


Deuxu Rybe  
Tyyriti



New Testament in Karajá (BR:kpj:Karajá)

**Deuxu Rybe Tyyriti**  
**New Testament in Karajá (BR:kpj:Karajá)**

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Karajá

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

---

PDF generated using Haiola and XeLaTeX on 11 Nov 2022 from source files dated 29 Jan 2022  
55ce0bcd-101e-52a3-984e-847027efe150

## Contents

MATEU . . . . .	1
MARKU . . . . .	47
LUKA . . . . .	71
JOAÕ . . . . .	113
AÕHEBO ROTÏÏNYRE . . . . .	145
ROMA-Ò . . . . .	189
1 ORITXI-Ò . . . . .	209
2 ORITXI-Ò . . . . .	225
ALATXIA-Ò . . . . .	237
EFESU-Ò . . . . .	243
FILIPÌ-Ò . . . . .	249
ÒLÒSÒ-Ò . . . . .	253
1 TESALONIA-Ò . . . . .	257
2 TESALONIA-Ò . . . . .	261
1 TXIMÒTXI-Ò . . . . .	264
2 TXIMÒTXI-Ò . . . . .	269
TXITU-Ò . . . . .	273
FILEMO-Ò . . . . .	276
HEBREU-Ò . . . . .	277
Txiau . . . . .	291
1 PEDRO . . . . .	296
2 PEDRO . . . . .	301
1 JUAÕ . . . . .	304
2 JUAÕ . . . . .	309
3 JUAÕ . . . . .	310
JUDAS . . . . .	311
APOCALIPSE . . . . .	313

## Mateu Deuxu Rybe Wihikỹ Tỹmyra, Mateu Tyyritidỹỹdu

<sup>1</sup> Kaheka Jesuisi Kristu labiehekỹ rare. Juhuu tahe Abraõ heka Davi labiehekỹ rare. Iribi tahe Davi heka Jesuisi Kristu labiehekỹ rare.

<sup>2</sup> Ibutumy ilabiebohonimy arelyykre. Juhuu tybynimy arelyykre idi iriõrenimy: Abraõ, Ijai, Ijaõ, <sup>3</sup> Juda, Peresi, (Peresi seriõre tahe Zera inire. Isereny tahe Tamara inire.) Esraõ, <sup>4</sup> Araõ, Aminadabe, Nasaõ, Salmaõ, <sup>5</sup> Boasi, (Raabe, Boasise rare.) Obede, Rute, Ijese, Kie.

<sup>6</sup> Davi hãwyy heka Uria hãwyy juhuu raremyhỹ. Iribi Davi-wana roire. Salomaõ iriõre rare. Tii heka Roaboaõ tyby rare. <sup>7</sup> Idi Abia reare. <sup>8</sup> Idi Asa, Josafa, Joraõ, <sup>9</sup> Uzia, Jõtaõ, Aka, Ezekia, <sup>10</sup> Ezekia, Manase, Amo, <sup>11</sup> Josia, Jekonia, taseriõre-wana.

<sup>12</sup> Babilonia-ribi rohonyreu tahe tiiboho reare, Jekonia riõre wahe: Salatieli (Tii Babilonia-ki reare.) Zorobabe, <sup>13</sup> Abiude, Eliaki, Azo, <sup>14</sup> Sadõki, Aki, Eliude, <sup>15</sup> Eliaza, Matỹ, Ijaõ, <sup>16</sup> Ijaõ tahe Jyje tyby rare, Jyje tahe Marie hãbu. Jesuisi tahe Kristu Deuxu deõdỹỹna rare.

<sup>17</sup> Kia labiehekỹ sõwe tahe 14my rare, Abraõ-ribi Davi-õ wahe. Tule labieboho 14my rasõwerenyre Davi-ribi Babilonia hãwã-õ ridyreny ixideewimy aõkõ rõte-õ. Ixyby 14my rasõwerenyre. Iribi tahe Jesuisi reare.

<sup>18</sup> Kawese heka Jesuisi Kristu reare. Juhuu Marie Jyje-wana roikremy rare. Tii ijadõmaule tahe Deuxu Tyytybytyhy ribõtõnyre. <sup>19</sup> Jyje hãbu õbiti rare. Tai tahe riixãwididỹỹnykemy rõhõtinyre. Kia õmo-õ rarybeõlere tuu. <sup>20</sup> Kiau ýju tamy rarybere tarasina-ki: —Jyje, Davi riõre riõre. Ahãwyy, Marie, biteõnyõke. Tuu bexihãwyynykre. Iriõre dori Deuxu Tyytybytyhy riõre rare. <sup>21</sup> Jesuisimy raninykre. Kiani tahe irybereny rare: tarasadu. Ibutumy iny dori iõraruna-ribi ritakre.

<sup>22</sup> Iwese Deuxu rybe ihetxiu rarybere wese tahe tii wiji riwinyre. Kia wese ihetxiu rybe rare:

<sup>23</sup> —Ijadõma rabõtõnykre. Iriõreni heka Emanueli rarekre.

Kiani tahe irybe-ki kia rare:

Deuxu iny-wana ratxireri.

<sup>24</sup> Iribi tahe Jyje dexixade tarasina-ribi. Iwese Inynyrỹreny tuu tamy rarybere wesemy heka tii riwinyre. Tii-wana ratxiõre. Tii aõhe risỹnyõre.

<sup>25</sup> Uladu reare xiery tii aõhe rira. Tamy niõ riwahinyre, Jesuisi wahe.

## 2

<sup>1</sup> Belẽ hãwã-ki Jesuisi reare, Judeia bedeki wahe. Iõlõ Herodi iõlõmy raremyhỹ. Iu reareu, Hãbu Erytyhy mahãdu taina tỹmyramy robirenyre. Tai tahe iõlõ mahãduõ doidenyde biura-ribi Jerusalẽ hãwã-õ. <sup>2</sup> Tiiboho rỹỹraxirenyre: —Iule judeu mahãdu iõlõ aõbo kaki reare. Jiarỹboho itainamy rabirenyre tahe nadoidenyde riwowydnyrenykemy. Kaiboho teerytenyte aõbo titxibo ratxireri?

<sup>3</sup> Tahe inyõ Herodiko relyyreny. Herodi kia roholareu sõwemy riõtĩnyre. Tule ibutumy Jerusalẽ hãwã mahãdu riõtĩnyreny. <sup>4</sup> Tahe Herodi ibutumy dinodu mahãdu ributunyre: Xiwena wahidỹỹdu dinodu, bedeki ywina tyyriti erydu mahãdu tule. Tahe tamyreny rỹỹraxire: —Titxibo Kristu reakemy tinybo tyyriti-ki rõritidỹỹmy roire? <sup>5</sup> Tiiboho tamy rarybere: —Judeia bedeki, Belẽ hãwã-ki wahe. Kia tahe ihetxiu rybedu riritinyre.

<sup>6</sup>—Kai Belē hāwā mahādu. Judeia bede hāwāō. Kai hāwā yja iny rōhōtinyre. Tahe inatyhy aōkō rare. Kai hāwā nihikỹre. Aribi dori dinoduō rōhōnykre. Wamahādu iòlòmy ronykre. Idinodumy rarekre, judeu mahādu dinodu wahe.

<sup>7</sup> Tahe Herodi heka biura mahādu ributunyre ibutumy iny-ribi wasimy. Tamy rỹrỹraxire: —Tiutxubo taina rōhōnyre? Tahe rirawyònyre. <sup>8</sup> Tamyreny rarybere: —Kaiboho boibenyke Belē hāwā-ò. Idi tahe uladu-ki mahabenykre. Iu wadee manarybebedenykre. Jiarỹ tule tamy arakre ariwowydynykremy. <sup>9</sup> Biura Hābu Erytyhy mahādu roholarenyre. Tahe roirenyre. Ryki ixityre tainamy robirenyre. Uladu tyrehekỹle ritoosònyre. <sup>10</sup> Iu tahe sōwemy reysarenyre. <sup>11</sup> Heto-ò rehemynyre. Tahe ralorenyre. Uladu rare Marie-wana. Tahe tatiowotim� reserenyre riwowydynykemy. Isaueny riraynyre tamy riwahinykremy: womati tỹrỹrỹhỹkỹ, hee aderòna, aderònatyhy wana. <sup>12</sup> Idi tahe Biura Hābu Erytyhy mahādu rarasinnyre. Deuxu tamy rarybere: —Kaiboho Herodi-ò bòòsebenyōke. Tai tahe rywitxira-di tasubedereny-ò ròòserenyre.

<sup>13</sup> Biura mahādu tahe ròireny rahudi tahe Inynyrỹ ŷju nade Jyje-ò rybemy, irasina-ki tamy rarybere: —Ariòre, ise-wana bidyke Egito bede-ò. Herodi dori uladu rubudỹỹmy ratxireri. Adeer tiu ararybekreule kaò bòòòseke. <sup>14</sup> Tai Jyjeboho rummy rahenyrenyre Egito bede-ò. <sup>15</sup> Herodi rubusỹtybymy tahe dòòsedenyde. Tii riwinyre iwese ihetxiu tyryiti rarybere wese, Deuxu rybedu rybe wahe:

—Wariòre Egito bede-ribi nadidyde.

<sup>16</sup> Herodi reburere. Biura Hābu Erytyhy mahādu dori tii riitxenanyre. Tai ibutumy uladu rirubunyre Belē hāwā-ki, tule ijō iòhò hāwā-ki. Ibutumy howỹtòdu rirubunyre inataō beòra ijōdikeki tahe rirubunyōre. Tai Jesuisi rirubunykeny risỹnyre, iwese tii rareu Biura Hābu Erytyhy mahādu tamy rarybere. <sup>17</sup> Kiamy ta rỹire iwese Deuxu rybedu rarybere wese, Jeremia wahe:

<sup>18</sup>—Rama hāwā-ribi ibru-ò iny roholamyhỹre. Rakeli rare. Tii robumyhyre. Ibutumy iriòre ituere. Tai robumyhyre. Inyō riteysanyōtyhy iriòre rurureki.

<sup>19</sup> Herodi tahe rurureu, Inynyrỹ ŷju heka Jyje rasina-ki tamy nade. <sup>20</sup> Tamy rarybere: —Bòòsebenyke judeu bede-ò. Uladu ise-wana bidyke. Kia rirubunykemy risỹnymyhyré tahe, rurure.

<sup>21</sup> Tahe Jyjeboho ròirenyre judeu bede-ò. <sup>22</sup> Akelau tahe Herodi riòre ronyre iòlòmy, tyby deròwomy. Tai kowa-ò Jyje ròirenyōre sỹmy. Rasina-ki rybeō rieryre Kalileia-ò ròirenykemy. Tai tahe ròirenyre kowa-ò. <sup>23</sup> Nazare hāwā-ki rasỹnyrenyre. Kia tahe riwinyre iwese Inynyrỹ rybedu ihetxiu rarybere wese: —Nazare ludu tii rarekre.

### 3

<sup>1</sup> Kiau Judeia bederahy-ki Joaō Sebedỹỹdu heka iny-ò rarybemyhỹre: <sup>2</sup> —Deuxu Iòlòna bededỹỹnana iòhòmy ratxireri. Aòraruna-ribi biixāwibenyke, bexirāhīke! <sup>3</sup> Joaōmy heka Isaia ihetxiu riritinyre kawese:

Inyō bederahy-ki ryryreri: —Inynyrỹ dee ryòbiti biwinyke. Biywinyke ryō tamy kanakemy. <sup>4</sup> Joaō kamelo radetyy ityy rare. Iròduty iwereysanare. Seihikỹle bidi-wana irỹsỹna rare. <sup>5</sup> Ibutumy iny tamy ròirenyre irybe-ò roholakemy iòhò hāwā-ribi, Jerusalē, Judeia, Jordaō bero-ribi wahe. <sup>6</sup> Tamy òrarunamy relyyrenyre rabedewomy tamy relyyrenyre. Tai tahe Joaō heka bero Jordaō-ki tii riratysebenyre. <sup>7</sup> Fariseu mahādu, saduseu mahādu doide tamy

riratysebenykemy. Kiau Joaõ tamyreny rarybere: —Hemylala mahãdu! Deuxu aõhõkỹmydỹỹnana-ribi mahenybenyõtyhy. Aõhe inatyhy? <sup>8</sup> Juhuu aõwiihikỹ widỹỹna biwinybeny. Tai tahe iny rierykre kaiboho aõraru-ribi inatyhymy texihutenynte. <sup>9</sup> Fariseu mahãdu, kaiboho tahõtinytenynte: Abraõ heka inylabiehekỹreny rare. Rikirãhĩõtyhy. Deuxu-ò kia aõ aõkõ rare. Tamy wikeki mana-ribi Deuxu heka Abraõ riòkòreõ riwinykre. <sup>10</sup> Woma tahe òwòru-ribi iòhòmỹ rỹira. Òwòru bederaty wiwihikỹ ihoõkeki, kedesekre. Rasõkre. Woma heka Deuxu aõhõkỹmydỹỹnana wese rare. <sup>11</sup> Jiarỹ bedi araratisebedỹỹnyra aõraruna-ribi texirãhĩteki. Jesuisi tahe Deuxu Tyytybytyhy-di ròratisebedỹỹkre heòty-wana riratysebenykre. Tii waratyre awityhymy ratxireri. Jiarỹ riwaixỹrunymy watxireri iwa ariwykeki. <sup>12</sup> Tii maixõmo risykre. Maixõmo ributunyre tahyna-ò. Irỹnysi heòty-di riworonykre. Heòty itueõna heka rare.

<sup>13</sup> Idi tahe Kalileia bede-ribi Jesuisi nade bero Jordaõ-ò. Tii Joaõ-ò nade riratysebenykemy. <sup>14</sup> Joaõ aõkõmy rarybere: —Jiarỹ tahe aõ aõkõ rare. Kai biwaratysebenyke. <sup>15</sup> Jesuisi tahe tamy rarybere: —Deuxu deewina heka kia rare. Rikiwinykre. Tahe Joaõ riratisebedỹỹre. <sup>16</sup> Ròratisebenymy rahudi tahe Jesuisi ròtuòra. Biuwetyy rarayre Jesuisi tahe bòtòenimy robire, itxi dobehede, Deuxu Tyytybytyhy wahe. Rybeõ biu-ribi narybede: <sup>17</sup> —Kia heka Wariòre rare. Jiarỹ heka sõwemy tukure. Idi wadeysareri.

## 4

<sup>1</sup> Idi tahe Deuxu Tyytybytyhy heka Jesuisi ridyre bederahy-ò. Tai Satanasi riurihikemy tamy rehemynyre. <sup>2</sup> Jesuisi heka 40 txumy, 40 rummy heka aõ rirỹsỹõhy bede idi rỹire. Sõwemy heka rama risamy tai raremyhỹ. <sup>3</sup> Taile Satanasi tamy nade. Tahe iurihiximy tamy rarybere:

—Kai inatyhy Deuxu Riòre ahãte wana heka mana-di orotxumy biwitxirany my biwinyke ahinamy.

<sup>4</sup> Tahe Jesuisi dirawyònyde: Deuxu Ritidỹỹna-ki kiamy roire: —Iny heka orotxudile aõkõ irumy rỹirakre. Ibutumy Deuxu rybedile iny irumy rỹirakre.

<sup>5</sup> Idi Satanasi heka Jesuisi ridyre Jerusalẽ hãwã-ò. Templo heto ratyre tahe ritidire.

<sup>6</sup> Tahe tamy rarybere:

—Kai inatyhy Deuxu Riòre ahãte wana heka katyre-ribi ixi-di behukre bede-ò. Buruõtyhy heka besekeki. Deuxu taỹju kiditeònykre aramykemy. Bede-ò aõkõ beseke.

Ijõ tyyriti rarybere:

—Deuxu araywinykre taỹju-di. Tii ýju kiditeònykre tebò-di ariijekemy. Awa ritõmonyõtyhy manatyre-ki.

<sup>7</sup> Jesuisi rirawyònyre: —Tyyriti tule rarybere:

—Deuxu uritere biurihiõke.

<sup>8</sup> Iribi Diabo heka Jesuisi ridyre hãwãlòõ-ò. Tamy ibutumy bede iòlòna riteòsinyre. <sup>9</sup> Tahe tamy Satanasi rarybere: —Beseke atiowotimy tahe biwawowydynykeki, adee kia ibutumy iòlòna wiwihikỹ ariwahinykre. <sup>10</sup> —Make Satanasi, Jesuisi rarybere: —Tyyriti rarybere:

—Deuxu-ò sohojile deàlana, wowydyna biwahinyke. Tiile bityhinykre. Deòdu tamy sohojile mabeke.

<sup>11</sup> Satanasi tahe Jesuisi-ribi rexitare. Ýju mahãdu rehemynyre iyrubudỹỹmy.

<sup>12</sup> Joaõ òludu heka ròtenawo-ki ritidira. Kia Jesuisi roholareu, Kalileia bede-ò ròsere. <sup>13</sup> Nazare-ribi rare Kafanaõ hãwã-ki rasỹnykemy rare. Tii

aho-ki iòhòre, Kalileia aho wahe. Zebulõ bede, Natali bede tahe inatxi hãwã ibiòwa rare. <sup>14</sup> Kia tahe Isaia Tyyriti rarybere wese:

<sup>15</sup> —Zebulõ bede, Natali bede, Jordaõ bero kowawe-ribi ijà-ò. Ahohokỹry-ki. Kai judeukõdu mahãdu bede rare, Kalileia wahe.

<sup>16</sup> Iny kowasỹ mahãdu bede luru-ki rasỹnymyhỹre. Tahe tiiboho loosònahakỹmy robirenyre. Bede lurusỹ mahãdu-ki tahe Deuxu loosòna ritoosònyre.

<sup>17</sup> Iribi tahe Jesuisi ritelenyre Deuxu rybe ritỹnynykemy. Tii rarybere: —Aòraruna-ribi bexiràhĩke. Deuxu Iòlòna bededỹñana dori iòhòmý ratxireri.

<sup>18</sup> Kalileia aho ijàti-ki Jesuisi rariamy ratximyhỹ. Tahe inatxi waxidu seriòremý robire, Simaõ Pedro, tule Andre ijõre. Rià-di utura rimymyhỹreny.

<sup>19</sup> Jesuisi tamyreny rarybere: —Bodoike wahemy. Iny wadee bimykre. Iwese araerynanykremý bimýke. <sup>20</sup> Aõwesele tahe tarià ririrenyre. Jesuisi-wana roirenyre. <sup>21</sup> Roirenyre tahe inatxi ijõ seriòre-ki Jesuisi robire. Txiau ijõni rare. Joaõ ijõre. Tiiboho Zebedeu riòre roire. Tiiboho talawo-ki ronyrenyri rià riywinyrenymý. Jesuisi tamyreny rarybere: —Wahemy bòdòike. <sup>22</sup> Tai tahe tybyreny ririrenyre. Jesuisi hemý ròirenyre.

<sup>23</sup> Ibutumý Kalileia bedey-ki Jesuisi rariamyhỹre. Tii judeu dohodỹña heto-ki rarybemyhỹre. Deuxu Iòlònamý ritỹnynymyhỹre, Rybe Wihikỹ Tỹmyra wahe. Sòwemy webinadu mahãdu riteytenyre. <sup>24</sup> Jesusimý iny relyyre ibutumý hãwã hãwã-ki Siria bede ibutumý. Tai tahe sòwemy webinadu mahãdu didydenyde tamy, iny tyytybybina-di, iny iumý imyremýrehekỹ wahe. Jesuisi ibutumý iny riteytenyre. <sup>25</sup> Iny sòwehekỹ riheludunyre, Kalileia bede-ribi, Debòwiò hãwã-ribi, Jerusalẽ-ribi, Judeia bede-ribi, tule Jordaõ bero kowa-ribi.

## 5

<sup>1-2</sup> Jesuisi inumý sòwemy robireu, raòwònyre hãwãlò ratya-ò, Ierydỹña mahãdu tamy doidenyde. Taile rierynadỹñnymý ronymyhỹre. <sup>3</sup> Deuxuko-ki iny ibinamý rỹimyhỹre. Kia iny tuu rexierymyhỹre, teysatyhy rare. Tii deysana sòwemy tai ratximyhỹre, Deuxu Iòlòna heka ihòròrenymý rarekre.

<sup>4</sup> Robumý rỹirakeki teysamý heka rỹirakre. Ibedewona wiòhedỹña rybe-di heka tamy kanakre.

<sup>5</sup> Kia inytyhy-di widee ratxireri, tii heka teysahymý ratximyhỹre. Ibutumý heka iny ihòròlehekỹle rỹirakre. Bede bede heka ihòròmý rarekre teysamý rarekre.

<sup>6</sup> Inyõ-ò òbitinamý lobiximý rurukeyi tahe teysamý rarekre. Deuxu tamý òbitina riwahinykre.

<sup>7</sup> Inyõ ruxetòena-di ratxireri. Deuxu heka tamý ruxetòena-di rarekre.

<sup>8</sup> Inyõ irayky òbitimý ratxikeki tii heka teysamý rarekre. Tii dori Deuxumý robikre.

<sup>9</sup> Inyõ ywina-di wiwana rỹirake teysamý rarekre. Ywinaõ-di rarekré, teysamý rarekre. Tii dori rarinikre: Deuxu riòremý.

<sup>10</sup> Inyõ aòhòkỹmý dỹñana reuròkeki, tii dori òbitimý rurukeyi, tii tulesỹ teysamý rarekre. Deuxu Iòlòna dori ihòròmý rarekre. <sup>11-12</sup> Inyõ umyreny relyykeki uritere hekỹle. Ruiybe-di umyreny relyykeki, aòhòkỹmydỹñana adee riwahinykre wana, tai tahe beysakre. Awimý mohòtinykre. Kai dori biu-ò mahenykre. Tai tahe beysakre kai awimý nohòtykre. Uritere nohòti rosarenyòmý. Kia wese tule Deuxu rybemy rybedu aòhòkỹmý rotỹnyre.

<sup>13</sup> Kaiboho heka saawesemý atximahãtenyde, jyyra wesemý wahe bede mahãdu iny-ò, kai dori kiamý bede mahãdu tewiòhenanyte. Auri tahe urihimýò biònonykeki tahe aurihixina heka urihimýòlemý releke. Kaa jyyra urile

idi adehu rÿikre iny ityre rariakremy. Awiòhedÿÿna biõnonykeki tahe aõma aõkõ beleke. <sup>14-15</sup> Kai loosõna wesemy atximahãte kabede mahãdu iny-ò. Hãwãõ hãwãlò ratyy-ki roikeki, tiu heka rexiwòõtyhy itÿnyhy roimyhÿke. Loosõnaõ iny ritoosõnykeki, tule heka tiu heka hyna rawoõ-ki roiõtyhy roosõmy. Aõma roosõnanymyhÿre ibutu heto jurajuramy heka ibutu ritxux-anymyhÿre. Aõma tamana-ki rÿimyhÿreki wahe. <sup>16</sup> Kaiboho tule amahãdureny awiwihikÿmy robikeki tahe Deuxu-ò wowydyna riwahinykre.

<sup>17</sup> Jiarÿ heka anaõde bedede ywina tuededÿÿmy. Anade aõ Deuxu dee rybedu tuededÿÿmy aõkõ heka anade. Anade ibutomy aõmybo rarybere widÿÿmy. Timybo rarybere wese heka ibutomy tuu rotÿÿnymy rarekre. <sup>18</sup> Inatyhymy adeeremy ararybekre bedede ywina tyyritiy-ribi tiu ijõ iõõtyhy ijõ sohoji ritiwedena yreõ reseõhykre. Ibutomy roikre aõhebo rotÿÿnymyhÿreò bedede konanako-txi. <sup>19</sup> Inyõ tõhõti urihimyo bedede ywina rosakeki rexide-lenymyhÿre iny ribedeerynyõkemy iny ritohonyõmyhÿkemy. Hãbu tahe iy-jamy Deuxuko-ò rarekre, Deuxuko-txi. Inyõ rityhynymyhÿre irybe iny rybedeerynymyhÿre. Tii tahe Deuxu Iòlõna-ò nihikÿmy rarekre. <sup>20</sup> Kaiboho aõma fariseu mahãdu-ribi awityhymy ixi-di mohõtinybenykeki. Tiu heka Deuxu Iòlõna-ò aròterenyõmy. Kaiboho heka awi toite aõma fariseu mahãdu judeu mahãdu wedu ratyre heka awi boibeke. Kia aõkõkeki tahe malòbenyõtyhy.

<sup>21</sup> Ihetxiu bedede ywina Tyyriti kawesemy rare:

—Kai inyõ birubunykeki heka iòwynamy iny akanarubunyke. Kia heka bedede ywina heka rare.

<sup>22</sup> Tahe warybe urihimyo iwitxira bedede ywina-ribi. Kai inyõ-ò maraykynykeki. Tai tahe brebunahakÿ-ki tate. Abiõwa-ò bininikeki itxÿtemy. Tamy kai marybekeki: —Kai aõki awiõre. Tai tahe akÿnadykre heka aõma ywisidÿÿduko-ò araòwynykre. Inyõ-ò kai makyaranykeki kai brebuna-ki texilòròmy tate. Kai inyõ deramy mabekeki uriteremy nodu tamy marybekeki, tai brebuna-ki tate. Inyõ òsÿny aradykre wisidÿÿdu mahãdu-ò. Inydee ratyhymy mabeke wana aõkõ raremy marybekeki, heòty kõnana bedede-ò make lau brebuna-ki tate. Iòhãrure kai heòty bedede-ò makemy. <sup>23</sup> Kaki aõma nieru xiwena wahidÿÿna-ò behemynykeki inyõ-wana aõhe widee botÿÿnykeki õhõti rosaõlemy ahãte wana. <sup>24</sup> Deuxu heka axiwenatewahinyõhyymyhÿte aõma xiwena bire-ki heka birike. Tahe biijeke aseriòre juhuhu. Aõma wana biòbitinybenyke widee marybebenyke. Iribi tahe tamy bedehemynyke xiwena wahidÿÿna-ò wahe tadevenymy atximahãte wana hãbuõ-ò. <sup>25</sup> Aõma tai tahe iòraru-ki aòludumy relera wana. Tamy behemynyke aõma timybo tii-wana widi biywinykemy timybo adeve biòwynykemy tamy heka bitobiny òrale heka aõma rieryke urenana. Aradyhemy aõma ywisidÿÿna ube-ò, idi ywisidÿÿna mahãdu, idi soldado. Tai tahe bitobinyke bedede rierykemy. <sup>26</sup> Inatyhy heka adee ararybekre ròtenawo-ki malòkeki. Tiu heka aòlòkòmy aõma iòwy mahumy adi ròhõtinykre. Idi mohõtinyke xiery heka bòhònyke.

<sup>27</sup> Juhuhu ihetxiu heka kaweselemy Tyyriti-ki rarybere:

—Òtaõmy!

(Bede ywina tyyriti-ki wahe.) Kawesemy heka jiarÿ rebedeerynywãhãre. <sup>28</sup> Òtamy ròhõtinykeki hãwyy-ò retehekeki òtamy rexinohõtinykeki. Tai heka tii òta òraru riwinymyhÿre. Iwese iwitxira hãwyy-wana roireri yrubule taheka òta òraru riwinymyhÿre. <sup>29</sup> Arueõ òraruna-txi araatykeki, bitake. Awityhymy biu-ki malòke kawesekile heka awire, Deuxusÿ-ò malòke wahe. Arue wiòmy tahe awiõmy biu-txi arue yremy heòty bedede-ò make tahe ibinatyhyre. <sup>30</sup> Tule eraõ bitake iurelemy era-di make biu-txi. Aumy ibutuhukÿlemy heòty bedede-ò



rakehärele tahe awiöre. <sup>31</sup> Bede ywina heka kawesemy rõhònnyre iny-ò juhuhu wahe:

—Inyõ tahãwyy ixi-ribi riteònykeki rixãwididỹnyra tamy tyyritiõ riritinymyhỹre. <sup>32</sup> Iwitxira rybe-di jiarỹ arukile tahe hãbu tahãwyy riatyra. Inyõ uritere òta òtana òraru-ki ixi-ribi tahãwyy riteònymyhỹre. Tai tahe hãwyy roimyhỹre hãbu witxira hãbuõ-wana. Tai tahe òta òtadumy kia hãwyy rininire. Adỹwe òraru-ò riteònyre tahãwyy riteònyre uritere òhyynaòle. Tai tahe tii adỹwe òrarunaòle heka riteònyre. Taile heka hãwyy hãbu witxiramy heka roimyhỹre ahãbuõ tahãwyy uritere hyynaòle riteònymyhỹre mahãdu hãbu heka. Tii heka tule òtadumy relemyhỹre hãwyy òta òtaduõ heka roireki wahe.

<sup>33</sup> Juhuhu heka ihetxiu kia wesemy Deuxu tamyreny kia rarybere:

—Taholatenynte kiamy Deuxu heka uritere ruiõmy atximahãbenyke Deuxu-ò biwinybenykemy marybemy bimyekeki biwinybenyke.

<sup>34</sup> Tahe jiarỹ heka kiamy adeereny ararybekre. Aõwidỹmy ixi-di nohõtirenõmy ryberenyõmy iwidỹmy. Ixinohõtidiỹmy ryberenyõmy ariwinykre biwawiòhenanyke wana biu-ribi wawiòhenanykre wana. Uritere heka tuu ryberenyõmykre kia wesemy biubrò-ki aõkõ biu dori Deuxu rynana rare. <sup>35</sup> Kiamy uritere rybeõmy bedebrò-ki aõkõ aõ biwinykemy aõmy mabekemy. Bede dori Deuxu idi ratximyhỹre rare. Deuxu waa elehyna dori bede rare. Jerusale hãwãbrò-ki tule aõkõ, tii dori Iòlòtyhy hãwã rare. <sup>36</sup> Tule arade-di widỹmy uritere dori rybeõmy kai dori awitxiranyõtyhy arade iura-ò ilyby-ò urile araykywydynakile tuu ratxike. <sup>37</sup> Aõma araykywydynakile heka tuu riwitxiranykemy idi tahõtinyinmyhỹte. Kiamy heka tarybemahãte iwidỹmy teuremy tarybemyhỹte: —Kohe, kiale ariwinykemy marybeke ada aõkõre, ariwinyõtyhymy aõbo. Kiamy marybekeki iratylemy kohe, aõkõre myỹ aõbo. Sõwemy marybekeki tahe aõbina binahakỹle heka rõhònnyre.

<sup>38</sup> Ihetxiu bede ywina rõhònnyre.

Inyõ witxira rueõ ribinadỹnykeki, iny witxira tule iwesele riwinyke. Kia widỹdu rue heka ribinadỹnyke. Rue heka wilemy raòwynyru rueõwilemy. Juhu tasỹ yjuòlemy raòwynyru. Jiarỹ tahe rebedeerynyre kawesemy.

<sup>39</sup> Inyõ aõbinamy adee riwinykeki, aõ aõkõ tamy biwinyke. Inyõ aòsỹny rihetenykeki, tule iwyò-di beake rehetenykemy. <sup>40</sup> Uritere aòludu-ò ixiòwydỹnyõmy. Aõma ijõ atyy ritakeki heka tule tamy arahana biwahinyke. Inyõ sohoji urixinamy adee ixidinymy reake wana. Inatximy heka tii-wana beake. <sup>41</sup> Inyõ ixitòedỹnyõmy aõ aribi riwykeki tamy biwahinyke tule inyõ aribi aõ huòtemy riwyke wana. <sup>42</sup> Abròrò itue-di tamy òkeseõmyke iwòde-ki ihuòtemy biwahinyke.

<sup>43</sup> Ihetxiu heka taholatenynte kawesemy:

—Kai heka aõ hãwã ludu mahãdu luumy heka madònymyhỹke.

Aòludumy aki ratxike wana tukumy atxike teramy atximahãke. <sup>44-46</sup> Tahe iwitxiramy ararybekre. Aòludu heka arabedeerynyke. Tukumy mabekemy inyõ aõhõkỹmydỹnyana rotỹnyreri wana tamy rexitòenyke. Kia wese-ki heka inytyby riòremy mabeke, Deuxu riòremy wahe. Tii dori juu riòlòdỹnyomyhỹre inybina tyre-ki wahe. Tule iny wiwihikỹ tule-ki aõma biu heka tule riteònymyhỹre. Aõma iny òbitikõdu mahãdu tule-ò. Tule òbiti mahãdu tule riteònymyhỹre. Aõma tukumy ahãte sohoji ratximyhỹre sohojile kai itukukeki. Kia heka awi aõkõ rare ibutumy òraru mahãdu heka tule riwinyremyhỹre kia wese. Aõma urile rybedỹ azry mahãdu, Aseriòre mahãdu. <sup>47</sup> Tulesỹ kia aõma aõkõ rare aõma tule heka judeukõdu mahãdu dori tule riwinyke,

tii Deuxu rierykõre. <sup>48</sup> Òbitityhymy kaiboho boibeke. Aõma jiarỹ heka arabedeerynyrenyleri biu-ki inytybyreny ratximyhỹre dori òbitityhy rare.

## 6

<sup>1</sup> Wahisidỹỹna wiwihikỹ kai hãburu-ki iwahisidỹỹõmy iny-ò. Kai itxerenaõnamy biwahinyhỹ. Aõkõkeki tiu inytybyreny-ribi bitaõtyhy aõwy awahisidỹỹna.

<sup>2-4</sup> Kai biwahinykeu iny adee aõmybo rurumyhỹreó. Uritere ibutumy iny itxerenamy iwahidỹỹõmyhỹ. Inyõ-ò òbiti mahãdumy riwisỹnymyhỹre mahãdu, kia wesemy heka tii riwinymyhỹre heka. Dohodỹỹmy heto-ki tuu riwinymyhỹre kia wesemy tule ibutumy hãwãhãkỹ ruetyawetyamy tuu riwinyrerimy ihỹre. Inatyhy dori adee rarybereri: —Aõma wahisidỹỹnatyhymy heka adee rarybereri: —Wahisidỹỹnaõ ixidee ritamyhỹre. Aõbo Deuxu wahisidỹỹnaõ heka adee riwahinyõtyhy. Tai heka Deuxu wahisidỹỹnatyhy riwahinyõtyhy tamyreny. Iny-ò aõ biwahinykeki, abiõatyhy-ò belyyõke. Wasilemy tamyreny awiõhedỹỹna biwahinyke. Iny tybyreny dori ibutumy aõna aõna ròtena rieryre aõwahisidỹỹna adee kidiwahinykre.

<sup>5</sup> Iwese budu mahãdu riwinymyhỹre wese uritere iwidỹỹõmyke. Kia wesemy aõkõ heka bexitõenyke. Ibuturu-ò rexitõenymyhỹre dohodỹỹna hetowo-ki heka lamamy rexitõenymyhỹre. Hãwãy-ki dori rexitõenymyhỹre ibutu itxerenakemy. Inatyhymy heka adee rarybere: —Atarasana ibutumy ritare.

<sup>6</sup> Inatyhy dori ritare.

—Bexitõenykeu malòke aheto jurawo-ò. Ixi-di biijõtòbònyke. Ierykõnamy boo ratximyhỹreò heka bexitõenymy myike. Ibutumy heka boo aõbo wasimy iny riwinyriwinymyhỹremy robimyhỹre. Tai-ki tahe bedeywina wihikỹ heka adee kidiwahinykre. <sup>7</sup> Tule rexitõenymyhỹreu uritere irehemy idi lamaõmy uritere ixityre ixityremy tamy ixitòedỹỹõmy wiwesewesehyyle. Judeukõdu mahãdu dori kawesemy riwinymyhỹre. Kiamy heka raraykywydynanymyhỹre aõma rexitõenyre ehehekỹkeki heka roholatyhykemy rohõtínymyhỹrenyre uritere widỹỹõmy iwese tii riwinymyhỹre wesemy. <sup>8</sup> Inytybyreny dori rierymyhỹre aõmybo iny raraykynymyhỹré. Inyboho heka rexitõenymyhỹreu rierymyhỹre aõmybo inyboho rurumyhỹrenyre. Iny sõwemy rarybemyhỹrele aõkõ heka tii roholamyhỹre. Aõmybo iny rurumyhỹrenyre, heka bexitõenybenyke. Kia wese:

<sup>9</sup> Wahareny, biu-ki atximahãte. Anityhy iny ibutumy rityhynykemy idi rierykemy watxireri.

<sup>10</sup> Aiòlòna heka wymy kanake. Iny adeewile riwinykemy iwese biu-ki relemyhỹre wese.

<sup>11</sup> Wadeereny txuõ txuõ rỹsỹna bidiwahinyke.

<sup>12</sup> Waòrarunareny õhõtí-ribi bitosadỹỹnyke. Iwese jiarỹ inyõ òraruna wanohõtí iribi aritosadỹỹnymyhỹre wese.

<sup>13</sup> Isiratyhy urihixina-ribi heka biwayrubunyke, òraruna-txi reseke lau. Aõna aõna bina-ò bidiwaijebenyke. Iòlòna, ruru, loosòna heka ahõrõhy rare. Kie.

<sup>14-15</sup> —Inyõ ariixãwidinykeki iaõbina-ribi. Tule inytybyreny riwaiixãwididỹỹnyke. Deuxu iòraruna-ribi riixãwididỹỹnyke. Beinareheke wana.

<sup>16</sup> Uritere aõsỹny bedeõtíidỹỹõmy iwese budu mahãdu rỹira wesemy. Tai heka byreõmy iny-di txuu rỹimyhỹremy widi retehemyhỹre. Wiji õhõtíreny reake. Heka raòwynyra inarehena irareny. <sup>17</sup> Tai narehereheu tainarehenytau. Atarina-di ahãtemy beake aõsỹny bisuhòke. <sup>18</sup> Inywitzira

heka anaeryōtyhy kai tenarehemy atxiteri. Inytybyreny sohojile heka rierymyh̄re. Inyō tuu robiōtyhy. Tii tahe ibutumy aōna aōnamy robimy wasimy r̄yiramy. Iribi tahe tii araòwynyrenyke.

<sup>19</sup> Aōna aōna butud̄ȳōmy tyy, nieru, aōna aōna wiwihik̄y butud̄ȳōmy kabede-ki. Txudòera dori ibutumy kabede-ki tuu riroxike aōna aōnamy. Aōma rarar̄ȳnyke iaōmyd̄ȳna ibutumy rarar̄ȳnyke rahuke. Wasidu tamy ralòke. Iaōmyd̄ȳna-ò sōweò wyremy rasinyke iaōmyd̄ȳna-di. <sup>20</sup> Kaki ibutud̄ȳlemy heka biu-ò bibutumyke. Tai heka txudòera aō riròōtyhy tule rararyōtyhy. Tule wasidu aōkō rare. <sup>21</sup> Titxibo aōmyd̄ȳnana ratxireri iwesele taheka arayky ratximyh̄re. Biu-ki aōbo ada bede-ki aōbo. Aōma bede-ki araykywydyna ratxireri wana heka kakile taraykywydynanyte. Biu-ki araykywydyna ratxireri wana heka biu-ki heka arayky aōmyd̄ȳna butuna raykywydyna ratximyh̄re. <sup>22</sup> Arue heka loosòna wesemy rare. Aumy dee it̄ȳnykeki heka aumy ibutumy loosòna-di t̄ȳximy rarekre. <sup>23</sup> Aumy ibinakeki tahe bede loro-ki matxike. Aumy bede lorohok̄y-ki ratxikeki ibinatyhymy matxike aōma butunale-di iny rōhōtinykeki heka tiu Deuxu iny riwiòhenyōtyhy. Deòdumy heka releōtyhy. <sup>24</sup> Inatxi wedu-ki dori inyō rityynyōtyhy. Tule heka tii roholamyh̄re ijō-ribi tahe tōhōti rosamyh̄re. Inyō Deuxu deòdumy releōtyhy tii aōna aōna butunadile rōhōtinymyh̄reki. <sup>25</sup> Tai heka tuu rarybereri adeereny. Uritere nohōtiyreōmy ar̄ys̄namy tule atyymy, idi matykynykemy. Aumy dori r̄ys̄na ratyre aōnityhymy ratximyh̄re. Tule aumy tyky ratyre aōnimy ratximyh̄re. <sup>26</sup> Nawii-di inihe betehenyke. Tiiboho heka aōdòworumy aōkō ròbròmyh̄renyke. Aramyre heka aōma tar̄ys̄na wydymy bederahymy tar̄ys̄na riyrubunyōhyymyh̄re heto nihik̄y-ò. Deuxu biu-ki ratximyh̄ré heka nawii riyrubunymyh̄re ir̄ys̄na tamy riwahinymyh̄re. Kaiboho tahe iratyretyhy toite, Deuxu-ki wahe. <sup>27</sup> Sōwetyhymy maraykywydynanykeki aōbohe, arumy aōbo arirarehemy mariake. Aōkōre. <sup>28</sup> Uritere nohōtiyreōmyke atyymy. Betehemyh̄ inihe noijasa-di. Aōma tiiboho heka raaōmys̄d̄ȳōhykymyh̄re. Tai tyky wihik̄y-di rexityynyke. Tyy ixidee riwinyōtyhy. Ihāre tahe Deuxu rityynywihik̄yre heka tyy wihik̄y tamy riwahinyreri. <sup>29</sup> Salomaō heka itykynihik̄yra. Ihāre tahe ityky heka awityhy aōkō rare. Noijasa heka iratyre ityky wityhyre. <sup>30</sup> Deuxu heka noijasa ritykynymyh̄re aōma noijasa heka wijilemy idi ih̄re. Biurasòmy tahe ixāwilemy reamyh̄re, risōra. Tii heka tyky adee kidiwahinykre. Nohōtiyreōmy tahe. Tii dori adee kidiwahinykre tykyō. Aityhyna dori ibutetyhyre heka. <sup>31</sup> Tahe raykyōmy nohōtiōmy titxiribibo ar̄ys̄na bidiwykré, atyky amona. <sup>32</sup> Tyhyd̄ȳdukōdu mahādu heka kiaòle heka ritōhōtid̄ȳnanyh̄re. Inytybyreny heka rierymyh̄re aōmybo tarumahāte. Ibutumy heka araerymyh̄re aōmybo taruterimahāte. <sup>33</sup> Tii Deuxu aōma d̄ȳnana sohojidile. Manaykynykeki heka tii ibutumy adee riwahinykre. <sup>34</sup> Uritere nohōtiyreōmy aōbo biurasò kia aōmyd̄ȳnana-ò. R̄yire dori sōwemy wiji biaōmys̄d̄ȳnanykremy biwinykré. Iwitxiramy bidiwinykre iwitxira aōmyd̄ȳnanaō.

## 7

<sup>1</sup> Iny witxira witxira-di ywisid̄ȳōkeki. Aywisid̄ȳna wesemy heka Deuxu ruxetòena-di ywisid̄ȳmy araywinykre. <sup>2</sup> Iny teywinymahāte wesemy heka Deuxu araywinykre. <sup>3</sup> Kai heka òwòru nihik̄yereò arue-ki ijōdikeki, aōherekibo bederarasi sōmo-di inywitxira rue-ribi bitakemy atxiteri. <sup>4</sup> Tai heka kai bobiōtyhy itarasa-ki wahe. Arue-ki dori òwòruere ijōdireki heka bobiōtyhy. Òwòru ere dori aòraruna sōwemy r̄yire wesemy heka atximahāte. <sup>5</sup> Kai

texibònyteri. Aòraruna-ribi juhuu bexiòbitinykre. Idi tahe aseriòre òraruna-ki biwiòhenanykre. Aòraruny-di rierymy idi òbitimy betehекре iòraruna-ribi iixitarasadỹmy biwiòhenanykemy.

<sup>6</sup> Inyõ heka utura rati mana wiwihikỹ-di rehuõtyhy aõma ixỹni herina-txi. Ixỹni dori ityre rariake tahe riõnonyke adee heka kanakemy wahe. Iwese tule heka ijòrsa-ò biwahinydỹõmyke. Rybewiwihikỹ hãbu òrarudutyhy-ò iwahisidỹõmyke.

<sup>7-9</sup> Rexitòenykeki tahe bitake kia. Biekeki tahe tai mahake. Bihetenyekeki heka iny adee riraynyke ijòtòbòna. Inyõ heka Tyby-ò rỹsỹnaõmy rexitòenykeki, mana heka tyby tamy riwahinyõtyhy. <sup>10</sup> Uturaõmy rexitòenykeki tahe hemylala binahakỹ tamy tiu riwahinyõtyhy. <sup>11</sup> Kai aõna aõna wiwihikỹ biwahinyke heka teerymyhỹte auladu-ò wahe, hãbu òrarudu hãrele wahe. Aõbo heka tule Deuxu inytybyreny inydeereny riwahinyke aõna aõnaõ wihikỹõ. Rexitòenykeki tahe tamy ariwahinyke. Inytybyreny heka tamy riwahinyke. Iwese iny wixira teyrubunymahãte wesele heka iny araywinymy ixi-di tahõtinyinmahãte wese. <sup>12</sup> Tule kai aõwiwi inyõ ixidee aõhebo rotỹỹnymyhỹkemy taruterí, kiaweselemy tamy botỹỹnymahãke. Kia heka Moisesi bede ywina tyyriti-ki roire. Kiale Deuxumy rybedu mahãdu ribedeerynyre.

<sup>13</sup> Biu bede wiwihikỹ kia ryỹjòhỹtỹdile malokre. Heòty ijò bederyijò heka nihikỹ rare. Iny kia ryhykỹ irumy rakre heka isirare iny ibute kowa ralore. <sup>14</sup> Irumy nonona ijò tahe ihỹtỹre. Ryy heka ihỹtỹre heka ibutere iny ryhỹtỹ-di ròtedu timy bede erydỹkõdu-ò.

<sup>15</sup> Bexiijebynyke kia mahãdu lau Deuxu rybe rybedu mahãdu tyhymy aõkõ lau wahe. Budoeni wese ratximyhỹre inytyhy wesemy. Tawo-ki tahe inatyhy rare ahola debore wesemy heka ratximyhỹre. <sup>16</sup> Teeryte wesemy ibederaty-ò betehেকেki. Hede-ò heka uvamy figomy tule tiu iratyõna. Iaõmydỹỹna-ò bierybenyke tibo roiré. <sup>17-18</sup> Tii heka bierybenyke aõhebo rotỹỹnyre wana teerytenyete. Tii heka riitxenanyõtyhy kia aõma matyaty matynimy heka tiu biitxenanyõtyhy. Tule betehেকেki, bierybenyke aõwesele heka òwòruõ bierybenyke. Aõma bederatyõ birỹsỹkeki tiu heka bederaty wihikỹõ arỹsỹõna òwòru ratyy-ò, bederatybinahakỹ tule rierykre. <sup>19</sup> Òwòruõ bederaty wihikỹmy raratynyõkeki heka hemy raòròròke rokoke. <sup>20-21</sup> Kia weselemy heka iny teerytenyete. Aõhebo iny rotỹỹnyke wahe. Tai tahe terytenyete heka, tetehetenyerikile wahe. Òbiti mahãdu wesemy rarybemyhỹre. Tahe òbitimy aõkõre ihỹre. Sõwemy heka iny tawedumy riwaninire. Ihãrele tahe biu-ò ralòõtyhy. Deuxu tyhydỹỹdule tahe ralokre. Ywisidỹỹnatxu heka kawesemy wadee rarybekre. <sup>22</sup> Sõwemy iny wahe: —Wanyrỹ, Wanyrỹ, jiarỹ hewa iny iwixira sõwemy aijyy rarybemy rare wahe. Tule heka tyytybybina reteònymy rarewãhã. Tule deytana wiwihikỹ heka ani-di rewinymyhỹre. <sup>23</sup> Tai tahe jiarỹ tamy ararybekre heka: —Kõrehe, kaiboho aõ wamahãdumy aõkõ atximahãte. Umy reerykõre. Waribi bexitake. Aòraruna dori sõwere.

<sup>24</sup> Kawesemy heka iny bede eryna ratximyhỹre. Warybe-ò roholamyhỹre heka aõwesele riywinymy rityhynymyhỹre. Kia hãbu hetowidỹỹdu wesemy heka rare. Iheto heka manatyre-ki riwinyre. Tii heka ibedeery sõwemy ihỹre. <sup>25</sup> Biu heka beòra heka rariamyhỹre. Iu tahe biu rejuxunymyhỹre, yhy rebonyre. Tahe tiu reseõtyhy manatyre-ki dori riwinyre. <sup>26</sup> Warybe ijohonadu tahe iwixiramy ihỹre. Hãbu itxỹte tahe warybe-ribi aõwesele tõhõtireny rosamy reamyhỹre. Kaiboho aõbedeeryhykỹ aõkõre roire. Tii heka iwese hãbu ãnarakile heto riwinymyhỹ wese rare. <sup>27</sup> Biu risebenykeu, beòra rareareu, yhy rebonyre tahe iheto reseke, ibutumy iõre, rahura.

28-29 Ibutumy heka Jesuisi rybe erysydÿÿna-ò bede riòtiinyre. Tii heka hãbu erysydÿÿdu wesemy tii ribedeerymyhÿre. Aõ judeu wedu wesemy aõkõ ribedeerynyre.

## 8

<sup>1</sup> Tiu hãwãlò-ribi dobehedeu, sõwemy heka iny ihemy doidemyde webi-nadu, tybina heka tamy nade. <sup>2</sup> Wowydyna rybe-di heka tamy rarybere: —Adee wikeki heka kai biwatetytenyke. Jesuisi dirawyònyde: <sup>3</sup> —Wadee awire, aratetytenykre. Tahe tamy tebò ritytere tamy reerimy. Itybinana riteytenyre. <sup>4</sup> Tahe Jesuisi tamy rarybere: —Boholakre, iny-ò uritere ry-beõmy.

Kai tahe makre xiwena wahidÿÿdu-ò xiwenaõ biwahinykre. Idi tahe Moisesi bede ywina raryberewesemy xiwenaõ biwahinykre. Kai tahe iny rierykemy heka yteny ratximyhÿre.

<sup>5</sup> Jesuisi Kafanaõ hãwã-ò rehemynyreu heka hãbu soldado weduõ tamy rehemynyre. Tii tahe Jesuisi-ò rexitòenyre: <sup>6</sup> —Wadeòdu biteytenyke raterenymy ratxireri waheto-ki. Sõwemy aõhõkõmy rotÿÿnyreri. Ibinatyhymy roireri rexisiranymy raratykõhykylemy. <sup>7</sup> Tai tahe Jesuisi tamy rarybere: —Rakakre, tai ariteyteytenykre. <sup>8</sup> Idi soldado wedu rariwyònyre: —Aõkõre, Kai hãbu wiwihikÿ tate. Jiarÿ tahe hãbu aõ aõkõmy jiarÿ watxiwãhãre. Waheto-ò manalòòtyhy. Karibile marybekre tamy taile taile tahe wadeòdu reytekre. <sup>9</sup> Jiarÿ dori reyryre. Jiarÿ heka tule hãbu weduõmy watxiwãhãre. Soldado heka sõwemy riwatyhynymyhÿre. Iny sohoji-ò aõma rakremy rarybemyhÿré heka, ramymyhÿre. Tule ijõ dee rarybemyhÿre: —Manake, tai tahe namyhÿde. Ijõ dee rarybemyhÿre wana: —Kai biwinyke, idi riwinymyhÿre. <sup>10-11</sup> Tai tahe Jesuisi ribedeòtiidÿÿnyre irybe-ki wahe. Tahe rarybere erydÿÿna mahãdu-ò: —Judeu mahãduy-ki tai rahaõre ijõ-ki kahãbu wesemy inatyhynana sõwerek. Sõwemy heka judeukõdu mahãdu rityynykre kia weselemy. Ijõ txu aõ wiji aõkõ heka riroxirenyke: Abraõ, Ijai, Ijaò-wana biu-ki heka riroxirenyke bede ludu iny mahãdu-wana. <sup>12</sup> Judeu mahãduõ ròirenyõkre tamy. Tule kaibohoõ tahe aõhetykrebo. Ijõ mahãdu dori bede lorohokÿ-txi resekre. Taiki tahe irynamy rurykre aõkõmydÿÿnana-ò. <sup>13</sup> Taita Jesuisi soldado dinodu-ò rarybere: —Makre, timybo wiji tahõtinyinmy tetyhynyte wesemy heka rarekre. Iurele teòdu reyttere.

<sup>14</sup> Iribi tahe Jesuisi Pedro heto-ò ralòre. Iriòre lahi heka aõma rubuna nihikÿ roimyhÿ. <sup>15</sup> Tahe Jesuisi rimyre tebò-di tamy rerire. Idi tahe irubuna iribi ròhònyre. Tai tahe tii ronyre. Ronymy tahe rÿsÿna riwinymyhÿ tamyreny. <sup>16</sup> Txiorotyhymy inyõ didyde aõma tyytybybina nihikÿ-di ratximyhÿõ. Iu Jesuisi sohoji rybeõmy rarybereu tahe aõwesele iribi ròhònyre. Kia webinadu didyde, tule reyttere. <sup>17</sup> Iwese ihetxiu Isaia ryberiti rarybere wesemy heka tule riwinyre:

Jesuisi riwinyre. Kiamy wahe. Wabinanareny waribireny riwyre. Inatyhyre.

<sup>18</sup> Iny sõwemy ributunyreu. Tai tahe taerydÿÿna mahãdu-ò tii rarybere: —Rokoirenyhe kanawe-ribi ijà-ò. <sup>19</sup> Tai judeu mahãdu, bede ywina bederydÿÿduõ tamy rarybere: —Awana arakre titxibo makreu heka ahekile anakre. <sup>20</sup> Tahe Jesuisi dirawyònyde tamy heka rarybereri: —Ijòrò heka ihãloo dire, ibÿtÿ dire, nawii bÿtÿ isÿ dire. Tahe jiarÿ, Deuxu Riòre Hãbutyhyhykÿ wahe, wahetoõre, waherinaõre. <sup>21</sup> Ka ijõ iheludu mahãduõ tamy rarybere: —Wanyrÿ, waha heka rurura. Tai heka juhUU arituunykre. <sup>22</sup> Tamy rarybere:

—Manake, wijile biwaheludunye. Rubuõmy rÿira, rubu mahãdu heka rituunykemy idi ratxireri.

<sup>23</sup> Jesuisi hãworo-ki ronyre tahe reurore. Ieryredÿÿna mahãdu riheludun-  
yrenyre kia lawokile. <sup>24</sup> Ahobetya-ki tahe yhy debore nihikÿ tamyreny  
rehemynyre. Tahe òbò nihikÿmy resemihÿre. Uritereribile yhyhykÿ bee  
riòbònyra hãwò rilÿmynye iòhòtyhyre. Jesuisi tahe ròròmy roimyhÿ iu.  
<sup>25</sup> Tai tahe ierydÿÿna mahãdu heka riixixadÿÿnyre. Tamy raryberenyre: —  
Biwayrubunye, Wanyrÿ. Aòkòkeki, rukururenykre. <sup>26</sup> Jesuisi tamyreny  
rarybere: —Aòherekibo kaiboho taberutenyteri? Aityhyna sòwe aòkò atx-  
itenyteri. Jesuisi tahe rÿimy reare. Yhy debure-ò, òbò-ò rarybere: —Biyrkye,  
bede binahakÿ. Tahe aòwesele ibutumy riyrira. <sup>27</sup> Ierydÿÿna mahãdu urile  
ribedeòtiinyre. Tiiboho raryberenyre: —Aòhãbubo tii ihÿre. Òbò, tahe  
yhy-wana tamy roholare. Iwese tii rarybere wese rityhynyre. Irybemynale  
riwinyre.

<sup>28</sup> Kalileia aho ijò weribi ijana-ò ritehemynyre. Kowa bede heka Kadara  
inire. Tule hãbu inatxi heka tyytybybina-di tai rasÿnyrenyre wabedewo-ki.  
Kiary-ki tahe ibutumy iny ruberure. Iribi tahe ròhònymy reare. <sup>29</sup> Aòwesele  
heka ryrymy roirenyre Jesuisi-ò rarybekremy: —Aòwe wadireny tate, Deuxu  
Riòre? Kai aòbina binahakÿmy wahòròdÿÿõmykre. <sup>30</sup> Tahe kowa-ki ixÿni  
juramy riroximy rÿimyhÿ. <sup>31</sup> Tyytybybina tahe Jesuisi-ò rexitòenyre: —  
Biwatòenybenykeki, ixÿni jurawomy aralorenkyemy biwateònyke. <sup>32</sup> Tahe  
Jesuisi rarybere: —Bòibenyke hãbuwo-ribi. Tahe ròirenyre ixÿniwo-ò. Ixÿni  
jura tahe ibutumy rejuxunyre ijòtira-ribi. Berawo-txi tahe rabòròròre.  
<sup>33</sup> Ixÿni-di itxeredu mahãdu tahe hãwã-ò roirenyre ijyymy. <sup>34</sup> Kia hãwã ludu  
mahãdu tahe roirenyre Jesuisi-ò itxeremy. Tai tahe tamy rarybere ibede-ribi  
ròhònykemy.

## 9

<sup>1</sup> Ribererenyre aòma hãwò nihikÿro-ò reuròrenykyemy kanawe-ribi ijà-ò.  
Tai tahe Jesuisi tahãwã-ò rehemynyre. <sup>2</sup> Tai tahe didydenyde weryrybòò  
byre-di idi betyky-di ramyremynymy roimyhÿre. Tahe hãbu mahãdu inaty-  
hyna Jesuisi rieryreu heka hãbu dee rarybere: —Waexi, beysake, aòraruna  
dori reixãwididÿÿnyra. <sup>3</sup> Tai tahe ritidÿÿna bederydÿÿdu mahãdu retehereri.  
Ixideele heka rarybemahã: —Kia heka ibinamy Deuxumy rarybereri. <sup>4</sup> Iyky  
Jesuisi rieryre tahe tamyreny rarybere: —Kai aòbo ibinamy waki tahateri  
arayky-ki. <sup>5</sup> Timybo heka kaiboho tahòtinyteri. Aòma iòraruna ariixãwidinyke  
aòbo ada iumy ariteytenyke aòbo? Aòbohe isiratyhyre wadee tahòtinyte wahe.  
<sup>6</sup> Deuxu-ribi waruru dire. Kabede-ki heka òraruna ariixãwididÿÿnyke jiarÿ  
heka Deuxu Riòre Hãbu tyhyhykÿ rareki wahe. Tamy rarybekre: —Myike,  
abyre bimykre ta mariakre asÿ-ò. <sup>7</sup> Tai tahe hãbu aòwesele rÿimy reare. Tahe  
taheto-ò rare. <sup>8</sup> Tahe bede insòwetyhy heka ribedeòtiidÿÿnyre. Deuxu heka  
wowydyna riwahinyre. Tii iny-ò ruru riwahinyreki wahe.

<sup>9</sup> Jesuisi iribi rariamy rare. Tai tahe tii Mateu-wana heka witxi reare ryki:  
—Jiarÿ heka nieru butudÿÿna heto-ki ranymahã. Jiarÿ rebutunymahã aòma  
inyòwydÿÿna heka rebutunymyhÿre. Iu Jesuisi wadee rarybere: —Manake  
waerydÿÿnaõmy heka beleke. Tai tahe jiarÿ tii-wana heka rare aòwesele heka  
ihemy rare.

<sup>10</sup> Tai jiarÿ retobinyre kanakemy waheto-ò. Waheto-ki riroxikemy taery-  
dÿÿna mahãdu-wana. Tai tahe sòwemy heka iny waery mahãdu dòidenyde,  
òrarudu nihikÿ mahãdu wahe. <sup>11</sup> Tule heka fariseu mahãduõ tai ratx-  
imyhÿ. Tahe Jesuisi erydÿÿna mahãduõ kiaò-ò heka rarybere: —Aòherekibo

Jesuisi òrarudu nihikỹ mahādu-wana riroxireri? <sup>12-13</sup> Tai Jesuisi roholarehe tamy rarybere: —Aōma òhotibedu heka, webinadu mahādulemy aōnityhymy rarumahāre. Òhotibedu-ò kanakemy. Binadu mahādu-ò tahe tiu ararariòwyòtyhy aōma òbiti widỹỹdu mahāduòle heka anade. Warurumy rurumyhỹle mahādu ariwiòhenanykemy anade. Aō awihikỹmy ixi-di rōhōtynyreriò aōkō wahe. Deuxu Ryberiti-ki tahe kaweselemy roire:

Ixiwe heka wadee awiōre aruxetòena wadee awire. Kaiboho bierybenyke aōbo katyyriti rare.

<sup>14</sup> Tahe Jesuisi-ò rarybere Joaō eryna mahādu: —Aōherekibo Joaō Sebedeỹỹdu kia erydỹỹna mahādu renarehemyhỹre rexitòenykreu. Fariseu mahādu erydỹỹna heka tule heka renarehemyhỹre. Ihārele taheka aōherekibo abedeerydỹỹna mahādu heka tiu iwesemy riwinymyhỹre. Aōherekibo ka.

<sup>15</sup> Taita Jesuisi dirawyònyde: —Iu iny inyhāwyymy roimyhỹreu heka iny reysamyhỹre. Aōma kia weryrybò hāwyw kialiina heka teysamy ratxirerimy ihỹre. Tiu rirubunyòhymyhỹre teti-ò. Tahe aōutxumy tahe weryrybò hāwyw heridu heka inyō ritakremy ratximyhỹre. Iu tahe renarehekre heka.

<sup>16</sup> Uritere inyō deratyby ritòbònyòtyhy tyytỹmyra-di. Inyō itòbòna tỹmyra-di ritòbònykeki, raykake heka iura ranihikỹke. Aōma iwesele rare aōma vỹ tỹmyra iròdutyy tỹmyrahakỹle ritidikreu. Aōma itỹmyra-ò heka iròdutyy itỹmyrahakỹle raykake. <sup>17</sup> Aōhe tiu vỹ tỹmyra iròdutyy tyby-ò rihynyòtyhy. Inyō kia wesemy riwinykeki taheka raykake heka rejuxunykre irube. Ihyna heka rabinake. Vỹ wihikỹ taheka aōma iròdutyy tỹmyra hyynawo-ki ka awimy rỹike.

<sup>18</sup> Iu dohodỹỹdu hetoō bede erydỹỹduō heka Jesuisi-ò nade tariòre rurureki wahe. Tai ta Jesuisimy reālāre tamy heka rarybere: —Aōma wariòre rarurura wahirari wahe. Kai waheto-ò manake wariòre ruru-ribi biixixanykremy. <sup>19</sup> Tahe Jesuisi taerydỹỹna mahādu-wana roirenyre tii wana wahe. <sup>20-21</sup> Tahe hāwyw rōhōtynyre heka: —Jikarỹ heka ityky reroti-kò karirikrekule karekytekre.

Tii dori ihālubu rihyòhyy raremyhỹre waò inatxi reurò beòramy. Iòhòm y iribi reare. Ireroti wereysanakile rimymy resere. <sup>22</sup> Taita Jesuisi ròðsem y reare. Tuu robire tamy rỹraxire: —Lerỹ, awi heka rare. Aityhyna heka arateyteynyre. Inatyhymy teyteta. Tai tahe hāwyw aōwesele reytemy reare.

<sup>23</sup> Idi tahe aōwesele rehemynymy reare. Judeu wiuna bedeerydỹỹdu heto-ò rehemynyre. Tai heka hāwyw sòwemy robumy rỹimyhỹ rubura-ki rawiunymy rỹimyhỹ. <sup>24</sup> Tai tahe Jesuisi tamyreny rarybereri: —Bòibenyke hewahe. Hirarihikỹ heka ruruòhyky roireri. Urile heka rōrōmy roireri. Tahe iny rutxuenyre. <sup>25</sup> Tai iny sòwemy ròhònyre iribi. Tahe Jesuisi ralòre titxibo hirarihikỹ roireriò. Debò-ki rimyre tahe riteytenyre. Rexixare ixyby. <sup>26</sup> Ibutu bede bedemyhe inina-ò roholare. Kia deytēna riwinyraò.

<sup>27</sup> Tahe hābu ruetà inatxi Jesuisi riheludunyre heka. Kia hetoy-ribi wahe. Tamy heka raryberenyre: —Kai heka iòlò Davi riokore tate. Tai tahe ruxetòena-di biwawotòenyke. <sup>28</sup> Idi tahe Jesuisi taheto-ò ralore tai rasỹnymy ratximyhỹò. Iny mahādu ihewomy rare tahe ralòre. Tamy rarybere: —Inatyhymy aōbo tetyhynytenyte, ixyby arāitxeredỹỹnykeò. Ti-iboho raryberenyre: —Kohe Wanyrỹ, retyhynyre. <sup>29</sup> Jesuisi rarybere: —Ainytyhynadireki arue tabita. Aōwesele robirenyre. <sup>30-31</sup> Jesuisi heka rarybere tarurumy tamyreny uritere ijyyòmykremy. Tai tahe aōma ròirenyre ibutuko relyyrenyre.

<sup>32</sup> Idita tako-ò rexidorunymy reareki tasỹ kia hābuò-txi reare tyytybybina-di ratximyhỹò. <sup>33</sup> Tahe Jesuisi-ò didydenyde hābu irybeòna kia tyytybybina òraru-ki wahe. Jesuisi tuu òlòdỹỹnyre iribi. Iule tahe hābu aōwesele heka

rarybere iroo-ki. Kia iny ibutumy ribedeòtiidỹnyre. Timy heka rarybeòhyyre iko-ki juhoo raremyhỹu. Tuu rabiòhe iwesedyỹnadumy. <sup>34</sup> Idi tahe fariseu mahãdu rarybere: —Tyytybybina-di ratximyhỹre. Tai heka tyytybybinahakỹ reteònymyhỹre iny-ribi. Ihãrele heka Satanasi-di ihỹre. Tyytybybinatyhy wedu heka ratximyhỹre.

<sup>35-36</sup> Idi tahe ibutumy hãwã hãwã-di Jesuisi rariamy rare ròbedeerydỹmy. Judeu mahãdu dohodỹna heto-ki relyymyhỹre, Rybewihikỹmy. Tai Iòlòna kia ritỹnynymy tuu relyymy. Ibutumy iny bina bina kia heka riteytenyre. Iny nade ihewo-ribi. Sòwemy heka iny aõna aõna bina binahakỹ riwinymyhỹre idi rỹimyhỹ. Tixibo rakre heka rieryòhykymyhỹre ta aõna aõna òraru-ki idinoduòreki wahe. Tai tahe Jesuisi riwotòenymyhỹre ibutumy tiiboho dori budoeni wese ratximyhỹre, itxeredu ihoòreki. <sup>37</sup> Tai tahe taerydỹnana mahãdu-ò Jesuisi rarybereri: —Iny heka maixòmo sòwehekỹ rỹira wese heka iny ratximyhỹre. Aõma ibutelemy heka arixidu rỹira. <sup>38</sup> Bexitòenyke Deuxu-ò. Tii heka bederomy maixòmo rỹira wedu rare. Bexitòenyke tamy aõbo maixòmo arixidu-ò kiditeònykemy. Irybe-di heka raaõmysỹdỹkre ibedero-ki. Ibutu bedero-ki heka idi raaõmysỹdỹkre.

## 10

<sup>1</sup> Ributunyre Jesuisi aõma tawa-ò inatxi reurò kia bede erydỹna mahãdu. Tamy heka ruru riwahinyre. Aõma tyytybybina riteònykemy. Tule tamy riwahinyre ibutu binana deytana heka riwahinyre tamy.

<sup>2</sup> Kia heka tadeòdỹmahãdurenynimy ararybekre. Juhoo heka Simaõ Pedro. Juhoo heka Simaõ inire, ihewomy tahe Pedromy naninide. Andre ijõ. Tii heka Pedro seriòre rare. Txiau, Joaõ-wana heka Zebedeu riòre rare: <sup>3</sup> Filipi tasỹ ijõ rare. Idi tahe Bartolomeu ijõre. Tome ijõre. Mateu ijõre, jiarỹ wahe. Jiarỹ nieru tarasaduõ rare, imposto tarasadu wahe. Ijõ Txiau tasỹ Afeu riòre rare. Tadeu ijõre. <sup>4</sup> Simaõ ijõre. Tii Kana bede luduõ rare. Judasi Isariò ijõre. Tii heka Jesuisi tyhedỹdu rare.

<sup>5</sup> Jesuisi taerydỹna mahãdu waòinatxi reruòmy riteònyre. Tamyreny rarybere: —Judeukõdu mahãdu-ò aõkõkre reteònyre. Aõma Samaria mahãdu hãwã heka ralòòhyymyhỹre. <sup>6</sup> Kaiboho heka bòibenyke judeu mahãdu-ò sohojile. Tiiboho Israeli riokore mahãduò ihỹre. Aõma budoeni reòsamyhỹre mahadu wesemy tiiboho ratximyhỹrenyre. <sup>7</sup> Aõma tamy marybebennyke: —Deuxu Iòlòna biu-ki heka aõwesele kedehemynykemy ihỹre. <sup>8</sup> Webinadu mahãdu heka biteytenyke. Aõma iny rubu-wana witxi beakeki, biixixadỹnyke rubu-ribi. Tykybina yjy yjyhykỹ-ribi iny biteytenyke. Tyytybybina inywo-ribi biteònyke. Iwese aõ tetate wese iòwykõ heka ijõ-ò biwahinymahãke, iòwykõ wahe. <sup>9</sup> Uritere nieru wydyõmy, womati tỹrỹrỹhỹkỹ nieru aõkõ, prata womati nieru aõkõ, cobre womati nieru aõkõ wahe. <sup>10</sup> Aõma anieru hyna nihikỹ wydyõmy, awa ijõ wydyõmy, ijõ dera wydyõmy. Aõma òwòru arirana wiòhedỹna wydyõmy. Aõmysỹdỹdu taòwy riwykre. Kia òbitire. <sup>11</sup> Hetoõ malòke. Kia heka arayrubunykre. Adee riwahinykre ibutumy aõmybo rarumyhỹkre. Iu hãwã-ò malokreu, hãbu ityhydỹdu mahãduò biijekre. Taihyy bonykrehyy tahe iwitxira hãwã-ò iribihyymy makre. <sup>12</sup> Iu hetoõ-ò malòkeu Deuxu ywina tamy marybekre, Deuxu deysanamy wahe. <sup>13</sup> Kai awimy ityhydỹdu hetomy rỹike wana, biwahinyke aalàna tamyreny. Kai òbitimy aõkõ atxiteri wana tahe uritere tamy Deuxu deysanamy tamy wahidỹõmy. <sup>14</sup> Aõma tii arybe-ò roholaòkeki, kai hãwã-ribi bexitake taheto-ribi wahe. Tahe iribi bòhònykeu tahe awabrybyxi biubỹtỹnynymy bòhònyke. Tii tahe tamyreny rioimyhỹre. Aõma tamyreny ibinatyhykre. <sup>15</sup> Inatyhymy heka



adee ararybekre. Sodoma hãwã mahãdu, Komora hãwã mahãdu inatyhymy heka ibinare tamyreny tahe isiraõkre aõhõkõmy dõyõnana wahe. Aõma kia hãwã arybe-ò raholara heka kia ratyre heka tamy isiraõkre. Kia hãwã tahe aõnityhymy aõhõkõmy rotõyõnykre. Ywisidõyõna txu heka rõyekreu wahe.

<sup>16</sup> Iwese budoeni ijõrõ aholay-ki rõyikre wese heka kaiboho boibekre. Hemy-lala erydõyõna wesemy heka maraykynykre. Idi tahe sõwemy aõma ywina-di maraykynybenykre bõtõewesena-di. <sup>17-18</sup> Uritere inatyhy heka aramykre ararõtentykre dohodõyõna hetowo-ò adi ralokre. Waõraru-ki heka bede dinodu mahãdu heka araywisidõyõnynakre. Judeukõdu mahãduko Rybewihikõ Tõmyra rarybekre. Tiiboho arahãtenykre. <sup>19</sup> Aõ heka belyyke ikoreny ibutumy roholakemy. Aramykeu heka uritere nohõtõmyke aõmybo marybekremy ywisidõyõna-ki wahe. Bede heka ariwahinykre rybe ibededõyõnanau. Ry-beõmyke, urile rybeõmyke. <sup>20</sup> Kai ixivanale aõkõ marybeke. Aõma Deuxu Tyytybytyhy arãwiõhenanymyhõreny. <sup>21</sup> Inyõ heka taseriõre rityhenykre. Tybyõ tule tariõre rityhenykre. Aõma iriõre tasõ tyby-ò icy reakre idi rirubun-nykre. <sup>22</sup> Ihyy ibyrymy heka aluu aõkõkre waõraru-ki. Ibutumy iny deramy rarehyyke waõraru-ki: Inyõ tule õbitimy rarekreki, ikonanatxu-u, Deuxu Iõlõna-ò ralokre. <sup>23</sup> Tahe anatakre. Aõma hãwãhãkõyõ-ki atxikeki mahenykre ijõ hãwã-ò. Ihewoludu ikonana hãwã hãwãhãkõyõ-ribi behemynyke-ribi tahe adõõsekre. Judeu hãwãhãkõyõ-ò behemynykrekõule tahe adõõsekre, jiarõ Hãbutyhyhykõ wahe.

<sup>24-25</sup> Aõma bederydõyõdu mahãdu tahe aõma ierydõyõna mahãdu ratyre rare. Tule iwedu deõdu ratyre heka ihõre. Iwesereny tahe boibebenykre. Tahe awedu tate. Inyõ tahe riwarinimyhõre Satanasi, Belisibu wahe raremy. Tahe iwesele heka iny araninykre waweselemy, ibinatyhyre wahe. <sup>26-28</sup> Jiarõ adee wiji relyyleri. Biurasõmy heka tuu bedelyyke ibutu ijohonanamy adeereny relyyleri. Wasimy wijirumy adeereny relyyke. Biurasõmy tahe ibutu ijohonanamy tuu belyybenykre. Uritere ilau brebuõmy. Aõbo wasimy rõyire heka ibutumy ratõnykre. Uritere ilau brebuõmyke. Adeelekre rirubun-nykre atyytyby ta rirubunyõtyhy. Iruruõre dori atyytyby rirubunyké. Deuxule tahe bityhynyke. Tii dorihe iruru-di heka rare. Tii bede luru-txi heka atyytyby bede luru heõty-txi heka adi rehuke. Bityhynyke idile maraykynyke. Hãbu lau brebuõmy hãbu aõbina bina riwinymyhõre lau brebuõmy. <sup>29</sup> Nawiiõ iny riwymyhõre womati nieru iyja-di, iõwy riõre iny heka riwymyhõre. Ibutumy heka Deuxu nawii rieryre sohoji sohojimy. Tiu heka Deuxu rieryõhyymyhõre nawii sõmo rurumyhõre heka tiu rieryrykõmy idi reteheõtyhy. Kiawese aõbo tahõtõnymahãte. Aõkõre, inatyhymy idi retehemyhõre. Ijõ rurumyhõre heka tuu robimyhõre. Aõma Deuxu heka anaerymyhõre nawii sõmo ratyre heka aumy rierymyhõre. <sup>30</sup> Ara erymy heka aõma arati-ki tiwesebo radeti rõyimyhõre heka rierymyhõre. <sup>31</sup> Breburenykõmykre, kaiboho dori nawii ratyre Deuxu-ò toite. <sup>32-33</sup> Kai marybeke: —Jiarõ retyhynyre dori tahe umy arelyyke. Jiarõ heka umy ararybeke inynyrõ dee biu-ki wahe. Iny sõwehekõyõ-ki riwatõnykeki tule aratõnyke jiarõ Wahako-ò. Jiarõ heka suõ anade.

<sup>34</sup> Aõ ywina wydymy aõkõre heka anade. Jiarõ heka ywina aõkõre diwyde. Bedejeiejidõyõmy anade iribi wadee wou rõyikremy. Hãbu heka tybe õludumy rarekre.

<sup>35</sup> Tule hãwy tadi õludumy arisynykre. Tule iriokorese tariõrelahi õludumy arisynykre. Aõma inyõ õludu heka tasõ mahãdu õludumy rarekre.

<sup>36</sup> Boluu adireny boreny heka boibekre. Kia luumy heka boibekre. Tai tahe iratyremy boibekre aõkõkeki tahe waluuõkeki tahe wahõrõ mahãdumy aõkõ boibeke.

37-39 Kaweselemy boibeōkeki. Tai tahe kai wahōrō mahādumy aōkōhe mabekre. Aōma biyrurubunutyhykeki tahe kai ihārele aōkre. Aōma kai waòraru-ki aōhōkỹmy botỹỹnykeki wadee waaōmysỹdỹỹ òraru-ki inyō anarubunyekeki aōhe adee rutỹỹnykeki. Tai tahe aumy ròhònykre inyō tasỹ-ò aradykeki iwese tii tasỹ-ò riwadyra wesele heka aradykre.

40 Tii riwadyra wana Deuxu heka ridymyhỹre riwateònyreki wahe. 41 Deuxu rybeduō bidybenyekeki. Tii Deuxu-ò arāwahinykre. Deuxu adee uriiōno kadiwahinykre. Adeereny kidiwahinykre. Wahisidỹỹna ritakre wese heka tule kai bitakre. Adeereny ararybekre. Deuxu hōrō mahādu heka bimymahābenyeke. Aheto-ò bidybenyeke hābuwi ihỹreny. Tiibohe dori wese uriiōno ritarenkykre wesele kaibohe bitabenyke. 42 Kai uladu-ò bemonāō biwahinykeki bedi imonamy. Tai tahe kanakre inatyhymy adee aō kidiwahinykre. Kai waòraru-ki ityhydỹỹdu-ò bee biwahinykeki, inatyhymy heka aōwy adee kanakre.

## 11

1 Jesuisi heka rexihure aōma taerydỹỹna mahādu waòinatxi bedeerydỹỹna-ribi. Kia bede ywina tamyreny riwahinyre. Rexihureu tahe rare ròhònyre iribi hāwā-di. Aōma rybe ritỹnydỹỹmy rakremy hāwā hāwā-ò.

2 Idi tahe ròtenywokile heka iu Joaō roimyhỹ. Aōbo Jesuisi tahe iu aōna aōna wiwihikỹ ritxienymyhỹre heka Joaō tamy roholare. Ròtenywo-ki roimyhỹ-ribi. Idi tahe Joaō taerydỹỹna mahādu riteònyre Jesuisi-ò dỹỹraximy: 3 —Kohe, anaraòdenyde tate. Aōma Deuxu deòdỹỹna wahe kanakre aōbo ihewo-ribi. Ariraòrenykre aōbo urihimyò. 4 Tai Jesuisi rirawònyre: —Aōma hòòsebenyeke ixybyle Joaō-ò. Belyybenykre ikò aōna aōna wiwihikỹ rewinyre arureny-ki tule tabite wamyreny. 5 Aōma iruetàhàkỹ heka. Reruedỹỹnymy rare wahe. Itiere tasỹ retinywāhāre dinoduhukỹ ity reytemyhỹre. Aōma ijō Rybewihikỹ Tỹmyra roholaòhyymyhỹre tasỹ tule reijohonadỹỹnyre. Aōma rubu tule rubu-ribi reixixadỹỹnyre. Rybewihikỹ Tỹmyramy heka retỹnydỹỹnyre ibutu iny-ò wahe, iny aōkō mahādu-ò wahe. Tule Joaō-ò marybebenyeke kaweselemy wahe. 6 Maratyhybenyekeki, beysabenyke.

7 Iribi ròhònyreu tahe Jesuisi heka rarybere Joaō bededỹỹnanamy. Aōmybo wahe Joaō-di rōhòtinyreny aōmy tuu bedi nohòtinyreny tamy itxereny bederahy ròirenyreki wahe. Otxirarade wese yhy-ki tahòtinyteri. 8-9 Ada aōma hābu urimynodutyhymy aōbo idi rōhòtinyreny. Aōma butòre wesemy idi rōhòtinyreny. Ada iwitxiramy aōbo idi tahòtinyteny hābu tyywihikỹdiremy idi rahòtinyteny. Iòlò taheto wihikỹ-ki ratximyhỹre. Aōkōre, kia iny heka aō Deuxu rybeduōmybo tahòtinyteny. Inatyhy tii kia rare. 10 Iratyre heka tii rare. Aōma dori Tyyriti-ki rarybemyhỹre:

—Tii heka wako-ki kadehemynykremy ratximyhỹre, wamy relyykemy, wary riywinymyhỹre.

11-14 Inatyhy heka rare. Tii heka ibutu hābu ratyre ratximyhỹre. Ihārele tahe heka Deuxu Iòlòna-ki heka ijō iny iratyre ratximyhỹre. Hābu binahakỹ heka Deuxu Iòlòna-ò raaòbinanymyhỹre. Joaō rexidelenyry rybe itỹnydỹỹmy rexidelenyreuhyyle heka ritelemy ralore. Tule wiji nalòmhyhỹde sōwemy. Iu Joaō rehemynykōle heka tuu rarybemyhỹre ibutu Deuxu rybedu mahādu heka tuu rarybemy raremyhỹ. Tule Moisesi bede ywina kia rarybere. Tii Eliasi wesele ihỹre. Tetyhynyteny aōbo. Iwese Deuxu rarybereri wesemy heka tii nade. 15 Inyō ierysymy rurukeki, roholake wiji. Aōmybo ararybekre kainymy tiwesebo rỹimyhỹremy. 16 Tiibohe heka iwese weryry

uladu risinymyhÿre wesemy ihÿrenyre. Kiamy heka tiinamahãdu-ò rarybemyhÿre: <sup>17</sup> —Jiarÿboho heka aõma wiunawihikÿ-di rawinymyhÿrenyre. Idi tahe teysatenyõhyymãhãtenynte. Tahe wiuna bederarysyna-di heka rawiunymyhÿrenyre. Ta bedewoõhyymãhãtenyteri. <sup>18</sup> Joaõ Sebedÿÿdu heka riroxiõre. Vÿimy riõõre. Inywesereny tai tarybetenynte: —Tii raitxÿtemy ihÿre. Tyytybybina-di ihÿre. <sup>19</sup> —Jiarÿ Deuxu Riõre heka rehemynyre Hãbutyhyhykÿ wahe. Jiarÿ reroximyhÿre. Reõmyhÿre tahe kiaboho heka waluu aõkõ heka toite. Urile heka wamy tarybemyhÿtenynte wabyre nihikÿremy wabemomohõkÿremy. Aõma òrarudu kia liinatyhy heka jiarÿ rare. Aõ ikõkõlemy heka taraykynymyhÿtenynte ihãrele taheka õbitilemy ixi-di tanohõtityhÿtenynte.

<sup>20</sup> Jesuisi heka sõwemy aõwiihikÿmy riwinymy raremy. Ihãrele heka imahãdu rityhynyõhyymyhÿre heka. Kia Jesuisi heka rarybere kia hãwã mahãdumy. <sup>21-22</sup> Orasi hãwã aõ heka adee binatyhymy kanakre amahãdu-ò wahe. Besaida hãwã mahãdu, kaiboho aõna aõna wiwihikÿmy tabitenynte ahãwãreny-ki. Tiu heka ixi-txi õhõtireny reaõhykymyhÿre. Jiarÿ aõma Tiro hãwã-ki Sidõ hãwã-ki aõna aõna wiwihikÿ ariwinyre wana inihe heka ixi-txi tõhõtireny reare iniheka saumy tyky rexityyntyre tule brybysi ixityrereny heka rexihumy. Sidõ hãwã Tiro hãwã heka urihimyo adeereny isirakre. <sup>23-24</sup> Kafanaõ hãwã mahãdu! Kaiboho heka tule ixitxireny õhõtireny reaõhykyre. Aõma kaiboho heka awireny ixidireny tahoõtitymahãtenynte, awityhyremy. Kaiboho heka õhõtenamy bekoabenykre bedebina heõtyhykÿ-ò dori besebenykre. Sõwemy dori aõwiihikÿmy kaiboho tabitenynte. Deysana wiwihikÿ-di wahe. Tiu heka ixi-txi õhõtireny reaõhykymy aõrarurenny-txi. Aõ wiwihikÿ Sodoma hãwã-ki rewinyre wana wahe. Tiu heka rabinaõhyre inihe heka wiji-ò. Aõkõ botÿÿbenykre aõma Sodoma hãwã ratyre heka aõhõkÿmy botÿÿnybenykre, Deuxu ywisidÿÿnatxu.

<sup>25</sup> Tahe Jesuisi rexitõnenyre Deuxu-ò: —Waha, biu bede-wana iwedu atximahãte. Kai uladu-ò aõna aõna tetÿnynynte. Tewõmahãte heka kia ibedeeryhykÿ lau heka tewõmahãte. Kai ixi-di bedeeryhykÿmy rõhõtityhÿre lau wahe. <sup>26</sup> Tii heka adeewinare. <sup>27</sup> Ibutumy heka Waha wadee riwahinyre tii heka riwaeryre. Jiarÿ tule tii reeryre. Aõma ixidee wikeki inydee ariteòsinyke. Timybo Waha rare. <sup>28</sup> Elehydÿÿmy buruke aõbo? Manake wadee. Jiarÿ heka araelehinykre. <sup>29</sup> Walõtityreherina ixidee bitidibenyke. Tai tahe wawana maaõmysÿdÿÿbenyke. Arabederynykre heka ywina-di. Aritidiõtyhy heka aõ utxiehekÿ atyrereny. Elehyna adeereny ariwahinykre awo araykyreny-ò. <sup>30</sup> Aaõmysÿdÿÿna adeereny rewahinymyhÿre isiraõre heka. Iutxiemy aõkõ rare.

## 12

<sup>1</sup> Sabado txuu, judeu elehynatxu Jesuisi rariamy ròirenyre maixõmoni oworuru-ki. Tahe rekoarenyre aõma maixõmoni oworuro-di heka irenyre. Kia heka tahe Jesuisi taerydÿÿna mahãdu heka riarimyhÿre aõma riyrenykremy rama rahuraki. <sup>2</sup> Iu-ki tahe fariseu mahãduõ retehemy ratximyhÿre. Tii-boho tahe rarybere kia Jesuisi-ò rarybere: —Kia hewa brebuna rare aõma sabadotxu riwinymyhÿré: —Aõherekibo aerydÿÿna mahãdu iu riwinyrereri. <sup>3</sup> Tahe Jesuisi tamy rÿÿraxire aõma ijyymy ikoreny relyyre iwese Davi riwinyre wesemy heka riwinyrereri ramy rahureu. <sup>4</sup> Davi riki heka ralõre Deuxu dohodÿÿna hetowo-ò heka ralõre. Tai tahe rirÿsÿmyhÿÿ kia aõma xiwena-ki heka riymy. Kia orotxu heka aõma xiwena-ò hidÿÿna mahãduòle rÿimy. Tahe ihãrele heka riyrenyre heka. Taijoi mahãdu-ò riwahinyre. <sup>5</sup> Kia wesemy aõma tariakõte bede ywina tyriti-ki wahe. Aõma xiwena wahidÿÿdu heka rityynyõhyymyhÿre. Aõma sabadotxu kia wahisidÿÿna. Xiwena bede ywina

wahe. Iu dohodỹỹna hetowo-ki ratximyhỹu. Tii heka sabadotxu bede ywina rityhynyõhyymyhỹre. Tahe heka aõbina bina riwinyrenyõhyymyhỹre. Kia tahe heka tule heka bede ywina tyyriti heka ritidỹỹna roire. Idi tariatenyõte. <sup>6</sup> Inatyhymy heka adee ararybekre. Inyõ kaki ratxikeki jiarỹ heka kaki heka inyõ ratximyhỹre aõma dohodỹỹnahakỹ heto-ki wahe. Dohodỹỹdu mahãdu ratyre heka watzimahãre jiarỹ wahe. <sup>7</sup> Kiamy heka ritidỹỹna rỹimyhỹre. Jiarỹ heka xiwena luure ihãre tahe sõwemy heka iratyre ruxetõena luure. Jiarỹ aõma xiwena luure ihãre tahe iratyre heka aõma ruxetõena luure sỹ. Kaiboho terytenyete wana. Aõma heka ibinamy tarybehyynyhỹte inyõ teõsamy ratxikeò. Aõma aõ riwinyrenyõhyyre. Kiamy wahe. <sup>8</sup> Jiarỹ dori Deuxu Riõre Hãbu watzimyhỹre. Jiarỹ tule aõma sabadotxu wedu wãhãre.

<sup>9</sup> Tai tahe Jesuisi nade heka ixyby aõma tohodỹỹnareny heto-ò. Ralõre heka sabadotxu. <sup>10</sup> Hãbuõ ratximyhỹre debò binare. Debò rayjayja ihỹmyhỹre. Tahe fariseu mahãdu heka Jesuisi-di mynamy ratximyhỹre. Aõ rybebinamy rarybeke òraru-ki rimyky. Tai tahe rỹrãxire Jesuisi-ò: —Timyrebohe brebuna aõbo sabadotxu deytedyỹ ada aõkõre aõbo. <sup>11</sup> Tai ta Jesuisi rirariwõnyre: —Kaweselemy rõkõhõtinyrenyke. Kai heka aõmy abudoeni sohojilere. Sabadotxu heka reseke hãlooro-txi aribi. Timybo mohõtinyke aõma bitake hãlooro-ribi. Inatyhyre aõbo. Sabadotxu hãrele bitake. Kohe, inatyhyra. <sup>12</sup> Hãbu heka budoeni ratyre heka iõwy rare. Aõma sabadotxu aõwaxinyre heka reyteke. <sup>13</sup> Tai hãbu-ò rarybere Jesuisi: —Ebò biditytyke. Debò ritytyra ta wiwesele debò relere awimy. <sup>14</sup> Fariseu mahãdu heka wii ributunyre, iribi ròhõrenyreu wahe. Widee raryberenyre: —Aõma timybo rikisỹnyrenykre rikimynyrenykre rikirubunyrenykre.

<sup>15</sup> Tahe Jesuisi rierymyhỹ kiamy rarybermyhỹreny heka roholamyhỹ. Tahe Jesuisi rierymy heka. Iribi irehemy ratximyhỹreny hãrele, rierymy heka. Iribi tahe rexitare heka hãwã-ribi wahe. Idi heka ihemy heka rare riheludunyre. Sõwemy heka webinadu ihemy rare. Ibutumy riteytenyre. <sup>16</sup> Teyteydyỹna mahãdu-ò rarybere: —Uritere itỹnydyỹõmykremy tuu ijyyõmykremy inyko-ò. <sup>17</sup> Ihexiu Isaia tyyriti-ki heka kawesemy rỹimyhỹre. Tii heka Deuxu rybeduõ rare.

<sup>18</sup> —Kaheka Wadeòdu rare. Tuure heka jiarỹ, tii heka retare. Rehitxinyre. Tii heka deysana wadee riwahinymyhỹre Tatytybytyhy tamy ariwahinykre. Ywisidỹỹna txuu heka ibutuko-ò relyykre.

<sup>19</sup> Tii heka rryrõtyhy rebureõtyhy heka inyõ-wana widee. Tiu heka inyõ roholaõtyhy irybe dee. Ryki heka inyõ irybe-ò roholaõtyhy.

<sup>20</sup> Aõma bõtõreõ irybõhõmy roikeki. Tii raòrõõtyhy. Txuheõtyjurã loosõna urihimiyõkeki heka tiu ruriõtyhy eleti-di. Tii ritakre iaõbinana, inatyhynaõ binana wahe.

<sup>21</sup> Ibutumy heka irarõsõna iribi ritakre.

<sup>22</sup> Hãbu rybeõ ruetã heka iny didydenyde Jesuisi-ò wahe ralõmyhỹreki wahe. Tii tyytybybina iwo-ò ralõmyhỹreki wahe. Jesuisi tyytybybina riteõnyre. Tai irue heka awimy relere rarybere. <sup>23</sup> Ibutu iny sõwe heka heka ribedeõtiidỹỹnyre. Widee tahe raryberenyre: —Ka heka Davi riore riõre õsana rare, Deuxu deòdyỹna wahe. <sup>24</sup> Tahe fariseu mahãdu-ò roholare. Tahe rarybere Jesuisimy: —Tii inatyhymy tyytybybina riteõnymyhỹre inywo-ribi. Aõma tyytybybina wedu ruru-di heka riteõnymyhỹre. Belisibu ruru-di wahe.

<sup>25</sup> Jesuisi heka rieryre iraykyreny. Tai tahe tamy rarybere: —Ijyyemy heka tamy rarybere. Iõlõna mahãdu wiribi ibutumy rexihitxinykeki tahe rexihukre ibutumy wiribireny. Tahe hãwã mahãdu taijoiy-ribi rexihitxinykeki, awi aõkõ rare tai wahe. <sup>26</sup> Wiribi rexihitxinyke wana. Tule awi aõkõ rare tai wahe. Aõma Satanasi rexideõnykeki tahe tayreny-ribi rexitake. <sup>27</sup> Belisibu

ruru-di tyytybybina ariteònyke wana aõdibohe aheludu mahãdu riteònykemy ratximyhÿre. Tiiboho heka aywisidÿÿdurenymy ratximyhÿre. <sup>28</sup> Jiarÿ Tyytybytyhy ruru-di ariteònykeki heka kaiboho arurunareny Deuxu-ribi nade. Iòlòna adeereny rehemynyeri. <sup>29</sup> Inyõ heka hãbu rurutere hetowo-txi ralòõtyhy wasimy wahe. Tai rawasinymy ratximyhÿkeki tahe urile juhuu hãbu ritaataake. Idi tahe iheto-ribi aõdibo rawasinyke. <sup>30</sup> Inyõ wabiòwamy aõkõ ihÿre wana heka, waòludu rare. Inyõ wawana ibutumy ratxiõmyhÿre wana tahe raybàtàmehÿre. <sup>31</sup> Inatyhymy jiarÿ adee anarybekre. Ibutu òraruna kanaixãwididÿÿke. Hãbu aõtxile aõbina bina rarybemyhÿre. Sohojile taruxãwidÿÿõtyhy. Aõtxile inyõ aõbina binamy Deuxu Tyytybytyhy rarybekeki. Tii aõraru rataõtyhy. Kia heka òraruna tiiehyymy rarekemy ihÿre. <sup>32</sup> Hãbutyhyhykÿ heka Deuxu riòremy aõbina binamy iny rarybekeki, wamy wahe, tii tahe ixãwidina dire. Deuxu Tyytybytyhyhymy rarybekeki, tii tahe iixãwidinyõhyre. Tiehyy kia òraruna-di rareke. <sup>33</sup> Jesuisi rawesenanyre iny òwòru wese rare. Òwòru awimy rÿike wana, tai heka iratywihikÿõ-ki iny rahake. Ruru rasunymyhÿre raruburerimy ihÿre. Kia tasÿ iratywimy aõkõ rÿike ibinamy. Aõma òwòru iny rierymyhÿre aõbo iribi iraty dejuxunymyhÿde òraru-ki iny rierymyhÿre, awire. <sup>34-35</sup> Kaiboho heka hemylala mahãdu wesemy atximyhÿtenyte. Kaiboho heka abinatyhymy ahãtenyte. Timybo heka kaiboho aõwihikÿmy marybebenyke. Arayky aõbina bina hakÿlemy tõhõtinyteri wana. Tai taheka ary tuu ròhònyke ary tuu rarybeke. Aõma hãbu wihikÿõ ratxiremyhÿre wana aõnana wiwihikÿle tarayky-ki riyrubunymyhÿre. Tii heka rarybemyhÿre. Hãbu bina tahe tarayky-ribi ibinalemmy rarybemyhÿre. <sup>36</sup> Ibutumy aõmybo iny rarybemyhÿre heka ywisidÿÿna txu tuu rarybemyhÿre rierymy timykibo tuu rarybere wahe. <sup>37</sup> Òrarukibo rarybere: —Arybe òraru-ki heka ywisidÿÿna-ki atxiteri. Bitakemy aõbo ada aõkõre aõbo.

<sup>38</sup> Bedeerydÿÿdu mahãdumy heka fariseu mahãduõ tamy rarybereri: —Erydÿÿdu, wadeereny biteòsinyke awiwihikÿõ. <sup>39</sup> Jesuisi dirawyònyde: —Iny kamahãdu heka ibinatyhy rare aõ awiwihikÿ rexitòenymyhÿre. Abina binale wahe. Aõ wihikÿle bobiõtyhy. Tahe sohoji aõwihikÿõmy heka mohõtinyke. Jonasi widÿÿna wahe. <sup>40</sup> Jonasi Deuxu rybeduõ widÿÿna wahe. Tii inataõ txu inataõ rummy uturahakÿ wona-ki ihÿmyhÿwesemy. Iwese Deuxu Riòre Hãbutyhyhykÿ bede-ki rarekremyhÿ wesemy inataõ txumy inataõ rummy. <sup>41</sup> Ninive hãwã mahãdu heka roholarenymy tõhõtireny reare. Iu Jonasi rybe ritÿnydÿÿreu wahe. Tahe inyõ kaiboho tamy taholatenyte. Sõwemy heka iny Jonasi ratyremy ihÿre. Ihÿrele kaiboho ixitxireny õhõtireny reaõre. Ninive tamahãdu tahe ibinany adeereny rarybekre. Ywisidÿÿnatxu wahe. <sup>42</sup> Iòlò Hãwyyõ heka ibòò irehe-ribi nade. Aõma Salomaõ bede erydÿÿna-ò roholakemy. Kaiboho heka inyõ-ò taholatenyte. Salomaõ ratyre heka sõwe inihikÿ ihÿre. Ihãrele ta ixitxi nohõtireny reaõre. Ywisidÿÿnatxu heka Iòlò hãwyy ibinanamy kÿnarybekre umyreny wahe. Ywisidÿÿnatxu. <sup>43</sup> Aõma tyytybybina hãbu-ribi ròhònykreu tahe elehyydÿÿna riijekre. Aõma bedebinana tõteehekÿ tahe tuu reakre. Ihÿre tahe tai rahaõhykre elehyena-ki wahe. <sup>44</sup> Tai tahe ixidee rybekre: —Aròòsekre kÿhe. Iribi ranywÿhÿreò anakre. Tai tahe kia hãbu-ki rahara. Tyyrahakÿmy iwo-ki iruxeramy. <sup>45</sup> Tai tahe ijõ-txi reare. Debò inatxi reurò tyytybybina-txi iratyre tyhy wahe ibinare. Tai tahe ridyke tahãbu-ki rasÿnyrenykeny. Kia hãbu heka iwese juhu raremyhÿre ratyre ibinamy ratximyhÿre. Kaiboho heka kia tyytybybina wese atximyhÿtenyte.

<sup>46</sup> Jesuisi tahe ijõ-ò rarybere ijõ ijojì-ò, tai tahe ise rehemynyeri, iseriòreboho-wana. Sõwemy iny mahãdu-ò heka rarybere. <sup>47</sup> Inyõ tamy rary-

bere: —Inyõ heka arãijereri adi ahelỹna. Kie heka rehemynyereri adee rarybekemy adi ratxireri. <sup>48</sup> Jesuisi dirawyõnyde: —Mota heka nadireri, mota heka waseriõrereri? <sup>49</sup> Tai tahe tebõhe riteõsiriteõsinyre taerydỹna mahãduõ-õ. Ka heka nadi rare. Ka heka waseriõrere. Ka ijõ heka waseriõre. <sup>50</sup> Wahadeewi riwinymyhỹreki tahe, tii heka nadi rare. Waseriõre rare. Waha dori biu-ki ratximyhỹre.

### 13

<sup>1</sup> Itxu taheka Jesuisi rare heto-ribi Kalileia aho ijã-õ. Tahe tai ronyre. Tahe rexiterenyre Jesuisi iny ribedeernymy. <sup>2</sup> Tai ibututyhymy heka iny wirotyre. Tai tahe Jesuisi rexitareny urihimyõ hãworo-õ ronymy rexitarenyre. Iny sõwehekỹ mahãdu tahe aho ijãkile heka roholamy rỹimyhỹre. <sup>3</sup> Tii heka relyymyhỹre aõma ijyyõ relyyre: —Aõna aõna wese ijyy rawesenanyre. Hãbu alõbõrõmy rara. Tii heka alõbõrõna dehuu rare. <sup>4</sup> Ijõ heka idi rehumyhỹu heka ijõ ryro-txi resere. Nawii heka rirõmyhỹre riore heka. <sup>5-6</sup> Ijõ tahe rejuxunyre aõma manarutysu-txi. Tii tahe raumynyre aõwesele. Iraruxiõlemy heka rỹimyhỹ suu ibutureki. Idi bedetõtee rimoedỹnyre. Idi tahe rurure. <sup>7</sup> Õwõrudỹ resere edey-txi. Idi ta ruhunyre edewanale. Idi tahe ede riõdesedỹnymyhỹre. Tai heka raratynyõlemyhỹre. <sup>8</sup> Ijõ tahe resere suwitzirawihikỹ-txi. Tai tahe sõwemy raratynyre. Sohoji õwõrutu-ribi tahe 30my raratynyre iraty wahe. Ijõ 60my raratynyre iribi. Ijõ ta 100my raratynyre. <sup>9</sup> Tahe Jesuisi heka rarybere: —Kia boholatyhymy bonyke. Õhõtirenydikeki boholabenyke.

<sup>10</sup> Tai tahe ierydỹna mahãdu Jesuisi ritỹraxyre: —Aõherekibo kai ijyy-di bierynanykemy atxiteri, rawesenanyrereri wahe. <sup>11</sup> Tai tahe dirawyõnyde: —Kaiboho aõmybo Deuxu reerynanyre kaiboho bierybenyke. Ijõ mahãdu tiu ijyy rieryõtyhy. Kaiboho dori Deuxu Õlõna teerytenyte. <sup>12</sup> Hãbuõ iaõdikeki ijõ heka iratyre tamy ariwahinyke. Tai tahe sõwemy tamy rauhenyke. Tahe hãbu ihoõkeki ibutelemy ijõdikeki heka kiale iribi ibutumy aritakre. <sup>13</sup> Retehe my ihãre tahe robiõhyymyhỹrenyre tahe ririõhyymyhỹre. Tai heka ijyy-di reerynany watzireri. <sup>14</sup> Iwese Isaia tyryiti-ki roire wese heka tiiboho ihỹrenyre: —Roholamyhỹre, roholamyhỹre ihãre tahe rieryõhyymyhỹre. Retehe my ihãre tahe tiu robiõhykymyhỹre.

<sup>15</sup> —Irayky tererenyreki wahe rieryõre heka. Õhõtireny heka ritõbõnymyhỹre ta ijohonana-ribi. Tarue ribrenymyhỹre robike lau. Tahe wadee rõõseõtyhy. Aõkõre heka ariteytenykemy idi watzimyhỹre. Tibo heka terareny aõkõre.

<sup>16</sup> Jesuisi ijõ relyymyhỹre tamyreny: —Kaiboho heka eysamy atxitenyteri. Kaiboho heka bobibenyke tahe bierybenyke. Aõmybo kaiboho tabitenyteri heka, taholatenyteri wahe. <sup>17</sup> Ihetxiu mahãdu, hỹna mahãdu wahe, tuu lobiximy riwisỹnymyhỹre. Aõma aõwobo kaiboho taholamyhỹtenyteõ heka roholakemy riwisỹnymyhỹre tahe roholaõhyymyhỹre. <sup>18</sup> Tahe bohola heka adee aritỹnynyke aõbo ijyy rare. <sup>19</sup> Õwõrutu ryro-txi resemyhỹre heka iny ijoireny wesemy ihỹre. Ijohona tuuwesemy wahe. Tibo roholamynyre ihỹre tahe rieryõhyymyrenyre. Aõma Satanasi heka nade tai tahe warybe heka iribireny ritamyhỹre. <sup>20</sup> Ijõ manarutysu-txi resemyhỹ mahãdu tahe ijõ ijohonadu wesemy heka roire. Tiiboho heka deysana-di roholamyhỹrenyre. <sup>21-22</sup> Tai tahe urihimyõle rityhynymyhỹrenyre aõhõkỹmy dỹnana kanakeu tahe aõwesele riatyke ririmy reake. Kia edey-txi resera tasỹ aõma ijõ ijohonadu mahãdu wesemy heka rare. Tiiboho heka aõma 1000 nierule aõnityhymy idi rõhõtynymyhỹrenyre nierudile. Tai tahe

rexibedewonymyhÿrenyre. Tiu heka Deuxu aõmydÿÿna riwinyõhyymyhÿre, Deuxu Rybe riwiõhenanyrenyre. <sup>23</sup> Kia suwitzira wihikÿ-txi resera wana tahe iwitxira ijohonadu mahãdu wesemy heka rare. Tiiboho heka roholamyhÿrenyre rityhynymyhÿre sõwemy Deuxu dee roholamyhÿrenyre heka. Ijõ 100my wesemy raratynyre. Ijõ 60my raratynyre ijõ 30my raratynyre. Iny sohoji sohojiõ heka Deuxu-ò aõ riwinyrerimy ihÿre.

<sup>24</sup> Idi tahe iwitxira ijyymy relyyre Jesuisi tamyrenyre: —Deuxu Iòlõna heka kia wesemy ihÿre. Oworudu heka aõma alòbòrõna wihikÿõ ritòbrònymyhÿre taoworuro-ò. <sup>25-28</sup> Tahe iòluduõ rummy heka tamy nade. Tahe iu ibutumy iny ròrõmyhÿreu, asibinaty-di tamy rehure. Tai tahe alòbòrõna asibina-wana ruhunyre kia aõma ede wana wimy urilemy. Taiki tahe kia aõma oworudu kia aõmysÿdÿÿdu mahãdu. Tuu heka ijyy-di nade tuu ijyymy. Idinodu rarybere: —Aõma waòludu heka kia riwinyre wadee. Idi oworudu narybede: —Aõhebohe arotÿÿnyrenykre? Ta idile aõbohe arisiherenykre araxirenyre. Tai tahe rirawyònyre: <sup>29-30</sup> —Aõkõre wahe, kia ibutumy alòbòrõna rirarutxinykre. Ixinamy heka ratybienykre tii-wana wiurilemy kia maixõmo arixina bededÿÿnamy bede relerekeu tahe iribi raarike. Ararybekre heka tamy kia aõma oworu-di raaõmysÿdÿÿkreò. Juhu delemy asi arisykre. Tahe ritoonykre. Idi tahe maixõmo heka riarikre kia maixõmo hetowo-ò riyrubunykre.

<sup>31</sup> Tahe Jesuisi ijõ ijyy witziramy relyymyhÿre: —Aõma Deuxu Iòlõna heka aõma alòbòrõna sõmo sõmo wesemy ratximyhÿre. <sup>32</sup> Aõma raumynreri heka aõma òwòru iyjatyhymy ibutumy òwòruty-ribi rariwesele relemyhÿre.

Taiki tahe kia nawiile tuu rÿtÿnymyhÿre kia òwòru-ò.

<sup>33</sup> Uri paõ uri ixiòlòdÿÿna heka Deuxu Iòlõna wesemy heka kia ihÿre. Hãwyy heka paõ riwinymyhÿreu, riurinymyhÿreu tahe ibutumy raubÿtÿmyhÿre kia ibemy.

<sup>34</sup> Tai tahe rexiòlònymyhÿre Jesuisi heka sõwemy tuu relyymy raremyhÿ. Iu iny ribedeernymy raremyhÿu. Tiiemy heka Jesuisi relyyhy raremyhÿ iu ròbedeerydÿÿmy raremyhÿu. <sup>35</sup> Deuxu rybedu dori ihetxiu rarybere:

—Jiarÿ ijyy-di rebedeernymyhÿre. Aõma tuu relyymyhÿre heka ierykõna rare. Tiuhe rieryõhyymyhÿre. Iu bede rexideelenyrauhyyle.

<sup>36</sup> Idi tahe Jesuisi rexitare iny sõwey-ribi rexitare. Hetoõ-ò heka ralore. Tai tahe aõmybohe wakoreny inihe bedelyyke. Aòludu inybo arasÿnyremy. Kia ijyy heka aõma hãbu ede-di rehure ioworu-ò, taòludu oworu-ò. Kia inihe wadee bitÿnynyke aõbo rare wahe. Kia ijyy telyyté. <sup>37</sup> Tai tahe Jesuisi tii dirawyònyde: —Kia hãbu alòbòrõna wihikÿ ribòrònyre heka Deuxu Riòre Hãbutyhyhykÿ, rare wahe. <sup>38-39</sup> Ioworu heka ibutu bede heka roimyhÿ wesemy roimyhÿre. Aõma alòbòrõna wihikÿre heka ityhydÿÿdu iwese rÿirawesemy rÿira. Asi tahe kia ityhydÿÿdukõdu mahãdu wesemy heka ihÿre. Aõma kia iòludumy rarybereri tahe kia Satanasile heka ihÿre. Kia iyresynamy rarybereri aõbo bedekonana heka tuu rininimy heka tuu rarybereri. Kia ÿju heka iyresydumyhÿ tuu rarybereri. Kia rimumy ede riorokremy rarybereri heka aõma ityhydÿÿdukõdu mahãdu heka tuu rininimy rarybereri. <sup>40</sup> Ritakre heka rihitxinykre. Heòty bedehkÿ heka idi rehukre risòkre iu wahe. Iwesele taheka bedekonana heka rarakre. <sup>41</sup> Deuxu Riòre, Hãbutyhyhykÿ heka aõma ÿju riteònykre ibutu iny ributunykremy.

Ityhydÿÿdukõdu mahãdu ijõ iny òraruna-txi rityhedÿÿdu mahãdu heka ibutumy ributunykre widee. Ibutumy aõbina bina widÿÿdu wahe.

<sup>42</sup> Idi tii rihukre. Tai tahe ryrykre aõkÿmy rotÿÿnykre tai. Robumyhÿre taju.

<sup>43</sup> Kiau aõma

Deuxu hõrõ mahãdu tahe Waha Iòlòmý ronymyhÿre kie ronykre. Tiiboho loosòny wesemy heka ritoosònanykre txuu loosòna wesemy.

Õhõtirenydikeki ibutumy heka boholabenyke.

<sup>44</sup>Deuxu Iòlòna tahe nieru wesemy ratximyhÿre. Aõma nieru heka hynaõ-ki rahara nieru-di tÿximy aõma surawo-ki idi hãbu ixyby riwore. Tai tahe tii reysatyhymy ròsere. Kia ibutumy taaõmydÿÿna-di heka rohonyre. Kia bedero riwykremy.

<sup>45-46</sup>Ijõ tahe tule Deuxu Iòlòna wesemy ka ratximyhÿre. Iwese ixiura wydydu ihÿre wesemy heka Deuxu Iòlòna ihÿre. Iwydydu heka iijese ijesemy riwymyhÿre. Aõwi riererimy riererimy heka tai rahamyhÿre iruxera-ki tii tahe riwymyhÿre. Kiau tahe tai rahare aõ òwyhykÿõ-ki heka rahare. Tii idi tahe rohonyre ibutumy taaõmydÿÿna-di idi tahe kia iwydymy idi ratxirerìò riwyre.

<sup>47</sup>Riãõ wese heka tule Deuxu òlòna ihÿre. Aõma rià-di iny rehumyhÿre wana heka ibutumy utura rimymyhÿre. <sup>48</sup>Kia aõma idi tahe idi raixÿnymyhÿre riarimyhÿre iky-ribi. Aõma awi-di awihe riarirerimy iky-ribi. Ibinare rihitxinymy iribi. <sup>49</sup>Kia bedekonana tahe iweselemy heka rarekre. Kia aõma ÿju heka riarikre awi heka ibinau-ribi riarikre. <sup>50</sup>Rehukre heòty bedebinakÿ-ò wahe. Tai ki tahe rirajuamyhÿkre ta aõhõkÿmy rotÿÿnymyhÿkre. Txuu rikyinyamyhÿkre

<sup>51</sup>Tahe Jesuisi tamy rÿÿraxire: —Kiamy ibutumy teerymyhÿtenyete? Tiiboho riraòwònyrenyere: —Kohe, reerymyhÿrenyere. <sup>52</sup>Idi Jesuisi rarybere: —Inyõ bedeywina bederydÿÿna heka rityhynyreu, waheludu rarekreu wahe. Tii tahe iwese hãbu butudÿÿdumy ratximyhÿre wese heka ronymyhÿre. Tii heka ibutudÿÿna heto-ribi ritamyhÿre, tasÿ mahãdu-ò riwahinykemy. Aõ tyby aõ tÿmyra. Ibutumy heka ritamyhÿre.

<sup>53</sup>Tahe iribi Jesuisi rexitareu, <sup>54</sup>tahe tahãwã-ò ròsere. Judeu dohodÿÿna heto-ki ribedeerynyre. Tahe ibutumy ribedeòtiidÿÿnyre. Tiribibo heka tii bederyna rierymyhÿre: —Timyrekibohe aõwiwihikÿ rierymyhÿre. Tii kÿny heka aõma òwòru besedÿÿwidÿÿdu riòre heka rare. <sup>55</sup>Jyje riòre wahe. Marie heka tule rare ise wahe. Txiau, Simaõ, Jyje, Judasi-wana iseriòre ihÿre tule wahe inatyhy? <sup>56</sup>—Iseriòre hãwyy heka tule kaki rasÿnymyhÿre inatyhy. Timyrakibohe aõna aõna ikõkõ rierymyhÿre. <sup>57</sup>Tahe rityhynyõhyymyhÿre heka tai wahe. Jesuisi tamyreny rarybere: —Deuxu Riòre Hãbutyhyhykÿ heka tiu tauludu wijirana hãwã-ki inyõ rityhynyòtyhy rybeduõ ihetomy ijirana-ki. <sup>58</sup>Tai tahe aõna aõna wiwihikÿ heka tai riwinyõhyre, rityhynyõmyhÿreki.

## 14

<sup>1</sup>Kia bedeu tahe Herodi, Kalileia iòlò, Jesusini-ò roholare. Aõikõkõ heka riwinymyhÿre. <sup>2</sup>My heka rarybere teòdu mahãdu-ò: —Kia Joaõ Sebedÿÿdule aõbohe rubu-ribi riixixadÿÿnyre. Tai tahe tii aõikõkõ riwinymyhÿre. <sup>3</sup>Herodi tahe juhoo Joaõ ròtenawo-ki riteònyre. Tii taseriòre hãwyy òraru-ki kia wesemy riwinyre, Herodia òraru-ki wahe. Herodia heka Filipi hãwyy rare. <sup>4</sup>Juhoo Joaõ Herodi-ò rarybere: —Awi aõkõ rare. Kai dori aseriòre hãwyy-wana atxiteri. Uritere heriòmyke. <sup>5</sup>Tai tahe Herodi heka Joaõ rubudÿÿmy riwisÿnyre. Urile ruberumy judeu mahãdu lau. Tamyreny Deuxu rybeduõmy rÿiramy Joaõ Sebedÿÿdu rare. <sup>6</sup>Herodi kai beòramy bedeyreure tahe worana bedehesi ritxienyrenyere. Herodia riòre ijadòma heka iko-ò resemyhÿre. Iixe-ki tahe awimy Herodi rahare, Ijadòma luure wahe. <sup>7</sup>Tii tahe tamy rarybere kanakemy. Aõmybo wadee bexitòenykre. Inatyhymy adee ibutumy ariwahinykre. <sup>8</sup>Tai ise ijadòma-ò rarybere: —Aõma bexitòenykre: Sebedÿÿkÿdu



ratilemy tamy bexitòenykre. Tai tahe ijadòma tamy rexitòenyre: —Wadeke bidiwyke Joaõ Sebedỹkỹdu rati, pratoro-ki. <sup>9</sup> Tai tahe iòlòhe rabadewore. Ibutu ijohonaru-ò dori tuu rarybere ijadòma-ò. Tahe ibutumy riwinyke rỹire. <sup>10</sup> Tahe ihãrele iòlò heka soldadoõ riteònyre ròtenawo-ò kia Joaõ rati resymy. <sup>11</sup> Inyõ diwyde pratoro-ki. Ijadòma-ò heka riwahinyre. Tahe tii tadi-ò idi rare. Riwahinyre. <sup>12</sup> Idi tahe Joaõ erydỹỹna mahãdu dioryde iumy, riwykremy, rituunykremy. Iribi tahe roirenyre Jesusiko relyyre.

<sup>13</sup> Kia roholareu tahe Jesuisi ròhònyre ixisojojilemy bederahu-txi. Hãwò-di rexitaranyre rare. Iny sòwemy bedè-di ròirenyre ihemy titxibo iru-ki rakemy. <sup>14</sup> Rehemynyreu tahe iny sòwehekỹmy Jesuisi robire. Tai tahe Jesuisi riwotòenyre. Ibutumy riteytenyre webinadu mahãdu. <sup>15</sup> Tahe ratxioronyre. Tahe ierydỹỹna mahãdu tamy nade. Tamy rarybere: —Txuu ratxioronyra. Bederahy-ki dori atxiteri. Iny tahe biteònykre hãwã-ò tai rỹsỹna ixidee riwykemy. <sup>16</sup> Tahe Jesuisi rirawyònyre: —Aòkòre, ariteònyòtyhy jiarỹ. Kai-bohole tahe aõ tamy bidiwahinybedenyke. <sup>17</sup> Jiarỹboho kỹny diwatxiònyreri iruyre orotxu-di, utura inatxire. <sup>18</sup> Tai tahe Jesuisi narybede: —Bidiwahiny wadee. <sup>19</sup> Jesuisi tahe ibutumy iny asityre-ki ronykemy risỹnyre. Orotxu inaubiòwa, utura inatxi rỹire, utura-wana rimyre tahe ritehere biu-txi àlana Deuxu-ò riwahinyre. Idi tahe paõ riyreyrenymyhỹre teòdu mahãdu-ò riwahinyre. Idi rare iny sòwehekỹ-ò. <sup>20</sup> Ibutumy iny riroxirenyre ihãre rihydyre. Kia iuhe-di ierydỹỹna mahãdu 12 weriri ritỹxinyre. <sup>21</sup> Hãbumy 5000 òsana rỹimyhỹre. Ihãre tahe uladu-di rariaòhyyre hãwyyboho-di.

<sup>22</sup> Tahe Jesuisi taerydỹỹna mahãdu riteònyre aho kanawe-ribi ijà-ò reuròrenykemy hãwò-di. Jesuisi tahe rarire iny sòwehekỹ mahãdu rirybedỹỹmy. <sup>23</sup> Jesuisi heka iny tahetoreny-ò riteònyremy rahudi tahe tii raòwònyre hãwãlò ratyy-ò ixitòedỹỹmy. Taihyyle idi bedè roronyre ixi sohojihyyle. <sup>24</sup> Kiaule hãwò ahotya-ki rare. Òbò nihikỹy-txi ixinalemy ratximyhỹre. Tiò tiò òbò riwelòrò riwelòròmmy idi rehumyhỹ. Yhy deade txura-ribi. <sup>25</sup> Rudile tahe Jesuisi biura-di heka rare taerydỹỹna mahãdu-ò, beratyredile heka rare. <sup>26</sup> Iu Jesusile betyredile tamy rarau tahe, tiiboho heka ruberurenre. Rirajuarenre: —Worỹsỹ òsana inydee rareri. <sup>27</sup> Tai tahe Jesuisi rarybere: —Aworeny bitamadỹỹnybenyke. Jiarỹle watxireri. <sup>28</sup> Tahe Pedro rarybere: —Wanyrỹ, inatyhymy kai atxiteriwana heka wadee manyarybeke betyre-ki arariakemy. <sup>29</sup> Tahe Jesuisi tamy rarybere: —Manake wahe. Aòwesele tahe Pedro hãwò-ribi ròhònymy reare, Jesuisi-ò rakemy. Betyre-ki rariare. <sup>30</sup> Yhylemy tahe robure. Tii urile ruberure. Tai ijirahakỹlemy riwisỹnyra berahatxi-ò. Tai tahe Pedro rarybere: —Biwatakewa Wanyrỹ. <sup>31</sup> Tahe Jesuisi rimyre: —Ainatyhynakỹny ibutelemy atxiteri. Aòherekibo heka tiwatyhynyòteri. <sup>32</sup> Idi hãworo-ò wiwana rorukurenre. Yhy ruhure. <sup>33</sup> Ierydỹỹna mahãdu Jesusimy reàlære. Inatyhymy heka kai Deuxu Riòretyhy tate.

<sup>34</sup> Tai tahe reuròrenyre Kenesare bedè-ò. <sup>35</sup> Ibutumy iny kowa Jesuisi rieryrenyre. Ti ibutumy webinadu mahãdu-ò relyyrenyre Jesusimy. Tahe hãwã ikòkò-ribi ritelenymy didydenyde. <sup>36</sup> Tahe Jesuisi-ò rarybere. Ixinamy watyky-ò rerike, awimy relerenykemy. Ibutumy tamy rerire heka reytere.

## 15

<sup>1</sup> Jerusalè hãwã-ribi bedè ywina bedè erydỹỹna mahãduõ dehemynyde Jesuisi-wana rarybekemy. Tiiboho-wana tule fariseu mahãduõ dehemynyde. Tiiboho heka Jesuisi-ò rỹỹraxirenre: <sup>2</sup> —Aòherekibo aerydỹỹna mahãdu tebòreny risuhòkòreri roxiko-ki. Inydeereny kia bedè ywina rare.

Aõherekibo rityhynyõreri ihetxiu lahi rybe. <sup>3</sup> Jesuisi rirawyònyre ÿÿraxina-di: —Aõherekibo kaiboho Deuxu rybe tetyhynyõteri kaiboho lahirybele tetyhynytenyte. <sup>4</sup> Deuxu bede ywina kawesemy rarybere:

—Boo adi-wana ibutumy heka bityhynybenyke. Inyõ rybebina tadi-ò tyby-ò rarybekeki. Tii tahe ruruke, tuu bede ywina rybe wahe.

<sup>5</sup> Kaiboho tahe kawesemy tebedeerynytemy tewitxiranyte: Inyõ tadimy tybomy rarybekeki Wanieru Deuxu-ò wahisidÿÿnamy. <sup>6</sup> Tai tahe inieru-ei tyby tadi-wana riwiòhenanyõre kia bede ywina wixira tewinymahâte. Deuxu bede ywina rityhynyõreki. <sup>7</sup> Kaiboho itxerenadu mahâdu atxitenyteri. Isaia inatyhymy umy rarybereu:

<sup>8</sup> —Kia mahâdu wadee rybe-di riwadeàlànanyrenyrene. Wowydyna wadee riwahinymyhÿrenyrene. Inatyhymy aõkõ heka kai tarybemahâte. Arayky dori Deuxu-ribi irehemy ratximyhÿre. Teerytyhyõlemy heka atximahâte.

<sup>9</sup> Iwowydyna heka wadee aõ aõkõ rare. Wabede ywina ribedeerynyõtyhy. Texibedeerynymahâtenyte abede ywinarenydile.

<sup>10</sup> Jesuísí rexidelenymy ribedeerynyre: —Boholabeny warybe-ò. <sup>11</sup> Brebuna roxina-di biroxibenykeki, aõ adeereny ibinaõtyhy aõ aryrenymy ralòmehÿre aõkõ heka ibinare. Ryribi ròhòmehÿre heka ibinare, arybe wahe. <sup>12</sup> Tai tahe Jesuisi erydÿÿna mahâdu Jesuisiko rarybere: —Fariseu mahâdu kÿny tamy awiõre kia wiji tuu tarybeta wahe. <sup>13</sup> Tahe Jesuisi rarybere: —Aõhere aõkõ rare. Timyre aõkõ rare. Ixinamy tuu raryberenyre. Iorutere-di nohõtirenyõmy. Kia fariseu bedeeryna lòbòròna wese rare. Waha ribòrònyõre. Ibutumy waha ribòrònyõre suribi mahâdu ritakre. <sup>14</sup> Inatxi hãbu ruetà widee ryò ritÿnynymyhÿre wese. Hãwãry-ribi wiwanale hãloo-txi resekre. Tiiboho ixinamy biribenyke. <sup>15</sup> Tahe Pedro Jesuisi-ò rÿÿraxire: —Wakoreny inihe biditynynyke, roxina brebuna ijyy wahe. <sup>16</sup> Kaiboho ibutu wese atxitenyteri. Teeryõtenyte. <sup>17</sup> Ibutumy iny aõ rirÿsÿmyhÿre weryri-di ramyhÿre tahe ròhòmymyhÿre. <sup>18</sup> Tahe inyõ rybebinamy rarybemehÿre. Tii iwo ibinare, irayky ibutumy ibinare tai wahe. <sup>19</sup> Raykywydyna binahakÿ-ribi heka òtaòtana, rubuna, wasina, ruina ujõmo inyry-ribi ròhòmymyhÿre. <sup>20</sup> Kia aõmydÿÿnana iny risurisumyhÿre, inydee ibinare. Tahe roxinako-ki iny tebò risuhòmehÿré, kia tahe aõ aõkõ rare, ibina aõkõ rare.

<sup>21</sup> Iribi tahe kia-ribi ròhònyreu tahe Jesuisi rare irehetytymy Tiro hãwã-ò Sidò hãwã-ò. <sup>22</sup> Kana bede hãwyyò tamy nade. Tahe tamy rexitòenyre: —Wahĩ, Davi riòkòre, biwaruxetoènyke hewa. Waritxòre heka tykytyby bina-di iwoku-ki ratximyhÿre. Anohòkÿmy heka idi rotÿkÿnymyhÿre. <sup>23</sup> Tahe Jesuisi aõmy rarybeõhyre tamy. Taerydÿÿna mahâdu tahe rarybere: —Biteònyke hewa. Inyboho dori riixiranyrenyteri. <sup>24</sup> Jesuisi tahe rarybere: —Jiarÿ Deuxu riwateònyre judeu mahâduòle, tabudoeni mahâdu iõre mahâdu wese wahe. <sup>25</sup> Hãwyy ixityre nade. Tatiowotimy resere. TAhe ixityre tamy rarybere: —Biwawikòhenanyke hewa, Wahĩ. <sup>26</sup> Jesuisi rirawyònyre: —Awiòhedÿÿna kia wese rare aõma hãbuõ tariõre-ribi rÿsÿna riwya tahe idi rehura ijòrsaòle. Kiawese rarekre, jiarÿ arawiòhenanykeki. <sup>27</sup> Hãwyy rarybere: —Inatyhy rare. Kuladu-ribi ano rÿsÿna resemyhÿre bede-txi, tiki tahe itxòròsa ritxòre idi riwomy reakamy riròmehÿre. <sup>28</sup> Inatyhymy Jesuisi rirawyònyre: —Kai ainatyhyna sòwere. Adee ariwinykre aõmybo textitòenyteri. Iule iriõre reytemy rare.

<sup>29</sup> Tahe Jesuisi ròsere ixityre Kalileia ahohokÿ-ò. Raòwònymy rare hãwãlò-ò. Iratytyre ronyre. <sup>30</sup> Sòwemy heka iny webinadu didyde: itiere mahâdu, iruetà mahâdu, irybeõ mahâdu, aõ ikòkõ heka bina bina wixira

witxira idi rare. Jesusiko-ò heka ritidirenyreki ibutumy riteytenyre. <sup>31</sup> Iny ruetà rÿira mahãdu itxeretyhymy riwinyre. Rarybekõmy rÿira mahãdu, rarybemy rÿimyhÿ teysamy. Itiere rÿira mahãdu, rariamy rÿimyhÿ. Tai ibutumy iny ribedeòtidÿÿnyre heka tahe judeu mahãdu Deuxu-ò wowydyna riwahinyre.

<sup>32</sup> Jesusi rarybere taerydÿÿna mahãdu-ò kanakemy. Tahe tamyreny rarybere: —Jiarÿ kÿny rewotòenyreki kainy mahãdu rÿireridi. Inataõ txumy bederiera waki. Aõ heka ihokõre rirÿsÿrenykemy. Iòwedÿÿkõlemy ariteònykeki heka ijõ reseke ryrowetyakile. Rama riatyke. <sup>33</sup> Tai tahe ierydÿÿna mahãdu rarybere: —Inyboho bederahy-ki, titxibo heka rÿsÿna arimykre iny sõwehekÿ-ò ariwahinyrenykemy? <sup>34</sup> Tahe Jesusi tamyreny ritÿÿraxinyre: —Tiwesebo roxina-di atxitenyteri. Tahe rirawyònyre: —Debò inatxi reurò orotxu sõmo sõmomy idi watxireri utura deyre ijõ rare. <sup>35</sup> Jesusi rarybere ibutumy iny ronykemy. <sup>36</sup> Tahe tí rexitòenyre Deuxumy reàlãre. Orotxu, utura-wana riereerenyre tahe taerydÿÿna mahãdu-ò riwahinyre idi rakremy. <sup>37</sup> Ibutumy riroxire heka kia iny sõwehekÿ ta rihydyre. Tabyre rahudi tahe riarire ierydÿÿna mahãdu. Tai tahe rahure tÿxihikÿlemy. Debò inatxi reurò weririmy heka ritÿxinyrenyre. <sup>38</sup> Tahe 4000 hãbumy riòwenyre, kia txuu wahe. Uladu, hãwyy-di rariaõhyre. <sup>39</sup> TAhe Jesusi iny-ò rarybere tasÿ-ò ròòsekemy ixyby. Iribi tahe Jesusi hãwò-di reuròmomy rare Magadã hãwã-ò.

## 16

<sup>1</sup> Fariseu mahãdu saduseu mahãdu nade Jesusi-ò iurihixidÿÿmy riitxenanyrenykemy: —Aõbedeerydÿÿnabo heka biu-ki iribi rexitòenyre. Biwateòsinyke heka aõwiwihikÿ-di biu-ò jiarÿboho arieyrenykre, kai inatyhy tate wahe. <sup>2</sup> Idi tahe Jesusi rarybere: —Kaiboho heka awirenyre biuwetyky ersy-ki. Jesusi rarybere: —Kia rybe tarybemahte. Txiorotxumy heka biuwetyy isòhòkÿra-ki, biurasòmomy tahe awimyy txu kedekre. <sup>3</sup> Biurasou ibede lyby lybimyy txu-di kedekreki tahe biu ròahyyhy bede txu rariakre. Myhe tarybemahte. Kaiboho heka iwitxira aõhebo rotÿÿnykre heka teerytenykõlemahtenyte. <sup>4</sup> Iny kamahãdu heka ibutumy ibina binare. Tiu heka rityhynyõhymyhÿrenyre. Rexitòenymyhÿrenyre heka biu-ò rityhynykemy. Tahe riwahinyõtyhy heka aõma bedeerynaõ. Kia Jonasi-ò bedeeryna rareõle tahe tamy rakre heka. Tahe Jesusi rexitamyy rare iribireny.

<sup>5</sup> Idi tahe aho weribijã-ò reuròenyre tahe, tõhõtireny rosare tarÿsÿnarenry-ribi. <sup>6</sup> Jesusi tamy rarybere: —Fariseu mahãdu, saduseu mahãdu iurina-ò bexiebenyke. <sup>7</sup> Ierydÿÿna mahãdu tahe widee rarybere: —Tii kia rarybere iny orotxu diwyòdeki. <sup>8</sup> Jesusi roholare aõmybo raryberenyre tahe tamyreny rarybere: —Aityhynarenry urihimyyõre. Aõherekibo orotxumy jiarÿ rarybererimyy tahõtinytenyete? <sup>9</sup> Tiu kaiboho bierybenyõtyhy. Iruyre orotxumy remyre. Idi 5000 hãbumy reòwenyre. Ihãre tahe weriri txÿxi tÿxihikÿlemy rÿimyhÿre rauhenyre. Itxi aõbo õhõtireny reakõmyhÿre. <sup>10</sup> Ixityreu tasÿ 4000my reòwenyre, debò inatxi reurò orotxu-di. Ixiyrubule rauhenyre. <sup>11</sup> Jiarÿ orotxumy rarybeõre. Fariseu mahãdu, saduseu mahãdu urina-ribi bexiebenyke. <sup>12</sup> Tai ierydÿÿna mahãdu rieryrenyre aõmybo rarybemyhÿmy Jesusi heka fariseu saduseu bedeerydÿÿnamyy rarybereri.

<sup>13</sup> Idi tahe Sesaria Filipi hãwã iòhòmomy rehemynyre. Jesusi rÿÿraxire taerydÿÿna mahãdu-ò: —Iny wamy rarybereri. Mobo heka jiarÿ raremyy heka wadi rÿireri. Jiarÿ Hãbutyhyhykÿ rare, Deuxu Riòre wahe. <sup>14</sup> Ijõ kÿny rarybemy rÿireri: —Kai riki heka Joaõ Sebedÿÿdu atxiteri. Ijõ riki Elia

atxiterimy adi r̄yireri. Ijō tahe Jeremiamy adi r̄yireri. Ijō heka Deuxu rybeduō riki heka atxiterimy adi r̄yireri. <sup>15</sup> Tai tahe Jesuisi r̄ȳraxire taeryd̄ȳna mahādu-ò: —Mowexe watzirerimy wexe wadi tahōtinytenyteri. <sup>16</sup> Simaō Pedro heka rarybere: —Kai Kristu atxiteri Deuxu deòd̄ȳna heka tate. Kai heka Deuxu Riòre tate. <sup>17-18</sup> Tahe Jesuisi rirawyònyre Pedro-ò: —Inatyhymy Pedro tate, Waha, biu-ki Mana ani rare. Boholake, ratximyh̄rele kia adee riteòsinyre. Iny aōkō kia adee riteòsinyre. Wadohod̄ȳna mahādu kia mana tyre-ò ariwinykre. Rubu dori heka tiu ituedeōna. <sup>19</sup> Waiòlòna rayna heka adee ariwahinykre. Kabede-ki aōwid̄ȳ adee binakeki tule biu-ki ariij̄onykre. Aōtxilet̄xibo aōwid̄ȳmy burukre tas̄ȳ biu-ki tule adee ariwinykre. <sup>20</sup> Jiar̄ȳ inatyhymy Deuxu deòd̄ȳna rare. Tuu ijyyrenyōmyke.

<sup>21</sup> Iribi tahe Jesuisi it̄ny relymy taeryd̄ȳna mahādu-ò. Rurukremy heka relyre: —Arakre heka Jerusalē-ò. Tai heka matuari mahādu, ònosōna be-deeryna mahādu, xiwena wahid̄ȳdu mahādu-wana riwarubunykre. Inataō txu-di tahe ixyby rubu-ribi adexiakre. <sup>22</sup> Idi tahe Pedro heka Jesuisi ridyre ijō eryd̄ȳna-ribi tahe tamy rarybere: —Aōkōre, Wanyr̄ȳ, tiu heka tiiboho ararubunyrenyōtyhy. <sup>23</sup> Tahe Jesuisi rarybere Pedro-ò: —Waribi bexihitxinyke. Kai heka Satanasi weselemy atximahāte. Iwese kai taraykynmahāte heka aō Deuxu deewinamy aōkō tuu tahōtinymahāte hābudeewile rare. <sup>24</sup> Idi tahe Jesuisi rarybere taeryd̄ȳna mahādu-ò: —Inyō wawananomy rurukeki, ixi-ribi heka tōhōti rosake. Nomy rurukeki heka taitxeò rinyke idi tahe wahemy kanake. <sup>25</sup> Inyō wahemy rariakemy ixi-di rōhōtinyhyke wana heka irumy inonana irehemy ixi-di ratxikeki heka tii ihārele ruruke. Inyō taumy riōnonykeki waòraru-ki tai tahe tii ròtake. <sup>26</sup> Inyō heka ibutumy aōna aōna bede-ki ributunykeki. Tahe ihārele heka tii ruruke. Tule umytuedeōna riōnonyre. Aō tarasana tamy aō aōkō rare. Iny iruna riòwynyōhyymh̄re, ixyby tamy kanake wahe. <sup>27</sup> Jiar̄ȳ, Deuxu Riòre, Hābutyhyhyk̄y dori kanakre wana aōwesele. Tāȳju loosòna-ki tii kanake. Iny ibutumy ariòwynykre bibutunymy aōbo iny riwinymh̄ré heka aōwiwihik̄y aōbina bina.

<sup>28</sup> Iu jiar̄ȳ, Deuxu Riòre, Hābutyhyhyk̄y, kanakeu tahe inyō kaibohoō tuu robikre, Iòlòm̄y kanakre.

## 17

<sup>1</sup> Reare heka debò sohoji reurò txumy. Tahe Jesuisi ridyre Pedro, Txiau, Joaō-wana. Joaō tahe Txiau seriòre rare. Tahe raòwònyre tiiboho-wana hāwālò ratòhòk̄y ratyy-ò. Inyō heka tii wana raòhyre. <sup>2</sup> Ikoreny-ki tahe Jesuisi rexiwixiranyre. Iòsana heka roosòre. Txuwesehek̄y le relere iòsana heka rat̄ȳr̄nyre. Ityky tas̄ȳ rauranyh̄k̄y re. Tahe roosòna itoosònadihik̄y re. <sup>3</sup> Iu tahe tuu robire Moisesi rubu, Elia rubu, Jesuisi-wana widee rarybemyh̄reny. <sup>4</sup> Tahe Pedro tamy rarybere: —Awire, Wanyr̄ȳ, kawese watzirenyreri kaki. Adee wikeki hetomy ariwinyrenykre ijō adeekre, ijō ta Moisesiòkre, ijō Eliaòkre. <sup>5</sup> Iu Pedro rarybereriule tahe biuwetyky urahak̄y relere. Iyri-bile rybeò narybede: —Kia heka Wariòre waluu heka rare. Boholabeny irybe-ò. <sup>6</sup> Idi tahe ieryd̄ȳna tamy roholareu, tahe ruberure. Tahe reserenyre iòsanareny bede-ò. <sup>7</sup> Jesuisi tamyreny nade: —Breburenyōmyke hewa bodorukubedenyke heka. <sup>8</sup> Reteherenyre tahe Jesuisi sohojile tai r̄yre.

<sup>9</sup> Iribi tahe diberenydenyde hāwālò ratyy-ribi, Jesuisi narybede: —Uritere waijyyōmyke inyko wiji tuu tabitimy. Iu jiar̄ȳ, Deuxu Riòre Hābutyhyhyk̄y, rubu-ribi riixixanykreu tahe tuu belyykre. <sup>10</sup> Tahe ieryd̄ȳna mahādu Jesuisi-ò r̄ȳraxire: —Aōherekibo tarybetenyteri —Elia juhūu kanakemy ako-ò

juhuu kanakemy. <sup>11</sup> Jesuisi rirawyònyre: —Inatyhy rare tii juhuu kanakre. Ibutumy heka bede riywinykre. <sup>12</sup> Tule ararybekre kiamy: —Elia nade tahe ihãrele heka iny rieryõhyyre. Aõhõkõmy risõnyre. Iwese Elia aõhõkõmy risõnyre wesele tahe Deuxu Riõre Hãbu heka aõhõkõmy risinykre, jiarõ wahe. <sup>13</sup> Tai tahe Jesuisi erydõõna mahãdu rieryrenyre aõmybo Eliamy tii raryberemy Joaõ Sebedõõdule tahe Jesuisi rarybere.

<sup>14</sup> Iribi tahe dòosedenyde iny sõwemy riraõmy rõimyhõre. Hãbu-ò nade Jesuisiko-ò tatiowomy resere: <sup>15</sup> —Wanyrõ, ruxetõena wariõre-di biwahinyke. Irayky awimy aõkõ ratximyhõre. Bera-txi resemyhõre. Heõtyru-txi resemyhõre. Ibutumy aõna aõna riwinyrerimy ihõre. <sup>16</sup> Aerydõõna mahãdu-ò heka adidyde tahe tiu riteytenyõtyhy. <sup>17</sup> Jesuisi rirawyònyre tamyreny: —Kaiboho isira mahãdu atxitenyteri. Aõ heka inatyhyna heka akireny ijõkõre. Tiwese bede dõõnana bohe araòludunyrenykre. Bedese inihe bididy uladu wadee. <sup>18</sup> Tahe Jesuisi rarybere kia uladuwo-ki ratximyhõre: —Iribi wa bohonyke! Tahe uladu reytemy reare.

<sup>19</sup> Idi ierydõõna mahãdu Jesuisiõle rarybere: —Aõherekibohe jiarõboho tyytybybina iribi reteònykõreri? <sup>20</sup> Aõmareki kiehe ainatyhyna ibutetyhyreki õwõrutu sõmowesele ainatyhyna dikeki heka kai aõwiwihikõ biwinyke. Kai hãwãlõ-ò marybeke: —Iribi bexitake! Tai tahe hãwãlõ rexitake iwitxira suò. Aõ aõkõ adee isirake, ainatyhyna direki wahe. <sup>21</sup> Kia tyytyby bina iwitxira rare. Isiratyhyre heka. Kaiboho bexitõenybenykeki, binarehebenykeki, ixiery tyytybybina biteònybenyke.

<sup>22-23</sup> Kalileia bedeki Jesuisi taerydõõna mahãdu-wana ributunyre. Tai Jesuisi rarybere tamy: —Jiarõ, Deuxu Riõre Hãbu, rare. Tai inyõ riwahinykre hãbubinaõ-ò warubudõõmy. Inataõ txu-di tahe rubu-ribi adexixakre. Tai tahe ierydõõna mahãdu rabadewo nihikõre.

<sup>24</sup> Iu tiiboho heka Kafanaõ hãwã-ò ritehemynyre, inyõ Pedro-ò nade. Tii dohodõõna õwy butudõõdu rare. Tahe rarybere: —Awedu aõbohe tii rexiòwynykekõ. <sup>25</sup> Pedro rirawyònyre: —Tii riòwynymyhõre. Tai tahe Pedro rakemy reare. Iu Pedro tuu Jesuisi-ò rarybekemy hetowo-ò raloreu, Jesuisi juhuu rarybere: —Moribibo iòlõ rexitõenymyhõre õwydõõnany. Mynydu mahãdu-ribi aõbo ada ta taijõiribile aõbohe rotamyhõre. <sup>26</sup> Pedro tahe rirawyònyre: —Mynydu mahãduõle rexitõenymyhõre. —Inatyhy rare, Jesuisi rarybere. Ijoi mahãdu õsana riòwynyõhykymyhõre. Jesuisi rarybere: —Ihãre tahe ròkòdwydõõkre. <sup>27</sup> Òbitimy rakaòwònyrenykre. Kia Templo heto õwymy. Ibinamy kia iny-ò ariwinyõtyhy. Kai heka makre ahohokõ-ò awaxi-di behukre. Juhu utura kanakrele heka bidimykre. Idi iry biraynykre. Tai nieruõ-ki mahake. Iribi biditamya tahe makre iny õwydõõmy.

## 18

<sup>1</sup> Iule tahe Jesuisi erydõõna mahãdu tamy rehemynyre rõõraxire: —Mobohe Deuxu Iòlõna-ki nihikõmy rarekre. <sup>2</sup> Jesuisi heka ratximyhõ uladuõ ibire-ki. <sup>3</sup> Idi tamy rarybere: —Kai uladu weseleõmy mabeõkeki, Deuxu Iòlõna-ò malõbenyõtyhy <sup>4</sup> Uladu wese maraykynybenykeki heka, tii tahe Deuxu Iòlõna-ki inatyhymy rõirakre. <sup>5</sup> Kai waòraru-ki uladu kawesemy biwiòhenanykeki tiwawiòhenanymahãte <sup>6</sup> Kai uladuõ õraruna-txi resekemy risõnykeki, kai abinatyhymy atximahãte. Inyõ õy ritakamy reroti-di aratakemy heka inyõ adi rehuke bera-txi. Tii tahe awityhyre adee.

<sup>7</sup> Sõwemy heka aõna aõna rõira wary-ribi iny riatykemy. Tii adee ibinatyhyre. Tiiemy heka tuhy rarekre. Inydee heka ibinakre heka. Wary-ribi riòlõdõõnymyhõre heka tamy ibinakre. <sup>8</sup> Ebò õraru-ki tahe wainatyhyry-ribi

bexitakeki, ebò biòròmy idi behuke. Awityhyre heka adee Deuxu Iòlòna-ò malòkre sohoji ebòdile. Inatxi ebò-di heòty bedebina-ò malòkeki, awiòre heka. <sup>9</sup> Tule arue sohoji òraru-ki kia òrarunamy beseke lau, urile bitake idi behuke. Arue wiò-di heòty bedebina-ò malòheny arue-di wiòle. Biu bedewihikỹ-ò malòke tahe awire heka arueyremy. <sup>10</sup> Iny nihikỹ ityhy iny yja mahādu heka tuuòre. Uritere heka iweserenyòmy atxibenyke kaiboho bexiijebenyke tamy. Iny aòkò mahādu dori tii iỹju dire heka. Iỹjurenny heka Deuxuko tii ibutumy relyymyhỹre turenny. Idi òhòtirenny-ribi bosabenyòke. <sup>11</sup> Jiarỹ Hābutyhyhykỹ rare, Deuxu Riòre wahe. Ityhydỹỹdukòdu mahādu ibutumy aritakemy anade. <sup>12</sup> Rakawesenanykre heka kaijyy wesemy. Rakarybekre heka kahābu 100 budoeni ijòdire wesemy. Sohoji heka iòre iy-ribi. Kia hābu idi itxeredu tahe iy-ribi iòre rakre ijesemy. Iuhe tahe hāwālò-ki riroximy ririre. <sup>13</sup> Tai rahakre wana heka teysamy ratxikre. Kia sohoji òrarukile reysakre. <sup>14</sup> Iwesetyhylemy taheka inyò iòòtyhy Waha-ribi. Tamy dori kia ibinare.

<sup>15</sup> Inyò adee rexiòrarunyeky tahe tamy makre rybemy. Uritere inywitxi-rako-txi rybeòmy tuu. Tahe tamyhyylemy marybeke. Aityhydỹỹdu seriòre heka arybe-ò roholakeki, tahe ixi-txi tòhòti reake wana, ixi dee ibinamy ròhòtinyra wana, tai tahe kai ixyby tii-wana ityhydỹỹdu seriòre biòwamy beleke. <sup>16</sup> Aòhe wana tahe arybe-ò roholaòhykry, tahe ixityre make inyò wana rexibiòwanymy.

Iny inatximy ixihe-ki bidyke. Tii tahe arybe-ò ijohonaduke inatyhy raremy arybera-txi resekemy wahe. Iu dohodỹỹna-ki rarybekrey, tai tasỹ tii rarybeke teòsamy aòkò ratximyhỹrelemy rarybeke. <sup>17</sup> Tii irybereny-ò roholaòkeki, tai tahe dohodỹỹna mahādu-ò belyyke. Tii irybereny-ò roholaòkeki, tai tahe biteònyke. Tii iwese òrarudu mahādu heka adee rarekre, bede dinodu-ò nieru wydydu wese wahe. <sup>18</sup> Iwese kaiboho waityhydỹỹdu mahādu kabede-ki ròhòtinyre wesele, tule araykywesityhyle Deuxu biu-ki ròhòtinykre. Aòbo adee kabede-ki aòwidỹỹ ibinare ada awire heka tule biu-ki ibinamy rarekre, awimy rarekre. Arybe riwitxiranyòtyhy kowa biu bede-ki. <sup>19</sup> Iwitxiraòmy adeereny ararybekre: —Ijò titxibo inatxi ada inataò ityhydỹỹdu seriòre wiweselemy raraykynykre. Waha-ò rexitòenymyhỹreki iwese rexitòenyre wesele heka tamy riwinykre biu-ki. <sup>20</sup> Titxibo waniòraru-ki inatxi, inataò wii ributunykry heka, jiarỹ taile watxireri.

<sup>21</sup> Tahe Pedro rỹraxire Jesuisi-ò: —Bede erydỹỹdu! Waityhydỹỹdu seriòre heka wadee rexiòrarunyeky, tiwesebo sòwe ariixāwididỹỹnykre ixi-ribi debò inatxi reurò, my aòbo? <sup>22</sup> Jesuisi rirawyònyre: —Aòkòre, debòinatximy aòkòre, 490 wesemy wahe. Ixityre ixityre biixāwidỹỹnykre. <sup>23</sup> Deuxu Iòlòna kawesemy rare: —Iòlòò heka teòdu mahādu kia contamy robikemy idi ratxireri. Tiwesebo inieru-di rasiranyre wesemy wahe. <sup>24</sup> Sohoji teòdu juhūu dehemynyde. Sòwemy heka tevedỹỹna ratximyhỹre, 1000,000 womati tỹrỹrỹhỹkỹ nieru wahe. <sup>25</sup> Inieruòre heka iòwydỹỹna wahe. Idi rohonykemy heka iwedu riteònyre deòdu mahādu wesemy. Tariòre-wana tahāwyy-wana ibutumy deòdumy roirekemy. Aòbo tai rỹimyhỹ heka ibutumy idi rohonyre. <sup>26</sup> Tai kia deòdu heka tatiowotimy resere kia iòlòko-txi: —Waiòlòrenny, tx-ioinihe biwaraòkre ariòwynykry ibutumy. <sup>27</sup> Tai tahe iòlò riwotòenyre aòma ixinahykylemy ritusanyre. <sup>28</sup> Tai tahe kia hābu he rare kia urihimyo tamy radevenymyhỹò heka rexinohòtidỹỹnyre. Tai tahe hābu lòtikile rimonyre. Rierenymy resere ribòtòrarityxynyre: —Bidiwaòwynykry kỹnyhe wijityhyle. <sup>29</sup> Tai tahe tatiowomy resere, rarybere: —Txikre inihe ariòwynykry ibutulemy. <sup>30</sup> Tai tahe rirutyre ròtenawo-ò idi riòtenyry. Riwotòenyreòhyry. <sup>31</sup> Itxeredu

mahādu heka rabadewore tai tahe ibutumy relyyre iòlòko. <sup>32</sup> Tai tahe ixityre tamy rarariòwyre tamy rarybere: —Aõherewe, deòdu binahakỹ, jiarỹ araixāwididỹnyre ibutumy inatyhy? Kai dori ixitòedỹna wadee tewinyta. <sup>33</sup> Aõherekibohe aleina kia adee nadevenymyhỹde kia teixāwidinyòta, iwese jiarỹ araixāwidinyre wese. <sup>34</sup> Tai tahe tii rimyre reburere itere iòlò, tai imynomy riteònyre rotenawo-ò riòwynykre xiery riòlòdỹnykremy. Tai aõhòkỹmy rotỹnymyhỹre. <sup>35</sup> Jesuisi rexihura narybede: —Kiawesele heka adeereny rarekre. Ityhydỹdu seriòre taseriòre riixāwidinyòkeki heka iwesele heka waha adi riwisỹnykre.

## 19

<sup>1</sup> Jesuisi ibedeerydỹna-ribi rexihureu, Kalileia bede-ribi ròhònyre. Bero Jordaõ weribijà-ò reurore, Judeia hāwā bede kanawe-ribi ijà-ò rehemynyre.

<sup>2</sup> Tai tahe sòwemy iny webinadu mahādu rỹire. Idi tahe ihemy rare. Ibutumy riteytenyre. <sup>3</sup> Fariseu mahādu imynomy idi riwisỹnymyhỹre aõbinamy rarybekeki rimykemy. Tai tahe tamy dỹraxyimy namyhỹde aõsirahakỹmybo: —Iny bede ywinareny tahāwyy riteònymyhỹre urirybelemy, wiribi resekemy.

<sup>4</sup> Jesuisi dirawyònyde: —Ritidỹnyamy aõbo tariaõmyhỹte idi?

—Deuxu ibutu widỹdu heka juhuhu hābu hāwyy-wana riwinyre.

<sup>5</sup> Idi tahe rarybere:

—Hābu heka tybyboho-wana tadibocho-wana wiribi rexihitxinymyhỹre tai tahe tahāwyywanale wii ributunomy rỹira.

<sup>6</sup> Inatxi heka sohoji weselemy rarekre, hābu tahāwyy-wana. Deuxu heka hābu tahāwyy-wana ributunyre, inyò heka tiu rihitxinyòtyhy. <sup>7</sup> Tahe ijòmy fariseu mahādu ritỹraxyinyre: —Aõherekibo Moisesi kawesemy juhuhu rarybere:

—Hābu tahāwyy riteònykeki juhuhu urile tyyriti tamy riwahinyke riteònykekoki.

<sup>8</sup> Tahe Jesuisi kawesemy rarybere: —Kaiboho heka ieryna urihimyòlereki aõ isirareki heka kia riwinyre. Juhuhu tahe kawese aõkò rỹire. <sup>9</sup> Aõmale tahe ixinamy riteònyke ixi-ribi òta òtadule heka aõwaxiny tuu riteònyre ixi-ribi.

<sup>10</sup> Tai tahe ierydỹna mahādu rarybere Jesuisi-ò: —Tahe kiawesekeki heka uritere heriòmy hāwyyòmy, hābuòmy. <sup>11</sup> Jesuisi tahe dirawyònyde: —Kaa bede eryna heka aõ ibutuhukỹ-ò aõkò tureri aõma Deuxu bede eryna tamy riwahinymyhỹreòle heka tureri. <sup>12</sup> Aõtxi-ki tahe tuu hābuò rỹira hāwyyimy heridumy aõkò rỹira. Ijò hābuò tahe tiemy tunodumy rỹirerimy ihỹre. Iwixira hābu-ò rexiwahinomy rỹireriki heka tuu rỹirerimy ihỹre. Ijò tahe tuu rỹirerimy ihỹre aõma Deuxu aõmysdỹna òraru-ki wahe. Kaa rybe tahe inyò tahe rityhinykeki tii inatyhymy rityhinyke.

<sup>13</sup> Inyò didyde uladuõ Jesuisi-ò tamy rexitòenykemy tebò iraty tyre-ki roirerilemy. Ierydỹna mahādu tahe uritere iixiradỹnyòmyke. <sup>14</sup> Tahe Jesuisi rarybere: —Ixinamy kanamyhỹke uladu wadee. Uritere itinysỹrenyòmy. Uladu wesemy dori Deuxu Iòlòna ròtedu mahādu ratximyhỹre. <sup>15</sup> Jesuisi tahe iratytyre tebò ritidire tamy rexitòenyre. Idi tahe Jesuisi rare.

<sup>16</sup> Aõu tahe hābuò Jesuisi-ò nade: —Erydỹdu, aõhebo arotỹnykre. Aõma, timykibo umytuedeõna aritakemy wahe. Aõwidỹ wiwihikỹbo ariwinykemy.

<sup>17</sup> Jesuisi rarybere: —Aõherekibo wadee aõwiwihikỹmy widỹ tỹraxyiteri? Iny sohojile awi rare, Deuxule wahe. Kai bede ywina ibutumy bityhinyke, umytuedeõna hakỹ-ò molokre. <sup>18</sup> Aõbedeywinabo arityhinykre? Tahe Jesuisi rirawyònyre:

—Rubudỹnyòmy, Òta òta widỹnyòmy, wasiòmy, ruiòmy,

<sup>19</sup> Adi boo-wana bityhinyke, iwese ixiluure wese heka abireludu mahādu luuke.

20 Hābu rarybere: —Kia heka aōu aōu jiarỹ retyhynyre. Aōijōmybo arotỹnykre? 21 Jesuisi rirawyònyre: —Kai òbitimy mabekekile aōmydỹna-di ibutumy. Kia idi bohonyke òwy tahe biwahinyke urimynodu mahādu-ò. Tai sōwemy aōna aōna biu-ki ahōrōmykre. Iribi tahe biwaheludunyke. 22 Iu hābu kia roholareu tahe rabadewonihikỹre inieru sōwereki heka rabadewore.

23 Tai tahe Jesuisi taerydỹna mahādu ribedeerynyre: —Isiratyhyre heka biu bedè-ò ralòke aōma ityhy nihikỹkeki. 24 Isirare heka aōma kamelo tyy rurena òtumy ralòke heka isirare, inatyhy? Tai tahe aōma ityhy mahādu ralòke tarasanamy reake heka isirare. 25 Jesuisi erydỹna mahādu ribedeòtiinyre kai-ò roholareu. Tai tahe rōhōtinyre: —Aōkōre isiratyhyre tuu ròte. Inyō tarasanamy reaōtyhy. 26 Jesuisi tamyreny retehere tahe rarybere: —Inatyhy rare hābu-ò isirare. Deuxu dee tahe isiraōle rare. 27 Tai tahe Pedro rarybere: —Jiarỹboho ibutumy aōmydỹnareny adiridenyde. Araheludunymy watxiwāhāre. Aōma ritarenykre? 28 Jesuisi tahe dirawyònyde: —Kiamy heka adee ararybekre. Jiarỹ Deuxu Riòre Hābu tyhyhykỹ wahe. Kaiboho heka tule borukubenyke aiòlònaryna-ki iu ibutumy ratỹmyrakre. Kaiboho iny sohoji sohojimy judeu ijoio biywisidỹnanybenykre, waijoi waòinatxi reurò mahāduō wahe. 29 Inyō kia ibutumy aōbo waòraru-ki ririmyhỹre iwese taheto ririmyhỹre waòraru-ki, taseriòre, tadi, tyby, uladu, taoworu, ririmyhỹre. Kia sohoji sohoji-ribi heka aō sohoji sohoji òwymy 100 ritakre. Tule umytuedeòna ijōmy ritakre. 30 Inyō nihikỹmy ityhymy ratxirerimy ihỹre, tii iyjalemy relekre, aōma aōkō tai relekre. Tule iyja nihikỹmy relekre. Sōwemy urimynodu kaki rỹirerimy ihỹre tahe biu-ki inihikỹmy rarekre.

## 20

1 Jesuisi tasỹ riteòsinyreri ijyyò timyrebo Deuxu Iòlòna. Hābu aōmysỹdỹdu heka oworu widỹmy heka riteranymy tamy rarybemyhỹre: 2 —Aōmamy araòwynykre, sohoji prata womati nieru, iwese ibutumy raòwynymyhỹre wese, sohoji txuòwy wahe. Tai tahe tii raaòmysỹdỹre uva oworu-di raaòmysỹdỹmyhỹ. 3-4 Idi tahe tii reare 9 horau tule, txutyeyu tule, titxibo iaòmysỹdỹna rỹireri titxibo hābu teaòmysỹdỹmyhỹò. Tahe tuu robire urile ratximyhỹmyhe idi retehemyhỹ. Tai tahe tamy rarybere: —Maaòmysỹdỹke hewa, waoworu-ki. Ikonana txu heka òbitihyky araòwynykemy adi watxireri. 5 Tiiboho raaòmysỹdỹre tule. Txutyeyu tasỹ ixiryubule ijō riteranyre aōma iwese kia juhū ijō-ò rarybera wesele. 6 Txuinyòbira-ò ijō rinyre, tule ijō txiorotxure. 7 Iruyire hora-ò ijō tasỹ riteònyre. 8 Tahe txiorotxumy rōhònyra tahe kia iòwydỹdu tamy rryre. 9 Tahe 1 womati nieru tamy riwahinyre, sohoji hora raaòmysỹdỹre mahādu wahe. 10 Tahe txusohojimy raaòmysỹdỹre tahe iratyre ròtakremy ixi-di rōhōtinyre. Tahe tule riòwynyra iwese ijō riòwynyra weselemy, 1 womati nieru, sohoji sohoji wahe. 11 Tai tahe rinyre nieru urile tamy rexibinanymy rarybere: 12 —Kowa heka sohoji horale raaòmysỹdỹhārele heka 1 teòwynyta. Jiarỹ boho tahe txuhyy raaòmysỹdỹra, bedè tòtee-ki wahe. 13 Tahe iwedu rarybere: —Wabiòwa, adeereny rarybera. Wiji 1 womati nieru ariwahinykremy heka inatyhy? Tuheka adeereny rewahinyre. Aribi rawasinyora. 14 Boibenykre heka ibutumy araòwynyreri. Wiwesetyhylemy heka araòwynyrenyreri, iwese rarybere wese. 15 Hora sohojilemy raaòmysỹdỹraò sohojimy wanieru ariòwynykre inatyhy. Tamy wanieru ariwahinykemy ixideewimy, aōhe inatyhy? Aōherekibo tebureteri? Jiarỹ urihimyo raaòmysỹdỹraò wawiremy tarybetenyteri wahe. 16 Jesuisi tahe rexihure kia rybe-di, kiamykre bedè: —Ikoludu heka ihewoludu-ò resekre. Ihewoludu tasỹ iko-ò resekre.



<sup>17</sup> Tai tahe Jesuisi ròwònyre Jerusalē hāwā-ò. Iny-ribi tawaò inatxi reurò mahādu rihitxinyre. Tamy relyyre timybo aõhebo rotỹỹnykremy Jerusalē hāwā-ki: <sup>18</sup> —Jiarỹ, Hābutyhyhykỹ adee ararybekre: —Inyõ riwawahinykre aõma-ò Xiwena wahidỹỹdu wedu mahādu-ò. Tule diwatyhenykre judeu wedu mahādu-ò. Tahe riwarubunykemy heka tiiboho wamy rarybekre ijõ iny-ò. <sup>19</sup> Tii heka riwamykre tahe riwawahinykre Roma iòlò-ò, judeukõdu mahādu iòlò wahe. Ibinatyhymy aõhebo riwasỹnyny riwahetenyre. Itxeò nihikỹ-ò riwatamadỹỹnykre. Tahe txu inataõ-di rubu-ribi areixixanykre.

<sup>20</sup> Zebedeu riõrese Jesuisi-ò nade. Tatiowotimy resere tahe rexitòenyre aõmybo Jesuisi-ò tariõre-wana nade. <sup>21</sup> Jesuisi tamy rarybere: —Aõbo rare hāwyy rarybere: —Waritxòre inatxi hābu rare. Tikiboho kỹnyhe, aikòlònykuna rynana-ki ronykre awana. Ijõ aruruna-txi, ijõ ahywe-txi wahe, kai aikòlòkuna-kò malokreku wahe. <sup>22</sup> Jesuisi heka iriõre-ò rarybere: —Kaiboho aõmybo textiòenyteri teerykõleterì. Kai Txiau, kai Joaõ, teerytenyte aõbo aõhebo wadi rotỹỹnykre arurukre dori jiarỹ kaiboho tulekre? Tiiboho dirawyònyde: —Tulekre. <sup>23</sup> Tahe Jesuisi rarybere: —Inatyhy rare kaiboho tule aõhòkỹmy botỹỹnybenykre. Tahe mobo warora-txi ada waruruna weribi rynana-txi ronykre. Jiarỹ reerykõre. Wahale heka rieryre. Tiile tamy riywinyre. <sup>24</sup> Idi tahe debòwiò ierydỹỹna mahādu kia rieryre aõmybo Txiauku Joaõboho rexitòenyrenyrá. Tai tahe tiiboho rakyarananyrenyre. <sup>25</sup> Tahe Jesuisi ibutumy taerydỹỹna mahādu tamy kanakemy rarybere: —Iny iòlò iruru dire. Ibutumy dinodu tahe kia weselere —taijoi mahādu riteònymyhỹre. Teòdu mahādu riteònymyhỹre. <sup>26</sup> Tahe aõ tuukre aõkõ heka rare ayreny-ki. Inyõ dinodumy ixidikre heka deòdumy rarekre. <sup>27</sup> Kia iny nihikỹmy ixi-di rexinohòtynyteri tasỹ aõ aõkõ tii rarekre. <sup>28</sup> Iwese jiarỹ riwinyre wesemy heka rarekre. Hābutyhyhykỹ aõ dinodumy aõkõ anade. Iwese deòdu rỹira wesemy heka nade waumy riwahinykremy rubu-ò kabede-ki. Tai sòwemy iny ritakre.

<sup>29</sup> Iu Ijeriò hāwā-ribi ròirenyreu, tahe sòwemy iny riheludunyre. <sup>30</sup> Inatxi iruetàmy heka ronymyhỹ iu Jesuisi ibire-di rareu. Tiiboho roholarenyre kia Jesuisi raremy. Rexitòenyre ryryre Jesuisi-ò: —Davi riokore, wadee hewa ruxetòena biwahinyke. <sup>31</sup> Tai tahe iòhòmny iny iribi rỹimyhỹ rarybere: —Txioke inihe, biyryke! Ixityre ryryre tarurutyhy: —Inynyrỹ Davi riokore, Biwawotòenyke hewa. <sup>32</sup> Jesuisi tamy rarybere: —Aõwexe adeereny ariwinykre. <sup>33</sup> —Wanyrỹ, Kai wa bidiwaruenykre warue biraynykremy. <sup>34</sup> Tahe Jesuisi riwotòenyre iruebymy reare tebò-di. Aõwesele tahe ruòmny reare. Tai tahe Jesuisihe riheludunyre.

## 21

<sup>1</sup> Jesuisiboho tahe rehemynyrenyre Jerusalē hāwā iòhòmny. Betabaji hāwā-ò heka rehemynyre. Kia Oliveira hāwā-ò-ribi irehemy aõkõ ihỹre. Tahe Jesuisi inatxi iny riteònyre hāwā-ò, taerydỹỹna mahādu wahe. Tamy rarybere: <sup>2</sup> —Juhu hāwā dele-ò malokreule aõma bobikre, jumenta tariõre-wana. Tahe bitaanalawekre ta bididykre kaò. <sup>3</sup> Inyõ aratỹỹraxinykre wana, tai tahe kiamy bisỹnykre aõma: —Wawedu hewa idi ratxikemy ròhòtynyteri. Tai ki tahe ahemy kiditeònykre. <sup>4</sup> Kia ihetxiu ritidỹỹna tuheka relemy roimyhỹre. Kamy rarybere: <sup>5</sup> —Marybeke heka Jerusalē hāwā-ò:

—Deuxu Iòlòna heka kanakre adeereny wahe. Tii inihikỹ wesemy aõkõ kedehemynymy, jumenta tyre-ki heka kedehemynykre.

<sup>6</sup> Tahe ierydỹỹna mahādu riwinyre iwese Jesuisi rarybere weselemy. <sup>7</sup> Didyde tahe jumenta tariõre-wana. Ihetyreny jumenta tyre ritidire. Jesuisi ityre ronyre tahe idi rare. <sup>8</sup> Tahe inyõ sòwemy-ribi tahetyreny-di rehumyhỹre

iryko-txi idi rariakemy ityre-di. Ijõ tasỹ hereru-di iryko-txi rehure iryube hetymy ityre-di rariakemy. <sup>9</sup> Sõwemy tai iny rirajuamy rỹimyhỹ iko-ò, ihewo-ò:

—Iòlò Davi riokore heka sõwemy iny wowydyna tamy iny riwahinyreri. Tii Deuxu Riòre Hãbu rare. Deuxu deysana heka tamy biwahinyke!

<sup>10</sup> Jesuisi hãwãy-ki rehemynyreu, ibutumy iny ribedeòtiidỹnyre: — Mohãbuwe kia ralòreri Jerusalẽ hãwã-ki wahe? <sup>11</sup> Tai tahe iny mahãdu rarybere: —Aõkõre, kia Deuxu rybeduõ rare. Jesuisi inire Kalileia bederibi Nazare hãwã-ribi dehemynyde.

<sup>12</sup> Tahe ralore Deuxu dohodỹna heto-ò. Tai kia aõna aõna-di rohonyreri heka riteònyre. Kia aõma nieru wiurõna iòwòruwebese tahe riatyre. Kia aõma bòtòe dohodỹdu ryna ibutumy ritxiwire riatyre. <sup>13</sup> Tahe Jesuisi rarybere: —Deuxu Tyyriti rarybere:

—Dohodỹna heto heka waha heto rare, ixitòedỹna heto rare.

—Kaiboho heka inywasidu mahãdu-di tetỹxinytenyta. <sup>14</sup> Sõwemy iny itiere, iruetà, nade Jesuisi-ò dohodỹna heto-ò. Jesuisi taile riteytenyre. <sup>15</sup> Tahe xiwena wahidỹdu wedu tuu robire. Tule judeu bede ywina bede eryna mahãdu robireu tahe, aõma uladu templo-ki ryrymy rỹimyhỹò aõma: — Davi riokore heka Deuxudeewina rare. Tai tahe kia rybe-ò reburerenyre. <sup>16</sup> Tiiboho tahe raryberenyre Jesuisi-ò: —Kai aõbo taholate aõbo rarybereri. Jesuisi rirawyònyre: —Kohe, raholare. Kaiboho teeryõtenyte:

—Uladu dori wowydyna tamy riwahinykre. Tiu aõbo tariatenyõhyymahãte kia Tyyriti-ki.

<sup>17</sup> Tahe Jesuisi iribi ròhònyre Betỹnia hãwã-ò. Taile tahe ruu idi rỹire.

<sup>18</sup> Biurasò txumy tahe tii dòòsede Jerusalẽ-ò. Tahe rama risare iu. <sup>19</sup> Òwòruõ tai rỹire. Tai tahe diaride figoraty-ò. Tahe iratyõre, txirule rỹire. Tai Jesuisi rarybere òwòru-ò: —Tiu heka kai maratynyõtyhy aõwesele tahe irade rairuxỹrure. <sup>20</sup> Tai tahe ierydỹna mahãdu heka ribedeòtiidỹnyre: — Timykibo heka aõwesele rairumyrõmy reareri. <sup>21</sup> Tahe Jesuisi tamy rarybere: —Kai ainatyhyna ijòdikeki heka iwesele biwinyke. Iratyre biwinyke. Kaiboho heka bitxiõnyõkeki kaa hãwãlò-ò dori marybekre kiamy: —Iribi bexitake tahe aho-ò boikre. Tai hãwãlò-ò aõwesele heka ahoro-ò roikre. <sup>22</sup> Aõtxile kai bexitòenykre heka adee ijõ rỹikre. Bityhynytyhykeki, tahe ibutumy bitake.

<sup>23</sup> Tai Jesuisi dehemynyde Deuxu dohodỹna heto-ò. Tai tahe ròbedeerydỹmy ratximyhỹ. Tahe xiwena wahidỹdu mahãdu, tule judeu bede ywina erydỹna mahãdu tule tamy dỹraxyimy nade. Tai tahe Jesuisi-ò rỹraxyire: —Morurudibo heka kai aõmydỹnana tewinymahãte? Mobo heka arateranyre kia biwinykemy. <sup>24</sup> Tai tahe Jesuisi tamy rarybere: —Kai aõbo myraxyikeki wadee tai ako tuu arelyykre. Kai dỹraxyinaõmy bidiwatỹnynekeki tahe, adee tuu arelyykre. <sup>25</sup> —Joaõ Sebedỹdu heka morurudibo nade morybekibo tuu tadiwinymahãte wesemy. Morybekibo Joaõ iny risebenymyhỹre. Deuxu Rybe-ki aõbo ada iny rybe-ki aõbo. Tai tahe widee rarybe raryberenyre: —Aõma Deuxu Rybe-ki tuu ròsebedỹmyhỹre. Mykeki rakarybenykre taheka: —Aõherekibo tetyhynytenyõte myle tii risỹnykre. <sup>26</sup> Aõmamy rikisỹnynekeki: —Iny rybekile tii tahe nade. Myỹ rikisỹnynekeki tasỹ kia ijoi inydeereny rakyarananyke. Joaõ Sebedỹdu dori ibutumy iny rityhynyrenyre moma tii Deuxu deòduõ ratximyhỹre heka. Rakarybenyõkre tahe. <sup>27</sup> Tai tahe Jesuisi-ò raryberenyre: —Aõkõre, reeryrenyõre heka irawyòdỹ titxiribibo iruru nade. Tahe Jesuisi rirawyònyre: —Tule jiarỹ yraxyina adeereny aritỹnyrenyõtyhy. <sup>28</sup> Ijõ Jesuisi

relyyre: —Timybo maraykynybenykre ka ijyymy arelyykre. Hãbuõ heka inatximy iriõre raremyhỹ. Tariõre dela-ò rarybere: —Dãã, maaõmysỹdỹỹkre waoworu-ki, wiji wahe. <sup>29</sup> Tahe tamy dirawyõnyde: —Waha, araõkre hewa. Ihãrele tahe tawo rirahõrere rakremy. Tahe rare. <sup>30</sup> Idi tahe tyby rarybere helỹỹna-ò: —Kai tule makre waaõmysỹdỹỹna biwinykremy: —Dei wahe, arakre araaõmysỹdỹỹkre. Ihãrele tahe tii raõhyyre. <sup>31</sup> Adeereny inihe araỹraxikre. —Tibohe weryrybò aõma tybyrybe rityhynyre? Tai tahe dirawyõnyde: —Juduludule irybe rityhynyre. Tai tahe Jesuisi tamy rarybere: —Iny õrarudu tyhy heka wydena-wana ralõkre biu bede rõtana-ò. Ihãrele tahe kaiboho birõnybenyõtyhy. <sup>32</sup> Joaõ Sebedỹỹdu dori adeereny rarybere. Ihãrele tahe kaiboho ixitxireny aõrarureny-txi õhõtireny reakemy Deuxu bityhynykemy. Kaiboho heka teramy tekoamahãte tahe sõwemy õrarudu mahãdu wydena mahãdu rityhynyrenyre. Kaiboho tuu tabitenyte ihãrele teerytenykõte.

<sup>33</sup> Ijõ ijyymy arelyykre:

—Hãbuõ heka uva oworuhukỹle ritõbrõnyre. Tahe õtityna riwinyre. Tai tahe utã riwinyre yrubudỹỹdu mahãdu itxerenamy.

Tai tahe rihuõtere oworu wahe hãbu mahãdu-ò. Tii tahe rabetetỹinymy rare taheto-ribi. <sup>34</sup> Iu uva bederaty kia siredenamy bede reareu, riherehe txuramy ixidee ritxuakemy wahe. <sup>35</sup> Tai tahe huõtedu mahãdumy heka teòdu mahãdulemy raõhõtere. Ijõ tahe rirubunyre ijõ manadile tamy rehunanymy rỹimyhỹ. <sup>36</sup> Iribi tasỹ teòdu mahãduõ didyde sõwetyhymy juhuna ludu ratyre. Tahe ixybyle tuu raõhõtere juhoo iwese tuu rotỹỹnyra wesele. <sup>37</sup> Tahe iwedytyhy rõhõtinyre: —Aõma wariõrele kòri ariteõnykre. Tai tahe wariõre rityhynykre heka. Tahe tariõre diteõnyde. <sup>38</sup> Tahe huõtedu mahãdu weryrybòmõ robireu, tahe wideereny rarybere: —Kaa heka iwedu riõrele rare. Aõma iwedu rurukreu iaõna aõna, ioworu heka ixideereny rikimyrenykre. <sup>39</sup> Tahe rirubunyrenyre iumy-di rehurenyre oworuro-ribi.

<sup>40</sup> Tahe Jesuisi rarybere: —Adeereny araỹraxikre aõbo iwedu tamyreny riwinykre huõtedu mahãdu-ò iu tii rehemynykreu wahe. Timybohe tii riwinykre? <sup>41</sup> Tiiboho dirawyõnydenyde: —Kia rirubunykre ibutumy hãbu bina. Inywitzira-ò huõtenamy ele elemy wijuramy riatykre-ò riwahinykre.

<sup>42</sup> Tahe Jesuisi tamy rỹỹraxire: —Kaiboho aõbo Ryberiti-di tariaõletenyteri: —Mana-di heka heto widỹỹdu rehumyhỹre kia manale heto hàtxi-ki ritidimy roimyhỹre. Jiarỹ kia mana wese rare. Inynyrỹ Deuxu kia riwahinyre. Tai awi heka rare. Ijõ riwiõhenanyre, mana wahe.

<sup>43</sup> Tahe Jesuisi tamyreny rarybere: —Tule jiarỹ adeereny ararybekre: —Deuxu Iòlõna heka aribi ritakre. Tahe inywitzira-ò aribi riwahinykre. Inyõ txura wylemy riwahinykremy Deuxu-ò. <sup>44</sup> Kia iny mana tyre resemyhỹkre heka tii heka wiòròmõ ixòdumy rare. Mana inytyre resekeki tasỹ iny risururunya. <sup>45</sup> Inyõ roholakeki kia aõbo aõma xiwena wahidỹỹdu mahãdu roholamy rỹimyhỹ tule fariseu mahãdu. Tule rexierymyhỹrenyre tiiboho Jesuisi turenyle rarybereri heka rierymyhỹrenyre. <sup>46</sup> Tai heka tii mahãdu rimyky idy riwisỹnymyhỹ tahe iny sõwehekỹ lau ruberumyhỹrenyre. Iny mahãdu dori idi rõhõtiny tii Deuxu rybeduõ ratximyhỹremy.

## 22

<sup>1</sup> Jesuisi heka rexidelenyre ijyymy relyykre: <sup>2</sup> —Timybo Deuxu Iòlõna rare ijyymy heka relyykre. —Iòlõõ heka tariõre herinamy worana bedehesi riywinyre. <sup>3</sup> Iaõmydỹỹnana ròrarukòmõ rỹidi tahe teòdu mahãdu iòrysomy roire. Rexihumy rỹireriki iaõmydỹỹnana, kanakremy wahe. Tahe õrysina noderamy

reare. <sup>4</sup> Ijõ riteònyre teòduõ iny ritobinykremy. Aõhere tahaka, wabroneni kÿnyhe rerubunyre heka. Ibutumy heka waaõmydÿÿna rehumy rÿireri. Tahe kedeake kedeake heka kòdòidenyke heka. <sup>5</sup> Tahe timy heka irybe rityhynyrenyõhyre. Iny sohoji sohoji tatyresi-di ijohona-ò, ijõ taaõmysÿdÿÿna-ò rea reare, ijõ taoworu-ò reare. <sup>6</sup> Ijõ lobidÿÿna reburere teòdu mahãdu dee. Tii teòdu dee heka rawobinare. Ijõ aõbina bina heka ritxienyre ijõ rirubunyre dori. <sup>7</sup> Tai tahe iòlò reburere lobidÿÿna mahãdumy bina bina raòhòtedÿÿnyre, rirubunyre. Ihãwã ritoonyre. <sup>8</sup> Tai iòlò rarybere teòduboho-ò: —Waworana bedehesi rexihumy rÿireri ibutumy. Kia iny mahãdu ijoi juhoo retobinyra heka aõ ibina heka roire. Urile riòmysanymyhÿrenye. <sup>9</sup> Tai tahe ibutumy boibenykre hãwã-ò ibutumy iny-txi bekoabenybeker heka bitobinybeny-beker ibutumy waworana bedehesina-ò kedeake kedeakremy. <sup>10</sup> Tai tahe didyde iny wiwihikÿ, iny ityhy iny bina mahãdu. Hetowo tahe ritÿxire tÿmyra mahãdu-di. <sup>11</sup> Tahe iòlò ralore hetowo-ò kia iny mahãdu dee rybemy. Tahe tii robire hãbuõmy kia worana bedehesi kia tykyõmy ratxirerimy. <sup>12</sup> Tai tahe tamy iòlò rarybere: —Waliiny, aõherekiwe worana bedehesi kia tyky-di aõkõ atxiteri? Kia tahe hãbu rybeõmy riijere. <sup>13</sup> Tai tahe iòlò aõma rarybere teòdu mahãdu-ò: —Bimybenyke kaa hãbu. Waa bitaataabenyke imy behubenyke tahe idi diòlòdÿÿmy idi rehukre luruhukÿ-ò. Tai Aõhõkÿmy dÿÿnana-ki tai txuraruti rikyikyiny. Tai rahinykre. <sup>14</sup> Tai tahe Jesuisi rarybere: —Sõwemy iny heka kidirahukre tahe ibutemy kanaarikre.

<sup>15</sup> Tai tahe fariseu mahãdu ròhònyre wii rotyre. Aõbinamy Jesuisi rarybekeule heka rimykyemy idi rÿimyhÿ. <sup>16</sup> Kia aõma fariseu ijoiõ heka riteònyre Jesuisi-ò. Tule Herodi ijoi mahãdu riteònyre. Rÿÿraxire Jesuisi-ò: —Erydÿÿdu, kai heka hãbuwi tate, hãbu òbiti. Kai heka tòbedeerydÿÿmahãte Deuxu deewinamy. Awire aõbo ariòwynyrenykre Roma hãwã mahãdu dinodu-ò. <sup>17</sup> Kai heka ixinamy aõma adee iny rarybererimy ihÿre. Timybo iny raraykynyrerimy ihÿre. Iny bede ywinareny aõbohe ixinamy nieru aõna aõna òwydÿÿnamy ròhònyke aõbohe awire? <sup>18</sup> Tai Jesuisi heka rierymyhÿ aõma awimy aõkõ tai rahareri heka rexierymyhÿre: —Kaiboho òbitimy aõkõ toite. Aõherekibo heka kai biwaitxenanybenykemy wamynomy wadi atxitenyteri? <sup>19</sup> Timybohe nieru-ki rakaharenykre aõna aõna òwydÿÿnamy. Biditeòsinyke kia-ò arierykremy. Tai tahe tamy riteòsinyre womati nieruõ. <sup>20</sup> Tahe Jesuisi ritÿÿraxinyre: —Motyytybybo koa rÿire. Monibo ityre-ki koa roire? <sup>21</sup> Tai tahe rirawyònyre: —Roma hãwã iòlònila tai roire. Tai tahe Jesuisi rarybere: —Tibo Roma hãwã iòlò nierubo heka tamy biwahinykre. Tibo Deuxu nierule tasÿ tamy biwahinykre. <sup>22</sup> Tai tahe urile ribedeòtiidÿÿnyre. Tai ririrenyre ròirenyre.

<sup>23</sup> Tahe kia txule saduseu mahãduõ heka dòidenyde Jesuisi-ò. Rityhynyõhyymyhÿre kia aõma rubu-bibi ixixana heka rityhynyõhyymyhÿre, saduseu mahãdu wahe. <sup>24</sup> Tamy rarybere: —Erydÿÿdu, Moisesi tyyriti heka kawesemy ribedeerynyre:

—Aõma hãbumy hãwyy heridumy roikeki aõbohe timykibo hãwyy uladu-di ratxikeki. Hãbuõ iriòrekõ-di rurukeyi tai tahe iseriòre heka iriòrese tyby-wana roike. Tai heka kia hãbu rubuweleu, kia deròwomy heka uladu ritybinyke.

<sup>25</sup> Aõu heka debò inatxi seriòremy kaki rasÿnomy raremyhÿ. Telareny heka roire hãwyy tahe iriòrekõlemy rurure. Tahe ihãwyytybyhe kia iseriòrewanale roire. <sup>26</sup> Ihelÿÿna sÿ tule rurure. Kia heka ibutumy debò inatxi reurò tii-wana roihyyre iriòrekõule. <sup>27</sup> Tahe hãwyy heka tule rurure. <sup>28</sup> Tai tahe kia ruru-ribi

rexixakreu tahe, tiwexe ihābukre? Ibutumy dorihe tii-wana heka roile-hekylera. <sup>29</sup> Tai tahe Jesuisi rirawyònyre: —Kaiboho teerytenykõlemahātenyte timybo Tyyriti-ki roimyhÿre. Deuxu ruru tule teeryõte. <sup>30</sup> Tiu iny rubu-ribi rexixakreu iwitxiramy rexixakre. Ýju wesemy ronykre. Timy heka hābumy hāwyymy roiõtyhy. <sup>31</sup> Kaiboho heka tetyhynytenyõhyymahātenyte rubu-ribi ixixana. Idi heka tariatenyõhyymahātenyte timybo Deuxu rarybere? <sup>32</sup> Kiamy heka rarybere: —Jiarÿ heka Abraõ Deuxu rare. Ijai Deuxu rare. Ijaò Deuxu jiarÿ rare. Tii heka iru mahādu Deuxu heka tii ihÿre rubu mahādu Deuxu aõkõ wahe. <sup>33</sup> Iu iny sõwe ribedeerynyreu, tahe urile iny ribedeòtiidÿÿnyre.

<sup>34</sup> Fariseu mahādu doidenyde Jesuisi-ò wii rotyrenyde. Roholareki wahe aõma saduceu mahādu ribedeòtiidÿÿnyrenydeki. <sup>35</sup> Bede ywina erydÿÿna mahāduõ rÿÿraxire heka aõmybo Jesuisi-ò. Tii rimyky heka idi riwisÿnymy kia rybebinaõmy rirawyònykeki rimyky. <sup>36</sup> Tahe rÿÿraxire: —Erydÿÿdu, ti-bohe aõbo bede ywina kia-ribi aõnityhymyhewe bedeòtiidÿÿnamy ratximyhÿre. Wakoreny inihe tuu bedelyykre. Tibo kidiòtiidÿÿnamy ihÿre. <sup>37</sup> Tahe Jesuisi dirawyònyde: —Iny Deuxureny iny iòlòreny luuke heka. Ibutumy awo-ribi heka iluuke, ibutumy aruruna-ribi, ibutumy arayky-ribi luuke heka. <sup>38</sup> Tii heka inatyhy bedeòtiidÿÿna tyhymy ratximyhÿre ibutu bede ywina-ribi. <sup>39</sup> Ijõ ihelÿÿna tahe iwesele heka rare: Iwese ixiluure wese heka ibutu luuke. <sup>40</sup> Ibutumy Moisesi bede ywina heka juhoo rare. Tule Deuxu rybedu mahādu erydÿÿna heka iribile rare. Kia bede ywina inatxi-ribi heka ibutumy iny bede eryna ròhònyre. Kia inatxi bityhynymy bohonykeki iuhe heka tetyhynymahāte.

<sup>41</sup> Iu fariseu mahādu iweroramy rÿimyhÿò tahe rÿÿraxire Jesuisi tamy: <sup>42</sup> —Mobo Deuxu deòdÿÿnamy ihÿre, Kristu wahe? Moriòrebo tii ihÿre. Tai tahe tiiboho rirawyònyrenyde: —Moma Davi riokore òsana. Tahe ijõ Jesuisi rÿÿraxire: <sup>43</sup> —Tai tahe aõherekibo Davi heka Wanyrÿmy rininire Deuxu Tyytybytyhy irybe riwiòhenanyreu wahe. Davi dori kawesemy rarybere: <sup>44</sup> Deuxu wawedu-ò rarybere.

—Bodonyke warurunawe-ribi, jiarÿ heka aòludu mahādu-di arawo-txi.

<sup>45</sup> Davi tawedumy Kristu rininirehāre, timykibo Kristu iriokore riokorekre.

<sup>46</sup> Tahe inyõ heka Jesuisi rirawyònyõhyre. Tai tahe ruberumyhÿre tamy rÿÿraxike lau.

## 23

<sup>1</sup> Jesuisi heka iny sõwe nihikÿ ribedeerynymyhÿ taerydÿÿna mahādu-wana. Tii rarybere: <sup>2</sup> —Judeu bedeerydÿÿdu mahādu heka Moisesi bede ywina bede erydÿÿna mahāduõ rare. fariseu mahādu tule bede ywina riwinymyhÿrenyde. <sup>3</sup> Iwese ribedeerynyre wese tahe bityhynykre. Uritere iwese tii riwinymyhÿre wese uritere iwidÿÿõmy. Aõwidÿÿmy rarybemyhÿrenyrehāre tahe aõwitxira heka riwinymyhÿrenyde. <sup>4</sup> Tiiboho heka atyrenyde riòdònynihikÿmyhÿre bede ywina. Ihāre tahe rityhynyrenyõhyymahārenyde. <sup>5</sup> Aõma òbitimy ratxike sÿny heka iny tamy roholamyhÿre ixidi ratxirerimy ihÿre. Aõma walabu riòreõ heka rÿimyhÿre axiò-ki bede ywina heka ritidimy roimyhÿre ityky ijete retydyna bede ywina-txi tõhõti reakemy tuu riwinyrenyde. Sõwemy heka iretydyna riwinyrenyde. <sup>6</sup> Ronymyhÿreu heka ikoòhòkÿle ronymyhÿre, worana bedehesina rÿi-wana wahe. Dohodÿÿna heto-ki heka tule ronymyhÿre, iko-ò tuu rexisÿnymyhÿ. <sup>7</sup> Hāwāy-ki iny tamy ryrymyhÿre: —Waerydÿÿdu, Habimy, kia tahe irybe-ki bede erydÿÿdu rare. Tii tahe tamyreny awire. <sup>8</sup> Tai tahe Jesuisi tamyreny rarybere: —Kaiboho heka uritere Habimy inyõ adeereny irykõmy ihÿke. Deuxu sohojile bede

erydÿÿdu heka rare. Ibutumy kaiboho seriðre wesemy atximahãtenyete. <sup>9</sup> Kasu-ki taheka inyð heka tiu wahamy inyð widee rarybeðtyhy Deuxu biu-ki ratximyhÿrele tuu bininibenyke heka. <sup>10</sup> Uritere Wawedu myÿ inyð kia nidÿÿðmy. Deuxu deðdÿÿnale heka awedu ratximyhÿre Mesia wahe. <sup>11</sup> Anihikÿmy ixi-di mohðtinnykeki tahe, kia iny biwiðhenanyke. <sup>12</sup> Kia ityhy rare ixi-di rðhðtinnyhÿre, tii heka ihewo-ribi rabedewokre. Ihewo-ribi tahe aðma aðkð relekre. Kia iaðkðmy ixi-di rðhðtinnykre tahe nihikÿmy heka relekre. <sup>13</sup> Belàhàxe! Kaiboho itxenadÿÿluku. Ibina adeereny kanakre, kai bede erydÿÿna mahãdu, fariseu mahãdu. Kaiboho uritere iny rðtedÿÿrenyðmy Deuxu Iðlðna-ð. Kaiboho birðnybenyðtyhy tule iny rðtedÿÿ-ð biebenyke. Kaiboho bexisÿnybenyke òbitinamy. <sup>14</sup> Aixitðedÿÿna rehereheki wahe hãwã ube-ki. Kaiboho urile iny teitxenanymahãtenyete. Aðma wytese urimynodu heka iheto-ribi teteðnymahãtenyete kaiboho heka abinarennyre. Tai heka kaiboho yla aðkð aðhðkÿmy botÿÿnybenykre. <sup>15</sup> Belàhàxe! Kaiboho ibutumy iny aratyhynnyrennykemy ixi-di tahðtinnyahãtenyete. Tai heka iny tesÿnymahãtenyete òrarudutyhymy wahe ixiratyre heka teijiradÿÿnymahãtenyete. Aðraru-ki heka aðhðkÿmy botÿÿnybenykre. Iny-di atxikemy heka tahðtinnyahãte. <sup>16</sup> Kaiboho ruetà mahãdu wesemy kai ahãte. Kaiboho heka kia wesemy tebedeerynytenyete. Inyð heka Deuxu bede eryna heto riwawiðhenanykeki heka aðna aðna ariwinykre. Myÿ marybebenykeki, heka að aðkð heka rare. Deuxu dohodÿÿna heto womati tÿrÿrÿhÿkÿ-di marybekeki heka, tii heka rityhynnyhy. Ibutumy heka kia bede ywina òta òta tewinnyahãtenyete. <sup>17</sup> Kaiboho heka bede erydÿÿdu bede erytyhykð mahãdu atxitenyeteri dohodÿÿna heto kia-ð ralðkeki. Aðbo bedeðtiidÿÿna tyhyre womati tÿrÿrÿhÿkÿ aðbo ada dohodÿÿna hetole aðbo teeryðte, Deuxu Dohodÿÿna heto wahe. <sup>18</sup> Kaiboho tule tebedeerynyte kawesemy. Inyð tarybe inatyhy-di rarybekeki, tai heka kia xiwena wahidÿÿna-di rarybekeki, tai tahe tii rityhynyðkeki, awira. Tahe tii xiwena wahidÿÿna tyre-ki rarybekeki tahe, tii òbitimny heka rarybeke. <sup>19</sup> Kaiboho ruetà mahãdu wese, kaiboho heka erydÿÿnakðdu mahãdumny toite. Aðbo awityhyre? Xiwena wahidÿÿna aðbo ada ityre-ki wahidÿÿna roimnyhÿre aðbo? <sup>20</sup> Wahisidÿÿna heka wiwesele rare. Aðma xiwena tyre-ki roire wana tule wiwesele rare. Aðma xiwena tyre-ki roiðre wana wahe heka að aðkð rare. Xiwena utàle heka rierymnyhÿre inatyhy rare. Myheka kai mararybekeki heka tai tahe kai heka xiwena utàlemny tarybeteri. Ibutumy iny ityre-ki rÿire bohomy tule heka tai tuu tarybeteri. <sup>21</sup> Deuxu dohodÿÿna heto òraru-ki kai koityhyxemy marybekeki heka tai heka kai dohodÿÿna hetomy tarybeteri hãre tahe Deuxu iwo-ki ratxirerilemny tuu tarybeteri. <sup>22</sup> Biu òraru-ki ka koityhyxenyeteri marybekeki, Deuxusÿmy tarybeteri. Tii dori tarynana-ki ronyreri. <sup>23</sup> —Belàhàxe! fariseu mahãdu! Kaiboho heka itxenadÿÿdu mahãduð toite. Tule bede ywina bede erydÿÿdu mahãdu. Adeereny heka ibinamy ratxikre. Arÿsÿna uri jurað heka kai Deuxu-ð tewahinyete, hortelã, erva-doce, cominho wahe. Kaiboho heka aðninihikÿ tetyhynnytenyðhyymahãtenyete. Iwese òbitina, ruxetðena, inatyhyna kia-ribi heka òhðti losamnyhÿre ibutumny. Aðmydÿÿna jura wahisidÿÿna heka awi rare. Tahe tule uritere òhðti losaðmyke aðwitzira-ribi wahe. Aðbo bedeðtiidÿÿnare bede ywina-ki. Kaiboho heka bede erydÿÿdu toite hãre tahe teerytenyðte. <sup>24</sup> Belàhàxe! Kai hãbuð wese rare. Tiiboho imona berarenny-ribi ohoruxðmo riarimahãre. Ihãrele tahe tiiboho irðdu nihikÿ rirÿsÿmyhÿre. Iwesele kaiboho tule terÿsÿmyhÿtenyete. <sup>25</sup> —Belàhàxe fariseu mahãdu, bede ywina bede erydÿÿna mahãdu. Amona deoreny tesuhðmahãtenyete iwe. Iwo tahe ka

isuhukỹlemy rỹimyhỹre. Itxenadỹỹna rỹire. Aõma aumy weselemy heka kia ratximyhỹre. Aõma aumy heka webòròsityy tyrare heka. Araykywo-ki tahe ibutu itxenadỹỹ heka tai rỹimyhỹre. <sup>26</sup> Belàhàxe fariseu mahãdu! Kaiboho taruetà mahãdu. Kai mona hynawo bisuhòke heka biòtinyke. Aõma bisuhòke ihỹre tahe arayky bityranykre. Tahe ibutumy heka aumy ryranykre. <sup>27-28</sup> — Belàhàxe fariseu mahãdu! Kaiboho heka koityhyxenyteri. Rubu heto wiwihikỹ ixideereny tewinymahãtenynte. Kaiboho heka iwesetyhylemy toite. Aõma webòròsitylydu heka iruxeramy idi toite. Aõma aworeny-ki tahe aõma iny rubu idi ròhòkỹdileka atxitenyteri mahãtenynte. Ibutumy aõbina bina awo-ki arayky-ki idi atxiteri mahãtenynte. Aumyreny-ki heka tykywihikỹ texitykyny mahãtenynte. Aõma hãbu wihikỹwesemy. Hãbu òbitimy matxibenyke myheka iny adi ròhòtirenkyemy heka tuu texitykynymahãtenynte. Araykywo-ki tahe arimyrenywo-ki tahe ibutu itxenadỹỹna-di heka toite, òrarudu mahãdu toite. <sup>29</sup> Belàhàxe! Tai heka kaiboho Deuxu rybedu mahãduõ rirubunyre. Kaa nohòti ijaranamy tuu tewinymahãtenynte. Awabederenywo-ki heka noijasa ruxerahakỹle tetidite. <sup>30</sup> Kaiboho heka tarybemahãtenynte. —Tiu wahareny riwinyre wese heka ariwinyrenyòtyhy. <sup>31</sup> Kiamy tarybeteu heka hãbu bina riòremy texininite. Bowesele toite. Iriòre toite. <sup>32</sup> Iwese juhoo ibinamy riwinyre wese heka iwesetyhyle aõhebo tatỹỹnymahãtenynte. <sup>33</sup> Iwese hemylala deborehekỹ wesemy heka kaiboho atximahãtenynte. Boreny tule iweselere. Timybo heka kaiboho heòty bede-ribi mahenybenyke? Kaiboho heòty bede-ò boibenyke. <sup>34</sup> Adeereny ariteònykre aõma Deuxu rybeduõ hãbu erydu, tyyriti erydu wahe. Kaiboho bidirubunybedenykre. Ohodỹỹna heto-ki ijõ bidihetenybedenykre awaru hetenaõ-di. Itxeòtyre-ki ijõ bidirubunybedenykre. Ijõ heka biheludumykre hãwã hãwã-ò tamy ibinamy riwinykremy. Aõhòkỹmy dỹỹnana heka tamy biwahinybenykre ijõ hãwã-ò rakreu. <sup>35-36</sup> Kia heka hãbu ibutumy rurure tyby òraru-ki wahe. Dohodỹỹna hetowokile rirubunyrenyre. Kaiboho Abeli juhoo terubunytenynte ikonana tahe Zacaria, Barakia riòre wahe. Òbitityhy juratya-ki heka tuu tewinytenynte. Wijinabòdu mahãdu tai aõhòkỹmy rotỹỹnykre. Ibutumy ibinamy kai atyre-ò kedeseke. <sup>37</sup> Jesuisi ikonana tahe rarybere: —Jerusalẽ hãwã mahãdu, kaiboho heka terubunytenynte Deuxu rybemy rybedu mahãdu. Jiarỹ heka aramykemy adi rewisỹnyreri wariòre wesemy tahe waderarenyre kaiboho. Iwese hãnieõ iriòre ridyre wese idewo-ki. <sup>38</sup> Aheto heka ixisohojilemy rỹimyhỹre. <sup>39</sup> Kaheka ararybekre adeereny: —Wamy heka bobiòtyhy ixityre. Kai heka Deuxu deòdỹỹna bidykreule wamy bobikre. Iu rarybereu, Deuxu deysanamy, wamy bobikre.

## 24

<sup>1</sup> Iu Jesuisi ròhònyreu dohodỹỹna-ribi, ierydỹỹna mahãdu tamy rarybere dohodỹỹna heto itxeremy ròikemy, eleri-ò wahe. Tai tahe Jesuisi dirawyònyde: <sup>2</sup> —Inatyhy rare, awi heka rare. Urile tahe kidiixãwididỹỹnykre heka. Timy heka manaõ wityre-ki roiòhykre. Ibutumy bede-ò idi rehukre. <sup>3</sup> Iribi tahe Jesuisi rehemynyre Oliveira hãwãlò-ò heka ronyre. Tai tahe erydỹỹna mahãdu tii ritỹỹraxinyre iny sòwe-ribi: —Tiubohe ibutumy kedeixixãwididỹỹnykre. Tiuboho ibutumy bede konanadỹỹnamy reakre. Timybohe rikieryrenykre kai bedehemynyke aõma bede ibutumy rexihukre. <sup>4</sup> Tahe Jesuisi tamy rarybere: —Uritere inyõ aitxenadỹỹòmykre. <sup>5</sup> Sòwemyhe iny itxenadỹỹnamy rỹirakre. Jiarỹ Kristu rare, Deuxu deòdỹỹna heka jiarỹ rare, myheka adee kanarybekre. <sup>6</sup> Kaiboho heka boholamy mabekre iny aõbina ròhònymyhỹkre:

boholamahãkre. Ihãre tahe iny rarybekre aõma: —Karibi heka aõbina urihimyò ròhònykre. Myhe rarybemahãkre. Ihãrele tahe kòdòòseõkre aõma ikonana urihimyò. Ibutumy heka kia wesemy relekre. <sup>7</sup> Aõma kia wesemy heka bede roimyhỹ rarekre aõbo iny witxira witxira heka ibutumy iòlòna heka riteranymyhỹkre. Aõbinamy. Tai heka raaõbinanymy rỹirakre. Aõma rama ijara reakre. Bede ibutumy ramytatakre hãwãõ-ki. <sup>8</sup> Kia heka iwese hãwyy uladu dese wesemy robumyhỹre wese tukre. <sup>9</sup> Adeereny heka aõhõkỹmydỹnana tiiboho riwahinykre aõma wani òraru-ki wahe. Ijõ kaibohoõ heka ararubun-nyrenykre. <sup>10</sup> Sõwemy heka iny riatymyhỹkre wary-ribi heka riatymy rir-imeyhỹkre. Wii rityhenymyhỹkre. Widee rakyarananymyhỹkre. <sup>11</sup> Rybebina rybeduõ heka sõwemy kedehemynykre tahe kia heka sõwemy iny riitxen-nyanymyhỹkre. <sup>12</sup> Iu heka òraru nihikỹ iu ròhònykremy roimyhỹre. Sõwemy heka luuna-di rỹiramyhỹ katahe wiji ixãwikre heka ihomy aõkõ relekre. <sup>13</sup> Kia idi hyy rỹirakre ikonana-ò. Tii mahãdu tahe tarasanamy reakremy rỹira. <sup>14</sup> Ibutumyhe kia iny-ò rybe tỹnydỹnany reakremy rỹira, Deuxu Rybewihikỹ Tỹmyra wahe. Ibutu iny witxira witxira heka roholakre rybe wihikỹ-ò. Kia rahudi hikỹle heka taheka kedehemynykre heka ikonana. <sup>15</sup> Aõbinahakỹ tyhybohe ibinatyhy rỹikre. Tii heka rỹikre heka aõma Deuxu ubetyre-ki, Deuxu isỹ-ki, kiaweselemy heka rỹikre. Bieryke aõbo kia rare. Bieryke aõbo kia rare Danieli heka Deuxu rybeduõ ihetxiu kiamy heka rarybere:

<sup>16</sup> —Judeia mahãdu bede-ribi tahe kia bihenybenyke. Ibutumy heka bòibenykre hãwãlò bede-ò biòturònykre.

<sup>17</sup> —Kia bededỹnanau heka tiu aõ bimyoõtyhy ahetowo-ribi. Tiiemy heka ròhònyhykyle rakre aõwesele wahe.

<sup>18</sup> Iu bedero raaõmysỹdỹkrey heka tiu kòdòòseõtyhy tatyky itxemy. <sup>19</sup> Tule aõma hãwyy bòtòmỹ rỹira kia bedeu aõhõkỹmy rotỹnykremy rỹira. Kia tohouã-di ratxireri tahe tamy isirakre heka itybiedỹỹ idi rakeõ heka isirakre. <sup>20</sup> Bedejutytykõkemy heka bexitòenyke ahena mahenykeu. Tule sabado txu aõkõkemy bexitòenyke. <sup>21</sup> Tiu heka aõhõkỹmy dỹnana iny rotỹnyõhyymyhỹre kaa aõhõkỹmy dỹnana nihikỹmy. Tule tiu tuu robiõhyymyhỹre. <sup>22</sup> Kia Deuxu irokorehemynykre wana heka ibutumy iny ituekre. Kaa urihimyòlekre wana tahe kai Deuxu hõrõ mahãdule tuukre. <sup>23</sup> —Aõma Mesia heka kowa-ò rehemynyra, Deuxu deòdỹna wahe. Ihãre tahe kai heka inyõ adee rarybekeki tahe tetyhynyõhyte heka. <sup>24</sup> Kia iu kedehemynykre tahe aõ Kristu tyhy aõkõ heka rarekre. Aõma rybedu itxenadỹỹdu heka tule aõna aõna wiwihikỹ riwinykre. Aõma ityhydỹỹdu dori riitxenanykemy idi riwisỹnykre: <sup>25</sup> Boholake, juhoo dori adee relyreri ibutumy aõhebo rotỹnykre. <sup>26</sup> —Aõma arateòwarinyre dori tuu. Kia Mesia, Deuxu Deòdỹna heka ròòsereri. Beteheke bederahy-ki, tule hetowo-ki. Iu tahe timy heka tamy itxeremy raõtyhy inatyhy aõkõreki. <sup>27</sup> Iu jiarỹ Deuxu Riòre Hãbutyhyhykỹ arehemynykre ibutumy heka rierykre loosõna delaana wesele heka wadehemynyna heka rarekre biu ibutumy ritỹxinykre. <sup>28</sup> Iwese aõ rubu roimyhỹre, rara heka tamy rabutumyhỹre. Kaiboho rierykre iu rehemynykre. <sup>29</sup> Iu kia bede dỹnana reakre tahe txulyby heka kòdòhònykre. Ahãdu tule rybinykre. Taina tule ixewesehekỹle kanakre. Ibutumy ramytatakre biu-ki. <sup>30</sup> Iule tahe kia wadehemynynamy iny robikre. Sõwemy heka hinana ibrunana bede bedemy rỹirakre. Ibutumy heka iny robikre wadehemynynamy biuwetyky-ki, jiarỹ dori, Deuxu Riòre, Hãbutyhyhykỹ rare. Loosõna ruruna sõwekre, tahe arehemynykre. <sup>31</sup> Tule wajurõna-di, ÿju aditeònykre iu, ajurõna wodỹhỹkỹ-di. Tahe ibutumy wahõrõ mahãdu he ixidee aributunykre bede bede-ribi, ibutu rehetyhy-ribi wahe. <sup>32</sup> Jesuisi tule relyyre:



—Ijyyōmy heka ako arelyykre. Kai heka ibede erynamy bimykre. Iu kia figueira òwòru hābu wiji tybiehekỹ. Kia aōma iruru tỹmyra rurunymyhỹrè. Tule aōma txirubò tỹmyra ròhònykre. Tiu tahe bierykre. Kai iòhòra bohe wyra. Myhe tamy besekre. <sup>33</sup> Iwesetyhyle taheka kai heka bierykre. Aōma wadehemynyna ròhòny relekre wahe aòbitikre wadehemynyna iu, aòhòkỹmydỹñana wahe. <sup>34</sup> Tiu kia bededỹñanaule heka bedekònyyna rexihukre. <sup>35</sup> Biu heka bede-wana ituekre warybe tahe aōu aōu heka rỹihyymy rarekre. <sup>36</sup> Inyò heka rieryòhyymyhỹre. Tiubo txuu ruu kai konany rỹimyhỹre wahe Ýju dori tiu rieryòhyymyhỹre. Aōma, jiarỹ Deuxu Riòre dori rieryòre. Aōma Waha Deuxule tahe rierymyhỹre. <sup>37</sup> Noe bededỹñana wesemy heka rỹimyhỹkre iny risinykre kia bedeu. <sup>38</sup> Ibutumy heka worana bedehesi rỹikre kiau. Lisisò tahe rỹikre. Herina lisina aōma hāwyymy herina. <sup>39</sup> Tahe Noe bededỹñana wesemy heka reakre. Iu heka beòra rariare. Tahe rityyhynyòhyyre tiiboho. Tahe heka raòwònyre rariare ibutumy ituere. Iwesele tii heka rarekre heka, wadehemynyna Deuxu Riòre Hābutyhyhykỹ wahe. <sup>40</sup> Inatxi hābu heka oworu-ki raaòmysỹdỹñkre. Ijò heka rakre dynamy reakre. Ijò tahe rarikre. <sup>41</sup> Tule inatxi hāwyy heka raaòmysỹdỹñkre heto-ki ratxikre mai risyrenykre. Ijò heka dynamy reakre ijò heka rarikre. <sup>42</sup> Tai heka iny rexiywinymy rỹimyhỹkemy rybe roimyhỹre awedureny kanakreki. Tiubo rehemynykre, teeryòte. <sup>43</sup> Aōma hābuò kanakeki heka tiu aōma hābuò itxeredumy ronykeki heka, tiu hābuò iribi rawasinyòtyhy. <sup>44</sup> Bexiywinymy heka wadehemynyna biijemy bonyke, jiarỹ Deuxu Riòre Hābutyhyhykỹ wahe. <sup>45</sup> Ijò Jesuisi relyyre: —Inyò tadinodu deòdutyhymy ratxikeki, tii aòmaysỹdỹñna riwinyhyy rononymhỹke tamy. Iheto riywinyhyyke. Teòdu mahādu txuò txuòlemy riywinymahāke. <sup>46</sup> Kia riwinykeki, deysamy rarekre teòdu rehemynykreu. <sup>47</sup> Inatyhymy ararybekre: —Kia deòdu tadinodu aòmaysỹdỹñana ibutumy idi riywinykre, riyrubunykre. Tii ibutu wedu rarekre. <sup>48-49</sup> Ibinamy tahe tii ròhòtinykeki, kiawesemy riwinykre: Deòdumy raòhòtemyhỹ, lisilemy rononymhỹ, riroximyhỹ momodu mahādu-wana riòmehỹ. Tii ixidee rarybekre: —Wawedu kedehemynyòtyhy, aòtxile ariwinykre. <sup>50</sup> Iu rehemynyòkremy ròhòtinyre, iwedu kiau rehemynykre. <sup>51</sup> Tai tahe raòhòtebinakre. Heòty bede-ò riteònykre, Iwese itxena mahādu tii riteònykre wese. Kia-ò rahinykre, robukre, txuraruti rikyikyinyymy aòhòkỹmy dỹñana òraru-ki.

## 25

<sup>1</sup> Jesuisi ijò relyyre: —Kia txu heka Deuxu Iòlòna ka ijyy wesemy rarekre. Debòwiò ijadòma heka hābumy herina riraòmehỹreny. Iny sohoji sohoji heka toosòna riwyre iximynamyna. <sup>2-4</sup> Iruyrelè tahe tòhòti reare aōma adỹ-di ritỹxinykemy. Ihony tahe tòhòti rosare iruyre wasỹ, ijò tule ihyna-ki riwykemy. <sup>5</sup> Weryrybò rehemynyòre, tai tahe ijadòma mahādu ele rihynymy rỹimyhỹ themynyna riiraòmehỹreny. Iny sohoji sohoji heka toosòna riwyre iximynamyna. <sup>6</sup> Tai tahe rarybera: —Tỹmyra mahādu-ò wahe rehemynyreri. Birybenybenyke ruwetya. <sup>7</sup> Tai tahe ijadòma mahādu he rituranymy rỹimyhỹre. Toosò itỹnytyhymy rookemy. <sup>8</sup> Kia ijò tahe tòhòti rosare mahādu tahe uritere riijere. Itoodỹmy idi riwisỹnymyhỹ. Aōma widee he rexitòenyre: —Urihimykò inihe wahòrò-kò biditxiwike karihukòtekre. <sup>9</sup> Tai tahe kialemy risỹnyre: —Anokòre wadehunale dokuri rỹire. Bikòryke tahe ijò itxe tahe. Maa. <sup>10</sup> Idi tahe ròireny iòbradỹmy. Tai titxi tai rohononymhỹrè. Iòrysmy iòbradỹmy ròirenyra rookile tahe dehemynyde kia tỹmyra mahādu wahe. Tahe rironyrenyre ibutumy riroxikemy. Riratòbònyreny. <sup>11</sup> Tai tahe kia iruyre ijadòma iòbradỹmy rare tahe dehemynyde: —Wahĩ, itxòtòbòna

wadeke bidirakynybedenyke! <sup>12</sup> Tai tahe kialemy rirawyònyre: —Jiarỹ umyreny reeryõre. Kie riki ijyy. <sup>13</sup> Tahe Jesuisi rarybere: —Tai kaiboho bexiywinymy ahãbenyke wadehemynyna biijebeny. Teerytenykõte dori tiubo adòòsekre.

<sup>14</sup> Tii ijõ rarybere: —Ijõ ijyymy adeereny arabedeerynykre timybo Deuxu Iòlòna raremy. Inyõ heka rakemy ratximyhỹre ijõ bede-ò ratỹinykemy. Tii tahe taaõmysdỹnana ririre teòdu mahãdu-ki. <sup>15</sup> Tanieru tahe tamy riwahinyre timykibo isiraõmy nieru ritamyhỹre myheka tamy riwahinyre. Ijõ-ò 5000 riwahinyre. Ijõ-ò 2000 riwahinyre. Ijõ-ò 1000 riwahinyre. Idi tahe tii rare tabede tỹinamy. <sup>16</sup> Kia iruyre ritara heka aõna aõna riõbranymyhỹre. Diwymyhỹre tasỹ idi rohonyrerimy ihỹre. Tai wylemy heka inieru rabuture. Ijõ ixityre iruyremy ritxienyre iratyretyhy. <sup>17</sup> Kia ijõ inatximy tamy riwahinyre tasỹ tulere aõwesele raaõmysdỹdỹre ta ròtare tule ijõ inatximy ixityre. <sup>18</sup> Kia sohojimy tamy riwahinyre tahe urile riyrubunyre inieru hãloole riare tamy tahe riyrubunykemy heka riare. <sup>19</sup> Sõwemy rabeledỹnana-ribi tahe iwedureny dehemynyde. Tahe tamyreny rarariòwyre takõtareny riòbitinykemy. <sup>20</sup> Iruyre riwyre heka debòwiò diwyde: —Beteheiny wawedu ijõ iruyre anieru tyre rebutunyre. <sup>21</sup> Tahe tawedu sõwemy riwowydunyre iaõmysdỹdỹna wiwihikỹmy ròhònyraki wahe. Kiamy heka tamy rarybere: —Òbitimy idi taaõmysdỹdỹteki heka. Sõwemy heka adee ariwahinykre riywinykemy. Aõwaxinyhe bitelenykre aõmysdỹdỹna. Kai heka wawana beysanihikỹkre. <sup>22</sup> Idi tahe kia inatximy ròtaré sỹ dehemynyde: —Beteheke, inatxi tasỹ inaubiòwa ixityre adee rewinyra. <sup>23</sup> Tahe iwedu rarybere: —Awityhymyhe taaõmysdỹdỹta! Kai heka deòdu wihikỹ tate. Kai ibutedile sõwemy tewinyte tahe sõwemy ixityre adee ariwahinykre riwahinykemy. Kai heka wawana beysanihikỹkre. <sup>24</sup> Kia sohojimy tamy riwahinyre tahe rarybemyhe retximyhỹ: —Kai heka hãbu nieru tarasaery heka tate. Aõ taaõmysdỹdỹteri-ribi aõkõ heka nieru tetamahãte. <sup>25</sup> Tai heka jiarỹ raberumahã alau watzireri. Tai heka rewore iny lau. Tahe tii sohojidile ratzireri. <sup>26</sup> Iwedu rarybere: —Kai heka eoruxerere, awi aõkõ heka tate! Inyõ tehuòtekõta heka idi urihimyo ityre ròtakelemy wahe. Kai tiwaeryte wahe. <sup>27</sup> Aõherekibo banco-ki aõkõ tetidite. Kia huòteòwy wanieru-ribi ritarerimy ihỹre. <sup>28</sup> Bitabohe kia nieru-di atxitere, tahe kia debòwiò ritaraò wahe biwahinykre. <sup>29</sup> Kia òbitimy raaõmysdỹdỹra heka sõwetyhymy ròtakre. Kia òbitimy raaõmysdỹdỹõmyhỹre kia heka ròõnodỹỹkre. <sup>30</sup> Kia deòdu bimybennyke. Tii dorihe ibinatyhyre inihe bede luruhukỹ-ò idi behubenykre. Tai heka tii aõhòkỹmy rotỹnykre rahinykre.

<sup>31</sup> Jesuisi tahe ikonana rarybere: —Iu jiarỹ, Deuxu Riòre Hãbutyhyhykỹ, arehemynykreu heka Waiòlònary-ò aronykre. Arehemynykre waỹju mahãdu-wana. <sup>32</sup> Ibutumy heka bede iny mahãdu wako-ki ributunykre. Iwese budoeni itxeredu heka tabudoeni, budòe-wana wiribi rihitxinymyhỹre wese heka bede iny mahãdu wiribi arihitxinykre. <sup>33</sup> Wabudoeni heka warurunawe-ribi arisỹnykre. Budòe tahe wahywe-ribi arihitxinykre. <sup>34</sup> Idi tahe waruruna ludu-ò ararybere: —Manake hewa, beysabennyke. Waha Iòlòna-ò rokonykre. Myheka tamy ararybekre. Juhuu bedeu ihetxiu heka ywimy adireny kia rỹimyhỹre. <sup>35</sup> Rama tahe riwasanyreu rỹsỹna wadee tewahinytenynte. Iu bemy rarureu, wadee tewahinytenynte. Jiarỹ heka tori rare asỹ-ò tiwadytenynte. <sup>36</sup> Jiarỹ heka watykyhoho aõkõu, kaibohole wadee tewahinytenynte. Binamy rỹimy rarewãhã, waroramy taddòitenynte ròtenawo-ò. <sup>37</sup> Tai tahe òbiti mahãdu rarybekre: —Wanyrỹ, tiu taheka ramamy heka wadeereny teate —Adee rewahinyrenyre? Tiubo heka

bemy tarumy tatemahã adee rewahinyrenyreny? <sup>38</sup> Tiubo heka kai torimy tatemahã idi wahetoreny-ò aradyrenyreny. Tiubo atykyõmy tatemahã-di, tyky adee rewahinyrenyreny. <sup>39</sup> Tiubo ròtena-ki tỹimy tatemahã-ò ada webinadumy tatemahã-ò, aroramy ròirenyreny. Wanohõti atxi reaõhyymyhỹre. <sup>40</sup> Tai Jesuisi rarybere: —Jiarỹ, Iòlò, tamy ararybekre: —Iu kaiboho waityhydỹỹdu seriòre mahãdureny-ò waòraru-ki tewinymy toitemahãu, wadeele tuu tewinytenynte. <sup>41</sup> Idi tahe kia wahywenawe-ribi ludu tamy ararybekre: —Boibenyke karibi kaiboho heka abinarenyreny heòty bede-ò ihyymy boibenykre ixi-di ariteònykre. Diabo tatytybybinasỹ-ò idi boibenykre. Deuxu isỹ tamy riwinyreny. <sup>42</sup> Tiu rama riwasareu rỹsỹna kaiboho wadee tewahinytenyõhyyte. Iu bemy rarureu heka ijõ wadee tewahinytenyõhyyte. <sup>43</sup> Torimy rarewahãu, tiu tiwatobinytenyõhyyte. Tykyõ wadee tewahinytenyõhyyte. Binamy rãimy rarewãhã ròtenawo-ki wororana webinadumy tahe tòiõhyyte. <sup>44</sup> Tai tahe kiamy rarybekre: —Wanyrỹ, tiubohe tuu rewinyrenykrõre. Wanohõti heka reaõhyymyhỹre aramamy rubuna-txi, abemy rubuna-txi, torimy tatemahãu, atykyõmy tatemahãu, ròtenawo-ki webinadumy tatemahãu wahe. <sup>45</sup> Tahe jiarỹ Iòlò tamy ararybekre: —Kaiboho heka waityhydỹỹdu seriòreõ tewiòhenanyõmahãtenynte tai heka tiwawiòhenanytenyõte. <sup>46</sup> Tahe Jesuisi ikonanamy rarybere: —Tai tahe tii tiuhyymy rakre heòty bede-ò, aõhõkỹmydỹỹnana-ò. Òbiti mahãdu heka umytuedeõna-ò rakre.

## 26

<sup>1</sup> Kia taijyy rahudi tahe Jesuisi taerymahãdu-ò rarybere: <sup>2</sup> —Ixityre inatxi txu-di tasỹ aõma Pascoa worana bedehesimy rỹikre. Kaiboho tahe kia teerytenynte. Iu iny riwatyhenykre Deuxu Riòre Hãbu wahe. Irahu-di tahe itxeònihikỹ-ò riwatamadỹỹnykre. <sup>3</sup> Tahe aõwesele heka xiwena wahidỹỹdu wedu mahãdu ributunyreny heka judeu wedu mahãdu-wana wahe. Kaifa heto wii rotyre. Xiwena wahidỹỹdu mahãdu wedu wahe. <sup>4</sup> Wiwana heka raryberenyreny: —Tímybohe Jesuisi aõhebo rikisỹnyrenykre aõma teburemy ijiranakõnahakỹle. Tímybo rikisiraõnyrenykre, rikimyrenykre, rikirubun-nyrenykre. Urile iny tuu rierykrõre. <sup>5</sup> Pascoa worana bedehesi rỹireu tahe aõkõlemy idi rỹire. Kia worana bedehesiko-ki iny raaõbinanykeki dori ibutuhukỹlemy heka raaõbinanyke.

<sup>6</sup> Jesuisi heka rare Betỹnia hãwã-ò hãbu tykybinaõ-wana heka isỹ-ò rare, Simaõ heto-ò wahe. <sup>7</sup> Iu iheto-ki riroximyhỹre tahe hãwyyõ tamy rare aderõna lỹnyrehekỹõ-di manaurahyna-ki. Tai tahe Jesuisi tyre ritxiwire, iratityre. <sup>8</sup> Ierydỹỹna mahãdu heka urihimyò heka rebure riòre iòraru-ki. <sup>9</sup> Iòwy nihikỹtyhyre dorihe. Tai heka tanieru uriterehekỹle rahuraki heka tai rawobinamy. Idi rohonykewile heka rare aõma iòwy tahe iny aõkõ mahãdu-ò riwahinykewihikỹle tii rõhõtynyreny. <sup>10</sup> Tahe Jesuisi rierytyhymy aõmybo tuu raryberenyreny: —Aõherekibo kaiboho ibinamy tarybetenyteri hãwyy-ò. Aõwidỹỹnana wihikỹ wadee riwinyreri. <sup>11</sup> Aõma kaiboho heka urimynodu mahãdu-wana ihyymy boibekre. Ibutulemy awanareny jiarỹ watxiwãhãde. <sup>12</sup> Tii heka wahãloodỹỹna riwaywinyra aderõna watyre ritxiwireu. Kia tahe wadee riwinyreny. <sup>13</sup> Boholake, iny itxi tõhõti reahyy rỹirakre iòraru-ki. Rybewihikỹ Tỹmyramy ritỹnydỹỹmyhỹkre heka rierymyhỹkre bede bedemy wahe.

<sup>14</sup> Iribi tahe Judasi Isariò, tii waò inatxi reuròõ rare, tii heka ròhònyre ierydỹỹna mahãduy-ribi. Tahe rare xiwena wahidỹỹdu mahãdu wedu-ò. Tahe tamy rarybere: <sup>15</sup> —Adeereny Jesuisi ariwahikre wana heka tiwe-sebo biwaòwinybenykre? Kiamy tahe 30 prata womati nieru myhe tamy

riwahinyre. <sup>16</sup> Judasi kia ribile rarunymy raremyhỹ dohodỹỹnaõmy Jesuisi tamy riwahinykremy. <sup>17</sup> Pascoa worana bedehesi rỹireule rexidelenyre, Paõ iuridỹỹkõ, kia txu rỹimyhỹ wahe. Jesuisi erydỹỹna mahãdu tai ritỹỹraxinyre: —Titxiwexe rikirỹsỹkre Pascoa worana bedehesi jiarỹboho dori ariywinyrenykemy? <sup>18</sup> Tahe Jesuisi rirawyõnyre: —Hãbuõ hãwãhãkỹ-ki ratximyhỹre tii riwaeryre. Tahe tamy marybekre: —Wawedu kỹny rarybereri aõma aheto-ki heka Pascoa worana bedehesina rirỹsỹkremy taerydỹỹna mahãdu-wana. Ibededỹỹna dori iõhõre riki. <sup>19</sup> Tai tahe taerydỹỹna mahãdu kia riwinyre idi kowa worana bedehesi rỹsỹna riywinyre.

<sup>20</sup> Bedesõmy tahe tai riroximy rorukumyhỹreny, taerydỹỹna waõ inatxi reurõ mahãdu-wana wahe. <sup>21</sup> Aõma inyõ heka riwatyhenykremy ratximyhỹre. Jesuisi heka tuu rarybere: <sup>22</sup> —Mowexe tii rarekre. Tiiboho rabedewomy roire, tai tahe widee rarybere: —Jiarỹ kõaõboka. <sup>23</sup> Tahe Jesuisi rarybere: —Kia wawana pratoro tebõ rearerile taheka tiikre. <sup>24</sup> Iwese Deuxu Tyyriti-ki Rybe roire wese heka arurukremy jiarỹ Deuxu Riõre Hãbutyhyhykỹ watxiwãhãre. Kia hãbu riwatyhenykre tahe tamy heka ibinatyhykre. Ratybienykõre wana inihe awityhyre. <sup>25</sup> Tai tahe Judasi ityhedỹỹdu rarybere: —Erydỹỹdu, jiarỹ aõbohe rare? Tahe Jesuisi tamy rarybere: —Kaityhy wahe tate. Kaile tarybeta.

<sup>26</sup> Tai tahe Jesuisi orotxu sohojiõ rimyre ibutumy riroxireu, tahe riyreyrenymyhỹre tahe inysohoji sohoji-õ riwahinyre. Tai tahe tamy Jesuisi rarybere: —Kia biybenyke heka. Waumy wese heka kia ratxireri. <sup>27-28</sup> Idi vỹ monahynaõ rimymy rexitõenyre Deuxu-õ. Idi tahe tamy riwahinyre iribi sohoji sohoji riõrenykemy. —Biõrenyke kaa dori wahãlubu wesemy ratxireri. Tai sõwemy iny biu-õ rahenykre Deuxu dee. Ibutumy õraruna ixãwididỹỹmy heka tuu rõhõnyra. Wahãlubu heka Deuxu, iny-wana wii riwoàxinykre rare. <sup>29</sup> Tahe boholake warybe-õ. Awanareny heka ixityre vỹ monamy ariõõtyhy. Kia Waha Iõlõna-õ dehemyrynahykyle tahe awanareny ixyby tuu ariõkre.

<sup>30</sup> Idi tahe wiuõ rawiunyrenyre idi tahe Oliveira hãwãlõ-õ rõirenyre.

<sup>31</sup> Jesuisi tamyreny rarybere: —Wijiru heka ibutumy kaiboho biwaribenykre. Tyyriti-ki heka roire kiawesemy: Budoeni-di itxeredu rirubunykre. Ibutumy budoeni raubỹtỹkre bede bedemy.

<sup>32</sup> —Waixixana kỹnyikreu tahe Kalileia bedeki awanareny aratxikre.

<sup>33</sup> Pedro tahe rarybere: —Ibutumy ararirenykre wana tahe jiarỹ aõkõre. Ararirenyõtyhy. <sup>34</sup> Tai Jesuisi heka Pedro-õ rarybere: —Kai heka hãnie dele robukõdile biwatxiõ-ribi bexihukre, inataõmy wahe. Tuu wijiru rarekre.

<sup>35</sup> Pedro dirawyõnyde: —Aõkõre wa, arurukre heka tahe urile aratxiõnyõtyhy. Tule ibutumy ijõ ierydỹỹna tule Pedro wesele rarybere.

<sup>36</sup> Tahe Jesuisi ridyrenyre bederaty oworuõ-õ, aõma Kesemani ninadu-õ ridyre: —Kakile bonykre arakre dori ixitõedỹỹmy kowa-õ. <sup>37</sup> Tahe Jesuisi heka Pedro ridyre ixi-wana. Tule Zebedeu riõre wiwana ridyrenyre. Tahe Jesuisi rabedeõtiidỹỹre aõhõkỹmy rotỹỹnyre bedeõtiidỹỹ õrarukile. <sup>38</sup> Tii tahe tamy rarybere: —Kaki wawanale atxibekre. Watyytyby heka tỹxihikỹlemy bedeõtiidỹỹ-di ratxireri. Waki bexiebekre. <sup>39</sup> Urile tahe tako-õ rariareu tahe resere bede-õ. Jesuisi tahe tyby-õ rarybere: —Waha, rubu mona waribi bitake adeewikeki. Aõkõkeki tahe ariõkre, arurukre adeewilemy aõhebo arotỹỹnykre. <sup>40</sup> Idi tahe dõõsede kia ierydỹỹna inataõ tai rõrõmyhỹõ heka ixyby dõõsemy nade. Jesuisi rarybere: —Pedro! Kai heka timy sohoji horamy adi bede rỹiõtyhy wawana. <sup>41</sup> Bexixaruhy atxibeke bexitõenymy. Aõkõkeki tahe õraruna kanamykre. Kai heka õbitimy matxikemy tahõtinymahãte. Aumy tahe

ibinare heka arurukõre wahe. <sup>42</sup> Ixityre rare rexitòenykemy. Tahe Jesuisi rarybere: —Waha, adeewinale ariwinykre. Aõhõkõmydõõnana monamy heka ariõkre. Kia mona waribi bitaõkeki ihãrele heka arurukre. <sup>43</sup> Tai dõõsede tai rõrõmyhõrenyõle heka nade. Tiiboho ixixamy rõiõhyyre. <sup>44</sup> Tahe rõõsere ixibylye ikonanamy. Iweselemy rexitòenyre tyby-ò. <sup>45-46</sup> Idi tahe dõõsede taerydõõna mahãdu-ò rarybere: —Bexielehynybeny. Watyhedõõdu naderi. Rexihumyhe rare. Hãbubina mahãdu rehemynyre. Jiarõ Deuxu Riõre Hãbutyhyhykõ, wahe. Bexixabeny, rakakre watyhedõõdu dori rehemynyre.

<sup>47</sup> Tahe Judasi dehemynyde waõinatxi reurõõ wahe. Jesuisi rarybereu, tii nade sõwemy hãbu-di mayrehe-di, õhõte-di tõnori-di widotyde. Judeu mahãdu wedu tahe iteõdõõdure xiwena wahidõõdu wedu wana wahe. <sup>48</sup> Juhuu Judasi tamyreny bede riywinyre. Kamy rexirybenymy: —Iõõny-ò aruwokrele heka tiikre. Tiile bimynykre. <sup>49</sup> Tahe Judasi rarybere: —Rareri, Wawedu. Iõõny-ò ruwore. <sup>50</sup> Tahe Jesuisi rarybere Judasi-ò: —Iõ, aõwaxiny aõbo biwinykre iwidõõmy tateri. Tahe Jesuisi imahãdu rimyre. Ritaataare. <sup>51</sup> Tahe Jesuisi mahãduõ mayrehe-di rimymy resere. Tai hãbuõ-ò reare. Tai tahe tõhõtile rikõromy idi reare, xiwena wahidõõdu wedu deõduõ wahe. <sup>52</sup> Tahe Jesuisi tamy rarybere. Aõkõre amayrehe birutyke irasirahanawomy. Kia dori inyõ maydese rimymy resekre heka tule rurukre maydeselemy. <sup>53</sup> Karibi ixitarasamy arurukeki dori wahaõle ararybekre. Tai tahe waha sõwemy õju kiditeõnyke, 12 aõbinadu ijoi mahãdu wahe. Kia teeryõtenyete. <sup>54</sup> Ihãrele tahe ibutumy tuu bededõõnana relekre iwese ritidõõna-ki roimyhõre wese. <sup>55</sup> Tahe Jesuisi rõõraxire tamyreny: —Aõbo jiarõ raremy wadi tahõtinytenyteri. Wasidu aõbo. Kai dori waõrysmy tehemynte maydese-di, tõnori-di. Aõherekibo wahe. Jiarõ heka arabedeerynyrenyre txuõ txuõlemy wahe Deuxu dohodõõna heto-ki. Aõherekibo taile tiwamytenykõte kowa watxiwãhãure. <sup>56</sup> Kia ibutumy Deuxu Ritidõõna-ki roimyhõre. Tai tahe tuu bededõõnana relekre iwese Deuxu rybedu mahãdu rarybere. Ibutumy aõna aõnamy rotõõnymy raremyhõ. Tai tahe taryberahu-di. Ibutumy iery mahãdu iribi tahe robõõre.

<sup>57</sup> Tiiboho heka Jesuisi ridyrenyre Kaifa heto-ò, xiwena wahidõõdu wedu wahe. Tai ibutumy judeu mahãdu wedu ributunyre bede ywina erydu mahãdu tule wahe. <sup>58</sup> Pedro irehetyty-ribi riheludunyre. Iheto ube-ki tahe ronyre yrubu dõõdu-wana. Tahe rehere aõhebo rotõõnykemy. <sup>59</sup> Xiwena dinodu mahãdu tahe ributunyre Jesuisimy raruikremy heka riijemy. Aõma rirubunykre õbirele heka tuu rarybemyhõ. <sup>60</sup> Tahe inyõ-ki heka rahaõhyyre turybedu wahe. Iny sõwemy tahe relyyre. Ihãrele rirubunyõhyyre. Iroona-ribi tahe inatxi hãbu dehemynyde. <sup>61</sup> Tai tahe kiamyhe tuu relyyre: —Aõma Jesuisi rarybere: —Aõwesele heka Deuxu dohodõõna heto ariatymy idi areake. Inataõ txudi tasõ ixityre aditamadõõke, ibutumy adiwinyke. <sup>62</sup> Tai tahe xiwena dinodu heka Jesuisi-ò ryraxire: —Aõbo marybekre kia umy ijyy rohonyreriki? <sup>63</sup> Jesuisi tahe rybeõlemy ronyre roholare. Ixityre tamy rõõraxire: —Kai heka inatyhy tyhymy Deuxu Riõremy kai atximahãte. Mesia aõbohe kai tate? Deuxu riwaeryre inatyhymy rarybereri. <sup>64</sup> Jesuisi dirawyõnyde tamy: —Kaile kia tarybete. Ibutumy iny-ò ararybekre: —Kaiboho ibutumy bobibenykre

Deuxu Riõre Hãbutyhyhykõmy, jiarõle wahe. Tii heka Deuxu rurunawe-ribi heka ronykre. Iribi tahe kanakre biuwetyky-ki. Jiarõle wahe tiire.

<sup>65</sup> Tai tahe xiwena dinodu tatyky riykare. Reburere kie: —Aõhere tahaka. Deuxumy heka ibinatyhylemy tarybemahãte. Iõõ iny-ò aroholaõkre, rexihura! <sup>66</sup> Ibutumy kaiboho irybe-ò taholatenyteri, inatyhy? Aõbo rikiwinykre

tii ibinatyhyre dori, rikirubunyrenykre tahe. <sup>67</sup> Tahe iòsŷny-ò rarybexinyre. Rihetenyre. <sup>68</sup> Tamy ihetedŷŷdu rarybere: —Marybeke Kristu, mobo arahetenyra inihe.

<sup>69</sup> Pedro tahe ube-ki ronymyhŷ. Tahe ijadòma heka deòduõ tamy rehemynyre: —Kai anõbo Jesuisi Kalileia ludu-wana atximahã. Kumymy rabire. <sup>70</sup> Iny ibutuko Pedro rarybere: —Aõkõre, aõmybo arybe reeryõhykyreri. <sup>71</sup> Tai tahe rare ijò-ò. Ijõ ijadòma deòduõ rarybere kamahãduko: —Inatyhymy heka tiki Jesuisi Nazareludu mahãduno tiki rare. <sup>72</sup> Ixityrele Pedro ritxiõnyre: —Reerykõre wahe hãbu. Tiu heka rabiõwãhãre. Inatyhy rare. <sup>73</sup> Idi hãbuõ heka narybede tamy: —Inatyhy rare. Kakŷny irybe weselemy tarybeteri, Kalileia rybe wahe. <sup>74</sup> Tahe Pedro rarybere: —Jiarŷ reerykõreri, tuu heka rabiõwãhãre. Deuxu riwaeryre inatyhymy rarybereri. Iule taheka hãnie hãbu robumy reare. <sup>75</sup> Tahe Pedro tõhõti itxi reare. Jesuisi rarybere weselemy heka tii riwinyra. Ritxiõnyre. Tai tahe Pedro røhõnymy reare heka rahinyhyre.

## 27

<sup>1</sup> Ijõ biurasò ruidile tahe rŷire. Xiwena wahidŷŷdu wedu ributunyre judeu mahãdu wedu-wana. Timywexe aõhe rikisŷnyrenykre. Rikirubunyrenykemy heka idi watxiwãhãre. <sup>2</sup> Roma dinodu-ò òsana rikidyrenykre. Tahe tiiboho Jesuisi ritaataare idi ridyrenyre tamy, Pilato-ò.

<sup>3</sup> Judasi heka rieryre. Tai tahe tii rabadewonihikŷre rityhenyeki wahe. Tai tahe raraykynyre tawo-ò raðhõrere. Tahe nieru òkesedŷŷmy idi røhõtinyre. Tahe nieru diwyde, 30 prata womati nieru tahe riòkesedŷŷnykremy judeu wedu mahãdu-ò, Xiwena wahidŷŷdu mahãdu-ò. <sup>4</sup> Tahe Judasi rarybere: —Ixãwirahe, jiarŷ raðrarunyra hãbu òbitityhymy ratximyhŷrele retyhenyre heka. Tahe judeu mahãdu dinodu rarybere: —Jiarŷboho, kia aõ aõkõ rare. <sup>5</sup> Tahe Judasi nieru-di bedetyrele rihure. Tahe røhõnyre iribi. Tahe rare. Rerotihikŷ-di rexibõtòtaare. Rexirubunyre. <sup>6</sup> Tai tahe xiwena wahidŷŷdu wedu riwyre nieru bede-ribi: —Aõwexe kanieru rikiwinyrenykre? Dohodŷŷna hetowo-ò rikirutyrenyke heka aõkõre. Aõma dori rare rubuòwymy iwahidŷŷ heka rare. <sup>7</sup> Urile suõle rikiwyrenykre idi. Tai tamy wabede rikiwinyrenykre. Aõma tori kaki rurukreu tahe rikitoonyrenykre tamyle wahe. Tai tahe tiiboho riwyrenyre aõma butxi widŷŷna subede heka riwinyrenyre. Kia heka inire suni wahe. <sup>8</sup> Kia bedero tahe rininire aõma Hãlubu Bederomy heka rininire. Wiji tule ini rare. <sup>9-10</sup> Iwese Jeremia tyyriti-ki roire wesele heka tii riwinyre: Tahe 30 —Womati nieruõ-di heka bedero riwyre butxiwidŷŷdu-ribi. Iwese kai riwateõnyre wese. Kia iõwy rare judeu mahãdu-ò tamy riwahinyre wahe. Txiõdŷŷna òwy wahe.

<sup>11</sup> Jesuisi heka Pilato, bede dinodusŷ-ki ratximyhŷ. Pilato tahe tamy rŷŷraxire: —Kai aõbo judeu mahãdu iòlò atxiteri? Jesuisi dirawyònyde: —Kai tuu tarybeta. <sup>12</sup> Xiwena wahidŷŷdu wedu heka tamy rarybere: —Jesuisi rirawyònyõhyre. Judeu mahãdu wedu-ò tule rirawyònyõre. <sup>13</sup> Pilato tahe tamy rarybere: —Kai aõbohe rybe-ò taholate. <sup>14</sup> Tule tamy Jesuisi dirawyònyõhyde. Byy! Urile Pilato ribedeòtiidŷŷnyre. <sup>15</sup> Pascoa worana bedehesi bededŷŷnana tikiemy tuure. Ròtenawo-ribi heka sohoji beòra beòrahyyle ixinamy inyõ rexideõnymyhŷ, inysõwe rybe òraru-ki wahe. <sup>16</sup> Kia beòra tahe hãbu ibinatytyre ròtenawo-ki rŷire. Baraba inire. Ibutumy iny tuu rieryre. <sup>17</sup> Aõma Pascoa worana bedehesi rŷireu ibutumy iny ributunyre. Tahe Pilato ritŷŷraxinyre: —Tibohe ixinamy ariteõnykre Jesuisi Kristu aõbo ada Baraba aõbo? <sup>18</sup> Tahe iny heka ibutumy urile Jesuisi Kristu luure heka. Tai tahe judeu

dohodỹydu wedu mahãdu tahe aõkõ tamy waritimy rityhenyreny. Pilato kia rierye. <sup>19</sup> Iu tabede ywina dohodỹy-na-ki Pilato rỹireu, ihãwyy tamy tyyriti riwahinyre. Kawese heka rarybere aõma: —Ixinamy Jesuisi bitekõnykre. Anobinatytymybo dokuri rarasino txu wadi reakareri. Jikarỹ anohõkỹmy dỹkỹnana sõwemy ratỹkỹnyre Jesuisi kõraru-ki wahe. <sup>20</sup> Iny sõwehekỹ-ò heka xiwena wahidỹydu mahãdu wedu rarybere: —Kaiboho mararybebenyke: —Baraba ixinamy bitekõnykre. Tiiboho dirawyònyde: —Jesuisi birubunykre. <sup>21</sup> Iribi Pilato rarybere: —Tiwexe ixinamy aritekõnykre? Tiiboho dirawyònyde: —Baraba bitekõnykre. <sup>22</sup> Pilato tahe rỹraxyre: —Aõhebo tahe arotỹnykre Jesuisi-di, Kristu-di? —Itxeò nihikỹ-ki bitamadỹnykre. Birubunykre. <sup>23</sup> Pilato tamy rỹraxyre: —Aõbinahakỹ aõbo riwinyraki? Tai tahe ibutumy iny rirajuamy rỹimyhỹ: —Birubunykre kia bitamadỹnykre. <sup>24</sup> Pilato iny sõwe-di aõ riwinyõhyre aõbinatyhy òsana ròhònykremy idi rõhõtinyre, tai tahe inyò rarybere: —Bee kidiwykremy baciaro-ki. Tahe tebò risuhore iny sõwehekỹko-ki. Tamy rarybere: —Jiarỹ kỹny waòraru-ki aõkõ heka rurukre. Kaiboho heka irubudỹy erydumyhe boibekre. <sup>25</sup> Tahe ibutumy iny rarybere: —Awire, inyboho heka irubudỹydu erydumy rokoirekre, tule wariòreny òraru-ki wahe ihãlubu rejuxunykre. Soldado ridyre itxeò nihikỹ-ò ritamadỹnykremy rirubunykremy. <sup>26</sup> Tai tahe Pilato heka Baraba ritekõnyre ixinalemy. Iribi tahe Jesuisimy raòhòtere.

<sup>27</sup> Pilato soldado mahãdu urile idi juhu risinyre, soldado tyamy ritidire. Pilato heto-ò ridyre. <sup>28</sup> Ityky iribi ritare tahe aõma tykysò-di ritidire heka juhu rihetyre. <sup>29</sup> Iòdỹmy tahe idi ede lòrilòrihikỹ irati-ò ridekremy. Òwòruò tebò-ò ritidire. Tai iko-ò resere tatiowotimy. Raryberenyre: —Awire, kai judeu Iòlòtyhy. <sup>30</sup> Ityre rarybexinyre. Òwòru rimyre tahe iratimy tuu raòhòtere. <sup>31</sup> Iribi ritarenyreny ihõrõ itykyle ixityre rirutyre ityre-ki. Idi tahe ryò ròirenyre.

<sup>32</sup> Iu ròhònyreu, hãbuõ Sireni bede luduõ-wana witxi reare. Tamyhe rarybere Jesuisi itxeò riwykemy.

<sup>33</sup> Tahe Kòkòta hãwãlò-ò rehemynyre. Aõma, rubu ratityby wesemy heka rare. Tai tahe Kòkòtamy heka rininimyhỹreny.

<sup>34</sup> Tii vỹ riurinyre bee ihyra-wana, idi tahe Jesuisi-ò kia riwahinyre. Iurihi-di teramy reare.

<sup>35</sup> Tahe itxeò nihikỹ-ki ritamadỹnyre. Irahu-di tahe ityy heka ritxuatxuaenyre wimy rarudeòsanyre tibo iwydydukemy.

<sup>36</sup> Idi tahe retehemy rorukumyhỹreny. <sup>37</sup> Irati tyre-ki tahe ritidỹnaõ roire: —Kia Heka Jesuisi Rare, judeu Iòlò Mahãdu.

<sup>38</sup> Tule wasidu brebunahakỹ tii-wana ritamadỹnyreny itxeò hòkỹ-ki, ijõ iruru-ribi, ijõ ihywe-ribi. <sup>39</sup> Iny ibire-di reamyhỹ idi risinymyhỹ kamy rexirybenymy: <sup>40</sup> —Kai inihe bexitake, kai Deuxu Rìòre tateki. Bodobeheke itxeò nihikỹ-ribi. <sup>41</sup> Kai heka arurudiremy iximy tarybemahãte. Dohodỹy-na biatykemy heka iximy tarybete tahe inataòtxu-di heka biwinykemy tarybeta. Tule xiwena wahidỹydu wedu mahãdu idi risinyre. Tii tahe rarybere:

<sup>42</sup> —Tii heka iny iwixira witxira aõbina bina-ribi ritamyhỹre ihãre tahe taaõbina bina-ribi rexitaòtyhy. Tii heka aõ judeu mahãdu iòlò aõkõ rare. Myheka tuu rarybemyhỹ. Kia itxeòhòkỹ-ribi kedexiberesedỹnykekile tahe rikityhynyrenykre inatyhymy. <sup>43</sup> Tii heka iximy rarybemyhỹre Deuxu Rìòre raremy, Deuxu rityhynymyhỹremy. Reketeherenykre inihe aõbo Deuxu riwiòhenanykremy wahe. <sup>44</sup> Wasidu mahãdu kia itxeò nihikỹ rỹire iwesele heka tamy rarybere.

<sup>45</sup> Txutyeyu tahe bede luruhukÿ bede reare, txioro tirehehekÿule bede kamy reare. <sup>46</sup> Kiaule tahe bede ratÿnyre Jesuisi iu ryryre:

—Eli Eli Lema Sabatani.  
Kiamyhe rarybere:

—WaDeuxu, WaDeuxu, aõherekibo waribi õhõti rosare?

<sup>47</sup> Tai tahe iny sõwe mahãdu irybe-ò doholade. Ijõ kiamy narybede: —Eliasi-ò hòwa ryryreri. <sup>48</sup> Kia ele elemy riwinyre noseõ. Idi tahe vñõ riryrymy tamy idi riteònyre. Teòrehemy riwinyre bemy rimonykremy. <sup>49</sup> Ijõhe raryberenyre: —Txiokre inihe inatyhymy aõbo reketeherenykre inatyhymy aõbo Eliasi iwiòhenadÿÿmy kanakremy aõbo inihe. <sup>50</sup> Jesuisi ixityre rirajuare. Rurure. <sup>51</sup> Kia dohodÿÿna heto-ki heka ixiwõtenaõ rÿimyhÿre ierykõna. Tahe urile idi ixiwanale ruamy reare iratyre-ribi bede-ò. Suuhe ramytatare. Mana rabòhòbòhònyre. <sup>52</sup> Wabede hãlooõ heka riraynyre. Deuxu hõrõ mahãdu sõwemy rubu-ribi riixixanyre. <sup>53</sup> Wabede-ribi ròhònyrenyryre. Iu Jesuisi rubu-ribi riixixareu tahe Jerusalẽ-ò ròirenyre. Tai tahe sõwemyhe iny tuu robire. <sup>54</sup> Tai heka soldado dinoduõ ratximyhÿ idi retehemy. Tule soldado mahãduõ tii-wana ratximyhÿre. Ibutumy tuu robirenyre. Tai tahe tabrebu-ribi narybedenyde: —Tii inatyhymy Deuxu Riòre heka rare. <sup>55</sup> Hãwyyõ tule retehemy ratximyhÿre irehe-ribi idi. Aõma hãwyy Jesuisi riwiòhenanymy raremyhÿ heka idi retehemyhÿre. Tiiboho Kalileia bede-ribi doide. <sup>56</sup> Marie Madalena, Marie Txiause Jyjese, Zebedeu riòrese tule tai ratximyhÿ.

<sup>57</sup> Bedesòmÿ Jyje rehemynyre. Tii ityhy heka rare Arimatea hãwã luduõ ratximyhÿre. Tii Jesuisi tyhydÿÿduõ ratximyhÿ. <sup>58</sup> Tai Jesuisi umy rexitòenyre Pilato-ribi. Tai tahe Pilato rarybere: —Tamy biwahinykre. <sup>59-60</sup> Tahe Jyje linho tyky rirahananyry. Tai tahe aõma wabede tÿmyrahakÿ riamy roireriò heka rituunykremy idi rara. Idi mana nihikÿ ritidire txiò. Idi ròirenyre. <sup>61</sup> Marie Madalena ijõ Marie-wana taile retehemy ronyre wabede-ki.

<sup>62</sup> Ijõ txu tahe fariseu mahãdu wedu tule xiwena wahidÿÿdu wedu heka Pilato-ò sexta feira rahudi tahe, judeu mahãdu elehyna txu wahe ituere. <sup>63</sup> —Jesuisi irumy raremyhÿu tii rarybere:

—Rubu-ribi heka ariixixanykre inataõ txu-di.

<sup>64</sup> Ruimÿ rare tahe ihãrele tahe biyrubunyke iwabede. Aõkõkre-wana tahe ierydÿÿna mahãdu heka iumy riwykre. Tai tahe rarybere: —Tii rexixixanyre. Tai tahe ibutu rityhynykre iruina. Kia ibinatyhymy rarekre. <sup>65</sup> Tai tahe Pilato riteònyre soldado mahãduõ txiò-ki. Tamy rarybere: —Awimÿ biyrubunyke! <sup>66</sup> Kia bede erynaõ heka tamy ritidire. Txiò-ribi resekreule heka rieryrenykre. Tahe soldado mahãdu riyrubunymyhÿre.

## 28

<sup>1</sup> Ijõ txu rudile tahe Marie Madalena, Marieõ-wana rare ihãloona-ò itxeremy, domingo, nobiutxu wahe. <sup>2</sup> Aõwesele tahe iu suu ramytatare. Wanyrÿ ÿju heka dobehede biu-ribi iu. Tahe hãloo ijò-ribi mana ritamy ityre ronyre. <sup>3</sup> Iòsÿny heka urile ritoosònyhÿkÿre. Ityky tasÿ iurahakÿre. <sup>4</sup> Idi itxeredu mahãdu heka aõma ruberunihikÿrenyryre. Urile ròhõtiberemy reserenyryre. <sup>5</sup> ÿju rarybere hãwyy-ò: —Uritere berebuòmÿrenyke. Kai aõbo Jesuisi teijeteri, inatyhy? Aõma itxeò ritamadÿÿnyrenyryre wahe. Reeryre kia. <sup>6</sup> Aõkõre kaki aõkõ heka ratxireri. Tii dori rubu-ribi rexixixanyre iwese tii iximÿ rarybere wese wahe. Beteheke inihe iherina tyby-ò tai juhu roimyhÿò. <sup>7</sup> Make karibi ele elemy ierydÿÿnako belyykre tii rubu-ribi rexixixanyraki. Tii heka rara Kalileia-ò tamy wirotÿreriò. Matahe, relyyra dorihe adeereny. <sup>8</sup> Tai



tahe rakòrunyrenyrene, hãwyyboho. Ruberumy ròirenyre tasỹ reysamy ròirenyre. Ierydỹỹna mahãdu-ò heka riijemyhỹre aõma ýju rybemy ikoreny relyykemy. <sup>9</sup> Iu rakòrunyrenyraule tahe wii reòbynyra. Jesuisiwanale heka itxi rekoare. Idi tamy rehemynyre iòhòmy. Iwa rimyrenyrene tahe riwowydynyrene. Jesuisi tamy rarybere: —Toiteri aõbo! <sup>10</sup> Uritere breburenyõmyke. Boibeny tahe ijyymy waityhydỹỹdu mahãdu seriòre-ò heka Kalileia-ò aròirenykemy. Tai tiiboho-wana wii areòbynyrenykemy.

<sup>11</sup> Tai tahe tiiboho ròirenyre. Kiaule tahe wabede soldado itxeredu rehemynyre xiwena wahidỹỹdu wedu-ò wahe. Tahe ibutumy relyyre iko. <sup>12</sup> Tai tahe nieruõ riwahinyre ruiõmy relyykemy. <sup>13</sup> Tamyreny raryberenyrene: —Ierydỹỹna mahãdu heka ridyra watỹireny reòbylemy. <sup>14</sup> Tai tahe bedede dinodu rierykreu heka aõ adee beleõtyhy aõbinahakỹõ. <sup>15</sup> Tai tahe nieru sòwemy riworenymy tahe tuu ròirenyre ruimy. Wiji dori tuu ijy rỹira. Ibutumy judeu mahãdu kia rybe-ò rityhynymyhỹre.

<sup>16</sup> Idi tahe ierydỹỹna mahãdu ròirenyre Kalileia-ò. Tiobo Jesuisi riteònyrenyremy juhutyhy. <sup>17</sup> Jesuisimy robirenyreu tahe tiiboho bedede-ò reserenyrene tahe riwowydynyrenyrene. Ijõ mahãduõ riseõnylemy idi rõhõtynymyhỹre. <sup>18</sup> Tai tahe Jesuisi iòhòtyhymy tamyreny relere kiamy tamy rarybere: —Waruruna heka ibutu ratyre ratximyhỹre kabede-ki tule, biu-ki tule. <sup>19</sup> Tai kaiboho waha deòdumy boibenyke ibutumy iny bedede bedede mahãdu-ò, bedede bedede konananahakỹ mahãdu-ò ihyy behemynybenyke. Waityhydỹỹdumy heka bitxienybenyke. Wahanimy, tule Deuxu Riòrenimy, tule Deuxu Tyytybytyhynimy, tahe bòratisebedỹỹnybenyke wadeòdurenymy, Waha, Ityytybytyhy, Iriòre kaboho deròwymy wahe. <sup>20</sup> Ibutumy aõbo wabede ywina adee rewahinyredi bibedeerykre. Uritere nohòti losarenyõmy awanarenhyhy dori ararekre bededỹỹnanahyy rekehemynykre.

## Marku Deuxu Rybe Wihikỹ Tỹmyra, Marku Tyyritidỹđu

<sup>1</sup> Kaki heka Rybe Wihikỹ juhu kaki roire. Ka Rybe Wihikỹ Jesuisi Kristumy heka rarybereri. [Tii heka Deuxu Riòre rare.] <sup>2</sup> Myheka Isaia tyyriti-ki kia rybe rỹire:

Deuxu rarybere: —Boholake, waõwàdàdu ariteònykre akomy. Tii ary ri-winykre.

<sup>3</sup> Tii ryrymyhỹ bederahy-ki: —Kai biwinykre rywihikỹ Wanyrỹ dee. Òbiti tamy biwinyke.

<sup>4</sup> Joaõ Sebedỹđu bederahy-txi taile ihỹmyhỹ rybe tyyriti ritỹnynymyhỹ. Tii sebenaõmy riòbitinymyhỹ. Kia riwinykemy ixi-txi tõihti reakemy taòraru-txi kia Deuxu ritakemy. <sup>5</sup> Ibutumy Judeia bede ludu mahãdu Jerusalẽ hãwã mahãdu-wana rare bederahy-ò. Taòrarumy relyymy rahudi tahe, Joaõ risebenyre bero Jordaõ-ò. <sup>6</sup> Joaõ rexytyynyre kamelo rade tyy-di, tule iròduty wereysana iwetya-ki roimyhỹre. Irỹsỹna raremyhỹ, seihiỹle bidi-wana. <sup>7</sup> Joaõ rybe tyyriti ritỹnynydyỹmy rarybemyhỹ: —Jiarỹ aõ aõkõ rare, waruru-di aõkõ. Inyõ wahewomy kanakre tahe iruru waruru ratyredỹđnadu rare. Waratyre awityhyke. Jiarỹ riwaixỹrunymy watxireri iwataana ese-ki.

<sup>8</sup> Jiarỹ bedi arãsebenyre. Tii heka Deuxu Tyytybytyhy-di arãsebenykre.

<sup>9</sup> Kiatxu Jesuisi nade Nazare Kalileia bede ludu-ribi. Joaõ tii risebenyre Jordaõ bero-ò. <sup>10</sup> Tii bera-ribi dotuodeu biuwetyky rarayre. Deuxu Tyytybytyhy heka bòtòe wese tamy dobehede. <sup>11</sup> Deuxu rybe-ò roholare biu-ribi: —Kai heka Wariòre waluu tate. Adi wadeysawihikỹreri.

<sup>12</sup> Aõwesele Deuxu Tyytybytyhy heka Jesuisi riteònyre bederahy-ò. <sup>13</sup> Tii bederahy-ki 40 txumy bede idi rỹire. Satanasi aõhõkỹmy risỹnymy Jesuisi raremyhỹ. Iròdu deborehekỹ tai rỹiramyhỹ. Ýjureny iyrubudỹđmy rehe-mynyre.

<sup>14</sup> Joaõ rare ròtenawo-ò, idita Jesuisi Rybe Wihikỹ ritỹnynykremy dehemynyde Kalileia-ò. Jesuisi heka Rybe Wihikỹ ritỹnynydyỹre: —Deuxu Iòlõna bede-ò wahe. <sup>15</sup> Jesuisi rarybera: —Bedeđỹnanahede bede reara. Deuxu Iòlõna bedehede iòhõra. Kaiboho ixi-txi õhõtireny reake aòrarureny-txi bityhynybenyke Deuxu Rybe Wihikỹ.

<sup>16</sup> Jesuisi aho ijàti-ki rariamy ihỹmyhỹ. Tii robira tuureny taseriòre-wana ihỹmyhỹ-ò, Simaõ Pedro, Andre-wana. Tiiboho rehumy ihỹmyhỹreny rià-di. Tiiboho heka waxidu roire. <sup>17</sup> Jesuisi rarybera tamyreny: —Kaiboho bodoibedenyke wahemy. Tai tahe araerynanyrenykre iny rymykemy utura temyta wese. <sup>18</sup> Tahe aõwesele rià ririrenyre. Roire Jesuisi-wana. <sup>19</sup> Iko roire Joaõ, Txiau, taseriòre-wana. Tiiboho heka Zebedeu riòre roire. Tiiboho hãworo-ki ratximyhỹreny rià riywinymyhỹreny. <sup>20</sup> Jesuisi tamyreny rarybera: —Wahemy bòdòike. Tahe aõwesele tybyreny ririrenyre teòdu-wana. Tahe tiiboho roire Jesuisi-wana ierydỹđnamy roirekemy.

<sup>21</sup> Tiiboho rirònyrenyre Kafanaõ hãwã-ò. Judeu mahãdu aõmysỹdỹđna txu aõkõ. Jesuisi ralore judeu mahãdu dohodỹđna heto-ò erydỹđmy. <sup>22</sup> Kowa mahãdu urile bede riòtiinyre irybe-ki. Tii heka irurutyhy-di rierynanyre, ierydỹđdu mahãdu wese aõkõ rohodỹđnanymyhỹre. <sup>23</sup> Kia bedeu heka hãbu tyytybybina-di ratximyhỹre dohodỹđna heto-ki. Tyytybybina hãbuwo-ribi rarybere: <sup>24</sup> —Aõhebo wadi botỹđnykre Jesuisi Nazare ludu. Biwahubenykre aõbo? Jiarỹ araeryre mobo kai tatehe, kai heka hãbuõtyhy inatyhy Deuxu-ribi

kai tate. <sup>25</sup> Jesuisi tarurumy rarybere: —Kai rybeõmyke. Iribi bõhõnyke tyytybybina. <sup>26</sup> Tyytybybina hãbu riatyre riworÿsÿworÿsÿnyleny. Tyytybybina ryrre rybe iteremy, idi rõhõnyre. <sup>27</sup> Ibutumy iny ribedeòtiinyre. Ritÿÿraxinyre ijõ: —Aõwexe ratxireri, aõerydÿÿnatÿmyrabo ratxireri. Tii riteõnyre tyytybybina. Tyytybybina Jesuisi rityhynyre. <sup>28</sup> Ityhynina Kalileia bede bedemy reare.

<sup>29</sup> Tahe dohodÿÿna heto-ribi rõhõnyreny. Jesuisi, Txiau, Joaõ-wana roirenyre Simaõ, Andreboho heto-ò. <sup>30</sup> Simaõ riõre lahi roimyhÿ rubunamy. Tahe aõwesele tuu relyyre Jesusiko. <sup>31</sup> Jesuisi rimyre tebò-ki, tahe, aõwesele irubuna ixãwira. Idi tahe hãwyy tamyreny bede redere.

<sup>32</sup> Txu ralõmy rahudi, ibutumy tamy didydenyde inybina bina. Tule iny tyytybybina tamy didydenyde. <sup>33</sup> Ibutumy iny hãwã ludu iheto ijõ wirotyre. <sup>34</sup> Tii ibutumy binana òta òta riywinyre. Sõwemy tyytybybina riòlòdÿÿnyre. Tyytybybina Jesuisi rierymyhÿre. Tai tahe Jesuisi riijõnyre tyytybybina rarybekeò.

<sup>35</sup> Rudile Jesuisi rare bederahy-txi rexitõenykremy. <sup>36</sup> Simaõ, ijõ mahãdu-wana Jesuisi ijesityhymy roire. <sup>37</sup> Tiiboho Jesuisi raharenyre. Tamy rarybere: —Ibutumy iny arãijereri. <sup>38</sup> Jesuisi tamyreny rarybere: —Rokoikehe rekexinoranyrenyke hãwã wixira-ò. Jiarÿ tamyreny rybe tyyriti aritÿnynykremy. Iurenana tahe jiarÿ anade. <sup>39</sup> Jesuisi rare ibutumy Kalileia bede-ò. Tyytybybina iny-ribi riteõnyre. Tule dohodÿÿna heto-ki tii rybe tyyriti ritÿnynyre.

<sup>40</sup> Hãbu tyybina mahãduõ Jesuisi-ò nade. Tii tatiowotimy resere Jesusiko-ò. Tahe Jesuisi-ò hãbu rarybere: —Adee awikeki tahe, biwateytenyke. <sup>41</sup> Jesuisi juhu urile riwotõenyre. Tii hãbu ritorunyre. Tahe rarybere: —Wadee awire, atyy awimy relekre. <sup>42</sup> Tahe aõwesele ityybina reytera. <sup>43</sup> Jesuisi hãbu riteõnyre. Rarybere: —Kai tahe inyõdee rybeõmykre. <sup>44</sup> Kai bexiteõsinykre Deuxu aõmysÿdÿÿdu-ò. Iwese Moisesi rõerynadÿÿnyre wese, kai bexiteõsinykre. Kia heka inydee deõsinamy riteõsinyre. Kia iny rieryke timybo teytemy atximahãtemy. <sup>45</sup> Tahe hãbu rare ibutumy inyko relyyra. Kia heka Jesuisi tahe uritere hãwãhãkÿõ-ò ralòõhyre. Tahe bederahykile rarire. Ibutumy iny tamy rare ibutumy bede bede-ribi.

## 2

<sup>1</sup> Tiutxuõmybo Jesuisi dòõsede Kafanaõ-ò. Idi tahe rybe reare rehemynymy ratximyhÿ heto-ki. <sup>2</sup> Tahe iny, aõriõre aõkõ, tamy wirotyre heto ijõ-ò. Tahe Jesuisi relyymyhÿ Deuxu rybemy. <sup>3</sup> Hãbu inaubiõwa heka hãbubina-di tamy de-tyydenyde. Kia hãbu rawòronyre taumy-ki. <sup>4</sup> Jesuisi-ò rehemynyõhykylere iny sõwereki. Tahe raòwõnyrenyre idi heto ratyytyre-ò. Hetotyre riraynyrenyre tahe reru-di diberesedÿÿnydenyde byretyre-ki Jesusiko-ò. <sup>5</sup> Jesuisi rieryre hãbu rityhynyrenyre, tai rarybere hãbubina-ò: —Waexi aõraru-ribi araixitarasadÿÿnyre. <sup>6</sup> Bede ywina erydÿÿ mahãdu rorukurenryeri, ixideele rarybemy rÿimyhÿre: <sup>7</sup> —Aõherekibo hãbu kiawese rarybereri. Tii iõwe òwelemy rarybereri. Deuxu dee aõbina binalemy rarybereri. Mobo tahe òraru-ribi iny ritake. Deuxule òraru-ribi iny ritake. <sup>8</sup> Jesusile roholaõlere ihãrele rieryre aõmybo raryberenyre. Tai tahe Jesuisi tamyreny rarybere: —Aõherekibo kiawese tarybetenyteri. <sup>9</sup> Tibohe isiraõtyhyre, tuu ararybeke: —Aõraru-ribi anaixitarasadÿÿnyre ada myike, abyre bimyeke, mariake. <sup>10</sup> Kaiboho bierykemy Deuxu Riõre Hãbutyhykÿ irurudire iny òraru-ribi iny ritakemy. <sup>11</sup> Tahe hãbubina-ò rarybere: —Boholake, myike, abyre bimyeke tahe makre aheto-ò. <sup>12</sup> Tahe hãbu rÿire, tabyre rimymy tahe rare ibutumy

inyru-ò. Ibutumy bede riòtiinyre tahe reàlàre Deuxumy. Ibutumy rarybere: —Tiu heka aõmy kawese rabiõhyymyhỹre.

<sup>13</sup> Jesuisi rare ahohokỹ ijà-ò. Ibutumy tamy doide. Tii iny ribedeerynyre. <sup>14</sup> Levi, Afeu riòre, ronymyhỹ nierumynydu hetowo-ki. Jesuisi ibire-di rareò, tii robira. Jesuisi heka Levi-ò rarybere: —Waijoimy mynake. Tahe rỹimy reare Jesuisi ijoi-ò ralore.

<sup>15</sup> Jesuisi taerydỹỹna-wana rorukure Levi hetowo-ki. Tule nierumynydu mahãduõ ronymyhỹre òrarudu-wana. Ibutumy riroximyhỹrenyire. Sõwemy heka kia iny mahãdu Jesuisi riheludunyenyre. <sup>16</sup> Bede ywina erydỹỹ mahãdu, lahi rybe-di erydỹỹna mahãdu tuu robirenyra. Idi raryberenyre Jesuisi erydỹỹna mahãdu-ò —Aõherekibo tii riroxireri òrarudu-wana, nierumynydu-wana. <sup>17</sup> Jesuisi roholareu, tamyreny rarybere: —Iny ibinaõkeki tahe luahidu tamy kanaõtyhy. Tahe iny ibinakeki, tamy kanake bina-ò. Òbiti mahãdu itxemy aõkõ anade. Tahe òrarudu mahãdu itxemy anade.

<sup>18</sup> Joaõ erydỹỹna mahãdu, lahi rybe-di erydỹỹdu mahãdu-wana byreõhyky txuu tutyhyle rỹimyhỹrenyire. Tahe roire Jesuisi dỹỹraxidỹỹmy. Inyõ Jesuisi ritỹỹraxinyre: —Aõherekibo Joaõ erydỹỹna mahãdu byreõmy rỹiõmyhỹre.

<sup>19</sup> Jesuisi rirawyònyre: —Heriduõ, itxeredu-wana ratxireriu, byreõmy rỹiõtyhy tutyhylemy. <sup>20</sup> Tiutxulemybo tahe heridu iribi kanatakre, tai tahe byreõmy kỹnyikre tutyhylemy. <sup>21</sup> Moheka tyytỹmyra dòbõna ritidikre tyytyby-ò. Idi inatyhymy dòbõna rayjakre tahe tyytyby sõwemy raykake.

<sup>22</sup> Moheka òteti bederatyrybe tỹmyra rihynymyhỹre iròdutyy walabuutybywo-ò. Idi tahe raberyrònymyhỹre, urile iròdutyy walabuu raykake tahe irube rejujuke. Tule iròdutyy walabuu ribinadỹỹnymyhỹre. Irubetỹmyra awire heka iròdutyy walabuu tỹmyrarokile.

<sup>23</sup> Judeu elehydỹỹnareny txu Jesuisiboho ririranymyhỹrenyire maixõmo wesena oworumy, tai ierydỹỹna riòròmehỹrenyire riroxirenykemy. <sup>24</sup> Tahe lahi rybe-di erydỹỹdu mahãdu rarybere Jesuisi-ò: —Aõherekibo aerydỹỹna mahãdu riwinyreri aõwidỹỹna aõkõ karare sabado txu. <sup>25</sup> Tahe Jesuisi tamy rarybere: —Kaiboho aõbo teriranyõletenyta tyyriti-di. Iwese Daviboho-wana aõhebo rotỹỹnyreri aõmy rekoarenymahãu, rama rahumyhỹrenyu. <sup>26</sup> Tii ralore hetotyhy-ò. Tai tahe orotxu sira ybina riyre, tule tamahãdu-ò riwahinyre. Kia tahe Deuxu deòdule rirỹsỹmyhỹre. Kia Davi aõhebo rotỹỹnyre Abiata heka Deuxu deòdu wedurau. <sup>27</sup> Jesuisi tamyreny rarybere: —Sabado txu heka rawidỹỹre inydee, iny tahe rawidỹỹõre sabado txu dee. <sup>28</sup> Deuxu Riòre Hãbutyhyhykỹ tahe sabado txu wedu rare.

### 3

<sup>1</sup> Ixityre Jesuisi ralore dohodỹỹna hetowo-ò. Hãbu debò binahakỹõ tai ratximyhỹ. <sup>2</sup> Lahi rybe-di erydỹỹdu mahãdu Jesuisi retehemyhỹrenyire. Jesuisi sabado txuule riteytenykeki, tiiboho rarybekemy aõbinabinakibo raharenykemy Jesuisi. <sup>3</sup> Jesuisi heka hãbubina-ò rarybere: —Manake. <sup>4</sup> Tahe Jesuisi ijõ mahãdu-ò rarybere: —Aõwihikỹwidỹỹ awire ada aõbinalemy widỹỹ awire. Tibohe awire, itarasa-ki aõbo ada rubu-ki aõbo. Hãbu mahãdu urile riyryre. <sup>5</sup> Jesuisi tamyreny retehere raõbinamy. Tii heka iaõna aõna riwotònyrenymyhỹ. Jesuisi hãbu debò bina-ò rarybera: —Ebò biterenyke. Tai tebò riterenyre, aõwesele awimy relere. <sup>6</sup> Lahi rybe-di erydỹỹdu mahãdu rara Iòlò Herodi mahãdu-ò. Tiiboho raryberenyre timybo tahe Jesuisi rirubunyenye. <sup>7</sup> Jesuisi rexitare taerydỹỹna mahãdu wana aho-ò. Tahe sõwemy iny Judeia mahãdu, Kalileia mahãdu riheludunyre. <sup>8</sup> Ibutumy aõna aõna roholare Jesuisi riwinyreò. Tahe sõwemy tamy nade: Jerusalẽ hãwã

mahādu, Idumeia hāwā mahādu. Iny Jordaō bero ijà-ribi tule nade. Tule iny Tiro hāwā, Sidō beà hāwā-ribi iòhòmy tamy nade. <sup>9</sup> Tahe Jesuisi taery mahādu-ò rarybere: —Walawò bidiwykre. Iny sōwemy dori rehemynyre. Kidiwawotōmonykre òsana. <sup>10</sup> Ibutumy bina mahādu ibymy tebò reareri ixideytedỹmy. Urile iny sōwemy riywinyre dori. <sup>11</sup> Tyytybybina Jesuisi reteherenyreu, urile iko-txi resere ryryreri: —Kai Deuxu Riòre Tate. <sup>12</sup> Tai tahe Jesuisi rarybere tyytybybina-ò, uritere iteòsidỹỹomykemy.

<sup>13</sup> Tii raòwònyre bederatòomy. Tahe taerydỹỹna-ò ryryre tibo tamy reòbykemy. Tahe tamy nade. <sup>14</sup> Tahe ierydỹỹna waòinatxi reuròmy rarunyre tii-wana rarekemy, rybe ritỹnynydyỹkemy. <sup>15</sup> Tule iruru-di rarekemy inybina riteytenykemy. Tule irurudikemy tyytybybina riteònykemy. <sup>16</sup> Kie ierydỹỹnanirenyre: Simaō, (tii tahe Jesuisi ijōni riwahinyre, Pedromy) <sup>17</sup> Txiau ijō, tii Zebedeu riòre rare. Kia seriòre Jesuisi rininirenyre, Boanejimy, inireny. Kia heka irybereny rare, Biumytxy riòrereny. <sup>18</sup> Ijō heka Andre, Filipi, Bartolomeu, Mateu, Tome, Tadeu, Txiau. (Kia Txiau heka Afeu riòre rare.) Ijō Simaō iwitxira, (tii brebuōmy rybe-ki, tasubedeluudu wahe.) <sup>19</sup> Judasi Isariò ijōre, kia heka Jesuisi riwahinyre iòludu-ò.

<sup>20</sup> Tahe Jesuisi nalode taheto-ò. Ixityre iny sōwemy tamy nade. Tai tahe Jesuisi taerydỹỹna-wana riroxiòhyyre. <sup>21</sup> Idi tahe Jesuisi leinarenny itxỹtesana roholarennyreu, riòryrennyre. Tiiboho raryberenyre: —Jesuisi itxỹte iòhòlere. <sup>22</sup> Bede ywina erydỹỹ mahādu doide Jerusalē-ribi rarybemyhỹrennyre: —Belisibu idi ratximyhỹre. Tyytyby wedu ruru-di tyytybybina iny-ribi riteònyreri. <sup>23</sup> Jesuisi inyko ijyymy relyyre: —Timy taheka Satanasi rexiteònykre Satanasi. <sup>24</sup> Iòlòna wiribi rexihitxinykeki tahe, rexihukre ibutumy wiludu. <sup>25</sup> Tahe sỹro luduō wiribi rahitxikeki, rỹiòtyhy. <sup>26</sup> Satanasi rỹikeki reburemy, tii ixìòbitile rexirubunyke. <sup>27</sup> Inyō heka hābu rurutere hetowo-txi ralòòtyhy. Tai rawasinykeki, urile iny ritaataake. Urile hābu rataataakeki, iròòbymy iny rawasinyke. <sup>28</sup> Inatyhy jiarỹ adee ararybereri, ibutumy òraru heka kanaixāwidinykre hābu dee aòtxile aòbina binamy rarybemyhỹre. <sup>29</sup> Kia inyō aòtxile aòbina binamy Deuxu Tyytybytyhymy rarybekeki, tiu heka iòraru rataòtyhy. Kia òraru riwinyre tiiehyymy rarekemy. <sup>30</sup> Jesuisimny kiamy narybedenyde: —Tii heka tyytybybina dire.

<sup>31</sup> Tadi tahelỹỹna-wana nade. Tahe ahanakile ritamanyre. Tamy riteònyrennyre iòrysmy. <sup>32</sup> Iny sōwemy iwerora-di ronyre. Tahe Jesuisise-ò rarybere: —Adi aseriòre-wana ahanakile nyide, araijereri. <sup>33</sup> Jesuisi rarybere: —Mowe nadi rare, waseriòreboho rare. <sup>34</sup> Juhu urile idi retehereri iwerora-ki. Tahe rarybere: —Betehekere, kaiboho ibutumy kaki nadiwesere, waseriòre wese toite. <sup>35</sup> Inyō aōna aōna riwinymyhỹkeki, Deuxu dee awira. Kia heka nadi, waseriòre roire.

## 4

<sup>1</sup> Jesuisi ròsera ahobero ijà-ò iny dohodỹỹmy. Sōwemy iny wirotyre. Tai Jesuisi ronyre hāworo-ò tahe rexitaranyre ahoro-ò. Aho ijà-ò iny wirotyre ijohonamy. <sup>2</sup> Tii aōna aōna sōwemy roerydỹỹnanyre ijyutyhydile. Kaa ijyymy tii relyyre: <sup>3</sup> —Boholake, alòbòròna-di dehuu rara alòbòrònamy. <sup>4</sup> Alòbòròna-di rehumyhỹu, ijō ryro-txi resere. Tahe nawiixōmo rirore. <sup>5</sup> Ijō rejure manarutàsutxi. Tahe aōwesele raumynyre iraruxiòlemy su dori ibutere. <sup>6</sup> Irauxiòreki, bede tôtee alòbòròna rimoenyre idi rurura. <sup>7</sup> Ijō oworuty resere edehu-txi idi ruhunyre edewanale. Tai tahe ede-ò riòdesenyre tai raratynyòlere. <sup>8</sup> Ijō resere su witxira wihikỹ-txi. Kia tahe raumynyre. Tahe sohoji oworutyō 30my iraty raratynyre. Ijō oworuty 60my raratynyre.

Ijõ tahe 100my raratynyre. <sup>9</sup> Tii rarybera: —Kaiboho aõbo õhõtidiyenyre, inatyhymy warybe-ò boholake. Adee awikeki, bierybenyke.

<sup>10</sup> Iny robýtýreu, ijõ rarilere ierydýña mahãdu-wana. Tiiboho rýraxyre Jesuisi-ò: —Aõhekemybo telyyta ijyymy. <sup>11</sup> Jesuisi tamyreny rarybera: —Deuxu Iòlõna rybemy Deuxu araerynanykre. Kia heka tuu teeryõmahãte. Kowaboho-ò jiarý urile ijyymy relyyra. <sup>12</sup> Tai tahe kia wesele relyyra. Iny rethemyhýkemy tahe robiõhyymyhýre. Roholamyhýre ta, rieryõhyymyhýre. Tai tahe raløkemy aõkõ, taðraru riixãwididýñnakemy aõkõ.

<sup>13</sup> Tii tamy rarybere: —Kaiboho aõbo teeryõhyyletenyteri ijyy. Ihãre tahe timykibo bierybenyke ijyy ibutumy. <sup>14</sup> Aloborodu rehumyhý alòbòrõna-di. Kia oworuty heka rybe wese rare. <sup>15</sup> Oworuty ryjãti ludu heka iwese urijohonadu wese heka rare. Rybe-ò roholarenyreu, Satanasi nade rybe iwo-ribi ritakremy. <sup>16</sup> Manarutãsu ludu iwese iny reysamy roholareri. <sup>17</sup> Iny urihimyòle rarorehenymyhýre iraruxi sõweõreki. Idihe rasirara irybe. Tule iny ralahatxinamyreki, ihyye tahe riixãwidinyra. <sup>18</sup> Ede rawo ludu iwese iny witxira roholareri. <sup>19</sup> Tiiboho taaõmydýñnadile rõhõtinyinmyhýre. Sõwemy nieru-di ratxikemy rexinohõtinyinmyhýre ta nieru riitxenanymyhýre. Ijõ aõna aõnadile rexinohõtinyinmyhýre. Kia aõna aõna rybe rirarutxinymyhýre. Tai tahe rybe raratynyõmyhýre. <sup>20</sup> Suwihiký ludu iwese iny witxira roholareri. Kia inatyhymy rýireri heka raratynyre alòbòrõna raratynyre wese. Ijõ raratynyre 30my, ijõ tahe 60my raratynyre. Ijõ tahe 100my raratynyre.

<sup>21</sup> Tii rarybera tamyreny-ò: —Uritere loosõna ideõmyke butxi worawo-txi ada herina raworawoõ-txi aõbo. Loosõna bidekre bedewiõ-ò. <sup>22</sup> Inyõ iwõteõmy aõna aõna tiiehyymy. Tiutxulemybo ratýnykemy ihýre. Iwõteõmy atximahãbenyke aõu bodobikemy atximahãtenyete. <sup>23</sup> Kaiboho aõbo õhõtidiyenyre, inatyhymy boholake. <sup>24</sup> Tahe Jesuisi tamyreny rarybera: —Kaiboho inatyhymy boholabeny tamy taholamahãtenyete. Urihixina iwese teõteri wesele, kai biwykre. Ihãre tahe biwykre ijõ teõta-ribi ritamy. <sup>25</sup> Hãbuõ ijõdikeki tamyle rawahidýñke, tahe hãbuõ ijõõkeki iribi ratatyhyke.

<sup>26</sup> Jesuisi relyyra kia ijyymy: —Deuxu Iòlõna kia ijyy wese rare. Hãbu rehumyhýre alòbòrõna-di suò. <sup>27</sup> Hãbu rummy rõrõmyhýre txulemy rexixamyhýre. Tii rieryõlemyhýre timybo alòbòrõna ratybienymyhýre. <sup>28</sup> Suu ixi dee sohojile raratymyra. Juhuu iòle ramyhýre. Idi tahe raratynymyhýre, ihewonau, tahe, iraty rasõnymyhýre. <sup>29</sup> Bederaty rasõnymyhýreu, iyresydu riteõnymyhýre. Mayrabu-di riòrøkemy bederatysò butudýña dori rexihumyhýre.

<sup>30</sup> Tii rarybera, Deuxu Iòlõna wexe aõwesere. Aõ-ò wexe rikioirenykre. Tiwexe ijyy kawesere. <sup>31</sup> Kia heka mostardaty wesere. Tii heka iylatyhymy ratximyhýre kabede-ki. <sup>32</sup> Tahe tii raumynymyhýre wana, ireitòbòròdýñ ratyre rarurururunymyhýre. Tahe nawii tamyle rasýnymyhýre. Iubòròrò rawolemy taheto riwinyre.

<sup>33</sup> Tahe Jesuisi Deuxu rybemy rierynanymyhýre. Kia ijyy wese sõwemy ijyy rierynanymyhýre. Kialemy iny-ò Jesuisi relyymyhý ibutumy tamy reny ritynynymyhýreki. <sup>34</sup> Kia-ò riòbitinyõlere ijyyõ. Tahe iny-ribi irehemy taerydýña-ò riòbitinyre.

<sup>35</sup> Iu txu txiorolemy Jesuisi rarybere taerydýña-ò: —Rikiòhòrerenyke kowa weribi ijã-ò. <sup>36</sup> Sõwemy iny rarire aho ijã-ki. Tahe taerydýña tamy ralore. Roire hãwò-di. Tahe ijõ hãwò idi ratximyhýre. <sup>37</sup> Tahe bede binahaký rexidelenyre yhymy. Tahe òbò hãwò rihãtenymyhý tai ritýmynykemy rite-lenyre. <sup>38</sup> Tai tahe Jesuisi rõrõmy roimyhý tòro-ki irati tarahynatyre-ki. Tai tahe riixixanyre. Ijõ rarybere: —Waerydýñdu, adeehe awimy aõbo iny

ituerenykre. <sup>39</sup> Rexixamy Jesuisi. Tii yhy riixãwididỹnyre. Tii ahohokỹ-ò rarybere: —Biyryke! Tai bede ruhuwihikỹre. <sup>40</sup> Tamyreny rarybere: —Aõherekibo kaiboho taberutenyteri? Deuxu aõbo tetyhynyõmahãtenyte? <sup>41</sup> Tai tahe tiiboho bede riõtĩnyrenyra. Tahe widee raryberenyre: —Mowexe tuu yhy ahohokỹ-wana irybe riywinyke.

## 5

<sup>1</sup> Ritehemynyrenyre ijõ berohokỹ weribi ijãna-ò. Kowa heka ibutumy hãwãhãkỹ Kadarena inirenyre. <sup>2</sup> Jesuisi hãworo-ribi resereu, hãbu tyytybybina-di robire ròhònyreri wabede-ribi. <sup>3</sup> Kia heka tiiemy rasỹnomy raremyhỹ wabede-ki. Katahe wiji moheka womati reroti-di rataataaõtyhy. <sup>4</sup> Aõdorihe òhòõre tebò iwa rataataare womati reroti-di. Tiiemy heka rimoenymyhy. Teòruty ludu tawararu ludu tule ritòtynymyhyre iyresomy. Moheka iruruõre iny erydỹmy. <sup>5</sup> Txuu ruu-wana heka tii rasỹnyre wabedewo-ki. Tii rariamyhỹre bederatòomy. Tule rirajuamy tai rexihãtenyre mana-di. <sup>6</sup> Tai tahe Jesuisimy robireu, tii raijaranyre Jesuisi-ò. Resere tatiowotimy Jesuisiko-ò. <sup>7-8</sup> Jesuisi tyytybybina-ò rarybere: —Iribi bòhònyke. Tahe tyytybybina rarybera: —Aõwe wadi tate. Kai, Jesuisi, ibutumy inyõ dee inyatyre tate. Kai Deuxu Riòre tate. Lãhãmy lãhã, uritere aõbina binahakỹmy wahõrõdỹõmykre. <sup>9</sup> Jesuisi ritỹraxyre: —Mobohe anire. Tyytybybina rirawyõnyre: —Wanireny sòwetyhyre wasõwerenyreki. <sup>10</sup> Urile karibi wateòdỹnyreõmykre. <sup>11</sup> Tahe kowa-ki ixỹni juramy riroximy rỹimyhỹ bederatò-ki. <sup>12</sup> Ibutumy tyytybybina rexitònyrenyre: —Biwateònybenyke ixỹni jurawomy aralòrenykemy. <sup>13</sup> Tahe Jesuisi riteònyre. Tyytybybina aõwesele ròhònyre tahe ixỹniwomy ralore. Ixỹni jura tahe raòrunyre rejuxunyre ijõtira-ribi. Berawo-txi tahe rabòròròre ahohokỹ-ki. Inatxi mil ixỹni rabòròròre. <sup>14</sup> Ixỹni-di itxeredu reare ijyymy ibutumy hãwã hãwãmy relyyrenyre. Tahe iny dirahude tamy itxeremy. <sup>15</sup> Tiiboho Jesuisi-ò doideu, tuu robirenyra hãbu tyytybybina-di raremyhỹ. Tii rexitynymy ronymyhỹre. Tii heka òbitimy ròhòtinymyhỹre. Tai iny mahãdu rabedeòtiidỹnyre. <sup>16</sup> Tiiboho tuu robirenyre, ijõ-ò relyyrenyre ixỹni ijyymy, timybo aõhebo rotỹnyremy hãbu tyytybybina-di ratximyhỹre. Tule relyyrenyre timybo rotỹnyre ixỹni jura. <sup>17</sup> Iny rexitònyre Jesuisi-ò rexitakremy isureny-ribi. <sup>18</sup> Jesuisi hãworo-ò ralore. Tahe hãbu tyytybybina-di ratximyhỹre, rexitònyre Jesuisi-wana rakemy. <sup>19</sup> Tahe Jesuisi idy derare. Tamy rarybera: —Mahe asỹ-ò, aijoi-ò belyyke aõna aõna Deuxu adee riwinyremy, iwese tii araruxetònymyhỹre wese. <sup>20</sup> Tahe hãbu rare Debòwiò hãwãreny-ò. Ibutumy Jesuisi aõna aõnamy ixidee riwinyremy relyyre. Ibutumy iny ribedeòtiidỹnymyhỹre.

<sup>21</sup> Ixityre Jesuisi rare ahohokỹ weribi ijã-ò. Ixidee iny sòwemy ributunyre. Tii heka ihỹmyhỹ ahohokỹ ijã-ki. <sup>22</sup> Tahe dehemynyde tamy dohodỹna heto weduõ. Ijairu inire. Tii Jesuisi robireu, resere tatiowotimy iko-txi. <sup>23</sup> Ijairu rarybere Jesuisi-ò: —Wariòre irubu iòhòtyhylemy roireri. Kai manakre tamy ebò bitidikremy. Tai awimy relekre, ruruõtyhy. <sup>24</sup> Tahe Jesuisi tii-wana rare. Iny sòwemy tule rare iòhòkile tamy rỹire.

<sup>25</sup> Kia heka hãwyyõ binamy ramyhỹre. Ihãlubu rejuxunymy raremyhỹ. Beòra waòinatxi reuròmy rejuxunymyhỹre, rihuõhyy raremyhỹ. <sup>26</sup> Tii aõhòkỹmy rotỹnymyhỹre sòwemy òhotibedu mahãdu-di. Tahe awimy rotỹõlemyhỹre. Urile tanieru ibutumy rahure òhotibedu mahãdu-ki. Awimy releõlemy, ire bedè-ò resere. <sup>27</sup> Tahe roholare Jesuisi nina-ò tahe iòhò-ki nade inyy-ki. Idi ihewo-ribi rimyra ityynora-ki. <sup>28</sup> Hãwyy ixidee rarybemyhỹre: —Krile itykynora-ki karimykeki, karekyteke. <sup>29</sup> Tahe aõwesele ihãlubu ijera

ixāwire. Ixidee awimy rōhōtinyre. <sup>30</sup> Jesuisi rieryre iruru iribi rōhōnyremy, tai rarybere: —Mobo watyynora rimyra. <sup>31</sup> Tahe ierydỹna raryberenyra aōherekibo tuu tarybeta ibutumy taheka iny abirelemy rỹireri. <sup>32</sup> Jesuisi retehemyhỹre urile mobo rarekemy. <sup>33</sup> Hāwyy rierymyhỹ aōhebo rotỹnyre. Tii ruberumy Jesusiko-ò resere relyykemy iko. <sup>34</sup> Jesuisi rarybera: —Lerỹ, atyhydỹna kỹnyhe aratarā. Mahe, kai dori texiywinyta.

<sup>35</sup> Tii rarybemyhỹò, dohodỹna wedu deòdu rehemynyrenyneri. Tiiboho raryberenyra: —Wawedu, Ijairu, ariòre rurumy roireri. Aōmybo tahe Erydỹdu-di atxiteri. <sup>36</sup> Jesuisi kia-ò roholara tahe rarybera dohodỹna wedu-ò: —Brebuōmy, urile bityhynkre. <sup>37</sup> Jesuisi-wana roire, Pedro, ijō Txiau, ijō Joaō. Joaō heka Txiau seriòre rare. Kaòle heka reòbyre tii-wana rakemy. <sup>38</sup> Dohodỹna wedu heto-ò dehemynydeu, ixiyjadỹ-ò roholara, robureriò, rirajuareriò. <sup>39</sup> Jesuisi ralore tahe rarybera: —Aōherekibo tabutenyteri. Hiraririkỹ rurumy aōkō roireri. Tii urile rōrōreri. <sup>40</sup> Juhu urile tai rutxuenyrenyra Jesuisi-ki. Tahe Jesuisi ibutumy iny riòlòdỹnyra hetowo-ribi. Tahe ise, tybyle, ixidee rimyrenyra ratxirenykemy. Tahe tamy rirònyrenyre tai hiraririkỹ roimyhỹò. <sup>41</sup> Jesuisi hiraririkỹ debò rimyre tahe rarybera: —Talita kumi. (Katahe iwitxira rybemy rarybera. Kiamyneri heka, mynyikemy.) <sup>42</sup> Aōwesele hiraririkỹ rỹimy reara. Tahe rariara aōmyreki iwyrā waòinatxi reuròmmy iwyrāmy. Tahe urile bede riòtiinyrenyre. <sup>43</sup> Jesuisi riteranyre moō rierydỹkemy aōkō. Jesuisi tule rarybere: —Rỹsỹna tamy biwahinykre.

## 6

<sup>1</sup> Jesuisi dexitade kowa bede-ribi. Tahe tauladu tybiena hāwā-ò dehemynyde. Taerydỹna mahādu riheludunyre. <sup>2</sup> Sabado txumy rierynanyre dohodỹna heto-ki. Sōwemy iny roholamy rỹimyhỹ bede riòtiiny. Tahe rarybere: —Tiribibo kia hābu aōna aōna bede rieryre. Aōbedeeryhykỹbo ratximyhỹre. Timyta heka bedeòby riwinyre. <sup>3</sup> Kia aōbohe aōwidỹdule ratxireri, Marie riòrele. Tiiboho aōbohe Txiau, Jyje, Judasi, Simaō, seriòrebohole ratxirenyneri. Terỹboho aōbohe tule kakile ratxireri. Ibutumy iny heka Jesuisi derarenyre. Irybe rityhynyōre. <sup>4</sup> Jesuisi rarybere tamyreny: —Deuxu rybedỹdu heka tyhydỹna ritaòlekre tahāwāreny-ribi, taijoi-ribi, tasỹ-ribi. <sup>5</sup> Tahe Jesuisi kowa-ki bedeòby riwinyòlere. Urile tebò ritidire inybina bina tyre, taile riteytenyre. <sup>6</sup> Jesuisi urile bede idireny riòtiinyre rityhynyòlemyhỹrenyreki. Tahe Jesuisi reurore hāwā hāwā-di erydỹmy.

<sup>7</sup> Tii ixidee ributunyre tawaòinatxi erydỹna mahādu. Tii riteònyre inatxi inatxi iubỹtỹnyre. Tamyreny taruru-ribi riwahinyre tyytybybina deòdỹki. <sup>8</sup> Jesuisi tuu rarybere: —Urile biwykre adebòna. Uritere orotxu aōkō, nieruhyna aōkō, nieru wereysanawo-ki aōkō, iwydysyrenyōmykre. <sup>9</sup> Uritere waubehetyōmy noōmykre. Uritere inatximy wirawomy tyy-di ixityydỹōmykre. <sup>10</sup> Hāwā-txi malòkeki, tiemy taile bonykre tiubedemybo iribihyyle bōhōnykre. <sup>11</sup> Titxi behemynybenykeki, uritere iny erarenymy reakeki, roholaòkeki, txiòrare, urileta awareny bitòtynkre bede erynamy. <sup>12</sup> Tahe tiiboho roire. Rybe ritỹnydỹmyhỹre iny ixidee rexirahĩrenykeny. <sup>13</sup> Tyytybybina irehemy iny-ribi ririradỹnykeny. Sōwemy inybina tyre òlỹre ritxiwire. Tai tahe riteytenyre.

<sup>14</sup> Kia heka iòlò Herodi roholara. Jesusini dori erynatyhymy raremyhỹ. Tahe ijōboho rarybemyhỹreny: —Joaō Sebedỹdu rexixara rubu-ribi. Ijō rarybemyhỹreny: —Eliale ratxireri. <sup>15</sup> Ijō rarybera: —Deuxu rybedỹdu ratxireri. Deuxu rybedỹduò wese heka ratxireri. <sup>16</sup> Herodi roholareu



aõbo Jesuisi riwinyreu, rarybera: —Kia hãbu Joaõ ratxireri. Kia heka irati reorore heka rare. <sup>17</sup> Kia heka iòlò Herodi riteònyre imynamy. Idi tahe ritisanre ròtenawo-ò. Taseriòre hãwyy òraru-ki kia riwinyre. Filipi iseriòreni rare. Iseriòre hãwyyini Herodia rare. Herodi, Herodia-wana roire iseriòre riòrese-wana. <sup>18</sup> Juhuule Joaõ rarybere Herodi-ò: —Kai aõkõre aseriòre hãwyy-di mabeõtyhy. <sup>19</sup> Herodia tamy iky reamyhỹ rirubunykemy ratximyhỹ tahe aõkõhyllere. <sup>20</sup> Herodi tahe Joaõ rityhynyre. Tii rierymyhỹre Joaõ hãbu wihikỹõ ratximyhỹ. Tai riyrubunyre ròtenawo-ki. Herodi Joaõ roholareu, urile bede riòtiinyre urile roholawihikỹre. <sup>21</sup> Kia txuu ibeòra reare Herodi lisina berenamy riwinyre. Tahe ibutumy hãwã dinodu, soldado wedu mahãdu, tule ibutumy hãbu ninihikỹ Kalileia mahãdu-ribi rihuòtere. <sup>22</sup> Ijadòma ralore resere, Herodia riòre. Herodi, iny huòtedu mahãdu-wana tamyreny awire. Iòlò ijadòma-ò rarybera: —Aõtxile aõma wadee bexitòenyke, adee ariwahinykre. <sup>23</sup> Inatyhymy adee ararybekre. Waaõna aõna iweeremy bexitòenykeki, adee ariwahinykre. <sup>24</sup> Ijadòma tadi ritỹraxyre aõmybo tahe tamy rexitòenykre. Ise rarybera: —Joaõ Sebedỹkỹdu rati kai bexitòenykre. <sup>25</sup> Tahe ijadòma ròsere iòlò-ò. Tahe ijadòma rarybera: —Joaõ Sebedỹkỹdu rati kai biwahinykre hyna tyre-ki. <sup>26</sup> Iòlò sòwemy rabadewore irybe-ki. Rexitxiònyõlere iny dori sòwemy ibire-ki. <sup>27</sup> Iòlò soldado rariare Joaõ rati òrysymy. Tahe irati riorore ròtena-ki. <sup>28</sup> Tahe irati diwyde besetyre-ki. Ijadòma-ò riwahinyre, tahe ijadòma tadi-ò riwahinyre. <sup>29</sup> Joaõ erydỹna rieryreu tahe, nade iumy òrysymy. Tahe iumy riwyre wabede-ò.

<sup>30</sup> Jesuisi erydỹna mahãdu ròserenyre Jesuisi-ò. Tahe relyyrenyra ibutumy aõmydỹnana tule ibutumy rierynanyhỹre. <sup>31</sup> Jesuisi tamy rarybere: —Inyboho sohojile rokoireny bederahy-txi ixielehydỹmy. Tii dori rarybera tamy heka byrena iòhòtyhyõlere tamy roxina raòhòõlere. Iny sòwemy tamy wii reutydynyri. <sup>32</sup> Tahe tiiboho sohojile hãwò-di roire bederahy-txi inyò-ò. <sup>33</sup> Iny sòwemy tuu robira ròhònyrerimy. Tahe iny ibutumy hãwã hãwã ludu rajaranyre tòròsòna-ò. Tiibohole juhu rehemynyre iko-ki. <sup>34</sup> Jesuisi rororeu, tahe inymy sòwemy robire, riraòrerì. Jesuisi tamy ratòenymyhỹre. Tiiboho dori iwese budoeni idi itxereduõmy rỹireri wesemy. <sup>35</sup> Txuu raloreu, ierydỹna mahãdu Jesuisi-ò roire. Tiiboho rarybere: —Ka kỹnyhe bederahy roire txuuke rexihura. <sup>36</sup> Kai tahe iny biteònykre hãwã hãwã mahãdu-ò rỹsỹna ixideereny õbradỹmy. <sup>37</sup> Jesuisi tamyreny rarybera: —Kaiboho tamy rỹsỹna biwahinykre. Tahe raryberenyre: —Timybo tahe inyboho 200 prata womati nieru-di orotxu rikiòbranyrenykre. Timy wexe tamyreny rỹsỹna rikiwahinyrenykre. Jesuisi tamyreny rarybera: <sup>38</sup> —Tiwese orotxu bohe rỹire. Maa tamy itxeremy. Idi tahe rieryrenyreu, rarybera: —orotxu iruyre, utura inatxi. <sup>39</sup> Idi tahe Jesuisi iny rabòròhòkỹ asityre rorukukremy. <sup>40</sup> Idi tahe iny rabòròhòkỹ wii rirareare, ijõ s̄wètamy, ijõ 100my. <sup>41</sup> Jesuisi orotxu utura-wana rimyre tahe retehere biu-ò Deuxu-ò rexitòenyre. Idi tahe orotxu reòròòròre. Riwahinyre taerydỹna mahãdu-ò riwykremy iny-ò. Tule utura inatxi wirarea riwahinyre iny mahãdu dee. <sup>42</sup> Ibutumy iny riroxire. Rihydymy rỹimyhỹ. <sup>43</sup> Idi tahe ritỹxinyre waòinatxi reurò weririmy orotxu yre yre utura-wana rauhenyredi. <sup>44</sup> Kia heka rerỹsỹre 5000 inymy rỹsỹna-di.

<sup>45</sup> Juhu Jesuisi riteònyre taerydỹna mahãdu ixiko-ò kanaijõwe-ribi ijà-ò, Besaida hãwã-ò. Tii tahe ririre iny riteònykremy. <sup>46</sup> Tahe riteònyreu, tii rare ixitòedỹmy bede ratòhòkỹ-ò. <sup>47</sup> Txioro bedesou hãwò ahoty-ki ratximyhỹre. Jesuisi suki ratximyhỹre ixisohojile. <sup>48</sup> Tahe yhy rebònymyhỹ iutedereny-ribi. Hãwò rariaõlemyhỹ. Tahe Jesuisi tuu robire txu ijera iòhò-di. Tahe betyredile tamyreny rariare. Jesuisi iratyreny wese rariakre. <sup>49</sup> Tahe tuu robireu,

betyre-di rariareriò, tiiboho unisÿna rōhōtinyrenyire, rirajuarenyre. <sup>50</sup> Tahe ibutumy tuu robira ibutumy ruberurenyre. Jesuisi aōwesele rarybere: —Urile beysabeny, breburenÿomy. Jiarÿle watzireri. <sup>51</sup> Tii ralore tamyreny hāworo-ò. Yhy urile ixāwire. Ierydÿÿnaboho bede riòtiinyrenyre. <sup>52</sup> Tiiboho ruberurenyre, orotxu bedeòbyna dori rierykōrenyre.

<sup>53</sup> Tiiboho riòhòrenyre, ritehemynyre Kenesare-ò. Kia-ki hāwò ritisarenyra. <sup>54</sup> Tahe hāworo-ribi ròtuòeriu, ibutumy iny Jesuisi rieryra. <sup>55</sup> Juhu raòrunyrenyre bina bina mahādu òrysomy. Idi tahe didydenyde roholarenyre titxibo tai Jesuisi ratximyhÿò. <sup>56</sup> Tii raloreu iny hāwā-ò aōbo ada hāwāhākÿ-ò aōbo ada bedero-ò aōbo, tiemy iny bina bina mahādu iryko-txi ritidire. Tai tamy rexitònihikÿre tamy debò reakemy ityynora-ò. Ibutumy tamy debò reareu, tahe riteytenyre.

## 7

<sup>1</sup> Jesuisi-ò ributumy fariseu mahādu lahi rybe-di erydÿÿdu mahādu wahe. Tule bede ywina erydÿÿ mahāduributumy. Jerusalē-ribi ritehemynyreri. <sup>2-5</sup> Jesuisi erydÿÿna mahādu tebò risuhòomy riroxireri. Fariseu mahādu, Bede ywina erydÿÿ mahādu-wana Jesuisi-ò ritÿÿraxinyrenyre: —Aòherekibo aerydÿÿna tebò risuhòomy riroximyhÿrenyre. Aòherekibo ihetxiu bede ywidÿÿnana rityhynyòreri. Lahi rybe-di erydÿÿdu mahādu judeu mahādu-wana ihetxiu iwidÿÿnana riwinymyhÿrenyre. Tii heka tebò tiu suròduomy riroxiòmyhÿre. Tiiboho aōna aōna wydyna heto-ribi dòsemahādeu, tiu heka rōhòdile riroxiòmyhÿre. Sōwemy iwidÿÿnareny rityhynymyhÿre. Bemona butxi, womati bese-wana risuhòrenyre. <sup>6</sup> Jesuisi tamy dirawyònyde: —Isaia juhuule rarybere tiwesebo kaiboho toite. Kaiboho itxenadÿÿdu toite. Riritinymy rÿire:

—Kaiboho riwawowydynymyhÿre tary-di. Tahe awo-ribi waluuòlemyhÿre.

<sup>7</sup> Kaiboho riwawowydynyre tahe watxi nohōti ijeraòlerenymy. Kai teerynanyteri erydÿÿna-di iny nohōti-ribi namyhÿdeòle.

<sup>8</sup> Kai Deuxu erydÿÿna tyhydÿÿomy. Iny erydÿÿnale tetyhynytenyte. <sup>9</sup> Tii tamyreny rarybera: —Kaiboho aōbo ijō bihōrōnybenyleke, biaòmÿsÿnybenyke. Deuxu rybe bede ywina kaiboho tetyhynyòlemyhÿtenyte. Arybe bede ywinale tetyhynyòlemyhÿtenyte. <sup>10</sup> Moisesi rarybera:

—Kaiboho biytyhynybenyke adirybe-ò, tybyrybe-ò. Inyò tadimy tybymy iehehemy rarybekeki, aōtaxiny ruruke.

<sup>11</sup> Kaiboho teerynanyteri hābuò-ò tadi tybywana-ò rarybekemy: —Wanieru waribi bitaòke. Ariwahiny dori Deuxu-ò. Wanieru heka korbÿ rare. (Korbÿ heka uri wahidÿÿna rare, iwitxira rybe wahe.) <sup>12</sup> Jesuisi rarybehymy rare: —Kiawese rierynanymy raremyhÿ, kaiboho uritere hābuò tadibo-ò aōmydÿÿomy rarekemy. <sup>13</sup> Kawese ityhydÿÿrenyomy Deuxu rybe, aerydÿÿna òraru-ki. Sōwemy aōna aōna kawese tatÿÿnytenyte. <sup>14</sup> Tahe Jesuisi ixityre rarybera inysōwe-ò: —Bodoholabenyke, ibutumy bierybenykemy. <sup>15</sup> Aōbo iny-ò ralòmÿhÿre, kia tahe iny risunyòlemyhÿre, inywo-ribi tahe namyhÿde kia tahe iny risunymyhÿre. <sup>16</sup> Inyò bierybenykeki, boholawibenyke. <sup>17</sup> Tahe iny-ribi ròhònyreu, heto-ò raloreu, ierydÿÿna mahādu tahe tamy rÿÿraxire ijyymy. <sup>18</sup> Tii tamyreny rarybere: —Kaiboho tule aōbo teeryòmahātenyte. Aōbo iny-ò ralòmÿhÿre, kia iny risÿnyòlemyhÿre. <sup>19</sup> Tawotyhy-ò dori ralòòlemyhÿre. Urile weryri-ò ralòmÿhÿre idi umy-ribi ròhònymyhÿre. (Ibutumy rÿsÿna tahe awire riki.) <sup>20</sup> Tule rarybere: —Aōbo iny-ribi namyhÿde, kia risurisunymyhÿre. <sup>21</sup> Inywo-ribi tahe ròhònymyhÿre ibutumy nohòtinana binahakÿ. Kia heka rare nohòtinana binahakÿ: òta òtalemy, wasilemy, rubudÿÿlemy, ijō

hābu riðrese ridymy, <sup>22</sup> ibutumy aōna aōna wedu iny ratyrekemy, binamy rōhōtinymyhÿre, ruilemy, aōbina binaōle, itxeredu, aōbina binalemy rybedu, tule itxÿtelemy. <sup>23</sup> Kia heka ibutumy bina bina inywo-ribi namyhÿde. Kia heka iny rexisunymyhÿre.

<sup>24</sup> Jesuisi rexitare. Tahe r re Tiro hāwāreny-ò, Sidō beà hāwā hāwā-ò. Tahe tii ralore hetowo-txi tahe moō rierykōdi ixidire hetowo-txi. Ralòrau tahe, rexiwòke aōkō. <sup>25</sup> Jesuisi tyhynina-ò hāwyy roholare, tahe tamy nade, tatiowotimy resere. Iriòre-riki tyytybybina dire. <sup>26</sup> Kia heka hāwyy Grego mahādu rare. Ilahinanire heka Siru Senisia. Tii Jesuisi-ò rÿÿraxire tyytybybina iriòre-ribi deòdÿÿmy. <sup>27</sup> Tahe Jesuisi tamy rarybere: —Txioiny, juhu inihe uladu mahādu riroxikre. Wadee awiòre uladu-ribi rÿsÿna ritake ijòrsa-ò. <sup>28</sup> Hāwyy rirawyònyra: —Inatyhy rare, Wāhī. Kurile rÿsÿna kyre kyre rejujumahāre. Kòwòruku bese-ribi, kuladu-ribi. Kiamy heka itxoòrsa rirakuximyhÿre. <sup>29</sup> Tahe Jesuisi tamy rarybera: —Kia rybe òraru-ki heka kaa tarybeta tyytybybina ariòre-ribi rohonyra. Kia bòðsekre aheto-ò. <sup>30</sup> Hāwyy taheto-ki rehemynyreu, iriòre-ki rahara byretyre-ki roire. Hāwyy rieryre tyytybybina iribi ròhònyre.

<sup>31</sup> Tai tahe Jesuisi ixityre rexitare Tiro hāwāreny-ribi, Sidō beà hāwā reny-ò rara Kalileia aho-ò. Tii raremyhÿu, Debòwiò hāwā hāwā reny ririre. <sup>32</sup> Tahe tamy didydenyde hābuò nohōtityò. Tii roholaōlemyhÿre. Tule awimy rarybeòhyylemyhÿre. Tahe rexitònyrenyra Jesuisi-ò, tebò ityre ritidikemy. <sup>33</sup> Jesuisi tii ritare inysòwehekÿ-ribi tahe tebò ritidire tōhōti-ò. Tahe rarybexinyre tahe idi tòròtòbymy reare. <sup>34</sup> Tahe Jesuisi tarue ruwyre biu-txi, ele-di reare. Tahe rarybere: —Ebata. (Kia heka rybe riwiuròsòdÿÿmy rare, —Biraynyke.) <sup>35</sup> Aōwesele tōhōti riraynyre. Tòròtò riykoykonyre. Tii aōwesele awimy rarybere. <sup>36</sup> Jesuisi rarybere: —Uritere iny-ò ijyyōmykremy. Ihārele tahe ibutumy kiamy iny-ò relymyhÿre. <sup>37</sup> Idi bede riòtiinyrenyre. Tahe raryberenyre: —Ibutumy tii riteytenymyhÿre. Tii nohōtity aōwesele roholamyhÿre. Hābu rybeò aōwesele rirybedÿÿnymyhÿre.

## 8

<sup>1</sup> Kia txuu ixityre iny sōwemy ributumy. Kiau tule aōrÿsÿnamy ijòòhyylere. Jesuisi taerydÿÿna mahādu ixidee ributumy. Tahe tamyreny rarybere: <sup>2</sup> —Jiarÿ inysòwe rewotònyreri. Tiiboho txuu inataō waki rÿireri byreòlemy. <sup>3</sup> Jiarÿ byreòlemy ariteònyrenykeki, ryrowetyakile reserenykre iòderawyrinymy. Tule, iny sōwemy irehe-ribi nade. <sup>4</sup> Ierydÿÿna tamy dirawyònyde: —Timytaka inyboho tamyreny orotxu rikiwahinyrenykre kabederahy-ki. <sup>5</sup> Tii ritÿÿraxinyre: —Tiwesebo orotxu kai ijòdire. Tiiboho rarybere: —Debò inatxi reuròmy. <sup>6</sup> Jesuisi iny sōwemy risÿdÿÿnykremy sutyre-ò. Tii orotxu debòinatxi reuròmy rimyra. Tii rexitònyreu tahe riorore. Tahe riwahinyre taerydÿÿna mahādu-ò riwykemy iny sōwe-ò. <sup>7</sup> Tule utura ibutemy rÿimyhÿ. Tahe rexitònyreny rahudi tahe taerydÿÿna-ò rarybere: —Kaa tule biwybenyke iny sōwe-ò. <sup>8</sup> Tiiboho riroxirenyremy tahe rihydymy ratximyhÿ. Iyre yre rauhenyryre riwyrenyryre weriri debò inatxi reuròmy riwyrenyryre rÿÿximy. <sup>9</sup> Inaubiòwa mil iny iòhòmy rÿimyhÿ. Tahe Jesuisi rexideòwarinyre iny sōwe-ò. <sup>10</sup> Tii ralore hāworo-ò taerydÿÿna-wana. Tiiboho roire Damanuta hāwāreny-ò.

<sup>11</sup> Lahi rybe-di erydÿÿdu mahādu nade fariseu mahādu wahe. Tiiboho tamy nade rybe òbitidÿÿmy. Tiiboho rÿÿraxirenyra bede erydÿÿnaò kiditeòsinykremy. Lahi rybe mahādu rierykemy tii inatyhy rare urenana. <sup>12</sup> Tii raelewesenanyre tawo-ki rarybere: —Aòherekibo kaa iny mahādu rÿÿraximyhÿre bede erydÿÿnamy. Inatyhymy jiarÿ ararybekre: —Bede erydÿÿna heka tamy

rawahidỹỹōtyhy. <sup>13</sup> Tahe idi Jesuisi rexitare. Hãworo-ò ralore. Idi rohorere kanawe-ribi ijà-ò.

<sup>14</sup> Ierydỹỹnaboho tahe tōhōti rosare orotxu wydysy-ribi. Sohojityhyle heka orotxu roimyhỹ hãworo-ki. <sup>15</sup> Jesuisi tamy ribedeerynyre: —Beteheiny, biyrubuny, lahi rybe mahãdu, Herodi mahãdu-wana wirỹsỹna uri-ribi. <sup>16</sup> Jesuisi erydỹỹna mahãdu ixideele rarybere: —Aõherekibo Jesuisi kia rarybereri. Inyboho iorotxurenyōreriki òsana. <sup>17</sup> Jesuisi heka rieryra tahe rarybera: —Aõherekibo raryberemy orotxu ijōōremy. Kaiboho aõbo teerytenyōte. Kaiboho aõbo arawoxierynyre.

<sup>18</sup> Kaiboho aõbo arueōrenyrene. Tabiōletenyteri. Kaiboho aõbo itxi òhōtirenny reaōlereri.

<sup>19</sup> Jiarỹ 5000my iny-ò orotxu reareareu, tiwesebo weririmy orotxu yre yre-di ritỹxinyre. Tahe tiiboho rirawyònyre: —Waòinatxi reurò weririmy. <sup>20</sup> Tahe debòinatxi reurò orotxumy reòròra 4000 inymy, tiwesebo weriri orotxu yre yre-di ritỹxinyre. Tiiboho rirawyònyre: —Debòinatxi reuròmny. <sup>21</sup> Tahe tamyrenny rarybere: —Timyrekibo tahe teerytenyōte.

<sup>22</sup> Dehemynyde Besaida hãwã-ò. Tahe hãbu ruetà-di tamy didydenyde. Rexitòenyrenny tamy debò reakemy. <sup>23</sup> Jesuisi tebòmny rimyre tahe ridyre hãwã-ribi bederahy-ò. Iruetyre rarybexinyre. Tebòmny tamy reare. Tahe ritỹraxyre: —Aõmybo aõbo tabiteri. <sup>24</sup> Hãbu tahe biu-txi tarue riukora, tahe rarybera: —Hãbumy rabira, òwòru wese rỹireriò, rariareri. <sup>25</sup> Ixityrele Jesuisi tebò reare irue-ò. Hãbu heka irue reyteramy òbitilemy retehereri. Robire irehetyhy-ò itỹnyhỹkỹlemy. <sup>26</sup> Tahe Jesuisi riteònyre isỹ-ò urile ihãwã-ribi ròðseòmykre.

<sup>27</sup> Jesuisi taerydỹỹna mahãdu-wana ròhònyrenny Sesaria Filipi hãwãrenny-ò. Ryki taerydỹỹnarenny-ò ritỹraxyre: —Mowe hãbureny wamy raryberenyra jiarỹ raremy. <sup>28</sup> Tiiboho rirawyònyra: —Joaõ Sebedỹỹdu riki, ijō Eliasi riki, ijō riki Deuxu rybedỹỹdu. <sup>29</sup> Tahe Jesuisi tamyrenny ritỹraxyre: —Kaiboho, mobo tarybetenyte jiarỹ raremy. Tahe Pedro rirawyònyre: —Kai Kristu atximahãte. <sup>30</sup> Tii raraybinihikỹmy ixi-ki rarybera: —Inyko wamy ijyyòmykre.

<sup>31</sup> Jesuisi rexiranyre erydỹỹmy: —Deuxu Riòre Hãbutyhyhykỹ heka aõna aõnamy aõhòkỹmy rotỹỹnyhikỹkre. Matuari mahãdu heka ixideramy ryanakre. Tule Deuxu aõmysỹdỹỹdu wedu, Bede ywina erydỹỹ mahãdu ixideramy ryanakre. Jesuisi kudurukre idi tahe txu inataõ rỹidi kedexiakre rubu-ribi. <sup>32</sup> Idi tahe iòrurehekỹlemy tamy rarybere. Pedro iny-ribi Jesuisi ritare, tahe tamy rarybere: —Kawese rybeòmyreke. <sup>33</sup> Jesuisi ròðsemy reare, retehemyhỹ taerydỹỹna-ò tahe Pedro-ò rarybere: —Bexitake wako-ribi Satanasi. Kai dori Deuxu ijoi aõkõ atximahãte. Kai hãbu ijoi tate. <sup>34</sup> Jesuisi ributunny iny sòwehekỹ, taerydỹỹna-wana tahe rarybere: —Inyò wahemy kanakeki, ixideele rexirahike, tahe taitxeò rimyke riwaheludunykemy. <sup>35</sup> Mobo taumy tarasamy rurukeki, riononykre. Tahe aõtxile iny waluukeki, Rybewihikỹ luukeki, taumy wadee riononykeki, kia heka taumy ritakre. <sup>36</sup> Aõbo tahe awire, ibutumy aõna aõna bitake tai aumy biononyke. <sup>37</sup> Aõbo tahe iny riwahinykre taumy wydyna òkesena aõbo. <sup>38</sup> Kai wijinabòdu òrarudu mahãdu rare, òta òtadu rare. Aõtxile iny walau warybe lau raixỹrukeki, tule Deuxu Riòre Hãbutyhyhykỹ ilau kanaixỹrukre tii nadeu jỹjuwihikỹ-di boo wowydyna-ò.

## 9

<sup>1</sup> Tii tamyreny rarybere: —Inatyhymy adeereny ararybekre. Ijõõ kaki ratximyhÿre ruruõtyhy Deuxu Iòlònau taruru-di kedehemynykreu.

<sup>2</sup> Tahe debò sohoji txuu rÿidi, Pedro, Txiau, Joaõ-wana Jesuisi ridyre. Tiiboho sohojile bederatò-ò roire. Jesuisi tamyreny rexiwixiranyre. <sup>3</sup> Ityy heka urile rabòtòranyre. Iurahakÿmy relere suròna ratyre heka rauranymy ritoosònyre. <sup>4</sup> Tahe tamyreny dexitÿnynyde Eliasi, Moisesi-wana tahe rarybemyhÿre Jesuisi-wana. <sup>5</sup> Pedro rarybere Jesuisi-ò: —Wawedu, awityhymy inihe kaki ratxirenyreri tahe rikiwinyrenykre inataõ hetomy, ijõ adee, ijõ Moisesi-ò, ijõ Eliasi-ò. <sup>6</sup> Pedro rieryòlemyhÿre aõmybo rarybekemy ruberumyhÿremy. <sup>7</sup> Nonoe dobehede iubòròna bede ritòbònyre. Tahe rarybere reare rybeuni iy-ribi: —Kia heka wariòre waluu rare. Kaiboho tamy bohlabenyke. <sup>8</sup> Tiiboho reteherenyre tahe inyõ robiòlerenyre. Jesuisilemy robirenyre.

<sup>9</sup> Dohedeu tahe inydee Jesuisi rarybere: —Uritere inyõ-ò tuu ijyyõmykre aõmybo tobitemy. Uritere Deuxu Riòre Hãbutyhyhykÿ rubu-ribi rexixareu, tai tahe tuu belyybenykre. <sup>10</sup> Kia rybe wasimy riworenyre. Ixideerenyle wii ritÿÿraxinyreny: —Aõmybo rarybereri, rubu-ribi rexixamy nade. <sup>11</sup> Tiiboho tamy rÿÿaxirenyre: —Aõherekibo bede ywina erydÿÿ mahãdu rarybere Eliasi juhu kanakremy. <sup>12</sup> Tii rirawyònyre: —Inatyhymy, Eliasi juhu nade. Ibutumy aõna aõna riywinykremy. Tewesebo raritinanymy rÿireri: —Deuxu Riòre Hãbutyhyhykÿ aõna aõnamy aõhòkÿmy rotÿÿnynihikÿre. Tahe tii inydee awiòhykre. <sup>13</sup> Adeereny ararybekre: —Eliasi nade. Tule iny ixideewilemy tamy riwinyrenyre. Kaheka iaõmydÿÿnana riritinanymy rÿire.

<sup>14-15</sup> Jesuisi dehemynydeu taerydÿÿna mahãdu-ò, tahe robire iny sòwehekÿmy tahe bede ywina erydÿÿ mahãdu taerydÿÿna-wana ritxiònymyhÿre. Tahe Jesuisimy robireu, tahe tiiboho riumysaõnyreny. Raòrunyrenyre irybedÿÿmy. <sup>16</sup> Tamy rÿÿraxire: —Aõmybo tamyreny tatÿÿraxinyteri. <sup>17</sup> Inyõ rirawyònyre: —Erydÿÿdu, wariòre adee redyreri. Tii tyytybybina rybeòhòkÿ-di ratxireri. <sup>18</sup> Tyytybybina rimiry tahe riatorye bede-ò. Idi tahe urile txuu riyiyinyre. Tahe tii rubureriwesele roire. Aerydÿÿna-ò jiarÿ rarybera tyytybybina riteranykremy, tahe tiiboho iruruòhyymyhÿ. <sup>19</sup> Jesuisi tamyreny rarybere: —Tiwesebededÿÿnanabo wijinabòdu ityhyòlemy rÿira. Tiwesebededÿÿnanabo awanareny ariijekemy. Wadee uladu bididyke. <sup>20</sup> Tahe didydenyde Jesuisi-ò. Jesuisimy robireu tahe tyytybybina urile raitxÿteitxÿtenymy resere. Idi tahe urile bedeki rara òhòremy raratymyhÿ rybexi irywomy ròhònymyhÿ. <sup>21</sup> Jesuisi rÿÿraxire uladutyby-ò tiubedemybo taheka kaa binana tamy dehemynyde. Tii rarybere: —Uladuylauke idi ròrarunyre. <sup>22</sup> Tiwese wese aõkò idi rehure bera-ò, heòty-ò rahukemy. Aõ biwinykeki, jiarÿboho biwawiòhenanyke wijile. Kai biwaruxetòdenybenyke. <sup>23</sup> Jesuisi rarybere: —Kai bityhinykeki, ibutumy aõna aõna rÿimyhÿre. <sup>24</sup> Aõwesele uladutyby riryre idi tahe rarybere: —Jiarÿ retyhinyre, biwiòhenanykre aõbo rauheny. <sup>25</sup> Jesuisi iny sòwemy robire wii rotyrerimy, tahe riteranyre tyytybybina-ò: —Kai tyytyby rybeò tule roholaõ iribi bòhònykre, tiu ixityre malòòtyhy. <sup>26</sup> Tyytybybina riryre. Uladu ritxÿtenyre idi tahe ròhònyre. Uladu rubuwesele roire herimy. Tahe iny sòwemy rarybere: —Tii rurura. <sup>27</sup> Jesuisi rimyre tebò ritamadÿÿnyremy tahe uladu rÿire lamamy. <sup>28</sup> Heto ralorenyreu ierydÿÿna mahãdu tamy rÿÿraxirenyre: —Aõherekibo jiarÿboho tyytybybina riteònyòreny. <sup>29</sup> Tamyreny rarybere: —Kaiboho bexitòdenybenykeki byreòna-di bonybenykeki, kiawesele heka ròhònyke.

<sup>30</sup> Iribi ròhònyreu, Kalileia lowysy-di roirenyre. Jesuisi heka inyerydỹderamyhỹ tai ratximyhỹki. <sup>31</sup> Taerydỹña mahãdu Jesuisi rierynanymyhỹre. Jesuisi tamyreny rarybere: —Deuxu Riòre Hãbutyhyhykỹ heka rawahidỹkre hãburenyõ-ò. Tii hãbureny rirubunykre. Idi tahe txu inataõ txuu rỹidi tahe kedexixakre rubu-ribi. <sup>32</sup> Tiiboho rierykõlere tahe ruberurenyre tỹraxidỹki.

<sup>33</sup> Idi tahe rehemynyre Kafanaõ-ò. Ralore heto-ò. Jesuisi tamyreny rỹraxire: —Aõmywe widee tarybetenyteri ryro-ki. <sup>34</sup> Tiiboho urile roholarenyre rybeõlemy. Ryro-ki dori rarybemyhỹ mowexe wiribi aõnimy ròhònykre. <sup>35</sup> Tahe Jesuisi ronyrenyredi, Jesuisi taerydỹña mahãdu ributunyre erydỹmy: —Inyõ juhuludumy rarekemy ratxikeki, tai heka tii ihewoludukre. Tule tii reakre ibutumy deòdumy. <sup>36</sup> Tahe Jesuisi uladuõ rimyre risỹnyre iubetya-txi tahe taerydỹña-ò rarybere: <sup>37</sup> —Moõ uladu kawese wadee riwiòhenanykeki, riwawiòhenanyre. Moõ riwawiòhenanykeki, tule wateòdỹdule riwiòhenanyre.

<sup>38</sup> Joaõ tamy rarybere: —Erydỹdu, jiarỹboho tuu rabirenyra inyõ tyytybybina-di ani-ò rehureriò. Tahe iny mahãdureny aõkõ rare. Tahe jiarỹboho tamy reijõnyrenyre iny mahãdureny dori aõkõ rare. <sup>39</sup> Tahe Jesuisi rarybere: —Bijõnybenyõkre. Inyõ wani-di bedeòby riwinykeki, wanimy heka ibinamy rarybeõtyhy. <sup>40</sup> Iny òluduõkeki, tii heka iny ijoì rare. <sup>41</sup> Inyõ beõ adeereny waninamy riwahinykre-wana, kai waerydỹña dori tate, inatyhymy adee ararybekre. Tii tawahidỹña ritakre. <sup>42</sup> Inyõ kaa uladu ityhydỹdu riatykre òraruna-txi, kia heka tamy awire tòti-ki myna ritaamy idi bera-txi rehure. <sup>43</sup> Ebòle araatykeki òraruna-txi, juhuule adee awire ebò biòròke. Kia heka awityhykre iny welytyle ralokre biu-ò, tahe awiõtyhykre heòtytòteehekỹ-ò ralòkeki debò inatxi-di. <sup>44</sup> [Tai mohõ ruruõtyhy. Heòty ruruõtyhy.] <sup>45</sup> Awa araatykeki òraruna-txi, juhuule adee awire awa biòròke kia awire iny rariake awa sohojilemy, awiõre heka heòtytòteehekỹ-ò ralokre awa inatxi-di. <sup>46</sup> [Tai mohõ ruruõtyhy. Heòty ruruõtyhy.] <sup>47</sup> Arue araatykeki òraruna-txi, bitake idi behuke juhuule adee awire arue sohoji-di Deuxu Iòlò biu-ò ralokre, tahe awiõre heòtytòteehekỹ-ò ralokre arue inatxi-di. <sup>48</sup> Tai mohõ ruruõtyhy. Heòty ruruõtyhy. <sup>49</sup> Ibutumy iny heka heòty-di rijyyranykre. <sup>50</sup> Jyyra heka awire, saa wahe. Urile taruru riononykeki, tiwesebo tarỹsỹna uri ixybyle tawo-ki bitidikre. Kaiboho ibutumy widee eysarenylere.

## 10

<sup>1</sup> Jesuisi iribi rexitare. Tahe rare Judeia bede bede-ò, tule Jordaõ kanawe-ribi ijà-ò. Iny sòwemy tamy ributunyre, tahe tiiboho Jesuisi rierynanyre. Tii reòarimy tuu ratximyhỹre.

<sup>2</sup> Tamy lahi rybe-di erydỹdu mahãdu dehemynydenyde irutaadỹrenymy. Tahe tamy rỹraxyre: —Hãbu aõbo tahãwyy ririleke, awire aõbo ibinare aõbo. <sup>3</sup> Tahe Jesuisi tamyreny rirawyònyre: —Aõrybe bede ywina-di Moisesi rierynanyre. <sup>4</sup> Tahe tiiboho Jesuisi-ò dirawyònydenyde: —Tii rierynanyre iny tahãwyy ririkemy. Urile juhuu hãwyy bede erydỹña rybe tyyriti riwinykemy, idi tahe tahãwyy ririkemy. <sup>5</sup> Jesuisi tamyreny rarybere: —Õhõtixyre dori Moisesi kia rybe bede ywina adee riwahinyre. <sup>6</sup> Juhu bedeu Deuxu riwinyre hãbu, hãwyy-wana.

<sup>7</sup> Iurenana tahe hãbu tadibohosỹ-ribi ròhònymyhỹre tai roimyhỹre hãwyy-wana.

<sup>8</sup> Hãbu inatyhy hãwyy-wana roimyhỹreu, sohoji tyhylemy radenymyhỹre.

Iny inatxi inymy aõkõ rỹimyhỹre, sohoji tyhylemy rỹimyhỹre. <sup>9</sup> Hãbu hãwyy-wana Deuxu ributunyreu, iny iwitxira wiribi ritòhòrarienyõtýhy. <sup>10</sup> Hetowo-ki tahe ierydỹỹna ritỹỹraxinyre kia rybe-ki. <sup>11</sup> Jesuisi tamyreny rarybere: —Aõtxile hãbuõ tahãwyy ririkeki tahe ijõ-wana roikeki, kia heka òtadu rare. <sup>12</sup> Hãwyy tahãbu ririkeki tahe ijõ hãbu-wana roikeki, kia heka wedena rare.

<sup>13</sup> Tiiboho tamy didydenyde uladu tamy debò reakemy. Tahe ierydỹỹna riononymy rarybere tamy idyrenyõmykre. <sup>14</sup> Jesuisi kiamy robireu, rikyaranyre rarybere: —Txiò, kididyke uladu wadee. Uladu wese dori Deuxu Iòlòna rare. <sup>15</sup> Inatyhymy ararybekre: —Moõ heka uladuwesemy Deuxu Iòlòna ralòõkeki, kia heka Deuxu Iòlòna-ò ralòõtyhy. <sup>16</sup> Tahe Jesuisi rexiranyre uladu manamy taaxiò-ò rimyre. Tahe tebò iratytyre ritidimy tamyreny rarybewihikỹre.

<sup>17</sup> Tahe Jesuisi rydi raloreu, hãbuõ tamy reare. Tahe hãbu iko-txi resere tatiowotimy. Rarybere: —Erydỹỹdu wihikỹ, aõwexe ariwinykre biu-ò hena aritakremy tiiehyymy umywihikỹ-di ararekremy. <sup>18</sup> Jesuisi tamy rarybere: —Aõherekibo wihikỹmy wadee tarybeta. Hãbu awiõre. Deuxu sohojile tahe awire. <sup>19</sup> Bede ywina kai teeryte: rubudỹỹõmykemy, tule òta òtaõmykemy, wasiõmykemy, tule ruiõmykemy, iny wii itxenadỹỹõmykemy, adi bityhynykemy, boo tule. <sup>20</sup> Hãbu tamy rarybere: —Erydỹỹdu, kia bede ywina rewinyhyllere, uladuule wiji-ò. <sup>21</sup> Jesuisi tamy retehere tuu reòarire tahe rarybere: —Kai sohoji aõmydỹỹnale aki nasiranyde. Kai makre, ibutumy aõna aõna-di bòhònykre, idi tahe idi biwahinykre iny aõkõ mahãdu-ò. Kia tahe aõmydỹỹnadikre biu-txi. Tahe manakre biwaheludunykre. <sup>22</sup> Kia rybe-ki heka hãbu rabadewore. Rexitare ibedewomy urile iaõna aõna sõwetyhyreki.

<sup>23</sup> Jesuisi retehemy iwerura-di tahe rarybera taerydỹỹna-ò: —Kia iny iaõna aõna sõwemy rỹireri, tamy Deuxu Iòlòna-ò ralòke isirare. <sup>24</sup> Ierydỹỹna mahãdu bede ribedeòtiinyrenyre irybe-ki. Jesuisi ixityre rarybere: —Waexiboho, isiratyhy rare Deuxu Iòlòna-ò ralòkemy. <sup>25</sup> Kamelo tyyrorenawo-di ralòkemy isirakeki, kia-ribi isiratyhyre iny iaõna aõnadikeki ralòke Deuxu Iòlòna-ò. <sup>26</sup> Tiiboho bede ratiinyre sõwemy. Widee rarybere: —Mobo tahe iòraru-ribi iny ritakre. <sup>27</sup> Jesuisi iwerora-di retehere tahe rarybera: —Inatyhymy kãaõboka hãbu-ò isiratyhyre. Deuxu-ò tahe ibutumy aõna aõna isiraõre. <sup>28</sup> Pedro rexiranyre rarybere: —Boholake, jiarỹboho ibutumy rerirenyra araheludunykre. <sup>29</sup> Jesuisi rarybere tamy: —Inatyhymy adeereny ararybekre. Moõ walukeki, rybewihikỹ luukeki, kia heka ririkre: heto, taseriõre, tyby tadi-wana, tariõre, tabede, ibutumy ririkre. <sup>30</sup> Wijile itarasamy rarekre: 100 sỹmy, 100 seriõre, 100 tybyboho, 100 tadiboho, 100 tariõreboho, 100 tabede. Iny tamy rarybebinanykre tule. Ijõ bede kanakre tahe taumy tỹmyra-di tiemy rarekre. <sup>31</sup> Tahe sõwere juhu ludu ihewomy ròhònykre. Ihewo ludu ijõ iko-ò ròhònykre.

<sup>32</sup> Tiiboho rydi raòwònyrenyre Jerusalẽ hãwã-ò. Jesuisi heka rare iko-renymy. Ierydỹỹna mahãdu bede ribedeòtiinyre. Tiiboho Jesuisi riheludunymy ihewo-ribi. Tahe Jesuisi reraòmyhỹ idi rare waòinatxi reurò taerydỹỹna mahãdu-wana. Tii relyyre ixityre aõbo ixidee kỹnyikremy. <sup>33</sup> Boholabenyke inyboho roirenyreri Jerusalẽ-ò. Kowa, jiarỹ Deuxu Riõre Hãbutyhyhykỹ, inyõ riwawahinykre Deuxu aõmysỹdỹỹdu mahãdu wedu-ò, bede ywina erydỹỹ mahãdu-ò. Kia warubudỹỹmy riwawahinykre tori-ò. <sup>34</sup> Tiiboho kidiwalahikre. Watyre kanarybexinykre. Òhòte-di kidiwahãtenykre. Idi tahe kidiwarubunykre inataõ txu-di. Tahe rubu-ribi adexixakre.

<sup>35</sup> Joaõ, ijõ Txiau, wii Zebedeu riõre, tamy nade. Tahe rarybere: — Erydỹdu, kai aõma aõ wadeereny biwahinykre. <sup>36</sup> Jesuisi rarybere: —Aõbohe jiarỹ adeereny ariwahinykre. <sup>37</sup> Tahe tamy rarybere: — Kai, aiõlõnasỹ-ò kedehemynykreu, aruruwe-ribi aronykre, waseriõre ahywewe-ribi ronykre. <sup>38</sup> Tahe Jesuisi rarybere: —Kaiboho teeryõlemahãte aõmybo textiõnyteri. Kaiboho aõbohe wabemona-di biõbenyke idi Jerusalẽ-ò adiõkremy wahãredi. Kaiboho aõbohe wasebena-di mohõlebenyke idi jiarỹ anohõkremy wãhãredi. <sup>39</sup> Tiiboho dirawyõnyde: —Kohe tulekre. Jesuisi tamyreny rarybere: —Bemona-di ariõkre kaiboho tule idi biõbenykre. Sebena-di jiarỹ adohõkremy, kaiboho tule idi mohõbenykre. <sup>40</sup> Tahe mobo wabire ronykre ruruwe-ribi hywewe-ribi kia heka jiarỹle ariwahinyõkre. Kia tahe iyrubudỹmy rỹreri Deuxule kidiwahinykremy. <sup>41</sup> Tai debõwiõ erydỹna mahãdu heka Joaõ-ò, Txiau-ò tamyreny iky reare. <sup>42</sup> Jesuisi tamyreny ryrere tamy kanakemy, tahe rarybere: —Kaiboho teerytenyete toriwedu irurusõwe dire. Iny nihikỹ heka iny deõdu luure. <sup>43</sup> Jesuisi kiamy rarybere: —Kia wese tahe aworeny-ki aõkõkre. Kaiboho aõtxile mobo bõityhynyhykre, ijõ iny deõdumy rarekre. <sup>44</sup> Mobo juhutyhy rarelekre, deõdumy rarekre. <sup>45</sup> Deuxu Riõre Hãbutyhyhykỹ nade teõdu sõwekemy aõkõ tahe ixilemy reõdunykeny. Nade taumy wahidỹmy sõwemy iny tarasamy.

<sup>46</sup> Idi tahe roire Ijeriõ hãwã-ò. Jesuisi taerydỹna-wana iny sõwehekỹ-wana rõhõnyrenyra. Tahe rahare Bartimeu ruetãhãkỹ-ki. Bartimeu tahe Timeu riõre rare. Tii ronyre rywe-ribi aõna aõnamy rexitõnyreri. <sup>47</sup> Tii roholare Jesuisi Nazare ludu kia rare tahe tamy ryrera: —Jesuisi, Davi riõre, wadee maruxetõekre. <sup>48</sup> Sõwemy tamy rarybere: —Rybeõmyke. Tahe aõhe-wana tii rarybemyhỹre: —Davi riõre wadi mawotõeke. <sup>49</sup> Jesuisi ryrere tahe rarybere: —Tamy byryke wadee kodoikemy. <sup>50</sup> Tahe rexitareu rỹire, wylemy nade Jesuisi-ò. <sup>51</sup> Jesuisi tamy rarybere: —Aõmybo kai taruteri adee ariwahinykremy. Tahe hãbu ruetãhãkỹ tamy rarybere: —Wawedu, ixityre arobikremy. <sup>52</sup> Jesuisi tamy rarybere: —Makre, atyhydỹna kai arateytenyra. Kialehe rare. Aõwesele ixityre tii robire. Tahe Jesuisihemy rare, ryki.

## 11

<sup>1</sup> Jerusalẽ iõhõmy ritehemynyrenyreu, tahe inatxi taerydỹna riteõnyra hãwã-ò. Inatxi hãwã-ò iõhõmy, Betabaji, Betỹnia-wana. Kia-ò Oliveira hãwãlõ roire. <sup>2</sup> Jesuisi rarybere: —Kaiboho boikre kowa hãwã-ò. Kowa-ò birõnykreu jumentinho mahabenykre. Moheka ityre rariaõlemy ratximyhỹre. Bieseke, wadee bididyke. <sup>3</sup> Inyõ adeereny rarybekeki: —Aõhekremybo idi atxitenyteri. Tahe tamy marybebenykre: —Wanyrỹ tuu rurureri. Ixityre kaõ kidiõkesedỹnykre. <sup>4</sup> Tahe hãbu roire. Jumentinho ryro hetoiõ-ki ritisanymy rỹimyhỹ. Tai riesere. <sup>5</sup> Kia hãwã mahãdu rarybere: —Aõherekibo jumentinho kaiboho tetatenyta. <sup>6</sup> Tai tiiboho Jesuisi rybe tamy riwahinyra. Tai hãwã mahãdu jumentinho riwahinyre. <sup>7</sup> Tahe ridyrenyre jumentinho Jesuisi-ò. Tiiboho tatyreny ritidirenyre jumentinho tyremy. Tiiboho risỹnyrenyre Jesuisi ityre-ò. <sup>8</sup> Ijõboho tahe horerule ritidire ryromy, ijõ tahe tauwõhi ryromy ritidire ityre rariakemy. <sup>9-10</sup> Ihewo ludu, iko ludu rawyhyrarõnyreri, tule ryreri: —Tii heka wowydyna rare. Tii heka Wanyrỹ niwesekemy naderi. Wowydyna rare iny labie Davi Iõlõna. Kai Iõlõna kanakre. Wyhyrarõ biu-txi kodoholakre.

<sup>11</sup> Kia wese Jesuisi ralore Jerusalẽ-ò. Dohodỹna heto-ò ralore, ibutumy retehere, idi tahe rõhõnyre txiorotyhyreki. Tahe Betỹnia-ò roirenyre.



<sup>12</sup> Ijõ txu biòwamy tahe Betÿnia-ribi rexitarenyreu tahe tii rama rahure. <sup>13</sup> Òwòru figueira rademy robirenomy irehe-ribi. Tahe tamy ritehemynyreu iraty-ki raharenyòlere, aõmyreki figueira raty bededÿÿnanamy aõkõ bede rÿimyhÿre urenana. <sup>14</sup> Òwòru figueira-ò Jesuisi rarybere: —Tiu heka moõ araty ritòòtyhy. Tahe ierydÿÿna roholare.

<sup>15</sup> Tahe ritehemynyrenyre Jerusalẽ hãwã-ò. Tahe Jesuisi dohodÿÿna hetowo-ò ralore. Tahe kia-ribi aõna aõna-di rohononymhÿre mahãdu, õbradu mahãdu diteònyde. Tahe nieru wibydyÿdu mahãdu, òwòrubesedyÿ-di Jesuisi rehure. Bòtòe dinodu mahãdu rynana-di Jesuisi rehure. <sup>16</sup> Inyõ heka ritxyy-dÿÿnyòlere dohodÿÿna hetowo-ki. <sup>17</sup> Rierynanyhÿre tahe tamy rarybere: —Raridÿÿòlemy aõbo rÿireri:

Waheto kõaõboka inatyhymy ibutumy iny wixira wixira dee ixitòedÿÿna hetomy rÿirakre. Waheto tewinytenyete wasidu hetowesele.

<sup>18</sup> Bede ywina erydÿÿ mahãdu, Deuxu aõmysÿdÿÿdu wedu mahãdu roholarenyreu, rõhõtynyrenyre: —Timybo inyboho Jesuisi rubudÿÿmy roki-wisÿnykre. Tiiboho ruberumyhÿrenyre iny sòwemy dori bede riòtiinymhÿ ibedeerydÿÿnaren-y-ki.

<sup>19</sup> Txioromy dehemynydeu, tiiboho rexitarenymhÿre hãwãhãkÿ-ribi.

<sup>20</sup> Txu ròhòny-di, rehemynyrenyre òwòru figueira-ò. Tiiboho robirenyre rarubumy rÿireriò, taru-wana, tararoti-wana. <sup>21</sup> Pedro ixi-txi tõhòti reare tahe rarybere: —Erydÿÿdu, betehe inihe aõma òwòru figueira rarubumy rÿire arybebina-di tamy tarybetaki. <sup>22</sup> Jesuisi dirawyònyde: —Kaiboho Deuxu bityhynymhÿbeny. <sup>23</sup> Inyõ rarybekeki kaa bede ratòòhòkÿ-ki: —Kai myike, adi adehu rÿikre berohokÿ-ki. Tahe irybe heka kedelekre. Tai inyõ rityhynykeki, tumy heka kedelekre. Tahe uritere iseòdÿÿòmykre urile bityhynykre, irybe heka kedelekre. <sup>24</sup> Iurenana adee ararybekre: —Aòtxile aõ bexitòenykre, kia heka bitakre. Bityhynykeki, inatyhymy bitake. <sup>25</sup> Kaiboho texitòenytenyteri wana aõbo inydee aky reamyhÿre kia biixãwididÿÿnymhÿke ratximyhÿre, Deuxu dori riixãwididÿÿnyke aòrarureny-ribi. <sup>26</sup> Kai iny wixira òraru biixãwididÿÿnyòkeki, boo biu-ki ratximyhÿre aòraru riixãwididÿÿnyòkre.

<sup>27</sup> Tiiboho ixityre doide Jerusalẽ hãwã-ò. Ririranymhÿrenyre dohodÿÿna hetowo-ki, bede ywina erydÿÿ mahãdu, Deuxu aõmysÿdÿÿdu wedu mahãdu, matuari mahãdu tamy doide. <sup>28</sup> Tiiboho tamy ritÿÿraxirenyre: —Mowe ateòdÿÿdu kia aõna aõnamy tatÿÿnymhÿte. <sup>29</sup> Jesuisi dirawyònyde: —Adeereny tule araÿraxikre. Kaiboho bidiwawyònykeki, tahe jiarÿ akoreny ÿraxina arelyykre, aòrurudibo aõna aõna rewinyhÿre. <sup>30</sup> Tahe Jesuisi ritÿÿraxinyre: —Ratysebedÿÿna, Joaõ hõrõ, kia heka tiribibo nade, biu-ribi ada hãbu mahãdu-ribi. Kia manarybeke. <sup>31</sup> Tiiboho widee rarybera: —Biu-ribi inyboho raryberenykeki, tai tii rarybekre: —Aõherekibo tahe tii tetyhynytenyòte. <sup>32</sup> Hãbu-ribi inyboho raryberenykeki, iny aruberumyhÿrenykre. Ibutumy iny rityhynyre Joaõ heka Deuxu rybedu raremyhÿ. <sup>33</sup> Tai tahe tiiboho raryberenyre: —Inyboho reeryòrenyre. Tai tahe Jesuisi rarybera: —Hebo, jiarÿ adee arelyyòtyhy modeòdÿÿdubo jiarÿ watzireri.

## 12

<sup>1</sup> Iribi tahe Jesuisi tamyreny ijyy-di rierynanyhÿre: —Hãbu uva oworuõ wese ròbròre. Tahe riòtitynyre. Tahe hãloo riare oworuubetya-ki, ruÿdÿÿnymy. Tahe utò riwinyre. Idi tahe rihuòtere hãbu mahãdu-ò. Tahe rexitare tasÿ-ribi ijõ bede-ò. <sup>2</sup> Tahe bederatysiredemy bededÿÿnana rehemynyreu, iwedu teòdu riteònyre bederaty ritakemy. <sup>3</sup> Huòtedu mahãdu teòdu rinyrenyre, rihetenyre tahe riteònyre ixihyykemy. <sup>4</sup> Ixityre oworuwedu teòduõ riteònyre.

Kia heka irati rihetenyre ta tamy rawobinarybenyre. <sup>5</sup> Ijõ riteònyre. Kia heka rirubunyre. <sup>6</sup> Tahe oworuwedu iriòre sohojilere, tahe iluumy raremyhỹ ihewomy tii riteònyre. tahe wedu rarybere: —Wariòrele heka tiiboho rityhynyrenykre. <sup>7</sup> Kia huòtedu mahãdu widee raryberenyre: —Kia heka wedu aõna aõna tarasadu rare. Rikirubunykre tahe iaõna aõna inydeerenykre. <sup>8</sup> Tahe rimyrenyre idi rirubunyre tahe idi rehurenyre oworu-ribi. <sup>9</sup> Jesuisi ritỹ̃raxinyre: —Aõhebo tahe oworuwedu rotỹ̃nykre. Tii kodoikre huòtedu mahãdu hudumy, tai tahe oworu riwahinykre inywitxira-ò. <sup>10-11</sup> Ritina-di aõbo tariaõletenyte kia ryberiti:

—Mana-di hetowidỹ̃du rehura. Kia mana heka hetohãtxi-ki ritidimy doide.

Kia heka Wanyrỹ riwinyre kia iny ruereny dee aõna aõna nihiky rare.

<sup>12</sup> Tai ijohonadu mahãdu Jesuisi mynomy ratximyhỹ tii dori rieryre ixidee lau Jesuisi ijyymy relyymyhỹre. Tiiboho ruberurenyre iny sõwehekỹ lau. Tahe rexitarenyre, rexixãwidinyre.

<sup>13</sup> Idi riteònyrenyre Lahi rybe-di erydỹ̃du mahãdu, Herodi mahãdu-wana tamy imynamy irybe-ki. <sup>14</sup> Tiiboho rarybere Jesuisi-ò: —Erydỹ̃du, jiarỹboho araerymy adi watxiwãhãrenyre kai inatyhy hãbu tate. Iny ibutumy adee wiwese wiweselere. Inatyhymy iny-ò Deuxurymy teerynanymahãte. Tahe tiiboho ritỹ̃raxinyrenyre: —Awire aõbo ada ibinare aõbo nieru rawahinymyhỹre bede dinodu-ò. <sup>15</sup> Timybo tahe, rikiòwyny aõbo ada aõkõre aõbo. Jesuisi rierymyhỹre tõhõtinanareny, tahe ritỹ̃raxinyra: —Aõherekibo kaiboho tiwaurihitenyteri. Wadee womati nieruõ bidiwy waitxerenamy. <sup>16</sup> Tahe tamy diwydenyde. Tahe tii ixityre ritỹ̃raxinyra: —Kawe moõ tyytarasana rare, katahe moõ tyyritina rare. Tiiboho dirawyònyde: —Kiahe bede dinoduhõrõ rare. <sup>17</sup> Jesuisi rarybere: —Hỹdebo, bede dinoduhõrõ tahe tamy biwahinybeny tule tahe Deuxu aõna aõnahõrõ tamy biwahinybeny. Tiiboho bede riòtiinyrenyre.

<sup>18</sup> Saduseu mahãdu tamy nade. Kia heka iny rubu-ribi rexixamy aõkõre-riki rierynanymyhỹre. Tiiboho ritỹ̃raxinyre Jesuisi: <sup>19</sup> —Erydỹ̃du, Moisesi raritinyra bede ywina-di: —Hãbuõ rurukeki, tahãwyy iriòre ijõdiõkeki, tahe kia hãwyy tahãbu seriòre-wana roike. Iriòredikre taseriòre rubuòwymy roikre. <sup>20</sup> Seriòre debòinatxi reuròmymy raremyhỹ. Juhuu ijõ roire hãwyy-wana. Tahe tii rurure iriòreõlemy. <sup>21</sup> Tahe ihewo ludu iseriòre wytese-wana roire. Tii rurure iriòreõlemy. <sup>22</sup> Ihewoludutyhy tule ibutumy roire wytese-wana, tahe ituerenyre iriòreõlemy. Iròòbymy tahe hãwyy tule rurure. <sup>23</sup> Ixixanau tahe mohãbubo tuu rarekre. Ibutumy dori wytese-wana roire. <sup>24</sup> Tai tahe Jesuisi tamyreny rarybere: —Kaki kaiboho teòsamy toite aõma ritina teeryõtenyteki. Tule Deuxururu teeryõtenyde. <sup>25</sup> Ixixanau heka moõ roiõtyhy. Ibutumy iny ỹju wese rarekre biu bede-txi. <sup>26</sup> Kaiboho aõbo tatyryritinytenyõta iny rubu-ribi kedexixakremy. Kia heka raritinymy rỹire Moisesi tyyriti-ki, òwòrusõmo ijyy-ki rỹimyhỹ. Iwese Deuxu rarybere Moisesi-ò: —Jiarỹ heka Abraõ Deuxu rare. Ijai Deuxu rare. Ijaò Deuxu jiarỹ rare. <sup>27</sup> Jiarỹ heka rubu mahãdu Deuxu aõkõ rare, tahe iru mahãdu Deuxu jiarỹ rare. Kaiboho teòsamy toite.

<sup>28</sup> Bede ywina erydỹ̃ mahãduõ nade ijohonamy. Tahe tiiboho widee raryberenyroholareu, Jesuisi tamyreny rirawyònywihikyreu, tahe tii Jesuisi-ò ritỹ̃raxinyre: —Tibo rybe bede ywina juhuure. <sup>29</sup> Jesuisi rirawyònyre: —Ka heka juhu ludu rare: —Boholake Israeli mahãdu, judeu ijoi mahãdu wahe. Wanyrỹ, iny Deuxu sohojile rare. <sup>30</sup> Kia aDeuxu luuke ibutumy awo-ribi, aumytytyby-ribi, ibutumy aruru-ribi. <sup>31</sup> Ka heka ihewo ludu rare: —Kai abireluduluuke iwese ixiluuke wese. Ijõ bede ywina heka ka ratyreõre. <sup>32</sup> Tahe Bede ywina erydỹ̃ mahãduõ rarybere: —Inatyhymy kai tarybeta.

Deuxu heka sohojile ratximyhÿre. <sup>33</sup> Ibutumy awo-ribi iluukemy. Ibutumy aruru-wana iluukemy. Tule ibutumy aeryna-wana iluukemy. Iwese kai ixiluure wese, abire ludu mahãdu luukemy. Kia heka ibutumy iròduxiweloo ratyre rare. Ibutumy wahidÿÿnaloodÿÿna ratyre rare. <sup>34</sup> Jesuisi rieryre kia hãbu rirawyònywihikÿre tai tamy rarybere: —Kai heka Deuxu Iòlòna-ribi irehemy aòkò. Tai tahe ibutumy ilau ruberure tÿÿraxidÿÿki.

<sup>35</sup> Jesuisi dohodÿÿna heto-ki rierynanyumyhÿreu, rarybere: —Timybo Bede ywina erydÿÿ mahãdu rarybemyhÿre Kristu Davi riòre raremy. <sup>36</sup> Davi rarybere aòmybo Deuxu Tyytybytyhy tamy narybedemy: —Wanyrÿ rarybere Wanyrÿ-ò: —Bodony warurunawe-ribi. Txiòhe rare, aòludu awarawo-txi aritidikre. <sup>37</sup> Tahe Davile Wanyrÿ rininire. Timybo tahe Davi iriòremykre. Tahe iny sòwemy deysana-di roholarenyre.

<sup>38</sup> Tii rierynamyhÿreu, rarybera: —Bexiemyhÿbeny bede ywina erydÿÿ mahãdu lau. Tiiboho heka tyyrehe-di riraluurenyre. Tiiboho heka rybedÿÿluurenyre hãwãhãkÿ riranaki. <sup>39</sup> Dohodÿÿna heto-ki juhurnana luurenyre. Tule ta anarÿÿ rÿiwana, juhu ryanadile tamyreny awire. <sup>40</sup> Tiiboho tule wytese urimynydu aõna aõna ritarenyre. Ixitòedÿÿna rehehekÿ rexitòenymyhÿrenyre. Tiiboho heka aõnihikÿmy aõhòkÿmy dÿÿnana riòwynyrenykre.

<sup>41</sup> Jesuisi retehemy rÿimyhÿ dohodÿÿna heto nieruhyna ratya-txi. Tii retehere timybo iny sòwemy tanieru-di tamy rehumyhÿ. Tahe ityhynihikÿ tamy sòwemy nieru-di rehure. <sup>42</sup> Tahe nade wytese iaòkòdu mahãduò tii rare. Tii inatxi nieru sòmo-di rehure. Tanieru tahe nierukonana rare. <sup>43</sup> Jesuisi ryryre taerydÿÿna-ò: —Inatyhymy adee araybekre. Kowa heka wytese nieru-di rehure ibutumy iny witxira ratyre. <sup>44</sup> Kaa mahãdu ibutumy nieru-di rehure rauhenyredile. Tahe wytese idi rehure ibutumy tanieru-di rexihumy taumy-ribi idi rehure.

## 13

<sup>1</sup> Dohodÿÿna heto-ribi ròhònyreu, ierydÿÿna tamy rarybere: —Erydÿÿdu, beteheke inihe mana nihikÿ-ò, hetohokÿ-ò. <sup>2</sup> Jesuisi rirawyònyre rarybere: —Kaiboho betehebennykre heto nihikÿ-ò. Kia heka mana ijò wityre-ki rÿiòtyhy, ibutumy heka kedexunykre.

<sup>3</sup> Oliveira bederatòhòkÿ-ki tii ronyreu dohodÿÿna hetoko-txi, tahe Pedro, Txiau, Joaõ, ibutumy tamy doide rÿÿraximy iny-ribi irehemy. <sup>4</sup> Wakoreny bedelyyke, tiubo kia kÿnyikre. Ibutumy aõna aõna kÿnyikre wana tibo iny bedeerynyrenykre. <sup>5</sup> Jesuisi rexiranyre tamyreny rarybere: —Kaiboho anaitxenanydenyheny lau bexiebenyke. <sup>6</sup> Sòwemy dori roikre wanimy rarybemy rarekre: —Jiarÿ dori Kristu rare. Tahe iny sòwemy anaitxenanykre. <sup>7</sup> Kaiboho wounarybe-ò, aõbinarybe-ò, boholakreu, breburenyòmykre. Kia heka kanakremy ratximyhÿre. Urile bededÿÿnana ikonanamy aòkòhyylemyhÿre. <sup>8</sup> Uritere inylahinareny, ijòlahinareny-wana wii kidiaòbinanykre. Tule iòlòna mahãdu ijò iòlòna mahãdu-wana wii kidiaòbinanykre. Bede bedesu ijò hãwã-ki kanamytatakre. Tahe aòkòre rama kedekre. Kia heka juhu aõhòkÿmydÿÿnana rarekre.

<sup>9</sup> Kai bexiekre anamydenyheny lau. Tiiboho anawahinydenykre aòludu wedu-ò, iòlò-ò. Tiiboho anahatenydenykre dohodÿÿna hetowo-ki. Ki-abohoko-txi wadee kaiboho kedelyykre inatyhymy aõna aõna rÿiremy. <sup>10</sup> Rybewihikÿ juhoo ibutumy bede hãwã hãwã-ò kiditynydÿÿnykre. <sup>11</sup> Tiubo aradyrenykeu, urile nohòtiòmy aõbo kaiboho marybebenykre. Kiautyhyle aòmybo rarybekremy bierykre. Kia tahe marybekre. Kai dori aòkò

tarybemahâte, Deuxu Tyytybytyhy tahe rarybemyhÿre. <sup>12</sup> Seriore seriorele wii kidirubunykre. Tyby heka tariore kidirubunykre. Uladule tadi, tyby kidirubunykre. <sup>13</sup> Ibutumy heka iny iy kedeakre wani òraru-ki. Kia heka ikonana-ò riijekreu, taumy tarasanakre.

<sup>14</sup> Aõna aõna binahakÿ kanakreu, ibutumy rahukemy. Tiiboho kanakeu itxinonana-txi aõkõ rarekemy, kaiboho mahenybenykre bederatòhòkÿ-ò, Judeia hãwã hãwã-ki ratxikeki, mahenybenykre. <sup>15</sup> Inyõ hetotyre-ki ratxikeki, urile ròteõmy aõna aõna wydysymy. <sup>16</sup> Inyõ bedero-ki ratxirekeki, uritere òkeseõmy tyy òrysymy. <sup>17</sup> Kobexe heny hãwyy bõtõmy rÿira, tule hãwyy tariore ritõnomy rÿira. <sup>18</sup> Bexitõenykre kia kanaheny bededÿÿnana sirau. <sup>19</sup> Aõhòkÿmydÿÿnana kanakre tiu heka tuuõre. Juhule Deuxu bede riwinyreule wiji tuu yrubule bede roimyhÿre. Tiu heka kiamy bede roiõtyhy aõhòkÿmydÿÿnanamy. <sup>20</sup> Deuxu bede iòhõmy rirawetyòròkeki, moheka irumy ròhõnyõtyhy. <sup>21</sup> Inyõ adee rarybekeki: —Kaki heka Kristu ratxireri. Kowa-ki ratxireri. Uritere ityhydÿÿõmy. <sup>22</sup> Sõwemy Kristu kanakre, urile Kristu inatyhy aõkõ rarekre. Tule Deuxu rybedÿÿdu kanakre. Kia Deuxu rybedÿÿdu inatyhy aõkõ rarekre. Tiiboho heka bedeòby riwinykre tule bede eryna. Deuxu hõrõ riitxenanykemy inatyhymy kõaõboka. <sup>23</sup> Kaiboho warybe biyrubunykre. Adee ibutumy juhuule reòbitinyre.

<sup>24</sup> Idi webòhõna rÿira txuu, aõhòkÿmydÿÿnana itue-di, txuu heka rurunykre. Ahãdu tule rurunykre.

<sup>25</sup> Taina heka kedejuxunykre biu-ribi. Biururu raòweòwenykre.

<sup>26</sup> Iny retehekre Deuxu Riore dehemynyna-di. Biurawetyky-ribi kodobehekre. Kia heka lobixina kanabòtòranykre. <sup>27</sup> Tahe taÿju kiditeònykre tawedu ijoihõrõ butudÿÿmy.

Kidibutunykre ibutu bede bede konana-ribi, tule ibutu biukonana-ribi.

<sup>28</sup> Tahe figueira òwòru-ribi erydÿÿna bierybenykre. Tahe iruru raixinykreu tahe, txiru ròhònykreu, tai tahe bierybenykre wyra iòhòreri. <sup>29</sup> Tule kia aõna aõnamy bobibenykreu, tii iòhòlereri. Ijòkile wese nyide. <sup>30</sup> Inatyhymy adee ararybekre, kia wijinabòdu itueõtyhy aõna aõna rÿikre hãrele. <sup>31</sup> Bui, bede-wana ituekre, tahe warybe itueõtyhy. <sup>32</sup> Moõ heka rieryõtyhy tiubededÿÿnanamybo tii kòdòòsekre. Tule ÿju biutxile rieryõre. Tule iriore rieryõre. Tule tyby sohojile rieryre.

<sup>33</sup> Kaiboho bexieke, beteheke. Kai dori teeryõtenyete tiubededÿÿnanamybo kòdòòsekre. <sup>34</sup> Kedehemynykre dori iwese hãbu tÿimy rarewese tii rexitareu, ririre tadeòdu. Tadeòdulemy tule ridyre itxeredu retehemyhÿkemy. <sup>35</sup> Tahe betehe inihe teeryõteri dori tiubo kanakre heto wedu, txioromy ada ruwetya aõbo, ada hãnie hãbu ryry-di aõbo, ada txumy aõbo. <sup>36</sup> Betehe inihe iny araraòõlemy tii rehemynyreki aki rahakre atÿi-ò. <sup>37</sup> Aõna aõnamy jiarÿ rarybemyhÿre, rarybera ibutu-ò: —Biijebeny.

## 14

<sup>1</sup> Kia-ribi inatxi txumy riuhenymy ratxireri anarÿÿ kodohònykremy. Kia anarÿÿ wehityhynamy heka iny ratya-di reare. Tule orotxu anarÿÿ kia ròhònyre. Tule Deuxu aõmysÿdÿÿdu wedu mahãdu tule bede erydÿÿdu mahãdu Jesuisi rimyky ratxireri idi rirubunyky. <sup>2</sup> Tiiboho rarybemyhÿreny: —Kiahe aõkõre anarÿÿ rÿireriu, iny sõwemy inydeereny kana aõbinanyheny.

<sup>3</sup> Jesuisi Betÿnia hãwã-ki ratximyhÿu, Simaõ tyybina heto-ki ratximyhÿre. Jesuisi òwòru besedÿÿbire-ki roimyhÿ. Tahe hãwyy aderòna òwynihikÿ-di lÿnyrena wihikÿ-di nade. Tai ihyna riwebòhõnyra tahe Jesuisi ratityre-ò

ritxiwira. <sup>4</sup> Inyõreny rexiykaranyke. Tahe widee rarybera: —Aõherekibo aderõna rahura. <sup>5</sup> Inywitzira tahe iõwinykewi sõwemy nierумы kia-ò. Kia nieru-di tahe iny aõkõdu-ò rawahidỹnykre. Tahe tiiboho rexibynyreri hãwyy dee. <sup>6</sup> Tahe Jesuisi rarybere: —Txiõhe rare, uritere ixibydyỹõmyke. Tii heka aõwihikỹbo wadee riwinyra. <sup>7</sup> Kiamy aõu aõu iny aõkõdu rỹikremy. Aõule heka tamy aõwihikỹ biwinybenyke. Jiarỹ tahe, aki aõu aõu aõkõlekre. <sup>8</sup> Tii heka rexikonananymy ròwidỹre. Aderõna-di watyre ritxiwire wabede-ò jiarỹ raõule. <sup>9</sup> Inatyhymy adeereny ararybekre. Aõtxile Deuxu Rybewihikỹ iny relyykre. Kia-ò kahãwyy ijyymy relyykre, ibutumy iny idi rõhõtynykre aõbo riwinyredi.

<sup>10</sup> Tahe Judasi Isariò Deuxu aõmysdyỹdu-ò rara Jesuisi tamy rawahidỹnykre. <sup>11</sup> Tiiboho tamy roholarenyre, reysare. Tahe tamy nieru riwahinykemy riurenanyre. Tahe Judasi rijemyhỹre aõu aõu bedewihikỹ tamyreny riwahidỹnykre.

<sup>12</sup> Juhu orotxu anarỹtxure budoeni xiweloo rirubuny rahudi tahe Jesuisi erydyỹna mahãdu tamy rarybere: —Titxibo anarỹ rỹsỹnamy biroxikemy atxiteri. Jiarỹboho kowa-ò aroikre. <sup>13</sup> Tahe Jesuisi tamy rarybere: —Kaiboho boikre hãwãhãkỹ-ò. Tahe hãbu-wana wii biõbinykre butxi-di riwyreriò. Tahe tii biheludunyenye. <sup>14</sup> Aõtxile hetoõ-txi ralòke, kaiboho marybebenyke hetowedu-ò: —Waerydyỹdu rarybera: —Titxiwexe anarỹ rỹsỹna arirỹsỹkre waerydyỹna-wana. <sup>15</sup> Tii heka adee kiditeòsinykre hetowowitziraõ biu-txi. Ibutumy rexihumy rỹire inydeereny. Kowa rỹsỹna inydeereny biwinykre. <sup>16</sup> Tahe ierydyỹna rexitare. Roire hãwãhãkỹ-ò. Tahe rõhõnyre iwese Jesuisi relyyre wese. Tahe ibutumy rexihurenyre anarỹ-ò.

<sup>17</sup> Txiorou Jesuisi nade taerydyỹna waõinatxi reurò-wana. <sup>18</sup> Tiiboho õworubesedyỹ riroximahãu, Jesuisi rarybere: —Kaiboho wawana teroxitenyteri sohojiõ biwawahinykre. <sup>19</sup> Tahe urihimyò rexiranyre rabadewomy. Tahe widee raryberenyre: —Jiarỹle heka ariwahinykre. <sup>20</sup> Tii rirawyõnyre: —Kaiboho, waõinatxi reurò mahãdu sohojiõ. Kia mahãduõ orotxu-di wawana rebenymy hỹ besero-ki. <sup>21</sup> Inatyhymy Deuxu Riõre Hãbutyhyhykỹ rakre iwese iritina rỹirewesele. Kobexeheny kowa hãbu heka kidiwahinykre. Tamy iny awire kedeãlede.

<sup>22</sup> Tiiboho riroxireriu, Jesuisi orotxu rimyreu, raorore, rexitõnyre, tahe tamyreny riwahinyre. Rarybere: —Ãhãxe, kia heka waumy wese rare. <sup>23</sup> Tahe vỹhynamona rimyreu, rexitõnyre, tahe tamyreny riwahinyre. Ibutumy ibute bute iribi tuu riõrenyre. <sup>24</sup> Tamyreny rarybere: —Kia wãhãlubu wese rare. Kia hãlubu heka rybe tỹmyra ywidỹna hãlubu rare. Kia inyboho kidinohõtijuadenykre. Wahãlubu heka kedexunykre iny rabòrõnihikỹ dee. <sup>25</sup> Inatyhymy ararybekre: —Ariõõtyhy heka õtetibederatyrupe tỹmyra ihyy tahe tiutxumybo Deuxu Iòlõna-ki ariõkre.

<sup>26</sup> Deuxuwimy rawinyrenyre, tahe rexitarenyre Oliveira bederatòhòkỹ-ò.

<sup>27</sup> Jesuisi tamyreny rarybere: —Kaiboho ibutumy wijirumy biwaribenykre. Kia heka iritina rỹire. Itxeredu tahe rirõrenykeki, budoeni rahenykre.

<sup>28</sup> Tahe rubu-ribi adexiakre, arakre akomy Kalileia-ò. <sup>29</sup> Pedro rarybera Jesuisi-ò: —Ibutumy ararikeki, arariõtyhy. <sup>30</sup> Jesuisi tamy rarybera: —Inatyhymy ararybekre. Wijirumy hãniehãbu inatxi kydyrykreule, kai iny witzira-ò biwatxiõnykre inatã bedemy. <sup>31</sup> Tahe Pedro rarybera tarurutyhymy: —Aõkõre, aratxiõnyõtyhy, ihãrele tahe awanale arurukre. Ijõ mahãdu tule kia wese rarybera.

<sup>32</sup> Tahe roire Kesemani hāwāmy ninadu-ò. Taerydỹna-ò rarybera: — Biwaraòmny bonykre kakile. Kowa-ò arexitòenykre. <sup>33</sup> Tii ridyreny Pedro, Txiau, Joaõ-wana. Jesuisi rexiranyre rabedewomy ihyy rexitòenyre. <sup>34</sup> Tahe tamy rarybera: —Watyytyby heka rabedewomy ratxireri rubuhyy-ò. Kaki bonykre biijemy. <sup>35</sup> Tahe iko-txi urihimyò rareu, resere. Rexitòenyre: — Waha, adee arexitòenykre. Adee awikeki, kia òraule tiu waròteõna. <sup>36</sup> Tii rarybere: —Waha, adee ibutumy isiraõre. Kia bemona inyhe waròbi bitake inihe. Tahe wadeewi wadeewi-ki aõkõ watxireri, tahe adeewi-ki. <sup>37</sup> Tii rehemynyre tai rahare rõrõrenymy roireriò. Rarybere Pedro-ò: —Simaõ, Tarõteri aõbo. Biijeõtyhy sohoji òramy bededỹnana. <sup>38</sup> Biijebenykre, bexitòenykre, uritere rutaanamy ròteõmykre inatyhymy atyytyby irurudire tahe ade iruruõre. <sup>39</sup> Tahe Jesuisi ixityre rare rexitòenyre ixiwesele. <sup>40</sup> Ròsereu, ijõ-ki rahare rõrõmy ixiwesele, irurureny rautxienymyhỹ dori. Tiiboho rierykõre idi rirawyònyreny. <sup>41</sup> Tahe ixybyle ròsere tahe rarybere: —Morõbeny bexielehynybeny. Òra iòhòreri. Kia heka Deuxu Riõre Hãbutyhyhykỹ kanawahidỹykre òrarudu mahãdu-ò. <sup>42</sup> Bitỹmynybenyke, rokoireny, walòsedỹỹdu iòhòmny rareri.

<sup>43</sup> Tii rarybereri, aõwesele Judasi nade. Kia heka waòinatxi reurò mahãduò rare. Tii-wana doide hãbu mahãdu mayrehe-di, òhòtemy debõna. Kia heka hãbu mahãdu doide matuari mahãdu-ribi, Bede ywina erydỹ mahãdu-ribi, Deuxu aõmysỹdỹỹdu wedu-ribi. <sup>44</sup> Lòsedu tamyreny juhūu bede eryna riwahinyre. Kawese heka rarybere: —Kowa heka inyõ-ò aruwokre, tii heka hãbu rare. Bimybenykre, birarenymy wihikỹkre. <sup>45</sup> Judasi rehemynyrenyreu, tahe rarybere: —Wedu, wedu. Tahe tamy ruwore. <sup>46</sup> Juda ijoi Jesuisi rima. <sup>47</sup> Kia ijoiõ mayrehe ritare tahe Deuxu aõmysỹdỹỹdu wedu deòdu nohòti riorore. <sup>48</sup> Tahe Jesuisi dirawyònyde: —Kaiboho mayrehe-di tiwaòrynteri wasidu-wesemy aõmy, òhòte-di. <sup>49</sup> Jiarỹ tahe dohodỹỹna heto-ki watximyhỹ txuõ txuõlemy adeereny araerynanywãhãdenyde. Kowa-ki heka tiwamyõlemyhỹtenyde. Tahe aõbo iritina-ki rỹireri, kia heka kỹnyikremy. <sup>50</sup> Ibutumy ierydỹỹna mahãdu ririrenyre, rihenyreny.

<sup>51</sup> Kia heka hãbuò riheludunymyhỹ tyy tayredile rexitynymy tiiboho ridyreny. <sup>52</sup> Tii tahe tyy ririre tahe rahenyre tadelemy.

<sup>53</sup> Deuxu aõmysỹdỹỹdu wedu-ò tiiboho Jesuisi ridy. Bede ywina erydỹ mahãdu, matuari mahãdu-wana ributuny. <sup>54</sup> Pedro riheludunyre irehetyhytyhymy. Rehemynyre Deuxu aõmysỹdỹỹdu wedu heto-ò. Tai tahe ixitòeenymy heòtywera-ò rorukumyhỹ heto itxeredu mahãdu-wana. <sup>55</sup> Deuxu aõmysỹdỹỹdu mahãdu wedu, tule dohodỹỹdu mahãdu alobixidu rijemyhỹre aõlemy Jesuisi òludu relyymyhỹre, Kia òraru-ki rirubunyrenykemy. Rahaõre. <sup>56</sup> Sõwemy iny ruimy relyymy rỹimyhỹ. Iruinarenymy wiribi hitxi hitxilera. <sup>57</sup> Ijõ mahãdu rỹimyhỹre relyyrehãre ruimy rarybere: <sup>58</sup> —Inyboho irybe-ò roholarenymy: Jiarỹ heka dohodỹỹna heto ariixãwididỹỹnykre kia heka hãbu iwidỹỹna rare. Txu inataõ-di ijõ ariwinykre iwidỹỹnaweseõre. <sup>59</sup> Kia heka aõmybo tuu relyyrenyremy irybe wiribi hitxi hitxire. <sup>60</sup> Deuxu aõmysỹdỹỹdu mahãdu rỹire inysõwetya-txi. Tii Jesuisi ritỹỹraxinyre: —Kai aõbo biwarawyònykre aõmybo relyyrenyreny adee òludumy. <sup>61</sup> Tii rerawyònyõlere ixiby tahe Deuxu aõmysỹdỹỹdu mahãdu ritỹỹraxinyre: —Kai aõbo Kõristu tate, Deuxu wityhy riõre. <sup>62</sup> Jesuisi rarybera: —Jiarỹ heka. Kaiboho betehebennykre

Deuxu Riõre Hãbutyhyhykỹ Deuxu rurunaweribi-ò ronyreri. Kaiboho tii betehebennykre Deuxu Riõre Hãbutyhyhykỹ biuwetyky-ribi naderi.

<sup>63</sup> Deuxu aõmysỹdỹỹdu wedu ityy riykara idi rarybera: —Aõherekibo ijõ alobixidumy iny rururenyreri. <sup>64</sup> Kaiboho taholatenyta aõbina binalemy

rarybereriò aõmybohe kaiboho tahõtinyinmyhÿtenyete. Ibutumy heka tawo riraòhòrenenyra rubudukremy. <sup>65</sup> Tahe ijõ ityre rybeximy rarutaara rexiruehetynyre tahe tule rihetenyre. Tahe rarybere: —Mota làhà arahãtenyra. Idi tahe heto itxeredu tule rihetenyre.

<sup>66</sup> Pedro heka ratximyhÿ bedeube-ki tahe ijadòma dehemynyde, Deuxu aõmysÿdÿÿdu deòdu. <sup>67</sup> Pedro rexitòteenymyhÿ heòtywera-ò tahe ijadòma tamy rethehere. Tahe rarybera: —Kai tule Jesuisi Nazare ludu-wana atximahãte. <sup>68</sup> Tahe tii rexitxiõnyre: —Jiarÿ reeryõre aõmybo kai tarybeteri. Tahe Pedro hetowo-ribi ròhònyre. <sup>69</sup> Ijadòma ixyby ixyby itxeremy rarybere kowa ijoi-ò: —Kowa heka tii mahãduõ rare. <sup>70</sup> Tahe tii ixityre rexitxiõnyre. Ixybyle kowa ijoiõ Pedro-ò rarybera: —Inatyhymy kai ijõ mahãduõle tate. Kai dori Kalileia mahãdu tate. <sup>71</sup> Tii inatyhytyhyrybemy rarybera: —Jiarÿ reerykõre hãbumy tarybetenyteri. <sup>72</sup> Tahe hãnie hãbu ryryra, inatxi hewoludumy. Ta Jesuisi rybe-txi Pedro tõhõti reare. Iwese Jesuisi rarybere: —Inatxi hãnie ryrykredi, ihewoludukomy ryrykre, wadee bedexitxiõnykre inataõmy. Pedro tahe iribi rexitareu, rahinyre.

## 15

<sup>1</sup> Txuu reareu, Deuxu aõmysÿdÿÿdu wedu, matuari mahãdu, Bede ywina erydÿÿ mahãdu ibutumy ributunyre. Tahe Jesuisi ritaataare tahe ridyrenyre Pilato-ò. <sup>2</sup> Pilato Jesuisi-ò ritÿÿraxinyre: —Kai aõbo judeu iòlò tate. Tii rirawyònyre: —Kai ka tuu tarybeta. <sup>3</sup> Deuxu aõmysÿdÿÿdu mahãdu wedu rarybere Jesuisi aõna aõna awimy aõkõ riwinyre. Tahe Jesuisi riwawyònyõhyllere. <sup>4</sup> Pilato ixybyle rÿÿraxire: —Kai birawyònyõtyhy aõbo. Kai aõbo taholaleteri aõmybo tiiboho autedé-ò raryberenyteri. <sup>5</sup> Tahe Jesuisi rarybeõhyllere tahe Pilato urile bede riòtiinymyhÿre.

<sup>6</sup> Kia heka juhoo iny deòwarixina rare hãbu ròteduõ ritakemy anarÿÿtxuu. Aõtxile iny tamy rexitòenyke. <sup>7</sup> Ròtenawo-ki raremyhÿ inyõ Barabamy ninadu-ki. Tii tahe inywitxira aõbinadu mahãdu-wana ratximyhÿ. Kiamy inydinodu òraru-ki aõbina rÿireki, tii iny rirubunyre. <sup>8</sup> Iny sòwehekÿky-ki doide, tahe rexiranyre ixitòedÿÿmy: iny deòwarixina kòdòhònykre. <sup>9</sup> Pilato dirawyònyde: —Adeereny ariòlòdÿÿnykekõ aõbo ka judeu iòlò. <sup>10</sup> Tii rieryre dori Deuxu aõmysÿdÿÿdu mahãdu wedu tamy Jesuisi ridyrenyre iwobinanareny lau. <sup>11</sup> Deuxu aõmysÿdÿÿdu wedu inysòwe riixitòedÿÿnyre Baraba riòlòdÿÿnykemy. <sup>12</sup> Pilato ritÿÿraxinyre ixybyle: —Aõhebo tahe idi arotÿÿnykre. Kaiboho tuu teninimyhÿtenyete judeu iòlòmy. <sup>13</sup> Tiiboho rirajuarenyre: —Bitamadÿÿnyke itxeò nihikÿ-ò. <sup>14</sup> Ta Pilato tamyreny ritÿÿraxinyre: —Aõbina taka riwinyre. Aõhe-wana ixityre rirajuamyhÿrenyre: —Bitamadÿÿnyke itxeònihikÿ-ò. <sup>15</sup> Pilato inydee aõ riwahinykemy rõhõtinya, tai ta Baraba riòlòdÿÿnyre. Idi tahe Jesuisi riyhtanymy rahudi, riteònyre itxeònihikÿ-ò riukòrenykremy.

<sup>16</sup> Soldado ridyrenyre heto woube-ò. Tai tahe ibutumy soldado ributunyre. <sup>17</sup> Tahe tyysòborehekÿ-di rityynyrenyre. Tahe ede rataana ritidire ira-ò. <sup>18</sup> Tahe rirybenyrenyre: —Adee nihikÿre judeu iòlò. <sup>19</sup> Tahe rihetenyre bòtòre-di irati-ò, tahe ityre rarybexinyre tahe rÿire tatiowotimy rityhynykemy. <sup>20</sup> Tahe tyysòbore iribi ritara, tahe ityyle tamy ritidira. Inatyhymy ridyrenyre itxeònihikÿ-ò riukòrenykremy.

<sup>21</sup> Kowa-di rekoarenyre hãbuõ. Simaõ Sireni inire. Kia heka Alexÿdre, Rufu-wana tyby rare. Tii nade bedero-ribi. Tiiboho tahe riitxyydÿÿnyre itxeò-di retyykemy.

<sup>22</sup> Riwyrenyre bederahy-ò Kòkòta ninadu-ò. Kia heka iwitxira rybe rare. Kia heka rubu ratitybyho wese rare. <sup>23</sup> Tiiboho vñ riurinyre òwòruburu-wana. Tahe tii tuu riòòlera. <sup>24</sup> Itxeònihikỹ-ò raukòrenymy rahudi tahe ityy wirarea riatyre, tahe ityy-di rarudeòsanyre tibo iny sohoji sohoji ityy riwykremy. <sup>25</sup> Biurasò txu Jesuisi itxeò-ki raukore. <sup>26</sup> Iratya-ki tahe ritina rỹire: JUDEU IÒLÒ. Kia heka iny tuu rarybemyhỹrenyre. <sup>27</sup> Tahe tii-wana inatxi wasidu itxeònihikỹ-ò riherinanyre, ijõ ruruweribi-ò, ijõ hyweweribi-ò. <sup>28</sup> Tahe rotỹnyre aõbo Deuxu ritina-ki rỹire wese: Tii ratximyhỹ òrarudu mahãdu-wana. <sup>29</sup> Iny reareare tara riohowimy rarybere aõbina binamy: —Kobe, kai korihe dohodỹña heto biatykemy inataõ txudile tahe ixityre bidiwinykre. <sup>30</sup> Kaile inyhe bexitakre itxeò-ribi. <sup>31</sup> Iwesehyyle Deuxu aõmysỹdỹdu wedu, bede ywina erydỹ mahãdu-wana widee raryberenyre. Jesuisinimy raujõmorenyrerì: —Tii iny witxira ritare, tiile tahe rexitaõtyhy. <sup>32</sup> Kristu, judeu Iòlò, bodobeheke itxeò-ribi jiarỹboho arobirenykremy, tai tahe aratyhynyrenykremy. Tule wasidu tii-wana raukòrenyre itxeò-ki Jesuisimy raujõmorenyre.

<sup>33</sup> Txutyeyu ibutumy bede rurunyre. Tahe roire txu kaò resemy. <sup>34</sup> Kiaule tahe Jesuisi rarybeterenyre: —Elòi, Elòi, lema sabatani. Kia heka iwitxira tybe rare. Kia rare: —WaDeuxu waDeuxu, aõherekibo kai tiwarite. <sup>35</sup> Ijoiõ heka tamy roholareu, rarybere: —Tii heka Eliasi-ò rryrerì. <sup>36</sup> Hãbuõ reare bexi ritỹxinyre vñ juberere-di idi tahe ritidire tabòtòrejura-ò. Riwahinyre Jesuisi ritòkemy. Tahe rarybere: —Deinyhe tamy inyhe reketehereny Eliasi kanakremy aõbo inyhe itarasamy. <sup>37</sup> Jesuisi rryre irariemy idi rurure. <sup>38</sup> Dohodỹña hetowetyy raykare inatxi weryna tyymy, biu-ribi, bede-ò. <sup>39</sup> Soldado dinodu Jesuisiko-txi ratximyhỹre. Tahe rurureu, irubumy robire. Tahe rarybere: —Ka heka inatyhymy Deuxu riòre rare. <sup>40</sup> Tule hãwyy mahãduõ retehemy rỹimyhỹ irehe-ribi, tòwysyreny-ki, Marie Madalena, Marie (Txiause, Jyese tii rare. Txiau heka Jyje hewoludumy rare.) Salome tule ihỹre ijõ-wana. <sup>41</sup> Kia heka Jesuisi Kalileia raremyhỹu, tiiboho tahe sòwemy iny-wana doide Jerusalẽ-ò.

<sup>42</sup> Txioromyhe dehemynyde. Wirareasanatxu rare. Kia heka sabadotxukokile rare. <sup>43</sup> Jyje Arimatea hãwã ludu dohodỹdu nihikỹõ rare. Tule heka tii riraòmy ratximyhỹ Deuxu Iòlòna. Tii ruberuòlemy rare Pilato-ò Jesuisiumymy ixitòedỹmy. <sup>44</sup> Pilato rabedeòtiidỹnyre Jesuisi rurumy roimyhỹdi tai rryre soldado dinodu-ò. Tai Pilato ritỹraxinyre, Jesuisi rurumy roimyhỹdi. <sup>45</sup> Soldado rarybereu Jesuisi rurumy roiremy tahe Pilato riteònyre Jesuisiumy Jyje-ò iwahidỹmy, <sup>46</sup> Jyje ritare itxeònihikỹ-ribi tahe ritỹtenyre tyyurahãkỹ-di. Idi tahe ritidirenyre mana hãloo wabedewo-ò. Tahe mananihikỹ-di riijòtòbònyra. <sup>47</sup> Marie Madalena, ijõ Marie Jyese reteherenyre titxibo tii ritidirenyreò.

## 16

<sup>1</sup> Tahe nobiutxu, Marie Madalena, ijõ Marie-wana ihewoludu Marie, Txiause, Salomese-wana rare. Tiiboho lỹnyrena riòbranyrenyre. Tahe roire Jesuisibymy idi rekoakremy lỹnyrena-di. <sup>2</sup> Juhutxu semana bededỹñanau txuu deadeule roire wabede-ò. <sup>3</sup> Widee raryberenyre: —Mowexe mana ritakre ijõ-ribi. <sup>4</sup> Tahe tuu robirenyre. Mana nihikỹ ritamy rỹire. <sup>5</sup> Wabede-ò rirònyrenyre, robirenyre weryrybòweselemy rononymhỹ ruruweribi-ò. Ityy urahakỹmy rononymhỹ. Tahe tiiboho bede riòtiinyrenyre ruberurenymy. <sup>6</sup> Tii tamyreny rarybera: —Uritere breburenỹmy. Kaiboho aõbo teòrytenyta Jesuisi Nazare ludu. Kia itxeò-ki rurure. Tii aõkõ kaki ratxirerì. Rexixara



rubu-ribi. Betehebenny inihe tai ritidiraò. <sup>7</sup> Makre. Marybekre ierydỹna-ò tule Pedro-ò. Tii rakre akorenymy Kalileia-ò kaiboho tuu lobiximy boikre tuu adeereny raryberemy. <sup>8</sup> Tahe tiiboho rihenyreny wylemy wabede-ribi ruberumy. Tiiboho moõ heka rarybeõhyylereny ruberumyhyrenyki.

<sup>9</sup> Juhutxu semana bededỹnau Jesuisi rubu-ribi rexixare. Idi tahe juhuu àsitereribile rexitỹnynyre Marie Madalena dee. Kia-ribi heka juhuule ritare debò inatxi reurò tyytybybinamy. <sup>10</sup> Tii rare Jesuisi-wana raremyhỹ mahãdu-ò. Tiiboho rabadewomy ratximyhỹreny, rahinymyhỹreny. <sup>11</sup> Tamyreny relyyreu iwese Jesuisi tamy rexitỹnynyre wese Jesuisi irulemy ratximyhỹmy tuu robireke, rityhynyõlerenyre.

<sup>12</sup> Jesuisi rexixamy rahudi tahe, iwitxiramy rexisỹnyny inatxi erydỹna-ò. Tiiboho heka roimyhỹreny bedero-ò. <sup>13</sup> Tahe dòòsede relyyreny taijoi-ò, tahe tule rityhynyõlerenyre.

<sup>14</sup> Tahe waòsohoji reurò erydỹna-ò Jesuisi àsitereribile rexitỹnynyre. Tiiboho riroximyhỹrenyò rexitỹnynyre. Tahe Jesuisi tamyreny rarybera: —Aõherekibo kaiboho iny wamy robira mahãdu tetyhynyõteri. <sup>15</sup> Kaiboho boibenyke ibutumy bede bede-ò Rybewihikỹ bitỹnykremy. <sup>16</sup> Inyõ Rybewihikỹ rityhynykeki, idi kidisebenykeki, tii Deuxu ritake. Inyõ rityhynyõkeki, Deuxu ixi-ribi riteònykre iòraru-ki. <sup>17</sup> Kia bede eryna ityhydỹdu kidiheludunykre. Tiiboho tyytybybina kiditeònykre wani-ki. Tule heka tiiboho itỹmyra rybe kanarybedenykre. <sup>18</sup> Hemylala rimyrenyreu, aõhe rotỹnyõlere tule rubuna monamy riõkeki, rotỹnyõlere. Tiiboho tebò ritidirenykre bina mahãdu-ò tahe riteytenykre.

<sup>19</sup> Idi tahe Jesuisi tarybe rahuredi, Deuxu ridyre biu-ò. Tahe ronyre Deuxu ruruweribi-ò. <sup>20</sup> Tahe tiiboho roire ibutumy bede bedemy tai bederitỹnynyreny. Wanyrỹ riwiòhenanyreny tahe bede eryna-di irybe ixidee rimyreny ihelududỹdu mahãdu-ò.

## Luka Deuxu Rybe Wihikỹ Tỹmyra, Luka Tyyritidỹdu

<sup>1-3</sup> Wyla, Teòfilo. Adee heka watyyriti ariwahinykre timybo Kristu rotỹnyre. Tuu lobixidu mahādu tuu relyymyhỹre-ribi, jiarỹ ire ariòbitinytyhykre. Kia heka jiarỹ adee reritinymyhỹre, waiòlò, iwese ibutumy reeryrenyrehu bededỹna-ribi. Aōma inatyhymy kia rotỹnyre rare wahe. <sup>4</sup> Kia wese wahe. Iwese iny adee relyyre wese, jiarỹ adee arelyyre inatyhymy aōbo rotỹnyre. <sup>5</sup> Zacaria heka Deuxu xiwe wahidỹdu rare, Abia ijoiò wahe. Iriòrese Isabeli tahe tule xiwe wahidỹdu riokore mahāduò rare. Kiau heka Herodi judeu bedesỹ iòlòmý raremyhỹ, Araò riokore mahāduò wahe. <sup>6</sup> Wiwanale heka awirenyre Deuxuru-ò. Òbitihyy heka ratximyhỹrenyrehu ibutumy Deuxu bededỹnanako-ò. <sup>7</sup> Tiiboho iriòreòhyyre. Ihāwyy Isabeli heka rasenadunyrehu, uladu herina dori awiòre. Ihābu tule ramatuarinyre.

<sup>8</sup> Aōutxumy tahe Zacaria raaōmysỹdỹnyre aōma templowo-ki. Ki-atxu heka iròtenatxumy bede rỹimyhỹre templowo-ò. Tahe iwo-ki ratximyhỹre. <sup>9</sup> Hewydysi lỹnywi ritoonymyhỹ Deuxu kia deàlanamy, iwese riwinymyhỹrewesehyyle. <sup>10</sup> Iu ahana-ki tahe sōwemy iny rexitòenymyhỹ. <sup>11</sup> Iu Zacaria xiwena ruruwe-ribi loosòna-ò rỹireu, hewydysi lỹnywi ritoonymyhỹre. Tahe aōwesele yjuò rexitỹnyre Zacariako-ò. <sup>12</sup> Tii tuu robeure heka rexiraòmý ruberumy reare. <sup>13</sup> Yju rarybere: —Brebuòmýkre, Zacaria. Deuxu roholare aixitòedỹna-ò. Tai heka adee ijyymy rareri. Ahāwyy Isabeli rariòrenykre. Kai heka Joaōmy bininikre. <sup>14</sup> Tai kaiboho heka iura heka beysabenyke sōwemy; ijò iny tule reysakre iòraru-ki. <sup>15</sup> Tii heka hābutyhyhỹmý rarekre Deuxu dee tiu heka vỹ riòòtyhy mona hàrihikỹ riòòtyhy. Deuxu Tyytybytyhy. Juaòtykymy ralokre tii reareu. <sup>16</sup> Sōwemy heka aōma Israeli mahādu Deuxu rityhinykre iòraru-ki wahe. <sup>17</sup> Tii heka hābutyhyhỹmý rarekre Deuxu rybedumy Elia wesemy. Tii heka aōma Deuxu deòdỹna juhuhū rehemynymy reakre ikòlemy iny ywisidỹnakre rehemynykre juhuhū, aōma Deuxu Tyytybytyhy dehemynyna riijemy tuu rehemynymy rakre. Tii bede ywina riòbitinykre inyy-ki. Tyby tariòre-wana wii riwoxinykremy. Tii heka iny ribedeerynykre aōma òbitimý rỹirakremy. Deuxu luumy rỹirakre aōma ilahireny rỹira wesemy juhuhū.

<sup>18</sup> Zacaria rarybere yju-ò: —Jiarỹ ramatuarinyre timykre heka? Hāwyy tule rasenadunyrehu ihārele òsana tukre. <sup>19</sup> Yju rarybere: —Jiarỹ Gabrieli watxireri, Deuxu deòdutyhy wahe. Tii heka diwateònyde kaò adee rybemy wahe. <sup>20</sup> Kai tetyhynyòhyteri tai kai marybeòkre uladu reakre xiery tahe marybekre. Kaa adee rarybereri dori òbitimý rarybereri warybemynamy ibutumy rỹikre. <sup>21</sup> Iny riraòmý rỹimyhỹ Zacaria òlòna, tahe raroorehenymyhỹ. Iroorehena rieryòhyymyhỹreny. Dòhònydeu ta, rybe-ki rexisiranymy rarybeòhyyre. <sup>22</sup> Tii rehemynyrehu tamy rybeòhykyre rahòra. Idi tebò-di raramynyre urile rybe riwisỹnyre rarybeòhykymyhỹre aōma timybo aōhebo rotỹnyrá heka riòbitinykemy heka rarybeòhyymyhe timyrabo. <sup>23</sup> Tahe taaōmysỹdỹna rihudi, taheto-ò ròòsere ixbyby.

<sup>24</sup> Idi tahe Isabeli rabòtònyre iruwyyre ahādumy bede riijere rexiwòmý. <sup>25</sup> Isabeli rarybere: —Deuxu awi heka rare, riwatare waixỹruna-ribi. Kuladu wadeke riwahinyreri.

<sup>26</sup> Ijò ahādu tahe Deuxu Gabrieli riteònyre Nazare hāwā-ò Kalileia bede-ò. <sup>27</sup> Yjuò heka rybe-di ijadòma-ò. Kia ijadòma heka wii ritobinymy rỹireri

tybyboho iseboho Jyje-wana roikremy. Jyje heka iòlò Davi kia mahãduõ rare. Ijadòma tahe Marie inire. <sup>28</sup> Ŷju heka kiamy rarybere: —Beysakre Marie! Inynyrÿ heka awana ratxireri. Bedeòbyhykÿ adee kidiwahinykre. Tii arãwowydynyneri. <sup>29</sup> Kia rybe-di tahe Marie rexiraykynyre. Tii rieryõmy aõmybo rare. <sup>30</sup> Tahe Ŷju tamy rarybere: —Marie, Brebuõmy! Deuxu teteysanyte. Kai awi heka rare. Tii aõwihikÿbo adee kidiwahinykre. <sup>31</sup> Kai heka mariòrekre, uladu heka Jesusimy raninikre. <sup>32</sup> Tii heka hãbu nihikÿ rarekre. Tii Deuxu riòremy raninikre. Deuxu heka tii iòlòmy risÿnykre, iwese Davi alabiehekÿreny ronyre wese, tii ronykre. <sup>33</sup> Tii heka ibutu Ijaò mahãdu iòlòmy rarekre. Iòlòna heka tiu itueõtyhy. <sup>34</sup> Tai tahe Marie Ŷju-ò rarybere: —Jikarÿ heka ijadòkòmatyhy watzireri. Timykibohe krabòtònykre. <sup>35</sup> Tahe Ŷju rirawyònyre: —Tyytybytyhy adee kanalokre. Deuxu ruru heka adee kanakre. Tai heka kia uladu Deuxu òbiti riòremy raninikre. <sup>36</sup> Nohõti lusaõmy anymy-ribi Isabeli riki bòtòkõmy rareke-ribi tahe bòtòmy ratxireri. Debò sohoji reurò ahãdumy iahãdu. <sup>37</sup> Deuxu dee heka tiu aõ isiraõre. <sup>38</sup> Marie rarybera: —Jikarÿ Wahĩ dekòdu rare. Anomybo tarybeteri ka ibutumy rekyrubunyneri. Wadeke awire. Anowaxina tuukre irybemynamy karotÿkÿnykre. Idi Ŷju rikõmy reare.

<sup>39</sup> Idi ta tii heka Isabeli roramy rare. Zacaria sÿmy Judeia bede hãwãlò hãwã bede-ki. <sup>40</sup> Iu Marie rehemynyreu tahe wii rirybenyreny: <sup>41</sup> Tiu kia aõbo uladu Isabeli kia-ki iule rexiwatxinyhy Marie-ò. Isabeli heka tÿxyikÿle Deuxu Tyytybytyhy-di ratximyhy. <sup>42</sup> Riajuamy rare deysana-di sòwewere: —Kai hãwyy ibutu-ribi deysana rarekre. Auladu tule deysana rarekre. <sup>43</sup> Anoherekibo Wahĩse waroramy naderi. Jikarÿ ano anokõ rare. <sup>44</sup> Adeke rahokujareku, kuladu wawoku-ki rexilòrelòrenymyhy tabedesa-di. Tai tahe Isabeli rÿÿraximy ratximyhyre Deuxu Tyytybytyhy-di. <sup>45</sup> Kai bekysabenyke kia tetyhinyteki. Deuxu rybe dokuri adeke nade. Iwese tiki raryberewesele ibutumy rãikre. <sup>46</sup> Marie rarybere: —Jikarÿ wawoku-ribi Wahĩ rewokuwydynyre. <sup>47</sup> Wawokuribityhy wadekysareri Wahĩ watarasadu dokuri rare. <sup>48</sup> Ihyky tahe tiki tekòdu-ribi walanokonakona-ribi tòhõti rosakre. Tahe iny ibutumy hãwyky dekysanamy riwaninikre. <sup>49</sup> Deuxu dokuri anomydÿkÿnana wiwihikÿ wadeke riwahinyre. Tii tahe ityhy rare.

<sup>50</sup> Tikiemy inydeke ruxetòena riwahinyhyre iny tamy wowydyna riwahinyreki.

<sup>51</sup> Ixityhy nohõtidu mahãdu tiki rehure. <sup>52</sup> Bede ikòlò sòwemy tiki rehure. Tule iny ianokõ mahãdu Deuxu riwikòhenanyhyre.

<sup>53</sup> Rama risamahãdu deke rÿsÿna tiki riwahinyre.

<sup>54</sup> Irybe tahe tiki rityhinyre anobo tiki inytybyreny deke tiki raryberemy. Tikiboho tahe Deuxu riwikòhenanyre. <sup>55</sup> Ruxetòena tahe Abraõ deke riwahinyre tule tikiemy iriokore deke riwahinyhyre.

<sup>56</sup> Marie tahe inataõ ahãdu Isabeli-wana riwya. Idi tahe tasÿ-ò ròòsera.

<sup>57</sup> Bededÿÿnana Isabeli-ò rehemynyre. Iriòre reakremy ratxireriu, Iriòre reare. <sup>58</sup> Isÿ mahãdu heka teysana-ò roholarennyre, iery mahãdu tule rabe-desarennyre tamy Inynyrÿ raruxetòenyredi, Inynyrÿreny ruxetòena tamy riwahinyreki. <sup>59</sup> Tahe debò inataõ txu-di, uladu notyky resynamy bede rÿire. Zacaria raninykemyre. <sup>60</sup> Tai tahe ise rarybere: —Anokõre, Joaõmy rarekre. <sup>61</sup> Isÿ mahãdu rarybere: —Joaõmy ninadu taheka ijòkòhykyre inysÿreny-ki. Anoherekibo tuukre? tai tuu raninike wahe. <sup>62</sup> Tuu Zacaria-ò rÿÿraxireny: —Momybo raninykre? <sup>63</sup> Tahe Zacaria tababese riòreõ rinyre. Riritinyra kia: —Joaõ heka inikre. Tahe ijò mahãdu ibutumy ribedeòtiidÿÿnyre. <sup>64</sup> Iu tahe Zacaria rarybere Deuxu riwowydynyre. Tahe ibutumy isÿ mahãdu heka

ruberure. <sup>65</sup> Ibutumy heka tii relyymy raremyhỹ Judeia mahãdu hãwãlò nihikỹmy. <sup>66</sup> Ibutumy tamy roholaré heka raryberenyre: —Timybo uladu rarekre? Inynyrỹ idi tarukimy iweribikre.

<sup>67</sup> Tahe Deuxu Tyytybytyhy heka Zacariatykymy ralore. Tahe Deuxu aõmydỹñnanamyhe relyyre timybo rabeledỹñnananykremy. Tii rarybere:

<sup>68</sup> —Judeu mahãdu Deuxu awi rare. Tii dori taijoi roramy nade.

<sup>69</sup> Iwiòhedỹñmy tulemy tarasadu tyhy Tii heka Iòlò Davi mahãduy rare.

<sup>70</sup> Deuxu Rybedỹñdu mahãdu kia wesemy tuu raryberenyre.

<sup>71</sup> Inydireny òludu mahãdureny-ribi riki iny ritarenykre. Iny-di heka rarux-etòerenyra.

<sup>72</sup> Tahe iny-ribi tõihtireny rosaõhykyra. Tahe rarybekre timybo raryberemy inytybyrenymy. <sup>73-75</sup> Tii heka iny ritarenykemy inydireny ratxireri inyòludureny-ribi. Kia-ò heka rarybere inylabiereny Abraõ-ò. Tai heka rikiwiòhenanyrenyke brebuõlemy. Òbitimy iko-ò rakatxirenyhykre. <sup>76</sup> Kai wariòre Deuxu rybedumy mabekre. Kai heka mabekre Deuxuhukỹ rybemy rybedumy. Kai heka bòhõnykre

Inynyrỹ-kò iry biywinykremy.

<sup>77</sup> Asỹ mahãdu-ò marybekre biu-ò hena kanakremy ihỹre. Deuxu heka tõihti rosakre iòrarunareny-ribi. <sup>78</sup> Iny Deuxureny dori inydeereny ruxetòedu rare. Tii heka biu-ò hena ibutu-ò kidiòkre, tarasana wahe.

<sup>79</sup> Kia bede lurumy rỹira mahãdu biuloosònamy robikre.

Zacaria rybe tahe rikonananyre. Loosòna ywinary-ò tahe ritỹnynykre.

<sup>80</sup> Ihewo-ribi tahe uladu ratybienyre taumy-di Deuxu tyhydỹñna-ki tule. Tii heka bederahy-ki raremyhỹ. Tiutxumy rexitỹnynykremy judeu mahãdu-ò.

## 2

<sup>1</sup> Kia mahãdu iòlò Augusto inire. Kia heka ibutumy bedeki inyni rityritinykemy bedeki riywinyre. <sup>2</sup> Kurina heka Siria bedeki dinodu rare. <sup>3-4</sup> Jyje heka Nazare hãwã-ki rasỹnymy raremyhỹ. Tai tahe Kalileia bedeki ribi tiiboho roirenykemy Judeia bedeki-ò. Iòlò Davi dori tai reare, Belẽ hãwã-ki. <sup>5</sup> Jyje tahe rare, tii dori Davi ijoimy rareki. Marie bòtõmy tii ridyre tai ihãwyy. <sup>6</sup> Tahe Belẽ hãwã-ò rehemynyre. Tahe herina roxina heto ihoõre herina tamyreny. Taihe awaru roxina heto-ò roire. <sup>7</sup> Tai hãwyy ratohouãsenyrene. Idi rihetynyre awaru roxina hynaro-ò ritidikemy.

<sup>8</sup> Iu tahe budoeni-di itxeredu mahãdu bedeki ratximyhỹreny. <sup>9</sup> Idi tahe ãjuõ tamy nade Deuxu-ribi. Deuxu loosòna tamy ritynyre. Ruberurennyre.

<sup>10</sup> ãju tamy rarybere: —Brebuõmyrenyke. Rybe wihikỹ-di adee rehemynyreny. Ibutumy iny reysakre ka rybe-di. <sup>11</sup> Atarasadu heka ratohouãnyra Davi hãwã-ki, abiu-ò hedu wahe. Tii heka Kristu rare, Inynyrỹreny wahe. <sup>12</sup> Kaiboho heka awaru roxinaõ-ò inihe bòike itxeremy. Tai heka tohouã roireri tyy-di rarahananyre. <sup>13</sup> Iule tahe sõwemy ãju widotyde Deuxu dee rawiunykremy, kiawese rawiunynyrenyriwowydynyrenymy:

<sup>14</sup> —Biu-ki Deuxu loosòna ratxihyymyhỹre.

<sup>15</sup> Tahe ãju ròðerenyrene biu-ò. Budoeni-di itxeredu mahãdu widee raryberenyre. Wylemy Belẽ-ò ròkòirenykre itxeremy kia aõmydỹñnanamy Deuxu inydee riteòsinyrenyriò. <sup>16</sup> Tahe roirenyre idi tahe Marie, Jyje-txi rekoarennyre. Tuu robirenyre. Tahe broreni dòròtòhòhyna-ki uladu roire. <sup>17</sup> Tai tahe budoeni-di itxeredu mahãdu timybo ãju tamy raryberamy, rarybere. <sup>18</sup> Tai tahe ibutumy kia tamy roholaré ribedeòtiinymy rỹire. <sup>19</sup> Marie heka tõihti

itxi reare. Tahe sōwemy raraykywydynanymy ronyre. <sup>20</sup> Budoeni-di itxeredu mahādu ròðserenyre rawiunyrenymy Deuxu-ò Deuxumy reàlàre ibutu òraru-ki. Iwese ŷju raryberewesetyhyle heka ibutumy rỹire.

<sup>21</sup> Iribi tahe txu rỹireu tahe rare Jesuisi notyky orokré. Debò inataō reurotxu rỹireu Jesuisi notyky raorokremy raywire. Tahe rininirenyre Jesuisimy iwese ŷju rarybere myna.

<sup>22</sup> Xiwena rỹikemy bedede rỹire Moisesi bedede ywidỹnamyna. Aōutxumy tahe dehemynyde Marie Jyje-wana kia idi riwinyrenykemy. Tahe Jyje ridykemy Jerusalē-ò idi ratxireri. Tai uladu-di roirenyre Deuxu-ò riteòsinykemy.

<sup>23</sup> Kiamy heka Inynyrỹ Ritidỹna-ki roire.

Weryrykeki, Deuxu dee rawahidỹkre. Tii uladudelaa weryrykreki.

<sup>24</sup> Iwese tule bòtòe inatximy rawahidỹkre ada bòtòerurà inatxi heka xiwenamy reakre Moisesi bedede ywidỹna myna.

<sup>25</sup> Hābuō tai ratximyhỹre Simeaō inire. Jerusalē hāwādu wahe. Deuxu rityhynymyhỹre hābuwi rare. Tii Kristu riraòmyhỹre Deuxu deòdỹna wahe. Ijoi aōbina bina-ribi tarasadumy Deuxu Tyytybytyhy heka tai ratximyhỹre. <sup>26</sup> Deuxu Tyytyby ihetxiu tamy rarybere: —Kai buruōtyhy Deuxu deòdỹnamy bobiōdi. <sup>27</sup> Iu Jesuisise tyby-wana rehemynyreu Deuxu Tyytybytyhy heka Simeaō riteònyre kowa-ò. <sup>28</sup> Simeaō uladu taāxiò-ki rinyreu. Tahe Deuxu riwowydynyre:

<sup>29-31</sup> —Kiamy heka Wanyrỹ Iòlò arybe retyhynyre timybo tarybete wahe. Ibutumy dorihe tewinyta. Tahe aōwaxinyhe arurukre. Abiuòhenamy heka rabira. Tii ibutu iny tarasadumy rarekre biu-ò hena wahidỹdu wahe.

<sup>32</sup> Kia heka ibutumy iny-ò loosòna tewahinyta judeukōdu mahādu-ò. Tai judeu mahādu tahe wowydynyre tii rarekre.

<sup>33</sup> Tai tahe Jyje Marie-wana bedede riòtiinyre aōmybo rarybereki. <sup>34</sup> Simeaō tahe Deuxu deysanamy tamyreny rarybere: —Deuxu biu-ò henamy heka kia uladu rare. Sōwemy judeu mahādu tarasadumy rarekre, tule sōwemy tasỹ ituekre. Kia heka Deuxu deòsina rare. Sōwemy heka Jesuisimy rakyararybenynykre. <sup>35</sup> Ibutumy iny rayky-ribi heka ibutumy ritỹnynykre. Bederyry sōwemy bieryke tai aōhōkỹmy botỹnykre. <sup>36</sup> Tule Deuxu rybe erydỹnaō rehemynyre. Ana inire. Hāwy rare. Tii heka Faneli riòre rare. Asere mahādušyō rare. Tii heka rasenadunymy raremyhỹ. Ijadòmamy raremyhỹ heka roire hābu-wana. Debò inatxi reurò beòralemy heka tii-wana raremyhỹ tahe tii rawytesenyre. <sup>37</sup> Tii 84 beòramy heka bedede idi rỹire wytesemy. Tii Deuxu dohodỹna heto-ribi ròhònyòhyymyhỹre. Tii heka rexitòenymyhỹre rummy txumy tabyreō-di. <sup>38</sup> Tahe tii rehemynyre Deuxu dohodỹna heto-ò. Deuxumy reàlàre. Idi Jesuisimy imahādu-ò rarybere tii tarasadumy rarekremy.

<sup>39</sup> Iu Marie, Jyje-wana ibutumy bedede ywidỹnamy ituereu, riòðserenyre tahāwā-ò Nazare-ò. <sup>40</sup> Jesuisi raumynymyhỹre beòra beòramy. Iruru, ibede eryna sōwemy ijòdire Deuxu dori idi tarukimyhỹre.

<sup>41</sup> Pascoa worana bedehesi riòlòdỹnyre Jerusalē hāwā-ki. Jesuisi tyby heka iseboho roihyymyhỹrenyrene tamy. <sup>42</sup> Tule Jesuisi waòinatxi reurò beòra-di ridyrenyrene tamy. <sup>43</sup> Worana bedehesi rexihureu kidiòkesedenykremy doide. Tahe Jesuisi naride Jerusalēkihikỹle. Tiiboho rieryrenyòhyre naridemy. <sup>44-46</sup> Taijoiirenywanale ratxirerilemy idi ròhòtinyrenyrene. Txusohojimy heka bedede idi rỹidi, rierenyrene. Tai rahaòhyrenyrene iijesemy diòkesedenyde Jerusalē-ò ixyby. Inataō txu-di tahe tai nahadenyde, Deuxu dohodỹna hetowo-ki wahe. Tii heka bedede erydỹdu mahādu-wana ronyre. Roholamyhỹrenyrene

irybe-ò rononymhỹreny. Tule rỹraxyreny. <sup>47</sup> Tii heka ibutumy ri-rawyònymhỹre. Tii dori bede ery nihikỹ rare. <sup>48</sup> Iseboho tahe bede riòtiinyreny tai ronyreki wahe. Ise tamy rarybere: —Waritxòre, anoherekibo kai ikykyreny-ki tanyte. Anoherekibo tuu wadekereny tewinyteri aijesereny-di watzireri. <sup>49</sup> Tahe Jesuisi rirawyònyre: —Waijeserenykömyke. Waha heto-ki watzireri, Waha aõmysỹdỹỹnamy reywinyhy watzireri. Kia aõbo teeryõhyyteny. <sup>50</sup> Tiiboho rieryrenyõhyyre aõmybo Jesuisi rarybereri. <sup>51</sup> Idi tahe dòosedenyde Nazare-ò. Tahe Jesuisi tyby rybe rityhynyhy my raremyhỹ. Tahe Jesusise kia ibutumy riyrubunyhy my raremyhỹ tarayky-ki.

<sup>52</sup> Jesuisi tahe raumynyre. Bede erytyhymy relere. Ibutumy he iny iluure. Deuxu wowydyna-di ihỹre.

### 3

<sup>1</sup> Tiberiò heka waiyre beòramy iòlòmny raremyhỹ. Poncio Pilato heka Judeia bede dinodu. Ijõ heka Herodi inire. Inataõ inymy heka bede dinodumy raremy. Herodi heka Kalileia bede dinodu. Iseriòre, Filipi tahe Itureia bede, Traconite bede-wana dinodu rare. Ijõ iny tahe Lisỹnia inire. Tii Abileni bede dinodu rare. <sup>2</sup> Anasi, Kaifa-wana heka inatxi hãbu roire. Tiiboho wiwana xiwena wahidỹỹdu wedu raremyhỹ. Kia bedeu heka Joaõ rehemynyre bedero-txi. Tii iny-ò Deuxu rybe tỹnydỹỹdu rare. Zacaria riòre rare. <sup>3</sup> Tii kia bede ibutumy rybe ritỹnynyre, Jordaõ beroweramy ibutumy wahe. Kia wesemy rarybere: —Aòraru-ribi bòhònyke. Maratisebenyke. Tahe Deuxu aòraru riixãwididỹỹnykre. <sup>4</sup> Iwese Isaia ròritidỹỹre wesemy heka wiji rỹire. Inyõ heka rryrymyhỹ bedero-ki.

Kia:

—Inynyrỹry bexiywinybenyke. Ryòbitihikỹ biwinybenyke. Hãloo bitỹxinybenyke wimyny biijaranybenyke. Iry iòweòwena ramyhỹre heka, biòbitinybenyke.

<sup>5</sup> Iratòratòkeki, wimyna biijaranybenyke. <sup>6</sup> Ibutumy iny heka Deuxu biu-ò henamy robirenykre. <sup>7</sup> Sõwemy iny nade riratisebenykre my Joaõ-ò. Tahe tii tamyreny rarybere:

—Kaiboho hemylalaweselemy toite. Deuxu ykarana-ribi bexitabenyke, aõwiwihikỹ.

<sup>8</sup> Uritere kawese ryberenyõmykre: —Abraõ dori iny labiereny rare. Tai tahe ibutumy awityhy rare inydeereny.

Jiarỹ dori adeereny ararybekre: —Deuxudeewikeki, Tii kia manadile iny riwinyke. Abraõ dee ijõ riòreõmy kia manadile riwinyke. <sup>9</sup> Woma heka òwòruraruti riòròmnyhỹre. Kia raratynyõkeki heka, raòròkre. Heòty-di wòmny ririradỹỹnymyhỹke. <sup>10</sup> Tai tahe iny rỹraxyre Joaõ-ò: —Timybohe rakatxirenykre. <sup>11</sup> Tai tahe rarybere: —Inyõ tõre inatximy ijòdikeki, sohoji iny ijõ-ò riwahinyke. Irỹsỹnadikeki, tule ritxuatxuaque ijòkõ mahãdu-ò. <sup>12</sup> Iny witxiraõ Joaõ-ò rehemynyre. Tiiboho nieru tarasadu mahãdu rare bede dinodu-ò. Tai rỹraxyreny: —Timybo aõhebo rokotỹỹnyrenykre. <sup>13</sup> Joaõ rirawyònyre: —Uritere aõnihikỹmy itarasarenyõmykre. Bede ywidỹỹna tyyriti myna ta tuukre. <sup>14</sup> Tai tahe soldado tamy rỹraxyre: —Inyboho tahe aõhebo rokotỹỹnyrenykre. Joaõ rirawyònyre: —Inyõ biteranyõtyhy adee nieru kanakemy. Inieru dori ahõrõ aõkõ rare. Beysake, adinodu-ribi tiwesebo nieru tetamahãte-di. <sup>15</sup> Tahe kia iny mahãdu raraykynyre Joaõ-di. Kowa aõbo hãbu Kristu ihỹre. <sup>16</sup> Tai heka Joaõ rarybere: —Jiarỹ heka bedi araratisebenyreny. Ijõ wahewo-ribi kanakre tahe woratyre inihikỹ rarekre. Tii heka awityhy rare. Jiarỹ heka raixỹruwãhãre iwataana aritake lau. Tii heka

akanaratisebenykre Deuxu Tyytybytyhy-di. Heòty-di tule wahe. <sup>17</sup> Iti tebò-ki ratxireri. Maixõmo ruxity hitxina-di wahe. Tii heka ritakre. Maixõmo riyrubunykre ihyna-ò. Iruxityy tahe ritoonykre. Kia heòty heka tiu ruriòtyhy. <sup>18</sup> Aõ heka Joaõ rarybere. Sõwemy aõna aõnamy iwesele rarekemy. Dohodỹỹna wihikỹ-di tamyreny rarybera. <sup>19</sup> Bede dinodu Herodi heka taseriòre riòrese-wana roire. Aõbina binahakỹle riwinyre kia. Tai tahe Joaõ tamy rarybere: —Kia awi aõkõ rare. Ibina heka rare. Sõwemy aõna aõna bina tule tii riwinyre. <sup>20</sup> Tai Herodi heka Joaõ mynomy riteranyre ròtenawo-ki roikemy. <sup>21</sup> Joaõ ixiwesehyyle rexitỹmyranomy iny riratisebenyre. Tahe tule iny wixirahe-ki Jesuisi riratisebenyre, Jesuisi rexitòenyreu, biuwetyhy rarayre. <sup>22</sup> Biuwetyky-ribi tahe Deuxu Tyytybytyhyle dobehemy nade bòtòerurà wesemy. Biu-ribi rybeò-ò iny roholare: —Kai heka Wariòre tate. Aluure heka jiarỹ wadeysatyhyre. <sup>23</sup> Jesuisi 30 beòramy raremy taaõmysỹdỹỹna tyhy ritelenyre, iny heka Jyje riòrelemy ròhòtinymyhỹre. <sup>24</sup> Jyje heka Eli riòre rare. Matate, Levi, Maki, Janai, Jyje, ibutumy labiehekỹ Jyje rare. <sup>25</sup> Ijõ tahe Matatias, Amos, Naum, Esli, Nagai, <sup>26</sup> Maate, Matatias, Semei, Jyje, Joda, <sup>27</sup> Joana, Resa, Zorobabe, Salatieli, Neri, <sup>28</sup> Meki, Adi, Cosã, Elmadaõ, Er, <sup>29</sup> Josue, Eliézer, Jorim, Matate, Levi, <sup>30</sup> Simeaõ, Juda, Jyje, Jona, Eliaki, <sup>31</sup> Melea, Mena, Matata, Natã, Davi, <sup>32</sup> Ijese, Obede, Boasi, Sala, Nasaõ. <sup>33</sup> Aminadabe, Adimim, Arini, Esraõ, Peresi, Juda. <sup>34</sup> Ijaò, Ijai, Abraõ, Tera, Nakò, <sup>35</sup> Serui, Raau, Faleki, Eber, Sala, <sup>36</sup> Aina, Arfaxade, Sem, Noe, Lamei, <sup>37</sup> Metusalẽ, Enoi, Jarete, Maleleel, Aina, <sup>38</sup> Enosi, Sete, Adaõ. Tii tahe Deuxu juhoo riwinyre iriòre wese.

## 4

<sup>1</sup> Bero Jordaõ-ribi Deuxu Tyytybytyhy heka Jesuisi diòòsedỹỹnyde Tai heka tule bederò-ò rexiykynyra. <sup>2</sup> Tahe Satanasi Jesuisi riurihire, 40 txu-di wahe. Aõ heka rirỹsỹõhyre Jesuisi kia itxumy txu rỹireu wahe. Idi tahe sõwemy rama risare. <sup>3</sup> Satanasi tamy rarybere: —Kai Deuxu Riòretyhy tate-wana heka, mana bitxienykre hinamy. <sup>4</sup> Tai Jesuisi dirawyònyde: —Deuxu Rybe tule kiamy rarybere.

—Hãbu hewa byre sohojiribile aõkõ irumy rỹimyhỹre.

<sup>5</sup> Tai Satanasi heka Jesuisi ridyre heto ratyti tyre. Ibutumy hãwãhãkỹ riteòsinyre bede bede rỹirá. <sup>6</sup> Tahe Jesuisi-ò rarybere: —Kai biwalãhãnanykeki, ibutumy aõna aõna adee ariwahinykre, ibutumy hãwãhãkỹ dinodumy tule wahe. <sup>7</sup> Wahõrõ heka rare. Inyõ-ò aõtxile ariwahinykre. <sup>8</sup> Idi tahe Jesuisi dirawyònyde: —Deuxu-ò sohojile walãhãna biwahinykre. Kiamy Deuxu Rybe rarybere. <sup>9</sup> Idi Satanasi Jesuisi ridyre Jerusalẽ hãwã-ò. Biu-txi tahe rỹire, Deuxu dohodỹỹna heto tyre-ki wahe. Tii narybede, kai Deuxu Riòre tyhy tate wana heka bexiwatxixinyke inihe karibi hetoratyti-ribi. <sup>10</sup> Ýju riki arayrubunykre wa. Deuxu taỹjuõ bede riywinyre aramykemy. <sup>11</sup> Tule kia rarybemyhỹre Deuxu Rybe.

Awa riki manaõ riwotõmonyòtyhy.

<sup>12</sup> Tahe Jesuisi dirawyònyde: —Tule Deuxu Rybe rarybere: —Inyõ heka Deuxu uri urihixiòtyhy. <sup>13</sup> Rexihure tahe Jesuisi urihixina. Tahe Satanasi heka Jesuisi ririre. <sup>14</sup> Idi tahe Jesuisi ròsere Kalileia bede-ò. Deuxu Tyytybytyhy ruru tahe tii-wana ratximyhỹre. Ibutumy heka kia hãwã-ki ibededỹỹnana rieromy hỹreny. <sup>15</sup> Jesuisi heka dohodỹỹna heto-ki ròbedeerydỹỹmyhỹre. Ibutumy tuu rarybere. Tuu reàlãmy rarybemy rỹimyhỹ. <sup>16</sup> Iribi tahe Jesuisi ròsere tai raumynyréò, Nazare hãwã-ò. Sabado txuu tahe dohodỹỹna heto-ò reamy raremy iwesehyyle. Tii tahe lamamy rỹire tyyriti-di

rariakremy. <sup>17</sup> Tahe tamy Isaia tyyriti riwahinyreò. Tahe Jesuisi riijemyhÿre rybeò idi rariakemy. Tai idi rariare:

<sup>18</sup> —Wanyrÿ Tyytybytyhy waki ratxireri. Rybe Tÿmyra wihikÿ inyko arotododÿÿkremy. Iny aòkò mahãdu-ò rybe wihikÿ ararybekemy riwatare. Tule iny ròtena-ki rÿira mahãdu, jiarÿ ariòlòdÿÿnykemy. Kiamy heka tamyreny ararybekre. Tule ruetÿmyra ariwahinykre ruetà mahãdu-ò. Iny idi rarÿÿnymyhÿre mahãdu-ribi, aritakre idi risinymyhÿreki. (Aõna aõnamy risÿnyrenymyhÿreki wahe.)

<sup>19</sup> Tibedeubo Inynyrÿreny tajoi ritakremy ararybekre. <sup>20</sup> Idi tasÿ ixyby riwerasenyre. Tahe riwahinyre ixyby kia hãbu riyrubunymyhÿreò. Tii ronyre. Ibutumy kia dohodÿÿna mahãdu idi retehemy rÿimyhÿre. <sup>21</sup> Tahe Jesuisi ritelenymy rarybera: —Wiji idi rariará heka aõbo tamy ibededÿÿnanamy roire. Kia aõbo ritidÿÿna-ki roireri ihetxiu. Kaimy tahe wiji rarybereri, jiarÿ heka tii rare. Tii adeereny tyyriti rariará wahe. <sup>22</sup> Tai tahe bede riòtiinyreny. Kia tahe aõmybo raryberakí. Tahe widee raryberenyre. Kaa heka Jyji riòrele ratxireri. <sup>23</sup> Tahe Jesuisi ixityre tamyreny rarybere: —Aõu kaiboho wamy tarybetenyteri rybeõmy, myÿ manarybeke: Kai bexideytenyke, hàri, òhotibedu. Kiamy aõbohe wadee manarybebennykemy atxitenyteri:

Iwese Kafanaõ bedeki tewinyte wese ariwinyrenykeny wadi atxitenyteri, ahãwã-ki.

<sup>24</sup> Adeereny inihe tuu ararybekre. Rybe tÿnydÿÿdu heka õmo rityhynyõtyhy ihãwãreny-ki. <sup>25-26</sup> Tahe iwitxiramy ararybekre. Ibedeu kia raremyhÿu, sõwemy heka rama reamy raremyhÿ judeu sÿ mahãdu. Sõwemy wytese mahãdu heka ramamy rurumyhÿre. Biu heka roaõhykyre tai inataõ beòra weeremyhÿ wahe Sareta hãwã heka Sidõ bedeki tii rasÿnymyhÿre. Tahe Deuxu bede riywinyre Eliasi rakemy iny sohoji wytese-ò, rÿsÿna riwahinykelemy wahe. <sup>27</sup> Eliseu bedeu heka sõwemy tyybinadu rÿimyhÿ. Sohoji inyle riteyteny. Naamy heka inire. Tii heka Siria bede luduõ rare. <sup>28</sup> Kia dohodÿÿna mahãdu heka ibutumy iu tamy rakyananyre. <sup>29</sup> Rimyreny heka Jesuisi. Idi retÿhirenyre hãwãlò ratya-ò ridyreny. Idi rehurenkyemy riwisÿnyreny. <sup>30</sup> Tahe Jesuisi inysõwehekÿy-txi ralore. Idi rahenyre. <sup>31</sup> Iribi tahe Jesuisi rare Kafanaõ-ò, Kalileia bede-ò. Sabado txuõ txuõlemy heka Jesuisi iny ribedeernymyhÿre. <sup>32</sup> Sõwemy heka iny ribedeernymyhÿre mahãdu tamy awimy rÿira, irybe dori awireki wahe. <sup>33</sup> Hãbuõ raremyhÿ dohodÿÿna hetowo-ki tyytybybinahakÿ-di tahe taumywo-ki ratximyhÿ. Tai tahe tii ryryre: <sup>34</sup>—Jesuisi, Nazareludu, aõhebohe ijoi bisÿnykremy atxiteri? Biwahubenykre aõbo? Jiarÿ heka araeryre mobo taté. Kai heka Deuxu deòdu atxiteri. <sup>35</sup> Tai tahe Jesuisi tamy rarybere tyytybybina iumywo-ki riyrykemy. Iribi riòlòdÿÿnyre. Tahe idi rehure iutyde-ò idi iribi ròhònyre. Hãbu aõhe risÿnyõhyre. <sup>36</sup> Ibutumy heka iny ribedeòtiidÿÿnyre. Iny sohoji sohoji widee rarybere: —Aõrybemy aõwe tii rarybereri? Timybo iny-ribi tyytybybina riteònyke. <sup>37</sup> Ibutumy timybo Jesuisi riwinyre, ijynamy reare. <sup>38</sup> Tahe Jesuisi ròhònyre Simaõ heto-ò idi rare. Simaõ riòrelahi webinadumy roire rubuna-di. Tai Jesuisi-ko tuu relyyreny. <sup>39</sup> Tai Jesuisi ibireweribi-ò rare. Tahe irubuna iribi riòlòdÿÿnyre. Tahe tii ritamadÿÿnyre. Rÿsÿnaõ tamy riwahinyre. <sup>40</sup> Ibutumy iny tawebinadu mahãdu didydenyde. Ibutumy Jesuisi riteyteny tibò iratityre rilidimyhÿre. Sõwemy iny tyytybybina-di rÿireri mahãdu riòlòdÿÿnyre. <sup>41</sup> Iu tahe ryrymy reamy rÿimyhÿ: —Kai Deuxu Riòretyhy tate. Tii Jesuisi rierymyhÿ tii Deuxu deòdu raremy, tyytybybina wahe. Tai Jesuisi tamy rarybere rybeòkemy. <sup>42</sup> Txu ijiramy Jesuisi rare bedero-txi ixisohojile. Iny sõwemy riijemyhÿ.



Itxi rearenyre, iatysy deramy rekoamyhÿreny. <sup>43</sup> Tai Jesuisi rarybere tamyreny: —Jiarÿ heka Rybewihikÿ Tÿmyra arelyykre iwitxira hãwã Deuxu Òlona Tÿmyramy arelyykre. Tuu Deuxu diwateõnyde. <sup>44</sup> Jesuisi ibutumy Judeia mahãdu bede bedemy dohodÿÿna rÿiraki rotohodÿÿmyhÿre.

## 5

<sup>1</sup> Jesuisi tahe aho ijà-ki rÿire Kenesare aho ijà-ki. Iny heka sõwemy Deuxu rybe-ò roholakemy iu rÿimyhÿ. <sup>2</sup> Tii robire hãwòò inatximy roinyimyhÿre. Waxidumy mahãdu heka rirahure rià-di risuhòreri. <sup>3</sup> Idi tahe rimyre hãwòò. Simaõ hãwò heka rare. Tii tahe ixidi ritaranyre beroro-ò. Tai tahe tii rexidelenymy relyyre. Kia iny rÿimyhÿ mahãdu heka ribedeerynymy relyymyhÿre. <sup>4</sup> Rexihure rybe-ribi. Idi tahe Simaõ-ò rarybere: —Make wa bera-txi. Rià bitidike. Bimykmemy utura. <sup>5</sup> Tahe Simaõ rirawyònyre: —Wanyrÿ, ruu wa wadireny aõkõhykylemy bedewadireny rareri, uturamy ho aõkõ. Tarybete urenana anakre. Aritidikre heka rià. <sup>6</sup> Tahe ritidireu tahe, rià utura sõwemy rimyre, kia rautxienyre. Tule riykamyhÿ rià. <sup>7</sup> Talawò biòwa mahãdu-ò rryre: —Bòdòibedenyke bidiwawiòhenanybenykemy. Inatxi hãwò heka rÿixire. Ritÿxinyre utura-di. Ihyy berahatxi-ò ijiramy riwisÿnymyhÿ ilawòreny. <sup>8</sup> Simaõ tuu robire. Tii Jesuisi ratximyhÿre tahe tatiowomy resere Jesusiko-txi. Simaõ Pedro rarybere: —Wanyrÿ, aribi kÿny iòhòmy arÿiõtyhy. Jiarÿ heka waðrarudimy rare. <sup>9</sup> Simaõboho bede riòtiinymy rabadewore aõma utura sõwemy tamyreny riwahinyraki wahe. Tii tuu iximy rarybere. <sup>10</sup> Ibutumy tiiboho mahãdu ribedeòtiidÿÿnyrenyre Zebedeu riòre kia Txiau, Joaõ-wana. Jesuisi rarybere Simaõ-ò: —Brebuõmyke heka ikonana-ò heka utura bimyoõkre. Wadee dori maaõmysÿdÿÿnykre hãbu wadee bimykremy. Tamyreny biwatÿnynykre. Iwese utura temymyhÿte wese, wadee hãbu wiji bimykre waerydÿÿna mahãdumy rarekremy. <sup>11</sup> Tahe waxidumy mahãdu ibutumy kaa tawaxi tarià iu ririra Jesuisi riheludunykremy.

<sup>12</sup> Ròirenyre rirònyrenyre ibutumy hãwã-ò. Idi tahe hãbuõ rare ityyjyhykyle. Hãbu Jesuisi robireu tahe resere iko-txi, rexitònyre: —Wanyrÿ, adeewikeki biwateytenykre. <sup>13</sup> Jesuisi tamy tebò ritetemy rarybere: —Kohe, arateytenykre. Tii reytemy reare. <sup>14</sup> Tai Jesuisi rarybere tamy: —Inyò-ò tahe ijyyõmykre. Xiwena wahidÿÿdu mahãdu-ò make. Tai maxiwekre tuu Moisesi bede riywinyre myna. Xiwenaõ heka biwinymy biwahinykre. Moisesi rarybere wese wahe. Iny mahãdu-ò heka biteòsinykre. Kia riteòsinykre teytetamy. <sup>15</sup> Tahe ihãrele Jesuisi ibutumy rieryre. Sõwemy iny heka wirotyre raholakremy. Ijõ nade aõma iwebinaduna ibina-ribi riteyteuykemy. <sup>16</sup> Tahe Jesuisi iribireny aõma rexitònykremy rexitare.

<sup>17</sup> Ijõ txuu ròbedeerydÿÿmyhÿu, fariseu mahãdu, bede ywina rybe bede erydÿÿduò-wana ronymyhÿreny. Ibutu hãwã hãwã-ribi dotydenyde wese tahe sõwerenyre, Kalileia bede-ribi Judeia bede-ribi, Jerusalē hãwã-ribi. Deuxu deytēna Jesuisi-ki ratximyhÿ. Jesuisi hãwãlò-ribi dobehede tii-wana, taerydÿÿna mahãdu-wana wahe. Tahe sõwemy iny iube-ki ributunymy ronymyhÿre. <sup>18</sup> Iny mahãduõ heka hãbu iumymy manadu kididydenykemy ratxireri Jesusiko-ò ritidirenykemy. Idi tahe hãbu webinadu wahe Jesuisi-ò rakemy bede riywinyre. Inatyhyle riathyhyre. <sup>19</sup> Inysõwereki tahe tamy rehemynyrenyõtyhy. Tai tahe hetoratyti-ò raòwònyre hãbu webinadu-di. Iribi tahe diberesedÿÿnyde reroti-di. <sup>20</sup> Jesuisi robire, rieryre aõma rityhynymy ratxirenyreri. Hãbu-ò Jesuisi rarybere: —Wy, aòraru heka raixãwidÿÿnyra. <sup>21</sup> Tahe fariseu mahãdu he widee raryberenyre: —Mobo kia hãbu ratxireri,

timyhe tu kia irybeõna rybe-di. Deuxu-ò kia rybe ibinatyhy rare. Deuxu sohojile òraru-ribi iny riixãwididỹnymyhỹre. <sup>22</sup> Tahe Jesuisi rierymyhỹ timybo rexinohõtinyinmyhỹreny. Tai rarybere: —Aõherekibo kia wesemy texiraykynynterteri. <sup>23</sup> Tibohe irutaõre webinadu-ò rybe: —Aõraruna reixãwididỹnyra ada myimy mariake aõbo. <sup>24</sup> Deuxu Riõre Hãbutyhyhykỹ jiarỹ rare. Tai waruruna wadee Deuxu Riõre òraruna ixãwididỹnyamy. Katahe bierybenykre inatyhymy aõbo rarybereri: —Myike, abyre biwymy asỹ-ò ta mahe. <sup>25</sup> Hãbu tabyre rimymy tahe aõwesele tasỹ-ò rare. Deuxu riwowydynymy rare. <sup>26</sup> Sõwemy iny ribedeõtidiỹnyreny. Riwowydynymy rỹimyhỹ. Tiiboho raryberenyre: —Aõwitxiramy wiji inyboho robirenyra. Tiu juhuu tukõre-ribi wahe robirenyra.

<sup>27</sup> Iribi tahe nieru bede dinodu nieru mynydumy robire, Levi heka inire. Tii heka raaõmysỹdỹnymyhỹ titxibo nieru tarasana-ki. Jesuisi tamy rarybere: —Manakehe wawana. <sup>28</sup> Tahe taaõna ibutumy ririre, idi ihemy rare.

<sup>29</sup> Levi tahe taheto-ki roxinaõ riòlòdỹnyre Jesuisi dee. Tamy rehe-mynyre nieru arisidu mahãdu, tule fariseu mahãdu. Ibutumy iny iarixina mahãdu. <sup>30</sup> Kia fariseu mahãdu kia bederydỹdumy mahãdu tyyritirybedỹdu mahãdu kie heka aõbina binahylemy rarybereri Jesuisimy. Jesuisi terydỹna mahãdu-wana kiamy rarybereny: —Aõherekibo kaiboho teroxitenyteri, nieru arixidu-wana, iòrarudu sõwe mahãdu-wana. <sup>31</sup> Jesuisi rirawyònyre: —Iny awimy ratxireri-wana, òhotibedumy reaõmyhỹre. Webinadu mahãdule ta tuu reamyhỹre. <sup>32</sup> Òbiti mahãdu-ò aõkõ heka jiarỹ anade rybemy. Tiibohole heka ixi-txi tõhõti reakemy idi watxireri.

<sup>33</sup> Tahe tiiboho Jesuisi-ò rarybere: —Joaõ heludu mahãdu roxiõmy txumy rỹire. Tule tiiboho rexitòenyreny. Sõwemy rexitòenymyhỹre fariseu mahãdu erydỹna tule. Tahe aijoi tahe riroximyhỹreny riõmyhỹreny. <sup>34-35</sup> Tahe Jesuisi tamy rarybere: —Hãwymy heridu tỹmyra ijoi ratxikeki heka tiu itobidỹnana mahãdu wahe. Kia heka riroximyhỹke. Kia tahe tỹmyra iribireny ratakreu, iijoi mahãdu renarehekre. <sup>36</sup> Tyky tỹmyraõ tiu tykytyby dòbònamy iny ritidiõtityhy. Timyki dori wii wiòbydỹõna. <sup>37</sup> Vĩ tỹmyra heka tiu aõiròdu tyky watxiwe yla tyby-ò rarareõmyhỹre, tukeki ta kia raykacre idi vỹ urile rejujukre. <sup>38</sup> Vỹ tỹmyra heka hyna tỹmyra-ò rararemyhỹke. <sup>39</sup> Inyõ vỹ tybyhykỹ riõkeki, itỹmyra rexitòenyõtityhy. Kiamyki rybe. Vỹ tyby dori itỹmyra-ribi awi rare.

## 6

<sup>1</sup> Judeu elehydỹnymyhỹreny txu kia idi rekoarenyre maixõmoho-di. Ierydỹna mahãdu rimyra maixõmo, maixõmo, debò-di riroxitytxiwimyhỹ riymy idi rare. <sup>2</sup> Fariseu mahãdu tuu robire. Tamy rỹraxire: —Aõherekibo kia wese tewinyteri. Kiamy heka iwidỹõmyke bede ywina rybe rarybemyhỹre judeu elehydỹnymyhỹrenytxumy. <sup>3-4</sup> Jesuisi tamyreny rarybere: —Ihetxiu Davi tamahãdu-wany rama risareu, Deuxu dohodỹna hetowo-ò rirònyre. Tai Davi xiwena rỹsỹnale taijoi-wana rirỹsỹre. Xiwena wahidỹdudule heka irỹsỹdure, inywitxira ta aõkõ. <sup>5</sup> Jesuisi ritỹnyreny tamy: —Hãbutyhyhykỹ jiarỹ rare, Deuxu Riõre wahe. Kiata sabado wedu jiarỹ rare, elehydỹnymyhỹrenytxu wedu wahe.

<sup>6</sup> Ixityre ralore dohodỹna mahãdu heto-ò ròbedeerydỹkemy. Hãbuõ tai rare tebò rabinamy. <sup>7</sup> Tahe fariseu mahãdu Jesuisi-ò retehere. Riteyteynykemy kia hãbu webinadu judeu elehydỹnymyhỹrenytxu. Rexiwodohonanyre. Kitaxuu tii riwinyrekeki tahe ribinanyke judeu elehydỹnymyhỹrenytxu, riwinykeki wahe. <sup>8</sup> Jesuisi rierymyhỹre aõmybo tiiboho raraykynyrenyteri. Jesuisi tamy ryryre, —Aõma hãbu debòbina-ò: —Mynyike ini, ityareny-txi.

<sup>9</sup> Tahe fariseu mahādu-ò Jesuisi rarybere: —Arỹraxykre inihe adeeremy, awire adee ka hābu debò ariteytenyke sabado txuu. Aōbo adeeremy awire sabadotxu widỹỹ. Aōwihikỹwidỹỹmy aōbo ada aōbina widỹỹmy. Rubu-ò wahidỹỹ aōbo ada rubu-ribi itarasa aōbo. <sup>10</sup> Retehere! Ibutu-ò idi hābu-ò rarybere: —Ebò inihe biditeòsinyke. Tiu hābu tebò riteòsinyreu tahe, reytete.

<sup>11</sup> Rebureremy heka. Timybo Jesuisi risỹnyrenykeny rexinohõtinyreny.

<sup>12</sup> Idi tahe Jesuisi heka hāwālòraty-ò rare ixitòedỹỹmy Deuxu-ò. Rureherehemy heka tamy rexitòenymy bede idi rỹire. <sup>13</sup> Txuijaramy tahe ludu mahādu-ribi waòinatxi reurò taheludutyhy mahādu ritare. Tarybemy rybedumy rininireny. <sup>14</sup> Sohoji ijō heka, Simaō inire, Pedromy idi ranire, ijō tahe Andre rare, iseriòre. Idi Txiau, Joaō, Filipi, Bartolomeu. <sup>15</sup> Mateu, Tome, Tadeu Txiau, (Kia Txiau heka Afeu riòre rare.) Ijō Simaō Kana bedeluduō rare, tasubedeluudure. <sup>16</sup> Juda Txiau riòre, ijō Juda Isariò tahe Jesuisi tyhedỹỹdu rare. <sup>17-18</sup> Jesuisi dobehede bedero-ò hāwālò-ribi. Tahe sōwemy iny iheludu mahādu tii-wana rỹimyhỹ. Judeia bede mahādu Jerusalē hāwā mahādu. Tule Kalileia bede, Tiro hāwā, Sidō hāwā mahādu. Tiiboho wii ributunymy hāwā mahādu Jesuisi-ò roholakemy idi reytekemy. Kia tai ròteytedỹỹmyhỹ. <sup>19</sup> Ibutumy Jesuisi tyky-ò tamy adereximy risỹnymyhỹre adeytena iribi ròhònymyhỹ.

<sup>20</sup> Tamyreny retehere tai ibutumy rierynanyreny: —Kaiboho aōkōreny-ki, beysabenyke. Deuxu Òlona dori ahōrōreny rare. <sup>21</sup> Rama arasareri-wana beysabenyke. Bihydumy dori mabekre. Tule tahinyteri wana beysakre ihewo-ribi. <sup>22-23</sup> Beysamy butxuenyke, inyō umy radònykeki tule. Kaiboho dori Deuxu Riòre tetyhinytenyete jiarỹ tiire, Hābutyhyhykỹ Riòre wahe. Kia mahādu eramy ijira Riòre rỹikeki beysake. Beysa tyhyki tai. Biu-ki dori aōwihikỹ bitakre. Deuxu rybemy rybedu mahādu tule rotỹỹnyreny iòraru-ki. <sup>24</sup> Kobe làhàxe kaiboho ityhy mahādu abedesanareny dorihe rexihura. <sup>25</sup> Kobe làhàxe ahàdyreny mahādu, aramasanareny dori rehemynyre. Kobe làhàxe abedesareny, ahinanareny dori abrunareny rehemynyre. <sup>26</sup> Kobe làhàxe atyhydỹỹ sōwereny tule dori. Ilabiereny rybemy rybedutyhy aōkō rityhinyreny.

<sup>27</sup> Warybe-ò taholatenyteriki inihe ararybekre. Aòludu luummy atxibenyke amykyaradureny-di, awimy idi mabeke. <sup>28</sup> Ibinamy aōma umy rarybekeki aōbinahakỹ riwinykeki, tamy bexitòenyke Deuxu-ò. <sup>29</sup> Aòsỹny-ribi anahatenykeki iyre-ribi iwyòdỹỹmy tamy bexirahòreke. Inyō atyky riwykeki tule tamy arahana biwahinyke. <sup>30</sup> Iwese aòtxiu aōna inyō adee rexitòenykeki, tamy biwahinyke ixyby iribi iwydykòkemy. <sup>31</sup> Aōbina inyō adee riwinykòkemy atximahāte. Iwese tiu kia aōhòkỹmy inyō isỹdỹỹòmykre. <sup>32</sup> Kai aluu mahādu sohojile iluuòmyke; òrarudu mahādu dori tuu rỹimyhỹre. <sup>33</sup> Kai aery mahāduòle tawotòemahāte, timyki Deuxu-ribi aō atarasaōna. Iny itxỹte iehehe mahādu dori widee rawotòemyhỹre. <sup>34-35</sup> Òrarudu mahādu heka widee rihuòtemyhỹre. Iribi tahe iwesele ixiby kidiwykemy idi riwisỹnymyhỹ. Kai ta buhuòtemyhỹke idi tehuòtete ixyby iraròsòkòmyke. Tukòkeki ta Deuxu-ribi aō atarasaōna. Aòludu luummy atximahābenyke. Tai Deuxu-ribi aōwihikỹ bitakre. Tai Deuxu wihikỹ riòremy mabekre. Tii dori inywi-ò inybina-ò awire. <sup>36</sup> Awimy kaiboho boibeke, iwese boreny awimy biu-ki ratximyhỹre wese. <sup>37</sup> Inyòdee kyarakòmyke tai Deuxu adee rakyarananyheny. Inyō taòraruna biixāwididỹỹnyòkeki, Deuxu tahe aòraruna riixāwididỹỹnyòke. <sup>38</sup> Ainytyhyke inyòdee imyna Deuxu adee rainytyhynanyhykre. Deuxu ibutumy aōwi adee riwahinykre. Tiwesebo tòwahite wesemyna idi Deuxu adee ròwahikre.

<sup>39</sup> Aõmybo ribedeerynyre ijyyõmy relyyre: —Inyõ ruetà heka riwiðhenanyõtyhy iwitxira iny ruetà. Tukeki heka hãloo-txi wiwana resekre. <sup>40</sup> Ierysýdýý iòrysýdýýdu, kia ratyre aõkõ ratximyhý. Kia uladu ratyyritinyre nihikýmy tahe erysydu tiu taerysydýýdu ratyre ratxiõmyhýre. <sup>41-42</sup> Òwòrukre nihiký aruety-ki roire. Aõherekibo aseriòre ruety-ribi òwòru rýnysiõ tarasamy tewisýnyteri. Kia heka itxenadýýdu tate. Juhuu òwòrukre aruewo-ribi bitakre. Idi tahe betehemy iruewo-ribi aõsõmo bitakre. <sup>43-44</sup> Òwòru wihiký tiu bederaty binaõ riwahinyõhyymyhýre. Tule òwòru binahaký bederatywimy raratynyõmyhýre. Òwòru raerymyhýre iraty-ò itxere rýimyhýreu, beraty-ò retehemy awire ada ibinare aõbo beraty-ò retehemy awire ada ibinare aõbo. Figoraty uvaraty tiu iwitxira òwòru-ribi raheõmyhýre. <sup>45</sup> Hãbuwi heka aõwimy rotýýnymyhýre iwo-ki tuu rýimyhýremyna. Tule hãbu bina aõbinamy rotýýnymyhý iwomy tuu rýimyhýremyna aõbina bina. Inyõ dori aõmy raraykymyhýremyna rarybemyhýre.

<sup>46</sup> Kai rarybere boholaõkeki aõbo biwinykeki. Uritere wanidýýõmy. Wanyrýmy tiwaninimyhýtenyte tahe warybemynamy atxõhyylemyhýtenyte. <sup>47</sup> Tiwese hãbu warybe riywinyre wese adee ararybekre. Tiu heka ariteòsinykre. <sup>48-49</sup> Hãbuõmy akoreny arelyykre. Tii warybe-ò roholare idi imynany rotýýnyre. Tii kiata taheto riwinyre manadelemy ria-di. Beòra iheto reseõhyre manatyre-ki relereki wahe. Ikõmyta warybe-ò roholakõre, kawese rotýýnyre. Taheto uritere sukile riwinyre. Beòrau ta, urile resere. Ikyhynakõreki wahe. Kiamyta rotýýnyre warybe tyhydýýdu-ò idi ityhydýýdukõ-ò.

## 7

<sup>1</sup> Jesuisi tarybe rahu-di tahe Kafanaõ hãwã-ò rare.

<sup>2</sup> Tai Roma soldado dinoduõ tai ihýmyhý. Teòduõ tahe binamy irubu iòhõmy roimyhý. <sup>3</sup> Soldado dinodu Jesuisini-ò roholareu tahe, iòrysomy rarybere. Taita judeu mahãdu kia matuariõ rexitòenyre aõma kididykremy riteytenykremy kia webinadumy roireri. <sup>4</sup> Tahe Jesuisi nade juhu be kiamy Jesuisi rarybere: —Ka hãbu heka awi biwiðhenanykre heka. <sup>5</sup> Ka hãbu heka waijoi luu nihiký rare ihyymy ta dohodýýna hetoõ riwinyre waijoi-ò. <sup>6-7</sup> Tai tahe Jesuisi rare tiiboho-wana. Tehemyny sý iòhõmy rare. Idi tahe ryrowetyakile Jesuisi-wana wii riòbonyre. Aõma soldado dinodu kia biòwa-ò wahe. Rarybere he aõma soldado dinodu kiamy rarybereri: —Noõmy heka. Ihãrele teka awimy rareòle heka bedehe mynyke. Awi tate timy heka anaixiranyõtyhy dori raixýruwýhýre alau adee ixitòedýý-ò aõma dori adee rybe rýikekile aõweseleke wadeòdu kia reytemy reake. <sup>8</sup> Jiarý dori inydee radýýdu jiarý rare. Aõbo riwinykemy. Kia riwinyre warybemynale kia heka jiarý rare. Wadeòdu-ò rarybewãhãraki heka: —Kia biwinybenyke. Riwinymyhýrenyre. Kai tule marybeke, beyteke. Tahe aõwese reytemy reake. Robedeòtiidýýnyre, kia tuu rarybereki wahe. <sup>9</sup> Jesuisi ròkesereri kia rarybemyhýò wahe: —Jiarý ka tiu judeu mahãduy-ki. Hãbuõmy rabiõ watyhydýýnamy. Rabireri riwatyhynyreri rabireri. <sup>10</sup> Soldado dinodu deòdu ròkesereri. Ixyby reytereri idi ronyre.

<sup>11</sup> Jesuisi rare terydýýna mahãdu-di ijõ hãwã-ò. Naí hãwã-ò heka rare. Kiemy rahyymy heka rahyyre. Sõwemy iny iheki rare. <sup>12</sup> Hãwã ijò-ki rehemynyreu tahe kia ibutumyle rehemynyre. Sõwemy iny rubudu rareò wabede-ò. Weryrybòò rurure. Ise, wytese, heka iriòre sohojihyylere. Iny sõwemy heka riheludunyre tahi-di taibru-di. <sup>13</sup> Tai Jesuisi tuu robireu, idi rexiwòtenymy kamy rarybere: —Ibrukõmyke! <sup>14</sup> Jesuisi debò ritidire caixaõ-ò. Iu idi itxyydu ruhurenyre. Idi tahe rarybere: —Weryrybò,

bexixake wahe. <sup>15</sup> Weryrybò rexixamy reamy ronyre. Idi rarybere. Tai tahe Jesuisi ise-ò riwahinyre. <sup>16</sup> Ibutumy tasỹ mahãdu ribedeòtiidỹdunyre. Tai tahe Deuxu riwowydynymyhỹreny: —Ebe, aõherewe, Rybedu nihikỹ kỹnyhe wixijumy inydeereny rehemynyre. <sup>17</sup> Kia taheka bede bede hãwãmy Jesuisini reare.

<sup>18</sup> Joaõ heludu mahãdu ibutumy tuu relyyre iko. <sup>19</sup> Inatxinareny Joaõ riteõnyre Jesuisi dỹraxy kamy wahe: —Kaiwe nodu aõbo tate, ada txio aõbo ini nodutyhy ariraðrenykre? <sup>20</sup> Idi Jesuisi-ò ròirenyre tuu itỹraxydỹmy; —Kai we nodutyhy tate? Ta txio aõbo ini ijõ ariraðrenykre? <sup>21</sup> (Iu ta Jesuisi yla aõkõ webinadu, binanamy binana mahãdu riteytenyra, tyytybybinamy ykydu mahãdu, iruetà mahãdu sõwemy tule.) <sup>22</sup> Irahu-di ta Jesuisi rarybere Joaõ ijoi-ò: —Bòõsebenyke. Ibutumy kamy tabitenyta taholatenyta Joaõko-ò tuu belyybenyke: —Iny ruetà bina mahãdu retehererimy, Iny rutiàre mahãdu rariarerimy, tyybinamy binana mahãdu reytererimy, iny nohõtity mahãdu roholarerimy. Iny rubu mahãdu heka rubu-ribi rexixarerimy, urimynodu mahãdu heka Rybewihikỹ Tỹmyra-ò roholarerimy. <sup>23</sup> Iny bedesa heka rare, warybe tyhydỹdu mahãdu.

<sup>24</sup> Joaõ heludu mahãdu iribi ròhõnyreu tahe Jesuisi rarybere Joaõ bededỹnanamy: —Aõmybo wahe Joaõ-di tõiõtinytenyete aõmy tubedi nohõtinyrenyre tamy itxerena bederahy tõiõtenyete wahe. Otxirade wese yhy-ki idi tahõtinytenyete. <sup>25</sup> Aõma hãbu urimynodutyhy aõbo tahõtinytenyteri. Hãbu tyywihikỹdiremy tahe tahõtinytenyete. Iwese iòlò taheto wihikỹ-ki ratximyhỹre wesemy aõbo tahõtinytenyteri. <sup>26</sup> Wadee manarybeke aõbo betehemy tahõtinytenyteri. Deuxu rybeduõmy aõbo tahõtinytenyete. Inatyhy tii rare. Kia ratyre heka tii rare. <sup>27</sup> Aõma dori tyyriti-ki rarybemyhỹre: —Tii heka wakoki kadehemynykemy ratximyhỹre, tamy relyykemy, ryõ riywinymyhỹre.

<sup>28</sup> Inatyhy kaa rare. Tie heka ibutu hãbu ratyre ratximyhỹre. Ihãrele tahe inyõ Deuxu iòlõna-ki ratxikeki heka iratyre ratximyhỹre. <sup>29</sup> Tahe nieru butudỹdu mahãdu kia-ò roholare. Tule sõwemy iny kia-ò roholare. Tiiboho Deuxu bede ywina tyhydỹdu mahãdu roire. Tule Joaõ Sebedỹna mahãdu roire. <sup>30</sup> Fariseu mahãdu tahe, bede ywina erydỹdu mahãdu tahe Deuxu-deewina dera rare. Tai Joaõ-ò ratisebemy roiõtyhy. <sup>31</sup> —Mowesebo heka wijinabõdu mahãdu wesemy ratxireri. <sup>32</sup> Uladu mahãdu wesemy tiiboho ratxireri. Tiiboho ijõ uladu mahãdu-ò rryrymyhỹre: —Inyboho rawiunyre, tahe kaiboho teseõtyhy. Wobina wiu rawiunyre tahe kaiboho tahinyõtyhy. <sup>33</sup> Joaõ Sebedỹdu renareherenyõmy rỹire, vỹ riõõre. Ihãre tahe kaiboho tarybete: —Tii tyytybybina-di ihỹre. <sup>34</sup> Hãbutyhyhykỹ jiarỹ rare, Deuxu Riõre wahe. Jiarỹ reroximyhỹre tule reõmyhỹre. Tai tahe tarybemahãte jiarỹ wabyre nihikỹlemy wamomohõkỹremy. Jiarỹ riki òrarudu liinatyhy heka jiarỹ rare, nieru tarasadu liina wahe. <sup>35</sup> Ihãre tahe aõikõkõlemy heka taraykynymyhỹtenyete ihãre taheka õbitilemy ixi-di tahõtinyamahãtenyete.

<sup>36</sup> Fariseu mahãduõ heka Jesuisi ritobinyre taheto-ò roximy. Jesuisi tahe rare idi ronyre roximy. <sup>37</sup> Kia hãwã-ki tahe hãwyyõ rasỹnyre, wydena wahe. Tii heka Fariseu heto-ki riroxirerimy roholareu, tii tule rare. Tahe hyna õwyhykỹ rimyre. Alabastro aderõnahynani rare. <sup>38</sup> Hãwyy tahe Jesuisi hewomy ronyre, iõhõmy. Tahe aderõna ritxiwire iwatyre. Tule iwa-ki ruworuwõmy ratximyhỹ irube-di iwa risuhõra idi irade-di rabunyre. <sup>39</sup> Fariseu kiamy robireu, ixideele rarybera: —Kia hãbu Deuxu rybeduõ aõkõ rare. Tuukeki tii hãwyy rieryke aõhãwyybo tii ratxireri. <sup>40</sup> Jesuisi tahe fariseu-ò rarybere: —Simaõ, adee ararybekemy watxireri. Simaõ

tahe rarybere: —Manarybeke Waerydÿÿdu! <sup>41</sup> Tahe Jesuisi rarybere: —Nieru huòteduõ heka inatxi hãbu-ò nieru riwahinyre. Ijõ 500 rihuòtera, ijõ tahe 50my rihuòtera. <sup>42</sup> Idi tahe hãbu inatxi nieruõhyymy rÿire òðemy tanieru tamy. Tai tahe nieru huòtedu riwotòenyrenyre tahe ritusanyre, wiwana iòwy riixãwididÿÿnyre. Tibo huòtedu ilàhãnadÿÿdu tyhyre. <sup>43</sup> Simaõ dirawyònyde: —Kia òsana 500my rihuòtere. Tahe Jesuisi rarybere: —Inatyhy rare. <sup>44</sup> Jesuisi tahe hãwyy, riijemy, tahe Simaõ-ò rarybere: —Kahãwyy ini bidiijeke. Jiarÿ nadehemynydeu, tii tarube-di wawa risuhòra. Kai beeõ tadiwyòte. Tii tarube-di riwawasuhòra. Iu tarade-di riwawarabunyra. <sup>45</sup> Kai tiwawehityhynanyòte rehemynyrau, tii tahe riwaatyõhyymy ratxireri. <sup>46</sup> Kai warade-ki òlÿre tetxiwiòta tii tahe aderòna wawatyre-ki ritxiwire. <sup>47</sup> Tai tahe adee ararybekre. Tii inatyhymy waluure. Taòraruna ixãwidÿÿna-ki. Inyõ iòraruna ibutemy raixãwidÿÿnymyhÿreki, tii inatyhymy aõkõ taòraruna ixãwidÿÿdu luure. Ijõ tahe inatyhyhykÿlemy taòraruna ixãwididÿÿdumy reamyhÿre. <sup>48</sup> Tai Jesuisi hãwyy-ò rarybere: —Aòraruna reixãwididÿÿnyre. <sup>49</sup> Tai roxidu mahãdu widee raryberenyre: —Mohãbubo kia rare? Tii òraruna riixãwididÿÿnyrerimy. <sup>50</sup> Tahe Jesuisi hãwyy-ò rarybere: —Atyhydÿÿnamy textitarasadÿÿnyte aòraruna sòwe-ribi biu-ò hena tetateri. Mata hÿny.

## 8

<sup>1</sup> Rexideleny raremyhÿ ralòralòmÿ hãwã hãwã ikòkòmÿ reamy rare kia aõma Deuxu Rybewihikÿ Tÿmyra relyymy rare. Tai ierdÿÿna mahãdu waòinatxi reuròmÿ idi ròirenyre. <sup>2</sup> Tule hãwyyõ tiiboho wana ròirenyre Ijõta Marie Madalena heka rare. Juhuu tahe tyytybybinahakÿ-di raremyhÿ. Idi debò inatxi reuròmÿ tyytybybina iribi riòlòdÿÿnyre. <sup>3</sup> Ijõta Joana Kusa hãwyy rare. Tii iòlò Herodí heka aõmysÿdÿÿdu heka rare. Tule ijõ hãwyyõ Susana inire. Idi tule ihona hona Jesuisi taijoi-wana ibutemy tanierureny-di ri-wiòhenyrenymyhÿre.

<sup>4</sup> Idi iny sòwemy titxiribibo dirahude kia-ò. Kia mahãdu-ò heka Jesuisi ribedeerynyre ijyyòmÿ. <sup>5</sup> Alòbòròna-di dehuudu heka ròhònÿre taoworu-ò. Alòbòròna-di imahãdu ijõ ryro-txi resere. Tai heka iny rariamyhÿre alòbòròna tyre-ki. Nawii tule tuu riroximyhÿ. <sup>6</sup> Mana rotysu-txi ijõ rejuxunyreri mana rotysu-txi suu dori ibututere tai tahe iraruxiòlemy raumynyre. <sup>7</sup> Ijõ tahe edey-txi resere. Raumynyreu tahe edemy riòhÿtÿnyre. <sup>8</sup> Ijõ resere suwi-txi. Tai ta raumynyre idi sohoji alòbòrònaty-ribi 100my raratynyre. Jesuisi tamy rarybere: —Kaiboho òhòtirenidykeki heka inatyhymy warybe-ò boholabenyke.

<sup>9</sup> Tai tahe Jesuisi-ò rÿÿraxinyrenyre: —Aõwe kaa tekewesenanyteri? <sup>10</sup> Jesuisi rirawyònyre: —Kaiboho heka teerytenyde aõbohe wasimy ijyy rare Deuxu dori adeereny ritÿnynynyre. Kia tahe rare, Deuxu Iòlòna aõmydÿÿnana wahe. Ijõ iny-ò tahe rarybere ijyy-di relyyre.

Tai robikre tahe, rieryòtyhyke. Roholarenkyre tahe rieryòtyhyke, timybo juhoo Deuxu rybemy rybedu mahãdu rarybere wese.

<sup>11</sup> Aõmybo kia aõijyybo kia rare wahe. Alòbòròna heka Deuxu Rybewihikÿ wese rare. <sup>12</sup> Ryro-txi resere heka ijohonadu wesemy rare. Deuxu ijyy heka resera ede sòwey-ki. Tii heka Deuxu Rybe-ò roholamyhÿre mahãdu wese rare. Idi tahe Satanasi heka ritamyhÿre iworeny-ribi. Tai rityhynyrenykòmÿ idi biu-ò rahenyòkremy. <sup>13</sup> Ijõ tahe manasuõ-txi resere heka, kia Deuxu Rybe-ò roholamyhÿre mahãdu wese rare. Rybe-ò juhoo roholamyhÿre deysana-di rityhynymyhÿre. Kia manatyre resera heka irarutiòhykre. Iny mahãdu wese heka rare. Idi ikyhynakòreki, iwodelòlòtòmòreki urile tatyhydÿÿna

riatymyhÿre. <sup>14</sup> Ijõ tahe edesuyky-txi resere heka, kia Deuxu rybe-ò roholamyhÿre, idi iworekena sõwemy, iaõdelòlòtõmomy, idi ityhyna wahe urile riòhòtÿnymyhÿre. Tai ròwiðhenadÿÿõhyymyhÿre Deuxu tyhydÿÿna-ki. (Kia tahe alòbòrònaõ ede yky-txi resera tahe iny umy wixira wesemy heka rare. Iny umy tyhyna idi ratxireri heka kia wesemy kia ede-txi iny reseremy. Aõma kia inytyhyna ratxireri. Tiu heka ityhydÿÿna riòlòdÿÿõtyhy. Kia alòbòròna tahe tai heka rokuõtyhy.) <sup>15</sup> Kia ijõ alòbòròna suu witxi-txi reserá tasÿ iwixira inywesemy rare. Kia ijohonadu aõma rierymyhÿre. Irayky-ò ralòmymhÿre. Kia iwotyhywo-ò òbitimy ratxirerí tahe, òbitilemy aõ riwinymyhÿre. Iwese kia alòbòròna sõwemy ratyy rawahinyre wese tahe tii rare. <sup>16</sup> Ijõ ijyy tahe kiamy roire. Uritere inyõ loosònaõ rideõmykre butxi rawo-txi ada herina rawoõ-txi aõbo. Loosòna bidekre bedewiõ-ò. Tai tahe ibutumy bede ritoosònanykre. <sup>17</sup> Aõ heka tai wasimy ratxiõhyymyhÿre. Aõutxumy dori ibutumy erynamy rarekre. <sup>18</sup> Tahe bexijebenykre ijohona-ò. Kia sõwemy idi rÿirerimy ihÿre heka sõwemy rimykre. Kia urihimyò iwo-ki rÿireri heka iribi ritakre. Idi ibutumy rÿireri heka iribi ritakre. Urihimyò iribi iny ritakre. Urihimyò iwo-ki rÿireri heka hulemy iribi ratakre.

<sup>19</sup> Jesusise, tariðreboho tamy doide. Tii ròbedeerydÿÿmymhÿki isirare tamy dehemyssÿ iny sõwe òraru-ki. <sup>20</sup> Tai inyõ Jesuisi-ò rarybere: —Adihe wa aseriðre boho hewa ahanakile ratxireri umy robikemy ratxirenyreri. Ade rarybekemy. <sup>21</sup> Tai Jesuisi rarybere: —Waseriðre wa kia Deuxu rybe erydÿÿnaõ rare. Kia tamy roholamynyrele heka rityhynymyhÿrele heka nadi wesele rare. Tii-wana iwese waseriðre wesele rare.

<sup>22</sup> Iribi tahe hãworo rorukurenyreu Jesuisi rarybere: —Ròkòireny kanawe-ribi ijà-ò. Idi tahe roirenyre. <sup>23</sup> Jesuisi ròrõmy tòru-ki. Idi tahe yhynihikÿ òbònihikÿ-wana tamyreny reare. Ruberurenyre tiibohe rÿmyrenyke lau. <sup>24</sup> Tai tahe wylemy riixixanyreny: —Erydÿÿdu, Erydÿÿdu rekekoarenykre berahatxi-ò. Idi Jesuisi donymy deademy tahe yhy dee rarybere: —Biyryke, Biyrykewa. Yhy ruhummy resere. Òbò tule ruhummy ibutumy riyryre, iny rurukre. <sup>25</sup> —Kaiboho tiwexe ainatyhynareny? Tiibohe rabedeòtidÿÿmy ruberumy widee raryberenyre: —Aõhãbuwe kaa rare. Yhyhykÿ dori òbò dori irybemy reòbyreri.

<sup>26</sup> Kanawe-ribi ijà-ò rehemynyrenyre Kerase bede-ò kalileia aho weribi-ò. <sup>27</sup> Hãbuõ heka tamyreny dobehede hãwãhãkÿ-ribi tamyreny dobehede. Tiibohe riòtyròny hãwãro-ribi iu ta tyytybybina-di ratximyhÿre hãbu tiu rexityynyõhyymyhÿre tatyy-di hyymyhÿre. Kiamy wabedekihyyle ratximyhÿre. <sup>28</sup> Jesusimy robireu tahe bedetxile resere tairy-di ryryre: —Aõhebo biwasÿnykre Jesuisi. Kai Deuxutyhy Riðre atxiteri. Uritere aõhòkÿmy wasÿdÿÿõmykre. <sup>29</sup> Tahe Jesuisi heka tyytybybina iribi riòlòdÿÿnyre. Sõwemy dori riuwinyre hãbu rimymyta. Riuwinyre idi rihure. Tai heka tii uritiere womati reroti-di ritaataamy riijemyhÿre. Ihãre tahe ixi-ribi riòròmymhÿre. Tai bedero-txi reamymhÿre tyytybybinamy rawonummy. <sup>30</sup> Idi tahe Jesuisi rÿÿraxire tamy: —Mobo anire? —Sõwemy wanire. Tyytybybina sõwemy dori tuu rexikykyreki. <sup>31</sup> Tiibohe raryberenyre: —Uritere bedebinahakÿ-ò wateòdÿÿrenyõmykre. Uritere sÿu-ò noõma rarekremy hãlootxi-ò. <sup>32</sup> Iu tahe ixÿni juramy riroximyhÿ hãwãlò-ki. Tai tyytybybina mahãdu Jesuisi-ò rarybere: —Biwateònyõke. Kowa ixÿnijura-ò biwateònybenyke aralorenkykremy. Tai Jesuisi riròtenyrenyre. <sup>33</sup> Iu kia hãbu-ribi tyytybybina ròhònyrenyreu tahe ixÿniwo-ò ralòreki wahe. Raòlònyra ijò-di rejuxunyre taraò wahe. Ibutumy ahoro-txi rejuxunyre. Ibutumy rururenyre berahatximy. <sup>34</sup> Ixÿni-di itxeredu mahãdu ibutumy raijiranyra hãwã-ò tule relyyrenyre tuu iny rasÿnymyhÿre

mahādu-ò. <sup>35</sup> Tai iny dirahude tamy itxeremy. Idi tahe rare Jesuisi-ò. Hābu robimyhỹrenyre tatyky-di rononymhỹ ibutumy rexiywinymy Jesuisi-ribi iòhòmý ronyre. Kia iny mahādu heka sōwemy ruberure rabedeòtidỹnyrenyhỹre. <sup>36</sup> Ibutumy relyyre. Kia tyytybybina timybo aõhebo rotỹnyrenyhỹre. <sup>37</sup> Kia Kadara bedede ludu kia mahādu tahe rexitòenyre Jesuisi-ò iribi ròhònykremy, ilau ruberurenreki wahe. Idi tahe Jesuisi ròkòsere ixybyle reare hāworo-ò. <sup>38</sup> Hābu tahe rexitòenyre Jesuisi-wana rakremy, kia tyytybybina-di iwo-ki ratximyhỹ wahe. Tamy rarybere: <sup>39</sup> —Aõkõre bøkese aheto-ò. Ibutumy belyyke aõbo adee Deuxu riwinyrenyhỹre. Tai ta ibutumy hāwā hāwā-ò relyyre aõhebo Jesuisi risỹnyrenyhỹre.

<sup>40</sup> Kia iny sōwehekỹ mahādu heka teysa-di rimyre ridyrenyhỹre riraòhyymy ratximyhỹrenyhỹre. <sup>41</sup> Kia hābu dohodỹnyrenyhỹre hetowo erydỹnyrenyhỹre tahe nade Jesuisi-ò. Tii heka dohodỹnyrenyhỹre dinoduõ rare. Ijairu inire Jesuisi-ò sutxi resere: —Mynake wasỹ Jesuisi <sup>42</sup> Jiarỹ wa wariòre sohojile rare waòinatxi reuròmý iwyra. Tii ka rurukremy roireri. Idi ta Jesuisi rare isỹ-ò. Sōwemy iny Jesuisi riheludunyre.

<sup>43</sup> Hāwyyõ raremyhỹ heka hāwyy webinadu rare iòhò Jesuisi rexisỹny waòinatxi beòramy heka idi ròhònyre hykyky hālubu ratxireri. Tiu heka inyò reteytenyòhyymyhỹre luahidỹnyrenyhỹre, òhotibedu mahādu he risiranyre. <sup>44</sup> Tai tahe Jesuisi tykysi-ò reare. Tai ta aõwesele reytemy reare. <sup>45</sup> Jesuisi rarybere: —Mowe watxi reare? Ijõ rarybereri: —Erydỹnyrenyhỹre mahādu aõkõre, jiarỹboho aõkõre. Pedro rarybere: —Aõheta sōwe iny kaki rỹireri. Timykibo tuu tỹnyrenyhỹre. <sup>46</sup> —Jiarỹ dori reeryre. Mobo watxi rearaule reytera. <sup>47</sup> Tiihe hāwyy ratxiremyhỹ ramytatamy. Tamy ramytatamy heka tamy rehemynyre. Iòraò rexibedenyre. Ibutumy iko tuu relyyre. Aõherekibo itxi reriramy. <sup>48</sup> Tai tahe Jesuisi tamy rarybere: —Lerỹ, atyhydỹnyrenyhỹre myna teyteta. Ta bexiywinymytahỹny maa!

<sup>49</sup> Kie raryberemyhỹwanale tasỹ iny wixiraõle dehemynyde. Kia aõma dohodỹnyrenyhỹre wedu heto-ribi dehemynyde. Ijairu-ò rarybere: —Ariòre wa rurura. Uritere ta òhotibedu-ò ijiraõma ixinamy tii rakre. <sup>50</sup> Jesuisi kia-ò roholareu tahe Ijairu-ò rarybere: —Urile bityhybenykre. Breburenyõma tii reytekre. <sup>51</sup> Tii rehemynyre heto-ò. Jesuisi ralòre iny deramy reare. Tii wana rake lau. Kia uladuse, uladutyby, Pedro, Txiau, Joaõ wana kiale ralòre tamy tiiboho wana. <sup>52</sup> Ibutumy rasỹbinamyhỹ Jesuisi rarybere: —Ibryrenyõmyke hewa rurumy aõbo roire, urile ròròmý roireri. <sup>53</sup> Ibutumy rieryrenyreri tiiboho urile tai idi risinyrenyre rurumy roimyhỹki. <sup>54</sup> Jesuisi ihāre ta hirari debò-ki rimyre. Tai tahe idi rarybere: —Hirari, bexixamy, bodonyke. <sup>55</sup> Ityytyby aõwesele ixityre tamy ralore. Dexixade, donyde. Rỹsỹna hirari-ò riwahinykemy Jesuisi rarybere. <sup>56</sup> Tai tahe tybyboho sōwemy rabedeòtidỹnyrenyhỹre rabedesarenyre. Jesuisi rarybereri: —Urile wamy ijyyrenyõmykre. Aõbo adeereny rewinyramy.

## 9

<sup>1</sup> Jesuisi tahe tawaòinatxi reurò taerydỹnyrenyhỹre mahādu ributunyre. Taruru tamy riwahinyre tyytybybina iny-ribi ritakremy. Tule iny webinadu mahādu riteytenykre. <sup>2</sup> Tule rarybere tamyrenyhỹre: —Kaiboho belyybenykre Deuxu kia Iòlònamy tule webinadu biteytenybenykre. <sup>3</sup> Aõ awanareny wydyrenyõmykre debòna aõkõ, aõna hyna tule aõkõre. Tule rysỹnake aõkõ, nieruke aõkõ. Ainatxityyke aõkõkre. <sup>4</sup> Hāwā-ki hetoõ-txi malòkeki taile bonykre. Hāwāribihyyle bòhònykreu, kia heto-ribi bexitakre. <sup>5</sup> Ibinamy aramyrenykreki, urile bixitakre. Idi òlòna-ki, awa bitòtynykre ibinamy tai



tahatenytaki. <sup>6</sup> Tiiboho ròirenyre hãwã sômo sômo-di Rybewihikÿ Tÿmyramy relyyrenykemy ròirenyre. Tule iny webinadu ibutumy iteyteynyreny hãwã hãwã-di.

<sup>7</sup> Idi tahe iòlò Herodi ibutumy heka aõna aõna rierymy ratximyhÿ. Tai tii bede ryy rieryõhyomy ratximyhÿ aõbo riwinykre. Roholamyhÿre heka iny rybe rybe-ò. Joaõ heka rexixamy ratxireri. <sup>8</sup> Ijõ tahe kiamy rarybereri: — Eliasile ratxireri. Ijõ rarybere Deuxu rybemy rybeduõ ratxireri. <sup>9</sup> Tai tahe Herodi kiamy rarybereri: —Jiarÿ heka Joaõra resymy rewahinyre. Mobo ratxireri iwese Joaõ raremy wese he ratxireri. Moobo ta kiamy raholamy watxireri. Tai Herodi tuu robikemy riwisÿnymyhÿ.

<sup>10</sup> Jesuisi eryna iko relyymyhÿreny ibutumy aõbo aõhebo rotÿÿnyrenyremy tabededÿÿnana. Jesuisi riòlònyrenyre ijõ hãwã wixira-ò, Besaida hãwã-ò wahe. <sup>11</sup> Tai iny sôwemy hekÿ rieryõlemy idi ta rieryreu tahe sôwemy ihemy rare roirehe. Jesuisi he ributumy ikole relyyre. Deuxu Iòlòmy relyymyhÿre. Tai ròteytedÿÿmyhÿ webinadu mahãdu. <sup>12</sup> Aõtxu tahe katxioromy Jesuisi eryna mahãdu, waòinatxi reurò mahãdu tamy raryberenyre: —Bede biywinyke ibutumy iny rÿireri hãwã-ò tarÿsÿna õbradÿÿmy. Inyboho dori bedero-ki ratxirenyreri. <sup>13</sup> Tahe Jesuisi rarybere: —Kaibohole rÿsÿna biwahinybenyke. Rirasÿnyrenykemy ierydu mahãdu diwyònydenyde: —Aõheretahaka, iruyre orotxu idi inatxi uturale heka roireri. Aroikemy aõbo wadireny atxiteri rÿsÿna õbradÿÿmy inysõwe-ò. <sup>14</sup> Txibo 5000 hãbu sôwemy heka rÿimyhÿ. Jesuisi rarybere: —Bihitxinybenyke 50 iny heka iny bisÿnybisÿnybenyke. <sup>15</sup> Tii myna ieryna mahãdu rotÿÿnyrenyre. <sup>16</sup> Idi tahe Jesuisi utura inatxi, orotxu iruyre rimyre. Biu-txi reteheremy rexitòenyre. Deuxu reàlãre tamy rexitòenymy riyreyrenymy riwahiny taerydÿÿna mahãdu-ò. Riwyrenyre tahe riwahiriwahinyrenymy idi roire. <sup>17</sup> Ibutumy riroxirenyre idi rihydyrenyre. Ihãre ta waòinatxi reuròmy hyna ixyby rÿximy rauhenyre. Idi ierydÿÿna mahãdu ixyby ributumy.

<sup>18</sup> Jesuisi heka ixisohojile rare ixitòedÿÿmy. Ierydÿÿna mahãdu heka irarò-ki rÿimyhÿ riijemy rÿimyhÿ. Idi tahe tamy nade tÿÿraximy: —Mobohe jiarÿ raremy wamy raryberenyre? <sup>19</sup> Tai narybedenyde: —Ijõ Joaõ Sebedÿÿnamy adireri. Ijõ ta Eliasimy adireri. Ijõ ta juhoo Deuxu rybedu mahãduõmy adireri. <sup>20</sup> Jesuisi tamy rarybere: —Adeereny tahe. Mobo jiarÿ watxireri. Idi Pedro rirawyònyre: —Kai Kristu tate, Deuxu deòdÿÿna wahe. <sup>21</sup> Tahe Jesuisi tamy rarybereri: —Uritere tuu iny-ò ijyykõkremy. <sup>22</sup> Jiarÿ Hãbutyhyhykÿ, Deuxu Riòremy, aõhõkÿmy arotÿÿnykre. Judeu wedu mahãdu, xiwena wahidÿÿdu wedu mahãdu, bede ywina erydÿÿdu mahãdu waderamy reakre. Jiarÿ arurukre. Inataõna txu-di arexixakre. <sup>23</sup> Idi ibutu-ò rarybere: —Wahemy kanake mahãdu urile ixi dee rexiiõnykre. Txuõ txuõlemy taitxeò rimymy kidiwaheludunykre. <sup>24</sup> Waòrary-ki rubudu heka biu-ò hedukre. Tukõkeki urile ixinany inatyhymy rurukre. <sup>25</sup> Aõmydÿÿnanamy iny ritakeki, tahe taumy riõnonykeki, kia heka aõmy aõkõkre. <sup>26</sup> Inyõ raixÿrukkeki warybe lau tule jiarÿ Hãbutyhyhykÿ, Deuxu Riòre wahe, tai ilau araixÿrukre. Deuxuko-ò ÿjuko-ò iu adehemynysÿu Deuxu Iòlòna-ki wahe. <sup>27</sup> Inatyhymy heka adeereny ararybekre. Ijõ kaki rare. Deuxu Iòlònamy robikre tarubukõtyre

<sup>28</sup> Tahe debò inataõ txuu rÿidi, Pedro, Txiau, Joaõ-wana Jesuisi ridyre. Tiiboho sohojile bederatò-ò roire Deuxu-ò rexitòenykemy. <sup>29</sup> Jesuisi rexitòenyre tii tamyreny rexiwixiranyre iu rexitòenyre ityy heka urile rabòòranyre. Iurahakÿmy relere. <sup>30-31</sup> Tahe tamyreny dexitÿnynde Eliasi, Moisesi-wana tahe rarybemyhÿre Jesuisi-wana. Jesuisi rubunamy Jerusalẽ hãwã-ki widee rarybemyhÿrenyre, kia Deuxu bedeywidÿÿnana

myna. <sup>32</sup> Pedroboho rōrōrenyleri. Idi tahe rexixarenyreu, tiiboho Jesuisi loosònamy robirenyre. Eliasi, Moisesi-wana tiiboho tuu robirenyre. <sup>33</sup> Ròireriu, Pedro rarybere Jesuisi-ò: —Wawedu, awityhymy inyhe inyboho kaki ratxirenyleri tahe rikiwinyrenykre inataō hetomy, ijō adee, ijō Moisesi-ò, ijō Eliasi-ò. Pedro rieryōlemyhÿre aōmybo rarybemyhÿ. <sup>34</sup> Tai rarybereu Nonoe dobehede iubòròna bede ritòbònyre. Pedro, Txiau, Joaō-wana ruberumyhyrenyremy. <sup>35</sup> Tahe ròhònymy reare rybeuni iuribi: —Kia heka Wariòre waluu rare. Kaiboho tamy bohohabenyke. <sup>36</sup> Tiiboho reteherenyre tahe inyōmy robiòlerenyre Jesusilemy ta robirenyre. Tahe rybeōmy rÿirenyre. Iu inyō-ò aōmy raryberenyòre tuu.

<sup>37</sup> Tai tahe ijō txu ratò-ribi dehemynydeu iny sōwehekÿmy Jesuisi-ò ròirenyre. <sup>38</sup> Inyō rarybere: —Erydÿÿdu, wariòre adee redyleri. Beteheke wariòre sohoji-ò. <sup>39</sup> Tyytybybina rimymyhyreu tahe riatyre bede-ò. Idi tahe urile txuu riyiyidÿÿnymyhyre. <sup>40</sup> Aerydÿÿna-ò jiarÿ rarybera tyytybybina riteònykremy, tahe tiiboho riixāwidÿÿnyòhyrenyre. <sup>41</sup> Jesuisi tamyreny rarybere: —Tiwesebededÿÿnanabo wijinabòdu ityhyòlemy rÿira. Tiwesebededÿÿnanabo akyreny-ki ariijekemy. Wadee uladu bididyke. <sup>42</sup> Tahe didydenyde Jesuisi-ò. Tahe tyytybybina urile riitxÿteitxÿtenymy resere. Idi tahe urile bede-ki rexiraòhòhòremy sutxi resere. Idi rarybexinymy. Rybexi irywomy ròhònymyhy. Jesuisi tahe tyytybybina iribi riòlòdÿÿnyre uladu riteyteyre. Idi uladu tyby-ò riwahinyre. <sup>43</sup> Ibutumy iny Deuxu aōwidÿÿna-di bede riòtiinyre.

Jesuisi taerydÿÿ mahādu-ò rarybere:

<sup>44</sup> —Boholatyhyki warybe-ò, Deuxu Riòre Hābutyhyhykÿ heka rawahidÿÿkre hābu mahādubinaō-ò. <sup>45</sup> Tiiboho rierykòlere. Kiamy dori ilaureny riwore. Tahe ruberurennyre tÿÿraxidÿÿki.

<sup>46</sup> Ryro-ki ierydÿÿna mahādu widee rarybemyhyre: —Mowexe wiratyre ityhykremy. <sup>47</sup> Jesusireny rexiraykynymyhyreny rieryre. Idi tahe uladuò rimymy rarybere. Jesuisi uladuò wana ronyrenyra. <sup>48</sup> Tahe taerydÿÿna-ò rarybere: —Moō uladu ka wese wadee riwiòhenanykeki, riwawiòhenanyre. Moō riwawiòhenanykeki, tule waha riwiòhenanyre. Mobo deòdumy reakre, tii ibutu ratyrekre.

<sup>49</sup> Joaō tamy rarybere: —Erydÿÿdu, jiarÿboho riòlòdÿÿnyrerimy tuu rabirenyra inyō tyytybybina-di animy rehureriò. Tahe iny mahādureny aōkò rare. Tahe jiarÿboho tamy reijònyrenyre iny inyjoirenyre aōkòki. <sup>50</sup> Tahe Jesuisi rarybere: —Biijònybenyòkre. Inyō inymyrenydòdukòkeki, inyweribireny-ki tii rare.

<sup>51</sup> Tahe Jesuisi bededÿÿnana iixihidu iòhòmy idi biu-ò rakreu, tii Jerusalē hāwā-ò rakremy rexiywinyra. <sup>52</sup> Tahe takomy inybuta bede riywinyre. Tai itÿhinamy rutòmy Samaria hāwā-ò. <sup>53</sup> Tai tahe Jesuisi deramy rekoarennyre Jerusalē-ò ramyhyreki. <sup>54</sup> Txiau Joaō-wana kia rierymy tahe narybedenyde: —Wanyrÿhÿkÿ, adee wikeki heòty biu-ribi ityrenny kedesekekemy aritxuhorenykre risòrennykremy. <sup>55</sup> Tahe Jesuisi irybereny-ki ibinamy rahare tahe reburemy taò riòsere iribireny. <sup>56</sup> Idi ta iwitxira hāwā-ò roire.

<sup>57</sup> Tahe Jesuisi taerydÿÿna mahādu-wana roirenyreu, hābuō tamy rarybere: —Ihyymy awana arakre titxibo makreu, ahekile arakre. <sup>58</sup> Tahe Jesuisi tamy rarybere: —Ijòrò heka ihāloo dire. Nawii tÿtÿ dire. Tahe jiarÿ, Deuxu Riòre wahetoòre, Hābutyhyhykÿ rare hārele. <sup>59</sup> Tahe ijō hābu-ò rarybere: —Biwaheludunyke. Tahe tii dirawyònyde: —Wanyrÿ, Waha heka rurura. Tai tahe juhū arituunykre. <sup>60</sup> Jesuisi rarybere: —Txioinihe, rubu mahādu wii

rituunye. Kai tahe makre Deuxu Iòlònamy belyykre. <sup>61</sup> Ijõ rarybere: — Wanyrỹ, araheludunykre. Urile juhuu wasỹ mahãdu arawehityhynanykre. <sup>62</sup> Tai Jesuisi dirawyònyde: —Inyõ ritelenykeki, tahe ixyby òòsemy rexi-nohõtinykeki, tii waheludu mahãduõmy rareõtyhy.

## 10

<sup>1</sup> Jesuisi 72 hãbu heka ritare inatxi inatximy tako-ò tihãwãhãwãtxibo rakreò bedede riywinyre. Kiamy tamyreny rarybere: —Waijyymy rybemy boibenyke. <sup>2</sup> Kiamy heka tamyreny rarybere: —Waaõmysỹdỹna heka inihikỹ-di isirare. Iwese maixõmo iny riòròmhyre wese heka waaõmysỹdỹna rare. Maixõmo oworu heka inihikỹre, idi aõmysỹdỹdu heka ibutere. Tai oworuwedu-ò aõmysỹdỹdumy bexitòenybenyke, Deuxu-ò wahe. <sup>3</sup> Kiaboho heka budoeni wesemy iyreny-ki boibeke. Kia-ribi nohõti losaõmykre. <sup>4-5</sup> Tai heka bexi-ijebenykre anierureny wydyõmy. Aõna aõna renyhynykeõ aõkõ awareny wydyõmy iny-ò ryberenyõmy iny iny-ò ryberenyõmy, rywetyatyamy abed-edỹna nodỹmy. Inyheto-ò malokreu Deuxu deysanamy birybenybenyke. <sup>6</sup> Tii adee awirenykre wana heka teysakre kahetoludu. Tai tahe ixibyle adee Deuxu deysana ròðekre adee awiõhyykeki wahe. <sup>7-9</sup> Aõma hãwã-ò malò-wana uritere deuròsò deòròsòõmy matximahãke. Tai tehemynymy atxiterikile bexiijemahã tetxilemy. Uritere rỹsỹna òta òtaõ aubeò ritidi wana uritere rybeòlòõmy. Birỹsỹmy rybeõlemy. Awiõhedỹmy ruruke wana bimymyhy aõbo adee riwahinymyhyre. Iny raaõmysỹdỹmyhyre heka ròtamymyhyre. Kia wese heka biwinymyhyke. Birỹsỹmahãke aõbo adee riwahinymyhyke. Binaõ roiwana biteytenymahãbenyke. Kia wesemy tamy marybeke: —Deuxu Iòlõna heka iòhòmỹ ihỹre. <sup>10-11</sup> Hãwã-ò birònykeki, inyõ aradyrenyõkeki, boibenyke hãwãky-di. Myỹ marybebenyke tamyreny: —Aõbo wawa-ki hãwã-ki rỹireri. Wawa aritòtynykre bryby iribi ròhònykremy. Adeeremy ariteòsinykre nohõti ijaranamy tamyreny. Nohõti losarenymy Deuxu Iòlõna adeeremy iòhòmỹ dehemynde. Tahe kaiboho teramy tekoatenyete. <sup>12</sup> Aõma ywisidỹnatxu heka tiiboho aõhòkỹmy rotỹnyrenykre. Jesuisi rarybere: —Tiro hãwã Sidõ hãwã heka awimy aribireny ròhònykre. <sup>13</sup> Kobe làhàxe kai Korasĩ hãwã, tule Besaida hãwã. Òhotibe ayreny-ki rỹire, kia heka Txiru hãwã, Sidõ hãwã tule kire-wana taõ òta òtareny-ribi rexiatyreny. Tiiboho tykysausuhukỹtyre rexisỹnyre bryby-di rexiereny. <sup>14-15</sup> Òhotibetxumy heka Deuxu raruxetòenykre Txiru hãwã mahãdu, Sidõ hãwã mahãdu! Kaiboho tahe aõkore. Deuxu araruxetòenyõkre. Kai Kafanaõ hãwã yludu mahãdu aõbo adeeremy rotỹnykre. Biu-ò aõbo bòibenykre. Aõkõ heka heòtybina bedetxi heka boibenyke. <sup>16</sup> Tahe Jesuisi taerydỹna mahãdu-ò ixyby rarybere: —Inyõ aradyrenykre wana tasỹ-ò. Iwese riwadymyhyre wesele, aradyrenykre. Moo adeeremy roholamymyhyre iyribu wadee roholamymyhyre. Wana tahe waderalemy reamymyhyre. Waderamy reamymyhyre tahe tule Waha deramy reamymyhyre. Deuxu wateòdỹdu wahe.

<sup>17</sup> Tanonanarenymy-ribi iribi tahe kia erydỹna mahãdu ibutumy dòòsedenyde. Tiiboho heka teysa nihikỹmy dòidenyde. Tybybinanahakỹ heka irybe-ki ròhònyhyre irybereny-ki. Riòlòdỹnymyhyreny wana Jesuisini-di heka ròhònymyhyre kiamy Jesuisiko-ò tuu relyyreny. <sup>18</sup> Tii rarybere tamyreny: —Bexiijebenyke jiarỹ dori Satanasimy biu-ribi rabire, biudelaa wesemy reseremy tuu rabire. <sup>19</sup> Inatyhy rare waruruke nyderi rewahinyre. Tai hemylala tyre-ki mariabenykeki. Tiu inyõ ruruõtyhy itytibòrò nihikỹ arawerenykeki, tiu buruõtyhy. Tule kai aòludu rururatyre arururenymy-di boibekre. <sup>20</sup> Ihãrele tahe uritere deysarenymy atxibenyke ka ruru

òraru-ki tyytybybina deòdỹna, ruru wahe. Kaiboho dori anireny raritinymy roimyhỹre biu-ki kia ta ateysanarenkyre.

<sup>21</sup> Iule tahe Jesuisi reysare heka Deuxu Tyytybytyhy iwomy reareu. Kiamy rexitòenyre: —Waha, kai wa biuwedu tate ibutu bedede wedu tate. Umy reàlãmý watzireri tamy retòenyre. Wadeysamy watzireri ka aõma dỹna bederaremy nihikỹ iribi tewòmý atxiteriki wahe. Tamy hete iwese iny uladu wesemy rityhynymyhỹre heka. Tai tahe tamy ritỹnynymyhỹre. Kia adeewimy tuu rare. <sup>22</sup> Jiarỹ heka ibutumy Waha wadee riwahinyre. Inyõ rieryõhymyhỹre Waha wahe. Waòrarukile tahe iny rierymyhỹre. Mobo Waha rare wahe. Waòrarukile dori rierymyhỹre. Ijõ aritỹnynykemy watzireri. Tai tahe tiki tule riery iruru. Taile rierykre. <sup>23</sup> Rexitòenymy rahudi tahe wasimy iwòtemy heka rarybere taerydỹna mahãdu-ò: —Kaiboho heka sõwemy aõwiihikỹmy tabimyhỹtenyte. Tai kaiboho beysabenyke. <sup>24</sup> Ihetxiu heka Deuxu rybedỹdu wana kia aõmysỹnanamy iòlò mahãdu wana. Kaireny aõmydỹnanamy robikemy risỹnyre, tahe aõkõhyre. Wijile heka tuu robireri aòrarureny-ki. Tule tabitenyteri kaiboho ratximyhỹ inatyhymy aõbo òbitimy Jesuisi ijyy-ò roholarenkyre tahe aõkõhyre.

<sup>25</sup> Moisesi bedede ywina rybe-di räire Jesuisi lỹraxidỹmy. Iwese kai ixiluure wese, iny witxira luuke! Tii tahe Jesuisi rihixidỹmy rarybere: —Aõhebo arotỹnyke biu-ò arahenykemy. <sup>26</sup> Jesuisi dirawyònyde: —Timybo kỹnyhe Moisesi bedede ywina tyyriti-ki roimyhỹre? Timybo tuu manarybekre. <sup>27</sup> Tii tahe diwyònyde timybo tyyriti-ki roimyhỹre myna:

—Deuxu adinodureny, ibutumy awo-ribi iluuke, ibutumy arayky-ribi aru-runa-ribi, ayky-ribi heka iluuke. Tule ibutumy iny ixiwesemy idi atximahãke.

<sup>28</sup> Tai tahe Jesuisi tamy rarybere:

—Kai inatyhymy tarybeteri tai inatyhymy mahenykre biu-ò.

<sup>29</sup> Kia hãbu heka rexiòbitinykemy idi ratxireri. Taita rarybere Jesuisi-ò: —Mobota waeryre? <sup>30</sup> Tahe Jesuisi ikò relyyre ijyymy. —Judeu mahãdu hãbu heka ratỹinamyhỹ Jerusalẽ hãwã-ribi, Ijeriò hãwã-ò. Iribi tahe kia wasidu mahãdu rimyrenyrene. Inieru ibutumy iribi ritarenyrene. Ityy hỹre raòhòtere irubudỹle rasiranyrene ririre. Tahe ruruõki rỹimyhỹ. <sup>31</sup> Aõma judeu xiwenawahidỹduõ heka idi rare. Tahe hãbumy robire. Idi hãbu-ribi irehemy rexiemy reare. Tahe tỹtxi rerikõle rare raty resere. <sup>32</sup> Hãbuõ rehemynyrene tiie-ki dohodỹna wiòhedỹduõ rare, Levita wahe. Tule ratyresemy ririre. <sup>33</sup> Tahe ijõ nade Samaria bedede hãwã luduõ heka rare. Judeu mahãdu heka Samaria mahãdu luukõre. Idi tahe kia judeu mahãdu roimyhỹ. Tahe Samaria mahãdu hãbu sõwemy riruxetòenyrene. <sup>34</sup> Idi tahe tamy rexitỹmynymy tahe iwotõmona rituahinymy ritaataamy iwotõmona. Idi tahe ka hãbu relyymy idi rare. Aõma ijumenta tyre-ò ritidimy. Idi rare rirarehu tahe heto-ò ritidikremy ririkremy ridymy heka idi rare. Rummy heka ritòenyrene hykyky idi bedede nade awimy risỹnykemy. <sup>35-37</sup> Rudile heka heto òwy-di iwedu-ò heka nieru riwahinyrene riòwynyrene inatxi womati nieru. Tamy rarybere: —Biwiòhenanyrene idi mabekre adòòsekre riròkre. Moma arỹnaderenykre Arỹnadebenykre heka adiòwynyrene adòòsekre wahe. Ka hãbuhe rarybere: —Hãbu bireludu ratxireri. Kia taruxetòenyreni tiòsinyrene waha tieka idi hãbubireludu ratxireri. Wimy raòludumyhỹre hãrele taheka riwiòhenanyrene. Jesuisi tamy rarybereri. —Iwesele biwinykre iweseke hãbu riwinyra weselemy biwinykre. Kai aõhebo botỹtyhy mahake. Iwesele wahe. Jesuisi rỹraxire: —Mobo hãbu aõtxino biòwa rare? Mobo ibireludu wahe? Bedede ywina erydu tai rirawyònyrene: —Iwiòhedỹdu wahe.

<sup>38</sup> Jesuisi, ijō mahādu-wana rōirenyre. Hāwā-ò rirōnyrenyrene. Hāwyyō rare Marta inire. Tahe ridyre tasỹ-ò tai ratxirenykemy. <sup>39</sup> Tahe Marta heka iseriōre dire. Marie inire. Marie urile ibire-txi ronyra aōbo tarybeke roholakelemy. <sup>40</sup> Marta heka raelelemy ratxireri. Aōna aōnale rotỹỹnymyhỹle riwinymy taile rare ratximyhỹ. Tai tahe nade Jesuisi-ò rarybere: —Jikarỹ sohojile wa watxireri waseritxōre riwawikōhenanykōhykyreri. Kai anobohe kōbitimy tai tahateri. Tamy marybeke riwawikōhenykeny. <sup>41</sup> Tai tahe Jesuisi he tamy rarybereri: —Marta, Marta, aōherekibo kai taelelemy teamy atxiteri? <sup>42</sup> Sohoji aōmydỹỹnale heka awire. Marie awityhy aōmydỹỹnana ixidee rimyrene. Kia moo iribi ritaōtyhy. Riwinymyhỹ awityhyreki wahe. Tamy rarybeōtyhyō wadee roholareri iribi ariōlōdỹỹnyke wahe.

## 11

<sup>1</sup> Tiutxubo Jesuisi rexitōdenymyhỹre, iny rieryōlemyhỹre. Jesuisi rexihudi, ijo rarybera: —Biwaerynanybenykre iwese textitōenyteri wese, Joaō tahe tajoi rierynanyrene. <sup>2</sup> Tai rierynanyrene. Kai bexitōenykeki, kawese marybekre:

—Waha, ani ibutumy tamywimy. Wylemy mynake iny òlōdỹỹmy.

<sup>3</sup> Rỹsỹna txuō txuōlemy biwahinybenykre.

<sup>4</sup> Inyōraruna biixāwidinykre, iny iwitxira-dori taōraruna ariixāwidinykre. Waatysyrenyōmy òraruna-txi.

<sup>5</sup> Jesuisi heka taerydỹỹna mahādu rierynanyrene ijyy-di: —Kai arỹsỹnaōmy bonykeki, abiōwa-ò make ruetya rexitōedỹỹmy rỹsỹnaō huōtemy bidiwykemy: —Wy, ahina inataō wadee bidihuōteke. <sup>6</sup> Wabiōwa rehemynyreri bedetỹi-ri. Aō heka wawahisidỹỹkōnare. <sup>7</sup> Tii òsana myỹ adee rarybekre: —Wadee ixitōedỹỹōmyke ruetyahakỹmy. Arỹiōtyhy waherina-ri. rexiyrubunymy heka rāireri. Ibutumy iny heka rōrōmy rỹireri. Uladu, tule iumy rōrōmy rỹireri. Wadee ixitōedỹỹōmyke. <sup>8</sup> Rexitōenyhyhyhy tai hyyhyhy rỹikeki tai ihārele rỹike. Abiōwatōenamy aōkō kỹnyhe rỹike. Textitōenyterikile rỹike. <sup>9</sup> Tai heka adeeremy rarybereri. Bexitōenykeki, biwyke. Biijeke aōbo teijeteri, tai tahe mahake. Ijōtōbōna bihetenyke tahe adee riraynymy tahe malōke. Tai tahe adeeremy rarybera. Ibutumy rexitōenymahāke, tamy riwahinymahāke. Ibutumy iny riijemahāke, tai rahake. Iny rihetenymahāke riraynyke. <sup>10</sup> Tai adeeremy rarybere: —Ixitōedỹỹki iny aō rimymyhỹre. Aōitxe-ki aōtxi ijara rỹimyhỹ. Ijō-di rōtemy ijara-ki iny ralōmyhỹre. Ijō-di rōtemy ijara-ki, iny ralōmyhỹre. <sup>11</sup> Uladuō tyby-ò uturamy rexitōenykeki aōbo, hemylalaō tyby tamy riwahinyke irỹsỹnamy? Timyki tuukōna! Kaiboho kiamy aōbo botỹỹnybenykre? Timyki tuukōna! <sup>12</sup> Uladuō tyby-ò hāniesimy rexitōenykeki aōbo, itytibōrō tamy riōkre. Timyki tuukōna! <sup>13</sup> Kaiboho aōbina binahakỹdile tahōtinymahātenyté, aōwihikỹ aōbohe ariōreremy-ò biwahinyke. Boreny aratyre heka bede rieryke, Deuxu wahe. Tamy bexitōenybenykeki, tii Deuxu Tyytybytyhy adeeremy riwahinyke.

<sup>14</sup> Ixityre tasỹ hābuō raremyhỹ irybeōmy. Jesuisi taile ratximyhỹ tahe tyytybybina riōlōdỹỹnyrene iribi. Iu tyytybybina iribi rohonyreu tahe, hābu rarybere kia rybeōmy ratximyhỹre wahe. Tahe iny sōwehekỹ mahādu sōwemy idi rabedeōtiimy rỹire. <sup>15</sup> Inyō tahe, inysōwehekỹ yluduō tahe kiamy rarybere: —Kia diabo ruru-di, Belisibu ruru-di heka iribi riōlōdỹỹnyrene. Tii tyytybybina mahādu wedu rare. <sup>16</sup> Ijō tamy rarybere: —Jesuisi, araeryrenykre inihe aō biditeōsinykre wadeeremy. Inatyhy aruru biuludu ratximyhỹre. Widỹỹnaō inihe wadeeremy bitỹnynyke kialemy heka rarybemyhỹre urile riurihimy tamy aō itxerenamy riwinykelemy. <sup>17</sup> Jesuisi tahe rierymyhỹ aōmybo raraykynymyhỹreny. Tai heka tamy tuu rarybere: —Kia iny mahādu

wiribi hitximy raraykywydynykeki, tii tahe rexihuke itueke, s̄y mahādu tule wahe. <sup>18</sup> Timybo Satanasiboho bede widee ribinanyh̄yrenykeki, awityhymy roirekre. Jiar̄y araeryrenyleri timybo taraykynytenyteri. Aōma Satanasiruru-di tyytybybina ariòlòd̄ȳnykemy tarybetenyteri heka reeryleri. <sup>19</sup> Kia riki ariwinykeki, kaiboho tule wawesele tewinyteny. Timybo? Mobo awiòhed̄ȳdureny rare? Satanasiruru aōbo? Kaiboho boibenyke ixitòed̄ȳmy awiòhed̄ȳdureny-ò. <sup>20</sup> Jiar̄y Deuxu ruru-di ariòlòd̄ȳnykeki, kaiboho bexiijebenyke, Deuxu Iòlòna tahe adeereny iòhòra. <sup>21</sup> Hābu deburehek̄y tadebòna-di taheto riyrubunykeki, rexityhynymy ronyke. Iaōmyd̄ȳna ibutumy iyrubud̄ȳnamy r̄yike. <sup>22</sup> Tahe ijò kedehemynyke iratyre teburetyhy, tahe iaōmyd̄ȳna ibutumy iribi riwyke. <sup>23</sup> Iny wawana aōk̄o ratxirerimy ih̄ȳre, tii heka waribi hitximy ratixmyh̄ȳre. Iny wawana aōk̄o ratxireri, tii tahe aōtxile ramyh̄ȳre ixideòna. <sup>24</sup> Jesuisi ijò ijyy relyyre: —Iny-ribi tyytybybina ròhònymyh̄ȳreu, tii heka rake ixitawo-di rake titxibo. Rubumy rarunymy rake. Bedeò-ki rahakeki tahe, ròhòtinyke. Aròòsekre, tikibo rarawāhāòle. <sup>25</sup> Ixyby kòdòòsekeu tahe, is̄y ibutumy, tytymy roike iruxeraō. <sup>26</sup> Idi ixityre ijò rimyke debò inatxi reurò tyytybybinaō. Idi tahe tamy ras̄ȳnyrenyke. Iratyre tyhy wahe ibina. Iu kia ixisohojimy tyytybybina-di aōmys̄d̄ȳmy raremyh̄ȳu tahe, ihewo-ribi rimyra tahe iroona-ribi tahe aōnityhymy releke. Ibinatyhymy tamy rare.

<sup>27</sup> Iribi tahe hāwyyō ryryre ibutu ijohonamy: —Hāwyky heka aratxurananyre, aratibienyke heka iny bedekòby rare. <sup>28</sup> Tahe Jesuisi rarybere: —Deuxu Rybe tyhyd̄ȳdumy iratyre wadee awire. Deuxu deysanamy tamy kanakemy idi watxireri.

<sup>29</sup> Idi tahe inysòwetyhymy dehemynyde Jesuisi-ò. Jesuisi kiamy rarybere: —Iny heka kia mahādu ibinatyhymy r̄yire aōwihik̄ȳle heka riijemy r̄yire. Itxerenaōmy robikre ratxireri tahe itxerena Jonasi-ribi nadelemy tahe robikre. <sup>30</sup> Jonasi heka Ninive hāwā mahādu-ò itxerenaō heka tii rare. Tule jiar̄y heka Deuxu Riòre Hābutyhyhyk̄y rare wijinabòdu mahādu dee itxerenaō jiar̄y rare. <sup>31</sup> Ibòò mahādu bede konana-ribi iòlò hāwyy Salomaō bede eryhyk̄y-ò ijòhonamy irehe-ribi nade. Wijinabòdu mahādu taheka naòhyymahāde wadee ijohonamy. Salomaō ratyre heka jiar̄y watxireri. Ikonana txu tahe ibòò iòlòhāwyy r̄yikre rarybekremy. Tii rarybekre: —Anoherekibo Jesuisi deramy teakamahātenyke wahe. Timykibohe irybe bedekeryna-kò ijohokuna r̄yikòmyh̄ȳreki wahe. <sup>32</sup> Ninive hāwā mahādu tule r̄yikre rarybekremy iwesele. Jonasi rybe t̄ȳnyd̄ȳna-ki rexirāh̄ȳrenyke. Kaki heka Jonasi ratyre hābuō ratximyh̄ȳre, jiar̄y wahe. Wadee ijohonadu aōk̄o heka toite.

<sup>33</sup> Moheka loosònaō rideòhyymyh̄ȳre herinarawo-txi toosò iwasihik̄ȳmy roosòmyh̄ȳkemy. Tiiemy heka biuòhyy rademyh̄ȳre ibutumy bede rat̄ynymyh̄ȳkemy. <sup>34</sup> Arue umy dori it̄ynymy roimyh̄ȳre. Arue awikeki heka ibutumy aumy awikre. Arue ibinakeki tas̄y aumy heka bedelorokile r̄yimyh̄ȳkre. <sup>35</sup> Awo toosòmy ratximyh̄ȳre wana, bexiijemahāke. Aumy biemahāke bedeloro-ki rurunyh̄ȳny. <sup>36</sup> Bedelrohok̄y aumy-ki r̄yiòmyh̄ȳre wana, tai tahe boosokre ibutumy titxibo bede-txi mamahākre wana.

<sup>37</sup> Jesuisi kiamy rarybereu tahe, fariseu mahāduō tamy rarybere: —Manake was̄y-ki rikiroxikremy. Tai tahe Jesuisi rare, ralore, ronyre roximy. <sup>38-39</sup> Jesuisi ronyreu, tebò risuhòòre. Tai tahe idi bede riòtiinyre. Jesuisi rarybere: —Kaiboho fariseu mahādu, ibutumy heka texisuhòsuhòmahātenyke. Ebò tesuhòmahāte, aumy ibutumy tesuhòmahātenyke. Webòròsityyludu wahe. Kaiboho heka isuhuk̄ȳlemy toimyh̄ȳte ibutu aōik̄k̄o-di isumy roimyh̄ȳre aworeny-ki. <sup>40</sup> Iu heka òbitimy taraykynytenyòhyymahātenyke. Deuxu heka

iwebrò ludu riwinyre, inatyhy? Tule aworeny, araykyreny wana riwinyre. <sup>41</sup> Iny aõkõ mahãdu-ò maruxetòemyhỹbenyke. Tai tahe byranybenykre heka. Ibutumy awo-ki, ahana-ribi tule ryranykre.

<sup>42</sup> Kobe làhàxe kaiboho fariseu mahãdu. Kaiboho Deuxu dee tewahinymahãtenyke uriõno. Debõwiò aõ tetatenywana heka, sohoji tewahinymahãtenyke. Tule aõmydỹnareny aoworoludurenyõ tewyteny wana, tule tewahinymahãtenyke. Kia awire, biwahinymahãbenyke. Urile tahe teerytenyõhyymahãtenyke Deuxu luuna, Deuxu òbitina. Biwahinymahãbenyke heka Deuxu dee aõmydỹnaõ. Tii tahe awire. Tule nohõti losarenyõmyke, luuna, òbitina. <sup>43</sup> Kobe làhàxe kaiboho fariseu mahãdu. Dohodỹna heto luureny ikoðhòkỹle heka torokomahãtenyke. Kaiboho arybedỹnareny-ki awimy tahamyhỹtenyke. <sup>44</sup> Kaiboho kobe làhàxe. Wobrona wesemy toite. Iwese iny rubuhãloo tyremy iny rariamyhỹre wese ierykõnamy, kiawesele toite.

<sup>45</sup> Bede ywina bede erydỹduõ heka tai ratximyhỹ. Tii tahe Jesuisi-ò rarybere: —Erydỹdu, kai heka aõbinahakỹlemy wamyreny tarybeteri, kia wese rybe-ki. <sup>46</sup> Inatyhy rare. My tahe Jesuisi risỹnyre: —Inatyhy dori tule bironybenyke aõhòkỹmydỹnana. Iny dori adeereny rarybemyhỹre iny rybe bityhynymyhỹbenykemy tahe ihãrele tetyhynyõhyymahãtenyke. Bede ywina ritidỹna tewinymahãtenyke, ihãrele tahe tiu heka tetyhynyõhyymahãtenyke. <sup>47</sup> Kobe làhàxe kaiboho, alahireny, alabiereny wese toite. Iwese tiiboho Deuxu rybedu rirubunyre wese kaiboho toite. <sup>48</sup> Kaiboho rubudỹdumy toite. Òbitile tewinymahãtenytelemy ixidee tahõtinyinmahãtenyke. <sup>49</sup> Deuxu tahe rarybere umyrenymy wahe: —Tahe jiarỹ aditeònykre heka Deuxu rybedỹduõ tule Deuxu deòdỹnaõ heka aditeònykre. Imahãduõ birubunybennykre ihona tahe biteònybenykre. <sup>50</sup> Kaiboho heka bede òrarumy boibekre kia rubudỹ òraru erydumy wahe. <sup>51</sup> Abeli hãlubu txiwina tahe xiwena hure rubuna. Idi tule Zacaria hãlubu txiwina wahidỹna bire-ki heka Deuxu hetobire-ki. Kohe, ihure rubureny òraru-ki aõhòkỹhỹkỹmy biòwynybenykre. <sup>52</sup> Kobe làhàxe, kaiboho bede ywina erydỹdu mahãdu, bedeeryna ijò rayna dinoduboho wahe. Kaiboho tahe terònyõmy bede eryny heto-ò. Tule iny-witxiraõ tetòenytenyke iròte lau.

<sup>53</sup> Jesuisi ròhònyreu, teburemy tiiboho ritỹraxywymyhỹre aõna aõnamy. <sup>54</sup> Tuu ròtỹraxywymyhỹre timykibo rirutaõnyrenykemy.

## 12

<sup>1</sup> Sõwemy iny tahe ributunyre. Ube tahe rỹximy ratxireri. Tahe juhoo Jesuisi taerydỹdu mahãdu-ò rarybere: —Fariseu mahãdu, saduceu mahãdu urina biebenyke. Tiiboho dori ruidu mahãdu roire. <sup>2</sup> Wasimy wiji adeereny relyyre. Tiu ta ibutumy ijyynamy rỹikre <sup>3</sup> Aõbo wasimy wiji taholate heka ibutumy biurasòmy ratỹnykre. <sup>4</sup> Uritere iny lau brebuõmyke. Aumyle tii rirubunykre. Ijò ibinamy adee aõkõ tii rotỹnykre. <sup>5</sup> Iny lau sohojile breburenyõmykre. Deuxu lau ta buberukre. Tii dori atytyby bede bina-ò rahuke ixideewikeki. <sup>6</sup> Nawiiõ kaiboho bidymyhỹbenyke iòwy riòre iny heka riwymyhỹrekre. Ibutumy heka Deuxu nawii rieryre sohoji sohojimy. <sup>7</sup> Deuxu ara erymy heka aõma arati-ki tiwesebo aradeti rỹimyhỹre rierymyhỹre. Brebuõmyke, aõma Deuxu heka anaerymyhỹre nawii sòmo ratyre heka rierymyhỹ. <sup>8</sup> Kai marybeke: —Jiarỹ Deuxu retyhynyre dori tahe umy arelyyke Deuxu ýjukomy rarybeke biu-ki wahe, jiarỹ Deuxu Riòre Hãbutyhyhykỹ wahe. <sup>9</sup> Iny sõwehekỹy-ki riwatxiõnykeki tule aritxiõnykre jiarỹ Deuxu ýjuko-ò. <sup>10</sup> Inyõ Deuxu Riòremy aõbina binamy rarybekeki, irybe-ribi nohõtilosa rỹikre.

Deuxu Tyytybytyhymy tahe inyõ ibinabinamy rarybekreki tahe, aõhõkõmy rotõnykre irybe òraru-ki. <sup>11</sup> Aramykeu heka uritere nohõtiõmyke aõmobo marybekremy ywisidõnyki. Bede heka ariwahinykre rybedõnyanau. Rybeõmyke ikotyre. <sup>12</sup> Kai ixiwanale aõkõre marybeke. Deuxu Tyytybytyhy arãwiõhenanymyhõreny.

<sup>13</sup> Hãbuõ inysõwey-ki tahe Jesuisi-ò rarybere: —Wanyrõ, Waha rurura. Waseriõre tahe ibutumy waha aõna aõna riwyrã ixidee sohojile. Tamy marybeke wadee ritxuranykemy. <sup>14</sup> Jesuisi tamy rarybere: —Hãbu, kia waaõmydõny aõkõ rare. Timybo ayreny-ki araywisidõnyke? <sup>15</sup> Tahe Jesuisi ibutumy iny-ò rarybere: —Warybe-ò bodoholabedenyke. Ixityhyõmy! Arutyhy heka aõna aõna-ki aõkõ rare aõna aõna sõwrehãre. <sup>16</sup> Tahe Jesuisi ijyymy ròkewesenadõnyre: —Hãbutyhy riki ioworu nihikõre. Tahe sõwemy rõsõna ributumy. <sup>17-18</sup> Iheto tahe iyjare ibutumy ributumy. Tahe ixidee rarybere: —Aõhebo arotõnykre? Waaõnaheto butumy aritxiwikre. Ijõ iribi inihikõmy ariwinykre. Tai ibutumy waaõwiwi. tamy aridekre. <sup>19</sup> Tai tahe ibutumy waõwiwi-di areysakre. Arexielehinykre, ariroxikre, ariõkre. Waruhy areysakre. <sup>20</sup> Deuxu tahe kia hãbu-ò rarybekre:

—Hãbu itxõtere. Kai wijirulemy burukre. Tai tahe mobo aõna rimumy.

<sup>21</sup> Jesuisi taijy rihure rexirybenymy. Kia heka aõhebo rotõnyre iny ityhy mahãdu. Tiiboho dori Deuxuõle ityhymy aõkõ ihõreny.

<sup>22</sup> Kia heka Jesuisi taerydõny mahãdu-ò rarybereri. Uritere nohõtiõlemy arõsõna tule atyymy, idi matykynykemy. <sup>23</sup> Aumy heka rõsõna ratyre aõnityhy ratximyhõre. Aumy heka atyky ratyre aõnityhy ratximyhõre. <sup>24</sup> Nawii-di betehenyke. Tiiboho heka ioworuõreny. Tarõsõna riyrubunyõhyymyhõreny. Deuxu heka nawii riyrubunymyhõre, irõsõna tamy riwahinymyhõre. Kai-boho tahe nawii ratyretyhy toite Deuxu dee. <sup>25</sup> Sõwetyhymy maraykywydynanykeki aõbo arumy arirarehemy mariake? Aõkõre! <sup>26</sup> Kia aõ iyjare tahe Deuxu-ò. Kia biwinybenyõkeki, aõherekibo ijõ aõna aõna nihikõ-di tahõtinymyhõte? <sup>27</sup> Betehemy inihe noijasa-di. Aõma tiiboho raaõmysõdõnyõhyymyhõreny. Ihãre tahe iruxerarenymy ity wiwihikõreny wese. Tyy ixidee riwinyõtyhy Deuxu rityny wiwihikõ heka tyy wiwihikõ tamy riwahinyreri. Salomaõ heka ityynihikõ rare. Ihãre tahe ity heka awityhymy aõkõ noirõsõ wese. <sup>28</sup> Deuxu heka noijasa rityynymyhõre kia wijilemy idi ihõre. Biurasõmy tahe ixãwimy reamyhõre. Tii heka tyy adee kidiwahinykre. Tai tii atyreny. Tai ta ixinohõtiyredõnyõmy. Aõherekibo ainatyhyna ibutere? <sup>29</sup> Tahe raykõmy nohõtiõmy titxiribibo arõsõna adee kanakredi. <sup>30</sup> Tyhydõnydukõdu mahãdu heka tuure. Inybyreny heka rierymyhõre aõmybo tarumahãte. Ibutumy heka arerymyhõre aõmybo teamyhõte. <sup>31</sup> Tii Deuxu aõmy dõnyana sohojidile maraykynykeki heka tii ibutumy adee riwahinykre. <sup>32</sup> Brebuõmy ahãbenyke wariõreboho. Deuxu Iõlõna adee kanakemy, Deuxudeewina wahe. <sup>33</sup> Aõna aõna-di bohonybenyke. Iõwy tahe iaõkõdu mahãdu-ò biwahinyke. Anieruhyna wiwihikõdile boibeke. Kaki ibutudõnylemy heka biu-ò bibutumy. Tai heka judõera aõ rirõõtyhy tule rararyõtyhy. Tule tai wasidu ralõõtyhy. <sup>34</sup> Tikibo aõwreny rõikeki, tai heka araykyreny ratximyhõre.

<sup>35</sup> Ijõ tahe Jesuisi rarybere: —Kaiboho bexiywinybenyke, ibutumy aõhebo rotõnykre bexiywinyke. Awereysanarenymy-di atyky beximykemy. Aloosõna bitoonyke. <sup>36</sup> Deõdu mahãdu wesemy boibenyke. Bexiywinybenyke awedu dehemyõny-ò, tii worana bedehesi-ribe rehemyõnyre wahe. Iu rehemyõnyre, teõdu mahãdu heka ijõ riraynyke. <sup>37</sup> Tiiboho riraõrenykeki, deysamy rõikre. Iwedu dori reximykemy ityky wereysana-di tahe rõsõna teõdu



mahādu-ò riwahinykre. <sup>38</sup> Tii ruwetyakile rehemynykeki, deòdu mahādu reysakre. Tiibocho dori rexiraòmy r̄ĩmyh̄yrenyre. <sup>39</sup> Tai heka iny rexiywinymy r̄ĩmyh̄ykemy rybe roimyh̄yre awedureny kanakreki. Aõma hābuõ kanakeki heka tiu aõma hābuõ itxeredumy ronykeki heka, tiu hābuõ iribi rawasinyõtyhy. <sup>40</sup> Kaibocho tule bexiywinymbenyke wadehemynyna txu heka biijemy bonymyh̄ybenyke.

<sup>41</sup> Tahe Pedro rarybere: —Wanyr̄y, kai wadeerenyle ijyymy telyyte ada ibutumy iny-ò aõbo telyyte? <sup>42-44</sup> Tahe Jesuisi riwyònyre: —Aõtxile inyõdee, tibo deòdu taaõmys̄d̄ȳna riywinymyh̄yre, kia idinodu tai awimy rahamyh̄yre tii dori r̄ys̄na òbitimy riõriõmyh̄yre. Idi tamy aõwiwi riwahinykre taaõna aõna-di itxeredumy tule ris̄nykre. <sup>45</sup> Tii iwitxiramy rexiyaykynykeki tahe, ijõ teòdumy raòhòtemy urile idi risinymy kamy rexirybenymy: —Wawedu dori wiji aõkõ rarerikre. <sup>46</sup> Tai ierykõna-di iwedu kedehemynykre. Tuu rierymy iaõmys̄d̄ȳna-ribe ritamy aõhõk̄my ris̄nykre ityhyd̄ȳdukõdu mahādu wese. <sup>47</sup> Deòdu tawedudeewi rierymyh̄yre. Tai heka tuu rot̄ȳnyõkeki, tii tahe s̄owemy aõhõk̄my rot̄ȳnykre, òhòtemy wahe, tamy riywinyõreki. <sup>48</sup> Ijõ deòdu tahe tii iwedudeewimy rieriyõkeki, tii tahe aõbinamy riwinykeki, tamy tahe urihimyo òhòte tai r̄yikre. Inyõ s̄owemy ityhykeki, s̄owemy ijõ iny tamy rexitòenykre.

<sup>49</sup> Jesuisi ijõ rarybere: —Heòty-di bede ariworonykemy heka jiar̄y anade. Tii òte raworonykremy idi watxireri. <sup>50</sup> Jiar̄y ratisebenaõwesemy aralokre. Arurukre dori. Ele elemy r̄yikemy ixi-di watxireri. <sup>51</sup> Kaibocho tahõtinyte wadehemynyna-di. Ywina adiwydemy wadi tahõtinyte. Aõkõrehe, bede jei jeid̄ȳmy anade iribi widee rahitxihitximy r̄yikremy. <sup>52</sup> Iruyre inys̄ mahādu heka widee rahitxihitximy r̄yikre. Inataõ iny iuhe òludumy r̄yikre. <sup>53</sup> Hābu mahādu heka tyby òludumy rarekre. Hāwy tyby òludumy rarekre. Iriokorese heka tariòrelahi òludumy rarekre.

<sup>54</sup> Ijõmy Jesuisi rarybere: —Iu biuwetyky biura-ribe r̄òhònyreu, Kaibocho kia rybemy tarybemahātenynte biu kòdòakre. Inatyhymy biu ròamyh̄yre. <sup>55</sup> Tule tarybemahāte. Yhy ibò-ribe rebonyreu, bede ratòteekre. Inatyhymy tuu ratòteemyh̄yre. <sup>56</sup> Itxenad̄ȳdu mahādu! Kaibocho kia terymahātenynte bede, biu aõmyd̄ȳna tule iwitxira aõmyd̄ȳnana teerytenykolamahātenynte, beded̄ȳnana konana eryna wahe. <sup>57</sup> Ijõ Jesuisi rarybere: —Kaibohole teywinyõmyh̄ytenynte, aõòbitinamy wahe. <sup>58</sup> Aõòrarumy heka aòludu umy rarybekeki, idi ywisid̄ȳna ube-ò aradykemy ratxireri, tii-wana widee marybeke idi widi bede biòbitinykemy. Aõkõkeki, tii aradykre ywisid̄ȳdu-ò idi ròtenawo-ò soldado mahādu araròtenykre. <sup>59</sup> Tiu heka aòlòkõmy heka mabekre. Ibutumy iòwy biòwynyke xiery bõhònyke.

## 13

<sup>1</sup> Tahe inyõ Jesuisi-ò relyyre: —Pilato rybemynamy Kalileia mahādu ruruenyre Deux-ò raxiwerenyre. <sup>2</sup> Kia ta Jesuisi narybede: —Kaibocho timybo irubureny-di texinohõtinytenyteri. Ijõ wiratyre raòrarunanyrenykeki aõbo? <sup>3</sup> Ture aõkõ, kaibocho bexiyrah̄iõbenykeki tule burubenykre irubureny wese. <sup>4</sup> Ias̄se ijõ. Iu Silòe hāwā mahādu tyre heka heto rarie resereu 18 iny s̄owe rirubunyenyre. Arāȳraxikre Jerusalē hāwā mahādu ratyre raòrarunanyrenykeki aõbo? Aõbo tahõtinytenyteri? <sup>5</sup> Kaibocho bexiyrah̄iõbenykeki tule burubenykre irubureny wese.

<sup>6</sup> Tahe Jesuisi kaa ijyy-wana rikewesenanyre, Figoratyò wese heka. Tahe Jesuisi kaa ijyymy delyyde: —Hābu oworu-ki figoò r̄ĩmyh̄yre. Tii iraty dilawijunyde tiubo. Tahe iraty-txi reakõre. <sup>7</sup> Tahe hābu taoworu-di itxeredu-ò

narybede: —Inataõ wyramy relawijunyre tahe aõkõhyyra. Urile ta biòròkre. Iraty ihoõreki, awi aõkõ rare. <sup>8</sup> Tahe oworu-di itxeredu dirawyònyde: —Wawedu, txioini kawyramy idi warukikre, isu ariwinykre. <sup>9</sup> Aõkõhyykreki tahe urile raorokre ijõ wyrau.

<sup>10</sup> Judeu mahãdu elehyna txuu Jesuisi rotohodÿÿmyhÿ judeu mahãdu dohodÿÿna heto-ki. <sup>11</sup> Tai ta hãwyyõ ratximyhÿ. Tii 18 beòra webinadumy ratximyhÿ tyytybybina òraru-ki. Tii iumy rarabunumy rariamyhÿre. Ixitaradÿÿ risiranumyhÿre. <sup>12</sup> Jesuisi tuu robireu, tamy narybede: —Hãwyy, kai heka teytemy tate. <sup>13</sup> Tahe Jesuisi tebõmy rimyre iuleta reytere. Tai tahe hãwyy heka Deuxu riwowydynyre. <sup>14</sup> Dohodÿÿna heto wedu tahe ibinamy Jesuisi-ki rahare, judeu mahãdu elehynatxureki wahe. Takamy inyreny-ò narybede: —Debò sohoji reurò txumy aõmysÿdÿÿnamy rÿimyhÿre iu heka adeytemy ixi-di bòdòimyhÿke, judeu mahãdu elehynatxu ta aõkõre. <sup>15</sup> Tahe Jesuisi dirawyònyde: —Kai, itxenadÿÿdu tate uriteremy iximy rybedu. Kaiboho judeu mahãdu elehynatxu dori abroreni, aawaru heto-ò toimahãte tuu teesenymahãtenyete, tedymahãtemy idi ibemomodÿÿmy bidybenykremy.

<sup>16</sup> Kaa heka Abraõ riore riòreõ heka Satanasi 18 beòramy rimyre. Aõherekibo ta iribi retaraki sabadotxu ibinamy tahateri. <sup>17</sup> Tahe Jesuisi òludu mahãdu raixÿrurenre Jesuisi rybe òraru-ki. Tahe ixÿ mahãdu awityhymy tai rahamyhÿ iòraru-ki. Ibutumy reysarenre.

<sup>18-19</sup> Tii rarybera: —Deuxu Iòlòna wexe aõwesere. Aõ-ò wexe rikiwese-nanyrenykre. Tiwexe ijyy kawesere? Deuxu Iòlòna heka alòbòròna sõmo sõmo wesemy ratximyhÿre. Raumynyreu heka òwòru rariwesele relemyhÿre. Nawiile tuu rÿtÿnymyhÿre kia òwòru-ò.

<sup>20</sup> Ixityre tamy rarybere: —Aõ ijyy wese heka Deuxu Iòlòna rare. Aõwexe rikiwese-nanyrenykre. <sup>21</sup> Paõ ixìòlòdÿÿna wese rare, iuri rare. Hãwyy paõ riwinumyhÿreu, inataõ urihixina-ki iuribemy riurinumyhÿre. Tai tahe raubÿtÿmyhÿre, rexiòlònumyhÿre.

<sup>22</sup> Jesuisi tahe Jerusalẽ hãwã-ò rareu, hãwã hãwãmy rotohodÿÿmy. <sup>23</sup> Iu inyõ ritÿÿraxinyre: —Wanyrÿ, Hedu mahãdu we sõwekre aõbo? <sup>24</sup> Jesuisi tamyreny narybede: —Bexityhynybenyke ijòyja-di birònybenykemy. Sõwemy iny tahe ròtemy reakre tahe ralòõhyykre. <sup>25</sup> Hãbuõ kie taheto ijòtòbòna ritòbònyre. Iu kaiboho uritere bydyrydenykre: —Wanyrÿ, aralòrenyke ini. Kiata tii anawyònydenykre: —Tiludubo toite, araeryrenyõre. <sup>26</sup> Kamy ta bidiwyònydenykre: —Inybohòle riroximy roiremyhÿ. Wahãwãreny-ki tòbedeerydÿÿmyhÿ. <sup>27</sup> Ixityre anawyònydenykre:

—Boibenyke aõbina bina widÿÿdu.

Tiludubo toite dori reerykõre. <sup>28</sup> Deuxu iòlò-ki Abraõmy, Ijaimy, Ijaòm, tule ibutumy Deuxumy rybedu mahãdumy bobibenykre, kaiboho malòbenyõtyhy. Tai hii, ibru, jumytata rÿikre. <sup>29</sup> Iny ibutu bede bede-ribi, Ibòò-ribi, Iraru-ribi, Biura-ribi, Beà-ribi Deuxu iòlò-ò hãwãmy. <sup>30</sup> Kiaremy ta, koludu mahãdu heka ibutuhewomy kedeakre. Ikõmyta, hewoludu mahãdu, koludumy kedeakre.

<sup>31</sup> Iu ta fariseu mahãdu Jesuisi-ò narybedenyde: —Mahenyke, Herodi dori arubudÿÿmy araijereri. <sup>32</sup> Jesuisi dirawyònyde: —Bòòsebenyke kamy ijòrò-ò marybebenykre: —Jiarÿ tyytybybina iny-ribi retareri, tule ròteytedÿÿreri wiji biurasòm. Ijõ txumy ta waaõmysÿdÿÿna arihukre. <sup>33</sup> Kiaremy ta kia rewinyreri arihukre. Deuxumy rybedu dori Jerusalẽ hãwã-ki sohojile rurukre, iwitxira hãwã-ki ta aõkõre. <sup>34</sup> Jerusalẽ, Jerusalẽ hãwã, amahãdu heka rirubunyrenre Deuxu rybedu mahãdu wahe. Iwese hãnie tariòre ributunumyhÿre wese terawo-ò, kia wesele arayrubunykeny rexinohõtynyre

tahe kaiboho terarenyre. <sup>35</sup> Aheto-ribi heka Deuxu rexitakre. Kaheka ararybekre adeereny: —Wamy heka bobiōtyhy ixityre. Tiutxumy kamy bexirybenykre bede-ò, myỹ:

—Deuxunimy nodu awityhy heka rare. Kiaule wamy bobikre.

## 14

<sup>1</sup> Sabadoõu Jesuisi heka fariseu mahãdu wedu mahãduõ heto-ò ralore roximy. Tahe iny idi retehemyhỹreny. <sup>2</sup> Iu inyõ taruti, tadera-di tari-tari-di tamy dehemynyde. <sup>3</sup> Tahe Jesuisi narybede bede ywina erydỹỹdu-ò, fariseu mahãdu-ò: —Sabado txuu deytedyỹwe awire aõbo, aõkõre aõbo. <sup>4</sup> Tiiboho rirawyõnyõhyyre. Tahe Jesuisi hãbu riteytenymy bede riywinyre iribi tahe riòlòdỹỹnyre. <sup>5</sup> Ixyby narybede Jesuisi: —Txibo kaiboho ariòreõ ada abroreniõ hãloo-txi resekeki, bitabenyke Sabadotxu hãrele. Aõhe inatyhy. <sup>6</sup> Tiiboho rirawyonyõhyyre.

<sup>7</sup> Tahe Jesuisi roxidu mahãdu-di retehemyhỹre. Tiiboho dori rynana wihikỹ-txi ronymyhỹreny. Tai kamy tamyreny rarybere: <sup>8</sup> —Txibo inyõ bedesanaõ araarikeki. Uritere ryanawi-ò rỹõmykre. Txibo dori inyõ aratyre ityhy kanake lau. <sup>9</sup> Tukeki bedesa dinodu inyõ aratyre-ò arynana-txi ronykemy adee kanarybekre. Tai tahe maixỹrumy rynana bina-ò bonykre. <sup>10</sup> Kialemyta inyõ araarikeki, rynana bina-txi bonykre. Tahe bedesa dinodu adee kanarybekre: —Wy, katxi bodonyke ryanawihikỹ-ò. Tai tahe kai mabedesakre ibutuko-ò. <sup>11</sup> Tahe ixityhydỹỹdu mahãdu uritere reakre. Kõmyta uriixi dinodu mahãdu rawowydykre.

<sup>12</sup> Tahe Jesuisi bedesa dinodu-ò rarybere: —Txibo roxina biwahinykeki, uritere asỹ mahãdu, aery mahãdu, ityhy mahãdu aarixiõmykre. Urikõ-ribi iwese teariteri wese araariheny. <sup>13</sup> Tukõmyta roxi biwahinykeki, uriteremy rỹira mahãdu, iny tiere mahãdu, iny ruetà mahãdu biarikre. <sup>14</sup> Tai adeysatyhymy mabekre. Tiiboho dori tiu ixiwesemy araariōtyhy. Deuxu tahe aõwydỹỹdukre iu bede awikreu.

<sup>15</sup> Ijõ roholare Jesuisi rybe tai tamy rarybere: —Deuxu Iòlòna-ki, òwòrubese rỹdu mahãdu reysamy rarekre. <sup>16</sup> Tahe Jesuisi rarybere: —Inyõ roxina nihikỹõ riwinykemy ratxireri. Sõwemy iny ritobinyre. <sup>17</sup> Rexihumy rỹireu, teòdu mahãdu bede riywinyre iny kididykremy. <sup>18</sup> Sohoji sohoji tahe tarybe tamy riwahinyre. Ijõ taoworu tỹmyra-ò reteheke. Ijõ kanaōtyhy heka. <sup>19</sup> Ijõ tahe broreni debòitue riõbranyre tai riurihikreki kanaõke. <sup>20</sup> Ijõ tahe hãwyy herinamy rexihumy rỹire tai kanaõke. <sup>21</sup> Teòdu tahe ròðsera tawedu-ò tamy relyyre. Tii reburere tahe rarybere: —Wylemy makre ibutury-di hãwã-ki. Ibutumy iny wixira wixira bididyke, iaõkõ mahãdu, itiere mahãdu, ruetà mahãdu wahe. <sup>22</sup> Iribi tahe teòdu ròðsera rarybere: —Ibutumy rewinyre wawedu, tahe heto rỹxiõmy rỹire. <sup>23</sup> Tahe iwedu ixybymy bede riywinyre hãwã-ribi ibryrari-ò iny kididykemy: —Aruru-di bididyke, waheto dori rỹximy rỹirakremy idi watxireri. <sup>24</sup> Juhuu watobidỹỹna mahãdu warỹsỹna riurihiōtyhy.

<sup>25</sup> Iu sõwemy iny Jesuisi heludumy roire. Tai Jesuisi tamyreny rarybere: <sup>26</sup> —Kaiboho aõbo inatyhymy waluu mahãdumy toite. Tuu tarybeta. Tahe boluu, adiluu, ahãwyyluu, ariòreluu, aseriòreluu, ixiluu ratyre waluuõkeki, wamahãdumy aõkõ boibeke. <sup>27</sup> Inyõ riwaheludunykemy ratxireri, tii juhuu taitxeò riwykre. Kialemy tahe riwaheludunykemy inatyhymy. <sup>28</sup> Inyõ heto rarie riwinykemy ratxikeki, juhuu iòwy-di rõhõtinykre. Inieru rimykeki tahe riwinyke, aõkõkeki tahe riwinyōtyhy. <sup>29</sup> Tii tuu rõhõtinyõkeki, tii ibutelemy riwinykre tahe inieru ituereu, ibutumy iny idi risinykre: <sup>30</sup> —Tii taheto

rarei ritelenyre tahe rexihuõtyhy. <sup>31</sup> Iòlòõ wou riwinykeki, juhuhu taaõbinadu mahãdu-di rariamyhÿre. Idi rõhõtinyre. Ijõ iòlò wawiò mil soldadomy ijõdikeki, tahe tii debòwiò mil ijõdikeki, tahe wou riwinyõtyhy. <sup>32</sup> Juhuu tahe teòdu riteònyre ijõ iòlò-ò ireheribile tii-wana wou ixãwidÿÿmy rarybekemy. <sup>33</sup> Akireny tule iweselere. Ibutumy aaõna aõna biriõbenykeki, waheludu mahãduõmy boibeõtyhy.

<sup>34</sup> Saa heka aõni awi rare. Tatxuberere rexihukeki tahe turibi ixãwike. <sup>35</sup> Tai tahe suurina-ki ahirana silÿna binakõki awiõhõtidiirenykeki boholabenyke warybe-ò. Suò awiõre, tule ahirana bitòbònykemy awiõre. Urile idi behuke. Kaiboho õhõtidiirenykeki, boholabenyke!

## 15

<sup>1</sup> Idi nieru tarasadu mahãdu sõwemy tamy roholamy doide. Tule ijõ iny òrarudu mahãdu rehemynyre. <sup>2</sup> Fariseu mahãdu, tule bede ywina erydu mahãdu kawesemy rarybere: —Kahãbu ibinare. Tii òrarudu mahãdu-wana riroximyhÿre, iny iehehe-wana.

<sup>3</sup> Idi Jesuisi rierynanyre ijyy-di rawesenanyre. <sup>4</sup> Kaibohoõ òsana 100 budoeni ijõdire. Sohoji heka iy-ribi iõre. Kai aõbo makre ijesemy? Kohe, iuhe, 99, birike bedero-ki tahe biòryhyyke. Aõhe inatyhy? <sup>5</sup> Mahakre wana tahe eysamy atxikre. Tahe bidyke iuhe-ò. <sup>6</sup> Taheto-ò rehemynyreu, tasÿ mahãdu-ò tahe ritobinyre: —Wawana ini kÿny bedeysabedenyke. Wabudoeni-ki rahara, iõreõ wahe. <sup>7</sup> Iwesetyhylemy taheka adee reerymahãre iny òrarudu mahãdumy. Iu sohoji iny rexirahÿkeki, biu-ki deysana sõwemy rÿikre. Iny òbiti 99my tahe urihimyo biu-ki deysana rÿikre.

<sup>8</sup> Ijõ Jesuisi relyyre: —Hãwyyõ òsÿny womati ura nieru debòwiò dire. Sohoji iõre-wana, tii riijeke inatyhy? Loosòna ritoonyre, iube riwysynyre, sõwemy riijeke ihyymy tahe tai rahara. <sup>9</sup> Tii itxi reakreu, reysamy rÿira. Iu tasÿ mahãdu ritobinyre: —Wawana inihe bedeysabedenykre. Wanieru-txi dokuri rahara. <sup>10</sup> Jesuisi tahe ritÿnyre: —Iwesetyhyle biu-ki rare. Deuxu ÿju mahãdu reysamy roirenyre, sohoji òrarudu rexirahÿreu.

<sup>11</sup> Ixyby tahe Jesuisi narybede: —Hãbuõ iriòre inatxire. <sup>12</sup> Tiutxumyta ihelÿÿna tyby-ò rarybere: —Waha, ibutumy aõna aõna burukreu wadee rawahikre, wijile bidiwahinykre. Tyby tahe iaõna aõna jura tamy riwahinyre. <sup>13</sup> Iriòre helÿÿna tahe ibutumy taaõna aõna-di rare irehe-ò, iwitxira bedehãwã-ò. Tai aõbina binale riwinymyhÿre. Ibutumy tanieru tai rahure. <sup>14</sup> Taaõwiwi rahu-di ta, tai rama ibede mahãdu rahumyhÿre. Tii uritere reamyhÿ wahe. <sup>15</sup> Tahe aõmysÿdÿÿnamy rarunyre. Hãwãduõ tahe taixÿniòwedÿÿdumy bede riywinyre taoworu-ò. <sup>16</sup> Tai rama risamy ta ixÿni rÿsÿna rÿsÿmy rexinohõtinyre. Tahe aõkõre. <sup>17</sup> Kia tahe tõhõti deade. Kamy dexinohõtinyde: —Yla aõkõ waha aõmysÿdÿÿdu mahãdu irÿsÿnadireri iwana jiarÿ kaki rama warubudÿÿmyreri. <sup>18</sup> Ixyby aròðekre. Kamy Waha-ò arexirybenymy: —Waha, Deuxuko-ò ako-ò rexiiitxÿtenyre jiarÿ raòrarunyre wahe. <sup>19</sup> Ariòre wese aõkõmy wadi mabeke, waitxÿte òraru-ki. Aaõmysÿdÿÿdu mahãdu wese ta ararekre myÿ tii rõhõtiny. <sup>20</sup> Tii tahe tyby heto-ò rare. Irehemy nadeò, tyby tuu dovide. Idi rexiwobrunymy tamy raijaranyre iwehityhydÿÿmy. <sup>21</sup> Tahe tii narybede: —Waha, Deuxuko-ò, ako-ò rexiiitxÿtenyre jiarÿ, raòrarunyre wahe. Ariòre wese aõkõmy wadi mabeke, waitxÿte òraru-ki. <sup>22</sup> Iule ta tyby teòdu mahãdu-ò rarybere: —Wylemy tyywihikÿ tymyra-di bitynybenyke. Debòò tebò-ò roikre. Waõ-di rawanykre. <sup>23</sup> Tasÿse broreni riòre dedi birubunybenyke. Idi rikiroxirenykemy rekeysarenykre dori. <sup>24</sup> Wariòre dori rubu-ribi wese rexixara. Ikõ-ribi itxi ijara rÿira.

Tahe rawobedesarenyre. <sup>25</sup> Iwana ta iumydela tahetoreny-ò dehemynymy nade taaõmysydÿÿna-ribi. Tahe wobedesana-ò roholamy. <sup>26</sup> Tahe deòduõ-ò narybede: —Aõhereriwe. <sup>27</sup> Dirawyònyde: —Ahelÿÿna kie ròsereri aõhe rotÿÿnyõhyylemy. Tai boo broreni rirubunya. <sup>28</sup> Iumydela tai reburere ròte deramy reare. Idi tyby tamy nade riròtenykemy. <sup>29</sup> Tahe iriòre dirawyònyde: —Aõhe òhòkò adee raaõmysydÿÿnymyhÿre. Ibutumy arybe retyhynymy watximahãre. Ihãreta budoeni wadee tewahinyõhyymyhÿte, waijoi mahãdu-wana idi arexideysanykemy. <sup>30</sup> Katahe ariòre urile aõnawiwi rahura wedena mahãdu-wana. Ròðsemyta kai broreni riòrede tamy terubunya. <sup>31</sup> Tai tyby dirawyònyde: —Wariòre iny ratximyhÿre kiaremyta ibutumy waaõwiwi heka ahòròle rare. <sup>32</sup> Iny bedesarenymy heka kawese rewinyre, wadee awireki. Ahelÿÿna dori ruruwese-ribi rexixara. Ikõ-ribi itxi ijara rÿira. Tahe rawobedesarenyre.

## 16

<sup>1</sup> Jesuisi taerydÿÿna mahãdu-ò relyyre ijyyõ: —Hãbuõ inieru sõwere. Tamy deòduõ ibutumy inieru-di raaõmysydÿÿre ijõ nieru ributunykemy. Ijõtxu tahe inyõ rarybere: —Eòdu riki heka anieru-di òbitimy aõkõ raaõmysydÿÿmyhÿre. Anieru sõwemy rexihumyhÿre. <sup>2</sup> Tahe didyde ixidee taconta retehekemy. Tamy rarybere: —Inatyhymy aõbo umy iny rarybemyhÿre? Wanierumy tyyriti aretehekemy watxireri. Òbitimy aõkõkeki, waribi arateònyke. Wanieru-di tiu maaõmysydÿÿnyõkre. <sup>3</sup> Tahe teòdu iximy rexiraykynyre: —Wadinodu riwateònyke. Aõhebo arotÿÿnyke? Warurukõre dori tahe aõmysydÿÿsira ariwinyõtyhy. Tule ijõ iny-ribi iixitòedÿÿna riwaixÿrure. <sup>4</sup> Reeryre tahe, aõhebo arotÿÿnykre. Aõwihikÿ wabiòwa dee ariwinykre. Riwateònykeki tahe wabiòwasÿ-ò arakre. <sup>5</sup> Ibutumy nieru huòtedu mahãdu-wana rarybere, tawedu-ribi huòtedu wahe. Tamyreny rarybere: —Tiwesebo tewyta wawedu-ribi? <sup>6</sup> Tahe diwyònyde: —Adÿÿ rehuòtera, 100 hynamy wahe. Tai tahe rarybere ijõ: —Iwekre tahe wylemy biritinyke, 50 wahe. <sup>7</sup> Ijõ-ò tahe rarybere: —Tiwesebo adeve? Diwyònyde: —Trigo rehuòtera, 1000 prato wahe. Tai tamy rarybere: —Kai 800my biritinyke. <sup>8</sup> Iribi tahe hãbu ityhy heka teòdumy rarybere: —Tii inatyhy nieru erydu ratxireri. Tahe Jesuisi rarybere: —Kabede wijinabòdu mahãdu heka aõmydÿÿnana erydutyhy rare, ityhydÿÿdu mahãdu ratyre wahe. <sup>9</sup> Tai tahe adee ararybekre. Kabede mahãdu biòwamy boibeke, anieru-di. Tahe anieru ituekeki, Deuxu taheto wiwihikÿ-ò aradykre, biu-ò heto wiwihikÿ wahe. <sup>10</sup> Aõmydÿÿnana aõ aõkõmy kai òbitimy masÿnykeki, tule aõ nihikÿmy kai iweselemy mabeke. Inyõ heka ibutemy wasikeki, tii tule aõ nihikÿmy rawasinykre. <sup>11</sup> Kaiboho heka kabede nieru-di òbitimy aõkõ atxibenykeki, tule biu-ki araròsòna bitaõtyhy, aõ wiwihikÿ inatyhy wahe. <sup>12</sup> Iny witxira nieru-di heka òbitimy boibebenyõkeki, timybo anieru tyhy-di òbitimy boibeke. <sup>13</sup> Inyõ iny inatxi deòdumy aõkõ rarekre. Inatxinaõ dori iluukre, ijõ ta iluukõkre. Deuxu dee maaõmysydÿÿõtyhy. Tiu nierurahi inatyhymy teamyhÿteki.

<sup>14</sup> Fariseu mahãdu tamy roholareu, urile idi nierurahi risinyrenyre, tiiboho ire nieru ributunymyhÿrenyre bòdÿÿluurenyre. <sup>15</sup> Tahe Jesuisi tamyreny rarybere: —Kaiboho heka òbitimy inyko-ò ixi-di atximahãtenyte. Ihãre tahe Deuxu timybo toimahãte rierymyhÿre aõna aõnarenyre bina. Aõmy hãbu rexinohòtinymyhÿre, aõtxi-ki Deuxu-ò awiõhyre. <sup>16</sup> Moisesi bede ywina rybe tahe tule Deuxu Rybedu mahãdu awi rare, Joaõ Sebedÿÿdu rehemynyreu tahe ixãwire. Iu tahe Deuxu Iòlòna Rybe wihikÿ tamyra ròhònnyre. Kia tahe

iny ritohodỹnyre. Ibutumy iny kia-ò ralokremy idi ratxireri. <sup>17</sup> Biu, bede rexihuke tahe isiraõre. Deuxu rybe tahe rexihuõtyhy. Kia isiratyhy rare. Ityyriti rybe wedenaõ riõnonyõtyhy. <sup>18</sup> Hãbuõ tahãwyy-ribi ixãwikeki, idi iwitxira-wana roikeki, tii òtadu rare. Hãwyy ixedu-wana tii roikeki, òtadu rare.

<sup>19</sup> Ityhy mahãduõ riki tyy òwyyhykỹwiwi-di rexytyynymyhỹre. Tii idi rexirabedesirananymyhỹre. Awimyhỹre tuu ratximyhỹre. <sup>20</sup> Tahe urimynodu tyymy binadumy iijò-ki ixyby ixyby ratximyhỹre. Lazaru inire. <sup>21</sup> Tii ityhy rỹsỹnauhe rirỹsỹkemy raõbirenymyhỹre. Ijòròsa dori ityybinatòmý di-rahumyhỹde. <sup>22</sup> Lazaru rurureu, ýju mahãdu ridyrenyre biu-ò ilabiereny rora-ò, Abraõ wahe. Tule ityhy rurure idi rituunynenyre. <sup>23</sup> Tahe rubu-ki rubu mahãdu bedebina-ribi aõhõkỹmy dỹynana ityhy Abraõmy robire irehe-ò Lazaru tule irora-ki. <sup>24</sup> Tahe ityhy dyryde: —Abraõ, walabie, wadi inihe bedexiwoboronyke. Lazaru ini wadee tebò-ki beruty-di kanake wadòròtò elehynamy. Jiarỹ dori raõhỹtỹhỹtỹreri kaheòtywo-ki. <sup>25</sup> Tukõleta, Abraõ narybede: —Dàà aõwiihikỹ-di tatemyhỹ-di bexinohõtinyke. Tukõlemyta Lazaru aõbina binahakỹle rimyre. Tahe kaki aõwimy Lazaru ratxireri. Tukõmyta kai ibymy atxiteri. <sup>26</sup> Ihãre ta hãloohukỹ inyko-ki rỹire. Timyki kaludu kia-ò iòhòreseõna. Tule kia ludu kaò iòhòreseõna. <sup>27</sup> Hebose, Abraõ walabie, kamy ityhy narybede, Urile Lazaru wasỹ-ò biteònykekõ aõbo. Waseriòreboho deõwarisidỹmy. <sup>28</sup> Waseriòreneny dori iruyrenenyre urikõ-ribi kabedebina-ò kòdòiheny. <sup>29</sup> Tahe Abraõ diwyònyde: —Tiiboho dori Moisesi tyyriti, Deuxu rybedu mahãdu tyyriti dire. Tii tahe tamy roholarenymy rityhynenyre. <sup>30</sup> Ityhy narybede: —Aõkõre Abraõ walabie. Kia inyõ tarubu-ribi rexixamy ròðsekeki xiery ta, taòrarunaren-y-ribi rexirahĩrenyke. <sup>31</sup> Tahe Abraõ dirawyònyde ixyby. —Moisesi tyyriti rybe-ò, Deuxumy rybedu mahãdu rybe-ò roholaõkeki, tii mobo rexixake tule ityhydỹõna.

## 17

<sup>1</sup> Tahe Jesuisi taerydỹna mahãdu-ò rarybere: —Kiemy inyõ wodohonadỹmy aradykre òraruna-ò besekemy. Kobe làhàxe tii kiawesemy rotỹnykreki. <sup>2</sup> Tii dori ibinatyhy rare. Wadee heka kabera-txi mana-di rataataamy sỹy-ò reakenawi rare. Tukõmy uri-ribi watyhydỹdu tỹmyraõ riòrarudỹnyheny. <sup>3</sup> Bexiijebeny ta. Aityhydỹdu seriòre rexiòrarunanykeki, tamy marãhĩke. Tii rexirãhĩkeki, iaõna aõna bina-ribi bexinohõtilosanyke. <sup>4</sup> Txu sohojiõmy adee rexibinanykeki, kai tule ibinamy tai mahamy. Tii ixi-di rexiwotòenymy adee nakeki, tule idi bexiwobrunymy bexinohõtilosanyke iaõna aõna-di.

<sup>5</sup> Jesuisi erydỹna mahãdu dexitòdenydenyde: —Wanyrỹreny, wainatyhynareneny ini bisõwedỹnyke. <sup>6</sup> Jesuisi dirawyònyde: —Ainatyhynareneny heka sunyisõmo wesekeki, kamy bederarade-ò marybebennyke: —Bexitake inihe idi bera-txi myike. Tahe tii aratyhynykre. <sup>7</sup> Titxibo kaibohoõ eòdudirenykeki aoworu-di itxeredu ada budoeni-di itxeredu wahe. Tii taaõmysỹdỹna-ribi kanalokreu, kawesemy aõbo tamy manarybekre? Wy, wylemy rikiroxikre dori. <sup>8</sup> Timyki kawese tamy arybeõna. Tukõmyta tamy marybeke: —Warỹsỹna biywinyke idi wadee, idi manakre. Ariroxikre dori. Wabyre arihu-di ta bexiòenykre. <sup>9</sup> Teòdu deòdumy rearahu-di aõbo, txiòtòetuukemy tamy rarybere aõbo. Timyki tukõna. Kiemy dori taaõmysỹdỹnale riwinyre. <sup>10</sup> Iu aõmysỹdỹnareneny bihudi, iwese heka atximahãbenyke kamy bexirybenymyhỹbenyke: Inyboho deòdule roire, aõtyhy aõkõ mynodu, iny aõmysỹdỹnarenyle heka inyboho riwinyreny.

<sup>11</sup> Jesuisi Jerusalē hāwā-ò ramyh̄reu, Samaria bedē, Kalileia bedē wotyā-di rare. <sup>12</sup> Iu hāwā-ò-txi raloreu, debo ituemy sōwereny tyymy binamy mahādu iry-ò doide, tahe irehemy rexiereny. <sup>13</sup> Iribi tamy drydenyde: —Jesuisi, Eryd̄ȳdu, wadireny ini bexiwobrunyke. <sup>14</sup> Tureny robireu, narybede Jesuisi-ò: —Xiwena wahid̄ȳna mahādu-ò ixī-di itxerenamy bōike. Kia-ò rariamy roirenyreu, tahe reytereny. <sup>15-16</sup> Ijōreny Samaria ludu mahāduō reytemy iximy robireu, Deuxu riwowyd̄ȳnyny tamy dōōsede, rawiunymy. Tatiowomy Jesusiko-ò resere. Tahe rarybere: —Txiòtòetuuke. <sup>17</sup> Tahe Jesuisi rit̄ȳraxinyre: —Debò itue wese, asōwerenyre? Titxibo ta debò in-aubiōwabohe roire? <sup>18</sup> Aōherekiwe kaa iny wixira sohojile Deuxu wowyd̄ȳnyny dōōsede, Samaria luduō wahe? <sup>19</sup> Tahe Jesuisi tamy rarybere: —Mynyike, idi makre. Atyhyd̄ȳna òraru-ki dori teyteta. <sup>20</sup> Idi fariseu mahādu Jesuisi-ò r̄ȳraxirenyre: —Tiubo Deuxu Iòlōna kanakre? Tii diwyònyde: —Timyki Deuxu Iòlōna dehemynys̄nyny inyō robiōtyhy. <sup>21</sup> Tule inyō kiau rarybeōtyhy: —Betehebeny inihe ka-ò: —Tukōmy aōbo: —Kowaki heka rare? Deuxu Iòlōna dori aworeny-ki rare.

<sup>22</sup> Tahe taeryd̄ȳna mahādu-ò rarybere: —Tiutxumy heka Deuxu Riòre Hābutyhyhyk̄y txumy bobibenykemy tahe bobibenyōtyhy. <sup>23</sup> Tahe ijō adeereny kanarybekre: —Bedetehebeny inihe kaò ada kowa-ò. Tahe iitxerenyōmykre. <sup>24</sup> Iwese tiribi tiò biu relaanymyh̄re wese heka Deuxu Riòre Hābutyhyhyk̄y txu k̄nyikre. <sup>25</sup> Delemy tahe tii aōhōk̄my rot̄ȳnykre. Wijinabòdu mahādu teramy reakre. <sup>26</sup> Noe beded̄ȳnana wesemy heka r̄ymyhykre. Iu beòra rariareu. Tahe Deuxu Riòre Hābutyhyhyk̄y kedehe-mynykre iu. <sup>27</sup> Ibutumy heka worana bedehesi r̄yire. Lisisò tahe r̄yire. Hāwyy herina lisina r̄yire iu. Iu tahe beòra rariare. Ibutumy ituere. <sup>28</sup> Lòò beded̄ȳnana tule iwesere. Tiiboho worana bedehesidile r̄yire. Tiiboho rityhynyōtyhy. Urile hetomy riwinymyhyre, oworumy riwinymyhyre, aōna-di rohonymyhyre. <sup>29</sup> Iu tahe Lòò ihāwā-ribi rōhōnyreu, Deuxu heòty ityre riteònyre. Biu-ribi heòty ityre resere enxofre-wana. <sup>30</sup> Iwesele txu tii heka rarekre heka, Wadehemynyna Deuxu Riòre Hābutyhyhyk̄y wahe. <sup>31</sup> Kiau tahe inyō ihetotyre heka r̄yire. Malòkekō heka ahetowo-ò aōnamynamy. Inyō tule oworu-ki r̄yire, taheto-ò aōkō ròðseke. <sup>32</sup> Lòò hāwyy-di mohōtinyke. <sup>33</sup> Inyō taumy riyrubunykeki, tii ruruke. Ijō tahe wadeewimy rurukeki, tii taumy rayrubukre. <sup>34</sup> Adeē rarybere: —Bede rurureu heka inatxi hābu rōrōreri. Ijō heka rakre dynamy reakre. Ijō tahe rarikre. <sup>35</sup> Inatxi hāwyy heka r̄ys̄na-di raaōmys̄d̄ȳnyny heto-ki ratxikre. Ijō heka dynamy reakre, ijō heka rarikre. <sup>36</sup> Inatxi hābu heka oworu-ki raaōmys̄d̄ȳkre. Ijō heka rakre dynamy reakre, Ijō tahe ririkre. <sup>37</sup> Ieryd̄ȳna mahādu r̄ȳraxire. Titxibo r̄yikre, Wanyr̄y? Tii rirawyònyre: —Titxibo iumy rubu roire-wana, rara tai wii ributunyre.

## 18

<sup>1</sup> Jesuisi heka ròkewesenanyre ribedeerynyreu. Kia wese heka tii ijyymy relyyre. Rexitòenyhykemy tii ribedeerynyre tule ixitòed̄ȳ-ò ixirarenyōmy. <sup>2</sup> Hāwā-ò-ki tahe hābu matuariō rare, tii tahe ibinare. Juizimy heka ratximyh̄re ywisid̄ȳdu wahe. Tii iny rityhynyōtyhy, Deuxu lau ruberuōmyh̄re. <sup>3</sup> Tule heka hāwyy wyteseō tai ras̄nymyhyre. Kia tamy ramyh̄re sōwemy. Tamy rarybera: —Biwawikōhenakre wahe. Wakòludu tahe riwahureri. Kywisid̄ȳk̄du kai atxiteri. Anoherekibo tiwawokutòenykōteri. <sup>4-5</sup> Aōhōkōmy hābu iaōna aōna òbitid̄ȳ deramy reamyh̄re. Tahe Hābu ixidee rarybehyra. Inatyhymy jiar̄y inyō retyhynyōtyhy. Tahe hāwyy wytese sōwemy wadee rarybereki, jiar̄y ariòbitinykre iaōna aōna ibutumy iòludu-wana. Aōkōkeki

tiemy kidiwarulòlòenyke. <sup>6</sup> Tahe Jesuisi ritỹnynyre: —Juizi bina rybe-ò kaiboho boholabenyke. My wahe. <sup>7</sup> Deuxu heka taijoi mahãdu-ò roholake. Òbitimy iòludu-di riywisinykre. Taijoi mahãdu dori tamy rexitòenyre. Tii wymy riwiòhenanyke. <sup>8</sup> Tii inatyhymy taijoi mahãdu riwiòhenanykre. Jiarỹ, Deuxu Riòre Hãbutyhykyỹ wymy adehemynykreu, watyhydỹỹdu-txi aõbo areakre.

<sup>9</sup> Tule Jesuisi kia ijyy relyyre, iny ixityhymy ixidi ratxityhymy kia ijõ inymy kiale radònymyhỹre. Kia tahe rikewesenanyre. <sup>10</sup> —Iny inatxi hãbumy heka templo-ò ròirenyre rexitòenykemy. Ijõ fariseu rare, ijõ tahe nieru arisidu rare. <sup>11</sup> Fariseu tahe rỹimy rexitòenykemy ixidee. My wahe: —Deuxu, jiarỹ aõhãbubina aõkõ rare. Tai tahe umy reàlãmy wahãre. Jiarỹ aõwasidu aõkõ, aõòrarudu aõkõ, aõòtadu aõkõ. Iwese kowa nieru arisidu wese aõkõ jiarỹ rare. Txiòtòetuuke tai. <sup>12</sup> Semana sohoji heka wabyreõ-di inatxixumy rewymyhỹre. Tule waaõna aõna ibutumy ijura adee rewahinyre. Debòwiõna-ribi sohoji rewahinymyhỹre wahe. <sup>13</sup> Nieru arisidu tahe irehemy rỹire. Biu-ò aõkõ retehere, tahe rexihetenyre rexitòenyrerimy Deuxu-ò. My wahe: —Deuxu, biwawotòenyke. Jiarỹ òrarudu rare. <sup>14</sup> Jesuisi ijyy ritỹnynyre: —Adee ararybekre. Mobo teysamy taheto-ò nade? Ixityhydỹỹdu aõbo ada ijõ aõbo. Kohe ijõ tuure, ixityhydỹỹdukõ wahe.

<sup>15</sup> Tiiboho heka uladu tamy didydenyde. Iu Jesuisi tebò iratityre ritidimy ritxuhore awimy roirekemy. Tahe ierydỹỹna mahãdu tamy idyrenyòkremy raryberenyre. <sup>16</sup> Jesuisi rarybere: —Txiò, kididyke uladu wadee. Uladu wese dori Deuxu Iòlõna rare. <sup>17</sup> Inatyhymy ararybekre: —Moõ heka uladu wesemy Deuxu Iòlõna rityhynyòkeki kia heka Deuxu Iòlõna-ò ralòòtyhy.

<sup>18</sup> Idi tahe iweduõ rarybere: —Erydỹỹdu wihikyỹ, aõwexe ariwinykre idi biu-ò arahenykemy. <sup>19</sup> Jesuisi tamy rarybere: —Aõbo wa wihikyỹmy wadee tarybeta. Hãbuõ tiu awiõre. Deuxu sohojile tahe awira. <sup>20</sup> Bede ywina tyyriti kai teeryte:

—Rubudỹỹòmykemy, tule òta òtaõmykemy, wasiõmykemy, tule ruiõmykemy, iny wii itxenadỹỹòmykemy, adi biywinykemy, boo tule.

<sup>21</sup> Hãbu tamy rarybere. —Kia bede ywina rybe retyhynyhyllere, uladudihyyle wahe. <sup>22</sup> Jesuisi rarybere: —Kai sohoji aõmydỹỹnale aki nasiranyde. Kai makre, ibutumy aõna aõna-di bohonykre, idi tahe kia nieru biwahinykre iny aõkõdu mahãdu-ò. Kia tahe aõmydỹỹnadikre biu-ki. Tahe manakre biwaheludunykre. <sup>23</sup> Kia rybe-ki heka hãbu rabadewore. Rexitare ibedewomy iaõna aõna sõwetyhyreki. <sup>24</sup> Jesuisi retehemy ibederyry-di tahe rarybera taerydỹỹna-ò: —Kia iny iaõna aõna sõwemy rỹireri, Deuxu Iòlõna-ò ralòke isirare. <sup>25</sup> Kamelo tyyrorenawo-di ralòkemy isirakeki, kia-ribi isiratyhyre iny iaõna aõnadikeki ralòke Deuxu Iòlõna-ò. <sup>26</sup> Ijohonadu tahe widee rarybere: —Mobo tai biu-ò hedukre. <sup>27</sup> Jesuisi rarybera: —Inatyhymy kãaõboka hãbu-ò isiratyhyre. Deuxu-ò tahe ibutumy aõna aõna isiraõre. <sup>28</sup> Pedro rarybere: —Boholake, jiarỹboho ibutumy rerirenyra araheludunykre. <sup>29</sup> Jesuisi rarybere tamy: —Inatyhymy adeereny ararybekre. Moõ waluukeki, rybewihikyỹ luukeki, kia heka ririkre: heto, taseriòre, tyby tadi-wana, tariòre, tabede, ibutumy waòraru-ki, Deuxu Iòlõna òraru-ki, ririkre. <sup>30</sup> Ka bedekile ritakre sõwetyhymy ibutumy aõna aõna. Ihãreta biu-ò rahenykre Deuxu-wana rasỹnykemy.

<sup>31</sup> Jesuisi taerydỹỹna mahãdu ridyre inysõwe-ribi tamyreny rarybekemy: —Boholabenyke waijoi! Jerusalẽ-ò rokoirenykre. Tai iny riwarubunykre jiarỹ Hãbutyhy rarehãre, Deuxu Riòre rarehãre wahe. Iwese Deuxu Rybemy rybedu mahãdu rarybere wese. <sup>32</sup> Tiiboho riwawahinykre judeukõdu



mahādu-ò. Tiiboho riwabinabinadỹnykre, riwalahikre, watyre rarybexinykre. <sup>33</sup> Riwahetenykre òhòte-di, idi riwarubunykre. Ihāre tahe inataõ txu-di tahe adexixakre rubu-ribi. <sup>34</sup> Jesuisi erydỹna mahādu urile bederiòtiinyrenyre. Aõmybo tii rarybere rierytyhyõrenyre. Irybe tamyreny dori ierynatyhykõreri.

<sup>35</sup> Iu Ijeriò hāwā-ribi iòhòmy roirenyreu, inatxi iny ruetàmy heka rononymyhỹ Jesuisi ibire-di rareu. Tiiboho nierumy rexitòenymyhỹrenyre. <sup>36</sup> Inysõwe-ò roholarenyre tahe, tii rỹraxirenyre: —Aõhereriwe. <sup>37</sup> Tahe tamy rarybere: —Jesuisi wa rareri Nazare hāwā ludu wahe. <sup>38</sup> Tahe ruetàõ rryre: —Jesuisi, Davi riokore! Biwatòenyke hewa! Wadi làhà inihe bexiruxetòenyke. <sup>39</sup> Iny sõwemy tamy rarybere: —Iryõmyke! Ihāre ta tii rryrymyhỹre: —Davi riokore, wadi mawotòeke! <sup>40</sup> Jesuisi rryryre tahe rarybere: —Tamy byryke wadee kanakemy. <sup>41</sup> Jesuisi tamy rarybere: —Aõmybo kai taruteri adee arutỹnykremy. Tahe hābu ruetàhākỹ tamy rarybere: —Wawedu, ixityre arobikremy. <sup>42</sup> Jesuisi tahe tamy rarybere: —Makre, atyhydỹna kai arateytenyra. Kialehe rare. <sup>43</sup> Aõwesele ixityrele tii robire. Tahe Jesuisihemy rare rry-di. Taihe ibutumy iny heka Deuxu riwowydynymyhỹ.

## 19

<sup>1</sup> Ijeriò hāwā-ki Jesuisi rehemynyre. Idi rariareri. <sup>2</sup> Tahe hābuõ tahe Jesuisi riere. Zaqueu inire. Inieru sõwere. Tii nieru tarasadu weduõ rare. Inieru sõwere. Tii heka iyjare tahe Jesusimy robiõtyhy. Raòwònyre tahe òwòru-txi. <sup>3</sup> Tii Jesusimy robikemy risỹnymyhỹ, tiu tuu robiõhyymyhỹreki. Iyjare-ki tahe rexisiranyre. Kiemy dori iny rarie rarie iko-ki rỹimyhỹ. <sup>4</sup> Tahe ijoiko-ò rexi-raòre tai òwòruõ-ò raòwònyre Jesusimy robikemy iribi idi kanakreò. <sup>5</sup> Iu Jesuisi tamy rehemynyreu, biu-txi retehemy Zaqueu-ò. Narybede: —Wylemy bedeseke Zaqueu. Wiji dori aheto-ki bede wadi rỹike. <sup>6</sup> Tahe rabedesamy wymy resere. Awimy Jesuisi rybe-ki rahare. <sup>7</sup> Tahe inyõ mahādu iòraru-ki kamy rexirybenyrenyre: —Aõhewe Jesuisi iheto-ò rara? Tii iny òbikõmy nodu hārele wahe. <sup>8</sup> Zaqueu tahe Jesuisi rarybere: —Bodoholake ini, Wanyrỹ. Tahe waaõna aõna iwekre iaõkõdu mahādu-ò ariwahinymy ararekre. Tule txibo inyõ-ribi rowasire inaubiòwa wawasi ratyre tamy ariwahinykre. <sup>9</sup> Tai Jesuisi narybede: —Wijityhyle kahābu sỹmahādu-ò henana rehemynyra. Kahābu tule Abraõ riore riòrele rare. <sup>10</sup> Deuxu Riòre Hābutyhyhykỹ dori iny òrarunamy resere mahādu òrysmy itarasamy nade. Jiarỹ tiire.

<sup>11</sup> Jesuisi tamyreny rawesenanyre timybo Deuxu Iòlòna raremy. Jerusalẽ hāwā-ò iòhòmy ratximyhỹre. Tai tahe Deuxu Iòlòna iòhòmy ratximyhỹremy roholare. <sup>12</sup> Tahe Jesuisi rarybere iny ityhyõ heka: —Inyõ nihikỹ heka rakemy ratximyhỹre ijõ bede-ò ratỹinkemy. Tai iòlòmy ronykremy rare. Iribi tahe ròsere. <sup>13</sup> Tii tahe taaõmydỹnana ririre teòdu mahādu-ki. Teòdu mahādu debòwiòmy heka womati tỹrỹrỹhỹkỹ nieruõ sohoji sohoji tamyreny riwahinyre. Tamyreny rarybere: —Nieru bitakre, idi bibutunybenykremy adireny watxireri adoosekreu. <sup>14</sup> Tahe kia bede ludu mahādu iòlò deramy ratximyhỹre tai tahe tamy rybemy iny mahāduõ riteònyre: —Kahābu aõkõ iny iòlòreny ronykre. <sup>15</sup> Ihāre tahe iòlòmy ronyre. Idi tahe tanieru wedu mahādu-ò rarariòwyre. Tiwesebo teòdu mahādu nieru ritare rierykemy. <sup>16</sup> Juhuludu tahe rehemynyre: —Wawedu, betehe inihe ijõ debòwiò anieru ratyre rebutunyre. <sup>17</sup> Tahe iòlò sõwemy riwowydynyre: —Awityhymyhe taaõmysỹdỹta. Kai heka deòdu wihikỹ tate. Kai ibutedile sõwemy tewinyte tahe debòwiò hāwā adee ariwahinykre. <sup>18</sup> Ijõ tahe rehemynyre: —Wawedu, betehe iny iruyre anieru tyre rebutunyre. <sup>19</sup> Tahe iòlò tamy rarybere: —Kai

sỹ iruyre hãwãmy dinodu mabekre. <sup>20</sup> Ijõ deòdu rehemynyre: —Wawedu, ahãxe anieru. Jiarỹ tyky-di reraserasenymy rerarenyre. <sup>21</sup> Jiarỹ alau raberure. Kai dori hãbu nieru tarasaery heka tate. Aõ taaõmysỹdỹyteri-ribi aõkõ heka nieru tetamahãte. <sup>22</sup> —Kai heka deòdu awi aõkõ heka tate. Arybe xiery waribi arateònykre. Kai tiwaeryte jiarỹ nieru tarasaery heka watxireri. Aõ raaõmysỹdỹyri-ribi aõkõ nieru retamahãre. <sup>23</sup> Aõherekibo. Kia nieru yrubuna heto-ki terikõte. Tai iximyna ratyre ini iribi ratare. <sup>24</sup> Iòlò teòdu inatxi-ò rarybere: —Wanieru iribi bitabenyke. Ijõ hãbu sõwemy ròtareò rawahikre. <sup>25</sup> Ijõ raryberenyre: —Tii heka debòwiò nieru ijõdire. <sup>26</sup> Adeerarybekre: —Inyõ òbitimy raaõmysỹdỹykeki, tii sõwetyhymy ritakre. Tule inyõ òbitimy raaõmysỹdỹyõkeki, tii ibutumy ròònodỹykre. <sup>27</sup> Iwedu rarybekre: —Waòludu mahãdu tahe wadee bididybedenyke. Wadera mahãdu wahe. Wako-ki birubunybenyke.

<sup>28</sup> Tarybe rahudi tahe Jesuisi rare Jerusalẽ hãwã-ò.

<sup>29</sup> Jerusalẽ iòhòmy ritehemynyrenyre, tahe inatxi taerydỹyña bede riywinyra hãwã-ò roikemy. Inatxi hãwã iòhòmy roire, Betabaji, Betýnia-wana. Kia-ò Oliveira hãwãlò roire. <sup>30</sup> Jesuisi rarybere: —Kaiboho boikre kowa hãwã-ò. Kowa-ò birònykreu jumenta riòre mahabenykre. Moheka ityre rariaõlemy ratximyhỹre. Biesemy, wadee bididybedenyke. <sup>31</sup> Inyõ adeereny rarybekeki: —Aõhekremybo idi atxitenyteri. Tahe tamy marybebenykre: —Wanyrỹ tuu rurureri. Ixityre kaò kidiòkesedỹynykre. <sup>32</sup> Tahe hãbu roire. Iwese Jesuisi rarybere wese ibutumy rỹire. Jumenta riòre ryro hetoijø-ki ritisanymy rỹimyhỹ. <sup>33</sup> Tai riesereu, iwedu rarybere: —Aõherekibo teeseteri. <sup>34</sup> Tai tiiboho Jesuisi rybe myna tamy raryberenyre: —Inynyrỹ tuu rurureri. <sup>35</sup> Tahe ridyrenyre jumenta riòre Jesuisi-ò. Tiiboho tatyreny ritidirenyre jumenta riòre tyremy. Tiiboho risỹnyrenyre Jesuisi ityre-ò. <sup>36</sup> Jesuisi rehemynyreu, ijõboho tahe tauwòhi ryromy ritidire ityre rariakemy. <sup>37</sup> Jerusalẽ iòhòmy rehemynyreu, Oliveira hãwãlò-ribi, ierydỹyña mahãdu rawyhyrarònyreri, tule ryrureri.

<sup>38</sup> Tii heka wowydyna rare. Tii heka Wanyrỹ niwesekekemy naderi. Wowydyna rare Deuxu Iòlòna. Kai Iòlòna kanakre. Wyhyrarò biu-txi kodoholakre.

<sup>39</sup> Ijõ fariseu mahãdu rarybere Jesuisi-ò: —Marybeke aerydỹyña mahãdu-ò tiiboho riyrykemy. <sup>40</sup> Jesuisi tamy rirawyònyre: —Tiiboho riyrykeki, manale wowydynamy riryke.

<sup>41</sup> Jesuisi Jerusalẽ hãwã-ò iòhòmy rehemynyreu, rahinyre. <sup>42</sup> Tii rarybere: —Kaiboho ywinatyhy teeryõte. Inatyhymy teeryte wana wadee awire, tahe aõkõre. <sup>43</sup> Ijõ txu kanakre. Ahãwã ibutumy rirurawonykre aõbina mahãdu, aòludu. <sup>44</sup> Ibutumy hãwã ituekre. Iny iwo-ki tule rurukre. Mana ibutumy kedeseke. Rierykõre dori tiubo jiarỹ ahedỹyrenymy nanade.

<sup>45</sup> Tahe Jesuisi dohodỹyña hetowo-ò ralore. Tahe kia-ribi aõna aõna-di rohonymyhỹre mahãdu, õbradu mahãdu diteònyde. <sup>46</sup> Rierynanymyhỹre tahe tamy rarybere:

—Raridỹyõlemy aõbo rỹireri: —Waheto kõaõboka inatyhymy ixitòedỹyña hetomy rỹirakre. Idi kaiboho tewinytenyete wasidu hetowesele.

<sup>47</sup> Txu ibutumy Jesuisi dohodỹyña heto-ki ròbedeerydỹymyhỹ. Xiwe wedu mahãdu, Deuxu aõmysỹdỹydu wedu mahãdu roholarenyre, rõhõtynyrenyre: —Timybo inyboho Jesuisi rubudỹymy rikiwisỹnyrenykre. <sup>48</sup> Tiiboho tahe aõkõhykre iny sõwemy dori bede riòtiinymyhỹ ibedeerynadỹyña-ki.

## 20

<sup>1</sup> Ijõ txu tahe Jesuisi ròbedeerydỹmy, Ijyy Tỹmyra Wihikỹ wahe. Riri-ranymyhỹrenyreu dohodỹna hetowo-ki, bede ywina erydỹna mahãdu, Deuxu xiwena wahidỹdu mahãdu wedu, tule matuari mahãdu tamy doide. <sup>2</sup> Tiiboho tamy rỹraxirenyre: —Mowe ateòdỹdure kia aõna aõnamy tatỹnymyhỹtemy. <sup>3</sup> Jesuisi dirawyònyde: —Adeereny tule araỹraxikre. Kai-boho bidiwawyònykeki, tahe jiarỹ akoreny ỹraxina ariwyòkre aõrurudibo aõna aõna rewinyhỹre. <sup>4</sup> Tahe Jesuisi ritỹraxinyre: —Mobo Joaõ ratisebedỹmy riteranyre? Deuxu aõbo ada iny aõbo? <sup>5</sup> Tiiboho widee rarybera: —Deuxu riteranyremy inyboho rakaryberenykeki, tai tii rarybekre: —Aõherekibo tahe tii tetyhynytenyõte. <sup>6</sup> Inyõ riteranyremy rakaryberenykeki, iny aru-beruwỹhỹrenykre. Ibutumy iny dori Joaõ rityhynyre tii Deuxu rybe-di rybedumy. Ijõ ijoi mahãdu urile inyreny kidihetenykre. <sup>7</sup> Tai tahe tiiboho raryberenyre: —Jiarỹboho reeryõrenyre. Tai tahe Jesuisi rarybere: <sup>8</sup> —Hebo, jiarỹ adeereny iximy ararybeõtyhy modeòdỹnamy jiarỹ tuu watxirerimy.

<sup>9</sup> Iribi tahe Jesuisi tamyreny ijyy-di rierynanyhỹre: —Hãbu uva oworuõ wese ròbròre. Tahe riòtitynyre. Tahe hãloo riare oworu ubetya-ki, ruỹdỹnyny. Tahe utò riwinyre. Idi tahe rityhere hãbu mahãdu-ò. Tahe rexitare tasỹ-ribi ijõ bede-ò. <sup>10</sup> Tahe bederaty siredey bededỹnana rehemynyreu, iwedu teòdu riteònyre bederaty ritakemy. Tahe oworu-di itxeredu oworu wedu deòdu rimyreny, rihetenynyre idi riteònyrenyre ixihyylemy. <sup>11</sup> Ixityre oworu wedu teòduõ riteònyre. Kia heka irati riheteny ta tamy rawobinarybeny. <sup>12</sup> Ijõ riteònyre. Kia heka rirubunyreny. <sup>13</sup> Iwedu ixi dee rarybere: —Aõhebo arotỹnykre. Tahe oworu wedu iriòre sohojilere, wariòre kie kie sohojile ariteònykre. Tai tiiboho rityhynyrenykre. <sup>14</sup> Kia oworu-di itxeredu mahãdu widee raryberenyre: —Kia heka wedu aõna aõna tarasadu rare. Rurukre, idi tahe iaõna aõna inydeerenykre. <sup>15</sup> Tahe rimyrenyre idi rirubunyreny tahe idi rehurenny oworu-ribi. Jesuisi ritỹraxinyre: —Aõhebo tahe oworu wedu rotỹnykre. Tai Jesuisi ixityre narybede: <sup>16</sup> —Tii kanakre oworu-di itxeredu mahãdu hudumy, tai tahe oworu rityhekre iny witxiraõ-ò. Kia-ò tiiboho roholareu, tahe raryberenyre. Timyki tukõna. <sup>17</sup> Jesuisi idi reny retehemy tahe rarybere: —Ritina-di aõbo tariaõletenyte kia ryberiti:

—Mana-di hetowidỹdu rehura. Kia mana heka hetohãtxi-ki heridu rare.

<sup>18</sup> Inyõ kia manatyre resekeki, kia urile raoroorokre. Mana tahe inytyre resekeki, kia urile risyrisynykre.

<sup>19</sup> Bede ywina erydỹna mahãdu, tule xiwena wahidỹna mahãdu wedu rimyky riwisỹnyre kiaule. Brebumy ta turenkyõre. <sup>20</sup> Tiiboho hãbubinaõ riòwyny tamy imynamy irybe-ki. Tai tahe Dinodu-ò riwahinykremy aõsirakõmy timykibo irutaõmy rirybewitxiranyrenyky. <sup>21</sup> Tiiboho rarybere Jesuisi-ò: —Erydỹdu, jiarỹboho araerymy adi watximahãreny kai inatyhy hãbu tate. Iny ibutumy adee wiwese wiweselere. Inatyhymy iny-ò Deuxurymy teerynanyhãte. Tahe tiiboho ritỹraxirenyre: <sup>22</sup> —Awire aõbo ada ibinare aõbo nieru rawahinyhỹre bede dinodu-ò. Timybo tahe, imposto raòwmy aõbo ada aõkõre aõbo. <sup>23</sup> Jesuisi rierymyhỹre tõhõtinanareny, tahe ritỹraxinyra: —Aõherekibo kaiboho tiwaurihitenyteri. <sup>24</sup> Wadee womati nieruõ bidiwy waitxerenamy. —Kawe moõ tyytarasana rare, katahe moõ tyyritina rare. Tiiboho dirawyònyde: —Kiahe bede dinodu hõrõ rare. <sup>25</sup> Jesuisi rarybere: —Hỹdebo, bede dinodu hõrõ tahe tamy biwahinybeny, tule tahe Deuxu aõna aõnahõrõ Deuxu-ò biwahinybeny. <sup>26</sup> Tiiboho aõkõre. Irybe-ki rimynamy aõkõ. Urile ribedeòtiinyre.

<sup>27</sup> Saduseu mahādu tamy nade. Kia heka iny rubu-ribi rexixamy aōkōre-riki rierynanymyh̄re. Tiiboho ritỹraxyre Jesuisi: <sup>28</sup> —Erydỹdu, Moisesi raritinyre bede ywina-ò, kaimy:

—Hābuō rurukeki, tahāwyy iriōre ijōdiōkeki, tahe kia hāwyy tahābu seriōre-wana roike. Iriōredikre taseriōre rubuōwyy roikre.

<sup>29</sup> Seriōre debòinatxi reuròm̄y raremyh̄. Juhuu ijō roire hāwyy-wana. Tahe tii rurure iriōreōlemy. <sup>30</sup> Tahe ihewoludu iseriōre wytese-wana roire. Tii rurure iriōreōlemy. <sup>31</sup> Ihewoludutyhy tule ibutumy roire wytese-wana, tahe ituerenyre iriōreōlemy. <sup>32</sup> Iròòbymy tahe hāwyy tule rurure. <sup>33</sup> Ixixanau tahe mohābubo tii-wana rarekre. Ibutumy dori wytese-wana roire. <sup>34</sup> Jesuisi rirawyòn̄y: —Kabede-ki hāwyy iny roimyh̄re. <sup>35</sup> Ixixanabedeu heka moō roiōtyhy, inyō dori bede kia riòbnykre. <sup>36</sup> Ibutumy iny ŷju wese rarekre biu bede-txi. <sup>37</sup> Moisesi tatyriti itỹnyh̄kỹlemy rarybere: —Iny rubu-ribi kedexiakremy. Tai ta heòty òwòru sōmo riworonymyh̄ki ixybylesỹ rarybera:

—Deuxu heka Abraō, Ijai, Ijaò kia Deuxu rare.

<sup>38</sup> Tai Deuxu inyru mahādu Deuxu dori rare. Iny rubu mahādu ta aōkōre.

<sup>39</sup> Inyō rarybere: —Arawyòn̄akyhyna, Wanyrỹ tate. Bede ywina tabohe teertyhyte! <sup>40</sup> Tai tahe ixyby rỹraxyōhyreny.

<sup>41</sup> Jesuisi rarybere: —Timybo bede ywina erydỹdu mahādu rarybemyh̄re Kristu Davi riōre raremy. <sup>42</sup> Davi rarybere aōmybo Deuxu Tyytybytyhy tamy narybedemy iwiuna-ki:

—Wanyrỹ rarybere Wanyrỹ-ò:

—Bodony warurunawe-ribi.

<sup>43</sup> Txiōhe inihe, aòludu awarawo-txi aritidikre.

<sup>44</sup> Tahe Davile tanyrỹmy rininire. Timyki tahe Davi itybymykre.

<sup>45</sup> Tii taerydỹna mahādu rierynamyh̄reu. <sup>46</sup> Tii rarybera: —Bexiemyh̄beny bede ywina erydỹdu mahādu lau. Tiiboho heka tyyrehetyhywidihikỹle rexityynymyh̄reny. Tiiboho heka ixi rybedỹluurennyre hāwā riraki. Dohodỹna heto-ki ryanawi luurennyre. Tule ta anarỹ rỹi-wana, tyhytyrekile ryanana tamyreny awire. <sup>47</sup> Tiiboho tule wytese aō aōkō mahādu aōna aōna ritamymyh̄reny. Ixitòedỹna rehehekỹ rexitòenymyh̄reny. Tiiboho heka aōnihikỹmy aōhōkỹmy dỹnanamy rotỹnyrenykre.

## 21

<sup>1</sup> Jesuisi retehemy rỹimyh̄ dohodỹna heto nieruhyna-txi. Tii retehere tibo iny tanieru-di rehumyh̄di. Tai inieru sōwe mahādu nieru sōwemy ritidimyh̄.

<sup>2</sup> Tule tahe nade wytese aō aōkō mahāduō. Tii inatxi nieru sōmo-di rehure.

<sup>3</sup> Tai Jesuisi rarybere: —Kowa heka wytese nieru-di rehure ibutumy iny wixira ratyre. <sup>4</sup> Ijō mahādu tanieru uhedile rehumyh̄. Tahe wytese idi rehure ibutumy tanieru-di rexihumy taumy-ribi idi rehure. <sup>5</sup> Dohodỹna hetomy ierydỹna tamy rarybere: —Erydỹdu, beteheke mana wihikỹ ruxera ruxera-di eryna heto riruxeranyreridi. <sup>6</sup> Jesuisi rirawyòn̄y: —Kaiboho betehebennykre hetonihikỹ-ò. Kia heka mana ijō wityre-ki rỹiōtyhy, ibutumy heka kedeljuxunykre. <sup>7</sup> Tiiboho ritỹraxyre. Tiubohe ibutumy kidiixixāwididỹnykre. Tiiboho ibutumy bede konanadỹnamy reakre. Timybohe arieryrennykre, aōma bede ibutumy rexihukre. <sup>8</sup> Jesuisi tamyreny rarybere: —Kaiboho anaitxenanydenyheny lau bexiebennyke. Sōwemy dori rỹikre wanimy rarybemy rarekre: —Jiarỹ dori Kristu rare. Tahe iny sōwemy itxenadỹmy reakre. <sup>9</sup> Kaiboho wounarybe-ò, aōbina rybe-ò, boholakreu,

breburenyõmykre. Kia heka kanakremy ratximyhÿre. Urile bededÿÿnana ikonanatyhy aõkõ rare.

<sup>10</sup> Tii tamyreny rarybere: —Uritere iny lahinareny, ijõ lahinareny widee kanaaõbinanykre. Tule iòlõna mahãdu, ijõ iòlõna mahãdu-wana widee kanaaõbinanykre. <sup>11</sup> Bede bedesu ijõ hãwã-ki kanamytatakre. Tahe aõkõre rama kedeakre. Kia heka juhu aõhõkÿmydÿÿnana rarekre. Aõbrebuna brebuna kÿnyikre. Idi biu-ki aõwitxira kÿnyikre. <sup>12</sup> Tiiboho arawahinyrenykre aòludu wedu-ò, iòlò-ò. Kaiboho heka aõhõkÿmy iu botÿÿnybenykre, watyhydÿÿ òraru-ki. Tiiboho arahatenyrenykre dohodÿÿna hetowo-ki. Kiabohoko-txi wadee kaiboho kedelyykre inatyhymy aõna aõna rÿiremy. <sup>13</sup> Rybewihikÿmy ibutumy bede bede hãwã hãwã-ò belyybenykre. <sup>14</sup> Tiubo aradyrenykeu, urile nohõtìõmy aõmybo kaiboho marybebenykre. <sup>15</sup> Kiautyhyle aõmybo marybebenykre bierykre. Kia tahe marybekre. Kai aõkõ dori marybekre, Deuxu Tyytybytyhy tahe rybedukre. <sup>16</sup> Asÿreny dori ròtenawo-ò ararõtenyrenykre. Seriõre seriõrele wii kidirubunykre. Tyby heka tariõre kidirubunykre. Uladule tadi, tyby kidirubunykre. <sup>17</sup> Ibutumy heka iny iy kedeakre wani òraru-ki adeereny. <sup>18</sup> Ibedeu araderenytiõ reseõtyhy. <sup>19</sup> Bexityhymy ta tai ixiery dori biu-ò mahenybenykre. <sup>20</sup> Ijõ tahe Jesuisi rarybere: —Woudu mahãdu Jerusalẽ rirurawonykreu heka bierybenykre aõhuluhudunamy bede rÿirerimy. <sup>21</sup> Judeia hãwã hãwã-ki ratxikeki, mahenybenykre bederatòhòkÿ-ò. Inyõ Judeia hãwãkikeki, iribi òlò rÿikre. Idi inyõ bederokeki ixyby Jerusalẽ-ò ròteõmykre. <sup>22</sup> Kia txuu heka òwynatxumy rare. Ibutumy rybe tyyriti myna heka bede rÿikre. <sup>23</sup> Kobexe heny hãwyy bõtòm rÿira, tule hãwyy tariõre ritònomy rÿira. Aõhõkÿmydÿÿnana kanakre tiu heka tuuõre. Debure nihikÿ heka kanake kia iny tyre-ki. Tiu heka kiamy bede roiõtyhy aõhõkÿmydÿÿnanamy. <sup>24</sup> Sõwemy iny rurukre mayrehe-di. Iny sõwemy radykre ijõ bede-ò aõhõkÿmy tai rotÿÿnykre. Ityhydÿÿdukõdu mahãdu rasÿnykre Jerusalẽ hãwã-ki iu.

<sup>25</sup> Ixityre tahe Jesuisi rarybere: —Idi webòhõna rÿira txuu, aõhõkÿmydÿÿnana itue-di, txuu heka rurunykre. Ahãdu tule rurunykre, tule taina. Beòbò lau iwodÿÿ lau ibutumy iny ruberukre inihikÿ òraru-ki. <sup>26</sup> Iu bede bede iny mahãdu aõhebo rotÿÿnymy, tatòhõtibre-di tiiboho reserenyre sutyre-ki tai. <sup>27</sup> Iny retehekre

Deuxu Riõre, Hãbutyhyhykÿ dehemynyna-di. Biurawetyky-ribi kodobehekre tatyhy-di.

<sup>28</sup> Tahe kia aõmydÿÿnana rÿikre, ywinamy bõibenykeu, iòhòlereri.

<sup>29-30</sup> Tai tahe Jesuisi figueiraò-wana tahe bede ròkewesenanyre: —Figueiraò-di ini bexinohõtinybenyke. Tii heka tairu-txi, tanoiròsò ritÿmyranymyhÿreu, tai tahe bierybenykre wyra iòhòlereri. <sup>31</sup> Tule kia aõna aõnamy bobibenykreu, tii iòhòlereri. Ijò-ki iòhòwesele rÿire. <sup>32</sup> Inatyhymy adee ararybekre, kia wijinabòdu itueõtyhy aõna aõna rÿikre hãrele. <sup>33</sup> Biu, bede-wana ituekre, tahe warybe itueõtyhy.

<sup>34</sup> Tahe Jesuisi tarybe rihumy rarybere: —Kaiboho bexiebenyke, betehebennykre ixinohõtìdÿÿrenythykõmy. Roxina worana bedehesi-di timybo kaiboho atximyhÿtenytedi. Mona juberere biõbenykeny mohõtinyõke. Kaiboho dori teeryõteny te tubedemybo adòðsekre. <sup>35</sup> Kiatxu kanakre tahe iwese nawii mynyna wese aõwesele rimykre ibutumy bede iny mahãdu rimykre. <sup>36</sup> Biebenyke tahe, Deuxu-ò bexitòenybenyke. Kia tahe aõhebo rotÿÿnykre-ribi mahenyke. Bityhynyke Deuxu Riõre, Hãbutyhyhykÿ, jiarÿ wahe.

<sup>37</sup> Txuõ txuõlemy tii Dohodỹña heto-ki ribedeerynyre ihãre tahe rummy Oliveira hãwãlò-ò rara. <sup>38</sup> Rudile tahe sõwemy iny dohodỹña heto-ò rehemynymyhỹre Jesuisi rybe-ò ijohomy.

## 22

<sup>1</sup> Iòhòmy ratxireri Pascoa worana bedehesi kodohònykremy. Kia anarỹ wehityhynamy heka iny ratya-di reare. Tule orotxu anarỹ kìa ròhònyre. <sup>2</sup> Deuxu aõmysỹdỹdu wedu mahãdu, tule bede erydỹdu mahãdu Jesuisi rymykemy ratxireri idi rirubunykemy. <sup>3</sup> Satanasi heka Judasi Isariòwo-ki ralore, tii Jesuisi erydỹnaõ ihỹre. <sup>4</sup> Juda Isariò heka Deuxu aõmysỹdỹdu-ò rara Jesuisi riwahinykemy. <sup>5</sup> Tiiboho tamy roholarenyreu, reysare. Tahe tamy nieru riwahinykemy riurenanyre. <sup>6</sup> Tahe Juda riijemyhỹre aõu aõu bedewihikỹ tamyreny riwahinykemy. Wasimy riwahinykemy tii roholare.

<sup>7</sup> Juhu orotxu anarỹtxure budoeni xiweloo rirubuny rahudi tahe Jesuisi erydỹna mahãdu tamy rarybere: —Titxibo anarỹ rỹsỹnamy biroxikemy atxiteri. <sup>8</sup> Tahe Jesuisi heka Pedro, Joaõ-wana riteònyre: —Kaiboho boike iny rỹsỹnareny ywidỹmy. <sup>9</sup> Tiiboho rỹraxire. Titxibo ariwinyrenykre? <sup>10</sup> Jesuisi tamy rarybere: —Kaiboho boikre hãwãhãkỹ-ò. Tahe hãbu-wana wii biòbynykre butxi-di retyreriò. Tahe tii biheludunybeny. Titxibo heto-txi ralokreò, kaiboho tule bironybenymy bitỹraxinybenykre heto wedu: <sup>11</sup> —Wawedureny rarybera: —Titxiwexe anarỹ rỹsỹna arirỹsỹkre waerydỹna mahãdu-wana. <sup>12</sup> Tii heka adee kiditeòsinykre hetowoõ-txi biu-ki. Ibutumy rexihumy rỹire inydeereny. Tai rỹsỹna inydeereny biywinybenykre. <sup>13</sup> Tahe ierydỹna rexitare. Roire hãwãhãkỹ-ò. Tahe rotỹnyrenyre Jesuisi rybe myna. Tahe ibutumy rexihurennyre anarỹ-ò.

<sup>14</sup> Kia txu rymyre tahe Jesuisi nade taerydỹna waòinatxi reurò-wana byremy ronyrenykre. <sup>15</sup> Tii tamyreny rarybere: —Jiarỹ awanareny ariroxikemy watxiwãhãre. Karibi dori warubuna-ò arakre. <sup>16</sup> Inatyhymy ararybekre: —Jiarỹ konanamy ayreny-ki ariroxikre. Ixyby ta Deuxu Iòlònakile tahe rikiroxirenykre. <sup>17</sup> Tahe vỹ mona hyna rymyre, rexitònyre, tahe tamyreny riwahinyre. Ibutumy ibute bute iribi tuu riòreny. <sup>18</sup> Inatyhymy ararybekre: —Tiu ixyby tuu ariõõtyhy Deuxu Iòlòna-ki kotyre. <sup>19</sup> Tiiboho riroxireriu, Jesuisi orotxu rymyre, raorore, rexitònyre, tahe tamyreny riwahinyre. Rarybere: —Ahãxe, kìa heka waumy wese rare. Iu biroxikey, warubuna-di mohòtinybenykre. <sup>20</sup> Biòbenyke! Kaa dori wahãlubu wesemy ratxireri. Tahe tamy riwahinyre riòrenykre. Tai sõwemy iny ròhònyke biu-ò hena-ò ibutumy òraruna ixãwididỹmy. Tuu ròhònyra. Kia heka wadeewimy iny Deuxu-wana ratxiinyhỹre, wahãlubu òraru-ki. <sup>21</sup> Boholabeny inihe watyhedỹdu inykyrenykre ronyre. <sup>22</sup> Iwese tyyriti-ki roire wese heka arurukremy, Deuxu Riòre, Hãbutyhyhykỹ, jiarỹ wahe. Kobe làhàxe watyhedỹdu. <sup>23</sup> Tiiboho tahe widee rarybere: —Mobo tahe rare? Mobo Jesuisi riwahinykre.

<sup>24</sup> Iribi tahe widee raryberenyre, mobo wiratyreremy? <sup>25</sup> Tahe Jesuisi tamyreny rarybere: —Kabede iòlò mahãduy-ki iruru dire. Bede dinodu tahe iny rininire: Iny biòwa. <sup>26</sup> Tahe ayreny-ki kawese aõkõ ihỹre. Inihikỹtyhy inyõ ratxikeki, tii inyuhe deòdumy ratxikre. <sup>27</sup> Tibo inytyhy rare? Roxidu mahãdu ada deòdu mahãdu? Roxidu mahãdu, aõhe inatyhy? Jiarỹ tahe ayreny-ki deòdu wesemy jiarỹ rare. <sup>28</sup> Kaiboho heka wawanahy atxitenyete aõhõkỹmy ratỹnymyhỹreu. <sup>29</sup> Tai tahe adee ruruna ariwahinykre. Iwese Waha wadee riwahinyre wese, adee ariwahinykre. <sup>30</sup> Waiòlòna-ki kaiboho wawana biroxikey, biòbenykre. Tule rynana wiwihikỹ tyre-ki rỹdu

mahādumy bonybenyke. Israeli iny mahādu heka kaiboho biòbitinybenykre, ibutumy judeu mahādu wahe.

<sup>31</sup> Jesuisi ijō rarybere: —Simaō, Simaō, wadee bohولاتyhyke. Sa-tanasi araurihirenykemy wadee rexitōenyre. Tahe adeereny kanake araurihidỹmy. <sup>32</sup> Dori rexitōenymyhỹre, Simaō, kai bityhynyhykemy. Wadee bōdōòsekeu, abiòwa mahādu biwiòhenanyke. <sup>33</sup> Tahe Pedro diwyònyde: —Awanahyy arakre, wanyrỹ, arurukre hāre, ròtenawo-ò arakre hāre. <sup>34</sup> Jesuisi tamy rarybere: —Pedro, kai biwatxiōnyke, hānie hābu ryrykōule biwatxiōnyke inataōmy.

<sup>35</sup> Jesuisi tamyreny rỹraxyre: —Juhu arateònyrenyreu anieruhynakōmy, asaurenkōmy, awarenyōmy, adeereny aōbo aō rasiranyre? Tiiboho dirawyòmy: —Aōkō, aō rasiranyōhyre. <sup>36</sup> Tahe Jesuisi narybere: —Wiji tahe txibo inyō inieruhynadikeki, saudikeki, biwykre. Txibo inyō imayrehedikōkeki tayhyitxena-di rohonykre iòwy-di tahe tii riòbranykremy. <sup>37</sup> Kamy dori Deuxu rybe tyryiti-ki roire:

—Òbitikōmy nodu mahādu-wana tii rỹire.

Ibutumy timybo tyryiti wamy rarybere heka rỹikre. <sup>38</sup> Tamy ierydỹna mahādu rarybere: —Wanyrỹ, kaa inatxi mayrehe rỹire. Tahe Jesuisi rỹire rarybere: —Awire kia.

<sup>39</sup> Tahe Oliveira hāwālò-ò roirenyre, taerydỹna mahādu-wana. <sup>40</sup> Tiiboho kowa-ò rehemynyreu, Jesuisi rarybere: Bexitōenyke! Tai tahe òraruna-txi beseōke. <sup>41</sup> Tahe iko-txi urihimyò rareu, taowotimy resemy. Rexitōenyre: <sup>42</sup> —Waha, adee arexitōenykre. Adee awikeki, aōhōkỹmy dỹnana waribi biixāwidỹnyke. Tahe adeewikomykre, wadeewi ta aōkōre. <sup>43</sup> Ŷjuō tamy nade biu-ribi tamy ruru riwahinyre. <sup>44</sup> Sōwemy tahe rexitōenyre, iòsana-ribi resere bee wahe. Hālubu wese heka ihỹre resereri bede-ò. <sup>45</sup> Tii rehemynyre tai rahare rōrōrenymy roireriò. Tiiboho ele risarennyre sōwemy rabadeworenyreki.

<sup>46</sup> Tamyreny rarybere: —Aòherekibo taròtenyteri? Biijebenykre, bexitōenykre.

<sup>47</sup> Tii rarybereriu, aōwesele Judasi nade. Tii-wana doide hābu mahādu. <sup>48</sup> Jesuisi rarybere Judasi-ò: —Judasi, Deuxu Riòre bityhenykre aōbo, jiarỹ hābutyhyhykỹ wahe? Waòbuò-di aōbo biwatyhenykre? <sup>49</sup> Jesuisi erydỹna mahādu tuu robireu, tamy rarybere: —Iny mayrehe-di araaòbinanyrenykre, Wanyrỹ. <sup>50</sup> Kia ijoiō mayrehe ritare tahe Deuxu aòmysỹdỹdu wedu deòdu nohōti riorore. <sup>51</sup> Tahe Jesuisi rarybere: —Ixāwike. Tahe hābu nohōti riteytenyre. <sup>52</sup> Tahe Jesuisi dirawyònyde tamyreny, Xiwe wahidỹdu mahādu-ò, dohodỹna heto itxedu wedu-ò, matuari mahādu-ò: —Kaiboho mayrehe-di, òhòte-di tiwaòrytenyteri jiarỹ wasiduòrys wese. <sup>53</sup> Jiarỹ tahe dohodỹna heto-ki watximyhỹ txuō txuòlemy adeereny anaerynanymahādenyde. Kowa-ki heka tiwamyòlemyhỹtenyde. Kia heka bededỹnana rexihure. Bede luru ruru roirerimy. Tahe aōbo iritina-ki rỹireri, kia heka kỹnyikremy.

<sup>54</sup> Xiwena wahidỹdu mahādu dinodutyhy-ò wedu-ò tiiboho Jesuisi ridyrenyre. Pedro riheludunyre ireheriòremy. <sup>55</sup> Rehemynyreu tai Pedro ixitòteenymy heòtywera-ò ronyre heto itxeredu mahādu-wana. <sup>56</sup> Pedro ratximyhỹ-ò tahe deòduò rehemynyre, ijadòma wahe. Pedro-di ijadòma retehemy ta rarybere: —Tii tule Jesuisi Nazareludu-wana ratximyhỹre. <sup>57</sup> Tahe tii rexitxiōnyre: —Jiarỹ reeryòre aōmyboho kai tarybeteri. <sup>58</sup> Ixybyle kowa ijoiō Pedro-ò rarybera: —Inatyhymy kai ijō mahāduleō tate. Tii inatyhytyhyrybemy rarybera: —Jiarỹ reerykōre hābumy tarybetenyteri. <sup>59</sup> Ijō òrau tahe ijō rarybere: —Inatyhy rare kai Jesuisi-wana ahāte, Kalileia mahāduòreki. <sup>60</sup> Tahe Pedro rarybere: —Hābu, reeryòre aōmybo tarybeteri!

Tahe hānie hābu robura. <sup>61</sup> Jesuisi heka Pedro-ò retehere. Tahe Jesuisi rybe-txi Pedro tōhōti reare. Iwese Jesuisi rarybere: —Hānie inataōmy robukre myna, kai waheludumy bedexitxiōnykre. <sup>62</sup> Pedro tahe iribi rexitareu, ixidee icy reamy rahinyre.

<sup>63</sup> Tahe hābu mahādu Jesuisi rihetenymy, rilahirenymyh̄yre. <sup>64-65</sup> Tiiboho riruehetynymy rihetenymy idi rit̄ȳraxinymyh̄yre: —Mowe arahātenyra. Idi tahe sōwemy idi risinymyh̄reny.

<sup>66</sup> Rudile tahe judeu wedu mahādu ributunyre xiwena wahid̄ȳna mahādu-wana. Jesuisi ridyrenykemy raryberenyre dohod̄ȳna mahādu-ò.

<sup>67</sup> Tamy rit̄ȳraxinyre: —Kai aōbo Kristu tate, Deuxu Riòretyhy. Jesuisi rarybera: —Jiar̄ȳ heka kohemy ararybekeki, kaiboho biwatyhynyōtyhy.

<sup>68</sup> Adeereny ar̄ȳraxikeki, kaiboho biwawyònybenyōtyhy. <sup>69</sup> Kaiboho bierybenykre

Deuxu Riòre heka jiar̄ȳ rare. Idi Waha rurunaweribi-ò aronykremy.

<sup>70</sup> Ibutumy tahe tamy rarybere: —Kai aōbo Deuxu Riòre tate? Tii rirawyònyre: —Iwese kaiboho tarybetenyteri wese jiar̄ȳ inatyhy rare. <sup>71</sup> Tahe tiiboho raryberenyre: —Inyō irybe-ò ijohoke heka aōkōre, inybohōle dori tuu roholarenyre.

## 23

<sup>1</sup> Kia iny ka ibutumy Jesuisi ridyrenyre Pilato-ò, bede dinodu-ò wahe.

<sup>2</sup> Idi tahe aōbina binahak̄my tuu raryberenyre: —Kahābu heka bede rijeijeinyreri iòlomy ijoi radōnykemy. Iribi iòlò-ò òwyd̄ȳ r̄ȳiōmyh̄kemy rarybere. Ihāreta Deuxu Deòd̄ȳnamy raremy idi iòlomy rexininimyh̄yre. <sup>3</sup> Tahe Pilato r̄ȳraxire Jesuisi-ò: —Inatyhywe kai Deuxu mahādu iòlòtyhy tate? Tai tahe Jesuisi riwyònyre: —Kai tuu tarybeteri, Wanyr̄ȳ. <sup>4</sup> Tai tahe Pilato rarybere xiwe wahid̄ȳdu mahādu dinodu-ò, tule inysōwe mahādu-ò: —Timyki kahābu aōhōk̄my was̄ȳd̄ȳōna, aōō bina dori riwinyōlere. <sup>5</sup> Tai ixbyby idi ris̄nyrenyre: —Kahābu heka Kalileia bede-ribi bede rijeijeinymy rareri, idi Judeia bede-di tule katahe kakile tuu rot̄ȳnyre. <sup>6</sup> Taita Pilato r̄ȳraxire: —Tii aōbohe Kalileia mahāduō ratxireri? <sup>7</sup> —Tii Kalileia mahādu rare. Kia Pilato rieryreu, Herodi-ò riteònykemy rexinohōtinyinre. Tii kia dinodureki. Ihāreta Herodi Jerusalē hāwā-ki iu ratximyh̄y.

<sup>8</sup> Herodi Jesuisi robireu heka reysare. Jesusimy robikemy riwis̄nymyh̄yre sōwemy. Idi tahe tuu robireke, reòsare. Tai tahe reysare. Ini-ò roholahyymyh̄yre. Tule aōwihik̄y witzira riwinykemy idi riwis̄nymyh̄yre.

<sup>9</sup> Idi tahe Herodi sōwemy r̄ȳraximyh̄yre. Jesuisi tahe rirawyònyōhyre.

<sup>10</sup> Aōbo xiwena wahid̄ȳdu mahādu wedu, tule bede ywina er̄ȳd̄ȳdu mahādu sōwemy aōna aōna binamy tuu raryberenyre. <sup>11</sup> Herodi tasoldado-wana tuu raòhòtemy idi risinymyh̄reny. Tyywihik̄y-di rirahananyrenyre. Iribi riòkesed̄ȳnyre Pilato-ò. <sup>12</sup> Juhuu heka Herodi Pilato òludumy widi raremyh̄y. Kia txule tahe widee rowoixirenyre.

<sup>13</sup> Idi tahe Pilato tahe ibutumy xiwena wahid̄ȳdu wedu, tule matuari mahādu tule ijō iny mahādu ributunyre. <sup>14</sup> Tamyreny rarybere: —Kaiboho heka wadee tedytenyteri bede jei jeiwid̄ȳdumy tuu tarybetenyte tebutenyteri heka. Jiar̄ȳ akoreny-ò ret̄ȳraxinyre idi aōhe tai ibinamy rahaōhyre. <sup>15</sup> Tule iòlò Herodi tai ibinamy rahaōhyre. Tai diòkesed̄ȳnyde. Tai iurenana ta aōhereki timyki irubuōna. <sup>16</sup> Urile raòhòted̄ȳkemy bede reywinyre idi ta ixinamy rakre. <sup>17</sup> Kiemy dori worana bedehesiu, ròtena-ribi inyō heka ròhònymyh̄yke. <sup>18-19</sup> Sōwemy iny heka rirajuare: —Aōkōre uritere ta Baraba biteònyke. Kia hābu urile ruruke. (Baraba inyrubud̄ȳdure. Bede jei



jeidỹỹ-ki heka ròtena-ò ralore.) <sup>20</sup>Tai Pilato Jesuisi òlòdỹỹmy riwisỹnmyhỹ tai ixyby rarybere: —Aòkõre Jesuisile ariteònykre. <sup>21</sup>Sõwemy iny ixyby ryryre: —Aòkõre, itxeò-ki bitamadỹỹnyke! <sup>22</sup>Tahe Pilato tainatãõnamy narybede: —Aõherewe, aõwe tii ibinamy riwinyre. Aõheka tai ibinaõhyreri rubu-ò rawahikemy. Òhòteòle ta arawahinykre idi ariteònykre. <sup>23</sup>Ihãre ta iny sõwe mahãdu ire rirajuamyhỹreny itxeò nihikỹ-ò rurukemy. Ixieryta iryreny-ò roholare idi tukremy. <sup>24</sup>Iu Pilato heka Jesuisi riwahinyre rubu-ò tumyna rexitòenymyhyreny. <sup>25</sup>Ijõ hãbuõ ta ròtenawo-ribi riòlòdỹỹnyre, iixitòedỹỹreny myna wahe. Tii hãbu aleerydu rare, tahe bede jei jeidỹỹdu tule. Iwana ta Jesuisi rawahire irybemynarenymy aõhebo rotỹỹnykremy.

<sup>26</sup>Tahe Jesuisi ridyreny. Ryki tahe hãbuõ iutedereny-ò nade, Simaõ inire, Sireni hãwã ludu wahe. Nohõtiòlemy ta ityre itxeò nihikỹ ritidirenyre, iherenymy idi kanakremy.

<sup>27</sup>Sõwemy ihemy nodu sõwe. Iy-ki hãwyy mahãdu Jesuisi-di robumyhyreny. <sup>28</sup>Tii tahe tamyreny rexiòkesemy narybede: —Jerusalẽ hãwã ludu hãwyy mahãdu! Ixirahi bobubenyke ariòre rahi tule warahi ta aòkõre. <sup>29</sup>Tiutxumybo bexirybenybenykre: —Hãwyky bedekòby heka raritxòrenykõre mahãdu rare, tohokuã ritònykõre mahãdu tiku kuladu-di tarukikõre mahãdu. <sup>30</sup>Tiutxumybo

bexirybenybenykre hãwãlò-ò: —Watyreny bedeseke

tule hãwãlò riòre-ò bexirybenybenykre: —Biwawòbenykre.

<sup>31</sup>Wiji kawesemyhyre hee itukure hãre. Timykrebo tahe hee irubukreu.

<sup>32</sup>Ihãre tasỹse iny inatxi hãbu òbitimy nodu aòkõ ridyrenyre Jesuisi-wana rururenymy.

<sup>33</sup>Tahe hãwãlò riòre-ò ratitybymy ninadu-ò ritehemynyreny. Tahe tii-wana inatxi wasidu itxeò nihikỹ-ò rilamadỹỹnyreny. Ijõ ruruweribi-ò ijõ hyweweribi-ò. <sup>34</sup>—Waha, idireny bexiruxetòenyke rieryõhyreri dori aõmybo rotodỹỹnyreri.

Tai tahe ityy wimy ritxuatxukremy dado-di rehumyhyreny tibo iwydydukremy.

<sup>35</sup>Iny retehemy rỹimyhỹ taile wahe. Judeu wedu mahãdu tule Jesuisimy rarybere: —Tii iny sõwemy rihedỹỹnyre, kia aõherekibo tii rexitaõreri rubu-ribi, tii Deuxu deòdỹỹna rarehãre. <sup>36</sup>Tule soldado mahãdu rarybere aõbina binahakỹlemy. Diwyde tii aõna ta iny kremy rirahòreny tamy idi reare rijeny: <sup>37</sup>—Kai inatyhymy judeu mahãdu iòlòmny atxiteri wana heka kaa bexitakre iribi.

<sup>38</sup>Itxeò ratya-ki tahe aõma timy roire tyrytidỹỹna.

—Kaa Heka judeu Mahãdu Iòlò Rare.

<sup>39</sup>Ijõ heka rarybereri Jesuisibire-ki roireriòle tamy rarybereri: —Deuxu deòdỹỹna tateki, bexitake tule biwatabenyke. <sup>40</sup>—Wy, Deuxu lau taberuòlemahãte aõbo tule dori iny aõhòkỹmy rokotỹỹnykrelemy iny roireri.

<sup>41</sup>Lòwudu tamy rarybereri: —Iny heka rurureri, aõbina binahakỹ iny riwinyre òraru-ki. Iny rurureri. Kaa hãbu rỹire tiu aõbina riwinyõhykyre.

<sup>42</sup>Jesuisi-ò rarybere: —Jesuisi, watxi òhõti beakre Iòlòmny bonykreu. <sup>43</sup>Jesuisi tamy rarybere: —Wijile heka biu-ò heka rakakre.

<sup>44-45</sup>Txutyemy bede roronyre idi txioro txu rehehekỹ-ò bede tuu rỹire. Inataõ òramy bede rybinyre, rỹire. Heto-ki rahanaheridu urile raykare templowo-ki wahe. <sup>46</sup>Tahe Jesuisi rirajuare: —Waha, watyytyby adee rawahinyreri. Iu irybe rexihureu rurure. <sup>47</sup>Soldado mahãdu wedu tuu robire kia aõhebo rotỹỹnara tuu rarybere: —Kia inatyhymy hãbu òbitityhy rare.

<sup>48</sup>Ibutumy iny kia robire Jesuisi rubu-ò rahinymy ròsere rexihetenymy

tabreti-ò. <sup>49</sup> Ibutumy tii mahādumy ratximyhÿre iribi ireheriòremy rexiijemyhÿ.

<sup>50-51</sup> Tii judeu bede mahāduõ rare. Jyjemy inire. Tahe Kristu rubuna-ki awimy rahaõhÿÿre taijoi mahādu-ribi. Tii dori Deuxu Iòlòna riraòmyhÿre. Ihāwā Arimatea inire. <sup>52</sup> Tai ta rare ixitòdedÿÿmy Pilato-ò, Jesuisi umy kidiwahinykremy. <sup>53-54</sup> Tai tahe ritare itxeò-ribi tyy ura nihikÿ-di tyy-di ritÿtetÿtenyrene. Manawabedewo-ò ritidire. Tai tiu iny rahāloonaõmyhÿre. Aõma judeu mahādu elehyna txu wahe ixiywidÿÿnatxumy txu rÿireu heka aõma worana bedehesi txu. <sup>55</sup> Hāwyy mahādu Kalileia-ribi Jesuisi-wana. Tiiboho doide Jyje-wana Jesuisi hāloo-ò itxeremy. <sup>56</sup> Tahe timybo roimyhÿ ritòtudunynyrene. Dòòsedenyde iribi aderòna lÿnyrene ywidÿÿmy iumy tÿnyrenamy.

Kia rexielehynynyrene sabado txu bede ywidÿÿna myna-di.

## 24

<sup>1</sup> Juhu txu semana bededÿÿnanau txuu deadeu hāwyy roire wabede-ò. Tiiboho riwyrene lÿnyrena. <sup>2-3</sup> Rehemynynyrenyreu, mana nihikÿ tahe ijò-ribi ratamy rÿire. Tahe ralòrenyreu, Jesuisiumy ihoõhyyre. <sup>4</sup> Wabede-ò rirònyrenyreu, robirenyrene inatxi hābu. Ityy urahakÿmy rononymhÿre tai. <sup>5</sup> Tahe tiiboho bede riòtiinyrenyrene idi tabrebu-di suò reserenyrene. ÿjyõ tamyreny rarybere: <sup>6</sup> —Iny irumy kaiboho teijeteri kaki wabede-ki aõbo? Tii kaki ratxireri. Tii rexixara rubu-ribi adeereny rarybere wese Kalileia bedeki: <sup>7</sup> —Inyõ riwawahinykre inybina-ò Deuxu Riòre Hābutyhyhykÿ. Itxeòtyre-ki arÿikre tai arurukre. Inataõ txu-di tahe rubu-ribi arexixakre. <sup>8</sup> Tahe hāwyy irybe-di rōhōtynyrenyrene. <sup>9</sup> Wabede-ribi rajaranyrenyrene Jesuisi erydÿÿna mahādu-ò ijyymy. <sup>10</sup> Kia tiibohore: —Marie Madalena, Joana, Marie Txiause. Ijõ hāwyy tule tii-wana roirenyrene. <sup>11</sup> Iu tamy relyyreu, rityhynyòlerenyrene. <sup>12</sup> Pedro tahe rÿimy reare idi rajaranyrene wabede-ò. Urile tykylemy robire tahe dòòsede, rexiòtiinyrene.

<sup>13</sup> Itxuleu ta iny inatxi hābu Jesuisi tyhydÿÿdu mahādu tahe roirenyrene Emau hāwā-ò. Jerusalē hāwā-ribi txibo 10 km wese irehere. <sup>14</sup> Ibutumy aõhebo rotÿÿnyramy wiko relyymy ròimyhÿre. <sup>15</sup> Iuleta Jesuisi tamyreny dehemynyde idi tiiboho-wana roire. <sup>16</sup> Tiiboho tuu robirehāre timykibo rierykōhykyrenyrene. <sup>17</sup> Tahe Jesuisi rōtÿÿraxire: —Aõmywe widee tarybetenyteri. <sup>18</sup> Iijõreny Klopamy nidu narybede: —Kai sohojilewe Jerusalē-ki aõhebo bede rÿira teerykōte. <sup>19</sup> Tii dotÿÿraxide: —Aõherabo ta. Tiiboho tuu relyyre: —Jesuisi Nazare ludu kie. Tii Deuxumy rybedu nihikÿ heka rare, Deuxu-ò dori ibutu iny-ò heka rybe-ki aõni heka aõmywidÿÿ-ki heka ihÿÿna rare. <sup>20</sup> Waxiwenareny wahidÿÿdu wedu tahe wadinodureny itxeò nihikÿ-ò rurukremy riwahinyrenyrene. <sup>21</sup> Tule judeu mahādu tarasadukresÿna raholarenyrene. Ihāreta tukōlemyta inataõ txumy rubu-ki bede idi rÿira. <sup>22</sup> Bederarasò-di waijoireny hāwyyõ ihāloo-ò roire. <sup>23</sup> Tai itxi rekoaõhyyre. Dòòsedenydeki tahe ÿjyomy riki robirenyremy delyydenyde. Tii Jesuisi rubu-ribi rexixamy tamyreny rarybere riki. <sup>24</sup> Waijoirenyõ tule ihāloo-ò roirenyrene. Inatyhy rikihe rare. Urileta riki Jesuisimy robiòrenyrene. <sup>25</sup> Tahe Jesuisi tyhy Klopaboho-ò narybede: —Aõherewexe Deuxu Rybedu mahādu rybe awo-ki teximytentyteri tetyhynykōtenyteriki wahe. <sup>26</sup> Kialemy dori Kristu dori aõna aõnamy rotÿÿnykremy tai Deuxu riwowydynyremy. <sup>27</sup> Tahe Jesuisi rexidelenyrene aõbo rybe ritina roirenyrene. Moisesi ryberiti juhuumy ritÿnynynyrene. Timybo Deuxu rybe ritidÿÿdu raremy. Tiiemy heka iximyhÿhyyle rarybere. <sup>28</sup> Ibutumy tamy relyyhyyre ramyhÿrehy tahe ritehemyny

Emau hāwā-ò, tai inatxi hābu rarikreò wahe. Tahe Jesuisi rarybere: — Aōkō arexinoranykre. <sup>29</sup> Tai ta tamy ihārele rarybemyh̄yre: —Txioinihe bodaye kakile. Aōma bede ratxinyra ratxioronytyhyra. Taile tiiboho-wana rare ihetoreny-ò. <sup>30</sup> Rorukurenyre riroxirenykremy. Tahe Jesuisi orotxu rimyre rexitōenyre Deuxu-ò. Tahe orotxu riororiorore imynareny. <sup>31</sup> Iu tahe aōwesele rierymy reare Jesuisi. Tai iruereny raraymy rieryreny. Tahe aōwesele iōmy iribi reny reare. <sup>32</sup> Tai widee raryberenyre kiamy. Iu tii Ryberitimy inydeereny rydi relyyreu, urile wawo ratooteemy. Kai tahe. Ijō diwyònyde: —Kohe jiar̄y tulere. <sup>33</sup> Iribi tahe ritamanyreny. Diòòsedenyde ixyby Jerusalē hāwā-ò. Tiu waòsohoji reurò eryd̄ȳna itxi rekoarenyre. Tai tiiboho narybedenyde: <sup>34</sup> Inynyr̄renyhe rexixara. Pedro heka tuu robira: <sup>35</sup> —Jiar̄yboho tulerenyra wawanale ròirenyra rydi. Tule wadeereny orotxu riyreynyra. Taile reeryreny.

<sup>36</sup> Iu kiamy relyymyh̄yre, Jesuisi dehemynymy deade ityareny-txi. Riryberenyre ibutumy: —Ywina heka akirenyke! <sup>37</sup> Ibutumy ruberurenyre ilau. Urile rares̄ny tamy raholarenyre. <sup>38</sup> Jesuisi rarybere: —Aōhebo taberutenyteri. Breburenyōmyke hewa biwatyhynybenyke. <sup>39</sup> Jiar̄yle ratxireri. Wadebò-di bedetehebedenyke, wawa-ò tule. Jiar̄y karare wadee inihe bideribedeny. Jiar̄y uni aōkō watxireri. Uni dori idedire aōkō wawese aōkōre bedetehebedeny inihe. <sup>40</sup> Tai tahe tebò wotō mona, tawa wotōmona, riteòsinyre tamyreny. <sup>41</sup> Ihārele tahe rityhynyrenyōre, ibedesamy bede riòtiinymyh̄reny. Jesuisi tahe rexitōenyre tamyreny aō rir̄s̄ykemy. <sup>42</sup> Tamy riwahinyrenyre utura wòsi deyreō. <sup>43</sup> Riras̄yre ikorenyòle.

<sup>44</sup> Idi tamyreny rarybere: —Aōma wawanale ratximahāre, òhōtirenny itxi reara. Aōma wawana atximahātenyde juhū. Ibutumy heka adeereny ret̄ynynymy rarybere aōmybo wamy rybe roimyh̄remy. Ibutumy heka Moisesi rybedu ritid̄ȳnaki iritina-ki roimyh̄re. Wiuna tule wamy riritinyre. <sup>45</sup> Tai tahe rit̄ynynyre òbitimy irakyreny riraynyre. <sup>46</sup> Ihetxiu rybe wāhā aōma Deuxu Deòd̄ȳna rurukre heka aōhōk̄my rot̄ȳnykremy. Ruru-ribi inatā t̄xu-di rexixakremy bede roire. <sup>47</sup> Kaa rybe wihik̄y ritid̄ȳna heka kaa Jerusalē bede-ki rob̄ȳtkre ihāreta ibutumy iny iny kōkōmy bede bedemy rob̄ȳtkre. Kiamy heka ibutumy inydee marybebenykre. Iny riwatyhynymy r̄yirakre heka ibutumy iòraru-ribi ariixāwidid̄ȳnyke. <sup>48</sup> Tule terytenyteri ibutumy aōhebo rot̄ȳnykremy. <sup>49</sup> Tahe adee ariwahinykre iwese Deuxu rarybere wesemy heka adee ariwahinykre. Kaki hewa matxibenykre hāwā-ki. Tahe kanakre heka adee ruruō biu-ribi. Iribi tahe bōhōnykre karibi.

<sup>50</sup> Iribi tahe Jesuisi ridyreny Bet̄nyari-ò. Tai tahe rilāhānanyreny tuu tamy rexitōenyreny ibutumy tamyreny. Tamy rexitōenyre heka ilāhānamy tamy rexitōenyre biutxile ire rexidymy ramyh̄re ryanamy ramyh̄re. <sup>51</sup> Iu rilāhānanyreny, biu-ò rare. <sup>52</sup> Tamy rexitōenyra aōma lāhānamy, wowodynamy rexitōenymyh̄re Deuxu-ò. Tai riwowodynymyh̄reny. Teysa-di diòkesedenyde Jerusalē-ò ixyby. <sup>53</sup> Tai tahe Deuxu dohod̄ȳna heto-ki ixyby ixyby rowowydynymyh̄reny.

## Joaõ

### Deuxu Rybe Wihikỹ Tỹmyra, Joaõ Tyyritidỹdu

<sup>1-2</sup> Ibutu aõna aõnakõu, Jesuisi rarehyymy raremyhỹ. Tii rybehyymy raninira. Tii Deuxu-wana ihỹre. Ihãre tahe tii Deuxule rare. <sup>3</sup> Tii ibutuhukỹlemy riwinyre. Tiiõhyykeki tahe, aõ releõtyhy.

<sup>4</sup> Umytuedeõna wahidỹdu tii ihỹre kia-di iny mahãdu rayky ritoosõnymyhỹre ritỹnynymyhỹre wahe. Kia loosõna heka bedede luru ludu loosõna rare. <sup>5</sup> Bede luru tỹnyna loosõna rare. Loosõna ròtamyhỹre, bedede luru tahe ròanodỹmyhỹre.

<sup>6</sup> Deuxu teõduõ diteõnyde, Joaõ inire. <sup>7</sup> Tii loosõnamy rarybekremy nade. Kia rybe-di roholamyhỹreki, ibutumy iny rityhynyrenykremy. <sup>8</sup> Joaõ loosõna aõkõ rare. Urile tuu rarybekemy nade.

<sup>9</sup> Jesuisile loosõnatyhy rare. Tii bedede-ò nadeu, ibutumy iny rayky ritoosõnyre. <sup>10</sup> Tii bedede-ki raremyhỹ, bedede widỹdu rare, ihãre tahe iny rieryõhyyre mobo tii ihỹre. <sup>11</sup> Tasỹ mahãdu-ò dehemynyde, judeu mahãdu-ò wahe. Ihãre tahe ridyõhyyre, rityhynyõhyyre urile teramy reare. <sup>12</sup> Iu inyõ Jesuisi rityhynymy ridyreu. Deuxu riõreõlemy risỹdỹnyre inimy rityhynyreki. Kia-ò tahe ruru tamy riwahinyre. <sup>13</sup> Kia ityhydỹdu tahe Deuxudeewilemy tule iriõreõmy roirekemy. Hãlubu-ribi aõkõ ratybiyenre, urariribike aõkõ, hãbudeewike aõkõ. Deuxudeewilemy iny ihỹmyhỹrenyre.

<sup>14</sup> Rybe tahe umyõ rimyre, demy rexiijenyre, inyyreny-ki rasỹnymyhỹre. Tii tỹxihikỹlemy Deuxu loosõna-di ratximyhỹre, ruxetõena-di inatyhyna-di nade. Inyboho tuu robirenyre. Deuxu Riõre delamy ratximyhỹre, sohojiihyyre. <sup>15</sup> Joaõ Jesuisimy rarybere kia wese: —Kiamy heka adeereny rarybere. Tii wahewomy kanakre heka waratyre awityhyre. Tii dori wako-ki rarehyymyhỹ waribi juhuutyhy wahe. <sup>16</sup> Inyboho dori sõwemy ruxetõena iribi ritarenyre. Luuna sõwetyhymy tawo-ribi Jesuisi inydeereny diwahinyde. <sup>17</sup> Deuxu bedede ywina tahe Moisesi òraru-ki nade inydeereny. Ruxetõenamy tahe inatyhyna Jesuisi Kristu òraru-ki nade. <sup>18</sup> Inyõ heka tiu Deuxumy robiõtyhy. Deuxuriõre delale heka itỹnydỹdu rare. Tuunatyhy-di taãxiõti-ki rimyre. Tiile iny-ò Deuxu ditỹnynyde.

<sup>19</sup> Judeu mahãdu Jerusalẽ-ribi xiwena wahidỹdu mahãduõ diteõnyde Joaõ dỹraxydỹmy. Levita mahãduõ tule diteõnyde. Tahe roirenyre ritỹraxynekemy mobo tii raremy. <sup>20</sup> Tahe Joaõ-ò rỹraxyrenyre aõhereriwe mobo atxiteri. Joaõ dirawyõnyde inatyhymy rexitxiõnyreri: —Jiarỹ Kristu Deuxu deõdỹna aõkõ jiarỹ rare. <sup>21</sup> Tai tahe ixityre tamy rarybere: —Mobo tahe atxiteri, Elia aõbo. Aõkõre, Joaõ rarybere. Tahe Deuxu dee rybedu atxiteri inyboho riraõrenyteriõ wahe? Joaõ rarybere aõkõremy. <sup>22</sup> Tamy tahe ixityre raryberenyre: —Wakoreny bedelyyke mobo atxiterimy. Tai iny deõdỹdu mahãdu-ò arelyyrenykre. Aõmybo iximy manarybeke? <sup>23</sup> Tahe Joaõ rarybere: —Jiarỹ Isايا Deuxumy rybedu wesele adeereny ararybekre. Jiarỹ rybetere-naduõ jiarỹ rare. Jiarỹ bederahy-ki iny-ò rarywãhã. Inyryõ-ò ryõ biõbitinyke.

<sup>24</sup> Fariseu mahãdu-ribi kia mahãdu roirenyre. <sup>25</sup> Tai tamy rarybere: —Kai Kristu aõbo tate? —Aõkõre. Elia aõbo? —Aõkõre. Deuxu dee rybedu aõbo? —Aõkõre. —Aõhereki tahaka iny teratysebenyteri? <sup>26</sup> Joaõ dirawyõnyde: —Jiarỹ bedi iny reratysebenyteri. Inyõ tahe ayrenykile ratxireri. Tii tahe teeryõmahãtenyde. <sup>27</sup> Tii wahewo-ribi kanakre. Jiarỹ raixỹrumy watxireri

iwataana ese-ki, tii waratyrereki. <sup>28</sup> Kia ibutumy aõhebo rotỹỹnyre Betỹna hãwã bedeki. Jordaõ bero kowa weribi ijã-ki ihỹre. Tai iule Joaõ iny riratysybenymyhỹre.

<sup>29</sup> Txubiõwau tahe Jesuisi Joaõ-ò kedehemynykemy nade. Tahe rarybere: —Beteheke, kowa Deuxu budoeni naderi. Tii òraru-ribi iny ritakremynade.

<sup>30</sup> Tuu jiarỹ rarybereu, inyõ wahewomy kanakre. Tii waratyre awityhy rare. Tii dori wako-ki rarehyymyhỹ waribi juhuure. Kia rarybereu tule jiarỹ tuurarybemahã. <sup>31</sup> Reeryõre heka tii, ihãre tahe anade tii aritỹnykemy judeu mahãdu-ò. Tai tahe anade iny bedi reratysybenymahãremy. <sup>32</sup> Tahe Joaõ tamyreny relyyre: —Jiarỹ Deuxu Tyytybytyhymy rabire tamy dobehede-ò. Bõtòe wesemy ityre-ò desede. <sup>33</sup> Deuxu riwateònyre bedi iny ariratysebenykemy. Tahe riwateònyre tahe wadee rarybere: —Aõmy kai bobikre? Deuxu Tyytybytyhy ronony resekele inyõtyre-ò. Tii sohojile tahe Deuxu Tyytybytyhy-di iny riratysybenykre. <sup>34</sup> Jiarỹ tuu rabire, tai tahe reeryre, tule taheka relyywãhãre, tii inatyhymy Deuxu Riõre raremy.

<sup>35</sup> Itxubiõwau tahe Joaõ taerydỹỹna inatxiõ-wana raremyhỹ. <sup>36</sup> Tahe Jesuisi nadeò tuu robire. Tahe tamahãdu-ò rarybere: —Kowa tahe Deuxu Budoeni naderi. <sup>37</sup> Kia rybe-ò tiiboho roholareu, tahe ròirenyre Jesuisi riheludunyrenykre. <sup>38</sup> Jesuisi tahe tuu robire ihemy roirerimy. Tahe tamyreny rarybere: —Aõbo teijetenyteri. Tahe dirawyònyde: —Rabi (kia rybe tahe irybereny-ki, erydỹỹdu rare), titxibo kai tasỹnymahãte. <sup>39</sup> Jesuisi rirawyònyre: —Bòdòibedenyke betehenykemy. Tahe tii-wana roirenyre, tamy reteherenyre. Tahe txioromy tii-wana ihỹmyhỹ. <sup>40</sup> Joaõ rybe-ò ijohonaduõ, Jesuisi helududỹỹduõ, Andre rare. Tii Simaõ Pedro seriõre rare. <sup>41</sup> Andre tahe taseriõre Simaõ aõwesele rioryre. Tahe tamy rarybere: —Mesia-ki inyboho rahamy ratximyhỹrenyre. (Ka rybe, Mesia, heka. Kristumy rare, Deuxu deòdỹỹna rare.) <sup>42</sup> Tahe Andre Jesuisi-ò Simaõ didyde. Jesuisi Simaõ-ò retehere urihimyò idi tamy rarybere: —Kai Simaõ tate, Joaõ riõrere. Iribi tahe ani Sefamy rarekre (Kani heka Pedro rare.)

<sup>43</sup> Itxubiõwau Jesuisi Kalileia-ò rakremy ixi-di rõtõtinyre. Tahe Filipi riijere. Tamy rarybere: —Wahemy manakekõ aõbo. <sup>44</sup> (Filipi tahe Besaida hãwã luduõ rare Pedro, Andre-wana ihãwãluduõle rare.) <sup>45</sup> Filipi tahe Natanaeli witxi reare. Tamy rarybere: —Moisesi bede ywina tyyriti-ki inyõmy rarybere: —Tule Deuxu dee rybedu tyyriti-ki rarybere. Taile rahare. Jesuisi ihỹre. Nazare hãwã luduõ rare. Jyje riõre rare. <sup>46</sup> Tahe Natanaeli ritỹỹraxinyre: —Aõwihikỹ aõkãbo Nazare hãwã-ribi kadòhònykre. Filipi rirawyònyre: —Manake betehemy. <sup>47</sup> Jesuisi Natanaelimy robire naderimy tahe tuu rarybere: —Kowa judeu mahãduõ inatyhy rare. Tii hãbu òbiti rare. <sup>48</sup> Tahe Natanaeli rarybere: —Timykibo tiwaeryteri. Jesuisi rirawyònyre: —Figueira òra-ki tanyteò, umy rabire. Filipi aòrysmy raõreule, umy rabire. <sup>49</sup> Natanaeli rimasajuamy rirawyònyre: —Kai Deuxu Riõre tate Inyerydỹỹdu tate. Kai judeu mahãdu Iòlò tate. <sup>50</sup> Jiarỹ adee rarybera: —Figueiraòra-ki umy rabireki. Kiakile aõbo, tiwatyhinyteri. Iratyre aõna aõna wiwihikỹ adee ariteòsinykre. <sup>51</sup> Inatyhytyhymy adee araybekre: —Biuwetyy riranykre. Jiarỹ biuloosòna hãbu jiarỹ rare. Yjuboho Deuxu-ribi wadee doideò kai bobikre. Idi waribi roireò bobikre.

## 2

<sup>1</sup> Inataõ txu-di tỹmyra herina txumy reare. Kana hãwã-ki Kalileia bedeki. Jesuisise tai ratximyhỹre. <sup>2</sup> Jesuisi tule ritobinyre tamy rakremy taerydỹỹna mahãdu-wana. <sup>3</sup> Lisinaube tya-ki vỹi mona ituere. Tai Jesuisise Jesuisi-ò

rarybere: —Vĩ mona ituere, imona kõre. <sup>4</sup> Jesuisi rarybere: —Nadi, aõhebo arotỹnykre. Aõka wawidỹkõna wabededỹnanamy aõkõka bede rỹireri. <sup>5</sup> Tahe Jesuisise deõdu mahãdu-ò rarybere: —Anowidỹkỹmy adekereny tiki rarybekeki, ibutumy biwinybenyke. <sup>6</sup> Debõsohoji reurò mana butxi nihikỹ tai rỹimyhỹ judeu mahãdu ibe-di brebu òraru-ki aõna aõna risuhòmehỹre worana bedehesinau. Mana butxi sohoji sohoji 80 urihixina ratyre rimyre. <sup>7</sup> Jesuisi tamyreny rarybere: —Ibutumy bedi bitỹxinybenyke. Tahe ibutumy ijà ratyre ritỹxinyrenyre. <sup>8</sup> Katahe iribi bitake. Worana bedehesi wedu-ò biwybenyke imona. Tahe riwyrenyre. <sup>9</sup> Kia bee heka Jesuisi riwitziranyre vỹ monamy. Tahe iwedu riurihire, rieryõre tiribibo nade. Deõdu tahe rieryre juhuu bee rare. Tahe iwedu rarybere weryrybò heridu-ò: <sup>10</sup>—Katahe awityhyre. Kai ijõ-ribi iwitziratyhymy tewinyteri. Ijõ iny heka awityhy iko-ò ritxiwimyhỹ. Ihewomy tahe awiriõre ritxiwimyhỹre. Kai tahe awityhy ikonana-ò teyrubunyta. <sup>11</sup> Katahe aõna aõna wiwihikỹ iny itxerenamy juhu ludu rare. Kana hãwã-ki Kalileia bede-ki ihỹre. Tii tarurutere riteõsinymyhỹre taerydỹyna mahãdu-ò. Tai ierydỹyna mahãdu rityhynyre.

<sup>12</sup> Iribi tahe Kafanaõ hãwã-ò Jesuisi dobehede tadi, taseriõre, taerydỹyna mahãdu tii-wana roirenyre. Ijõtsumy tahe tai bede tỹnyna rỹira.

<sup>13</sup> Pascoa worana bedehesi iõhòmỹ rỹireu, Jerusalẽ rotuore kia tahe judeu mahãdu worana bedehesina rare. <sup>14</sup> Tai Jesuisi Deuxu dohodỹyna hetowo-ò ralore. Tahe iwo-ki itxi reare sõwemy aõna aõna-di rohonyreriò, broreni-di ijohodu-txi, budoeni-di ijohodu-txi, bõtõde-di ijohodu-txi, tule nieru witzira witzira wibydỹydu mahãdu-txi reare tai ronymyhỹki. <sup>15</sup> Jesuisi reroti awaru hãtena wesemy riwinyre. Idi tahe dohodỹyna hetowo-ribi ibutumy riòlòdỹyre, budoeni, broreni-wana, tahe nieru wibydỹydu mahãdu oworubesedỹy-di Jesuisi rehure, tai nieru rejuxunyre. <sup>16</sup> Tahe rare bõtõde-di ijohodu-ò. Tamy rarybere: —Biòlòdỹynyke wa. Waha heto dori aõ-di ijohona aõkõ rare. <sup>17</sup> Tahe Jesuisi erydỹyna mahãdu tõhõti-txi reare aõbo Deuxu Tyyriti-ki roiretxi:

—Waha heto yrubudỹyna-ki dori riwasamyhỹre. Ariyrubunykemy dori watzireri, tai riwasareri.

<sup>18</sup> Judeu mahãdu Jesuisi-ò rỹỹraxire: —Aõherekibo kai teòlòdỹyntyteri. Mobo he arateranyreri tuu biwinykemy. <sup>19</sup> Tahe Jesuisi rirawyõnyre: —Deuxusỹ-di behuke tahe inataõ txu-di aditamadỹnykre. <sup>20</sup> Tahe judeu mahãdu rarybere: —Ka heto 46 beõra-di relere, timykibo kai inatãõ txu-di biwinykemy. <sup>21</sup> Jesuisi tahe Deuxusỹmy taumylemy rarybere. <sup>22</sup> Iribi tahe iu rubu-ribi iixixana-txi tõhõtireny reare, kia tuu rarybere-txi. Tai heka iritina rityhynyre, tule Jesuisi rybe rityhynyre.

<sup>23</sup> Jerusalẽ-ki Jesuisi Pascoa worana bedehesidỹyna riwyre. Aõna aõna wiwihikỹ inyy-ki ritxienyre riwinyre. Tai sõwemy iny inityhy rityhynyre.

<sup>24</sup> Jesuisi tahe urihimiyõle iny rityhynyre. <sup>25</sup> Tii dori ibutumy iny rayky rierymyhỹre. Inyõ timy iny raremy tiu tamy aõna relyyõtyhy tii ibutumy aõerydu rareki.

### 3

<sup>1</sup> Nikodema fariseu mahãduõ rare. Tii judeu mahãdu weduõ rare. <sup>2</sup> Tii rudimy Jesuisi roramy rara. Tahe tamy rarybere: —Wanyrỹ, reeryrenyre kai Deuxu-ribi erydỹydu tate. Inyõ Deuxu-diõkeki tii aõ wiwihikỹ riwinyõtyhy. Iwese aõ wiwihikỹ kai tewinyte wese. <sup>3</sup> Tahe Jesuisi rirawyõnyre: —Inatyhytyhymy adee ararybekre: —Inyõ ixityre reakõkeki, tiu Deuxu Òlõnasỹmy robiõtyhy.

<sup>4</sup> Nikodema rỹrãxire: —Timykibo matuari ixityre reakemy. Timyrabo, ixiby tadiwo-ò iny ralòkeki aõbo ixiby iny raumynyke. <sup>5</sup> Tahe Jesuisi ri-rawyònyre. Inatyhytyhymy rarybere. Inyõ bera-ribi ratybienyõkeki Deuxu Tyytybytyhy-ribi ratybienyõkeki, tiu ralòõtyhy Deuxu Òlòna-ò. <sup>6</sup> Deribi tybie heka dee rare. Deuxu Tyytybytyhy-ribi tybie tasỹ tyytyby rare. <sup>7</sup> Idi wanaòtaõmy aõmybo rarybereridi ixityre ijiranamy. <sup>8</sup> Tiò tiò yhy ribonymhỹre: —Iwodỹỹ taholate, tahe tiribibo namyhỹde teeryõmahãte tiòhe ramyhỹre teeryõte, kia wesele iny Deuxu Tyytybytyhy-ribi tybie iny rỹire. <sup>9</sup> Tahe Nikodema rỹrãxire: —Timyrebohe kia ratxike. <sup>10</sup> Jesuisi dirawyònyde: —Kai judeu bedede erysydỹỹdu tate ihãrele teeryõte aõbo. <sup>11</sup> Inatyhytyhymy adee rarybere aõmybo reeryre, aõmybo rabire. Ihãrele tahe kia tetyhynyõte. <sup>12</sup> Bede aõmydỹỹnanamy rarybere tahe tetyhynyõte. Timybo bityhynyke biu aõmydỹỹnanamy ararybekeki. <sup>13</sup> Iny sohojile biu-ò raòwònyre, Deuxu Riòre Hãbutyhyhykỹ rare. Tiile iribi juhu dobehede. (Tiile isỹre. Taile isỹ roire.) <sup>14</sup> Iwese Moisesi bederahy-ki womati hemylala ritamadỹỹnyre wese, Kiawesele jiarỹ, Deuxu Riòre Hãbutyhyhykỹ, wadi kidiwatamadỹỹnykre. <sup>15</sup> Tahe inyõ wadi rityhynykeki, umytuedeòna tuu ritamy rỹihyy rakre.

<sup>16</sup> Deuxu Riòre sohojihyyle rare. Deuxu bedede ludu mahãdu ibutumy iluutyhyre. Tai tahe tariòre diteònyde iny rityhynykre. Inyõ tii rityhynyre-wana, umytueõnahakỹ ritakre. Tii ruruõtyhy rubu bina bedede-ò. <sup>17</sup> Deuxu taRiòre bedede-ò diteònyde bedede iny mahãdu tarasadumy rarekemy. Aõ iny ywisidỹỹna-ò rirutykemy aõkõ. <sup>18</sup> Inyõ rityhynymyhỹreki, tii ywisidỹỹdu idi rehuõtyhy. Iny rityhynyõmyhỹreki tihe aõhòkỹmy dỹỹnana-txi riteònykre. Deuxu idi ratximyhỹre, tii dori Jesuisi rityhynyõhyymyhỹre, Deuxu Riòre dela wahe. <sup>19</sup> Ibinatyhymy iny aõmydỹỹnana bedede bedemy rỹira, tai bedede luru-ki rira tamy awira. Tuu loosòna nadeu, tamy ibinare. Tai tahe Deuxu riteònykemy idi ratximyhỹre. <sup>20</sup> Inyõ aõbinahakỹ rotỹỹnymyhỹre, loosòna dera heka tuu rỹira; loosòna-ò rehemynyõtyhy, rehemynyre-wana, iny taaõbina bina rierymyhỹre. <sup>21</sup> Iny tahe awiwihikỹle rotỹỹnymyhỹre-wana tii tahe loosòna-ò rehemynykre rỹira, taaõmydỹỹnana dori Deuxudeewimy rir-irymyhỹre, ibutu iny rierykre ririre.

<sup>22</sup> Iribi tahe Jesuisi taerydỹỹna mahãdu-wana Judeia bedede-ò ròirenyre. Tai heka bededỹỹnanaõ riwyre. Tiiboho iny ityhydỹỹdu mahãduõ tai riratysebenyrenyrene. <sup>23</sup> Joaõ iribi iòhòmy ratxireri. Iny riratysebenymyhỹre. Tii Eno hãwã-ki Salí hãwã-ribi iòhòmy roire. Tai riratysebenyrene sòwemy bee tai roimyhỹreki. Sòwemy iny tamy ratysebenymy rare. <sup>24</sup> (Joaõ iu rotenamy ralòõlemy ratximyhỹ.) <sup>25</sup> Judeu mahãduõ, Joaõ erydỹỹna mahãdu-wana rybetere txiòdỹỹna ròhònyra, bedede ywina òbiti aõmydỹỹnanamy wahe. <sup>26</sup> Tahe Joaõ erydỹỹna Joaõ-ò doidenyde rarybekremy: —Waerydỹỹdureny. Kai hãbumy telyymy tatemahã, kia Jordaõ kanawe-ribi ijã-ki umy-wana raremyhỹ, tii ròratysebenyrenyrene. Sòwemy iny tamy wirotyre. <sup>27</sup> Tahe Joaõ tamy rarybere: —Kia wadee awire aõ aõkõ iny ritamyhỹre, biu-ribi kanakẽle tahe iny aõ ritake. <sup>28</sup> Jiarỹ heka Jesuisi nonanamy ijyymy diwateònyde wahewo-ribi kanakremy. Jiarỹ tii aõkõ rare. Tii tahe Kristu tyhy rare. Jiarỹ kiamy juhuru rarybewãhãre: —Kia tahe teerytenyte. <sup>29</sup> Inatyhymy tahe hãbumy heridu wesemy Jesuisi rare. Ibutumy iny tuu robikemy tamy wirotyre. Ibiòwa weselemy jiarỹ rare. Tahe irybe-ò raholareu, reysamy rarewãhã. <sup>30</sup> Tai wadee awire iny tii rieryreki, waribi tahe nohòti rosakemy idi watxiwãhãre.

<sup>31</sup> Tii biujuxahakỹ-ribi nadeki ibutu ratyremy ratximyhỹre. Bede-ribi jiarỹ anadeki, tahe bedede ludu jiarỹ rare, bedede aõmydỹỹnanamy rarybewãhãre.

32 Tii rarybere aõmybo roholare, robire, tahe ijõ iny rityhynyõhyyre irybe.  
 33 Inyõ tahe rityhynykeki, tii tule ijõ-ò rarybere, Deuxu inatyhy rare wahe.  
 34 Deuxu deòdỹna heka irybelemy rarybere Deuxu dori Tatytybytyhy ibutумы tamy diwahinyde. 35 Tyby taRiòre luure, tai tahe ibutu aõmydỹnana ywisidỹmy tamy diwahinymy diteònyde. 36 Iny Jesuisi rityhynymyhỹreki, umytuedeònahakỹ-di iny rỹira. Inyõ tamy ratxiõkeki, tiu umytuedeõna ro-biõthy, Deuxu ykarana dori tii-wana ratximyhỹre.

## 4

1-4 Inyõ fariseu mahãdu-ò rarybere: —Jesuisi Joaõ-ribi iny sõwemy di-ratysebenymyhỹde. Sõwemy iny ritamyhỹre ierydỹmy. Tahe Jesuisi aõkõ ròratysebedỹmyhỹre, ierydỹnale tahe riratysebenymyhỹre. Iu Jesuisi ki-amy rieryreu tahe, Judeia-ribi rexitare. Roirenyre Kalileia bedè-ò ritehemynykemy. Roirenyreu tahe Samaria bededihyye riòhòrenyde. 5 Samaria bedè hãwã-ò tahe ritehemynyde. Sika inire. Ijaò riòresu-ribi iòhòmy ròira, tariòre Jyje-ò riwahinyde wahe. Ijaò behãloo tai rỹimyhỹ. 6 Txutyeyu tahe Jesuisi elerihynymy rononymhỹ tatilemy nadeki berysyna werora-ki. 7 Tahe Samaria mahãdu hãwyyò dobehede beixemy. Jesuisi tamy rarybere: —Beõ inihe wadee bidiõke. 8 Jesuisi erydỹna mahãdu tahe juhoo roirenyre hãwã-ò rỹsỹna itxemy. Tai Jesuisi riraòmy rononymhỹ. 9 Tahe hãwyy rarybere: —Kai judeu mahãdu tate, jikarỹ samaria mahãdu rare. Anoherekibo wadeke textòenyteri bemomomy. (Judeu mahãdu Samaria mahãdu-wana wiymy reaõhyyimyhỹre. Widi òludu wesemy rare.) 10 Tahe Jesuisi rirawyònyde: —Kai heka teeryõhyteri mobo jiarỹ rare wahe. Tule, Deuxu wahisidỹna teeryõte. Tiwaeryteriwana kai bedexitòenyke, tahe bee irumy ihỹre adee ariwahinyke. 11 Hãwyy rarybere: —Wahĩ, timybo bee irumy ihỹre wadeke kanakre. Kai ahynakõre, hãloko heka behekyre bee irehere. Timybo bee iru kumy-wana ratxireri. 12 Kai anobohe inytyby Ijaò ratyrere. Tiki heka behãloko wedu juhuku rare; idi riwahinyde inydekereny. Iribile iritxiòre riõmyhỹre tiki-wana, ibroreni riõmyhỹre. 13 Jesuisi tahe tarybetyhy-di rarybere: —Inyõ kahãloobemy riõkeki, ixityre bemomomy ruruke. 14 Jiarỹ bee ariwahinyke. Inyõ tahe kiabemy riõke-wana, tiu bemy tamy umytuedeònahakỹ riwahinyhyyimyhỹre. 15 Tahe hãwyy rarybere: —Wahĩ bee tuedekõdu ikuny tuu kariõke. Tai kakò kanakõthy berysymy. 16 Tahe Jesuisi rarybere: —Maa hỹny, ahãbu biòryke, tahe manake. 17 Hãwyy dirawyònyde: —Anokõre, wahãbukõre. Jesuisi rarybere: —Inatyhymy tarybeteri ahãbuõremy. 18 Kai heka iruyre ahãbu tate. Wijina tahe ahãbu aõkõ rare atỹhibiòwale wahe. Kia tahe inatyhymy tarybeteri. 19 Wahĩ, wiji tahe arakeryra, kai Deuxu rybeduò tate. 20 Wahareny Deuxumy reàlãmehỹre kahãwãlò-ki. Amahãdu anokõ, tamy tahe Jerusalẽ Deuxu deàlana rare. 21 Tahe Jesuisi rarybere: —Lerỹ, warybe bityhynyke. Kanakre itxu kahãwãlò-ki aõkõ, Jerusalẽ-ki aõkõ Waha Deuxu deàlana rarekre. 22 Kaiboho aõmybo tealãte teeryòtenyde. Jiarỹboho tahe aõmybo reàlãre, reeryrenyde, tarasana dori judeu mahãdu-ribi nade. 23 Kia bededỹnanamy reara. Inyõ Waha Deuxu àlanamy ratximyhỹreki Deuxu Tyytybytyhy-di, inatyhyna-di reàlãmehỹke. Tuu deàlana mahãdu Deuxu riijemyhỹre. 24 Deuxu Tyytyby rare: —Tai tahe tudealãnadu tatytyby-ki inatyhyna-ki tuu reàlãmehỹre. 25 Kia tahe jikarỹ rekeryre, Mesia kanakre, Deuxu dekòdỹkỹnamy wahe, Kristu inire. Tiki kanakreku wahe, ibutumy inydekereny anona anonamy relykykre. 26 Jesuisi rarybere: —Jiarỹ tahe tiire, umy-wana wiji rarybereri wahe.



<sup>27</sup> Tahe Jesuisi erydỹỹna mahãdu rehemynyre. Hãwyy-wana rarybereriki tahe ribedeòtiidỹỹnyrenyrene. Tahe inyõ tamy rỹỹraxiõhyyre. Aõmybo tamy rỹỹraxire, ada aõherekibo tamy rarybereriki. <sup>28</sup> Iu tahe hãwyy tabutxi ririre, hãwã-ò rara. Tahe tahãwã mahãdu-ò rarybere: <sup>29</sup> —Bodoibedenyke wahemy. Betehebenykemy hãbu-kò. Tiki wakoku relykyre ibutumy anohebo ratỹkỹnymahãremy. Tiki kòsana Kristu ratxireri. Deuxu dekòdỹkỹna rare. <sup>30</sup> Hãwã-ribi roirenyre Jesuisi-ò. <sup>31</sup> Iu hãwyy hãwã-ki rareamyhỹreu, tahe ierydỹỹna Jesuisi-ò rarybere: —Iny erydỹỹdurenny rỹsỹnaõ birỹsỹke. <sup>32</sup> Tahe Jesuisi rarybere: —Warỹsỹnadire wahe. Kaiboho heka kia rỹsỹna teeryõtenyete. <sup>33</sup> Tahe widee raryberenyre: —Inyõ kòaõboka tamy rỹsỹnaõ riwyreri. <sup>34</sup> Jesuisi rarybere: —Wadeòdỹỹdu deewimy ariwinykemy idi watxireri. Kia tahe warỹsỹnare, iaõmysỹdỹỹna arihukemy wahe. <sup>35</sup> Maixõmo butuna in-aubiòwa ahãdu-di bidiòrarunybenykremy kaiboho tahõtintytenyeteri. Tahe aõkõre adeereny ararybekre. Betehebenyke bedero-ò. Maixõmo redenamy rỹire. <sup>36</sup> Kia maixõmo butudỹỹdu iòwy ritake, tahe umytuedeõnahakỹ-ò iny ributunyre. Tahe wiwanale riwodeysanymyhỹre ibròdỹỹdu ibutudỹỹdu-wana. <sup>37</sup> Iwese inyõ rarybere wese, inatyhy rare. Ijõ tahe ibòròdỹỹdu rare. Iwixira tahe ibutudỹỹna rare. <sup>38</sup> Jiarỹ kaiboho arateònymahãre. Aõbo tebòrònyõtenyete tahe bibutunyke. Juhuu inyõ raaõmysỹdỹỹre: —Kaiboho tahe iraty temytenyete.

<sup>39</sup> Tahe hãwyy òraru-ki sòwemy Samaria hãwã mahãdu rityhynyre. Hãwyy rarybere juhoo: —Tiki wakoku relykyre ibutumy anohebo ratỹkỹnymahãre walanananamy relykyre. Kia rybe òraru-ki tahe rityhynyrenyrene. <sup>40</sup> Samaria hãwã mahãdu tahe Jesuisi-ò rexitòenyre tii-wana roirekemy. Tahe Jesuisi tii-wana inatxi txumy riwyyre. <sup>41</sup> Sòwemy tahe rityhynyre Jesuisi Rybe òraru-ki. <sup>42</sup> Tahe hãwyy-ò rarybere. Wiji tahe arybe òraru-ki aõkõ retyhynyrreri. Tamy tyhy-ò jiarỹle raholare, tahe reeryre tii bede iny tarasadu tyhymy raremy.

<sup>43</sup> Inatxitxu-di tahe Samaria-ribi rare Kalileia bede-ò. <sup>44</sup> Jesusile dori rarybere: —Deuxu rybeduõ uladumy ijirana bede-ki iny rityhynyõhymyhỹ. Tiu tamy wowydynaõ riwahinyõtyhy. <sup>45</sup> Kalileia mahãdu juhoo Jerusalẽ-ò tule roirenyre, worana bedehesi rỹimyhỹraò. Ibutumy aõbo Jesuisi riwinyra heka tiiboho reteherenyre. Tai Jesuisi tasubede-ò rehemynyre tiiboho awimy ridyrenyrene.

<sup>46</sup> Tahe ixityre Jesuisi rehemynyre Kana hãwã-ò. Juhoo tai bee riwitxiranyre vỹi monamy wahe. Bede dinodu aõmysỹdỹỹdu Kafanaõ-ki rasỹnyre. <sup>47</sup> Jesuisi Kana hãwã-ki ratxirerimy hãbu roholareu, tamy rara. Tariòre dori ibinamy roire taheto-ki. Jesuisi-ò hãbu rarybere: —Manakekõ aõbo waheto-ò wariòre biteytekemy. <sup>48</sup> Jesuisi rirawyònyre: —Kaiboho bede aõmydỹỹnana wiwihikỹ tetehetenyeteule tetyhynytenyete. <sup>49</sup> Hãbu heka Jesuisi-ò rarybere: —Wanyrỹ, wylemy manake wariòre rurukreko-txi. <sup>50</sup> Jesuisi rarybere: —Bòòseke, ariòre dori awimy relera. <sup>51</sup> Tahe tii Jesuisi rybe rityhynyra tai ròòsere taheto-ò rakemy. Ijõ txu tahe ryro-ki teòdu-wana witxi reare. Tii rarybere: —Ariòre reytera aheto-kile. <sup>52</sup> Hãbu ritỹỹraxinyre tiubo reytera. Tahe relyyre. Kaule, txutyeyu reytera. <sup>53</sup> Jesuisi rarybereu, kiaule iriòre reytera. Hãbu rieryre. Tai tahe idi ibutumy hãbu sỹmahãdu Jesuisi rityhynyre. <sup>54</sup> Kia tahe Jesuisi inatxina aõna aõna wiwihikỹ iny itxeranamy riwinyre Kalileia bede-ki.

## 5

<sup>1</sup> Iribi tahe judeu mahãdu worana bedehesimy rỹimyhỹ. Tai tahe Jesuisi

rare Jerusalẽ-ò. <sup>2</sup> Hãwãy-ki tahe hãloo ibedỹỹ roimyhỹ budoeni ryijò ìhò-ki rỹimyhỹ. Beteta inire, hebraika rybe ini rare, judeu rybe wahe. Iruyre iwòtena ube iwerora-ki rỹire. <sup>3</sup> Sõwemy webinadu ube-ò wii rotyre, iny ruetà ijõre, iny tiere ijõre, inytibina ijõre. <sup>4</sup> Tiiboho ýjuõ riraõmyhỹre. Ýju beò rerireu tahe raukỹre. Mobo juhu itxi resekeki tahe, tii reytemyhỹre. <sup>5</sup> Hãbuõ 38 beòramy ibinamy roimy raremyhỹ. <sup>6</sup> Jesuisi tamy retehereu, rierye tiwesebeòrabo ibinamy roimy rare myhỹ. Tahe tamy rarybere: —Kai aõbohe beytekekõ. <sup>7</sup> Hãbu dirawyònyde: —Aõkõre Wanyrỹ, wawiòhedỹỹduõre. Bee rexiukỹnyrau, ijõ wako-ò ralòmyhỹre. <sup>8</sup> Jesuisi tamy rarybere: —Myikewa, abyre bimykke, mariake. <sup>9</sup> Aõwesele hãbu rỹimy reare, awimy. Tabyre rimyre tahe rariare. Kia txu tahe sabado txu rare. Kia txu tahe judeu aõmysỹdỹỹna txu aõkõ rare. <sup>10</sup> Tai tahe judeu mahãduõ tamy rarybere: —Abyre-di riraõmy, sabado txu dori òbiti aõkõ rareki. <sup>11</sup> Tahe dirawyònyde: —Wadeytedỹỹdu wadee rarybere wabyre arimykemy. <sup>12</sup> Tahe tamy rỹỹraxire: —Mobo adee rarybere abyre bimykemy idi mariakemy. <sup>13</sup> Tahe hãbu deytedu rieryõre mobo rare. Jesuisi dori dexitade iribi. Sõwemy iny tai rỹimyhỹ. <sup>14</sup> Deuxu dohodỹỹna heto-ki Jesuisi idi hãbu-ki rahara. Tamy rarybere: —Kai teyteta, inatyhy. Tai tahe aõraruna biixãwidinyke, aõbinatyhy aõhe adee rotỹỹnyheny. <sup>15</sup> Hãbu tahe rare. Judeu mahãdu-ò rarybere, mobo teytedỹỹdu raremy, Jesuisi wahe. <sup>16</sup> Tai tahe judeu mahãdu Jesuisi ibinamy rexidelenymy rarybere, sabado txuu kia riwinyreki. <sup>17</sup> Jesuisi tahe rarybere tamyreny: —Waha, Deuxu aõu raaõmysỹdỹỹre, jiarỹ tulere. <sup>18</sup> Tai tahe sõwemy irubudỹỹmy rurumyhỹre. Sabado txu bede ywina-ribi tii riwinyõre. Tule Jesuisi Deuxu wesemy rexioire, Wahamy dori rarybemyhỹreki.

<sup>19</sup> Tai tahe Jesuisi tamyreny rarybere: —Jiarỹ ixi-di aõkõ aõmydỹỹnanamy ratỹỹnymahãre aõbo Waha riwinyemyhỹre, jiarỹ tule rewinywãhãre iweselemy. <sup>20</sup> Waha Deuxu dori waluure. Aõbo riwinyre wadee riteòsinyre, tai tahe aõruxerahakỹtyhymybo bobibenykre, idi bede biòtiinybenykre. <sup>21</sup> Waha Deuxu dori rubu-ribi iny riixixanymyhỹre. Tai tule jiarỹ iny areixixanyke ixideewikeki. <sup>22-23</sup> Ibutumy iny hitxidỹỹna Waha wadee tuu rarybera, tii dori iny rihitxidỹỹnyòtyhy. Jiarỹle tahe iny ywisidỹỹdumy aròhònykre, tai iwese Deuxu iny riwowodynymyhỹre wesele iny riwawowydynymyhỹkre. Adeereny Deuxu diwateònyde. Tai inyõ riwawowydynyòkeki, tii Deuxu riwowodynnyõreri. <sup>24</sup> Inatyhytyhymy adeereny ararybekre. Inyõ warybe roholakeki, wateòdỹỹdu rityhynykeki, tii wijityhyle umytuedeõna ritake, ywisidỹỹduko-ò ròhònyòtyhy, rubu ryribi ròhònyre umy irumy ihỹre ryò iny ralòmyhỹre. <sup>25</sup> Inatyhytyhymy adee arelyykre: —Bededỹỹnana-ki kòhòra, bede dỹỹnanamy reara. Tahe rubu mahãdu Deuxu Riòre rybe-ò roholakre. Roholamy rỹikeu tahe irumy rỹike. <sup>26</sup> Tyby dori iumyõnanaõhyre wese tule iRiòre rare. Umytuedeõna wedu rare. <sup>27</sup> IRiòre heka hitxidỹỹna wedumy relere. Tii dori Deuxu Riòre Hãbutyhyhykỹ tii rare, jiarỹ wahe. <sup>28</sup> Bedeòtiidỹỹõmy tahe bededỹỹnanamy he reare. Rubu mahãdu wabedey-ki warybe-ò roholakre, tai iribi ròhònykre. <sup>29</sup> Ibutumy aõwibo riwinyre mahãdu kedexiakre umytuedeõnahakỹ-di. Kia ibinamy riwinyemyhỹre mahãdu ywisidỹỹdu-ò rexixakre.

<sup>30</sup> Jiarỹ ixi-di aõkõ aõmydỹỹnanamy ratỹỹnywãhãre. Iwese Waha-ò raholare wese iny ywisidỹỹmy aròhònykre. Waywisidỹỹna heka òbiti rare. Wade wimy aõkõ dori tuu watxiwãhãre. Waha wadeòdudeewimy tuu watxiwãhãre. <sup>31</sup> Iximy ararybekeki, inyõ riwatyhynyòtyhy. <sup>32</sup> Iwitzira heka tuu rarybereri wamy wahe. Reeryre inatyhy raremy. <sup>33</sup> Kaiboho inywitzira teteònytenyete. Joaõ ratysebedỹỹdu-ò rỹỹraxikemy ibutumy kia wamy rarybere inatyhy

rare jiarỹ inatyhy rare. <sup>34</sup> Iny wamy rarybemyhỹre, tahe jiarỹle kia rei-jeõhyymahãre inyle rieryõre wamy rybe, wahe. Tahe kiamy adee relyywãhãre kaiboho ritamy rỹikemy. <sup>35</sup> Joaõ tahe loosõna wesemy raremyhỹ. Tii urihimyo bededỹñana ritoosõnomy raremyhỹwesemy tahe kaiboho atximahãtenynte. Idi urihimyo-õ teysatenynte iloosõna-di, idi iribi kaiboho terarenyre. <sup>36</sup> Jiarỹ Waha õraru-ki aõmydỹñana wiwihikỹ, rewinyimahãre. Kaheka inatyhymy urihixina rare. Joaõ wamy rarybere ratyre heka kaa roire, Deuxu Waha inatyhymy wadeõdu raremy riteõsinyre. <sup>37</sup> Waha wadeõdu wamy tule relyyre. Kaiboho irybe-õ taholaõtenynte tule tii tabiõtenynte. <sup>38</sup> Kaiboho tamy taholaõhyymahãtenynte, tiwatyhynyõteki, jiarỹ dori iteõdỹña rare. <sup>39</sup> Tyyriti-õ tetehetenynte iwo-ki dori umytuedeõna-ki mahakemy tahõtinytenynte. Ritidỹñakile wamy relyymyhỹre. <sup>40</sup> Ihãrele tahe wadee taõmahãte adeereny umytuedeõna ariwahinykemy. <sup>41-42</sup> Aõmybo wamy iny rarybemahãkeki, aõ aõkõ rare wadee, jiarỹ dori reeryre Deuxu luuna-di aõkõ atxitenyteri. <sup>43</sup> Jiarỹ Wahani-di anade, tahe kaiboho tiwatyhynyõmy wadi ahãte. Inyõ ixideewil-emy kanakeki, kaiboho bityhynybenykre. <sup>44</sup> Tai heka tetyhynyõmahãtenynte. Widee dori kaiboho tewowydynmahãtenynte, tahe Deuxu-ribi wowydyna ritakemy terarenyre, sohojihyyre heka Deuxu. <sup>45</sup> Kiamy tahe Waha-õ arellyõkre, Moisesi tahe relyykre. Moisesi bede ywina dori, ararõsõnyreny rare. <sup>46</sup> Inatyhymy Moisesi tetyhynymahãte-wana tule jiarỹ biwatyhynymahãke, wamy dori Moisesi rõratidỹñre. <sup>47</sup> Irybe bityhynyõkeki, timybo warybe bityhynyke.

## 6

<sup>1</sup> Iribi tahe Jesuisi Kalileia aho-ki ixyby reurore, Teberiaide ahoniõre. <sup>2</sup> Tahe sõwemy iny riheludunyre tuu robireki, aõna aõna wiwihikỹ, deyt-edỹña wiwihikỹ robireki. <sup>3</sup> Tahe hãwãlõratyy-õ Jesuisi raõwõnyre taerydỹña mahãdu-wana —rorukurenyre tai. <sup>4</sup> Judeu mahãdu worana bedehesi rexidelenykemy iõhõre. <sup>5-6</sup> Tahe Jesuisi retehere inysõwehekỹ-õ, tamy rehemynyreriõ. Tai Filipi-õ riurihimyo rarybere: —Tikibo orotxu tamyreny rikiõbranyke riyrenykemy. Jesuisi rierymyhỹre aõbo riwinykremy ratxireri ihãrele tahe Filipi-õ kia rarybere. <sup>7</sup> Filipi tahe dirawyõnyde: —Inyõ sohoji sohoji orotxu yre sohoji riykeki, 200 prata womati nieru rakahurenyke ihãre rimoõtyhy. <sup>8</sup> Andre Jesuisi erydỹña-õ rare, Simaõ Pedro seriõre rare. Tii tahe Jesuisi-õ rarybere: <sup>9</sup> —Weryryboõ kaki ihỹmyhỹ. Iruyre cevada orotxu idi ratximyhỹ, utura inatxi. Kia tahe aõ aõkõ rare inysõwe-õ. <sup>10</sup> Tahe Jesuisi taerydỹña-õ rarybere: —Tamy marybebenyke ranyrenykemy asityrekile. Tahe rorukurenyre ibutomy. Hãbu 5000 ronyre ijõ inyõ tahe sõwetyhymy rorukure. <sup>11</sup> Jesuisi orotxu rimyre. Deuxumy reãlãre, idi tahe tamyreny riwahinyre. Tule utura-wana wiwesele risỹnomy. Tuu rotỹnyre. Ibutomy heka ixideewina rirỹsỹrenyre. <sup>12</sup> Rihydyrenyre, Jesuisi rarybere taerydỹña mahãdu-õ: —Bibutunybenyke rauhenyra uritere ixinamy itxiwixirenyõkemy idi watxireri. Uritere idi dehurenyõmy. <sup>13</sup> Tahe ributunyrenyre iuhe waõinatxi reurõmy weriri ritỹxinyre orotxu yrere-di. <sup>14</sup> Jesuisi aõwiwihikỹ widỹñamy robirenyreu kiamy tahe raryberenyre. Tii inatyhymy Deuxu Rybedutyhy rare. Juhuu dori tuu rarybere kabede-õ kanakemy. Inyboho tii riraõmyhỹre.

<sup>15</sup> Rõhõtinyrenyre: —Jesuisi inyiõlõrenomy rikimyrenykre. Tamy ròkõirenykre. Iu Jesuisi kia rieryreu, ixisohojilemy rexitare ixyby, hãwãlõ-õ.

<sup>16-17</sup> Ibedesou aho ijã-õ ierydỹña mahãdu riberenyre riraõkemy. Bede rurunyre tahe Jesuisi rehemynyõhyyre. Tai hãwõõ rimyrenyre idi reurõkemy

ijõwe-ribi ijà-ò, Kafanaõ hãwã-ò. <sup>18</sup> Tahe yhy deborehekỹ tiribi tiribi rebonymhỹ. Òbò tahe resemyhỹ. <sup>19</sup> Sohoji urihixina iòhòmy ròireny tahe Jesusimy robirenyre. Tii betyredile tamyreny nariamy nade. Tiiboho ruberunihikỹrenyre. <sup>20</sup> Jesuisi tamyreny rarybere: —Jiarỹle wa rare, breburenyõmyke. <sup>21</sup> Tai tahe hãworo-ò Jesuisi ronykemy tiiboho disỹnydenyde. Aõ wesele tahe rehemynyrenyre tiòbo ròirenyraò.

<sup>22</sup> Itxubiòwamy sòwemy iny wii ributunyre aho kanawe-ribi ijà-ki. Hãwò sohojile tahe tai roire aho-ki. Jesuisi erydỹỹna mahãdu roirenyremy rieryrenyre. Tahe Jesuisi aõkõ idi rare. <sup>23</sup> Tahe hãwòõ dehemynydenyde. Teberiaade hãwã-ribi Jesuisi tai ratximyhỹ iòhò-ò. Tai juhu Jesuisi rexitòenymy rỹimyhỹ tahe orotxu tamy riwahinyre. <sup>24</sup> Jesuisi iõre tai, ierydỹỹna mahãdu iõre. Kia tahe iny sòwemy robirau, hãwò-ò rimyrenyre. Iòrysomy roirenyre, Kafanaõ-ò. <sup>25</sup> Kanawe-ribi ijà-ò rehemynyreu, tii-wana witxi reare. Tahe tamy rỹỹraxire. Waerydỹỹdureny, tiubo kaò tadehemynyte. <sup>26</sup> Aõwiihikỹ rewinyremy aõkõ tiwaijetenyteri, rỹsỹna adeereny rewahinyrakile, tehydymy terỹsỹtenytakile. <sup>27</sup> Rỹsỹna tyhy ituemyhỹre kiaòle aõkõ maaõmysỹdỹỹbenyke, tahe iwitxira rỹsỹnaõ-ò maaõmysỹdỹỹbenyke, kia ituedeõna-di aõkõ rare. Deuxu Riõre Habutyhyhykỹ dori adee riwahinykre. Kia rỹsỹna umytuedeõnahakỹ wesemy rare. Taile tahe Deuxu Waha riwateònyreri. <sup>28</sup> Tahe Jesuisi-ò rỹỹraxire: —Timybo iny Deuxudeewimy arotỹỹnyrenykemy. <sup>29</sup> Jesuisi dirawyònyde: —Kialemy, biwatyhybenyke: —Deuxu dori wateòdỹỹdumy rare. <sup>30</sup> Tahe raryberenyre tamy: —Aõwiihikỹbo inyko-ò biitxeredỹỹnyke. Aõhebo botỹỹnykre, iny aratyhynykre. <sup>31</sup> Inytybyreny orotxu riyrenyre bederahy-ki. Kia wese Tyyriti-ki roire:

—Moisesi tamy orotxu riwahinyre biu-ribi.

<sup>32</sup> Jesuisi rirawyònyre: —Inatyhy tyhymy Moisesi aõkõ tamy riwahinyre. Waha dori biu-ribi orotxu tyhy adee riwahinyre. <sup>33</sup> Deuxu orotxu tahe irutyhymy inydee riwahinymyhỹre, biu-ribi diwahinymyhỹde. <sup>34</sup> Tahe raryberenyre: —Wanyrỹ, tiu kia orotxu bidiwahinymahãkre. <sup>35</sup> Jesuisi iximy rarybere: —Jiarỹ orotxu irutyhymy rare. Inyõ wadee kanakeki, tiu rama risaõtyhy. Inyõ riwatyhynykeki, tiu bee risaõtyhy. <sup>36</sup> Adeereny heka rarybere: —Wamy tabitenyte, ihãrele tiwatyhynyõtenyte. <sup>37</sup> Ibutumy iny Waha wadee riwahinymyhỹre wadee kanakre. Tiu ixi-ribi ariteònyõtyhy. <sup>38</sup> Adobehede dori aõ ixideewimy aõma arotỹỹnykemy aõkõ. Wadeòdỹỹdudeewimy arotỹỹnykemy watxiwãhãre. <sup>39</sup> Tiu ariõnonyõtyhy wadee diwahinydeò kiaboho ibutumy ikonana txuu rubu-ribi ariixixanykre. Kia tahe wadeòdỹỹdu deewimy rare. <sup>40</sup> Inatyhymy Waha deewimy kia rare. Iny iRiõremy robireu, rityhynykeu, umy tuedeõna ritake. Ikonana txuu tahe rubu-ribi ariixixanykre.

<sup>41</sup> Jesuisi rarybere: —Jiarỹ biu ludu orotxu rare. Tai tahe judeu mahãdu aõbina binahakỹlemy rarybemyhỹre. <sup>42</sup> Kia wese rarybemyhỹre: —Kaa Jesusisile rare. Jyje riõre rare. Tyby he ijoi eryna rare ise tule. Aõherekibo tii rarybereri biu-rubu nademy. <sup>43</sup> Tahe Jesuisi dirawyònyde: —Tuu wamy ryberenyõmyke ayludurenymy. <sup>44</sup> Wadeòdỹỹdu iny wadee rayky-ò rarybemyhỹre namyhỹde. Kia wesele iny wadee kedehemynykre, ikonana txuu tiiboho rubu-ribi ariixixanykre. <sup>45</sup> Deuxu rybedu Tyyriti-ki kia rybe rỹire:

—Deuxu ibutumy iny ribedeerydỹỹnykre.

Tai tahe Waha-ribi iny rierymy roholamymhỹre, tii tahe wadee rehemynykre. <sup>46</sup> Inyõ Wahamy robiõhyymyhỹre jiarỹle tahe tuu rabimahãre, iribi anadeki. <sup>47</sup> Inatyhytyhymy adee rarybemahãre. Inyõ riwatyhynykeki,

umy tuedeõnahakỹ tiiwanale ratxireri. <sup>48</sup> Jiarỹ orotxu wesemy jiarỹ rare. Umytuedeõna wahidỹỹdu jiarỹ rare. <sup>49</sup> Boreny dori biu-ribi orotxu riyre bederahy-ki. Irabihyy ibutumy tiiboho ituerenyre. <sup>50-51</sup> Jiarỹ tahe biu ludu orotxu wese rare, inyõ tahe kia orotxu riykeki, tiu ruruõtyhy. Waumy ari-wahinykre rubu-ò ibutumy iny òraruna òwydỹỹmy. Tamyreny umytuedeõna riwahinykre rubu-ò ibutumy iny òraruna òwydỹỹmy. Tamyreny umytuedeõna riwahinykre.

<sup>52</sup> Judeu mahãdu tahe txiõdỹỹna rybemy widee raryberenyre: —Timybo tadelemy inyboho riõwenyrenykemy wahe. <sup>53</sup> Jesuisi rirawyõnyre: —Inatyhytyhymy adee ararybekre. Kaiboho Deuxu Riõre Hãbutyhyhykỹde birõõbenykeki, umytuedeõna bitabenyõtyhy. Ihãlubu biõbenykeki, umytuedeõna-di aõkõ atxitenyteri. <sup>54</sup> Inyõ waderòdu wahãlubumy momodu tii umytuedeõna-di ratxireri. Tii tahe ikonana txuu rubu-ribi adiixixanykre. <sup>55</sup> Wade heka juhu irõnatyhy rare, wahãlubu tu monatyhy rare. <sup>56</sup> Inyõ wade rirokeki, wahãlubu riõkeki, wawana tiuhyy ratxireri. Jiarỹ tule tii-wana watxihyyreri. <sup>57</sup> Waha irumy ratxireri. Tii wadeòdỹỹdu rare iòraru-ki warumy watxireri. Tule waderòdu irumy ratxike waòraru-ki. <sup>58</sup> Jiarỹ biu ludu orotxu inatyhy jiarỹ rare. Iwese bederahy orotxu heka boreny riyrewesemy aõkõ jiarỹ rare. Ihãrele tahe ituerenyre. Inyõ riwaykeki, rexixahyummy rarekre. <sup>59</sup> Kia ibutumy Jesuisi rarybere Kafanaõ judeu dohodỹỹna-ki, rierynanymyhỹreu.

<sup>60</sup> Iribi tahe Jesuisi-ò ijohona mahãdu rarybere:

—Kia isira tyhyre iny rieryke. Inyõ heka kia rityhynyõtyhy.

<sup>61</sup> Jesuisile heka rexierymyhỹre tiiboho tuu rarybemyhỹreki, tahe tamy rỹỹraxire:

—Kaa aõbohe arabinadỹỹnyrenyke.

<sup>62</sup> Tahe jiarỹ Deuxu Riõre Hãbutyhyhykỹ, ixyby biu-ò aròõsekeki, timybo marybebenyke, kaiboho wamy bobibenykeki. <sup>63</sup> Deuxu Tyytybytyhyle umytuedeõna riwahinymyhyre. Umydetyhy umytuedeõna-di aõkõ rare. Urile adee rarybemahãre Deuxu Tyytybytyhymy rybena rare, adeereny umytuedeõna rare. <sup>64</sup> Tahe inyõ ayreny ludu riwatyhynyõreri. Jesuisi tahe juhuhu-ribi rierymyhỹre mobo rityhynyõmyhỹre, tule mobo tatxiõdỹỹdumy rarekremy. <sup>65</sup> Jesuisi raryberehyummy tii-wana: —Jiarỹ juhuhu rarybewãhãre. Inyõ Waha wadee riteònyõkeki tiu wadee kanaõtyhy. Tai heka tuu adee jiarỹ rarybere.

<sup>66</sup> Kia rybe òraru-ki sõwemy taerydỹỹna mahãdu ririrenyre. Tahe roirenyre.

<sup>67</sup> Tahe Jesuisi rỹỹraxire taerydỹỹna waòinatxi reurò mahãdu-ò. Ka bexe boibenyõkre aõbo biwaribenyõkre aõbohe. <sup>68</sup> Tahe Simaõ Pedro rirawyõnyre. Wanyrỹ moobo aròirenykre. Kaile heka umytuedeõna rybe-di atxiteri.

<sup>69</sup> Jiarỹboho ka aratyhynymahãrenyre. Araeryrenyre ka, kai Deuxu-ribi hãbu òbitityhymy atximahãte. <sup>70</sup> Jiarỹ aratarenyre waòinatxi reurò inymy erydỹỹna mahãdumy. Ihãre tahe inyõ ratximyhyre diaboõ heka tii rare. <sup>71</sup> Jesuisi tahe Judasi Isariõmy rarybereri. Iwò inatxinamy wahe. Simaõ-Isariõ riõre tii rare. Judasi dori Jesuisi riwahinykremy ratxireri iòludu mahãdu-ò.

## 7

<sup>1</sup> Judeu mahãdu Jesuisi rubudỹỹmy rurumyhyre. Tai tahe Judeia bedeludu hãwã-ò ralòõmyhyre. Kalileia bedeludu hãwãdile rariamyhyre. <sup>2</sup> Tahe judeu mahãdu worana bedehesi iòhõmy rỹimyhỹ. Kiani tahe heto riõre worana bedehesi rare. <sup>3</sup> Tahe Jesuisi seriõreboho tamy rarybere: —Make wa karibi Judeia mahãdu bedeludu aerydỹỹna mahãdu dori aõwiwihikỹ kai tewinyteò tuu

robikemy. <sup>4</sup> Aõwiihikỹmy tewinyteri, tai tahe ixinamy iny tuu ibutumy robikre. Ibutumy iny ixierysomy tahõtinyteri-wana urile iny lau iwòteõmy aõna aõna wiwihikỹ. <sup>5</sup> Jesuisi seriõre mahãdu tule rityhynyõre. <sup>6</sup> Jesuisi tahe dirawyõnyde: —Wiji araõkre wabededỹỹnanamy dori tuu reaõmy ratxireri. Kaiboho tahe adohotalemy bõike. <sup>7</sup> Bede ludu mahãdu iny dori aluurenyre, tahe waderamy rekoarenyre. Iõrarunamy dori jiarỹ tamy rarybemahãre, ibinatyhyremy. <sup>8</sup> Kaiboho boibenyke worana bedehesi-ò. Jiarỹ tahe wiji araõkre, wabededỹỹnanamy reaõmy doimyhỹde. <sup>9</sup> Kia tahe Jesuisi tamyreny rarybere. Tahe Kalileia-ribi Jesuisi ròhõnyõmy rỹimyhỹre.

<sup>10</sup> Tahe iseriõre roirenyre worana bedehesi-ò. Idi tahe tule tii rare iherenymy itỹnmy aõkõ wahe, wasimy inyõ tuu robiheny. <sup>11</sup> Judeu mahãdu tahe Jesuisi riijemyhỹre worana bedehesi òrake-ò. Rarybemyhỹre: —Titxibo tahe tii ratximyhỹre. <sup>12</sup> Jesuisimy rybe ixitxiõdỹỹna ròhõnyre inysõwehekỹy-ki. Inyõ heka awimy tuu rarybemyhỹre. Ijõ tahe ibinamy tuu rarybemyhỹre, tii iny itxenadỹỹdu raremy. <sup>13</sup> Inyõ tuu rarybeõhyymyhỹre ibutumy ijohonamy judeu mahãdu lau ruberureki.

<sup>14</sup> Worana bedehesi tya-ki Jesuisi Deuxu dohodỹỹna heto-ò ralore ribedeerynykemy. <sup>15</sup> Ribedeerynyreu tahe judeu mahãduõ ijõ-ò rarybere: —Timykibo he kia ritidỹỹna rierymy tuu rarybemyhỹre. Rierykõ ihãrele iny rierynanyhỹre. <sup>16</sup> Tahe Jesuisi dirawyõnyde: Waerydỹỹna-di aõkõ rebedeeryre, Deuxu wateòdỹỹdu rybe-di wahe. <sup>17</sup> Inyõ Deuxudeewimy ratxikeki, tii rierykre aõerydỹỹnabo òbitimy ratxireri. Tii rieryke Deuxu-ribi aõbo rarybereri ada ixi-ribi rarybereri. <sup>18</sup> Iny ixi-ribi rarybekeki, tiile rexiloosõnanyke. Tahe iny iteòdỹỹdumy rarybekeki, tii tahe inatyhy rare. Tii inatyhymy òbiti rare. <sup>19</sup> Moisesi adee bede ywina riwahinyre: —Tahe kaibohoõ tetyhynyõhyamahãtenyete. Tai tahe aõherekibo biwarubunykemy atxitenyteri. <sup>20</sup> Tamy inyõ dirawyõnyde. Kaita itxýteteri. Inyõ ka ararubunykemy aõkõ ratxireri. <sup>21</sup> Jiarỹ inyõ reteytenyete sabado txuu tahe kaiboho wadi bede teòtiinytenyete. <sup>22</sup> Boholake, Moisesi bede ywina arateònyke ariõre ritõtyky aròkemy resynanykemy. (Boboho tahe kia tuu ritelenyete Moisesi aõkõ.) Tahe notyky resyna txu rỹikeki, tuu tewinyete sabado txu hãrele. <sup>23</sup> Kia sabado txu biwinybenykeki Moisesi bede ywina riywinykemy, tahe aõherekibo wadee taykarananyteri hãbu sabado txu reteytenyete. <sup>24</sup> Aõ òbitimy aõkõ rare, òbitimy tahõtinyterikile. Òbitinale-di maraykynybenyke.

<sup>25</sup> Ijõ Jerusalẽ hãwã ludu mahãduõ rarybere: <sup>26</sup> —Kia rarybemy rỹirerile, tii irubudỹỹmy rexinohõtinyreri. Beteheke. Butumy ijohonanamy kia rarybemyhỹre. Ihãrele taheka inyõ tamy rarybeõhyymyhỹre. Wedu mahãdu ròhõtinyhỹre: —Ina aõkàbo Kristumy inatyhymy tii rare. <sup>27</sup> Inyboho tahe rierymyhỹre titxiribibo tiò namyhỹde. Kristu Deuxu deòdỹỹna tahe kanakeu, inyõ tahe rieryõtyhy titxiribibo kanake. <sup>28</sup> Jesuisi tahe Deuxu dohodỹỹna heto-ki ribideerynymyhỹre rarybere: —Kaiboho tiwaerytenyete, titxiribibo anade tule teerytenyete. Tahe wateòdỹỹdu teeryõtenyete. Teròwymy heka jiarỹ anade. Tule tii inatyhytyhymy rare. <sup>29</sup> Iribi jiarỹ anade Tii riwateònyre, tai jiarỹ tii reeryre. <sup>30</sup> Inyõ riijemyhỹ riròtenykemy. Tahe rimyõhyre ruberureki, ibededỹỹnanamy aõkõ bede rỹireki. <sup>31</sup> Iny sõwehekỹy-ribi sõwemy iny rityhynyre. Tahe inyõ rarybere: —Kristu Deuxu deòdỹỹna iratyre aõna aõna wiwihikỹ riwinykemy tahõtinyteri. Aõkõre, tii dori inatyhymy Kristu rare. <sup>32</sup> Fariseu mahãdu kia-ò roholareu, tahe wii ributunyre xiwe wahidỹỹdu wedu mahãdu-wana. Tahe tiiboho soldadu mahãduõ riteònyrenyete Jesuisi rimyky. <sup>33</sup> Jesuisi tahe tamyreny rarybere: —Urihimyò umyreny-wana

watxikre, idi ta aròsekre wateòdỹdu-ò ixyby. <sup>34</sup> Kiaboho biwaijebenykre, waki mahabenyõtyhy. Titxibo watxireri kia-ò heka bitehemynyõtyhy. <sup>35</sup> Judeu mahãdu tahe widee rarybere: —Titxiwexe tii rakremy ihỹre, tuu rokobirenyõtyhy tai rakaharenyõtyhy, myỹ rarybemyhỹre wahe: judeukõdu mahãdu bede-ò aõbo rakremy ixi-di ratxireri. Tai ribedeerynykemy, judeu mahãdu-wana rasỹnykremy. <sup>36</sup> Timybohe rarybere: —Waki mahabenyõtyhy, titxibo watxireri-ò behemyhyõtyhy, myỹ rarybereri.

<sup>37</sup> Ihewotxu worana bedehesi aõnihikỹtyhy rare. Jesuisi iu rexiukỹnyre rarybekemy: —Inyõ bemomy risakeki, wadee kanake, riõke. <sup>38</sup> Inyõ riwatyhynykeki, Tyyritina-ki kia wese rybe rỹire:

—Iwo-ribi benihikỹ iru ròhònyke.

<sup>39</sup> Iu Jesuisi kia rarybereu, Deuxu Tyytybytyhy aõmy dỹỹnanamy rarybere. Iny dori rityhynykeki, iwo-ò Deuxu Tyytybytyhy ralõke. Urile tahe Deuxu Tyytybytyhy riwahinyõmy rỹire. Jesuisi dori ròseõre biu-ò. <sup>40</sup> Tahe roholare mahãdu tahe rarybere: —Ka heka hãbu Deuxu Rybedutyhy rare. <sup>41</sup> Ijõ tahe rarybere: —Tii Kristu rare. Ijõ tahe rarybere: —Kristu aõkõ Kalileia bede-ribi dori tii rareri. <sup>42</sup> Tyyritina rybe-ki roire: —Kristu, Davi sỹ-mahãdu ribi kanakremy. Belẽ hãwã-ribi; titxibo Davi rasỹnyre-ribi. <sup>43</sup> Tai tahe wiwese wese aõkõ rõhõtynyrenyre Jesuisi-di. <sup>44</sup> Inyõ riròtenykemy ixi-di ratximyhỹ, ihãrele tahe inyõ rimoỹhyre.

<sup>45</sup> Tahe soldado mahãdu ròsemy rare rimoỹhyylemy fariseu mahãdu-ò xiwewahidỹỹdu mahãdu wedu-ò. Tahe soldado-ò rỹỹraxirenyre: —Aõherekibo tedyõteri. <sup>46</sup> Tahe dirawyònyde: —Timybo inyõ kowa hãbu wesemy rarybeõhyre rybe iwitxira wihikỹmy tii rarybere. <sup>47</sup> Tahe fariseu mahãdu rarybere: —Kaiboho aõbo tule araitxenanyrenyra. <sup>48</sup> Inyboho mahãdu reny-ribi moõ rityhynyõhyymyhỹre, fariseu mahãdu wahe, wedu mahãdu wahe. <sup>49</sup> Inyõ rityhynyre, tahe tiiboho Moisesi bede ywina rieryõre tai Deuxu aõhõkỹmydỹỹnana-txi idi rehukre. Aõhõkỹmydỹỹnana-ò ritamadỹỹnykre. <sup>50</sup> Nikodema iyreny-ki ratximyhỹ. Fariseu mahãduõ tii rare, juhoo Jesuisi raraò rare wahe. Tii heka rarybere imahãdu-ò. <sup>51</sup> Juhoo roholamyhỹre aõhebo rotỹỹnyraò wahe idi tahe ibinakeki riròtenykemy riijemyhỹre. Kia tahe iny bede ywinareny rare. <sup>52-53</sup> Tahe rirawyònyrenyre: —Kai wa tule Kalileia mahãduõ atxiteri. Tyyriti-ò beteheke timybo rarybereriò: —Kalileia-ribi rybeduõ ròhònyõtyhy wahe.

## 8

<sup>1</sup> [Tahe ibutumy he tasỹ-ò reareare. Iu tahe Jesuisi rare Oliveira hãwãlò-ò. <sup>2</sup> Biura-di tahe dòsede Deuxu dohodỹỹna heto-ò ixyby. Sõwemy iny tamy rare; Jesuisi ronyre; ribedeerynyre. <sup>3</sup> Hãwyyõ ratximyhỹ hãbu witxiraõ-wana wasimy ratximyhỹ. Tahe inywitxiraõ itxireny reare. Tai tahe Deuxu rybe erydỹỹdu mahãdu fariseu mahãdu-wana hãwyy didyde Jesuisi-ò. Tahe hãwyy-ò rarybere rỹikemy iny sõwehekỹ-ki. <sup>4</sup> Tahe raryberenyre Jesuisi-ò: —Bede erydu: —Kahãwyy tỹwe rare inyõ itxi reara. <sup>5</sup> Iny bede ywina Moisesi riwawahinyré tahe rarybere mana-di rurumyhỹkemy. Tahe aõmybo kai mynarybeke. <sup>6</sup> Tiiboho kiamy rarybere Jesuisi riurihire timybo rarybekemy. Tai tahe ibinamy tamy rarybekemy idi ratxireri. Jesuisi tahe suò resera ròritidỹỹkremy tebò-di suki riritinyra. <sup>7</sup> Tahe ritỹỹraxinyhyy ihỹmyhỹ. Tahe Jesuisi rỹire; rarybere: —Inyõ òrarukõmy ratxirerile, tii mana-di juhoo tamy rehukre. <sup>8</sup> Ixityrele sỹ Jesuisi ròritidỹỹre suò. <sup>9</sup> Kia rybe-ò roholarenyreu, tahe rexitarenyre sohoji sohojilemy, tarayky dori ribinadỹỹnyrenyra. Matuari mahãdu tahe juhoo rexitare. Ikonatyhy dori rare, tahe Jesuisi hãwyywanale

tai rÿire. <sup>10</sup> Jesuisi retehere: —Hãwyy sohojilemy robire rÿÿraxire tamy: —Hãwyy, titxibo mana-di arubudÿÿmy rybedu mahãdu rirahura. Inyõ aõhe arasÿnyõhyyra. <sup>11</sup> Tahe dirawyõnyde: —Anokõre, Wahĩ. Tahe Jesuisi rarybere: —Jiarÿ tulere! Mahe, òraruna-txi tahe ixbyby ixẽõmy.]

<sup>12</sup> Ixityre Jesuisi rarybere tamy: —Jiarÿ wabede loosõna rare. Inyõ wahemy kanakeki, bedede luru-ki rariaõtyhy. Tii heka loosõna-di tarayky-ki rarekre. <sup>13</sup> Tahe fariseu mahãdu tamy rarybere: —Aõkõre, kai wa iximy tarybeteri tai tahe arybe inatyhymy aõkõ rare. <sup>14</sup> Jesuisi dirawyõnyde: —Inatyhymy iximy rarybereri jiarÿ, tahe warybe inatyhy rare, jiarÿ dori reeryre titxiribibo anade, tule tiobo arakre reeryre. Kaiboho tahe kia teeryõtenyete. <sup>15</sup> Kaiboho waywisidÿÿmy tadiõlõnyete, ihãre tahe õbitimy tiwaywinytenyõte tiwaerytenykõteki. Tahe jiarÿ inyõ reywinyõreri. <sup>16</sup> Jiarÿ inyõ ariwinykeki, waywisidÿÿna tahe õbiti rare. Jiarÿ dori ixiwanale aõkõ rare. Waha, wadeõdÿÿdu wawana raremyhÿ. <sup>17</sup> Abede ywina-ki kia ryberiritinymy rÿimyhÿre: —Inatxi hãbume wiwesehyylemy rarybekeki kia tahe inatyhy rare. <sup>18</sup> Jiarÿ iximy rarybemahãre tule Waha wadeõdÿÿdu wamy adeeremy rarybemyhÿre. <sup>19</sup> Tahe tiiboho Jesuisi-õ rÿÿraxirenyre: —Titxibo boo ratximyhÿre. Jesuisi rarybere: —Kaiboho tiwaerykõmahãtenyete, Waha tule teeryõmahãtenyete. Kai biwaerybenyõkeki, tule Waha bierybenyõtyhy. <sup>20</sup> Kia Jesuisi rarybere Deuxu dohodÿÿna hetowo-ki, iubeweri yrubudÿÿna ube-ki. Tahe inyõ rimyõhyyre, ibededÿÿnanamy aõkõ bedede rÿireki.

<sup>21</sup> Iribi tahe ixityre tamy rarybere: —Jiarÿ he arakre karibi. Kaiboho biwaijebenkyre tahe aõrarurenydile burubenykre. Boiõtyhy titxibo arakre-õ. <sup>22</sup> Tai tahe judeu mahãdu widee raryberenyre: —Inatyhymy aõbo tii rexirubunykre. Tii raryberaki: —Titxibo arakremy boiõtyhy, myki tuu idi rõhõtinyrenyete. <sup>23</sup> Tahe Jesuisi rarybere: —Kaiboho kaludu toite; jiarÿ aõkõre, biu ludu rare. Kaiboho bedede ludu toite, jiarÿ tahe kabede ludu aõkõ jiarÿ rare. <sup>24</sup> Tai heka adeeremy rarybereri aõrarureny-di burubenykremy. Inatyhymy jiarÿ tii rare: —Iwese rarybere wesemy. Tahe kia warybe bityhynyõbenykeki, aõrarureny-di burubenykre. <sup>25</sup> Tahe tiiboho rÿÿraxirenyre Jesuisi-õ: —Mobo he tate. Jesuisi dirawyõnyde: —Timybo adeeremy rarybewãhãre, juhoo wahe. <sup>26</sup> Jiarÿ sõwemy rÿire aõna aõnamy umyreny ararybeke umyreny ariwinyke ta ararybekre Waha tuu wadee rarybelemy. Tii diwateõnyete tii inatyhymy rare. Irybelemy bedede iny-õ ararybekre. <sup>27</sup> Rieryõhyyre tamyreny rarybere, tybomy. <sup>28</sup> Kaiboho heka biwatamadÿÿnybenykre, bierybenybenykre mobo jiarÿ rare. Tule ixi-ribi aõkõ aõna aõna rewinywãhãre bierybenykre; tule iwese Waha riwaerynanymyhÿre wese, rarybemahãre. Kia tule bierybenykre. <sup>29</sup> Wateõdÿÿdu wawana raremyhÿ. Iximy riwariõtyhy, jiarÿ tamy wimy rewinyhyymahãreki. <sup>30</sup> Kiamy tarybe rahudi tahe, sõwemy iny rityhynyre.

<sup>31</sup> Judeu ityhydÿÿdu mahãdu-õ Jesuisi rarybere: —Kaiboho warybe tyhy-di mohõtinybenyhyykeki, inatyhymy watyhydÿÿdu waheludumy boibekre. <sup>32</sup> Inatyhyna tahe bierybenykre. Kia dori aratarenyke, deõdumy aõkõ boibekre. <sup>33</sup> Dirawyõnydenyete aõkõre inyboho Abraõ riõkõre roire, tii heka modeõdumy roirekõmahãre. Timybo tarybeta: —Deõdu-ribi riwatakemy. <sup>34</sup> Tahe Jesuisi tamy rarybere inyõ òraru-di hyy rexiõrarunykkeki, tii òraruna deõdu wese hyyle rare. <sup>35</sup> Deõdu heka heto wedu ijoihyymy aõkõ rarekre. Iwedu ixinamy rakre. Riõre tahe ijoihyymy rare. <sup>36</sup> Tahe Deuxu Riõre heka ixinamy arateõnykeki, tii òraruna deõdu wesemy ixbyby bonybenyõtyhy. <sup>37</sup> Abraõ riõkõre inatyhymy toite. Kia tahe reeryre. Ihãrele tahe biwarubunyenkyre atxitenyeteri warybe dori araykywo-di aõkõ ratxireri.



<sup>38</sup> Waha-wana ranymahãu, aõmybo rabire, wiji tuu rarybereri. Kaiboho tule boo-ribi tabitenyte tuu tewinytenyteri. <sup>39</sup> Rirawyònyrenyre: —Wahareny heka Abraõ rare. Jesuisi rarybere: —Abraõ riòremy inatyhymy toite-wana, Abraõ aõmydỹnana iwesemy biwinybenyke. <sup>40</sup> Katahe warubudỹmy wadi atxitenyteri. Inatyhyna Deuxu-ribi raholaremy, adeereny rarybemahãre, tai tahe warubudỹmy atxitenyteri. Abraõ tahe tiu tahe tuu rotỹnyõtyhy. <sup>41</sup> Kaiboho heka borentytyhy wesele tatỹnymahãtenyte. Dirawyònyde: —Aõkõre, jiarỹboho waxiriõre aõkõ roire. Deuxuhyyle iny tybyreny rare. <sup>42</sup> Tahe Jesuisi rerawyònyre: —Deuxu boo inatyhymy rare-wana inihe kaiboho waluurenyre. Jiarỹ dori Deuxu-ribi anade. Ixidee wimy aõkõ anade tii diwateònyde. <sup>43</sup> Aõherekibo teerytenyõte warybe. Isiratyhyre aõbo ijohona. Aõkõre, ityhydỹ isirare adeereny. <sup>44</sup> Kaiboho Diabo riõre toite tamywimy biwinykemy atxitenyteri. Tii juhoo rubudỹdu hyy rare. Tii heka raruireri inatyhywesehekỹle wahe. Tii ruidu rare. Ruiwedu tii rare. <sup>45</sup> Kaiboho heka tiwatyhynyõhymahãtenyte inatyhyna dori jiarỹ rarybemahãre. <sup>46</sup> Inyõ inihe wamy rarybeõtyhy jiarỹ òrarudu raremy. Adeereny inatyhynamy rarybereri. Aõherekibo tiwatyhynyõteri. <sup>47</sup> Iny Deuxu-ribi ratxireri, Deuxu rybe roholamyhỹre. Kaiboho Deuxuhõrõ aõkõ toite. Teòdu aõkõ toite. Taita warybe-ò taholaõteri.

<sup>48</sup> Jesuisi-ò tiiboho dirawyònydenyde: —Inatyhymy rarybewãhãrenyre. Kai Samaria mahãdu tate. Kaludu mahãdu aõkõ tate. Kai tyytybybina dire. <sup>49</sup> Jesuisi rirawyònyre: —Aõkõre, tyytybybina-di aõkõ watxireri. Waha tahe rewowydynywãhãre. Kaibohole tiwabinaỹnymahãtenyte. <sup>50</sup> Wowydyna ixi-di aõkõ rejjereri. Waha tahe kia aõmydỹnanamy riywinykre, tii rierymyhỹre. <sup>51</sup> Inatyhytyhymy adee ararybekre: —Inyõ warybemy reõbykeki, tiu rubumy tii robiõtyhy. <sup>52</sup> Tai judeu mahãdu rarybere: —Katahe inatyhymyhe indeereny aerysydỹna rỹira tyytybybina-di tate wahe. Abraõ tahe rurure; Deuxu rybedu tule. Tahe timybo kai tarybeta: —Inyõ warybemy reõbykeki tiu rubu urihixinamy roiõtyhy tamy. <sup>53</sup> Kai aõbo inytybyreny Abraõ ratyre awikemy aõbo ixi-di tahõtinyinmahãte. Abraõ rurure Deuxu rybemy rybenadu amahãdu tule rurure. Mobo raremy he tahõtinyinmahãte. <sup>54</sup> Tahe Jesuisi rirawyònyre: —Jiarỹ ixi-di wowydyna ariijekeki, tahe wawowydyna aõ aõkõmy rareke. Waha tahe riwawowydynymyhỹke aDeuxumy raremy tu tarybeteri. <sup>55</sup> Tahe aõkõ teeryõtenyte. Jiarỹ tate reerymahãre. Jiarỹ reeryõmahãremy ararybekeki, tai ruidumy rareki, iwese kaiboho toite wesele wahe. Tahe reerywãhãre, tule irybemy reõbymahãre. <sup>56</sup> Boreny Abraõ, wamy dobide, wabededỹnana kanakremy tuu dobide, wabededỹnana kanakremy tuu dobide tai tahe reysatyhymy rare. <sup>57</sup> Tahe judeu wedu mahãdu rarybere: —Kai 50 beòramy aõkõ atxiteri timyrekibo tarybeta Abraõ tabitemy. <sup>58</sup> Jesuisi dirawyònyde: —Abraõ reaõule,

Jiarỹ rarehymahã.

<sup>59</sup> Tahe manadile rimymy reserenyre idile rirabunykemy. Jesuisi tahe rexiwòmny iribi rõhònymy rare, dohodỹna heto-ribi.

## 9

<sup>1</sup> Jesuisi rariamy rareu, tii robimy rare hãbu ruetàmny. Tii iruetàhãkỹmy ratohouãmny herinanyre. <sup>2</sup> Ierydỹna mahãdu rỹrãxire tamy. Erydỹdu, aõherekibo hãbu ratohouãmnyra iruetymy, ise tyby iòrarudireki aõbo ada taòrarumy aõbo. <sup>3</sup> Tahe Jesuisi rirawyònyre: —Tahe aõkõre tyby ise-ke aõkõ tiike aõkõ. Deuxu ruru wiji riteòsinykremy tahe tii kiawesemy rohonyre. <sup>4</sup> Wateòdỹdu aõmydỹnanamy arotỹnyrenykemy watxiwãhãrenyre. Inyboho

rikiwinyrenyke ibededỹnanamy rỹikreu, iwese txумы rỹikre wese tahe rummy heka kanakre tai raaõmysỹdỹõmyhỹre. <sup>5</sup> Kabede-ki watxiwãhãreòle tahe jiarỹ bede ludu mahãdu loosõnatyhymy jiarỹ rare. <sup>6</sup> Tarybe rahudi tahe rarybexinyre suò idi tahe subororomy ritxienyre. Idi ta hãbu rueyre-ò subororo ritidire. <sup>7</sup> Tahe hãbu ruetã-ò rarybere: —Make wa bexisuhòke Silòe ahobe-di. Silòemy ninadu heka iny rybe-ki deòdỹna wesemy rare. Hãbu tahe rare, risuhore, dòòsede robimy. <sup>8</sup> Tahe ierydu mahãdu, tuu robire idi itxeredu mahãdu raryberenyre widee: —Kabe hãbu ixitòedỹdu rare, nierummy kowa-ki rexitòenymy ronymyhỹrele rare. <sup>9</sup> Ijõ rarybere tule rare. Ijõ rarybere: —Aõkõre, iwesele tahe iwitxirari. <sup>10</sup> Rỹraxyrenyre tamy: —Timykibo arue reytera. <sup>11</sup> Rirawyõnyre: —Hãbuõ Jesuisi inire. Tii tahe suboro borole riwinyra warue-ò ritidire. Tahe wadee rarybera: —Make Silòe ahobe-ò aõ bisuhòke. Tahe rare, resuhore, tai rabimy watxireri. <sup>12</sup> Rỹraxyrenyre titxibo tahe tii rara. Rirawyõnyra: —Reeryõre.

<sup>13-14</sup> Kia ruedeytena Jesuisi riwinyre sabado txuu, judeu aõmysỹdỹna txu aõkõ. Tahe tiiboho hãbu ridyrenyre fariseu mahãdu-ò. <sup>15</sup> Ixityre hãbu-ò rỹraxyrenyre: —Timykibo riteytenyra. Tahe rirawyõnyre: —Subororole waruetyre-ò ritidira, idi resuhòra, iule tahe retehera. <sup>16</sup> Tai tahe fariseu mahãdu-ò narybede: —Ka hãbu Deuxu-ribi aõkõ nade. Kakỹny sabadotxu bede ywina riywinyõhyre. Tahe ijõ imahãduõ rarybere: —Hãbu òraruduõ tiu deytanawiwihikỹõ kia wesemy riwinyõtyhy. Tai tahe wiribi hitximy raraykynyrenyre. <sup>17</sup> Tahe ixityre hãbu-ò rỹraxyre: —Tii arue arue riteytenyra: —Tai tahe timybo tuu marybekre. Hãbu rarybere: —Tii Deuxu rybemy rybeduõ rare. <sup>18</sup> Tahe judeu mahãduõ rarybere: —Ise-wana tybywana widee ararybekekile, arityhynykre. Tai riteõnyre tybybohoòrysymy. <sup>19</sup> Rehemynyreu, tahe tamy rarybere: —Kaa aõbo ariòre rare. Inatyhymy aõbo iruetãmy reare. Timykibo tahe wiji robira. <sup>20</sup> Tahe tybyboho rirawyõnyre. Inatyhymy wariòreneny rare. Iruetãlemy ka reare. <sup>21</sup> Reerykõrenyre timykibo retehera. Irueriraynyre dori, reeryõhyre. Tamy marybebenyke. Ibeòra dire ka, iximy relyyleke. <sup>22-23</sup> Tybyboho ruberumyhỹrenyre judeu mahãdu lau. Judeu mahãdu dori, rarybemyhỹre: —Inyõ Jesuisimy rarybekeki, tii Kristu Deuxu deòdỹna raremy rarybekeki, tahe dohodỹnawo-ribi riteõnykemy idi rỹira. Tai tahe hãbutybyboho kia wesemy raryberenyre. Tii ibeòra dire: —Tamy marybebenyke.

<sup>24</sup> Juhuu iruetãmy raremyhỹò ixityre ròtedỹmy rarybere. Òbiti rybe-di marybeke. Inydeereny tahe ka dori òrarudu rare. Tai tahe Deuxu biwowydnyke. Tahe tii rarybere: <sup>25</sup> —Tii òrarudu rare, reerykõre. Sohoji aõmydỹnana reeryre. Juhuu waruetãle heka reeryre, wiji tahe retehereri. <sup>26</sup> Tahe ixityre tamy rỹraxyre: —Aõbo tii riwinyre. Timybo arue roire. <sup>27</sup> Hãbu rarybere: —Adeereny tuu rarybere tahe taholaõhyytenyta. Aõherekibo ixityre ijohonamy tarybetenyteri. Ierydỹnamy boibekemy aõbo atxitenyteri. <sup>28</sup> Tuu raryberenyre aõbina binalemy. Kai heka iijoiõ atxiteri. Jiarỹboho Moisesi erydỹna jiarỹboho roire. <sup>29</sup> Deuxu Moisesi-ò rarybemyhỹre. Kiamy reeryrenyre. Ka hãbumy tahe aõmy raholaõmahãreny, tiludubo rare. <sup>30</sup> Kia wa riwateytenyra bedeòtiidỹna urenana tii rare. Ihãrele tahe kaiboho teeryõmy tuu tarybetenyteri. Wadee kia ajuedena rare. <sup>31</sup> Deuxu wa òrarudu ixitòedỹna-ò roholaõtyhy. Kia reeryrenyre. Tahe inyõ Deuxu rityhynykeki tamywimy rỹirakeki, kia-ò Deuxu roholakre. <sup>32</sup> Bede rexidelenyre, inyõ roholatyhy iruetãmy raumynyre heka reytere. Inyõ tiu riwinyõre, wiji tahe diwinyde. <sup>33</sup> Kia hãbu Deuxu-ribi nokõduõ aõkõkeki tiu aõ riwinyõtyhy. <sup>34</sup> Tahe fariseu mahãdu aõbinahakỹlemy tuu rarybere: —Kai uladumy teateu,

òrarudutyhymy tate. Kai aõmybo biwabedeerynybenykremy aõbo wadireny tahõtinyteri. Tahe riteònyre dohodỹna heto-ribi. Ihyymy riteònyre.

<sup>35</sup> Kia-ò Jesuisi roholareu hãbu riijere tahe rỹrãxire tuu: —Kai Deuxu Riòre Hãbutyhyhykỹ aõbo tetyhynyte. <sup>36</sup> Hãbu rarybere: —Mobo tii rare, Wanyrỹ, arityhynykemy watzireri. <sup>37</sup> Wamy wa tabita, jiarỹleheka watzireri. Adee rarybererile watzireri. <sup>38</sup> Tahe rarybere: —Wanyrỹ aratyhynyra he. Tahe hãbu Jesuisi riwowydynyre. <sup>39</sup> Jesuisi rarybehyra: —Jiarỹ anade kabede-ò iny rueta aritobixidỹnykemy; tule robimyhỹre mahãdu ariruetãdỹnykre. Iny òwydỹnyamy anade. <sup>40</sup> Fariseu iòhòmy iribi rỹimyhỹ roholare irybe-ò. Tahe tamy rỹrãxire. Inatyhykõ aõbo ka jiarỹboho tule waruetãrenyre. <sup>41</sup> Jesuisi rarybere: —Aruetãmy ahãtenyteki, aõraruna-di aõkõ toite. Tahe tarybetenye reerywãhã, rabiwãhãre. Tai aõraruhyy-di toite.

## 10

<sup>1</sup> Inatyhytyhymy adeereny ararybekre: —Inyõ budoeni yrubudỹna ijõtòbòna-di, ralòòkeki, tii tahe wasidu ixiwatxidỹdumy rare, raòwònymy heka ralòmhyhỹre. <sup>2</sup> Ijõtòbòna-di ròtedu, tii budoeni-di itxeredutyhy rare. <sup>3</sup> Iu ijõtòbòna-ò rehemynymyhỹre, ijõtòbòna ludu tamy riraynymyhỹre. Tule budoeni irybe rierymyhỹre. Sohoji sohoji-ò ininimy tamy rryrymyhỹre, tahe idi ròhònymy ridymyhỹre. <sup>4</sup> Ihòrõ ahana-ò ridyre, tii iko-ò rỹimy idi ramyhỹre. Riheludunymy idi raremyhỹ rierymyhỹreki irybe. <sup>5</sup> Budoeni ieryõdu riheludunyõtyhy, irybe rieryõreki. Iny ieryõdu-ribi rahenykre. <sup>6</sup> Jesuisi tamy kia bede eryna ijyymy relyyre. Tiibocho tahe rieryõhyrenyre timybo ibede erydỹnyamy rororerimy.

<sup>7</sup> Tahe Jesuisi ritỹnynyre tamyreny: —Jiarỹ budoeni ijõtòbòna wesemy rãimahãre. <sup>8</sup> Ibutumy iny wakõule rehemynyre wasidu ixiwatxidỹdumy rỹiramyhỹ. Wabudoeni ityhydỹdu wesemy rỹirerimy ihỹre. Tiibocho wasidurybe-ò roholaõhyymyhỹrenyre. <sup>9</sup> Jiarỹ ijõtòbòna wesemy rãiwãhãre. Inyõ wamy ralòkeki, tii heka tarasanaõmy rarekre. Iwese wabudoeni ralòmhyhỹre idi ròhònymyhỹre asi wiwihikỹmy riroximyhỹre wesemy, tule ityhydỹdu mahãdu rỹirakre, bedebyna wiwihikỹ ritakremy. <sup>10</sup> Wasidu heka rubudỹny nade, bedehudumy wasĩmy, jiarỹ tahe anade inyõ umytuedeòna ariwahinykremy, irutyhytyhy wihikỹmy wiji rỹirakremy. <sup>11</sup> Jiarỹ budoeni-di itxeredu wihikỹ rare. Ihyy ta waumy ariwahinykre teròwrenymy. <sup>12</sup> Inyõ budoeni-di itxeredumy deòdumy risỹnykeki, tii riwisinanyõtyhy, tii dori budoeni wedu aõkõ rare, deòdule rareki. Tahe iròdu brebunaõ tamy kanakeki tahe rahenyke iribi, tai ijõ rimyke, ihona tahe raòrunyke. <sup>13</sup> Deòdu heka rahenyke tii iwedu aõkõ rareki, tii aõmy aõkõ idi ròhõtinyinymyhỹre, iòwydimy aõkõ. <sup>14-15</sup> Jiarỹ heka itxeredu wihikỹ rare wabudoeni riwaerymyhỹre. Jiarỹ tule tii mahãdu reerywãhãre. Waha riwaeryre, tule tii reeryre. Iwesetyhyle wabudoeni-wana wii reerynyre. Iòraru-ki tahe waumy ariwahinykemy idi wãhãre. <sup>16</sup> Jiarỹ wabudoeni-ò-di watxiwãhãre. Aõ kabede-ki aõkõ. Ibutumy aributunykemy idi watzireri. Tai tahe sohoji ijoihyylemy heka roikre. Ibutu-di itxeredumy ararekre. <sup>17</sup> Tai heka Waha waluure, waumy ariwahinykreki wahe. Ihãrele tahe ixiby idi arexiumydỹnykre. <sup>18</sup> Inyõ heka ixideewiõkeki riwarubunyõtyhy. Arexiwahinykre tamyreny riwarubunyrenykremy. Ixideewikre, arexiwahinykre, tule waumy arimymy arexiixixanykre. Waha dori wadee rarybere tii ariwinykremy.

<sup>19</sup> Kia rybe òraru-ki judeu mahãdu rybe rexijeijeinyre. <sup>20</sup> Sõwemy iny ritxiõnymy rarybere: —Tii tyytybybina-di ratximyhỹre ada raitxỹtemy aõbo

ihÿre. Aõherekibo tamy taholamahãtenyete. <sup>21</sup> Ijõ tahe rarybere: —Aõ tyytybybina-di aõkõ rarybemyhÿre. Tyytybybina aõbo hãbu ruetà riruedÿÿnyõtyhy.

<sup>22</sup> Jerusalẽ hãwã-ki heka beõrahy rare. Worana bedehesi hetxina Tÿmyradÿÿna rÿire. <sup>23</sup> Salomaõ Ube-ki, Deuxu dohodÿÿna heto ubeõ-ki. <sup>24</sup> Jesuisi rariamy ihÿmyhÿ. Tahe judeu mahãdu rirurawonyre itÿÿraxidÿÿmy. Tiwese bededÿÿnanamybo nohõtidihy bede ariwyrenykre. Kai inatyhymy Kristumy tate-wana, tahe manarybeke itÿnymy. <sup>25</sup> Jesuisi dirawyõnyde: —Rarybere wahe, tahe kaiboho tiwatyhynytenyõhyte. Inatyhymy ierysomy mohõtynybenykeki, waaõmydÿÿnana wiwihikÿ rewinyamahãre-di betehebennyke. Wahani-di kia rewinyamahãre. <sup>26</sup> Kaiboho tahe tiwatyhynyõlemahãtenyete, wabudoeni wesemy aõkõ toite. <sup>27</sup> Wabudoeni warybe rierymyhyre, riwaheludunymyhyre; jiarÿ heka ibutumy wabudoeni reerymahãre. <sup>28</sup> Tamy umytuedeõna rewahinywãhãre tiu heka ruruõtyhy. Inyõ waribi ridyõtyhy. <sup>29</sup> Waha wadee riwahinyre. Tii heka ibaturatyre rare. Inyõ iribi ritaõtyhy. <sup>30</sup> Jiarÿ Waha-wana sohojihyyle watxiwãhãre.

<sup>31</sup> Ixityre tahe judeu mahãdu mana-di rirubunykre idi rÿire. <sup>32</sup> Tahe Jesuisi tamyreny rarybere: —Jiarÿ sõwemy bedebyna inydee rewinywãhãre Waha ruru-di. Aõõrarukibo biwarubunybenykre. <sup>33</sup> Tahe judeu mahãdu rirawyõnyre: —Kai aõmydÿÿnana wiwihikÿle tewinyte. Kia õraru-ki aõkõ ijoi adi rÿireri mana-di arubudÿÿmy Deuxumy binatyhymy tarybeteriki. Kai dori hãbu tate, ihãrele Deuxumy texiniteri. <sup>34-35</sup> Jesuisi rarybere: —Abede ywina-ki ryberiti rÿire. Deuxu Rybe õbitihymy raritiny rÿire. Kiamy: —Jiarÿ rarybere: —Kaiboho Deuxu toite. Deuxu Rybe heka inyõ-õ diteõnyde. Kia mahãdu tahe Deuxulemy rininire. <sup>36</sup> Deuxumy tiiboho rininirenyre-wana, aõherekibo wadee takyarananyteri jiarÿ tule Deuxu Riõrelemy rexininireki. Waha dori, riwatamy diwateõnyde. Timykibo kaiboho tarybetenyteri Deuxumy ibinamy jiarÿ rarybererimy <sup>37-38</sup> Waha-ribi bedebyna ariwinyõkeki, biwatyhynybenyõtyhy. Tahe ariwinykeki, aõbo rewinyre-wana bityhynybenyke, biwatyhynybenyõke hãrele. Tai tahe bityhynybenymy boibeke jiarÿ Waha-wana wãhãre tule Waha wawana ratximyhyre. <sup>39</sup> Kabedeu ixityre riijere Jesuisi rimyky tii rexitamy rexihedÿÿnyre.

<sup>40</sup> Jesuisi ixityre Jordaõ bero kowa weribi-õ reurore. Joaõ juhuu rõsebedÿÿmyhÿõ rare. Taile tahe tii raremyhÿ. <sup>41</sup> Tahe sõwemy iny tamy roirenyre. Tamy rarybere: —Inatyhymy Joaõ bedebõby iny itxerenamy riwinyõre. Tahe ibutumy tii Jesuisimy rarybemyhÿre, inatyhy rare. <sup>42</sup> Sõwemy heka taile Jesuisimy rityhynymyhyre.

## 11

<sup>1-2</sup> Lazaru ibinamy roimyhÿ Betÿnia hãwã-ki. Marie, Marta-wana iseriõrereny rare. Juhuu Marie Jesuisi-wana raremyhÿu, tii Jesuisiwa tyre-õ tarinalÿnyrehekÿõ ritxiwire, idi tahe tarade-di rirubudÿÿnyre. <sup>3</sup> Lazaru ibinamy roimyhÿki tahe tiiboho riteõnyre Jesuisi-õ rarybekremy: —Wahÿ, abiõwa tyhy binanihikÿmy roireri. <sup>4</sup> Jesuisi kiamy roholareu rarybere: —Kabinana hãwã Deuxu wowydynamy tamy nade. Tule riwawowydynyky jiarÿ dori Deuxu Riõre rare. Kabinina tahe rubuhyymy aõkõ tamy rÿike. <sup>5</sup> Jesuisi heka ibutumy iluurenyre, Marta, Marie, Lazaru-wana. <sup>6</sup> Iu Jesuisi rieryreu Lazaru webinaduna, tahe taile ratximyhyre, reriãrele inatxitxumy. <sup>7</sup> Iribi tahe rarybere taerydÿÿna mahãdu-õ: —Ròkõirenyke ixyby Judeia bedebõ. <sup>8</sup> Tahe ierydÿÿna mahãdu tamy rarybere: —Erydÿÿdu aõherekibo ixybynomy tamy tarybeteri judeu mahãdu adi heka riwisÿnymy rÿimyhÿ

mana-di arubudỹỹmy. <sup>9</sup> Jesuisi dirawyònyde: —Txu heka waòinatxi òra bededỹỹnanamy rare. Aõhe inatyhy. Inyõ txumy rariakeki, tiu aõ òraru-ki reseõtyhy loosònamy dori ibutumy robimyhỹre. <sup>10</sup> Bede lurumy rariakeki tahe, aõ òraru-ki reseke, loosòna dori ihoõreki wahe. <sup>11</sup> Tahe ijõmy Jesuisi tamyreny rarybere: —Iny biòwareny rõrõmy roireri. Tamy arakre ariixixanykremy. <sup>12</sup> Tahe imahãdu rarybere: —Wanyrỹ tii rõrõmy roireri-wana bohe, reytekre. <sup>13</sup> Jesuisi heka rarybemyhỹ Lazaru rubumy roirerimy. Tiiboho tahe rõhõninyrenyure urile rõrõmy roirerimy. <sup>14</sup> Tahe Jesuisi ritỹnynytyhyra tamyreny: —Lazaru rurure. <sup>15</sup> Jiarỹ wa aòrarureny-ki wadeysamy watxireri tai watxiòraki. Ka tahe biwatyhynybenykre. Ròkòirenykre tamy. <sup>16</sup> Tome ierydỹỹna mahãduõ rare. Didimomy iniõre. Tamahãduõ rarybere: —Ròkòirenyke, tule tii-wana rukururenykremy.

<sup>17</sup> Jesuisi rehemynyreu, Lazaru inaubiòwatxumy hãloo iwòdỹỹwo-ki roimyhỹ. <sup>18</sup> Betỹnia Jerusalẽ hãwã-ribi sohoji urihixinamy roire. <sup>19</sup> Judeu mahãduy-ribi sòwemy doidenyde Marta Marieboho wotòdenamy, iseriòreny rurureki. <sup>20</sup> Marta Jesuisi kanakre rieryreu, tahe ròhònyre tii-wana witxi reakemy. Marie tahe tahetokile rononymhỹ. <sup>21</sup> Tahe Jesuisi-ò Marta rarybere: —Wahĩ, kakile atxiberi-wana waseritxòre rurukõhykyra ikuny. <sup>22</sup> Ihãrele tahe rekeryre ibutumy Deuxu-kò bexitòenykeki, tiki adeke kidiwahinykre. <sup>23</sup> Jesuisi tahe tamy rarybere: —Aseriòre wa rubu-ribi kedexixakre. <sup>24</sup> Tahe Marta rarybere: —Rekeryre jikarỹ ikokunanatxu-ku rubu-ribi rexixakre, ibutumy ixixanatxu-ku. <sup>25</sup> Jesuisi rarybere: —Jiarỹ waixixanadỹỹdu rare, umyuedeõna wahidỹỹdu rare. Inyõ riwatyhynykeki, tii rubu-ki roire hãrele, kedexixakre. <sup>26</sup> Ibutumy irumy roirekeki, tiu rururenyõtyhy, tii dori riwatyhynyreki. Kai aõbohe kia tetyhynyteri. <sup>27</sup> Tii dirawyònyde: —Kohe, Wahĩ, aratyhynywãhãre. Kai Kristu tate, Deuxu ritxòretyhy. Deuxu tuu rarybereki, bede-kò kanatekònyde wahe. <sup>28</sup> Tahe Marta ròsere Marie taseriòre-ò rarybere: —Inyhĩ rehemynyreki, kai makremy rarybereri. <sup>29</sup> Kiamy roholareu, tahe, wylemy rỹimy reare tamy rare.

<sup>30</sup> Jesuisi dori hãwã-ò ralòõlemy raremyhỹ Marta tamy raryberekile raremyhỹ. <sup>31</sup> Tii rỹimy ròhònyreu, judeu mahãdu tuu robire. Tahe riheludunyre, wabede-ò robukremy raresỹny tamy roholare. <sup>32</sup> Marie rehemynyre Jesuisi-ò. Tahe tii tuu robireu, resere iko-ò, tahe rarybere: —Wahĩ, kaki atxiberi-wana ikuny waseritxòre rurukõhykyra. <sup>33</sup> Jesuisi Marta ibru-di tule judeu mahãduhi-di retehereu tule tii rabadewonihikỹre. <sup>34</sup> Iule Jesuisi rỹỹraxire: —Titxiwexe tii tetiditenyte. Tiiboho rirawyònyre: —Wanyrỹ, manake itxeremy. <sup>35</sup> Jesuisi tahe rahinyre. <sup>36</sup> Tai tahe judeu mahãduõ rarybere: —Betehebenyke sòwemy heka tii Lazaru luure. <sup>37</sup> Ijõ tahe rarybere: —Tii iny ruetà riteytenyre. Aõherekibo Lazaru irumy ratxireriule riteytenyõra.

<sup>38</sup> Jesuisi ixyby tawo-ki bederiòtiinyre. Tahe rariamy rare wabede-ò Lazaru suiwodỹỹwo-ò roire. Mana-di tahe ritxiotòbònyre. <sup>39</sup> Tahe Jesuisi rarybere: —Mana bitake Marta tahe iseriòre rarybere: —Wahĩ, rarònyreki wahe inakubikòwa txumy dokuri txuu idi rỹira. <sup>40</sup> Tahe Jesuisi rarybere: —Rarybere taheka, bityhynykeki, Deuxu rurumy bobike. <sup>41</sup> Tahe mana iribi ritarenyre. Jesuisi retehere biu-ò rexitòenyre: —Umy reàlãmý wahe watxireri kai wadee taholataki. <sup>42</sup> Wadee taholahyy atxiteri mahãte: —Kia reeryre, kata inysòwehekỹ òraru-ki kiamy rarybera adee, tai tiiboho rityhynyrenykeny wahe, kai tiwateònyteki. <sup>43</sup> Kia rexihureu tahe rryre: —Lazaru, bodohonyke wa ahana-ò. <sup>44</sup> Kia rurumy roimyhỹ-ribi tahe dòhònyde. Iwa heka tebò-wana widee ritỹtenyleny roimyhỹ. Irati tahe tyybese-di ritỹtenymy ihỹmyhỹ. Jesuisi rarybere: —Biesebenyke wa ixinamy rake.

<sup>45</sup> Tahe judeu mahãduy-ribi, Marie Martaboho roraludu mahãdu, aõbo Jesuisi riwinyremy robireu tahe, rityhynyre. <sup>46</sup> Ijõ tahe fariseu mahãdu-ò roirenyre tamy relyykemy aõbo Jesuisi riwinyremy.

<sup>47</sup> Iribi tahe xiwe wahidỹỹdu wedu, fariseu wedu mahãdu-wana heka ywisidỹỹna mahãdu ributunyre. Dohodỹỹna mahãdu wedu heka imahãduni rare. Tahe inyõ rarybere: —Ka hãbu heka aõwiwihikỹ sõwemy diwinymyhỹde. Aõhebo he rokotỹỹnyrenykre. <sup>48</sup> Tiihyyle riwinymy rarekeki, heka ibutumy rityhynykre. Idi tahe Roma hãwã mahãdu soldadu kanakre iny riòlòdỹỹnyke insỹ rahurenykre. <sup>49-50</sup> Kaifa imahãduõ rare. Kabeòrau tahe tii ibutu xiwena wahidỹỹdu wedu rare. Tahe tii rarybere: —Kaibohe aõ teeryõhyytenyte. Hãbuõ tahe rurukre ibutu inydee. Tai tahe ibutu iny itueõtyhy. <sup>51</sup> Kia heka irayky-ribi aõkõ ròhònyre. Deuxu irayky-ò ritidire, tii dori xiwena wedu tyhy rare kabeòrau. <sup>52</sup> Kiamy rarybereu, tahe Jesuisi rubunamy rarybereri. Jesuisi dori ibutumy judeu mahãdu dee rurukre. Tamy sohojile aõkõ rurukre. Tahe sohoji mahãduòle rabutukre Deuxu riòre bede bedemy rỹira mahãdu wahe. <sup>53</sup> Itxuule tahe Jesuisi rubudỹỹmy rõhõtynyrenyre.

<sup>54</sup> Tai tahe ihãwãy-ki rariaõre, Judeia mahãduy-ki. Tahe iribi rexitare bederahy-ò iòhòmny. Hãwãõ-ò heka rare, Efraï heka inire. Taile taery mahãdu-wana ihỹmyhỹ. <sup>55</sup> Judeu mahãdu worana bedehesi iòhòmny rỹimyhỹ Pascoa heka inire. Ritelenykõule heka sõwemy roirenyre Jerusalẽ hãwã-ò, tai rexiwinyrenyremy iwese bede ywina rarybere wese Pascoakomy wahe. <sup>56</sup> Sõwemy iny Jesuisimy robikemy rỹimyhỹ. Tahe Deuxu dohodỹỹna hetowo-ki widee rarybemyhỹre tahe rarybere: —Kanakre aõbo Jesuisi worana bedehesi-ò. <sup>57</sup> Xiwena wedu fariseu-wana juhoo inyõ rarybemahãre: —Inyõ Jesuisimy robikeki, tuu wadeereny kanarybekre, tii ramykremy wahe.

## 12

<sup>1</sup> Jesuisi rare Betỹnia hãwã-ò Pascoa worana bedehesi rỹikrekoki. Debòsohoji txumy rauhenymy rỹimyhỹ tamy. Tai heka Lazaru rasỹnymyhỹre rubu-ribi rexixare-ribi wahe. <sup>2</sup> Martaboho tahe rỹsỹna wiutàdàna riwinyrenyre Jesuisideewina. Lazaru Jesuisi-wana riroxikremy ronymyhỹ. Tahe Marta tamyreny rỹsỹna riwymyhỹ. <sup>3</sup> Marie tahe sõwemy aderõna lỹnyre-di ratximyhỹ, iòwyhykỹre heka. Tahe tii Jesuisiwatyre ritxiwire idi tahe taradedile risuhore. Heto tahe tỹnyrehekỹlemy roire. <sup>4</sup> Judasi Isariò tule Jesuisi erydỹỹnaõ rare tii tai ratximyhỹ. Tii Jesuisi rityhenyremy tii raremyhỹ ihewo-ribi. Tii tahe rarybere: <sup>5</sup> —Kaa aderõna heka iòwyhykỹ rare. Aõherekibo idi tahonyõte nieru idi bitakemy iny aõkõ mahãdu-ò nieru biwahinykemy. <sup>6</sup> (Judasi heka iny aõkõ mahãdu luu aõkõ rare. Erydỹỹna mahãdu nieru rubudỹỹdu tii rare. Kia nieruõ tahe ixideele ritosinymyhỹre. Tai tahe aderõna òwy ixidee ributunyremy idi ratximyhỹ). <sup>7</sup> Tahe Jesuisi rarybere: —Ixinamy wawatyre ritxiwike, wahãloo-ò waherina heka riryrymy tuu ritxiwireri. <sup>8</sup> Kaibohe heka aõu biwiòhenanymy ahãbenyke iny aõkõ mahãdu awanareny dori rarehyymy rarekre. Jiarỹ tahe kaki aratxihyyke aõkõ rare.

<sup>9</sup> Judeu mahãdu Jesuisi rehemynyreny roholare. Tahe sõwemy iny tamyreny nade itxeremy. Tule Lazaru-ò itxeremy nade rubu-ribi rexixareki. <sup>10</sup> Tai tahe xiwewahidỹỹdu mahãdu wedu tule Lazaru rubudỹỹmy rarybere. <sup>11</sup> Lazaru òraru-ki dori sõwemy judeu wedu Jesuisi rityhynyre.

<sup>12</sup> Itxubiòwau tahe Jesuisi nade Jerusalẽ-ò kia-ò tahe roholare ibutumy worana bedehesi ludu mahãdu. <sup>13</sup> Tai tahe roirenyre tii-wana witxi reakemy horeru riwyre ityre-di kanakre. Riryrenyre Jesuisi-ò: —Waiòlòreny, kai arawowydynyreny, kai bedeòbydỹỹdu tateki! Kai Deuxuni-di tateri. Kai judeu

Iòlòtyhy Tate. <sup>14</sup> Jesuisi nade jumenta riòre tyre-ki, tuu dori ihetxina tyyriti-ki roire wesemy. <sup>15</sup> Kiamy wahe roire:

—Judeu riòre mahãdu uritere brebuõmy atximahãbeny aiòlòreny dori kanakre jumenta riòre tyre-ki.

<sup>16</sup> Iery mahãdu kia rieryõhyyre juhuu. <sup>17</sup> Iribi tahe tõhõti itxi reare ritidỹyna hetxina-ki roiremy, Jesuisi biu-txi ròsemy rareu wahe tõhõtireny itxi reare. Tule sõwemy iaõmydỹynana rybe hetxina-ki riritinomy rỹimyhỹre. Kia-di tahe idi tõhõtireny reare. <sup>18</sup> Inyõ itxeredu heka Lazaru ixixanamy relyyre. Tai tule iny sõwemy doidenyde. Kia Jesuisi riwinyreò heka roholarenyre. <sup>19</sup> Tai tahe fariseu mahãdu widee raryberenyre: —Ibutumy ihemy roirenyre. Timyõre, aõhe heka rikisỹnyrenyõtyhy.

<sup>20</sup> Inyõ worana bedehesi-ki grego rybedu mahãduõ ratximyhỹ. Tii tai Deuxu reàlakemy ratximyhỹ. Tii Besaida hãwã ludu-ò Kalileia bedede luduõ ratximyhỹ. <sup>21</sup> Tahe grego rybe mahãdu tamy rarybere: —Wanyrỹ, jiarỹboho, Jesuisimy arobikemy watzirenryeri. <sup>22</sup> Filipi tahe Andre-ko relyyre. Ta wiwana roirenyre Jesuisi-ò. <sup>23</sup> Jesuisi rarybere: —Aõkõra, Wabededỹynana iòhòra Deuxu Riòre Hãbutyhyhykỹ rubuna-ò, wahe. <sup>24</sup> Inatyhymy adeereny ararybekre: —Jiarỹ alòbòròna rijuxunymyhỹre wesemy aresekre suò, arurukremy. Aruruõkeki ixivanahyyle ararekre. Arurukre-wana sõwemy araratynkre. <sup>25</sup> Inyõ ixiluukeki heka, ruruke. Kabede-ki tahe ixiluuõkeki, tii rexiywinymy umytuedeõna-ò ratxike. <sup>26</sup> Inyõ wadeòdumy ratximyhỹkeki, tii riwaheludunyke. Tai titxibo aratxikeò tii wawana ratximyhỹke. Inyõ wadeòdumy rareke-wana, tii Waha riwowydynkre.

<sup>27</sup> Katahe wabedewonihikỹmy watzireri. Timybo ararybekre, Waha, kia rubu aõmydỹynana-ribi biwatake. My òsana arexitòenykre. Aõkõre, kiaòle heka kabede-ò anade. <sup>28</sup> Waha, anityhy-ò iny riwowydynkemy watzireri. Iule tahe rybeò-ò roholarenyre: —Kia rotỹnyre ihãre ta ixityre tuu rotỹnykre. <sup>29</sup> Tahe iny sõwehekỹ kia rybe-ò roholare. Tahe rarybere: —Biumytxyle rare. Tahe ijõ rarybere. Aõkõre ýju rare. <sup>30</sup> Tahe Jesuisi rarybere: —Waòraru-ki aõkõ kia rybe rỹireri, aõrarureny-ki, tamy boholabenykemy. <sup>31</sup> Wiji tahe ywisidỹyna kỹnykre, bedemy iny rỹira mahãdu-ò. Kia mahãdu iòlò, Satanasi, kanahitxidỹykre. <sup>32</sup> Iu jiarỹ itxeò-ki riwaukokreu, ibutumy iny heka ixidee adiwiutadãnykre riwatyhynkremy. <sup>33</sup> Iu tii kia rarybereu, tarubuna ritỹnyre timybo rurukre. <sup>34</sup> Iny sõwehekỹ dirawyònyde: —Jiarỹboho raholarenyre bedede ywina-ò. Tii rarybere: —Tiiemy Kristu rarehymy rarekre. Timybo kai tarybeteri: —Biwaukokremy. Mobo tahe Deuxu Riòre Hãbutyhyhykỹmy tuu tarybeteri. <sup>35</sup> Tahe Jesuisi dirawyònyde: —Urihimyòle loosòna awana rariamy ratxireri. Idi atxiteriule idi mariake, bedede luru atxi kanakelau. Inyõ bedede luruki rariakeki, tiobo rake rieryõhyyre. <sup>36</sup> Waloosòna atxiteriule, biwatyhynyke waloosònamy, taile waloosòna mahãduõmy boibeke. Kiarybe rahu-di tahe Jesuisi iribi rexitamy rexiwore. <sup>37</sup> Tii sõwemy bedetiidỹyna ikoreny-txi riwinyre. Ihãrele tahe sõwemy rityhynyõre. <sup>38</sup> Kia tahe Isaia tyyriti-ki roire, tahe iwesele tuu rarybere wese wiji rỹira rotỹnyre:

—Wanyrỹ, Iny rybe tỹnydỹynareny tiiboho rityhynyõhyyre, Deuxu taruru tamy riteòsinyrehãrele rityhynyõre.

<sup>39</sup> Tai rityhynyõhyyre. Isaia, Deuxu rybedu ijõmy ròritidỹyre:

<sup>40</sup> —Deuxu riruetãnyre, irayky riteredỹnyre. Tai rieryõhyymy robiõhyymyhỹre. Tiu heka Deuxu rityhynyõhyyre. Tiu riteytenyõhyyre.

<sup>41</sup> Isaia Jesuisi loosònamy robire. Tai tahe tuu ròritidỹyre. <sup>42</sup> Ihãrele tahe dohodỹyna mahãdu wedule sõwemy rityhynyre. Urile fariseu mahãdu òrarukile,

ijõ-ò tuu rarybeõre, dohodỹỹna mahãduy-ribi riòlòdỹỹnyheny. <sup>43</sup> Tiiboho dori Deuxu wowydyna luurenyõre inywowydynale luurenyre.

<sup>44</sup> —Iny riwatyhynymyhỹkeki, wadeòdỹỹdule rityhynymyhỹre. <sup>45</sup> Inyõ wamy robikeki, iule wadeòdỹỹdumy robike. <sup>46</sup> Jiarỹ loosõna wesemy anade bede-ò. Tai tahe iny riwatyhynykeki, bede luru ribi ròhõnyke. Tai heka anade. <sup>47</sup> Inyõ warybe-ò roholake hãrele riywinyõkeki, tahe jiarỹ tii wiji ariywidỹỹnyõke. Jiarỹ dori tarasaduhyylemy anade. <sup>48</sup> Inyõ riwatyhynyõkeki, warybe-ò roholaõkeki, ikonana txuu tahe ywisidỹỹna-ò ralõke, warybe-ò rityhynyõmyhyreki aõhõkỹmy dỹỹnana-ò heka kia ralõkre. <sup>49</sup> Jiarỹ ixi rayky-ribi aõkõ rarybemahãre. Wahale rybe wadee riwahinymyhỹre. Kia wesele relymahãre. <sup>50</sup> Deuxu rybe bede ywina-di diwateõnyde umytuedeõna wahidỹỹna kia rare. Kiale heka reeryre.

## 13

<sup>1-3</sup> Pascoa worana bedehesi txumy txuu rỹire. Tahe Jesuisi rexierye ixyby tyby-ò ròsekremy ihỹre, ibededỹỹnana iòhõmy roireki. Tule rexierye tyby ibutumy tamy riwahinyremy. Tii tyby-ribi nade tule ixybyle tamy rakemy. Txioro roxinau Jesuisi taerydỹỹna mahãdu-wana riroximyhỹreny. Judasi Isariò (Simaõ riòre) taile ratximyhỹ. Juhuu diabo tamy rarybere iruule Jesuisi rityhenykemy. <sup>4</sup> Jesuisi sõwemy taerydỹỹna mahãdu luure. Tai tahe rỹire, tatytyre ludu ritare òsurõna rimyre, idi rexiwetyataare. <sup>5</sup> Hynaro-ò bee ritxiwire taerydỹỹna mahãduwaa risuhokremy tahe òsurõna-di tawetya-ki ihỹmyhỹ-di iwa rirubudỹỹnyre. <sup>6</sup> Tahe Jesuisi rehemynyre Simaõ Pedro-ò, Pedro rarybere: —Aõkõre kai wawareny suròdòõmyke. <sup>7</sup> Jesuisi rirawyõnyre: —Kai heka teeryõte aõherekibo resuhõreri. Ihewo-ribi tahe bierykre. <sup>8</sup> Pedro rarybere: —Aõkõre, wawasuròdòdỹỹõmy. Jesuisi rirawyõnyre: —Arisuhòõkeki wawanahyy aõkõ mabeke. <sup>9</sup> Pedro rarybere: —Wawasohojile aõkõ bisuhokre, wadebò warati-wana tule wahe. <sup>10</sup> Tahe ritỹnynyre Jesuisi; inyõ rõhõre-wana iwale rasuhõke. Iuhe ibutumy tyralemy rỹimyhỹre. Kaiboho yralemy toite. Sohoji tahe aõkõre. <sup>11</sup> Jesuisi tatyhedỹỹdu rayky rierymyhỹre. Tai tahe rarybera, ibutumy aõkõ tyraremy.

<sup>12</sup> Jesuisi iwasuròdò rexihureu, tatytyre ludu retyynyra roxina-ò ròsere. Tamyreny rỹỹraxire: —Kaiboho teerytenyete. Aõhebo jiarỹ kia ratỹỹnyra. <sup>13</sup> Adeereny aritỹnynykre. Kaiboho tiwaninitenyete anyrỹmy, aõhe inatyhy? Aerydỹỹdumy, inatyhy heka jiarỹ rare tahe òbitimy tarybetenyete. <sup>14</sup> Jiarỹ aerydỹỹdureny anyrỹreny heka awareny resuhore. Tai tahe kaiboho wiwa bisuhòbenykre. <sup>15</sup> Iwese jiarỹ rexideòsinyre wese kaiboho biwinybenyke. <sup>16</sup> Inatyhymy adeereny ararybekre. Deòdu dori tawedu ratyre aõkõ rare. Rybe-ò ijohonadu dori rybedutyhy ratyre aõkõ rare. <sup>17</sup> Kia warybe teerytenyete. Tahe biwinybenykeki bedebynatyhy adeereny kanakre. <sup>18</sup> Ibutumy umyreny aõkõ rarybereri jiarỹ araeryreny, aratarenyreki, wahe. Rybe tyyriti-ki roire kiamy:

—Kia wawana riroximyhỹrele heka riwatyhenykre. Ele elemy tuu rotỹỹnykre.

<sup>19</sup> Wiji rarybereri heka wylemy kia tuu rotỹỹnykre. Tuu rotỹỹnykreule, kaiboho bierybenykre òbitimy raryberé wahe; jiarỹ biwatyhynybenykemy wahe. <sup>20</sup> Inatyhytyhymy ararybekre: —Inyõ adee aditeõnykre. Inyõ tii rityhynymy kididykeki, tii riwadymyhỹre. Inyõ kidiwadykeki wadeòdỹỹdu ridymyhỹre, Deuxu rityhynymyhỹre wahe.

<sup>21</sup> Tahe Jesuisi rabadewonihikỹmy ronymyhỹ. Tahe rarybera: —Iny sohojiõ ayreny-ribi riwatyhenykre. <sup>22</sup> Tahe wii riijerijereny. Mokobo



rarekremy rōhōtinyrenyrene. <sup>23</sup> Jiarỹ, Joaõ Jesuisi weribi ranywỹhỹ, tii dori sōwemy waluure. <sup>24</sup> Tahe Pedro wadee narybewasidi: —Tamy inihe myỹraxike mobo raremy. <sup>25</sup> Tahe jiarỹ retorunyrene: —Wanyrỹ, mowexe ratxireri. <sup>26</sup> Jesuisi rarybere wadee: —Kia orotxu ituudỹỹ tamy ariwahinykrele tiikre. Tahe Jesuisi orotxu yre rituunyrene idi tahe Judasi Isariò-ò riwahinyrene. Tii Simaõ riòre rare. <sup>27</sup> Tahe Judasi riyrene. Iribi tahe Satanasi aōwesele tamy ralore. Jesuisi heka Judasi-ò rarybere: —Aōhebo botỹỹnykre wylemy makre biwinykremy. <sup>28</sup> Tahe riroximy rỹimyhỹ mahādu rieryōre aōmybo Jesuisi rarybemyhỹ. <sup>29</sup> Judasi Isariò dori nieru hyna yrubudỹỹdu heka rare. Tai tahe rōhōtinyrenyrene Jesuisi worana bedehesi aōna aōna riwykemy riteònyrene, ada iny aokōdu mahādu-ò nieruō riwahinykemy. <sup>30</sup> Judasi orotxu yre riyemy rahudi tahe rōhōnymy rare bede luru-txi.

<sup>31</sup> Judasi rōhōnymy rahudi tahe Jesuisi rarybere: —Wiji tahe Deuxu Riòre Hābutyhyhykỹ loosònamy iny robimyhỹre taraykywo-ki. Tii heka jiarỹ rare. Deuxu-ò waòraru-ki wowydyna riwahinykre. <sup>32</sup> Deuxu loosònamy tahe waki iny robikeki, Deuxu riwatoosònyreri aōwesele ibutumy iny tuu robike. <sup>33</sup> Waluudu mahādu wariòre wesemy atximahātenynte, umywanareny urihimyòle ararekre, idi tahe arakre. Tahe biwaijebenyhārele waki mahabenyōtyhy. Iwese judeu mahādu-ò rarybere wesele adeereny ararybekre: —Titxibo arakre-ò kaiboho boibenyōke. <sup>34</sup> Bede ywina tỹmyra wese adeereny ariwahinykre kiamy wahe: —Wiluurenykemy wahe: —Iwese jiarỹ aluurenyrene wese tule kaiboho wiluurenyke. <sup>35</sup> Wiluurenykeki ibutumy iny rieryrenykre kai waerydỹỹna mahādumy tate.

<sup>36</sup> Tahe Simaõ Pedro ritỹỹraxinyrene: —Wanyrỹ, titxibo kai makre. Jesuisi dirawyònyde: —Titxibo arakre-ò wiji kaiboho boibenyōke, iribi tahe wahemy bodoikre. <sup>37</sup> Tahe Pedro rarybere: —Wanyrỹ aōherekibo araōkre wiji ahemy waumy kie aòraru-ki ariwahinykemy watzireri. <sup>38</sup> Inatyhymy aōbo aumy biwahinykre waòraru-ki. Inatyhytyhymy ararybekre: —Hānie hābu robukōule kai biwatxiōnykre inataōmy.

## 14

<sup>1</sup> Kaiboho bedeòtiidỹỹrenyōmyke bedewona-ki. Kaiboho Deuxu tetyhynytenynte, tai tahe biwatyhynykre. <sup>2</sup> Wahasỹ-ki sōwemy sỹỹ rỹimyhỹre kialemyrene heka tai. Kaweseōkeki adee inatyhymy rarybemahāre. Jiarỹ tahe arakre sỹỹ adeereny ariwinykemy. <sup>3</sup> Ariwinymy arahudi tahe ixbyble aòrysmy adòòsekre. Tahe aradyrenykre titxibo-txi aratzireriò kaiboho tule matxibenykre. <sup>4</sup> Kaiboho dori teerytenynte titxibo wasỹry roire. <sup>5</sup> Tahe Tome rarybere tamy: —Wanyrỹ, titxibo makreò reerykōrenyrene. Tai tahe timykibo asỹry reeryrenykre. <sup>6</sup> Jesuisi dirawyònyde: —Jiarỹ wa ryy rare. Deuxu inatyhyna jiarỹ rare. Umytuedeōna wahidỹỹdu jiarỹ rare. Inyō waòrarukile Waha dee rakre. <sup>7</sup> Kaiboho tiwaerytenynte-wana tule Waha teerytenynte. Wiji tyhyule Deuxu teerytenynte, tuu tabitenynte. <sup>8</sup> Idi Filipi rarybere: —Wanyrỹ, boo inydee biteòsinyke, tai tahe awike. <sup>9</sup> Tahe Jesuisi rarybere: —Filipi, sōwemy bededỹỹnana umy-wana rewyrene. Ihārele tahe tiwaeryòte. Inyō wadee kanakeki, Wahamy robike. Aōherekibo wadee tarybeta boo wadee biteòsinykemy. <sup>10</sup> Jiarỹ Waha-ki watxiwāhāre tule Waha waki ihỹre. Kia aōbohe tetyhynyòte rarybewāhāre, kia iximy aōkō rarybewāhāre. Waha waki ratximyhy tii taōmydỹỹnanamy rotỹỹnyrene waumy-ribi. <sup>11</sup> Waha-ki watxiwāhāre, tule tii waki ihỹre, kia bityhynybenyke. Aōwiihikỹ rewinywāhāre òraru-ki biwatyhynybenyke. <sup>12</sup> Inatyhytyhymy adee ararybekre: —Inyō riwatyhynykeki, wawesele aōwiihikỹ riwinykre. Tahe watyreleaō riwinykre.

Jiarỹ dori Waha-ò arakre. <sup>13</sup> Tai wanimy aõmy bexitòenybenykeki, tii tahe ariwinykre. Iny Waha-ò wowydyna riwahinykemy idi watzireri, iRiòere wahe jiarỹ rare. <sup>14</sup> Tai aõma wani-ò bexitòenybenykeki, tii tahe riwinykreadeereny. <sup>15</sup> Inyõ waluukeki tii wabede ywina riywinytyhyke. <sup>16</sup> Waha-ò arexitòenykre ijõ wiòhedỹỹdu adeereny kiditeònykremy waderòwymy. Tii aõu aõu adeereny hyyle rarekre. <sup>17</sup> Tii Deuxu Tyytybytyhy rare. Tii inatyhynamy rieryrenyre, iny bede bede mahãdu wahe. Deuxu Tyytybytyhy ixidee ridykemy. Tuu dori robiõtyhy rieryõtyhy. Kaiboho tahe teerytenyte. Tii dori umywanareny ratximyhỹre, aworeny-ki ratxikremy. <sup>18</sup> Jiarỹ heka ixisohojimy ararisidỹỹnyõtyhy. Jiarỹle adee adoosekre. <sup>19</sup> Wijile arurumy arakre bede-ribi. Bede bede mahãdu tiu wamy robiõtyhy. Kaiboho tahe wamy bobilebenykre, jiarỹ dori ixityre rubu-ribi adexixamy ararekre. Tai tahe tule kaiboho rubu-ribi bexixamy boibekre. <sup>20</sup> Kia txuu kaiboho bierybenykre jiarỹ heka Waha-ki watxiwãhãremy. Kaiboho tasỹ waki ahãtenyte. Jiarỹ tule akireny watxiwãhãre. <sup>21</sup> Inyõ wabede ywinareny dikeki tahe, riywinykeki, waluudu rare. Waha tule iluukre. Jiarỹ tule iluutyhyre. Tamy tule arexideòsinykre. <sup>22</sup> Judasi tamy rarybere: (aõ Isariò aõkõ kỹny, iwitxiraõ.) —Wanyrỹ, aõhekremybo wadeereny bedexideòsinykre tahe bede bede ludu mahãdu-ò aõkõ wahe. <sup>23</sup> Jesuisi rarybere: —Inyõ waluukeki, wabede ywina riywinytyhyke. Waha, heka iluutyhykre. Jiarỹboho tamy adoidenykre tamysỹmy. <sup>24</sup> Iny waluuõkeki, warybe tiu rityhynyõtyhy. Aõ warybe-di aõkõ heka rarybereri. Waha wadee riwahinyredi heka rarybereri.

<sup>25</sup> Tai arakrekoki tuu rarybereri adeereny. <sup>26</sup> Tahe Deuxu Tyytybytyhy, awiòhedỹỹdu, tii araerynanykre ibutumy aõna aõnamy. Tímybo jiarỹ adeereny raryberemy akananohõtíjaranydenykre. <sup>27</sup> Ywina adeereny adiwahinykre waywina wahe. Iwese bede bede ludu mahãdu riwahinyhỹre wese aõkõ ariwahinykre. Uritere nohõtíyreõmy brebuõmy. <sup>28</sup> Rarybere dori arakremy tule adoosekremy. Waha waratyre rare. Tamy he arakre. Kaiboho waluukeki, beysabenykre tamy arakreu. <sup>29</sup> Kaa bede reakoki tuu rarybereri. Tuu reakreu tahe, kaiboho biwatyhynybenykre. <sup>30</sup> Sõwemy heka adeereny ararybeõkre, bede dinodu dori tehemyhỹre ihỹre, Satanasi wahe. Tii heka wadee iruruõhyyre, riwateònyõtyhy. <sup>31</sup> Jiarỹ Waha luure. Rewinywãhãre aõbo Waha ariwinykemy riwateranyhỹre. Botamanyke: —Ròkòirenyke.

## 15

<sup>1</sup> Hãjutò òwòna wese wihikỹ jiarỹ rare. Waha tahe bede rade wysydỹỹdu wese rare. Bede òbebure iratyõkeki iò riòròke. Iratydikeyi iòsõmo iribi risihere. Tai tahe sõwetyhymy nihikỹmy raratynyke. <sup>2</sup> Kaiboho bede rade-ò wesemy toite. Warybe-di aõsõmoreny aribireny resihemahãre. Katahe òbitimy toite bederatymy raratynykemy. <sup>3-4</sup> Kaiboho biwamymy wadi myikre. Iwese bede radeò raòròõmyhỹkeki irulemy rỹikre raratynyke. Aõkõkeki ruruke. Kaiboho iwesele toite. Waki beàrenyõbenymyhỹkeki, tiu Deuxudeewimy atxibenyõtyhy. <sup>5</sup> Jiarỹ hãjutò òwòna wese rare. Kaiboho ibede radeò wese toite. Waki beerenybenykeki, jiarỹ aki araríke, tai bederaty wese sõwemy maratynyke. Wahoõkeki tiu aõ biwinybenyõtyhy. <sup>6</sup> Inyõ waki rariõkeki, iwese iny bede rade rubu-di rahuleke, tii iwesele inyõ rahukre. Juhuu rimyre, idi heòty-ò rehure, tai roomyhỹre. <sup>7</sup> Kaiboho waribi boibenyõkeki, warybe õhõtí-ribi rosaõtyhykeki, aõtaxina wadee bexitòenybenykre, tai ibutumy adee ariwahinykre. <sup>8</sup> Iwese bede rade sõwemy raratynymyhỹre wese, kaiboho, aõna aõna wiwihikỹ biwinybenyke Deuxu dee. Kiakeki tahe Deuxu deàlàna sõwemy ritakre. <sup>9</sup> Iwese Waha waluure wese jiarỹ aluurenyre waluuna-ribi

boibenyõke. <sup>10</sup> Wabede ywina inyõ riywinykeki, tii waluuna-ribi raõtyhy. Iwese Waha bede ywina reywinymyhÿre wese tahe Waha luuna-ribi jiarÿ tii rahõnyõhyyre. <sup>11</sup> Wadeysana awo-ki ratxikemy jiarÿ adi watzireri. Eysana sõwemy mabekemy adi watxiwãhã. Tai tahe warybe adee rarybere. <sup>12</sup> Wabede ywina heka kaa rare: —Wiluukemy. Iwese jiarÿ aluure wese wiluurenykemy. <sup>13</sup> Inyõ taery dee rurukeki taluunadireki, tii luunatyhy ijõdire. <sup>14</sup> Kaiboho wadeewi biwinybenykewana tai inatyhymy wabiõwa toite. <sup>15</sup> Tahe aõ wadeõdumy aõkõhe araninirenykre. Kaiboho wabiõwa toite jiarÿ dori Waha-ribi raholare adee tuu relywãhãre. <sup>16</sup> Kaiboho tahe ti-watatenyõhyyte, jiarÿ tahe aratarenyre kaiboho boibenykemy. Sõwemy aõna aõna wiwihikÿ botÿÿnybenyke. Tule kia aõna aõnamy tule roihyykemy. Tai tahe aõmy Waha-ribi wani-di bexitõenybenykeki, adee riwahinyhyy rareke. <sup>17</sup> Wiluubenyke: —Kia tahe wabede ywina adeeremy adiwahinyde. <sup>18</sup> Bede ludu iny mahãdu eramy reakeki myÿ uritere nohõtiõmy juhoo dori waderamy waluuõre. <sup>19</sup> Kai bede ludu iny tate-wana iny aluuke, tahe aõkõre. Tai tahe iny eramy reamyhÿre. Bede ludu mahãdu ribi jiarÿ aratara. Bede ludu mahãdu aõkõ tate urenana. <sup>20</sup> Adee heka rarybere aõmybo. Uritere iribi nohõti lusaõmy kia wahe: —Deõdu tawedu ratyre aõkõ rare. Tai wadee aõbina binamy iny rotÿÿnymyhÿre. Adeeremy tule aõmy rotÿÿnykremy wahe. Tiiboho warybe riywinyrenykeki, arybe tule tiiboho riywinyrenykre. <sup>21</sup> Kia tahe adee ratÿÿnymyhÿre wanimy rybe õraru-ki, tiiboho dori wadeõdÿÿna rieryõreki. <sup>22</sup> Tuu ararybeõre wana inihe tiiboho õrarudiõhyyrenyre. Katahe rarybere tai tahe tiiboho rarybeõtyhy rieryõremy. <sup>23</sup> Inyõ waluuõkeki, tule Waha luuõtyhy. <sup>24</sup> Jiarÿ heka ibutuko-õ wowydyna iitxerenarenymy rewinyõrewana, tiiboho iõrarudiõhyyre inihe. Tahe rewinyamahãre, tuu robimyhÿrenyre, ihãrele tahe waluuõre tule Waha luuõre. <sup>25</sup> Kiamy heka rotÿÿnyre bede ywina ritidÿÿna-ki roireki. Tai heka tuu rotÿÿnymyhÿre. Kiamy wahe ritidÿÿna-ki roire:

—Tii heka bede õraru aõkõ rare, ihãrele tahe iluuõrenyre.

<sup>26</sup> Deuxu Tyytybytyhy adee ariteõnykre. Tii, wiõhedÿÿdu rarekre inatyhynamy rierynanykre. Tahe, tii kedehemynykreu wamy rarybekre. <sup>27</sup> Tule kaiboho wamy marybebenykre, wawana hyy ahãtenyteki.

## 16

<sup>1</sup> Kiamy adee rarybemahãre õraruna-txi ixekemy. <sup>2</sup> Tiiboho heka anatakre tohodÿÿna hetowo-ribi. Kobe, bede dÿÿnana iõhõmy kadeakreu inyõ anarubunykeki, kia Deuxudeewimy tuu konohõtinykre. Tii Deuxu wiõhedÿÿdu raremy ixi-di kõnohõtinykre. <sup>3</sup> Tiiboho Waha rieryõhyyimyhÿrenyre tule riwaeryõmyhÿre. Tai tahe kiamy adeeremy rotÿÿnymyhÿrenyre. <sup>4</sup> Iu adeeremy aõmydÿÿnana kedehemynykreu, õhõtireny itxi reake timybo adeeremy relyyretxi. Tiu heka tuu rarybeõhyyre, umywanarenyhyy dori wãhãre. <sup>5</sup> Katahe arakre wadeõdÿÿdu-õ. Kaiboho bÿÿraxibenyekõ aõbo tiobo arakre-õ. <sup>6</sup> Kaiboho heka tabedewomy toite kamy rarybereriki. <sup>7</sup> Ihãrele tahe inatyhymy adeeremy ararybekre: —Adeeremy awikre arakreki wahe. Jiarÿ araõkeki awiõhedÿÿdu, Deuxu Tyytybytyhy kanaõkre. Arakeki tahe tii aditeõnykre adeeremy. <sup>8</sup> Iu kanakreu, tii inydee kiditeõsinykre irayky binadiremy, iõbitina-di aõkõremy, iõrarunadiremy. Deuxu dori õrarudu riywisidÿÿnykre. <sup>9</sup> Taõraruna ixidee kiditeõsinykre tiiboho riwatyhynyõrenyriki. <sup>10</sup> Tahe ixidee kiditeõsinykre. Jiarÿ iratyre waõbitina direki. Waha-õ dori arakre, wamy bobibenyõtyhkemy. <sup>11</sup> Deuxu ixiywisidÿÿna ixidee kiditeõsinykre kabede dinodu dee rarybere

tii rexihukremy. <sup>12</sup> Jiarỹ heka sōwemy adee ararybekemy watzireri, ibutumy tahe isiramy ixidee bohohabenyke. <sup>13</sup> Txiõhe rare. Deuxu Tyytybytyhy kanakreu, inatyhymy adeeremy rarybekre inatyhyna-di ibutumy. Tarybe-di tahe rarybeõkre. Deuxu-ribi aõmybo roholaremy tahe rarybekre. Tule timybo aõna aõna rarekremy kanarybekre. <sup>14</sup> Tii waaõmydỹnana adeeremy ritỹnynykre. Tai kidiwatoosõnanykre. <sup>15</sup> Ibutumy Wahahõrõ heka wahõrõ rare. Tai heka tuu adeeremy rarybereri waaõmydỹnana adeeremy kiditynynykre. <sup>16</sup> Urihimyò riòre heka waõkre, idi tahe ixityre wamy bobibenykre. <sup>17</sup> Tahe ijõ ierydỹna mahãduõ widee rarybere: —Timybo tii rarybere: —Urihimyò iõkremy tii rarybereri, tule ixiryre wamy bobibenykre. Tule Waha-ò arakre. Timybo heka rieryrenyõhyre aõmybo rarybera. <sup>18-19</sup> Tiiboho Jesuisi-ò rỹraxyrenykre ratxirenyreri. Tahe Jesuisi rierymyhỹre tuu rỹraxykre. Tahe Jesuisi tamyreny rỹraxyre: —Kaimy ixidee tỹraxytenyteri. Wananamy waòkesenalemy. <sup>20</sup> Inatyhymy adeeremy ararybekre: —Iny bede mahãdu urile reysakre, kaiboho tahe araeryreny urile mahinybenykre, birajuabenykre, mabedewobenykre. Idi tahe kaiboho beysabenykre. <sup>21</sup> Iwese hãwyy ijera iòhòreki, rabedewomyhỹre, taaõhõkỹmydỹnana-di rõhõtinyinmyhỹre. Idi tahe reamyhỹre. Iu tahe tõhõti rosamyhỹre tohouã tỹmyradile reysamyhỹre. <sup>22</sup> Iwesele kaiboho mabedewobenykre, ixityre wamy bobebenykre tahe, kaiboho beysabenykre. Inyõ heka deysana aribireny ritaõtyhy. <sup>23</sup> Kiatxu tahe uritere watỹraxydỹõmykre inatyhymy adeeremy rarybereri. Waha-ribi aõmy bexitõenybenykeki. Tii adeeremy kidiwahinykre wani òraru-ki. <sup>24</sup> Tiu heka aõmy texitõenytenyõmahãte wani-di. Bexitõenybenyke, tai bitabenykre. Tai tahe kaiboho beysabenykre.

<sup>25</sup> Ibutumy rybewòtemy adeeremy rarybewãhãre wahe. Idi tahe tuu adeeremy ararybeõkre. Idi tahe itỹnytyhymy Waha aritỹnynykre adeeremy. <sup>26</sup> Kiatxu tahe bexitõenybenykre wani-di jiarỹ ararybeõkre umyreny Waha-ò. <sup>27</sup> Waha dori aluurenyre, kaiboho waluurenyreki, Deuxu-ribi anade tetyhynytenyteki. <sup>28</sup> Waha-ribi anade, bede-ò adehemynyde ihãrele bede-ribi arakremy Waha-ò. <sup>29</sup> Jesuisi ierydỹna mahãdu rarybere: —Wiji tahe itỹnytyhymy tarybeteri. Rybewòte-di aõkõ tarybeteri. <sup>30</sup> Kai ibutumy teeryte. Inyõ dỹraxyõmy adee. Kai inatyhymy Deuxu-di tanate. Kia jiarỹboho retyhynyrenyre. <sup>31</sup> Tahe Jesuisi tamy rỹraxyre. Inatyhymy wijityhyle tetyhynytenyta. <sup>32</sup> Wabededỹnanamy heka reara. Kaibohoõ sohoji sohojimy tasỹ tasỹ-ò rakre. Biwaribenykre ixi sohojilemy arỹikre. Tahe ixi-wana aõkõ watzikre, Wahawanale arỹikre. <sup>33</sup> Kaheka aõna aõnamy adeeremy rarybere ywina-di araykyreny-ki boibekre. Bede-ki kaiboho aõhõkỹmy botỹnybenykre. Ihãrele beysabenyke, Jiarỹ heka Deuxu òludu mahãdu-di ròtara.

## 17

<sup>1</sup> Jesuisi rarybemy rahudi tahe retehere biu-ò rarybere: —Waha, wabededỹnanamyhe reara. Ariòre watziwãhãre. Wowydyna wadee biwahinyke tai tahe adee wowydyna adee ariwahinykre. <sup>2</sup> Kai, Waha, ibutumy wadee ruruna tewahinyta iny deòdỹnamy. Tai umytuedeõna ariwahinykre biu-ò hedu mahãdu-ò. <sup>3</sup> Kia heka umytuedeõna rare: —Deuxu inatyhy tate sohojihyy tate. Tii araeryrenykeki tahe eòdỹna Jesuisi Kristu rieryrenykeki. Kia umytuedeõna rare tamyreny. <sup>4</sup> Aõ aõmysỹdỹnabo wadee tewahinyte, ibutumy adee rewinyre. Tai heka arawowydynyra kabede-ki. <sup>5</sup> Iu bede rexidelenyreu umywanahyy rarewãhã. Sōwemy loosõna nihikỹ-di rawãhãre. Tahe

wiji, Waha, kia loosònale ixityre bidiwahinykre umywanahyymy ararekre. <sup>6</sup> Kai iny mahãduõ wadee tewahinyte bede mahãdu-ribi. Tamyreny umy rarybemahãre. Juhu tiiboho ahõrõ roire. Idi wadee tewahinyte. Tiiboho arybe riywinymyhÿre. <sup>7</sup> Ibutumy waaõmydÿÿna aribi retamahãre. Kia heka wiji tiiboho rieryrenyra ibutumy aribi nade. <sup>8</sup> Aõrybebo wadee tewahinytamy tamy rarybemahãre. Tiiboho rityhynyrenyre, rieryrenyre aribi jiarÿ anade, kai wateòdÿÿdu tate. <sup>9</sup> Iòraru-ki adee rexitòenyre. Tiiboho amahãdu roire. Wadee tewahinyte, bede mahãdu-ò raru-ki aõkõ adee rexitòenyre. <sup>10</sup> Ibutumy wahõrõ, ahõrõ rare. Tule ahõrõ, wahõrõ rare. Tai heka iny mahãdu riwatoosònanymyhÿre. <sup>11</sup> Jiarÿ adee arakre tai kaki arareõkre. Tiiboho heka kaki rarirenykre. Tiiboho biyrubunykre, Waha, ani òbiti-di biyrubunyke, wadee tewahinyteki. Tai tahe iraykyreny wiwesehyymy roirekre. <sup>12</sup> Tiiboho-wana rarewãhãu ani òraru-ki reyrubunymahãre, wadee tewahinyteki. Timy heka reõnonyõhyre ijõ, sohojile tahe reõnonyre. Juhuu dori Ritidÿÿna roire ijõ sohojiõ ariõnonykremy. Ihyy tahe reõnonyre, Judasi Isariò õnodÿÿduhyymy rarekre. <sup>13</sup> Ka tahe arakre arora-ò. Tii heka inyõ rarybemahãre ibutumy wadeysana iworeny-ò ralòmÿhÿkemy. <sup>14</sup> Jiarÿ arybe tamyreny rewahinymahãre. Bede mahãdu iny dori terarenyre, tiiboho bede mahãdu iny aõkõ roireki. Iwese jiarÿ bede ludu hãbu aõkõ rare wese. <sup>15</sup> Bede-ribi tarasamy aõkõ heka adee rexitòenyre. Urile ibina bina widÿÿ-ribi biyrubunykemy. <sup>16</sup> Tiiboho tahe wiji ijõ bede witxira ludu roire, iwese jiarÿ rare wese, wahe. <sup>17</sup> Arybe-di tiiboho biòbitinyke, tai ahõrõ mahãdumy rarekre. Arybe dori òbitityhy rare. <sup>18</sup> Iwese bede iny-ò tadiwateònyte wesemy, Jiarÿ tiiboho reteònyre bede ludu mahãdu-ò rarybekremy. <sup>19</sup> Tamyreny xiwena wesemy adee arexiwahinykre. Òbitihyymy ararekre, tai tiiboho òbitihyymy roirekremy inatyhyna-di. <sup>20</sup> Aõ tamy sohojile aõkõ heka rexitòenyre. Ibutumy kia rityhynymy rÿirakre-ò dori rexitòenyre. <sup>21</sup> Tai tahe ibutumy wiwese wesemy rõhõtynyrenykre. Iwese, Waha, kai waki atxiteri wesemy tule aki watxireri wesemy tiiboho iny-ki roirekre. Tai bede iny mahãdu rityhynykre ateòdÿÿna watxireri urenana. <sup>22</sup> Kai loosòna wadee tadiwahinyte, tahe tamyreny rewahinyre. Tiiboho sohojihyy weselemy roirekremy, iwese iny sohojihyy rare wesemy. <sup>23</sup> Jiarÿ taireny wãhãre, kai waki ahãte. Tai tahe inyboho butuhyymy rokoirekre. Wii riòbitinymyhÿrenykre. Tai bede mahãdu rierykre tadiwateònyteki. Tule wamahãdu luu tate urenana Waha, iwese waluure wese. <sup>24</sup> Waha, titxibo ararekre, tiiboho wawanahyymy roirekre, wamahãdumy wadee tewahinyteki. Tai tiiboho waloosònamy robikre. Kai dori bede ihokõule waluure, tahe loosòna wadee tewahinyte. <sup>25</sup> Waha òbiti, bede mahãdu araeryõre Jesuisi tahe araeryre. Wamahãdu tule rieryre tadiwateònyte. <sup>26</sup> Jiarÿ tiiboho reerynanyre ani-di. Ihãre ta arierynanykre. Tai aluuna iwese waki ratxireri wesemy taireny rarekre, tule jiarÿ taireny ararekre.

## 18

<sup>1</sup> Jesuisi rexitòenymy rahudi tahe roirenyre taerydÿÿna mahãdu-wana Cedrõ beàwe-ribi kowa ijà-ò heka reuròenyre, tahe bederaty oworuro-ò rirònyrenyre. <sup>2</sup> Judasi heka Jesuisi tyhedÿÿdu heka ibede rieryre, Jesuisi dori taerydÿÿna mahãdu-di tamy rahyymyhÿre. <sup>3</sup> Tahe Judasi, soldado mahãduõ tadinodu-wana ributunyre. Fariseu mahãdu-ribi xiwena wedu wahidÿÿdu-ribi Judasi soldado yrubudÿÿdu mahãdu rihitxinyre tule xiwena

deòdu mahãduõ rihitxinyre tii-wana rakremy roirenyre. Tahe tamy ritehemynyrenyrene tòbòra heòty-wana. <sup>4</sup> Jesuisi rexieryre ibutumy aõmybo tamy kodotỹnykre. Tahe iny mahãdu-ò rexidorunyre. Tahe rỹrãxire tamy: —Mowe teijetyteri. <sup>5</sup> Tahe dirawyònyde: —Jesuisi Nazare hãwã ludu reijereri. Tahe Jesuisi rarybere: —Jiarỹ wa tiile rare. Tahe Judasi ityhedỹỹdu tii mahãdu wanale nade. <sup>6</sup> Jesuisi tamyreny rarybereu, tahe rexilòhòrarienyre iribi, tahe suòle reserenyre. <sup>7</sup> Ixityre Jesuisi tamy rỹrãxire: —Mowe teijeteri. <sup>8</sup> —Jesuisi Nazare hãwã ludu, tiiboho dirawyònyde. —Rarybera tahe jiarỹ raremy wahe. Tiwajeteri-wana tahe biwadyke urile ixinamy waijoi rirahuke. <sup>9</sup> Kawesemy wahe irybe hitxina wadee tewahinyteõ heka tiu reõnonyõhywãhãre. Jesuisi, kiamy rarybere tamyreny irybe hitxina wesemy ibutumy tuu rotỹnykremy. <sup>10</sup> Tahe Pedro tamaydese ritamy reare tahe xiwena wedu deòdu riwotõmonyre. Malòò heka inire. Pedro Malòò nohõti riorore ruruwe-ribi ludu wahe. <sup>11</sup> Jesuisi rarybere Pedro-ò: —Amaydese birutyke. Jiarỹ Waha deewimy aõhebo arotỹnykrekõ aõbo wadi tahõtinyteri. Aõhõkỹmy arotỹnyõkemy aõbo wadi tahõtinyteri.

<sup>12</sup> Tahe soldadu, tadinodu-wana, judeu yrubudỹỹdu-wana Jesuisi rimyre ritaataamy ridyre. <sup>13</sup> Kia beòra Kaifa xiwena wedu tyhy rare. Anasi iriòre labie rare. Tai tahe juhoo Ana-ò ridyre. <sup>14</sup> Kaifa tahe juhoo judeu mahãdu-ò rarybere: —Wiji beòramy hãbuõ iny mahãdu òraru-ki rurukremy rahõtinyteri.

<sup>15</sup> Simaõ Pedro inyõ-wana rare Jesuisi hewomy. Kia Pedro-wana rare, kia xiwena wedutyhy eryna rare. Tai tahe ralore òtity ijòrore-di. <sup>16</sup> Pedro tahe ahanakile rỹire. Kia Pedro-wana rare. Rohonyre hetowo-ribi hetoijø-di itxeredu-ò rarybere, tahe Pedro ridyre hetowo-ò. <sup>17</sup> Kia ijadõma, heto ijò-di itxeredu rarybere Pedro-ò: —Kai Jesuisi erydỹkỹna mahãdunokõ anobo tate. Tahe Pedro dirawyònyde: —Aõkõre. <sup>18</sup> Tahe soldado yrubudỹỹdu tai rahetõmy rỹimyhỹ, heto ludu deòdu mahãdu-wana txutàtà riki. Pedro iyrenykele rỹimyhỹ rahetõmy.

<sup>19</sup> Tahe xiwena wedu tahe Jesuisi-ò rỹrãxire. Aõhebohe aerydỹỹna mahãdu-wana tadotỹnyamahãte. Timybohe tebedeerynymahãte. <sup>20</sup> Tahe Jesuisi ritỹnyre: —Ibutumy inyko relyymahãre iwasimy aõkõ heka relyymahãre. Judeu dohodỹỹna hetokile relyymahãre Deuxu dohodỹỹna heto-wana. Titxibo judeu mahãdu ributunymyhỹremy relyywãhãre. <sup>21</sup> Tai aõherekibo wadeele tỹrãxiteri. Myrãxike wadee ijohonadu-ò. Tiiboho ka rieryrenyre aõmybo rarybere. <sup>22</sup> Jesuisi kia rarybereu, soldadu itxereduõ rihetenyre. Tahe rarybere: —Tu heka rybeõmyke xiwena wedutyhy-ò. <sup>23</sup> Jesuisi dirawyònyde: —Jiarỹ ibinamy aõmybo rarybera-wana, manarybeke tuu. Aõkõkeki, awimy rarybera-wana aõherekibo tiwahetenyte. <sup>24</sup> Anasi tahe Jesuisi ridykemy riteònyre tataanadihyyle Kaifa-ò, xiwena wedutyhy wahe.

<sup>25</sup> Kowa tahe Simaõ Pedro ratximyhỹre rahetõmy rỹimyhỹ. Inyõ rỹrãxire: —Kai aõbo ierydỹỹna mahãduõ tate. Tahe rexitxiõnyre. Jiarỹ ijõ aõkõ rare. <sup>26</sup> Xiwena wedu deòduõ Pedro-ò rỹrãxire: —Tii heka Pedro ritõhõtiorore ijoiõ rare. Tahe tamy rarybere: —Umy taheka rabire tii-wana bederaty oworuro-ki atximahã-ò. <sup>27</sup> Pedro ixityre rexitxiõnyre. Aõwesele tahe hãnie hãbu robure.

<sup>28</sup> Idi tahe Kaifa heto-ribi Jesuisi ridyrenyre ywisidỹỹna-ò bede dinodu heto-ò rudiulere. Tiiboho rirònyõhyre brebuna-di rexisunyrenyheny. Rirònyrenykeki, tahe Pascoa worana bedehesi rỹsỹnaõ rirỹsỹõtityhy. Tiiboho dori rõhõtinyre rirònykeki, brebuna raremy. <sup>29</sup> Tahe Pilato ròhònyre tamy rarybekremy: —Tahe Jesuisimy tamy rỹrãxire kia hãbumy terajuatenyteri aõhebohe rotỹnyra. <sup>30</sup> Tahe dirawyònyde: —Aõbibina binamy rotỹnykõhyra

wana inihe aridyrenyõhyreri. <sup>31</sup> Tahe Pilato rirawyõnyre: —Bidyke abede ywina rybe-di biywinyke. Tahe judeu mahãdu rarybere: —Wabede ywina rybe warubudỹmy rybe aõkõ rare. Inyõ heka arirubunyrenyõtyhy. <sup>32</sup> Kia rybe tahe Jesuisi rybe wesemy rare. Tii dori iximy rarybere timybo rurukremy. Tai timybo irybe hitxina wesemy raryberemy ibutumy rarekre.

<sup>33</sup> Ixityre Pilato ralore ywisidỹna-ò Jesuisi-ò rỹraxire: —Kai aõbo judeu mahãdu Iòlò tate. <sup>34</sup> Jesuisi rityỹraxinyre: —Yraxina aõbo ahõrõ rare ada ijõ aõbo wamy kia rarybere. <sup>35</sup> Tahe Pilato rarybere: —Jiarỹ wa judeu mahãdu aõkõ wãhãre. Aõbinatyhymy aõbo he tewinyte. Judeu mahãdu wadee tiwadyte. <sup>36</sup> Jesuisi dirawyõnyde: —Waiòlòna hãwã bede ludu aõkõ rare. Waiòlòna kaki ratxikeki wamahãdu wadee raaõbinanyke. Tai tahe judeu mahãdu-ò riwawahinykemy aõkõ watziwãhãre. Tahe aõkõre kabede ludu aõkõ Waiòlòna rare. <sup>37</sup> Pilato tahe rarybere: —Kai aõbo inatyhy iòlòmý tate. Tahe Jesuisi dirawyõnyde: —Kai ka wamy tarybeta. Kia-ò uludumy anade. Kia-ò anade, inatyhynamy arelyykemy. Inyõ inatyhynamy luukeki warybe-ò roholamyhỹre. <sup>38</sup> Tahe Pilato rỹraxire: —Aõbo inatyhyna rare. Ta rybe rahudi tahe judeu mahãdu-ò rarybekemy rare. Tiu kỹny kahãbu-ki aõ ibinamy tai rahaõhyra. <sup>39</sup> Inyõ ariteònykemy watzireri kaiboho wadi tõhõtinyhytenyteri ka woranabedehesi-ki. Tahe judeu Iòlò aõbohe ka ribi ariteònykre ywihyyle. <sup>40</sup> Tahe ixityre ibutumy rryryrenyre: —Kia hãbu aõkõre, Baraba biteònyke (Baraba heka hãbu debore wasidu rare.)

## 19

<sup>1</sup> Idi tahe Pilato Jesusimý rerotiyhyta-di raòhòtekremy soldado mahãdu riteranyre. <sup>2</sup> Soldado mahãdu edehékỹ rataanadile ira-ò ritidire, iumy tahe tylỹrehékỹ-di rityynyre iòlòtyywesekemy. <sup>3</sup> Tamy rehemynymyhỹre: —Aõherebo iòlòtyhy wesena, tahe rihetenyrenyre. <sup>4</sup> Pilato tahe ixityre ròhònymy iny-ò rarybekemy: —Ixityresỹ adeereny redyreri. Bierybenyke. Aõ heka tai ibinaõhyymy idi retehewãhãre. <sup>5</sup> Tahe Jesuisi ròhònyre ede rataana-di tylỹrehékỹ-di. Tahe Pilato tamy rarybere: —Kakỹnyhe tiire. <sup>6</sup> Tahe xiwena wedu mahãdu, yrubudỹdu mahãdu tuu robireu, rryryrenyre birubunybennyke, itxeò dee bitamadỹnyke. Pilato rarybere: —Kaibohole itxeò-di bitamadỹnybenyke. Jiarỹ tahe tai ibinamy aõki rahaõhyymahãre. <sup>7</sup> Tahe judeu mahãdu rarybere: —Jiarỹboho kỹny wabede ywina renydire. Rurukemy heka tuu bede ywina roireri, tii dori Deuxu Riòremy rexininimyhỹre. <sup>8</sup> Pilato kia-ò roholareu tahe, ruberutyhyre. <sup>9</sup> Ixityre ralore ywysidỹna heto-ò: —Rarybere Jesuisi-ò, tiribi wexe tanate. Jesuisi rirawyõnyõhyre. <sup>10</sup> Tahe Pilato rarybere: —Bidiwarawyõnyõkre aõbo. Jiarỹ warurudire anarubunyke aõbo ada arateònyke aõbo. <sup>11</sup> Jesuisi rirawyõnyre: —Aruru-di aõkõ tate. Deuxu kidiwahinykekile tahe biwateònyke ada biwarubunyke. Tai tahe adee wawahidỹdu aratyre iòraru dire. <sup>12</sup> Tai tahe Pilato iteòdỹmy rurure. Tahe judeu mahãdu tamy rryryre: —Kai biteònykeki tahe, Iòlò Cesar biòwa aõkõ tate. <sup>13</sup> Kiarybe-ò Pilato roholareu tahe, Jesuisi diòlòdỹnyde ahana-ò. Pilato tahe ywisidỹna ryna-ò rexisỹnyre. Kia ubeni heka Rirana Ijàti inire. Tahe judeu rybe-ki heka Kabata inire. <sup>14</sup> Pascoa worana bedehesitxu sexta feira rỹire. Txutyre iòhòmý tahe bede rỹire. Tahe Pilato rarybere judeu mahãdu-ò: —Betehebennyke aiòlòreny-ò. <sup>15</sup> Tahe tiiboho rryryrenyre. Bidybennyke! Itxeònihikỹ-ò birubunybennyke. Pilato tahe tamy rarybere: —Aiòlò aõbo, birubunybenny. Tahe xiwena wedu rirawyõnyre: —Iny iòlòreny sohojile wa rare: —Cesar heka inire. <sup>16</sup> Tahe Pilato Jesuisi tamyreny riwahinyre rirubunyrenykemy.

<sup>17</sup> Tiiboho heka Jesuisi ridyrenyire. Iitxeò tamy riwahinyre idi re-tyykremy. Tahe Kalvariu-ò idi ridymy rare. Kalvariu heka Kòkòta inire judeu rybe-ki. <sup>18</sup> Tai itxeò nihikỹ dee ritamadỹnyre ijõ hãbu inatxiõ-wana Jesuisi itxeònihikỹ itya-ki rỹire. Hãbu wiò wiòmý idi rỹire. <sup>19</sup> Pilato riritinyre ritidỹna-ò Jesuisi tyre-ò ritidire. Kawesemy ritidỹna roire: —JESUISI, NAZARE HÃWÃ LUDU, JUDEU MAHÃDU IÒLÒ. <sup>20</sup> Hãwã-ribi ireheriòremy roire. Tai tahe sówemy judeu mahãdu tuu robire iritidỹnamy. Inataõ rybemy wixira riti heka inataòmý roire. Judeu rybe ijõre, latim rybe ijõre, grego rybe ijõre. <sup>21</sup> Judeu xiwena wedu mahãdu Pilato-ò rarybere: —Judeu mahãdu Iòlò rarybere: —Iritidỹõmyke wa. Kawesemy biritinyke: —Tii rarybere judeu mahãdu Iòlò raremy. <sup>22</sup> Tahe Pilato dirawyònyde: —Iwese reritinyre wesemy rarehyykre.

<sup>23</sup> Soldado Jesuisi itxeònihikỹ-ò ritamadỹnymy rahudi tahe, ityy ritxuatx-uakremy diwyde. Inaubiòwa heka riywinyra. Wirarea riwykremy soldado mahãdu idi rỹireri. Iyhyitxena tahe iretydyna-di aõkõ rare. <sup>24</sup> Tahe ijõ widee rarybere: —Iyreyredỹrenyõmyke wa urile ta idi rikihurenykre mobo ritakremy. Kia ryberiti-ki tuhyy roire:

—Watyy ritxuatxware ijõ yre wimy riywinyrenyire. Tule wayhyitxena tyre-ki rehurenyre mobo ritakremy. Tahe iwese Tyyriti rarybere wese, soldadu mahãdu ibutumy aõhebo risỹnyre.

<sup>25</sup> Inaubiòwa hãwyy retehemy rỹimyhỹ Jesuisi itxeònihikỹ iòhòmý. Jesuisise taseriòre-wana, Marie Madalena ijõre, Klopa hãwyy ijõre. <sup>26</sup> Jesuisi tadimy robireu, Joaõ, taerydỹna luunadu bire-ki, tahe rarybere: —Nadi beteheke wa kowa ariòre rare. <sup>27</sup> Tahe Joaõ-ò rarybere: —Kaa adi rare. Ierydỹna Joaõ tahe ridyre taheto-ò tai rasỹnykemy.

<sup>28</sup> Jesuisi tahe rieryre ibutumy rexihuramy tahe rarybere: —Ariòkemy watzireri. Kaimy heka rarybere aõbo Ritidỹna-ki roire riwinykemy. <sup>29</sup> Tai tahe vỹ mona silỹnyhỹkỹ-ki raharenyre. Tahe Jesuisi-ò iwereheni wese-ò rituunymy idi riteòmýre iry-ò teòdimy. <sup>30</sup> Jesuisi tuu riõre idi tahe rarybere: —Ibutumy Waha aõmysỹdỹna rexihumy roire. Tahe ròtiòòmý resere iule ta rurure.

<sup>31</sup> Kia sabadotxu heka worana bedehesitxu nihikỹõ rare, brebuna rare. Tai tahe hãbu rubu itxeò-ki ririkõkemy tuu rarybemyhỹre. Tai Pilato-ò judeu mahãdu rexitòenyre hãbuti riòròmý riteònykemy, itxeò-ribi ritakemy. <sup>32</sup> Tahe soldado mahãdu hãbuti wiòle riorore. <sup>33</sup> Jesuisi tahe rurumy roireki iti riòròõre. <sup>34</sup> Soldadoõ tahe Jesuisi-ki rojyre iweki tahe hãlubule rohonyre bewana. <sup>35</sup> Kia tuu rabire tahe òbitimý tuu jiarỹ rarybere, Joaõ wahe. Waritidỹna inatyhy raremy, reeryre. Kaiboho bityhynybenykemy, adireny watzireri. <sup>36</sup> Kaheka ibutumy iritina hetxina tuu rarybere heka ibutumy tuu rotỹre. Kia wesemy roire: —Iti riòròõkre, sohoji aõkõ. <sup>37</sup> Ijõ iritinaõ kawesemy roire:

—Rirorenykre tñori-di idi reteherenykre tamy.

<sup>38</sup> Jyje heka Arimatea hãwã luduõ rare. Idi tahe tii Pilato-ò rexitòenyre Jesuisi umymy rituunykremy. Tii heka Jesuisi heluduõ rare. Judeu mahãdu lau ruberumyhỹ tai Pilato-ò rare wasimy. <sup>39</sup> Pilato tahe awiremy rarybere. Tahe Jesuisi umy riwyre. Nikodema tule rare Jyje-wana. Tii juhule rummy Jesuisi-wana widee raryberele rare. Tii òwòrutyby òwòruòbru-wana aderòna wesemy diwyde sówemy, 45 urihixinamy riutxienanyre. <sup>40</sup> Tahe Jesuisi umy tyky jurarehe-wana ritỹtenyire aderòna wanahyyle. Kawesemy dori judeu mahãdu iny rituunymyhỹre. <sup>41</sup> Itxeòalamana-ribi bederaty oworu iòhòmý roire. Ityi-ki tahe wabede tamyra roire. Mana hãloo rỹire tai heka moo



rawabedenyõhyyre. <sup>42</sup> Tai tahe rawabedenyre iòhòreki, tule judeu worana bedehesina txumy roireki.

## 20

<sup>1</sup> Semana juhu ludu txu Marie Madalena rehemynyre wabede-ò, rudile wahe. Mana ijòtòbòna iraylemy rỹiremy idi retehere. <sup>2</sup> Tahe raijaranyre Simaõ Pedro-ò, ijò Jesuisi luunaduõ wahe, Joaõ-ò, jiarỹle wahe. Tahe wadeereny rarybere: —Wahĩ tahe hãlokowoku-ribi ritakarenyra. Tixibo ritidira, rekerykõre. <sup>3</sup> Pedro tahe ròhònyre, Joaõ-wana wabede-ò roire. <sup>4</sup> Wiwana raijaranyre tahe jiarỹ Pedro ratyre raijaranyre tamy. Jiarỹle heka juhu tamy rehemynyre. <sup>5</sup> Tahe rawebesere iwo-ò itxeremy. Irahanalemy rabire. Ta ralòõhyyre tamy. <sup>6</sup> Idi Pedro rehemynyre ralore tamy. Tule irahanamy robire. <sup>7</sup> Jesuisi rati rasirahana rihitxinyry roire ixivanale. <sup>8</sup> Tahe jiarỹ juhu rehemynyre tahe Pedro hewomy ralore. Tuu robire, retyhynyre. <sup>9</sup> Tiiboho dori ritina rieryrenyre ihãre tahe rierytyhykõlerenyre. Jesuisi rubu-ribi rexiixixanykemy ritina roire. Tii tahe rierytyhykõlerenyre. Tahe wiji rieryrenyra. <sup>10</sup> Tahe ixyby raòkeserenyre inyhetoreny-ò.

<sup>11-12</sup> Marie tahe robumy wabede-ribi iòhòmy rỹire. Rawebesere tahe wabedewo-ò itxeremy. Inatxi yjummy robire iwo-ki itykyuramy roimyhỹ. Ijò heka rỹmy rononymhỹ Jesuisi ratiherina tyre-ki. Ijò tahe iwaherina-ki rononymhỹ. Jesuisi umy tahe iõre. <sup>13</sup> Tahe yju Marie-ò rỹraxyre: —Hãwyy, aõherekibo tabureri. Rirawyònyre: —Wahĩ kumy dokuri riwumy ramyhỹre. Rekerykõre tixibo ritidira. <sup>14</sup> Iu rarybereu tahe tahewoòle roosere. Jesuisimy robire rỹimyhỹò. Tii heka rieryõhyymyhỹ tii Jesuisi raremy. <sup>15</sup> Tahe Jesuisi rỹraxyre: —Hãwyy aõmybo tabuteri, mobo teijeteri. Bederaty oworu ywidỹdu raremy heka tii ròhòtinyre: —Tahe dirawyònyde: —Wahĩ, kai anobo karibi tetakata-wana wakoku tuu belykyke. Tahe jikarỹ karikorykremy. <sup>16</sup> Tahe Jesuisi tamy rryre: —Marie! Marie rokesemy reare rijemy: —Wahĩ, erydỹkỹdu! (Tii hebraika rybe tuu rarybere: —Raboni, wahe.) <sup>17</sup> Jesuisi rarybere tamy: —Waroorehedỹỹõmyke wa. Waha-ò dori raõlemy wãhãre tahe arakre. Kai tyhydỹdu seriõre-ò makre tamy rybemy. Jesuisi rarybere kawesemy: —Arakre inytybyreny-ò, iny Deuxurenny-ò. <sup>18</sup> Idi tahe rarybere erydỹna mahãdu-ò Wanyrỹmy rabira. Marie Madalena relyyre timybo raryberamy.

<sup>19</sup> Semana juhu ludu txuu, txioromy heka Jesuisi erydỹna mahãdu wii ributunymy rỹimyhỹ hetowoõ-ki. Ibutumy ijò ritòbòtòbònyra judeu mahãdu lau brebumy. Jesuisi tahe nade iyreny-ò rexitỹnynyre. Rarybere: —Ywina araykywo-ki atxikemy idi watzireri. <sup>20</sup> Kia rarybereu tahe tebò rurena riteòsinyre, tawerurena tule riteòsinyre tamy. Iule tahe reysarenyre Jesuisimy robireki wahe. <sup>21</sup> Ixyby tamy Jesuisi rarybere: —Ywina araykywo-ki rarekemy idi watzireri. Iwese Waha diwateònyde wese tule arateònykre. <sup>22</sup> Iu tahe ribunymy rarybere: —Deuxu Tyytybytyhy tetateri. <sup>23</sup> Inyòrarunaõ biixãwididỹnykeki tule kia òraruna ariixãwidinyke. Tule aõkõkeki, ijò òraruna biixãwididỹnyõkeki, kia tule ariixãwididỹnyõke.

<sup>24</sup> Tome (Inatxina iniõre) tii waòinatxi reurò mahãduõ rare, tahe tairenyõre heka Jesuisi nadeu. <sup>25</sup> Jesuisi erydỹnaõ rarybere: —Wanyrỹmy rabirenyra. Tahe Tome tamyreny rarybere: —Retyhynyõre kỹnyhe.

<sup>26</sup> Semana sohoji bededỹnanamy idi rỹire, ixyby wii ributunyre Jesuisi erydỹna mahãdu. Iu tahe Tome tii mahãdu-wana ratximyhỹ. Ijò ritòbòtòbònymy rỹimyhỹ. Tahe Jesuisi nade iyreny-ò. Tamyreny rarybere: —Ywina-di

araykywo-ki atxikemy idi watzireri. <sup>27</sup> Tahe Jesuisi Tome-ò rarybere: — Betehe inihe wadebòrurena-ò ebò inihe tamy bidadidike. Tule wawerurena-ò ebò bidadidike. Itxiòdỹỹòmyke wa, bityhynyke. <sup>28</sup> Tome tai dirawyònyde: —Wanyrỹ, waDeuxu. <sup>29</sup> Tahe Jesuisi rarybere: —Tome, kai aõbo biwatyhynykre wamy tabiterikile. Sõwemy deysana inyõ kanakemy wãhãre tiiboho dori wamy robiõre hãrele riwatyhynyrenyre.

<sup>30</sup> Jesuisi heka sõwemy aõwiihikỹbo riwinyre. Ierydỹỹna mahãdu heka kia aõmybo robire. Kia aõmydỹỹnana heka ihoõre kaki iritina-ki. <sup>31</sup> Kaa ritidỹỹna reritinyre Jesuisi Kristumy rare. Deuxu deòdỹỹna rare. Kia bityhynybenykemy wahe, Deuxu Riòre wahe tetyhynyteri-wana tahe umytuedeõna bitakre, ini òraru-ki wahe.

## 21

<sup>1</sup> Iribi tahe Jesuisi rexitỹnynyre Tiberiade ahohokỹ ijã-ki. Kia wesemyre heka. <sup>2</sup> Ibutumy heka juhu rỹimyhỹ: —Simaõ Pedro, Tome Didimo iniõre, Natanaeli. Tii Kana hãwã ludu rare, Kalileia bedeki. Zebedeu riòreboho ijõre, inatxi Jesuisi ierydỹỹnaõ ijõre. Rarekie. <sup>3</sup> Tahe Simaõ Pedro rarybere tamyreny: —Riã teredỹỹmy arakre. Imahãdu rarybere: —Jiarỹboho aroirenykre ahemy. Tahe roirenyre hãwò-di. Aõhomy aõkõ ruu idireny nade. <sup>4</sup> Tahe bedeki ratỹnyrau heki Jesuisi ãnyrakile ratximyhỹ. Ierydỹỹna mahãdu tahe rieryõhyymyhỹre. <sup>5</sup> Jesuisi ryryre tamyreny rỹrãxire: —Ijoi moõ rokoreny. Utura aõbo temytenyta? Rirawyònyre: —Aõkõre wa. <sup>6</sup> Kaiboho biterebenyke rurunawe-ribi taita bimybennykre. Tahe riterenyre sõwemy rautxienyre iriã heka ritusinyõhyymyhỹrenyre utura sõwerekiki. <sup>7</sup> Kia ierydỹỹnaõ Jesuisi luunaduõ rare jiarỹ, Joaõ wahe. Jiarỹ tahe Pedro-ò rarybere: —Inynyryle wa rare. Pedro Jesuisi raramy roholareu, tatyky tawetyamy ritaamy tamy resere, tade hekỹlemy rareki. Tahe resere bera-txi tamy rakremy. <sup>8</sup> Ijoi mahãdu riã-di narurunymy nade utura sõwerekiki. Tahe 100 urihixinamy ãnyra-ribi ratximyhỹreny. <sup>9</sup> ãnyra-ò rejuxunyreu tahe, robirenyre heòtymy obiurawo-ki. Orotxu tule tai rỹire. <sup>10</sup> Jesuisi tamy rarybere: —Uturaõ bidiwybedenyke wiji temytenytaõ. Simaõ Pedro hãworibile riã-di rarurunyre. Sõwemy heka tai utura nihikỹ rỹimyhỹ, 153 wahe. Ihãre tahe riã raòrõohyire. <sup>11</sup> Tahe Jesuisi rarybere: —Manake hewa biroxi benyke. <sup>12</sup> Ibutumy ierydỹỹna mahãdu rieryre tii inynyryreny raremy. Tai tahe inyõ rỹrãxiõhyire: —Mobo tii raremy. <sup>13</sup> Tahe Jesuisi orotxu rimyre. Tamy riwahinyre. Ixiyrubule utura tamy riwahinyre. <sup>14</sup> Kia tahe ihewotyhymy Jesuisi rexideòsinyre taerydỹỹna mahãdu-ò, rubu-ribi dexixade hewomy wahe.

<sup>15</sup> Riroximy rahudi tahe Jesuisi Pedro-ò rỹrãxire: —Simaõ, Joaõ riòre, kahãbu mahãdu waluure. Kai tahe iratyre aõbo waluure. Tii rirawyònyre: —Kai tiwaeryte, aluure. Tahe Jesuisi rarybere: —Wabudoeni riòre bidiòwenyke. <sup>16</sup> Ixityre rỹrãxire: —Simaõ, Joaõ riòre, kai aõbo waluure. Tahe Pedro rirawyònyre: —Kohe, Wanyrỹ aluure jiarỹ, tiwaeryta. Tahe Jesuisi rarybere: —Bidyke wabudoeni biòwenykemy. <sup>17</sup> Ihewotyhymy tahe Jesuisi rỹrãxire: —Simaõ, Joaõ riòre, kai aõbo waluure. Iu tahe Pedro rabadewomy ronyre, ixityremy rỹrãxireki. Tahe dirawyònyde: —Wanyrỹ, ibutumy teeryte aõna aõna. Aluure heka, tiwaeryta. Tahe Jesuisi rarybere: Wabudoeni biòwenyke. <sup>18</sup> Inatyhymy adee ararybekre. Iu ijoi morõkõmy tatemahãu, ixiwanale textyynmahãte ixidee wimy titxibo tamahãte. Iu tahe mamatarinykre inywitxira aratyynykre, Ebò biteòsinykre iny arataataanykre tahe inyõ aradykre titxibo noderamy beakreò. <sup>19</sup> Kiamy heka Jesuisi rarybere ritỹnynyremy timybo Pedro rubu-ò rỹikremy. Tai Deuxu riwowidyynykre. Idi

tahe Jesuisi rarybere: —Biwaheludunyke wa. <sup>20</sup> Tahe Pedro retehere Joaõ Jesuisi hemy rareriò, Joaõ Jesuisi luomy raremyhỹ. Joaõ ihetxiu Jesuisi-ò iòhòmỹ rỹraxire jiarỹ wahe: —Mobo iwahisidỹdukremy, ihewo ludu roxina rỹireu. <sup>21</sup> Tahe Pedro Joaõmy robireu, rỹraxire Jesuisi-ò Joaõmy. Aõbo he tamy rotỹnykre. <sup>22</sup> Tahe Jesuisi rirawyònyre: —Tii rurukõlemy adòòsekemy idi watzikeki, timybo tahõtinyte. Adee tahe biwaheludunykekile awike. <sup>23</sup> Ierydỹna mahãdu rarybemy raremyhỹ: —Kiamy wahe Joaõ rurukõlemy Jesuisi rarybere. Tahe kiamy aõkõ Jesuisi rarybere. Jesuisi juhuu rarybere: —Tii rurukõòle adoosekre-wana, timybo tahõtinytenyteri.

<sup>24</sup> Jiarỹ tahe kia aõmydỹnanamy relymahãre, Joaõ wahe, reritinyahãre. Inatyhymy kia tuu rare, jiarỹ tuu relymahãre.

<sup>25</sup> Sõwemy aõmydỹnanamy tahe Jesuisi riwinyre. Inyõ ibutumy riritinykeki, iritina heka bedede ritỹxinykre tyyriti sõwekre-wana.

## Aõhebo Rotÿÿnyre Aõhebo Rotÿÿnyre Jesuisi Erydÿÿna Mahãdu

<sup>1</sup> Juhuu adee ratyritinyreu, Teòfilo, relyyre ibutumy Jesuisi aõbo riwinyré, aõmybo bedede riernanyrémy. <sup>2</sup> Deuxu Tyytybytyhy bedede erydÿÿnamy taerydÿÿna woludu mahãdu riernanyre. Tahe taerydÿÿna mahãdu-ò bedede ywina riwahinyre. Iribi tahe Jesuisi ròðsere biu-ò. Kia ibutumy juhUU adee relyyre. <sup>3</sup> Iribi itxeònihikÿ-ki rurureu, taerydÿÿna woludu mahãdu-ò rexitÿnyre hãbu irudilemy. Tamyreny rexideòsinyre sòwetu-di rulemy ratximyhÿmy. Inatyhy wa warybetyhy rare, tamyreny rarybere. Rexitÿnyre, tamyreny riernanyre Deuxu Iòlònamy. Txuõ txuõlemy iny inatxiwaitue txumy riernanyre. <sup>4</sup> Tiiboho-wana riroximy raremyhÿ, Jesuisi tamyreny rarybere: —Uritere Jerusalẽ-ribi ixitarasarenyòmy. Urile Deuxu Tyytybytyhy awo-ò kanakre xiery, Jerusalẽ-ribi boibenyke. Deuxu rarybere Tatytybytyhy kiditeònykremy. Tule juhUU Jesuisi kia rarybere. <sup>5</sup> Deuxu Tyytybytyhy aworeny-ò kanalokre. Kia ratisebenaõ wesele rare, Deuxu Tyytybytyhy ratisebena. Iwese Joaõ juhUU bero-ki iny risebenyrene wese, kia rare. Kia-txu tahe, iòhòmy roire.

<sup>6</sup> Tahe, juhUU ibutumy wirotynyre, Jesuisi dee rÿÿraxirenyre: —Wanyrÿ, kai aõbo wiji iny Iòlòreny bediwahinyre inywedureny wesemy ixyby ronykemy. <sup>7</sup> Tahe Jesuisi dirawyònyde: —Waha-ki ywisidÿÿnatxu doimyhÿde. Tiile riernanyre. Kai aõkòhykre. <sup>8</sup> Tahe Deuxu Tyytybytyhy aworeny-ò kanalokre, rurunatyhy arayky-ò bitabenyke. Kia tahe warubu-ribi waixixanamy belyykre ibutumy Jerusalẽ hãwã mahãdu-ò, Judeia hãwã bedede mahãdu-ò, Samaria hãwã bedede mahãdu-ò, iribi tahe ibutumy bedekonana bedede iny-ò. <sup>9</sup> Tarybe rahudi tahe Jesuisi ixihyy rexidymy raòwònyre biu-txi. Iõre biuwetyky-txi. Tiiboho rarirenyre bedede-ribi idi reteherenyre. <sup>10</sup> Idi retehemyhÿ iòtududÿÿtyhymy. Inatxi hãbumy ityy uramy aõwesele rÿimy reamyhÿre hãbu mahãduko-txi. <sup>11</sup> Tahe tiiboho raryberenyre: —Hãbu, Kalileia bedede mahãdu, itxereòmahãbenyke. Jesuisi ka ramyramyhÿre biu-ò, Deuxu sÿ-ò. Iwese rarawesele ka ixyby kòdòðsekre.

<sup>12</sup> Jesuisi erydÿÿna mahãdu ratximyhÿreny Oliveira òwòruraty hãwãlò-ki. Tahe dòðsedenyde Jerusalẽ hãwã-ò. Jerusalẽ rehe iribi doide sohoji urihixina rehely rimyòlemy. <sup>13</sup> Tahe wii rotyreny rorukure ixitòedÿÿmy hetoratyawo-ki. Kahekani-di rirana rarekre tai rÿimyhÿreny: Pedro, Joaõ, Txiau, Andre, Filipi, Tome, Bartolomeu, Mateu, ijõ Txiau (tii Afeu riòre rare), Simaõ Zelòte, Judasi (ijõ Txiau iwitxira, kia riòre rare). <sup>14</sup> Ijõ iny tule tai ronmyhÿ, Jesuisise, hãwyy ijõ ronmyhÿ, Jesuisi seriòre mahãdu tule rorukumyhÿreny. Ibutumy rexitòenymyhÿreny wiwese wiweselemy ròhòtinymyhÿreny.

<sup>15-16</sup> Ijõ txubiòwamy 120 inymy wii ributunyrene ixybyle. Tahe Pedro rÿire kiamy tamyreny rarybere: —Waityhydÿÿdu seriòre mahãdu, iwese Judasi aõhebo rotÿÿnyre wesemy Davi tyyritinamy roimyhÿre. Kiamy wahe: —Jesuisi taòluduboho-ò ròhònyre, Judasi tiiboho riwiòhenanyre. Iwese ka tyyritina-ki roire wesele, inatyhymy ibutumy rotÿÿnyre. <sup>17</sup> Judasi inybohoòmy raremyhÿ. Tii nieruõ ritare Jesuisi òludu-ribi tamyreny ridyrek. Tahe kia nieru-di subutebedeò riwyyre. <sup>18</sup> Tahe idi Judasi rexibòtòtaara. Idi tahe tasubute bedero-txi taratythikÿle-ribi resere. Tahe iumy ruare iwona rejuxunyrene. <sup>19</sup> Iribi ijyy heka ibutumy Jerusalẽ mahãdu-ò tuu ijyy rÿire.

Tahe kia subutebede rininirenyre hãlubu bederomy. <sup>20</sup> Iòlò Davi kia wese riritinyre tawiunatyriti-ki:

—Ixinamy iheto rÿike, inyõ taisÿõmy.

Ijõ:

—Inywitziraõ teròwomy tai rarekre iaõmysÿdÿÿna rimykremy.

<sup>21-22</sup> Inyõ tahe teròwomy iaõmysÿdÿÿna rimykremy. Tule rikimyrenyke Jesuisi ixixanamy ijyyduõ inywanahyy rybe ritÿnynykemy. Inyõ Jesuisi sebedÿÿna-di itxereduõ rikimyrenykre, inyõ tuu robire Jesuisi nonanamy tule rikimyrenyke. <sup>23</sup> Tahe inatxi hãbumy ritarenyre: Jyje (Basaba inire) Justu iniòrysyna rare, ijõ hãbu tahe Matxia rare. <sup>24</sup> Iribi tahe rexitòenyre: —Kiamy heka Deuxu dee raryberenyre:

Kai Wanynyrÿreny, ibutomy inyrayky teeryte, Deuxu. Biteòsinyke tibo rik-itarenykemy.

<sup>25</sup> Tii ritÿxinykre ixihyymy ratximyhÿre mahãdu. Judasi deròwomy rarekemy, Judasi dori iny-ribi ròhònyre taòrarunaòwydÿÿnamy rare aõhòkÿmy rotÿÿnykemy. Tahe rare tiobo rareò. <sup>26</sup> Wyhy raheto lisina wesemy idi rehure. Kiamy heka riwinyre tibo ròtakemy. Matxia tahe iribi ròtare. Tii tahe ralore waòsohoji reurò erydÿÿnaky-txi.

## 2

<sup>1</sup> Pentecostemy ninadu lisina kia txumy txuu rÿireu, ibutomy iny rorukurenyre tarynanakile. <sup>2</sup> Aõwesele biu-ribi wodÿÿõ nade yhynihikÿwesele ibutomy heto-ò ralore tai rorukumyhÿrenyrewo-ò. <sup>3</sup> Heòty helÿÿresi wesemy nade. Iny sohoji sohoji tyre resere. <sup>4</sup> Ibutomy iny tykumy heka Deuxu Tyytybytyhy ralòmy rÿire. Ta raryberenyre iwitxira rybemy. Deuxu Tyytybytyhy tamy rybe riwahinyre wese tahe raryberenyre.

<sup>5</sup> Deuxu dee òbitimy hãbu mahãdu noduõ rasÿnymy raremyhÿ Jerusalẽ hãwã-ki. Judeu mahãduõ ihÿre. Ibutomy bede bede hãwã hãwã-ribi nade.

<sup>6</sup> Kia-ò roholareu, wii ributunyre ijohonamy. Tahe rexieryòhykyre aõmybo ròhòtynyrè tahe widi bede riòtiinyre iny sohoji sohoji tarybe tarybeòlemy roholareki. <sup>7</sup> Urile bede riòtiinytyhyrenyre. Tahe raryberenyre deysana-di:

—Betehebeny iny, kowa rybedu Kalileia bede ludu mahãdu ratxireri.

<sup>8</sup> Timykibo iny ryberenymy rarybereri. Iny sohoji sohoji tarybeòle raholareri. <sup>9-10</sup> Kaheka inyboho bede bede ludu roire: Partia mahãdu, Media mahãdu, Elaõ mahãdu, tule ka bede ludu mahãdu: Mesopotamia, Judeia, Kapadosia, Ponto, Asia, Frigia, Panfilia, Egito, Libia Sireni-wana iòhòre, Roma hãwã luduõ tule kaki ihÿre. <sup>11</sup> Timybo inyrybereny witxira witxira-ò iny roholarenyreri. Deuxu rybemy rarybereri ibutomy inyryberenymy. Ibutomy inyboho: Judeu, Judeuerydÿÿna ityhydÿÿdu, tule Kreta mahãdu, Arabia mahãdu, Deuxu aõmydÿÿnana wihikÿ-ò raholarenyreri. <sup>12</sup> Tahe bede riòtiinyrenyre. Rieryòrenyre aõbo rare. Tahe widee rÿÿraxirenyre iny sohoji sohoji-ò aõbo raremy. <sup>13</sup> Ijõ tahe tawobinarybe rarybere:

—Tiiboho rururenyreri, itxÿtemonamy riòreri.

<sup>14</sup> Tahe Pedro rÿire waòsohoji erydÿÿna-di, tahe tii rexidelenyre rarybekemy:

—Boholake inihe, ibutomy kaiboho, Judeia mahãdu, Jerusalẽ sÿludu-wana —kia bierybenykemy.

<sup>15</sup> Inyõ rarybereri itxÿtemonamy riòrerimy. Tahe inatyhymy aõkõ rare. Txuu rati rariarerile heka rudiletyhyre. <sup>16</sup> Joel juhoo Deuxu rybeduõ rare. Tii narybede wijitxumy. Tahe iwese tii rarybere wesele, wiji ratximyhÿre. Tii rarybere:

17 —Kiamy Deuxu rarybere:

—Ikonanatxuu watyytybytyhyhykÿ aditeònykre ibutumy inydee. Ariòreneny, hãwyy hãbu-wana, warybe rierynanykre. Weryrybò tahe matu-ari-wana rarasinytyhykre.

18 Ibutumy wadeòdu-ò, lerÿ, hãbu, ibutuwo-ò Deuxu Tyytybytyhy kanalokre. Tuu raryberenykre, ritÿnyrenenykre.

19 Aõ tÿmyra ariteòsinykre biu-ki, bede-ki. Hãlubu, heòty, worona-wana ròhònykre.

20 Txuu heka ilybyhykÿlemy relekre. Ahãdu isòhòkÿlemy relekre. Iribi tahe Inynyrÿtxu-ò rehemynykre. Kia txu awimyy roikre. Inynyrÿ kòdòhònykre.

21 Kia bedeu, inyõ Inynyrÿnimy rexitòenykeki, tii jiarÿ aritakre iòraru-ribi. Kia Deuxu rybe rare.

22 Judeu mahãdu, Israeli mahãdu, bohohabenyke warybe-ò: Deuxu sòwemy aõna aõna witxira witxira-di, bedeòby-di riwahinyre. Inatyhymy Jesuisi Nazare hãwã ludu mahãduõ riteòsinyre. Inatyhymy rare. Kaiboho heka teerytenyete. 23 Kaiboho Jesuisi temyteu, Deuxu juhoo rymykre rierymyhÿre. Rexierymy røhòtinyre kawesemy bede roimyy rarekre. Kaiboho Jesuisi terubunytentyete. Kaiboho itxeò nihikÿ-ki tetamadÿÿnytenyete hãubina debòreny-di. 24 Tahe Deuxu ritare rubu-ribi riixixadÿÿnyre. Wabede Deuxu ribòhònyre. Iribi Jesuisi riòlòdÿÿnyre. Rubu heto tii rimoÿtyhy. 25 Davi juhoo rarybere iwese Jesuisi rarybekremy:

—Wanyrÿ wawana ratxireri, brebu-di watxiòkre. Tii riwawiòhenanymyhÿre. Tai wawo deysana-di ritÿxinymyhÿre.

26 Wadòròtò wowydyna tamy rewahinymyhÿre. Reeryre ibutumy rubuhetowo-ki awityhymy wãhãré, iribi dori aròhònykre.

27 Kai watyytyby teriòte rubuheto-ki. Jiarÿ ariòre òbitityhy rare, tai waumyde rasunyòtyhy.

28 Kai tiwaeryte ibutumy umytÿmyra aõmydÿÿnana awana aratxikreu, deysana-di tÿximyy biwasÿnykre.

[Kia ibutumy Jesuisi rarybekremy Davi rarybere.] 29 Pedro ijõ rarybemyhÿre:

—Tahe kiamy heka mohòtinybenyke, Waseriòreboho. Davi heka aõ iximyy aõkõ rarybereri. Tii tahe hãloowo-ò roire. Itityby heka kakile iny-wana ihÿre.

30 Tahe Davi Inynyrÿ deròwymy rybeduõ raremyhÿ. Deuxu inatyhyna rybe-di Davi-ò narybede. Kia tahe: Iriòre riòreõ bede dinodumy kodonykremy taiòlò ryna-ki. Kia iòlò Davi rieryre. 31 Davi tahe Kristu ixixanamy juhoo narybede.

Kristu umy dori rubu-ki rariòhyyre. Iumyde rarònyõre. 32 Jesuisi Kristu, Deuxu riixixanyre. Ibutumy inyboho tuu robirenyre. 33 Jesuisi ronymyhÿre Deuxu rurunawe-ribi. Iwese rarybere wese Deuxu Tatytybytyhy tamy diteònyde. Tii adee diwyde. Kiamy tahe wiji tabitenyteri, taholatenyteri.

34 Davi raòwònyõre biu-ò. Tahe kiamy rarybere:

Deuxu rarybere Inynyrÿ-ò:

—Bodonyke katxi warurunawe-ribi.

35 Aòludu awarawo-ki arisÿnykre. Aòludu-di arehukre.

Kiamy tahe Deuxu Jesuisi-ò rarybere. 36 Boholake judeu mahãdu. Kaa inatyhy hyy rare. Itxeònihikÿ-ki Jesuisi terubunytentyete. Deuxu tahe Jesuisi ritidire ibutu-ò wedumy, ibutu-ò Kristumy, aõma, Deuxu deòdÿÿna.

37 Tahe Pedro rybe-ki urile røhòtinyrenenyre. Tai tahe Pedro-ò ijõ erydÿÿna-ò rÿÿraxirenyre:

—Waseriòreboho, aõhebo rokotÿÿnyrenenykre.

<sup>38</sup> Tahe Pedro dirawyònyde: —Bòòsebenyke aòrarureny-ribi ixbyby Deuxu-ò. Idi tahe Jesusini-di maratysebekemy aòraru ritakemy. Tai bimykre Deuxu Tyytybytyhy wahidÿÿna wesemy awo-ki rarekremy. <sup>39</sup> Kristu juhuu rarybere:

—Ibutumy heka Deuxu Tyytybytyhy bimybennykre, ariòre rimykre, iny hãwã wixira ludu rimyke. Ibutumy Deuxu dee wimy tahe rimykre.

<sup>40</sup> Pedro relyymy raremyhÿ. Tamyreny rarybere tarasamy roikemy: —Iny bina binahakÿ-ribi bexitabennykre.

<sup>41</sup> Kia rityhynyré heka tahe ratisebedumy roiremyhÿ. Ralore kiatrixu 3000 iny iòhòmy Jesuisi tyhydÿÿdu mahãdu-ò. <sup>42</sup> Tahe Jesuisi erydÿÿna mahãdu rierynanymyhyre, wii ributunymy roiremyhÿ, paò rioroororenyre wideereny: rexitòenymy roiremyhÿ.

<sup>43</sup> Iny sohoji sohoji bede riòtiinymy rabrebumy hitxinymyhyre. Jesuisi erydÿÿna mahãdu bedeòby sòwemy riwinymyhyre. Aõna aõna wiwihikÿmy riwinymyhyre. <sup>44</sup> Ibutumy rityhynymyhyre mahãdu, sòwemy wii riwiutyre. Ibutumy aõna aõna wimy riywinyre. <sup>45</sup> Taaõmydÿÿna, tasu-wana idi rohonyre. Wimy tahe ritxuatxware. Ibutumy ityhydÿÿdu iaòkò mahãdu dee riwahiriwahinyre. Inyò aõna aõna rauhenykeki, tamy riwahinyre. <sup>46</sup> Deuxu dohodÿÿna heto-ki txuò txuòlemy wii ributunyre. Tahe tota hetomy paò riyreiryrenyre. Riroxirenre ibutumy teysarenymy wii wese ròhòtinyrenyre.

<sup>47</sup> Tuu reàlàrenyre Deuxumy. Ibutumy iny hãwãhãkÿ mahãdu awimy tai raharenyre. Deuxu rimyre txuò txuò lemy ralore mahãdu kia ritakemy.

### 3

<sup>1</sup> Pedro, Joaõ-wana rare Deuxu dohodÿÿna heto-ò rexitòenykemy, inataò òra bedeu. <sup>2</sup> Deuxu dohodÿÿna heto ijò inyò rininire, ijò ruxerahakÿ. Txuò txuòlemy hãbu tibina ridyhyhyymy iny tamy reamyhyre. Tamy iny ralòmyhÿkeò tamy nierumy rexitòenykemy. Tii tuu hyy uladumy reareu ihyy itibinare. <sup>3</sup> Pedroboho rirònyrenyre, hãbu tibina tuurenre robire. Nierumy tahe tamyreny rexitòenyre. <sup>4</sup> Pedro juhu tamy retehere idi rarybere:

—Bedeteheke wadireny.

<sup>5</sup> Tai hãbu retehemy ronyre, nieruò iribi riwykemy ròhòtinyre. <sup>6</sup> Pedro rarybere:

—Aõ ijòkòre, womati tÿrÿrÿhÿkÿ ijòkò, pratakò. Tahe aõbo idi watzirerile ta adee ariwahinykre. Jesuisi Nazare hãwãludunimy adee ararybekremy idi mariakremy. Kia deytana adee ariwahinykre.

<sup>7</sup> Pedro, hãbu debò rimymy ritamadÿÿnyre. Aõwesele iruru iti-ò ralore. <sup>8</sup> Hãbu rexiwatxinymy tahe, ririradÿÿnyre. Ihyy ralore dohodÿÿna heto-ò. Deuxu dee deysamy rexiwatxinymy ralore. <sup>9</sup> Ibutumy iny idi retehere rariarerimy, Deuxumy reàlàrerimy. <sup>10</sup> Inyò rarybere: —Tii ijò ruxerahakÿ-ki nierumy rexitòenymyhyremy, inyboho tii reeryrenyre. Tai tahe idi bede riòtiinyreri timykibo aõna aõnamy rotÿÿnyramy.

<sup>11</sup> Hãbu ta Pedro, Joaõboho werora-ki xiery. Idi tahe ibutumy ributunyre Salomaõ heto ijò ahanawo-ò. <sup>12</sup> Pedro kia robireu tahe, tamy rarybere: —Judeu mahãdu, wadireny itxereòmy, bedeòtiidÿÿòmy. Jiarÿboho inyruru-di aòkò ka hãbu retytenyrenyre, Deuxu rurudile wahe. <sup>13</sup> Abraõ, Ijai, Ijaò kiaboho Deuxu heka hãbu riteytenyra. Tybyreny Deuxu kia heka riwinyra. Deuxu, Kristunimy riwowydynyre, rubu-ribi riixixanyraki. Kaiboho tahe Jesuisi Kristu tedytenyte Pilato-ò. Pilato tii riteònykemy ratxireriu, kaiboho tamy rarybere: —Aòkòre, tii deòdÿÿòmy. Ijò biteònyke. Tai tahe rubudÿÿduò riteònyre. <sup>14</sup> Jesuisi òraru widÿÿdu aòkò rarehyymy raremyhÿ, ityhydÿÿdu ihÿre, òbiti widÿÿdu ihÿre. Kaiboho tii tetxiònytenyte, tewahinytenyte.

15 Umytuedeõna wahidÿÿdu tii rare. Kaiboho tahe terubunyte. Deuxu tahe tii riixixanyre rubu-ribi. Inyboho ierydu, iitxeredu ratximyhÿrenyre. 16 Rityhynyrekile hãbu tibina reytemyhÿre. Kia hãbu teerytenyte. Jesusini tyhyna kia riwinyre. Hãbu ibuturu-ò reytera, tai òbitimy raramy ratximyhÿre. 17 Jiarÿ reeryre kaiboho teeryõte aõbo tewinytemy. Tule adinodu rierykõlemy kia riwinyre. 18 Tahe Deuxu tarybe riwahinyre ihetxiu rybedu mahãdu-ò kia wahe tii rarybere Jesuisi rurukremy. Idi tahe irybe uludumy Jesuisi rurure. Iwese Deuxu rarybere wesemy heka irybe uludumy ròhõnyre. 19 Kaiboho ixi-txi õhõti reakemy Deuxu-ò biòòsekemy. Tai tahe aòraru aribi tii ritakre. Inynyrÿ adeereny kiditeònyke aõwihikÿmy Deuxu-ribi, biu-ribi. 20 Jesuisi Kristu wijityhyle kanaõkre. Aõna aõna juhu rÿimy rareke rexihudi, tahe kanakre. 21 Tii biukile rarekre wiji. Ijõ bede tÿmyra wihikÿkre iòhõmy rahudi tahe kanakre. Kia bededÿÿnanau tahe rarybere ihetxiu rybedu mahãdu. 22 Tahe Moisesi ijõmy rarybere: —Deuxu rybeduõ kedelekre asÿ, aijoi-ribi tii rarekre. Iwese Deuxu riwatare wese rybeduõmy ararekremy, iwesele tii Inynyrÿ kiditakre. Tamy boholabenykre irybe aõmybo kanarybekremy. 23 Kia, Deuxu rybedu rybe-ò inyõ roholakõkre-wana, Deuxu tii kanahukre. Kia Moisesi rybe rare, Pedro rarybere. 24 Deuxu rybedu sõwemy kia bededÿÿnanamy rarybere. Samueli juhuy rarybere. Idi sõwemy ijõ kiamy rarybere. Ihyymy ta wiji kabededÿÿnana roimyhÿre. 25 Kaiboho Deuxu ihetxiu rybedu roire atximahãtenyteri Deuxu juhuy rarybere Abraõ-ò. Ariòre-ribi iny sõwemy ruaruakre. Kia ibutumy ariòre hãwã hãwã-ki rasÿnykre. Kia iny-ribi inyõ ròhõnykre ibutumy iny wiòhedÿÿdumy rarekre. 26 Deuxu tariòre Jesuisi adeereny riteònyre aòraru-ribi arahitxinykemy, arawiòhenanykemy. Kia tahe Pedro tamyreny rarybere.

## 4

1 Pedroboho tamyreny rarybereu, tamyreny rehemynyre Deuxu heto dohodÿÿna mahãduõ, ijõ tahe kia heto itxeredu dinoduõ, ijõ, saduseu mahãduõ. Inataõ ijoi tamy rehemynyre. 2 Pedro, Joaõ-wana iny-ò relyymy raremyhÿ: —Inyõ Jesusimy rityhynykeki, tii tule rubu-ribi riixixanykre. Jesuisi dori riixixanyre. Tahe Jesuisi ixixanamy tiiboho relyymyhÿreki, kia hãbu mahãdu riykaranyrenyre. 3 Taita rimyre, Pedro, Joaõ-wana. Rõtana-ò ridyre. Wijile tahe tamy ixidee roholaõrenyra, txiorotyhyreki. Biurasou tahe roholakremy riòlòdÿÿnykre. 4 Iny sõwemy Deuxu rybe-ò kia txuu roholare. 5000 hãbumy, ijõ iny tule. Tiiboho Pedroboho-ò roholare. Tahe sõwemy rityhynyrenyre.

5 Itxu biòwamy tahe Jerusalẽ-ò rehemynyre dinodu mahãdu, matuari mahãdu, judeu bede ywina erydÿÿna mahãdu. Kia ijoi mahãdu ibutumy rehemynyre. 6 Anasi tule rehemynyre. Deuxu-ò xiwena wahidÿÿdu mahãdu wedu tii ratximyhÿre. Tule Kaifa ijõ, Joaõ ijõ, Alexÿdre ijõre. Anasi sÿ mahãdu tule ijõre. 7 Tahe dinodu mahãduõ Pedroboho ritamadÿÿnyre ibutu kia mahãdu koò. Tahe ritÿÿraxinyre: —Aòrurudibo iny teteytedÿÿnymahãte. Monidibo kia tewinytenyte. 8 Ta Pedro tykymy heka Deuxu Tyytybytyhy ralore. Idi tamyreny rarybere: —Iny dinodu mahãdu, matuari mahãdu, adeereny ararybekre. 9 Hãbu tibina aõmydÿÿnanamy tiwatÿÿraxinyte-wana, adeereny kiamy arirawyònykre. 10 Jesuisi Kristu Nazare hãwã luduni-di kia rybe ruru-di rewinyrenyre. Kia tahe bierybenyke. Kaiboho dorikÿhe Jesuisi itxeò nihikÿ-ò teukotenyte. Deuxu tahe riixixanyre rubu-ribi. Tai tahe ka hãbu reytemy rÿimyhÿre. 11 Jesuisi manaõ wesemy ratxireri. Kia-di rehure heto widÿÿduõ. Wiji tahe heto idile rÿimyhÿre. Kaiboho Jesuisi-di tehute heto widÿÿdu mana-di rehure wese. Wiji tahe Jesuisi Deuxu heto dinodu rarekre.



12 Tamy inyõ rityhynyõkeki, òraru-ribi ritaõtyhy. Ijõni aõkõ iny rityhynyke, Jesuisi nile iny rityhynymy rÿikrele, òraru-ribi ritamy rÿirakre.

13 Pedro, Joaõ-wana brebuõ-di kia rybe ritÿnyre. Tai iny bede riõtiniyrenyre, tiiboho dori tyyriti erydu aõkõ roire. Urile Jesuisi-wana roiremyhÿ, kiale iny rieryrenyre. 14 Hãbumy inyboho robirenyra juhuu itibinamy. Tai tahe inyõ aõbinamy tamyreny rybedu aõkõ rare, hãbu tibina riteytenyrenyraki. 15 Tahe ibutumy iny dohodÿÿna heto wo-ribi riteõnyre. Tahe wimy rarybere: 16 —Aõhebo rokotÿÿnyrenykre kia hãbu-di. Inatyhymy tiiboho aõwiihikÿ riwinyrenyre. Kia rikitxiõnyrenyõtyhy. Ibutumy Jerusalẽ hãwã mahãdu kia rieryre. 17 Tai kiamy rokotÿÿnykre. Tamy rakarybekre tiu Jesuisimy ixiby rybeõmykremy. Tai Jesuisimy rybe-di rikiixãwãdidÿÿnykemy. Inyõ-ò kiamy rarybeõtyhy. Kiawese raryberenyre rybe ywidÿÿdu mahãdu. 18 Idi tahe rarariõwryre Pedro Joaõ-wana tamyreny rarybere: —Jesuisi nimy rybeõmy, bibedeerynyõtyhy irybemy. 19 Tahe Pedro, Joaõ-wana tamyreny di-rawyõnyde: —Aõbo awityhyre. Inyboho arybe arityhynykre aõbo ada Deuxu rybe aõbo arityhynykre. 20 Aõbo jiarÿboho rabirenyré, raholarenyré, kialemy araryberenykre. Inyõ riwarybebinanyõtyhy. 21 Idi ta ixityre tamyreny raryberenyre, rybedÿÿõkemy. Tahe riteõnyrenyre. Tamy aõwidÿÿõmy rÿimyhÿ hãwã mahãdu dee ruberurenreki. Hãwã mahãdu dori Deuxu reàlãmhyÿre hãbu riteytenyraki. 22 Kia hãbu dori 40 beòra ratyremy tabeòra-di ratximyhÿre riteytenyrau.

23 Pedroboho rexitamy roirenyreu, ityhydÿÿdu seriòre òrysmy roirenyre. Tahe tiiboho tamyreny relyyrenyre iwese dohodÿÿna heto wedu matuari mahãdu-wana tamy rarybere wesemy. 24 Tahe wiwese wesele rõhõtineri wese, Deuxu-ò rexitõnyrenyre: —Kai, Waha, inyIòlòreny atximahãte. 25 Kai, ibutuwidÿÿdu tarybete: Davi, inytybyreny-di tarybete Atytybytyhy tamy ritÿnyre, iwese tii rarybekemy. Davi eòdumy raremyhÿ. Irybe tyyriti-ki roimyhÿre kiamy:

—Judeukõdu mahãdu raykarananyreri. Kia awimy aõkõ ihÿre. Waijoi aõ òbitinadibo aõkõ rõhõtineri.

26 Dinodu mahãdu wiributunyre Deuxuòludumy rÿikremy. Tule Kristu, kia Deuxu deòdÿÿna òludumy rÿikremy.

27 Arybe-ki, Waha, kia ritidÿÿna roire. Tule Waha, inatyhy rare. Ka hãwã-ki, Herodi, Poncio Pilato, Judeu mahãdu, Judeukõdu mahãdu, kia ibutumy ributunyre ariòre Jesuisi òludu rÿirakremy. 28 Tiiboho riwinyre iwese kai tarybete wese, Waha, kia aõmydÿÿnanamy rÿirakremy. 29 Kai, Waha, teeryte iwese tiiboho raryberemy, aõma, rybeõmykemy. Tahe eòdu biwiòhenanykre arybe-di ihãrele rarybekemy brebuõ-di. 30 Biwiòhenanykre, Waha, eòdu mahãdu, webinadu mahãdu riteytenykemy. Tule aõna aõna wiwiihikÿ riwinykremy, Jesuisi, Ariòreni òraru-ki kia riwinykremy. 31 Tahe ixitòedÿÿna rexihureu, heto ramytatamy. Deuxu Tyytybytyhy ibutumy iny tykymy ralore. Tai tahe Deuxu rybe rarybemyhÿre. Brebumy aõkõ tiiboho relymyhÿrenyre.

32 Ityhydÿÿdu mahãdu iaõna aõna-di wii riwiòhenanyre. Inyõ rarybeõhyra: —Kaa wahõrõ sohojile rare. Ibutu aõna aõna ibutu hõrõmy rÿimy raremyhÿ.

33 Deuxu Jesuisi erydÿÿna mahãdu riwiòhenanytyhyre irybemy relyyrenyre, kia Jesuisi rubu-ribi ixixana rybemy. Deuxu teysana tamy riwahinyre tule iny sõwemy iluurenre. 34-35 Tai tahe ityhydÿÿdu mahãdu aõna aõnamy rasiranyõhyra. Ityhydÿÿdu ityhymy rÿirakeki, taheto, tasubede rohonyre tahe nieru Jesuisi erydÿÿna mahãdu-ò diwyde. Idi tahe tii ritxuatxuamy riwahinyre ibutu-ò timybo iny sohoji sohoji tuu rurumy rÿiramy.

36-37 Jyje tule kiawesele riwinyre. Tasubedeõ-di rohonyreu, idi iòwy nieru diwyde Jesuisi erydÿÿna mahãdu-ò. Jesuisi erydÿÿna mahãdu Jyje rininire, Banabemy. Kiani inyrybe-ò riwiurònanyre, rybe-di wiòhedÿÿdu kiani rare. Tii Levi mahãduõ rare, Xibri bedebutesÿdu tii raremyhÿ.

## 5

1 Idi tahe tule ijõ hãbu, Anania ninadu, tahãwyy Safira-wana tasubed-erenyõ-di rohonyrenyrene. 2 Iòwy tahe txuralemy diwyde Jesuisi erydÿÿna mahãdu-ò tasubede òwyreny ibutumy risÿnyrenyreni. 3 Tahe Pedro tamy rarybere: —Aõherekibo Satanasi-ò taholamy araykywo-ki atxiteri Deuxu Tyytybytyhy-ò taruiteri. Aõherekibo iòwyjura-di atxiteri. 4 Juhuu asubede tahonyõteu, ahõrõ rare. Aõhe, inatyhy? Inyõ adee rarybeõre idi bohonykemy. Idi tahonyteu, tahe, nieru ahõrõ rare, aõhe inatyhy. Aõherekibo aõbinahãkÿmy tahõtynyteri. Hãbu-ò aõkõ heka taruiteri Deuxu dee. 5 Kia-ò Anania roholareu, rurulemy resere. Tai ibutumy iny ruberutyhyre. 6 Weryrybò tahe iumy rihetynyre. Tahe ritamadÿÿnyny riwyre rihãloonykremy.

7 Inataõ òra bededÿÿnanamy reare tahe Safira, Anania hãwyy rehemynyre. Aõ heka rieryõhyre tahãbu rubuna rieryõhyre. 8 Pedro tamy rÿÿraxire: —Tiwesemybo asu teòwynyta —ahãbu rarybere wesele aõbo. Tahe tii dirawyònyde: —Kohe, iwesele rakòwònyre. 9 Ixityre Pedro rarybere: —Aõherekibo ahãbu-wana kai taruiteri. Tii teurihite aõbo riwinykeò. Beteheke, weryrybò ahãbu loodÿÿ-ribi rehemynyreni. Tule tii aradykre rubumy. 10 Tule tii aõwesele rurulemy resere. Weryrybò mahãdu ralore. Tai riwyre ritoonykre tahãbu biremy roikremy. 11 Tai tahe ibutumy ityhydÿÿdu mahãdu ruberure. Ibutumy kia-ò roholareu, tule ruberumyhyre.

12 Jesuisi erydÿÿna mahãdu sòwemy wowydyna aõmydÿÿnana riwinyrenyrene. Tule deytanawiwihikÿtyhy sòwemy riwinyrenyrene. Ityhydÿÿdu mahãdu wii ributunymyhyre Deuxu dohodÿÿna heto ube-ò. Salomaõ ubetyhy inire. 13 Kaa hãwã mahãdu dori sòwemy ruberumyhyre Jesuisi erydÿÿna mahãdu-ò wiutadà lau. Tamy rabutuõhyre ijohonamy. Ihãrele tahe ijõ rityhynymyhyre, ityhydÿÿdu mahãdumy ralokemy. Aõbinatyhymy heka inyõ ityhydÿÿdu mahãdu dee raryberenyõhyre. 14 Ityhydÿÿdu mahãdu rasòwerenymyhyre. Hãbu, hãwyy tule ralòmyhyre Inynyrÿtyhy-ò. 15 Webinadu mahãdu iny ridymyhyre ryò, hãwã hãwã-ribi. Tai Pedro nonana-ki riraòmy roimyhÿ byre-tyre-ki, herina tyre-ki. Pedro ubòrò webinadu-txi reakemy tai riteytenykemy rexinohõtynyre. 16 Ibutumy Jerusalẽ-ribi iòhòmy rÿira mahãdu nade webinadu-di, tule iny tyytybybina-di didyde. Tai tahe ibutumy reytere.

17 Xiwenawidÿÿdu wedu mahãdu, Jesuisi erydÿÿna mahãdu-ò rexinaanymyhyre. Tule kiawedu eryna mahãdu riwiòhenanyre. Saduseu imahãdu ni rare. 18-20 Tai tahe xiwe wedu mahãdu, Jesuisi erydÿÿna mahãdu rimyrenyrene idi rehurennyre hãwã ròtenawo-ki. Rummy tahe Inynyrÿ ÿjuõ riraynyre ijò, tahe ridyre ahana-ò. Tamyreny rarybere: —Boibenyke Deuxu àlàna heto-ò. Bexideòsinybenyke iny sòwehekÿ-ò. Tamyreny bitÿnybenyke timybo Jesuisi umytÿmyra inydee riwahinymyhyre. 21 Iwese ÿju rarybere wese, txuu ratÿnyreu, dohodÿÿna heto-ò ralomyhyre. Tai rierynarenymyhyre. Tahe xiwena mahãdu wedu dehemynyde, tii-wana ratximyhÿ-wana. Israeli nohòti juradÿÿdu mahãdu ributudÿÿnyre. Ibutumy judeu mahãdu, matuari mahãdu bedeerityhy mahãduõ rare. Tahe soldado itxeredu-ò riteònyre ròtena-ò iòrysyrenymy. 22-23 Tahe roirenyrene. Ròtena-ki tai rahaõre. Ròðsere tamy relyyre: —Ròtena-ò rehemynyra. Txiòtòbòhòkÿlemy rÿire. Tahe reraynyreu, aõho aõkõ rare. 24 Dohodÿÿna wedu xiwena wedu-wana

kia roholareu, tiiboho rexieryrenyõhyre aõbo riwinyrenykemy, aõhebo rotÿÿnyrenykemy. <sup>25</sup> Iwesemy rõhõtinyrerikõnalemy, inyõ dehemynyde. Tai rarybere: —Rõtēna-ki tetidite mahāduõ, dohodÿÿna heto-ki ratxireri. Iny kowa ritohonyreri. <sup>26</sup> Tai tahe soldado dinodu, soldado itxeredu-wana riõryre ta didydenyde ywilemy. Tamy heka aõhe risÿnyõhyre mana huna-di tamyreny kedehukemy heka soldado rõhõtinyre. <sup>27-28</sup> Tahe dehemynyde ritamadÿÿnyre inysõwe weduko-txi. Tahe wedutyhy rybe ritelenyre: —Jiarÿboho heka juhu adeereny rarybere uritere Jesuisi nimy bede erydÿÿrenykõmykemy. Ihārele tahe tuu tebedeerynytenyta ibutumy Jerusalē hāwā iny-ò. Ibutu-ò aeryna-di tariate. Wamy tarybetenyteri jiarÿboho Jesuisi rerubunyrenyramy. <sup>29</sup> Tahe Pedro taijoi-wana rarybere: —Iwese Deuxu wadeereny rarybere wese, arityhynyrenykre. Hābuõ iwitxiramy wadeereny rarybekeki, tiu arityhynyõtyhy. <sup>30</sup> Kaiboho inatyhymy Jesuisi terubunytenyte. Òwòru nihikÿ itxe-ò tetamadÿÿnytenyte. Inytyby Deuxu tahe rubu-ribi riixixadÿÿnyre. <sup>31</sup> Deuxu tarurunawe-ribi debò-di biu-ò ritamadÿÿnyre ibutu iòlòm̄y rarekemy, ibutu tarasadumy rarekemy. Tai ibutu Israeli ijoi mahādu-ò òraru bedewona ixāwina riwahinykemy. <sup>32</sup> Inyboho heka kia aõmydÿÿnamy robimyhÿrenyre, tai heka reerymahārenyre inatyhy raremy. Inyõ Deuxu rityhykeki, tii Tatytybytyhy tamy kidiwahinyke. Tii tule kia aõmydÿÿnamy rarybemyhÿre.

<sup>33</sup> Xiwena wahidÿÿdu mahādu wedu tamy roholarenyre, rak-  
 yarananyrenyre, irubudÿÿmy idi ratximyhÿ. <sup>34</sup> Tahe fariseu mahāduõ  
 lamamy rÿire. Ònosõna erydÿÿduõ tii ihÿre. Ibutumy iny tii riijemyhÿre  
 rityhynymyhÿreki. Kamalie heka inire. Tahe tii rarybere: —Jesuisi erydÿÿna  
 mahādu-di biòlòm̄nyke urihimyo ahana-ò. <sup>35</sup> Idi tahe taijoi-ò rarybere: —Hābu,  
 Israeli mahādu, bexiijebenyke kia hābu-ò, aõhebo botÿÿnybenykre. <sup>36</sup> Kaiboho  
 dori õhõtireny beabenyke Teudani-txi. Juhuu dori dinoduõmy tii raremyhÿ.  
 Tii ixiòlòdÿÿnihikÿmy iximy rarybere. Sõwemy heka iny tii-wana raremyhÿ  
 tahe 400 hābumy ihemy rare. Inyõ tahe rirubunyre rityhynymyhÿre mahādu  
 tahe iribi raubÿtÿre. Tahe aõ heka rimoõhyre, ibutumy iõre. <sup>37</sup> Iwitxirau  
 ijõ-txi õhõtireny rearenyke. Judasi inire. Tii Kalileia mahāduõ rare. Iu bede  
 dinodu iny-di rariareu tahe, tii rexiòlòdÿÿnyre. Sõwemy iny riheludunyre.  
 Tii tule rurure. Taityhydÿÿdu mahādu tule raubÿtÿre. <sup>38</sup> Tule wahe kahābu  
 mahādu rare ixinamy biteõnyke. Hābu kia aõmydÿÿnana dinodukeki, aõmy  
 aõkõ relekre. <sup>39</sup> Deuxu tahe idinodukeki, tiu heka idi behuõtyhy. Deuxu  
 òludu wesemy heka kai tesumahāte. Tai tahe Kamalie rybe-ò ibutumy  
 rityhynyrenyre. <sup>40</sup> Didyde he Jesuisi erydÿÿna. Rihetenyre. Idi tamyreny  
 rarybere: —Rybeõmyke Jesuisi nimy. Tahe ixinamy riteõnyre. <sup>41</sup> Tiiboho iribi  
 rexitarenyre, reysatyhymy ratximyhÿ, Jesuisini òraru-ki dorikÿhe tiiboho  
 aõhõkÿmy rotÿÿnyrenyraki. <sup>42</sup> Txuõ txuõlemy Rybewihikÿ ritÿnynymyhÿrenyre  
 dohodÿÿna hetomy dori, heto hetomy tiiboho rarybehymy rÿimyhÿre: —  
 Jesuisi inatyhymy Kristu rare, Deuxu deòdÿÿnamy nade.

## 6

<sup>1</sup> Tahe ityhydÿÿdu rasõwetyhynymy rÿiramyhÿ. Iu ityhydÿÿdu wytese  
 mahādu-ò rÿsÿna riwahinymyhÿre, grego rybedu rexinaanymyhÿre rÿsÿna  
 wahidÿÿdu mahādu dee. Judeu mahādu wytese sõwemy rÿsÿna rita-  
 myhÿrenyre waratyreny. Kia wesemy heka judeukõdu mahādu rarybere.  
<sup>2</sup> Jesuisi erydÿÿna waò inatxi reurò mahādu, ibutumy ityhydÿÿdu didydenyde  
 kia aõmydÿÿnana-ò roholakemy. Tahe raryberenyre: —Deuxu rybe ery-  
 dÿÿ rikiixāwidinyrenykeki, wytese rÿsÿna ariwahinyrenykemy, kia heka òbiti

aõkõ rare. <sup>3</sup> Tai tahe kaiboho hãbu mahãduõ bitabenyke ayreny-ribi debò inatxi reurò hãbumy bitabenyke. Hãbu tyhydÿÿnale, Deuxu Tyytybytyhy-di tÿximy rÿiralemy, iny bedeeryhykÿle, kiaweselemy hãbu bitake. Tiiboho dori aõna aõna ywisidÿÿdumy roirekre, kiawesemy iaõmysÿdÿÿnarenkyre. <sup>4</sup> Tai jiarÿboho arexitòenywãhãrenykemy watxiwãhãrenyrene. Deuxu rybemy ariery-nanymahãrenyke. Kiawese Jesuisi erydÿÿna mahãdu rarybere. <sup>5</sup> Ibutumy heka tuu raryberé, tamyreny awire. Tai tahe hãbu mahãdu ritarenyrene. Estevaõ ijõre, tii Deuxu Tyytybytyhy-di tÿximy rÿira, tatyhyna-ki tÿximy rÿira. Filipi ijõre, Prokoro ijõre, Nikanu ijõre, Timaõ ijõre, Parmena ijõre, Niolau ijõre, Niolau tahe Atxiòkia mahãdu juhoo rare. Judeu bede erydÿÿna tyhydÿÿdu juhoo tii rare. <sup>6</sup> Ityhydÿÿdu mahãdu tiiboho didydenyde Jesuisi erydÿÿna mahãdu-ò. Deuxu-ò rexitòenyrenyrene tahe Jesuisi erydÿÿna ityre tebò ritidirenyrene.

<sup>7</sup> Deuxu rybe heka ibutu ijohonanamy rÿire. Ityhydÿÿdu mahãdu-ò sòwetyhymy tamy ralòmyhÿre Jerusalê hãwã-ki. Xiwena widÿÿdu tule sòwemy Jesuisi rityhynyrene.

<sup>8</sup> Estevaõ heka Deuxu luuna sòwemy ratximyhÿre. Sòwemy Deuxu ruru-di ratximyhÿre. Deuxu urihixina nihikÿmy inyko-ò riwinymy raremyhÿ. Aõdeytenawiwihikÿ wesemy tule riwinyrene. <sup>9</sup> Kowa hãwã-ki tahe judeu dohodÿÿna heto iwitxira rÿimyhÿre. Libertu mahãdumy rexininire taijoi. Imahãduõ Sireneu ludu rare, ijõ Alexÿdria hãwã luduõ rare. Tiiboho doidenyde Estevaõ-wana rybe ritxiõnykemy. Silisia bede luduõ-ribi, Afia bede luduõ-ribi tii-wana doidenyde. <sup>10</sup> Estevaõ rarybere bedeerynihikÿ-di. Kia mahãdu tahe irybe weseõre. Estevaõ dori, Deuxu Tyytybytyhy-di ihÿre. <sup>11</sup> Tai tahe hãbuõ-ò raryberenyrene: —Kaiboho heka Estevaõ dee maruibenykre. Jiarÿboho dori araòwinyrenyrene. Kawesemy maruibenykre, my: —Jiarÿboho Estevaõ rybe-ò raholamy rãiwãhãrenyrene. Tii Deuxumy aõbinahakÿlemy rarybemyhÿre, Moisesimy tule. <sup>12</sup> Kia-ki heka Estevaõ dee iny raykarananyrene, judeu matuari mahãdu tule tamy raykarananyrene. Ibutumy Estevaõ òrysymy roirenyrene tahe rimyrenyrene, ridyrenyrene rybe ywisidÿÿna-ò. <sup>13-14</sup> Tahe ruidu mahãdu didydenyde. Tahe tiiboho raryberenyrene, my: —Ka hãbu heka Deuxu dohodÿÿna hetomy ibinamy narybede. Tii rarybere Jesuisi Nazare ludu iny dohodÿÿna heto kidibòhònykre. Jesuisi iny aõmydÿÿnana kidiwitxiranykre, ibutumy Moisesi inydeereny rierynanyrene. <sup>15</sup> Ibutumy iny ywisidÿÿna mahãdu Estevaõ-ò retehere. Iòsana, ÿju òsÿnÿwesehekÿlemy tamy ròhòtynyrenyrene.

## 7

<sup>1</sup> Tahe xiwe wedu Estevaõ-ò rÿÿraxire: —Kia aõbohe inatyhy rare. <sup>2</sup> Estevaõ tahe dirawyònyde. Wanyrÿboho, Wahaboho, Ijyymy adeereny arelyykre. Warybe-ò bohoolabenyke. Mesopotamia bede-ki Deuxu biu-ribi rexitÿnynyrene Abraõ-ò, inytybyreny-ò, Harã hãwã-ki rasÿnyõreu. <sup>3</sup> Tamy Deuxu rarybere: —Abede-ribi boibenykre. Alahi riòkòre mahãduy-ribi makre. Manakre ijõ bede-ò adee dori asÿbede ariurihikre. <sup>4</sup> Iribi tahe Abraõ Kadeu mahãdu bede-ribi roirenyrene Harã hãwã-ò tai rasÿnykemy. Iribi tahe tyby rurureu, Deuxu kaò didyde ka bede-ò titxibo kaiboho wiji tasÿnymahãtemy. <sup>5</sup> Abraõ-ò sÿõ riwahinyõre timy urihimyoõhyy. Tahe idi tamy riwahinykemy, iriòre-ò riwahinykemy Deuxu tamy rarybere. Abraõ iriòreõre, ihãrele Deuxu tusÿmy tamy rarybere. <sup>6</sup> Tule Deuxu tamy rarybere: —Ariòkòre ijõ bede-ki rasÿnykre 400 beòramy. Kowa ariòkòre heka deòdu wesemy raaõmysÿdÿÿkyre. Iwedu mahãdu heka ibinamy idi rarekre. <sup>7</sup> Jiarÿ tahe iny ariòwinykre, Deuxu

rarybere, ibinamy widi rÿira mahãdu. Iribi ka bede-ò kòdòhònykre wamy kaki reàlãmÿhÿkemy. <sup>8</sup> Idi urihixinaõ Abraõ-ò Deuxu riwahinyre, tòhòti itxi reakemy. Uladu notyyresyna aõmydÿÿnana tamy riwahinyre. Idi tahe Ijai reareu, Abraõ Ijai notyy riorore debò inataõ reurò txu-di. Iribi tahe Ijai tariõre Ijaò ritòtykyorore. Iribi tahe Ijaò tariõre notyky riorore. Tiiboho waò inatximy riòrenaduõ roire. Inatyhymy tiiboho inytybyreny rare. <sup>9</sup> Idi waòsohoji inytybyreny mahãdu Jyje dee rexiwobinanymÿhÿre. Idi rohonyre Egito-ò ramÿhÿre mahãdu-ò. Tahe Deuxu tii-wana raremyhÿ. <sup>10</sup> Iaõhòkÿmy dÿÿnana-ribi Deuxu ritamÿhÿre. Egito iòlò, Faraòmÿ ninadu rare. Deuxu heka Jyje luomy Faraò risÿnyre. Faraò rue-ò heka Jyje bedeerydÿÿna sòwemy ratximÿhÿre. Faraò ibutu dinodumÿ Jyje risÿnyre. Tule Iòlòheto-di itxeredu tyhymÿ Jyje ronyre. <sup>11</sup> Ramamy rubu nihikÿ dehemynyde ibutusu-ò, Egito-ki, Kanaã bede-ki. Sòwemy iny aõhòkÿmy rotÿÿnyre. Inytybyreny rÿsÿnaõ-ki rahaõhÿre. <sup>12</sup> Egito maixòmo rÿimÿhÿreò, Ijaò roholare. Tahe inytybyreny riteõnyre iòrysymÿ. <sup>13</sup> Idi tahe ixityre iòrysymÿ riteõnyre, Jyje tamyreny rexideòsinyre. Tai tahe Faraò Jyje sÿmahãdu rieryre. <sup>14</sup> Tahe tyby-ò Jyje tarybe riwahinyre tamy sÿmy kanakemy ibutu imahãdureny-wana. Tiiboho 75 inymÿ rimÿre ibutumÿ. <sup>15</sup> Tai tahe Egito bede-ò Ijaòboho roirenyre. Iribi tahe Ijaò rurure. Idi tahe ibutumÿ inytybyreny rurure. <sup>16</sup> Tahe iumÿreny diwyde ritoonyre wabede-ò, Sikenì hãwã-ò. Abraõ kia wabede juhoo riwyre nieru-di, Emo riòre-ribi. <sup>17</sup> Deuxusÿ-ò wahidÿÿna juhoo rarybere Abraõ-ò. Ibededÿÿnana iòhòre Deuxu tamy riwahinykemy. Inyboho Egito-ki rasòwemyhÿrenyre. <sup>18</sup> Ikonanau tahe iòlò iwitxiramÿ ròhònyre Egito bede iòlòmÿ. Tii Jyje rieryõre. <sup>19</sup> Tii iny ijoi riitxenanyhÿre. Tii heka ibinatyhyre inytybyreny-ò. Uladu-di heto-ribi rehukemy riteõnyre. Tai iny riòrereny ituereny. <sup>20-21</sup> Iu tahe Moisesi reare. Tii uladu ruxeratyhyre. Tii tahetotyhykile raumynyre inataõ ahãdumÿ idi rÿire. Heto-ribi dòhònydeu, Faraò riòre rimÿre itibiedÿÿmy tariõre wesemy. <sup>22</sup> Ibutumÿ Egito bedeerydÿÿnana tamy rierynanyre. Tii heka rexiòlònyre rybedunihikÿmy aõmydÿÿna widÿÿdu nihikÿmy. <sup>23</sup> Moisesi iny inatxiwa itue beòra-di rÿireu, tamahãdu, Israeli mahãdu roramÿ nade. <sup>24-25</sup> Egito mahãduõ Israeli mahãduõ rihetenÿre, Moisesi tuu robire. Tahe Moisesi tii rirubunyre, Israeli mahãduõ riwiòhenanykemy, Egito mahãduõ rexiòwynymÿ. Deuxu Moisesi debò-di iny ritakre. Kiamÿ tahe Moisesi mahãdu rierykremÿ Moisesi ròhòtynyre. Tahe aòkòre rieryõhÿre. <sup>26</sup> Ijò txu biòwamy tahe Israeli hãbu inatximy wiwana ròrenymÿhÿ. Moisesi ronyre iyreny-txi riixãwididÿÿnykemy. Rarybere: —Kaiboho seriõre toite, aòherekibo wii tehetenytenyteri. <sup>27</sup> Kia òhòtedu Moisesi ritorunyre rarybere: —Mobo he wawedurenymÿ arasÿnyra, awaywisidÿÿdu renymÿ. <sup>28</sup> Kai biwarubunyekò aòbo, iwese kau Egito mahãduõ terubunyte wesemy. <sup>29</sup> Kiarybe-ò roholareu, Moisesi rahenyre Midiã bede-ò rasÿnykemy. Idi tahe inatxi Moisesi riòremÿ kowa reare. <sup>30</sup> Iny inatxiwaituemy beòra-di bededÿÿnana riwyre. Tahe Sinai hãwãlò bederahy-ki raremyhÿ, ÿjuõ tamy rexitÿnyre bede rade tòbòhòkÿy-ki tamy roomÿhÿre. <sup>31</sup> Moisesi kiamÿ dobideu, bede riòtiinyre. Tamy itxeremy rehemynyre. Tahe Deuxu rybe-ò roholare. <sup>32</sup> Jiarÿ borenÿ Deuxu watxireri, Abraõ Deuxu, Ijai Deuxu, Ijaò Deuxu. Tahe Moisesi ruberutyhyre, timÿ heka tamy reteheõhÿre. <sup>33</sup> Tahe Deuxu tamy rarybere: —Awa bitake, suu awarawo ludu dori, brebuna rare. Jiarÿ heka Deuxu watxireriki, biwatyhynyke. <sup>34</sup> Wiji tahe waijoimÿ rabireri Egito-ki. Tiiboho aõhòkÿmy rotÿÿnyreny. Ibru-ò raholareri, iohitxi-ò raholareri. Jiarÿ heka aditadenykre iribi. Manake, Egito-ò arateònykre. Kia heka Deuxu rarybere Moisesi-ò. <sup>35</sup> Ka Moisesi heka Israeli mahãdu juhoo teramy reare. Tamy

rarybere juhUU mobo wawedurenymy arasÿnyra, waywisidÿÿdurenymy. Tiile heka Deuxu riteònyre idinodumy rarekemy, tarasadumy rarekemy. Bederade tòbòhòkÿ ÿju, heòtywoludu, iwiòhedÿÿdure. <sup>36</sup> Tahe Moisesi Egito-ribi iny ritamyhÿre. Egito bede-ki bedeeryna aõna aõna wiwihikÿ-wana. Iwese ahohokÿbesò-ki tule bederahy-ki iny inatxiwaitue beòramy aòmydÿÿnana wiwihikÿ riwinyre. <sup>37</sup> Kaa Moisesi heka rarybere Israeli mahãdu-ò: — Ayreny-ribi, amahãdu-ribi rybedu nihikÿmy Deuxu kikitamadÿÿnykre iwese riwatamadÿÿnyre wese. <sup>38</sup> Kaa Moisesi taijoi-di wii ributunyreu, bederahy-ki ihÿmyhÿ inytybyreny-wana heka ratximyhÿ. ÿju-wana tii ratximyhÿ Sinai hãwãlò-ki iu tamy rarybere. Deuxu rybe tyhy iru-di ratximyhÿ. Tahe rybe bede ywina heka Moisesi-ò Deuxu riwahinyre inydeereny kidiwahinykemy. <sup>39</sup> Tahe inytybyreny ityhydÿÿ deramy rare. Reòbyòrenyre. Ixybyle Egito-ò ròòsekemy ròhòtynyre. <sup>40</sup> Tahe iny Araò-ò rarybere: —Ritxoo deuxuò inydeereny biwinyke inykorenymy rakemy. Moisesi, Egito-ribi iny ritarenyre, tahe titxibo ihÿre reeryrenyòre. <sup>41</sup> Kiatxu tahe broreni riòreò riwinyre. Tahe xiwemy ritoonyrenyre iko-ò, ritxooko-ò. Rexideysanyrenyre aõbo tebò-di riwinyrenyeki. <sup>42</sup> Tai tahe Deuxu rexitare iribi, taina rityhinykemy. Iwese rybeduò iu tyyriti-ki riritynyre wese:

—Israeli mahãdu, kaiboho xiwena tetoonytenyte, iròdu xiwena tetoonytenyta. Wadee aòkò tahe kia tetoonytenyta 40 beòramy bederahy-ki.

<sup>43</sup> Kaiboho tewytenyta ritxooheò riòre. Mòlòki inire, aritxoo deuxuni. Tule Renifa taina ijò aritxoonire. Kia tewytenyte, tetyhynytenyte wahe. Tai tahe arateònyrenykre Babilonia weribihikÿ-ò wahe.

<sup>44</sup> Inytybyreny heka Deuxu rybe bede ywina tyky heto riwinymyhÿre bederahy-ki. Iwese Moisesi-ò Deuxu riteònyre wesemy kia riwinymyhÿrenyre.

<sup>45</sup> Iribi tahe inytybyreny tatyby-ribi tyky heto ritare, tii-wana riwymyhÿre kabede-ò, Josue tadinodu-wana. Iu Deuxu iko-ribi riteònyre, ibutumy tai sÿ mahãdu tii-wana riwymyhÿre, ihyy tahe Davi reare. <sup>46</sup> Deuxu heka sòwemy Davi luure. Davi heka rexitònyre Ijaò Deuxu dee heto riwinykemy. <sup>47</sup> Tahe tii aòkò riwinyre, Salomaò iwidÿÿdure. <sup>48-49</sup> Deuxu biukisÿdu tahe hãbu widÿÿna heto-ki rasÿnyòmyhÿre. Iwese Deuxu rybeduò rarybere wese:

—Biu tahe warynana rare, bede tahe wawa elehyna rare. Timybo inyò wadee heto riwinyke, Inynyrÿ rarybere. Iwo-ki tahe waelehyna arihynyòkre.

<sup>50</sup> Deuxu rarybere:

—Ibutumy aõna aõna jiarÿ rewinyre.

<sup>51</sup> Tahe Estevaò rakonananyre he tamyreny rybena heka ròhònyre: —Kaiboho araykytererenyre. Deuxu Tyytybytyhy rybe-ò taho-

laòhyymahãtenyte. Iwese iny tybyreny riwinyrenyre wesemy. <sup>52</sup> Ibutumy Deuxu rybedu mahãdu-ò ibinamy iny tybyreny riwinymyhÿrenyre. Tiu ihetxiu Deuxu òbiti hãbu kanakeò, tiiboho raryberenyre, rirubunyre irybedu. Kaiboho tahe Deuxu òbiti hãbu-di ijò-ò tewahinytenyte, terubunytenyte. <sup>53</sup> Deuxu bede ywina ÿju mahãduò adeereny diwahinydenyde, kia bede ywina kaiboho tetatenyte, tahe tetyhynyòhyymahãtenyte. <sup>54</sup> Tahe kiamy Estevaò rarybereu, tiiboho heka rebure nihikÿre. Urile txyde-ki ruruamyhÿre tamy. <sup>55</sup> Estevaò tahe Deuxu Tyytybytyhy-di iwoki ratximyhÿre. Tahe biu-ò retehere: Deuxu loosònamy robire. Jesusimy robire lamamy rÿire Deuxu rurunawe-ribi. <sup>56</sup> Tahe Estevaò rarybere: —Jiarÿ wa rabireri biu juxahakÿmy. Jesusimy rabireri Deuxu deòdÿÿna. Lamamy heka rare Deuxu rurunawe-ribi. <sup>57</sup> Tahe ryrymyhÿre, tòhòti ritòbònymyhÿrenyre,

raijeranyre tamy. <sup>58</sup> Ridyre hãwã-ribi, mana-di tahe tamy rehumyhÿre, rirubunrenyrene. Erydÿÿna ijyydu tahe taderamy ririrenyre Saluko-txi tamy riyrubunykemy. <sup>59</sup> Iu mana-di rehureu, Estevaõ rexitøenyre: —Wanyrÿ, Jesuisi, watytyby kai bimyleke awana ararekremy. <sup>60</sup> Tahe tatiowotimyre resere, ryryre: —Wanyrÿ, kia òraruna iòwydÿÿomyke. Idi tahe rurure.

## 8

<sup>1</sup> Salu tahe kia òbitimyre raremyhÿ røhøtinyre, Estevaõ rurureu. <sup>2</sup> Iribi tahe ityhydÿÿdu mahãdu aõhøkÿmy rotÿÿnymyhÿre. Judeia wedu mahãdu dori, iòludumyre rÿimyhÿre. Tai tahe ityhydÿÿdu sohoji sohoji Jerusalẽ hãwã-ribi røhønyre. Urile Jesuisi erydÿÿna mahãdu sohojile rÿire. Judeia bede hãwã mynamyna robÿtÿre, Samaria bede-ò tule. Tahe hãbu ityhydÿÿduõ Estevaõ umyre riwrenyrene rihãloonykremy. Tahe rahinymyhÿrenyrene, rirajuamyhÿrenyrene. <sup>3</sup> Salu tahe ityhydÿÿdu mahãdu hudumyre. Wii risÿÿnymyhÿre. Ihetorenywo-ò ralòmymyhÿre tahe ridymyhÿre hãwyy, hãbu, røtenawo-ò rirøtenykemy.

<sup>4</sup> Iu tahe ityhydÿÿdu mahãdu ijø bede-ò roire mahãdu Deuxu rybemy relyymyhÿre ibutu hãwã-ki. <sup>5</sup> Filipi ijø raremyhÿ. Tii Samaria hãwã-ò rehemynyrene. Tahe Kristumyre tamyrenyre relyyre. <sup>6</sup> Iny søwemy rityhynyrenyre aõmybo Filipi rarybemyhÿremy. Tahe deytedyÿÿna wiwihikÿmy iny robimyhÿrenyrene, tyytybybina deòdÿÿnamyre tule robirenyrene. <sup>7</sup> Tahe riteønyreu, tyytybybina iny-ribi røhønyre, rirajuamyhÿre. Tule iny webinadu raraserasemy roimyhÿre, tule inytiere-wana. Tahe ibutumyre riteytenymyhÿre. <sup>8</sup> Tai tahe ka hãwã-ki deysana nihikÿ rÿire.

<sup>9</sup> Samaria hãwã-ki tahe hãbuõ raremyhÿ. Simaõ inire. Tii wodohonana widÿÿdu ihÿre. Iny riitxenanymyhÿre. Tahe riøtiinyrenyrene. Tii iximyre rarybemyhÿre moõ wiwihikÿmy raremyhÿmy. <sup>10</sup> Ibutumyre iny tii rityhynyrenyre, hãbu wedu mahãdu tule, hãbu aõtxile mahãdu tule. Tiibohe raryberenyrene: —Simaõ Deuxu ruruna rare. Ruruna nihikÿ inire. <sup>11</sup> Tiu bede aõkø iny riitxenanymy raremyhÿ, riøtiinyrenyrene. Tai tahe rityhynymyhÿrenyrene. <sup>12</sup> Iu tahe Filipi Jesuisi Kristunimyre, Deuxu òlønamy tamy relyymyhÿre. Tai tahe rityhynymyhÿre, raratysebemyhÿrenyrene. <sup>13</sup> Iribi tahe Simaõ itxenadyÿÿdu tule Jesuisimyre reòbyre, raratysebenyrene. Tahe Filipi-wana ihyy røirenyrene bede òtiidyÿÿna-di retehemyhÿre aõbo Filipi riwinyremy.

<sup>14</sup> Samaria hãwã mahãdu tahe Deuxu rityhynyrene. Kia-ò Jesuisi erydÿÿna mahãdu roholare Jerusalẽ-ki. Tai tahe Pedro Joaõ-wana riteønyrenyrene kowa-ò. <sup>15</sup> Rehemynyrenyre, Deuxu-ò rexitøenyrenyrene Deuxu Tyytybytyhy tamy kanakemy. <sup>16</sup> Inyø dori Deuxu Tyytybytyhy-di rÿiømymhÿ. Urile Jesuisi Inynyrÿni-di raratisebedÿÿmy rÿiramymhÿ. <sup>17</sup> Tahe Pedro Juaõ-wana tebørenyre ityrenyre ritidire. Tahe Deuxu Tyytybytyhy tamy nade. <sup>18</sup> Kiamyre Simaõ robire, aõma, debòtidina-di Deuxu Tyytybytyhy nade. <sup>19</sup> Tai tahe tamy rexitøenyrene: —Ka heka wanieru rare. Bidiwahinyke kia ruruna. Tahe inyø tyre wadebø aritidikeki, tamy Deuxu Tyytybytyhy kanakemy. <sup>20</sup> Tahe Pedro tamy dirawyònyde: —Aõkøre, anieru rakemy watxireri awanale rububede-ò. Deuxu ruruna dori anieru-di biwykemy mohøtinyke. <sup>21</sup> Kia heka aõmysÿdÿÿnakøre wayreny-ki. Arayky, awo, òbitimyre aõkø ratximyhÿre Deuxu dee. <sup>22</sup> Mabedewomy atximahãke aòraruna-ki, aõbo tahøtinyte. Bexitøenyke Inynyrÿ-ò tii òsana aòraruna-ribi araixãwididyÿÿnykre. <sup>23</sup> Kai dori texiwaritinymahãte. Aòraruna adi nararotinymyhÿde. <sup>24</sup> Tahe Simaõ tamy rarybere: —Wadee bexitøenybenyke Inynyrÿ-ò, kia aõkø waki kÿnyikemy, aõmybo tarybetenyteki aõbo.

<sup>25</sup> Iribi tahe, Pedro Juaõ-wana Inynyrÿ rybemy rarybemyhÿrenyre, re-lyymyhÿrenyre tai. Sõwemy Samaria bede hãwã hãwã-ki Rybewihikÿ re-lyymyhÿre, Jerusalẽ-ò ròðserenyreu.

<sup>26</sup> Filipi Samaria hãwã-ki raremyhÿ. Tahe Inynyrÿ ÿjuõ tamy rarybere: —Bexiywinyke, make ibò-ò. Kasa hãwã ryhykÿ bimyeke. Jerusalẽ-ribi ryy rare, bederahy-ki rare. Tahe Filipi rare. <sup>27-28</sup> Tahe inyõ-wana wibymy reare. Tii Etiopia bede luduõ rare. Etiopia bede iòlò hãwyyõ rare. Kanasi inire. Inieru-di itxeredu kahãbu rare. Tii enuku rare. Tii ròðsereri Jerusalẽ-ribi. Kowa Deuxu reàlãmy rare, tahe tasÿ-ò ròðsere iawarutewedile. Isaia Deuxu rybedu tyyriti-di rariamy tii rononymhÿre. <sup>29</sup> Deuxu Tyytybytyhy Filipi-ò rarybere: —Make, awarutewe-ò, mariake ibire-di. <sup>30</sup> Tahe Filipi tamy raijaranyra. Roholare tyyriti-di rariareriò. Tahe Filipi rÿÿraxire: —Kai aõbo teeryte aõbo rare, aõdibo tariateri. <sup>31</sup> Tahe dirawyònyde: —Aõkõre, inyõ dori wadee ritÿÿnyõre. Timybo arierykremy. Manaòwònyke wabire-ò bodonyke. Tahe Filipi raòwònyre. <sup>32</sup> Tii kia-di rariareri tyyriti-ki:

—Iwese iny budoeni rubudÿÿdu-ò riwyre wese, tii iwesele ridyrenyre. Budoeni-ribi iny isira riororeu, rirajuaõlere. Iwesetyhyle Tii rarybeõlere.

<sup>33</sup> Iehehenamy tamy raryberenyre wese hãbu ehehe wesena, òbitimy aõkõ idi riywinyrenyre. Inyõ rarybeõtyhy iriòkòremy, iumy dori bede-ribi ituera.

<sup>34</sup> Tahe tii Filipi-ò rarybere: —Wadee manarybeke momybo rybedÿÿdu rarybereri, iximy aõbo ada ijõmy aõbo. <sup>35</sup> Tahe Filipi kia Tyyritidile rexidelenymy relyyre. Jesusimy Rybewihikÿ Tÿmyramy tamy relyyre. <sup>36</sup> Rydi rariamyhÿre idi rehemynyrenyre beõ-ò. Tahe tii Filipi-ò rarybere: —Kowa bera rare. Biwaratisebenykekõ aõbo, adee awikeki. <sup>37-38</sup> Tahe Filipi dirawyònyde: —Awire wadee. Inatyhymy arayky-ki tetyhynyte-wana, aratisebenykre. Tahe rarybere: —Retyhynyre, inatyhymy Jesuisi Kristu Deuxu Riõre raremy. Tahe tewe irira riixãwidinykemy riteõnyre. Tahe itewe-ribi ròhònyra, bera-ò riberenyre. Tahe riratisebenyre. <sup>39</sup> Bera-ribi rotuoreu, Filipi aõwesele iõmy reare. Inynyrÿ Deuxu Tyytybytyhy ridyre. Hãbu ixyby Filipimy robiõhyyre. Tahe tary-di rariamy rare. Teysanatyhy-di tÿximy rare. <sup>40</sup> Idi tahe Filipi rexieryreu, Asoto hãwã-ki rehemynymy raremyhÿ. Iribi tahe Rybewihikÿ-di relyyre ibutumy hãwã hãwã-ki. Ikonana tahe Sesaria hãwã-ò rehemynyre.

## 9

<sup>1</sup> Salu rarybemy raremyhÿ, Inynyrÿ Jesuisi ityhydÿÿdu mahãdu rubudÿÿmy. Tii rarybemy raremyhÿ Deuxu dohodÿÿna heto wedu-ò. <sup>2</sup> Tamy rexitòenyre: —Arybe tyyriti ariwykremy watzireri Damasus hãwã dohodÿÿna heto wedu-ò. Tai tahe kowa-ki ityhydÿÿduõ-txi areakeki, aõtxile hãbu hãwyy aõbo, aridykemy Jerusalẽ hãwã-ò, ariròtenykemy. <sup>3</sup> Tahe iòhòmy Salu rare Damasus hãwã iròte iòhò-di, idi tahe loosònahakÿ Salu tyre resere. <sup>4</sup> Tahe bede-txi resere, tahe rybeõ roholare: —Salu, Salu, aõherekibo aõna aõnamy ibinamy wadee tatÿÿnymahãte. <sup>5</sup> Tahe tamy rarybere: —Mowexe, Wanyrÿ atxiteri. Tahe rirawyònyre. —Jiarÿ Jesuisi watzireri, aõna aõnabina binamy wadee tadotÿÿnymahãte wahe. <sup>6</sup> Myike, mariamy tahe hãwãhãkÿ-ò malokre. Taita inyõ adee rarybekre aõhebo botÿÿnykremy. <sup>7</sup> Tahe Salu ijoi riòryre rybeõhyy rÿimyhÿ. Rybe-ò roholare, tahe tuu robiõhyyre. <sup>8</sup> Salu suribi rÿireu, iruetà wesele heka ratximyhÿ. Tahe hãbu tii-wana ihÿmyhÿ heka iaxiò-ki idi rimymy idi rare Damasus hãwã-ò. <sup>9</sup> Tahe hãwãhãkÿ-ki txu inataõ txu idi rÿire aõmy robiõhyyre, riroxiõhyyre, bemy riõõhyyre.



10 Damasu hãwã-ki ityhydÿÿdu wihikÿ rasÿnyre. Anania inire. Wanyrÿ Jesuisi tamy rarybere rasi weselemy: —Anania. Tahe rirawyònyre: —Aõbo rare, Wanyrÿ, kakile watzireri. 11 Tahe Jesuisi riteònyre rarybere: —Myike, make òbitiry-ò, Judasisÿ heto-ò. Tai bitÿÿraxinyke titxibo Salu ratxirerimy. Tarso hãwãludu tule rininire. Tii wiji wadee rexitònyreri. 12 Tii umy robireri tarasi-ki. Kai themynyteri wese, irue-ò ebò bitidikemy, biteytenkemy. 13 Anania Jesuisi-ò rirawyònyra: —Wanyrÿ, sòwemy kia hãbumy rybe-ò raholara. Aõbina binamy ityhydÿÿdu-ò risÿnyre raremyhÿ Jerusalẽ-ki. 14 Deuxu dohodÿÿna heto wedu tyyriti diwyde kaki ityhydÿÿdu rutysÿny rirutekemy. 15 Tahe Inynyrÿ tamy rarybere: —Aõwaxina tamy makre, Jiarÿ dori, kia retara wadee aõmysÿdÿÿdu nihikÿmy rarekemy, judeukòdu mahãduko, iòlòrenyko, tule Israeli mahãduko wanimy rarybekre, aõma, warybetÿmyra wihikÿmy. 16 Tamy aritÿnynykre tiwesebo aõhòkÿmy rotÿÿnykre wanimy rybeòraru-ki. Kia ibutumy Jesuisi rarybere Anania-ò. 17 Idi ta Anania rare tamy Judasi heto-ki. Ralòmy rahudi, tahe, tebò ityre ritidira. Tahe rarybera: —Salu, waseriòre, Inynyrÿ adee riwateònyra. Tiile, Jesusile heka ryro-ki adee rexitÿnynyre. Tiile heka riwateònyra arue ritxuakemy, tule Deuxu Tyytybytyhy atykmy ralòkemy. 18 Tahe aõwesele irue-ribi rejujura aõ yjy wesele. Tahe ixityre robira. Idi rÿimy rahudi tahe, Anania riratysebenyre. 19 Idi riroximy rahudi tahe, inatyhymy raruruterenyre. Tahe Damasu hãwã-ki tiwese txubo idi rÿire kia erydÿÿna mahãduy-ki. 20 Idi dohodÿÿna heto-ki rybe ritÿnynyre. Rarybere: —Jesuisi heka Deuxu Riòrele rare. Kiawesele rybe-di ritynynymyhÿre. 21 Tahe uri ijohonadu mahãdu urile bede riòtiinymy rÿimyhÿ. Tahe inyò rarybere: —Kia aõ heka ityhydÿÿdu rubudÿÿdule ratxireri, Jerusalẽ-ki. Kiale heka kaò nade ityhydÿÿdu ritaataamy ridykemy dohodÿÿna heto wedu-ò. 22 Salu tahe ire riixiòlòdÿÿnymyhÿhyre. Judeu Damasus hãwã ludu rieryòhyymyhÿ aõmybo rarybemy. Tii rarybere: —Jesuisi Kristule rare, Deuxu deòdÿÿna rare.

23 Tiwese txubo txu idi rÿidi tahe judeu mahãdu rarybere irubudÿÿmy. 24 Tahe Salu rierymy rÿimyhÿ tahe inonana-ò rexiwinymy rÿimyhÿ. Rummy tahe, txummy hãwã ijò-ki rirubunykemy retehemy rÿimyhÿ. 25 Tahe ijò erydÿÿna mahãdu weriri nihikÿ riwinyre. Rummy tahe Salu riòlòdÿÿnyre òtity nihikÿ kanaweribi-ò, hãwã ahanaube-ò.

26 Salu Jerusalẽ-ò rehemynyreu, ityhydÿÿduky-ò ralòkemy ratxireri, tahe urile ilau ruberumy rÿimyhÿ. Erydÿÿna mahãdu ròhòtinyre: —Tii ityhydÿÿdu inatyhy aõkò ratximyhÿremy. 27 Banabe tahe rityhynymy ridyre Jesuisi erydÿÿna mahãdu-ò. Tahe relyyre iwese Jesuisi Salu-ò ryki rexitÿnynyremy tamy raryberemy. Tule relyyre iwese Jesusinimy Salu rybe ritÿnydÿÿnymyhÿremy, Damasus hãwã-ki. 28 Tahe taihy Salu ratximyhÿre. Tiò tiòle reamy ratximyhÿre rybe ritÿnydÿÿnyrerimy ihÿre, ruberumy aõkò. 29 Salu rarybera grego rybe heka erydÿÿna mahãdu-ò. Widee rarybehymyhÿrenyre. Idi tahe kia mahãdu Salu rubudÿÿmy roromyhÿre. 30 Ityhydÿÿdu seriòre kia rieryreu, tahe Salu ridyrenyre Sesaria hãwã-ò. Iribi tahe Tarso hãwã-ò riteònyre.

31 Idi tahe ywina reare ityhydÿÿdu mahãduy-ki. Ibutumy hãwã bedemy, Judeia, Kalileia, Samaria, ityhydÿÿdu mahãdu iruruteremy relere. Ibutumy Inynyrÿ dee òbitina-ki rariamyhÿre, rityhynymyhÿre. Deuxu Tyytybytyhy teysatyhymy tamy riwahinyre. Sòwemy tahe ralore iheki ityhydÿÿmy.

32 Ibutumy hãwã hãwãmy Pedro rariamyhÿre. Tule robehere Lida hãwã-ò ijò ityhydÿÿdu mahãdusÿ-ò. 33 Tai Eniamy ninadu-txi Pedro reare heka rare. Iumy heka imyremyrehkÿ heka rare. Debò inataõ reurò beòramy heka herina-ki bede idi rÿire 34 Pedro rarybere tamy: —Enia, Jesuisi

Kristu arateytenykre. Myike, aherina biyrubunyke. Aõwesele hãbu rÿira. <sup>35</sup> Ibutumy Lida hãwã mahãdu Saronã hãwã mahãdu tuu robire, tai Inynyrÿ rityhynyrenyre.

<sup>36</sup> Jõpe hãwã-ki hãwyy ityhydÿÿdu rasÿnyre. Tabita inire. Kiani riwiurõnyre, watxi wese heka rare. Kia heka aõwiwihikÿ widÿÿdu heka rare. Aõna aõna sõwemy iny-ò riwahinymyhÿre. <sup>37</sup> Ijõttxu heka webinadumy resere, ihyy ta, rurure. Risuhõmy rahudi tahe, ritidire hetowo ratyaluduwo-ò. <sup>38</sup> Laida hãwã iõhõmy rÿire, Jõpe hãwã-ribi, Ityhydÿÿdu roholare Pedro Lida hãwã-ki ratximyhÿre, tahe hãbu inatxi diteõnyde Pedro õrysmy. Uritere eleõkõmy kanakemy tii-wana. <sup>39</sup> Pedro tahe tii-wana rare. Rehemynyrenyreu, tahe ridyre hetoratya ludu wo-ò. Ibutumy wytese mahãdu robumy rÿimyhÿre, rubuweroramy. Tahety, tatyboho ritxeredÿÿnymy tamy riwinyre. <sup>40</sup> Tahe Pedro rarybere ibutumy rexitakemy. Tahe rexitõnyre taowotimy resemy. Tahe rexiõkesere rubu-ò rarybekemy: —Tabita, myike. Tahe irue raraynyre tahe Pedromy robire, tahe ronyre. <sup>41</sup> Pedro tebò tamy riwainyre tahe rÿire. Tahe wytese-ò, ityhydÿÿdu-ò rryre. Tamy riteõsinyre hãwyy irulemy roirerimy ihÿremy. <sup>42</sup> Jõpe hãwã mahãdu ibutumy kia rieryre. Sõwemy iny tahe Inynyrÿ rybe rityhynyre., <sup>43</sup> Txu sõwemy Pedro Jõpe hãwã-ki ihÿmyhÿ Simaõmy ninadu heto-ki. Simaõ heka irõduty wysydÿÿdu rare.

## 10

<sup>1</sup> Italia soldado mahãdu dinodumy raremyhÿ. Oreniliu inire. Sesaria-ki rasÿnyre. Tii õbitimy nodu rare, isÿ mahãdu-wana. <sup>2</sup> Tii uriwahidÿÿna diwahinyde tule sõwemy rexitõnyre Deuxu-ò. <sup>3</sup> Aõutxu inataõ òra bedeu iõhõmy, rasina wesemy Deuxu ÿjumy tii robira, tamy rehemynyreniri. Tahe tamy rryre:

<sup>4</sup> —Oreniliu, rimasajuare-ribi riwawyõnyre: —Aõherekibo, Wanyrÿ. Tahe ÿju rarybere Oreniliu-ò: —Aexitõedÿÿnamy Deuxu rierymyhÿre. Tule ijõ-ò awahisina Deuxu rierymyhÿre.

<sup>5</sup> Biteõnyke eõdubohõ Jõpe hãwã-ò Simaõ Pedro õrysmy. <sup>6</sup> Tii Simaõ irõdutyky iyxidÿÿdusÿ-ki ihÿre, bera ijã iõhõ-ki. <sup>7</sup> ÿju rybedu rexitareu, teõdu inatxi-ò rryre. Tule tasoldado mahãduy-ribi inyõwihikÿ rihitxinyre. <sup>8</sup> Kia ibutu-ò relymy rahudi tahe riteõnyre Jõpe hãwã-ò.

<sup>9</sup> Ijõttxu txutyetxuu, tiiboho hãwã-ò iõhõmy ròire. Kiaule Pedro raõwõnymy rÿimyhÿ hetotyre-ò rexitõnykemy. <sup>10</sup> Rama risamy ratximyhÿ tahe rirox-ikemy ixi-di ihÿmyhÿ. Rÿsÿna riraõmy rÿimyhÿ. Idi rasi wesemy rõhõtinyre rÿire. <sup>11</sup> Tahe robire: biuwetyy ruamyhÿre wese tuu robire. Riã wesemy aõna tamy dobehede. <sup>12</sup> Riã wo-ki ibutumy irõdu, nawii, hemylala, aõbo dõkõnakõnale. <sup>13</sup> Rybeõ-ò roholare: —Myike, Pedro, birubunyke, biroxike. <sup>14</sup> Pedro rirawyõnyra: —Aõkõre, Wanyrÿ. Kia dõkõna rerõkõhywãhãre, isu-isure dori. Ixityre tamy rarybere: <sup>15</sup> —Aõbo Deuxu risuhore wese isuisumy rybeõmyke. <sup>16</sup> Ixityre narybede. Iu tahe aõwesele ridyre biu-ò.

<sup>17</sup> Tahe Pedro kia aõbo raredi heka rõhõtinyreu, Oreniliu-ribi hãbu mahãdu rehemynyre. Simaõ heto riijemyhÿ tahe ijõhõkÿkile rahare. <sup>18</sup> Tahe rryrenyre: —Simaõ Pedro aõbo kakile ratxireri. <sup>19</sup> Pedro, tatxuu rasina-di rõhõtinyreu. Deuxu Tyytybytyhy tamy narybede: <sup>20</sup> —Myike tahe, bobehke. Inataõ hãbu dori araijereri. Tii-wana makre adee dori aditeõnyde. <sup>21</sup> Tai Pedro robehere. Tamy rarybere: —Jiarÿ aõrysydu rare. Aõherekibo tõitenyte. <sup>22</sup> Tahe rirawyõnyre: —Oreniliu hãbu õbiti rare. Tii Deuxu dee ijohonaduõ rare. Ibutumy judeu bedeu mahãdu awiremy tuu rarybemyhÿre. ÿjuõ

tamy rarybere aòrysomy kiditeònykremy, adee roholakremy. <sup>23</sup> Tahe Pedro tamyreny rarybere: —Kakile inyboho ròkòròrenykre.

Ihewoludu txu, rÿidi tahe Pedro tiiboho-wana ròirenyra. Ijò ityhydÿÿdu seriòre tule roirenyra. <sup>24</sup> Ijò hewo ludu txu Sesaria-ò rehemynyreny. Oreniliu tii riraòmyhÿre. Taijoi mahãdu tabiòwawoludu mahãdu-wana ributunymy rÿimyhÿre. <sup>25</sup> Pedro rehemynymy raloreu, Oreniliu ròhònyra heto-ribi tahe tatiowotimy iko-txi resere riwowodynky. <sup>26</sup> Tahe Pedro ritamadÿÿnyre. Rarybere: —Mynyike wahe. Jiarÿ hãbule watzireri. <sup>27</sup> Tahe rarybemy ralòmyhÿ, sòwemy wii ributunyreriò itxi reare. <sup>28</sup> Ta Pedro tamyreny rarybere: —Judeu mahãdu iny witxira mahãdu-wana wibutudÿÿòmy, iòhòmy wiribi riraòmy. Kia teerytenyte. Deuxu dori riwaerynadÿÿnyre kia wese aròhòtinkyre. Iny wiwese wiwesele raremy aròhòtinkyre. <sup>29</sup> Tahe tai waòrysomy teteònyteu, aòtaximy anademy wanohòti rÿire. Tai tahe adeereny arÿÿraxikre. Aòherekibo waòrysomy aòtaxina teteònyte. <sup>30</sup> Ta Oreniliu rirawyònyre: —Inaubiòwa txumy txu rÿire tahe hãbu tyky tÿrÿrÿhÿkÿ-di wako-txi rexitÿnyra. Iule wesemy tahe waheto-ki rexitòenywãhare. <sup>31</sup> Tahe wadee rarybera: —Oreniliu aexitòedÿÿna-ò Deuxu roholara, ijò-ò awahisina rieryra. <sup>32</sup> Biteònyke Jòpe hãwã-ò Simaò Pedro òrysomy. Simaò, iròdutyky iyxidÿÿdusÿ-ki ihÿre bera ijà iòhò-ki. <sup>33</sup> Aòwesele tahe, aòrysomy reteònyre. Awimy tahe tateriki rahara. Inyboho kakile ributunymy ihÿreny, aroholakemy ibutumy Deuxu-ribi aòmybo manarybekemy. <sup>34</sup> Tahe Pedro rarybere: —Deuxu dee iny ibutumy wiwese wiwesele rare. Kia reeryre. <sup>35</sup> Ibutumy bede bede hãwã ludu Deuxu rityhynykeki, aòbo tamy òbiti riwinykeki, tii Deuxu ixidee rimyke. <sup>36</sup> Kia rybe tahe Deuxu riwahinyre judeu mahãdu-ò. Rybewihikÿywina kia diwyde inydeereny be-deerynamy. Kia Jesuisi Kristumy rarybere ibutunyrÿna kia rare. <sup>37</sup> Joaò ijò ratysebenamy rarybere, idi tahe kia rybe hàletedÿÿmy rexidelenyre Kalileia-ki. Tahe ibutu judeu mahãdu bedemy rarybere. Kia kaiboho teerytenyte. <sup>38</sup> Iwese Deuxu Tyytybytyhy, taruru-wana Jesuisi Nazare ludu tyre-ki ditxiwide wesemy relyymyhÿre. Iwese Jesuisi reamy raremyhÿ wesemy aòwihikÿ riwinymyhÿremy, tule iny Diabo rururawo-ki ratxirerimy ihÿre Jesuisi iribi riteònyre, ta reteytenymyhÿre. Deuxu dori Jesuisi-wana ihÿre. Ibutumy kia teerytenyte. <sup>39</sup> Tahe ibutumy judeu mahãdu hãwã-ki riwinymyhÿre, idi itxeredumy inyboho roiremyhÿre. Ihãre tahe tii Jesuisi rirubunynyreny, òwòru itxeò nihikÿ-ki ritòhãletenymy ritamadÿÿnyreny. <sup>40</sup> Inataò txu-di tahe Deuxu rubu-ribi riixixanyre, tahe tii riteòsinyre inyò-ò. <sup>41</sup> Tatarasanaòòle Deuxu Jesuisi ritÿnydÿÿnyre. Kia heka inyboho roire tii-wana riroxirenyreki, riòrenyreki, iixixana hewomy. <sup>42</sup> Deuxu rarybere: —Jesuisi hitxidÿÿdu iny wiribi ywisijuradÿÿdu rareke, iru mahãdu dee, rubu mahãdu dee. Kiamy heka Deuxu iny-ò ritÿnytedÿÿmy, ta inyboho rokoirekemy diwahinyde. <sup>43</sup> Ibutumy iny Jesuisinimy tamy rityhynykeki, iòraru-ribi iny riixãwididÿÿnyke. Kia ibutumy ihetxiu rybedu mahãdu rÿimy rarybemy raremyhÿre. Kia heka Pedro tamyreny rarybere.

<sup>44</sup> Pedro rarybemy raremyhÿu, Deuxu Tyytybytyhy ibutu rybe-ò ijohonadu tyre-ki resemu ralore. <sup>45</sup> Pedro-wana rare mahãdu, judeu mahãdu òbiti, tahe riòtiinyre judeukòdu mahãdu-ki Deuxu Tyytybytyhy ralòmy rareki. <sup>46</sup> Raholare dori rybe witxira-di raryberenyreò, tiiboho Deuxumy heka reàlãmehÿre. Tahe Pedro tamyreny rarybere: <sup>47</sup> —Inyò rarybeòkre, iratysebedÿÿòmykemy, tiiboho dori Deuxu Tyytybytyhy-di ratxirenyre inyweserenyle. <sup>48</sup> Tahe Jesuisi Kristu nimy iratysebenyky riteònyre. Tahe rexitòenyrenyre Pedro idi iyreny-ki ijò txumy ramyhÿre.

## 11

<sup>1</sup> Judeukõdu mahãdu Deuxu rybe roholamy rityhynymyhÿre. Kia-ò tahe Jesuisi erydÿÿna mahãdu roholare kiamy ityhydÿÿdu seriõre mahãdu tule roholare. Judeia bedede ludu ratximyhÿ mahãdu ibutumy kia rare. <sup>2</sup> Pedro ixitire Jerusalẽ-ò rehemynyreu, tahe judeu ityhydÿÿdu mahãdu tuu tamy narybede. <sup>3</sup> Kia heka, Pedro, judeukõdu mahãdu-wana wiwo-ki atxiteri, tii-wana teroxiteri. Tai tahe ibinamy raharenyre. <sup>4</sup> Iribi tahe Pedro iko-reny relyyre ibutumy taaõna aõnamy. Kia wesemy Pedro rarybere: <sup>5</sup> — Jõpe hãwã-ki watxiwãhã. Tahe rabire rasinawesemy riã nihikÿ biu-ribi robehere-ò. Iwese inyõ iõhòti inaubiõwa-ki rimymyhÿre wesemy wadee robehemymy roimyhÿre. <sup>6</sup> Tahe aõbo heka iwo-ki ratximyhÿdi, rethenihikÿmy rãiwãhã irõdu deborehekÿ wesemy ratximyhÿ iwo-ki. Abòròrò wesemy tai ratximyhÿ, irõdu wese, nawii wese tai ratximyhÿ, inyboho rirÿsÿõmyhÿre wesemy. <sup>7</sup> Iribi raholare rybeõ-ò: —Myike, Pedro, birubunyke hewa aõtxile birubunyke tibo biròkemy. Aõkõrewa Wanyrÿ, tiu heka reròõwãhãre. Judeu mahãdu bedede ywina heka tiu iny kia riròõtyhy. <sup>8-9</sup> Tahe ixitire rybeõ tamy rarybere: —Marybeõke kia ibinamy. Aõbo Deuxu awimymy rarybere, kia wiji tahe ibinamy aõkõ rare. Deuxu dee awikeki, kia awi rare. <sup>10</sup> Inataõ heka tuu rotÿÿnyre. Iribi tahe kia riã, ibutu-wana iõre biuribihyy heka iõre. <sup>11</sup> Iribi tahe hãbu inataõ dehemynymy deade tai watxiwãhã-ò. Tii diwaòryde riwadykremy Sesaria hãwã-ò. <sup>12</sup> Tahe Deuxu Tyytybytyhy wadee rarybere tii-wana arakremy. Nohòtiõmy heka aõbo judeukõdu mahãdu raremy. Tii-wana makre ele ememy. Tahe kia debò sohoji reurò seriõremy wahemy rare. Tahe rethemynyreny wadrysymy riteõnyreny heto-ò tahe ralòreny Oreniliu heto-ò. <sup>13</sup> Iribi tahe Oreniliu rarybere iwese ÿju ihetowo-ki tamy rexitÿnynyremy rarybereri: —Oreniliu, inyõ biteõnyke Simaõ Pedro òrÿsymy Jõpe hãwã-ki. <sup>14</sup> Tii rybe tÿmyraõmy adeereny kanarybekre. Tai tahe ibutumy asÿ ijoi-wana aõraru-ribi kanatakre. Kia Oreniliu inydee rarybere. <sup>15</sup> Iribi tahe jiarÿ Rybewihikÿmy rexidelenymy rarybere tamy. Pedro rarybere. Urile tahe roholare, tahe aõwesele Deuxu Tyytybytyhy ityrereny resere iwo-ò ralòkemy iwese watyrereny resere wesele juhoo. <sup>16</sup> Tahe Jesuisi rybe wanohòti itxi reare tiubo raryberemy: —Joaõ heka inatyhymy bedi iny ratisebeny, kaiboho tahe Deuxu Tyytybytyhy-di akanasebedÿÿdenykre. <sup>17</sup> Judeukõdu mahãdu Inynyry Jesuisi Kristu rityhynymyhÿre. Tai Deuxu tamy diwahinyde iwese wadeereny juhu riwahinyre wesetyhyle. Deuxu Tyytybytyhy uriõno wesele tamyreny diwahinyde. Mobo jiarÿ raremy wahe tuu Deuxu dee aõmy ararybekemy. <sup>18</sup> Iribi Pedro rybe-ò roholareu tahe timyhe tamy irybekõna. Tule Deuxu riwowydynyreny: —Inatyhy wa rare Deuxu heka judeukõdu mahãdu-ò heka umytuedeõna riwahinyre. Inyõ rityhynykeki, ixirahikeki, tarasana rimyrenykre.

<sup>19</sup> Iu tahe Estevaõ rurureu, ityhydÿÿdu aõhòkÿmy rotÿÿnyreu tahe, ityhydÿÿdu mahãdu Jerusalẽ-ribi ròhõnyre. Tii heka relyymyhÿre Rybewihikÿmy judeu mahãduòle kÿny wahe, iwitxira witxira-ò aõkõre. Tahe ibutu bedede-ò ritelenymy ròirenyre. Senisia-ki relyyre. Xibri bedebute-ki tule relyyre, Atxiòkia hãwã-ki tule relyyre. <sup>20</sup> Ijõ ityhydÿÿdu mahãdu Jesuisi Rybewihikÿ tÿmyra rarybere. Tiiboho Xibri bedebute-ribi ròhõnyre, Sireni-ribi ijõ rybedu ròhõnyre Atxiòkia-ò. Tiiboho relyyre judeukõdu mahãdu-ò tule. <sup>21</sup> Deuxu riwiòhenanyre sòwemy iny rityhynyre, Jesuisi ryò ralòreny. <sup>22</sup> Jerusalẽ ityhydÿÿdu mahãdu kiamy roholare. Tai tahe Banabe riteõnyreny Atxiòkia-ò. <sup>23</sup> Banabe rehemynyreu tahe, tuu robire aõbo Deuxu kowa riwinyrerimy. Tai tahe reysare. Tahe ityhydÿÿdu tÿmyra-ò dohodÿÿmy, riwiòhenanykremy:

—Iòhòtyhymy Deuxu-ribi atximahābenyke, aworibityhy Deuxu bityhyny-benyke. <sup>24</sup> Banabe heka hābu wihikÿ rare. Tÿxihikÿlemy Deuxu Tyytybytyhy-di ratximyhÿre. Ibutumy ratximyhÿre tyhydÿÿna-di. Sōwemy iny rexiròtenyrene Inynyrÿ mahādu-ò. <sup>25</sup> Idi tahe Banabe rare Tarso hāwā-ò Salu ijesemy. <sup>26</sup> Tai rahareu tahe, didymyhe dōōsemy nade Atxiòkia-ò. Sohoji beòramy idi bede rierenyrene. Sōwemy iny ribedeerynymyhÿrenyrene. Atxiòkia hāwā-ki ityhydÿÿdu mahādumy raninira Kristu wese mahādumy. Kiani tamyreny riwahinyrene.

<sup>27</sup> Aōutxu tahe dehemynyde Deuxu rybedu mahāduō Jerusalē-ribi Atxiòkia-ò. <sup>28</sup> Ijō Abusi inire. Iribi tahe tii rarybere Deuxu Tyytybytyhy rybemy. Ramamy rubu nihikÿ kanakremy raxireri, ibutu suò. Lauju iòlòmymy raremyhÿu, kiamy rotÿÿmyhÿre. <sup>29</sup> Tai tahe ityhydÿÿdu mahādu he nieru riwahinykremy rÿire Judeia bede sÿdu ityhydÿÿdu riwiòhenanykremy. Tahe nieru riwahinyrene tiwesebo idi ratximyhÿre wesemy tamy riwahinyrene. <sup>30</sup> Tahe nieru riteònyrene, moma-wana Banabe Salu-wana Jerusalē dohodÿÿna heto matuari mahādu-ò riwyrene.

## 12

<sup>1</sup> Kia bededÿÿnanamy heka Herodi judeu iòlòmymy raremyhÿ. Iribi tahe rexidelenymy riwinyrene heka ityhydÿÿdu mahādu kia òludumy risÿnykre myhÿ. Tii riteònyrene aōna aōnamy risÿnykemymy ityhydÿÿdu mahādu-ò. <sup>2</sup> Tii mayrehe-di rubudÿÿmymy riteònyrene Joaō seriòre wahe, Txiau wahe. <sup>3</sup> Tai tahe judeu wedu mahādu heka tamy wihikÿlemy tuu rotÿÿnyrene. Herodi rierymy raremyhÿ idi Pedro rimyrene. Tahe worana bedehesi rÿire. Paō taurina ihoō inire. Kia ibutumy rotÿÿnyrene kia bedehesi rÿireu. <sup>4</sup> Tahe Pedro riròtenyrene, ròtenawomy wirutyrene. Aōmamy soldado mahādu inaubiòwamy iitxeredumy rÿimyhÿre. Pascoa kia worana bedehesi konana txu rexihumy rÿireu tahe, judeu mahādu-ò riwahinykre. Kia Herodi rexinohòtidÿÿnyrene. <sup>5</sup> Ròtenawo-ki tahe Pedro ratximyhÿre. Ityhydÿÿdu mahādu tahe Deuxu-ò rexitòenyhyymyhÿre Pedro tòenamy. <sup>6</sup> Txubiòwamy tahe itxu riywinyrenyrene iny sōwehekÿ-ò Pedro riwahinykemymy. Kiamy Herodi rōhòtinyrene. Ruu tahe Pedro rōrōmymy roimyhÿ. Inatxi soldado heka idile ratximyhÿre. Pedro womati reroti inatxi-di ratisamymy roimyhÿre. Ijō soldado rotēna ijò-ki ratximyhÿre. <sup>7</sup> Inynyrÿ ÿju heka Pedro weribi rihetenyrene riixixanykemymy. Loosòna itÿnyhÿkÿlemy ròtena ritoosònyrene. Tamy rarybere: —Wylemy wa rexiukÿnyke. Tahe aōwesele Pedro axiò-ribi womati rerotihikÿ rejuxunyrene. <sup>8</sup> Tahe ÿju tamy rarybere: —Awamy birutyke, bexityynyke. Kiamy riwinyra. Ijō arahana birutyke tahe biwaheludunyke. <sup>9</sup> Iribi ròhònyra he tai rōrōreri-ribi wahe. Kia ibutumy heka rasi weselemy Pedro rōhòtinyrene rieryòre inatyhy aōbo ada rasi aōbo. <sup>10</sup> Juhu heka ikoludu soldado mahādumy reare idi ihewoludumy reare iribi rehemynymymy rÿire ahana ijòtyhy-ò. Womatilere heka iijòtòbònare. Ixiwanale heka rarayre ijòtòbòna. Iribi tahe roirenyrene hāwāry-di ririranyrenyrene. Idi tahe ÿjuhe iòre iribi. <sup>11</sup> Tahe Pedro rōhòtinyrene, rieryrene heka aōhebo rotÿÿnyraò. Wanyrÿ ÿju riteònyrene riwatara Herodi-ribi judeu mahādu-ribi. Katahe wadee aōhe rotÿÿnyrenyòtyhy. <sup>12</sup> Rōhòtinymymy rÿire juhū urihimyò idi tahe rare Marie heto-ò. Joaō Markuse heka tii rare. Tai ityhydÿÿdu mahādu rÿimyhÿ tahe rexitòenyreniò Pedro tamy rehemynyrene. <sup>13</sup> Tahe ijò he rihetenyrene. Ijòtòbòna-ò nade mobo raremy rierykemymy ijadòma deòdu. Rode inire. <sup>14</sup> Tahe Pedro rybe rieryra. Reysamymy rajjaranyrene iwo-ò. Pedro tahe ralòòlemy rÿire. Tahe relyyrene Pedro heto ijò-ki rÿimyhÿmymy. <sup>15</sup> Tiiboho raryberenyrene: —Kai tabinamymy atxiteri. Ixityrene rarybere: —Aōkōre tii taile naderi. Tahe raryberenyrene:

—Pedro aõkõ rare, taÿjulemy tahe rare. <sup>16</sup> Tahe Pedro riheterihetenymy rÿimyhÿre. Idi riraynyrenyreny. Pedromy robirenyrau, bede riòtiinyrenyreny. <sup>17</sup> Pedro tahe tamyreny tebò reara roholarenkykemy. Tahe tamyreny relyyreny timybo Inynyrÿ ròtena-ribi rexiòlòdÿÿnyramy. Tule tamy riteònyre: —Kiamy belyyke Txiau-ò tule inyseriòre-ò. Tahe rexitare, rare ijòsÿ-ò.

<sup>18</sup> Txuu ratÿnyreu, soldado mahãdu ierysomy wii risÿnyre timybo Pedro aõhebo rotÿÿnyramy. Tahe jei jei aõnire. <sup>19</sup> Herodi iijesemy riteònyre tai moõ tai rahaõhylera. Tai soldado itxeredu sohoji sohoji dÿÿraximy riteònyra. Idi irubudÿÿmy riteònyra. Iribi tahe Herodi Judeia bede-ribi ròhònyra. Sesaria hãwã-ò bededÿÿnanaõ riwya.

<sup>20</sup> Tiro hãwã mahãdu Sidoma beà hãwã mahãdu-wana Herodi derarennyre. Tahe tiiboho ributunynyrenyreny tamy ròirenykemy rybe-di. Iòlò heto-di itxeredu Blastu inire. Tahe iny mahãdu Blastu ròtarennyre iwe-ribi mahãdureny. Tahe ròirenyre Herodi-ò tamy rexitòenyrenyreny, tamy ykaraõmykemy. Tarÿsÿna dori diwyde iòlò bede-ribi, Herodi bede-ribi. <sup>21</sup> Herodi tahe itxu riywinyre. Kia txuu tahe ròhònyre tamy. Rexityynyre taiòlòtÿyrehe-di tahe tarynana tyre-ò ronyre, tamy Rybewihikÿmy rarybere. Tai tahe iny rirajuare: —Katahe hãbu aõkõ rarybereri, Deuxu wahe. <sup>22-23</sup> Aõwesele Deuxu ÿju heka Herodi rirubunynyre, tii Deuxutyhymy reàlòreki. Woudò rubudÿÿnamy rurure.

<sup>24</sup> Deuxu rybe tahe ibutumy roholare. Sõwemy iny tahe rityhynyre.

<sup>25</sup> Banabe Salu-wana nieru riwahinymy rahudi tahe, diòòsede Jerusalẽ-ribi Atxiòkia-ò. Joaõ Marku tii-wana ridyre.

## 13

<sup>1</sup> Atxiòkia dohodÿÿna heto mahãdu-ki rybe tÿnydÿÿdu mahãduõ, bede erydÿÿdu mahãduõ rÿimyhÿre. Kaheka inireny rare: Banabe, Simaõ, iniraròsòna Nike rare. Lusu ijõre, tii Sireni hãwã ludu rare. Manaï ijõre, tii Herodisÿ-ki ratibienyreny, Salu ijõre. <sup>2</sup> Ibutumy tahe Inynyrÿmy reàlãre, riroxiòhy heka bede riemyhÿ. Tahe Deuxu Tÿtybytyhy tamyreny rarybere: —Jiarÿ waaõmysÿdÿÿna dire Banabe-ò, Salu-ò. Kaiboho heka biteònybenykre kia riwinykemy. <sup>3</sup> Tahe roxiòhyymy bede riemy, rexitòenyrenyreny. Tebòreny iratytyre ritidirenymy, idi riteònyrenyreny tabede tÿina-ò.

<sup>4</sup> Deuxu Tÿtybytyhy tahe tiiboho riteònyrenyreny. Selusia hãwã-ò tamy riberenyrenyreny. Tahe hãwòõ rimyrenyreny Xibri bedebute-ò. <sup>5</sup> Tahe rehemynyrenyreny Salamina hãwã-ò. Tai judeu dohodÿÿna heto-ki Deuxu rybemy raryberenyreny. Tule Juaõ Marku rare tii-wana wiòhedÿÿdu wese heka rare. <sup>6</sup> Tahe ibutumy bedebutemy rekoarennyre. Ritehemynyrenyreny hãwã-ò Pa-fumy ninadu-ò. Tai tahe judeu mahãdu witxi deade, Bajesuisi heka inire. <sup>7</sup> Tii Deuxu rybeduõmy raremyhÿmy iximy rarybere tahe aõkõre, raruire, riitxenanyreny. Tii bedebute hãwã dinodu-wana rare. Kadinoduni tahe Sergio-Paulo inire. Tii hãbu bedeery nihikÿ rare. Tii Deuxu rybe-ò roholakemy ratxireri. Tahe didyde Salu, Banabe-wana tamy roholakemy. <sup>8</sup> Bajesuisi, Elimasi ijõ ini rare. Tahe tii bedebute dinodu-ò rarybere uritere Salu rybe-ò, Banabe rybe-ò ijohonakõmykemy. Wanyrÿ tyhydÿÿkõmykemy dori tuu risÿnyre. <sup>9</sup> Salu tahe, Paulo ijõ ini rare. Deuxu Tÿtybytyhy heka itykymy ralòmy rÿimyhÿre. Tahe Paulo retehere Elimasi-ò tamy rarybere: <sup>10</sup> —Kai Satanasi riòre tate. Kai heka ibutu itxenadÿÿ-di tÿxihikÿlemy ahãte. Kai heka awihikÿ òludu tate. Tiubo heka bexihukre Inynyrÿ-ribi iny riixãwididÿÿnyre. <sup>11</sup> Deuxu heka wiji araòwynykre, aõhòkÿmy arasÿnykre, aruetãmy bonykre. Txu bobiòkre bede biwyke. Iule tahe aõwesele bede torohokÿlemy reare. Robiòhyymy reare. Urile riemy ratximyhÿre, iny riwiòhenanykemy, ryy tamy ritÿnynykemy. <sup>12</sup> Tahe

kia bedebute dinodu tuu robire aõhebo rotÿÿnyramy, tai bede riòtiinymy rononymhÿ tahe tii Inynyrÿ rityhynyre.

<sup>13</sup> Iribi tahe Paulo ròhònryra taijoi-wana Pafu hãwã-ribi. Rakremy riberenyra hãwã nihikÿ-ki Panfilia bede-ò, Peke hãwã-ò. Juaõ Marku iribireny rexitara, dòòsede Jerusalẽ-ò. <sup>14</sup> Tahe Paulo Banabe-wana roirenyre. Peke-ribi riòlònryre tahe rekoarenryre Atxiòkia-ò. Kaa iwitxira Atxiòkia hãwã rare, Pisidia bede-ki ratxireri. Tahe rirònryrenryre judeu mahãdu dohodÿÿna heto-ò. Sabado txu rÿire. Rononymhÿre ijohonamy. <sup>15</sup> Kia hãbu mahãdu heka Moisesi bede ywina tyyriti-di, Deuxu rybemy rybedu mahãdu tyyriti-di rariamyhÿre. Tahe dohodÿÿna heto wedu Pauloboho-ò raryberenykemy rarybere: —Waseriòre, arybemy idi atxiteri-wana marybeke aõwaxiny bitÿnyke. <sup>16</sup> Tahe Paulo rÿire lamamy. Iwese rybedÿÿmy ròteòsidÿÿmyhÿre wese rÿire. Tahe rexidelenryre: —Hãbu, Israeli mahãdu, tule ibutummy Deuxu rityhynymy rÿira mahãdu, bodoholabedenyke kaa ijyy-ò. <sup>17</sup> Israeli mahãdu Egito-ki rasÿnyreu, taDeuxu iribi ritare, moma, inytybyreny Deuxu, Israeli mahãdu tybyreny wahe. Deuxu rasõwedÿÿnyre. Iribi tahe Deuxu Egito-ribi ritarenryre tebò ruruteretyhy-di. <sup>18</sup> Tiiboho bederahy-ki 40 beòramy bede riereu, Deuxu taaõbina bina riòludunryre. <sup>19</sup> Kanaã bede-ki debò inatxi reuròm y ixÿju ixÿju mahãdumy rahure. Idi tamyreny riwahynyre bede, isÿhyymy rarekemy. Idi tahe rybe ywisidÿÿdu mahãdu tamy riwahynyre. 450 beòra rahureu, tahe Samueli Deuxu rybeduõmy raremyhÿ. <sup>20</sup> Idi tahe rybe ywisidÿÿdu mahãdu tamy riwahynyre. Tahe 450 beòra rahureu, Samueli Deuxu rybeduõmy raremyhÿ. <sup>21</sup> Iribi iny Deuxu-ò rexitòdenryre iòlòm y tamy kadiwahinykemy. Tahe Deuxu Salu tamy riwahynyre, iòlòm y. Salu tahe Kixi riòre rare. Benjami mahãdu rare. Tahe 40 beòramy iòlòm y ronyre. <sup>22</sup> Salu iribi ritareu, tahe Davi, Deuxu ritamadÿÿnyre iòlòm y. Deuxu Davimy rarybere: —Davi Ijese riòre rare. Jiarÿ iluure. Tii ibutu wadee wimy riwinykre. <sup>23</sup> Tahe Davi riòkòre-ribi Jesuisi ròhònryre, Israeli tarasadumy rarekemy. Iwese juhoo Deuxu rarybere wese. <sup>24</sup> Jesuisi naõdeu, Juaõ ritÿnynyre Israeli mahãdu-ò iòrarureny ririkemy idi raratisebenykemy. <sup>25</sup> Juaõ rybe tÿnydÿÿna kònana, tamyreny rarebere: —Jiarÿ wa iwese tahòtynytenyteri wese aõkõ jiarÿ rare. Kaiboho tiwaraòõhyymahãtenynte. Betehebenyke, tii, wahewomy kanakre. Jiarÿ aõ aõkõ rare, iwatisana arieseòtyhy iwa ritakemy, tii dori waratyre wihikÿreki. <sup>26</sup> Waseriòreboho, Abraõ riòre riòremy ibutummy inyboho roire, tule Deuxu reàlòm y rÿira mahãdu kaki ratximyhÿ. Deuxu inydeereny biu-ò hedu rybe diwahinyde. <sup>27</sup> Jerusalẽ mahãdu, iwedureny-wana raeryòhyre tii tarasadu rare. Ibutummy sabado txu rybedu tyyriti-di rariamyhÿre tohodÿÿna heto-ki, tahe aõbo rare rieryòhyre. Jesuisi rubudÿÿmy raryberenyreu, iwese rybeduõ rarybere wese, tiiboho rotÿÿnymyhÿre. <sup>28</sup> Tiiboho aõbina bina-ki tai rahaõhyra, ihãrele irubudÿÿmy rexitòdenryre Pilato-ò. <sup>29</sup> Iwese ibutummy Jesuisimy riritinymy roireri wese, ibutummy tuu ròhònryre. Tahe itxeò nihikÿ tyre-ribi ritarenryre. Tahe mana hãloo rawo-ò ritidirenryre. <sup>30</sup> Tahe Deuxu rubu-ribi riixixadÿÿnyre. <sup>31</sup> Tii-wana iny mahãduõ roirenyre juhoo Kalileia-ribi Jerusalẽ-ò. Rexixamy rahudi tahe, tii mahãdule tuu robihyymy txuu widireny rÿire. Kia mahãdule inysõwey-ki relyymyhÿre. <sup>32-33</sup> Deuxu juhoo rarybere inytybyreny-ò aõhebo rotÿÿnykremy. Inydeereny tahe tii riwinyre Jesuisi riixixanyreki. Kia Rybewihikÿmy adeereny relyymahãrenryre. Iwese inatxi wiuna ritidÿÿna-ki roire wese:

—Kai waRiòre tate. Wiji tahe bomy watxiwãhãre.

<sup>34</sup> Kiamy heka Deuxu rarybere Jesuisimy: —Rubu-ribi ariixixanykemy, tii rasunymyhÿre bede-ò ròòseòtyhy. Iwese Davi-ò jiarÿ rarybere wesemy ibu-

tumy adee bede ariywinykre. <sup>35</sup> Deuxu ijõ wiuna Ritidÿÿna-ki tule rarybere. Iwese Jesusile rarybere wese, kiamy roire:

—Eòdutyhy umy rasÿnyõtyhy kai dori waumysudÿÿ-ò teijemahãte.

<sup>36</sup> Iu Davi Deuxu dee taijoi riwiòhenanymy rahudi tahe, rurure. Tybyreny-ò tii rara. Iumy tahe rasunyre. <sup>37</sup> Jesuisi umy tahe rasunyõre Deuxu dori rubu-ribi riixiadÿÿnyreki. <sup>38-39</sup> Jesuisi bityhynybenykeki, aòraru riixãwidinyke. Kiamy Moisesi bede ywina ihoõhyyre adeereny. Kia bierybenyke waseriòreboho, tiile, Jesuisi, adeereny relyywãhãreny. <sup>40</sup> Bexiijebenyke, kiamy adeereny rotÿÿnyke lau iwese rybedu ritina-ki roire wese:

<sup>41</sup> —Kaiboho inatyhy derare. Betehebennyke, burubennyke, bede biòtiinybenyke, aõbo jiarÿ rewinyreriò. Inyõ adeereny ritÿnykyke ihãrele. Tiu heka bityhynybenyõtyhy.

<sup>42</sup> Tahe Paulo irybe rexihura. Iribi ròhònyre Banabe-wana. Rexitòenyrenyre ijõ sabado biòwau tarybetybydile ixbyyle relyykemy. <sup>43</sup> Iny ritobinymy rahudi, judeu mahãduõ, judeu bede erydÿÿna ityhydÿÿdu mahãduõ tule Banabe Paulo-wana riheludunyre. Tahe tamyreny raryberenyre: —Deuxu ruxetòena-ki idi mariahyymyhÿkemy.

<sup>44</sup> Ijõ sabado rehemynyreu, ibutu iny hãwã-ribi doimyhÿdenyde Deuxu rybe-ò ijohonamy. <sup>45</sup> Judeu mahãdu tahe inysòwemy robireu, tiiboho rexiwaritinyimyhÿreny. Tiiboho raryberenyre aõbinahãkÿlemy Deuxuru-ò. Paulo riki inatyhymy aõkõ tii rarybemyhÿre. <sup>46</sup> Paulo Banabe-wana ihãrele brebuõlemy raryberenyre: —Juhuu adeereny Deuxu rybe dobehede. Tahe kaiboho tetyhynyõteny, tai judeukõdu mahãdu-ò aroirenykre. Kaiboho Deuxu rybe terarenyreki, ixi sohojile tahe tetaõte adeereny aõ aõkõreki.

<sup>47</sup> Kia Inynyrÿ bede ywina wadeereny riwahinyre: —Kai loosòna wesemy atxikre judeukõdu mahãdu-ò. Kai tarasanary ritÿnykykre ibutu inyko-ò.

<sup>48</sup> Judeukõdu mahãdu kia-ò roholareu, tahe reysarenyre. Deuxu rybe riwowydynyrenyre tai. Tahe rityhynyre, timybo Deuxu juhUU ritare wesele tamyreny umytuedeõna riwahinyremy. <sup>49</sup> Inynyrÿ rybemy kia bede-ki ibutumy relyyre. <sup>50</sup> Tahe judeu mahãdu rarybere hãwyywihikÿ ityhy-ò, tule hãwã wedu-ò. Tai tahe Paulo Banabe-ò òludu sòwemy resere. Tahe isubede-ribi riteònyrenyre. <sup>51</sup> Paulo Banabe-wana tawa-ribi bryby riòhòwirenyre tamyreny tiiboho ibinareki. Tahe Ionio hãwã-ò roirenyre. <sup>52</sup> Atxiòkia ityhydÿÿdu mahãdu tahe reysamy rÿimyhÿre. Deuxu Tyytybytyhy-di tÿximy ihÿre.

## 14

<sup>1</sup> Ionio hãwã-ò Paulo Banabe-wana rare. Judeu mahãdu dohodÿÿna heto-ò. Tahe rybe ritÿnyrenyre, tarurumy he relyyrenyre. Sòwemy judeu mahãdu, judeukõdu mahãdu-wana rityhynyrenyre ijyy. <sup>2</sup> Tahe ijõ judeu mahãduõ rityhynyõre. Ijyy deramy reamyhÿre, tule ijõ-ò tule rarybere ityhynyòkemy. Tahe Paulomy, Banabemy aõ òta òtalemy rarybemyhÿrenyre. <sup>3</sup> Ihãrele tahe Paulo Banabe-wana bede nihikÿ riwyrenyre tai. Tamy rybe ritÿnyhy roiremyhÿ ibrebuõlemy. Inynyrÿ taruxetòena rybetyhydÿÿnamy riwiòhenanyre tiiboho bedebyna widÿÿdu renyreki. <sup>4</sup> Hãwã mahãdu ritxuare. Ijõ heka judeu wedu mahãdu rityhynymyhÿre, ijõ tahe Paulo Banabeboho rityhynymyhÿre. <sup>5</sup> Judeukõdu mahãdu, judeu mahãdu, tawedureny-wana widee rarybere Paulo Banabe-wana riòkòròrenykemy tamy mana-di rehurenkykemy. <sup>6</sup> Tahe tiiboho rexieryrenyre tahe rihenyrenyre. Tahe ròirenyre Listra hãwã-ò, Debi hãwã-ò, kia Laonia hãwã hãwã-ò rare. Tule rariarenyre kowa bedewo-ki. <sup>7</sup> Tahe kowa tiemy ritÿnyhy roiremyhÿ Rybe tÿmyra wihikÿ-di.



<sup>8</sup> Listra hãwã-ki heka hãbuõ-txi rekoarenyre, itierere heka. Taihy heka ronymhÿre. Tuuhyy heka ratohouãmy ijarananyre. <sup>9</sup> Tii tahe Paulo rybe-ò roholare. Paulo tamy retehere. Kia tahe Paulo rieryre hãbu teytetyhynadire Paulo riteytenykremy. <sup>10</sup> Tai tahe tamy rarybere tarybe riterenymy: —Mynyike, òbitimy. Ta hãbu rexiwatxinyre, rariare. <sup>11</sup> Ijohona mahãdumy robireu, aõbo Paulo riwinyremy tahe rirajuare tarybe-di, Laonia rybe-di: —Ka hãbu mahãdu heka deuxu wesemy idi rexinohõtídyÿnymhÿre. Inydeereny deuxu wesemy dobehede. Iumyreny tahe hãbu wesemy rare. <sup>12</sup> Banabe heka, Jupitemy tadeuxurenyniõmy rininire. Paulo tahe ijõniny, Meuriumy rininirenyre irybe sõwetyhyreki, tii rybedureki. <sup>13</sup> Jupite xi-wena wydydu horeru bederade-di dehemynde. Tohodÿÿna heto hãwã ahana ube-ki rÿire. Broreni xiwe wesena tamyreny hãwã mahãdu ri-woronykemy, riwahinykemy. <sup>14</sup> Kiamy roholareu, Paulo Banabe-wana tatykyreny riykaranyre idi rihurenyre. Tahe ralòmý reare inysõwey-txi rarybekemy. <sup>15</sup> Tamy rryre: —Aõhebo tatÿÿnytenyteri. Jiarÿboho hãbulemy watxirenyreri. Kialemy adeereny rarybewãhãre, Deuxu rybetÿmyra wihikÿ. Adeuxurený-di nohõtirenyõmy. Bedewidÿÿdu ta mohõtinybenyke. Tii dori benihikÿ riwinyre, ibutumy biu-ki riwinyre, tahe Deuxutyhy-di mohõtinybenyke. <sup>16</sup> Ihetxiu Deuxu ibutumy bede bedemy sÿdu ririre ixidee wimý aõna aõnamy rotÿÿnykemy. <sup>17</sup> Urile tahe tamy rexideòsinyre tamy biu riwahinyre taoworumy raratynkemy. Tai tahe kaiboho arÿsÿna dire, Deuxu debò-ribi, awo-ki eysanadire. <sup>18</sup> Ihãrele iny tamy xiwe wesena tamy riwahinykemy ratxireri. Paulo tamyreny rarybere: —Aõkõ, inydeereny bidiwahinyõke.

<sup>19</sup> Iribi tahe judeu mahãdu-ò Atxiòkia-ribi, Ionio-ribi tamyreny raryberenyre Paulo rubudÿÿmy. Hãwã òtityube-ò Paulo ridyrenyre. Mana-di tamy rehumyhy. Tahe rubu wesemy ririrenyre. <sup>20</sup> Idi tahe ityhydÿÿduõ tamy wirotyre. Paulo tahe suribi rÿire tahe tii-wana nalòde hãwã-ò. Ijõtxu biòwamy tahe Banabe-wana Paulo rexitare ijõ hãwã-ò, Debi hãwã-ò. <sup>21</sup> Ka hãwã-ki tahe Paulo rybe tÿmyra wihikÿ ritÿÿnyre. Sõwemy tai rityhynyreu, Pauloboho ròðserenyre Listra hãwã-ò, Ionio hãwã-ò, Atxiòkia-ò. <sup>22</sup> Ibutumy hãwã-ki Pauloboho ityhydÿÿdu mahãdu riwiòhenanyrenyre, tiiboho rityhynyhyymy ratximyhÿkemy. Tamyreny rarybere: —Kaiboho aõhõkÿmy botÿÿnybenyke, ihãrele malòkemy titxibo Deuxu Iòlò ratximyhÿre-ò. <sup>23</sup> Ibutu ityhydÿÿdu mahãduy ribi ritamy rÿimyhÿ rarekremy, idinodumy. Matuari mahãdu-ribi tii ritare. Iu ritareu tahe, rexitòenyre Deuxu-ò tule byreõhy txuõ riwyrenyre. Inynyrÿ-ò rexitòenyre: —Kia ibutumy aratyhynreri, tai tahe biywinymy ahãke. <sup>24-25</sup> Pisidia bede-ki rekoamyhÿrenyre Panfilia bede-ò. Kowa-ò Rybewihikÿ tÿmyramy relyymy rahudi Peke-ki, Atalia hãwã-ò dobehede. <sup>26</sup> Tai hãwò nihikÿ welòdi-di rimyrenyre. Tahe Atxiòkia-ò rorore. Kowa-ribi juhuule rybe tÿmyra wihikÿ ijyy-di dòhònyde. Kowa juhuu rexitòenyre tamyreny Deuxu ruxetòena-wana rarekemy. <sup>27</sup> Atxiòkia-ò rehemynyreu, Paulo, ibutumy ityhydÿÿdu mahãdu ditotynyde. Tai heka tamyreny rarybere iwese Deuxu riwiòhenanyre wese ibutumy iaõmydÿÿnana-di. Iwese judeukõdu mahãdu rityhynykemy. Deuxu tamy ityhyna ijòtòbòna riraynyre wese. <sup>28</sup> Idi bededÿÿnana riwynihikÿre ityhydÿÿdu mahãdu-wana.

## 15

<sup>1</sup> Hãbuõ Judeia mahãduõ ditehemynydenyde ta teòsamy ribedeerynyrenyre. Kawese ribedeerynyre: —Moisesi Tyyriti bede ywina, notykyresynamy, rityhynyõkeki, iny rataõtyhy. <sup>2</sup> Iribi tahe Paulo

Banabe-wana tamyreny rarybehyy rare. Tai tahe inyõ tamy rarybere Jerusalẽ matuari mahãdu-ò roirenykemy aõmydÿÿnana rexiòbitinyrenykeny. Iny wixira-ò Jesuisi erydÿÿna mahãdu-ò rarybekemy heka tamy, Pauloboho iteòdÿÿmy rarybere. Tahe ijõ hãbu mahãduõ tule tiiboho-wana riteònyrenyreny.<sup>3</sup> Dÿÿraximy heka tamy ròirenyreny, aõ aõmydÿÿnabo ratxirerímý wahe. Sõwemy dohodÿÿna mahãdu ihemy roirenyreny urihimýò, tai tahe ririrenyreny. Tahe Senisia bedede bedemy, Samaria bedede bedemy riòhòrenyreny. Relyyreny judeukõdu mahãdu tule ityhydÿÿdu mahãdu-ki rÿirerimý. Tai ibutumy ityhydÿÿdu mahãdu reysare.<sup>4</sup> Tahe ritehemynyrenyreny Jerusalẽ-ò. Wihe ritotynyrenyreny ityhydÿÿdu dinodu-wana, tule matuari mahãdu-wana, Jesuisi erydÿÿdu mahãdu-wana. Tiiboho relyyrenyreny aõmybo Deuxu rotÿÿnyreny iyreny-ki, timybo riwiòhenanyré.<sup>5</sup> Tahe hãbu mahãduõ tai raremyhÿ heka. Juhuu heka fariseu mahãdumy ihÿre, idi tahe ityhydÿÿdumy ralore. Imahãdu-ribi ijõ rÿire ribedeerynykemy. Tahe rarybere: —Inydeereny kia wese rare. Judeukõdu tyhydÿÿdu ibutumy notyyresyna-di ròhònyke. Tule ibutumy Moisesi bedede ywina ibutumy rityhynykeny. Kawesemy tamy ribedeerynyreny òbitimý aõkõ watzireri.

<sup>6</sup> Idi tahe Jesuisi erydÿÿna, matuari mahãdu-wana wii ributumyreny rybe òbitidÿÿmy.<sup>7</sup> Rybe sõwemy rahude tahe, Pedro rÿire tamyreny rarybekemy: —Waseriòreboho, Deuxu juhu riwatare Rybewihikÿ rybedumy judeukõdu mahãdu-ò tuu aritÿnynykemy, tiiboho tule rityhynyrenykeny. Tai rarewãhã. Kaiboho kia ibutumy teerytenyte.<sup>8</sup> Iwese inydeereny riwahinyreny wese, Deuxu Tyytybytyhy tamyreny tule riwahinyreny. Judeukõdu mahãduõ tule ixidee rimykemy. Kia wese tuu riteòsinyreny inydeereny.<sup>9</sup> Deuxu wiribi lahiximý aõkõ iny riwinyrenyreny. Wiwesehyyle ihÿre. Tiiboho inywesele ihÿrenyreny. Tiiboho rityhynyrenyreny, heka irayky rityranyrenykeny ritarenyke.<sup>10</sup> Kia wese Deuxu teurihitenyteri. Kia bedede ywina itxyynautxiehekÿ wesere ityhydÿÿdu mahãdu tyre-ki tetiditenyteri. Inytybyreny tiu retyyõre tule inyboho idi retyyõre.<sup>11</sup> Inynyrÿ, ruxetòenale-di iny ritamyhÿre. Tule judeukõdu mahãdu kia weselere ritamyhÿre.

<sup>12</sup> Tahe aõmy rarybeòhyrenyreny. Ibutumy he Paulo Banabeboho rarybereò, roholarenyreny. Tiiboho heka relyyrenyreny tule bededeòby wihikÿ aõna aõna-wana Deuxu riwinyreny tadebò-di wahe.<sup>13-14</sup> Iribi tahe rexihurenireu tasÿ, Txiau rÿire rarybekemy: —Waseriòreboho, bodoholabedenykre inihe warybe-ò: —Pedro kÿny adeereny rarybere, timybo Deuxu judeukõdu mahãdu roramy rare iny mahãduõ ixidee ritakemy tanityhy-ò.<sup>15</sup> Kiawesemy he tule ihetxiu Deuxu rybemy rybedu mahãdu riritinyreny, kamy wahe:<sup>16</sup> —Wanyrÿ heka rarybera: —Adòòsekre, ixyby ariwinyreny aritamadÿÿnykre aõdohodÿÿna heto Davi juhUU riwinyreny. Idi tahe resere. Ixyby ariwinykre.<sup>17</sup> Tai tahe judeukõdu mahãdu-ribi iuhe riwaòrykre wamy rityhynykeny. Wanyrÿ, Deuxu, kiamy heka tiiboho rarybekre, ibutumy jiarÿ retarenyreki.<sup>18</sup> Kawesemy Wanyrÿ tuhyy rarybemy raremyhÿ, tule wiji ihÿre.<sup>19</sup> Tai heka kiawidÿÿõmy rakatximyhÿrenykre. Tamyreny rybeõmy rakatximyhÿrenyke. Judeukõdu mahãdu Deuxumy rityhynyrenyreny, iny bedede ywina reny tyhydÿÿmy tamyreny rybeõmy.<sup>20</sup> Kialemy heka tamyreny rakaryberenykre: Suritxoo xiwe-ribi iròdude ròrenyõmy. Tule òta òta òraruna widÿÿõmy, iròdu hãlubu-di ròrenyõmy, ihãlubu rejuxunyõmyhÿre-wana.<sup>21</sup> Kiamy heka rakatximyhÿrenyke. Moisesi bedede ywina-di dori ibutu hãwã-ki judeu dohodÿÿna heto-ki rariamy raremyhÿ. Sabadotxu ihyymy aõkõ kia ritÿnynymy raremyhÿ.

<sup>22</sup> Tahe kiamy heka rahòtinyrenyreny, Jesuisi erydÿÿna mahãdu, ibutumy

dohodÿÿna mahãdu-wana, hãbuõ ayreny-ribi rikitakre. Tai Atxiòkia-ò riteònyrenykemy Paulo Banabe-wana. Tahe Judasi ritarenyre tule iniòrysna Basaba rare. Ijõ tasÿ Sila inire. Ka hãbuboho ityhydÿÿdu mahãdu awimy tai raharenyre. <sup>23</sup> Katyyriti tiiboho-wana rakre. Kawesemy tyyriti rare: —Jiarÿboho, erydÿÿna, matuari, seriòre mahãdu adeereny rybe wehityhyna rewahinyreri. Ibutumy judeukõdu mahãdu ityhydÿÿdu-ò ka tyyriti rakre Atxiòkia hãwã-ò, Siria bede-ò, Silisia bede-ò. <sup>24</sup> Inyõ rare wayreny-ribi adeereny notykyresymy rybemy. Tai tahe araykyreny riwerydÿÿnyre. Jiarÿboho reteònyrenyõhyyre. Kia reerymy watrixereri. <sup>25</sup> Tahe wiwesele rahòtinyrenyre riki, hãbubohoõ Paulo Banabe inyluudu-wana reteònyrenyri. <sup>26</sup> Kia hãbu Paulo Banabe-wana hãwã binahakÿ-ò roimyhÿrenyre Jesu-isi Kristu Inynyrÿni-di. Ixi-txi røhòtinyòlere, brebuny. <sup>27</sup> Judasi-wana tule adee raryberenykre kia aõmydÿÿnanamy, katyyriti rewahinyrenyre wese. <sup>28</sup> Kawese inyboho røhòtinymyhÿre, Deuxu Tyytybytyhy dori inyrayky rewiohenanyre. Kia bede ywinalemy adeereny rarybereri biywinybenykemy. <sup>29</sup> Uritere, suritxoo xiwe-ribi iròdude ròrenyõmy iròdu, ihãlubu-di ròrenyõmy, ihãlubu rejuxunyõmyhÿre-wana. Tule òta òtana òraruna widÿÿõmy. Ka bede ywina biywinybenykeki, awimy boibeke. Deuxu deysana tahe adeereny kanakemy watxiwãhãre.

<sup>30</sup> Tahe hãbuõ iny inaubiòwamy Atxiòkia hãwã-ò ròirenyre. Tahe Atxiòkia tyhydÿÿdu mahãdu ributunyre. Iu tahe tamyreny tyyriti riwahinyre. <sup>31</sup> Tahe idi rariarenyre, ritÿnynymy tamyreny. Ribedeerynyrenyre. Tai tahe reysarenyre. <sup>32</sup> Judasi Silaboho tule Deuxu dee rybeduwihikÿ roire. Sòwemy dohodÿÿna-ki seriòre mahãdu-wana rohonymyhÿre. Tai tahe rirurudÿÿnymyhÿre. <sup>33</sup> Aõtxumy raroorehenyre, tahe seriòre mahãdu tamyreny rarybere: —Bòibenye he ateòdÿÿdu mahãdu-ò. Biòkeseke wowina-di Jerusalẽ hãwã-ò. <sup>34</sup> Tahe Sila røhòtinyre rarikremy Atxiòkia-ki. <sup>35</sup> Tahe Paulo Banabe-wana naride Atxiòkiakile. Inynyrÿ rybemy rierynanyrenyri, ritÿnynyrenyri, ijõ seriòreõ-wana.

<sup>36</sup> Aõtxumy tahe Paulo rarybere Banabe-ò: —Ròkòòsekre kÿnyhe, ibutumy hãwã hãwã-di tai juhoo Inynyrÿ rybemy ritÿnynymahãreò wahe, rikiwehityhynanykremy timybo ityhydÿÿdu mahãdu nyimyhÿde-ò. <sup>37</sup> Tahe Banabe Joaõ-Marku ridykemy tamy reare. <sup>38</sup> Paulo heka Joaõ-Marku ridyòkemy ratxireri, Panfilia hãwã-ki dori iribireny ròhònyreki, riwiohenanyòreki. <sup>39</sup> Marku ridykemy wiwese wesemy aõkõ røhòtinyrenyre teratyhylemy ratximyhÿ. Tai tahe wiribi rexihitxinyrenyre, Banabe Paulo-ribi. Banabe Marku ridyra Xibri bedebute-ò, hãwò-di ròira. <sup>40</sup> Paulo tahe Sila ridyra. Seriòre mahãdu tahe Pauloboho riixitòedÿÿnyre, Inynyrÿ ruxetòena tamyreny kanakemy. <sup>41</sup> Tahe Siria bede werawo-di, Silisia bede werawo-di, ririranyre dohodÿÿna mahãdu riwiohenanykemy, rirurudÿÿnymyhÿkemy.

## 16

<sup>1</sup> Pauloboho tahe Debi hãwã-ò rehemnyre. Ihy tahe Listra hãwã-ò rare. Tai tahe Tximòtxi-wana witxi rekoare. Tximòtxise judea tyhydÿÿduõ rare. Tyby tahe grego mahãduõ rare. <sup>2</sup> Listra, Ionio ityhydÿÿdu seriòre Tximòtxi luure. Tximòtximy widee rarybere: —Tii iny hãbu tyhy rare. <sup>3</sup> Tahe Paulo Tximòtxi-wana rakemy rexiywinyraremyhÿ. Tahe rexitarenkre kotyre, Paulo, Tximòtxi notykyresymy riteònyre, kowa judeu mahãdu òraru-ki wahe. Tyby dorihe ibutumy iny rieryre tii grego mahãdu raremy. Notykyresykõmy rake tahe judeu mahãdu dee kia ibinare. <sup>4</sup> Iribi tahe ròirenyre hãwã

hãwã-di, ityhydÿÿdu seriðre mahãdu ribedeerydÿÿnykemy, timybo Jerusalẽ mahãdu røhõtinymyhÿremy. <sup>5</sup> Tai tahe ibutumy dohodÿÿna heto mahãdu tii rirurudÿÿnynmyhÿre ityhydÿÿna-di. Tule ijò rityhynynmyhÿre txuõ txuõlemy ralokemy ityhydÿÿduõmy rarekemy.

<sup>6</sup> Pauloboho Asia bede-ò ròirenyõre rybe ritÿnynkemy, Deuxu Tyytybytyhy ritirÿreki. Tahe Frigia-Alatxia bedemy rekoamyhÿreny. <sup>7</sup> Misia bede-ò rehemynyreu, Bitinia bede-ò ròirenykemy riwisÿnyreny. Tahe Jesuisi Tyytyby tamy riteònyõhyre, ritirÿmyhÿre. <sup>8</sup> Tahe Misia bedemy rekoare, tahe Troaji hãwã-ò robehere. <sup>9</sup> Tahe Paulo hãbuõ wesemy robire rasina weselemy. Hãbu, Macedonia bede ludu lamamy rÿimyhÿò, tuu robire. Tahe hãbu ryrymyhÿ tamy: —Manake Macedonia-ò, biwawiòhenanykemy. Kia Paulo rasi-ki tuu robire wese. <sup>10</sup> Tahe tarasi rahureu, tamyhe wylemy aroikemy watxiwãhãreny. Jiarÿ, Luka, Paulo-wana. Deuxu dori inydeereny rarybereri Macedonia-ò ròkòirenykemy, Rybewehikÿ rikiubÿtÿnyreny. Kialemy ròkòhõtinyrenykre.

<sup>11</sup> Tahe Troaji hãwã-ribi ròhònnyre hãwò yhywydynalaworo-ki. Samotrasia hãwã-ò imynahyy riòhòrere. Ijò txu tahe Niapoli hãwã-ò riòhòreri. <sup>12</sup> Iribi tahe Filiposi hãwã-ò roirenyre. Juhuludu hãwã rare Macedonia bede-ki. Roma hãwã mahãduõ tule tai rasÿnynmyhÿre. Tai txuõ rewyreny. <sup>13</sup> Sabadotxu tahe hãwã-ribi reòlònyrenyre bero ijà-ò. Rahõtinyrenyre tai ixitòedÿÿna-ò rÿimyhÿremy. Tai tahe hãwyyõ rexibutunymy rÿimyhÿ. Tahe rorokorenyre tamyreny raryberenykemy. <sup>14</sup> Hãwyyõ Lidia inire, inyrybe-ò tahe roholatyhymyhÿre. Tii Txiatira hãwã luduõ rare. Tii tylÿre ijohodure, tule Deuxu tyhydÿÿdure. Inynyrÿ irayky riywinyre Paulo rybe rityhynkemy. <sup>15</sup> Tahe ibutumy isÿmahãdu-wana riratysebeny. Tai tahe tamy Lidia rarybere: —Inaanokàbo ityhydÿÿkÿdumy watxiwãhãre-wana, wahetoku-kò manakre. Tai tahe iheto-ò ròirenyre irybe-ki.

<sup>16</sup> Aõtxumy tahe riberenyre ixitòedÿÿna-ò. Itxi rekoarenyre ijadòmaõ-txi, deòdu rare. Iwo-ki tyytybybina ralòmy rÿire. Tai ijadòma relyre inyko aõhebo iny-ò rotÿÿnykemy. Tai sòwemy nieru ritare tawedu-ò. <sup>17</sup> Tahe waherenymy dyrymy nade: —Deuxu ibuturatyre rare. Iteòdÿÿkÿna mahãdu kia mahãdu rare. Tikiboho rarybemyhÿre timybo iny taòraru-ribi ratakemy. <sup>18</sup> Tuheka rarybehyy raremyhÿ. Aõtxumy tahe Paulo tai rexirare, tamy ròosemy reare. Rarybere tyytybybina tai ratxirerìò: —Jesuisi Kristu nimy iribi arateònykre. Bexitakre. Tahe aõwesele iribi ròhònnyre reare.

<sup>19</sup> Iwedu tahe rieryre nieru idi ritaõkre ta rimyrenyre Paulo Sila-wana. Retÿhimy rare ywisidÿÿdu-ò, hãwã elehyna ube-ò. <sup>20</sup> Tahe ijadòma wedu rarybere ywisidÿÿdu mahãdu-ò: —Kaa judeu mahãdu iny hãwãreny dibinadÿÿnynmyhÿde. <sup>21</sup> Tiiboho iny ribedeerynynmyhÿre aõ iny bede ywinareny-di aõkò. Inyboho Roma hãwã mahãdu rare. Tai kia-ki aõhe arotÿÿnyõtyhy. <sup>22</sup> Tai tahe sòwemy iny Paulo Sila radònyre. Ywisidÿÿdu mahãdu tahe ityy ibòrò-ribi ritxuahakÿre idi tahe rityhenymy tuu raòhòtere. <sup>23</sup> Tuu raòhòtere, tuu raòhòtere, idi tahe ròtenawo-ò idi rehurennyre. Ròtena-di itxeredu-ò rarybere: —Kaa rahenykre-wana, kaile budurukre. <sup>24</sup> Tai rirutere iraru-txi rarutxi-ò iwa ritidire òwòru iwodÿÿwomy raratyheny. <sup>25</sup> Ruetya tahe Paulo Sila-wana rexitòenymy roimyhÿ Deuxu dee. Ijò ròtenawoludu mahãdu roholamy rÿimyhÿ tai. <sup>26</sup> Aõwese bede ramytatare. Ròtena ijòtòbòna rirayre hãbu mynyna iribi rejuxunyyre. <sup>27</sup> Tai tahe itxeredu ijò iraymy idi retehereu, rexirubunykemy tamaydese ritare. Ròtena woludu mahãdu rahenyramy tii rexinohõtinyra. <sup>28</sup> Paulo tahe tamy ryryre: —Ixirubudÿÿõmyke, kakile watxirenyreri, ibutuhukÿlemy. <sup>29</sup> Itxeredu ryryre

loosona kidiwykemy tahe ralore ramytatamy brebumy. Paulobohoko-ò resere tatiòhomy. <sup>30</sup> Tahe itxeredu diòlòdÿÿnyde irarutxira-ribi, tamyreny rarybere: —Wanyrÿboho timybohe aratamy arÿike. Aõhebohe arotÿÿnyke. <sup>31</sup> Tahe rirawyònyre: —Inynyrÿ Jesuisi bityhynykrekile, tarasanamy myikre, asÿ mahãdu-wana. <sup>32</sup> Tahe tamy Deuxu Rybe-di ritÿnydÿÿre ibutumy isÿ mahãdu-ò. <sup>33</sup> Iruule tahe riwisinanyrenyra ibrò wotõmona risuhòra. Idi tahe itxeredu raratysebenyre tasÿ mahãdu-wana ibutumy. <sup>34</sup> Iribi tahe itxeredu ridyrenyre taheto-ò riroxikemy tahe ibutumy reysanihikÿrenyre, Deuxu rityhynyrenyaki.

<sup>35</sup> Txu deadeu tahe ywisidÿÿna dinodu ijõ ywisidÿÿna mahãdu riteònyre, ròtena-ribi Pauloboho riteònykremy. <sup>36</sup> Itxeredu tahe Pauloboho-ò rarybere: —Ywisidÿÿna mahãdu arateònykremy riwateònyreri. Bòibenye, wowina-di, biòlònybenyke. <sup>37</sup> Paulo tahe rirawyònyre: —Aõkõre, araõtyhy. Jiarÿboho Roma hãwãhãkÿ mahãdu kaa watxirenyreri. Tii riwayhytanyrenyra idi ròtenawo-ki riwasÿnyrenyra. Ywisidÿÿdu mahãdu wii rotykõhyre riwaròtenyrenyra. Wasimy ka tiu ariòlònyõtyhy. Tiiboho kodoikreule tahe ariòlònykre. Tii he riwaòlòdÿÿnykre. <sup>38</sup> Tahe ywisidÿÿna mahãdu tawedu-ò rarybere. Tahe tiiboho ruberurennyre Pauloboho Roma hãwã mahãdu roireki wahe. <sup>39</sup> Tai tahe dòidenyde tamyreny, aõwaxina riòlònykremy. Tahe làhãmy tamy rexitònyre. Tutyhy-ki aõkõ làhã ararutara. Tai riteònyrenyreu, hãwã-ribi rexitarenykemy tamy rexitònyra. <sup>40</sup> Rexitarenyreu, Pauloboho tahe Lidia heto-ò ròsere. Ibutumy ityhydÿÿdu tahe wii ritotynyre, wii riwiòhenanykemy. Idi tahe riòlònyre kia hãwã-ribi.

## 17

<sup>1-2</sup> Tiiboho rekoarennyre Afipoli hãwãmy, Apòlonia hãwãmy tahe rehemynyre Tesalonia hãwã-ò. Judeu dohodÿÿna hetoõ tai rÿimyhÿredò. Paulo, iwese aõu riwinymyhÿre wesele rare tamy. Ralore rybe-di rarybekemy. Inataõ sabadomy tai riraynyre tyyriti ritidÿÿna tamy ritÿnynykemy. <sup>3</sup> Rybe hitxina rurukremy tuu relyyre. Tahe Paulo tamyreny ritÿnynyre iwese Kristu durudemy idi dexiixixanyde rubu-ribi. Kia iny rityhynyra Jesuisi inatyhymy Deuxu deòdÿÿna raré. <sup>4</sup> Tahe ijohonadu mahãduõ rityhynyre. Tule ijõ judeukõdu mahãdu rityhynyre. Tule ijõ hãwyy wihikÿ mahãduõ rityhynyre sõwemy. <sup>5</sup> Tahe judeu mahãdu dinodu tuu ròhãrumyhÿre. Tiiboho tahe hãbu binahakÿ mahãduõ wii rotyre aõbina ritelenykre. Tahe ròirenyre Ijasõ heto-ò Pauloboho rimyrenykre, ywisidÿÿna-ò idi retÿhikremy. <sup>6</sup> Tai tahe rahaõhyre tai. Tahe Ijasõ ritarenyre ijõ ityhydÿÿduõ-wana. Tahe ridyrenyre ywisidÿÿna-ò. Tahe raryberenyre ywisedÿÿdu mahãdu-ò: —Paulo, Silamy urile bedè diòtanymyhÿdenyde, aõna aõna binahakÿlemy rotÿÿnymyhÿre. <sup>7</sup> Ijasõ tahe ritirÿmyhÿre taheto-ki. Tiiboho iny òludu roire. Iny iòlòreny rityhynyõtyhy. Jesuisi ka iòlòreny. <sup>8-9</sup> Ibutumy iny idi rõhõtynyre, tule ywisidÿÿna mahãdu rexitònyre nieru ririkemy. Tai xiery tahe rõhonyke. Tai tahe ririrenyre nieruõ.

<sup>10</sup> Kiaru tahe ityhydÿÿduõ Pauloboho riwiòhenanymy iribi riòlònykemy Bereia hãwã-ò. Tahe rehemyhÿreu, dohodÿÿna-ò ròirenyre. <sup>11</sup> Kia hãwã-ki judeu mahãdu iny awi rare, Tesalonia hãwã mahãdu wese aõkõre. Teysamy tamy roholarennyra. Idi heka rariara Tyyriti-di, òbitimy Paulo rybe aõbo roirerimy rierykemy. <sup>12</sup> Tahe sõwemy judeu iny rityhynyre. Judeukõdu mahãduy-ribi sõwemy rityhynyrenyre, hãwyy wihikÿ, hãbu-wana tule rityhynyrenyre. <sup>13</sup> Bereia hãwã-ki Paulo Deuxu rybe ritÿnynymy raremy. Judeia mahãdu dinodu Tesalonia hãwã-ki roholareu, tahe doidenyde. Iny sõwe-ò

raryberenyre: —Pauloboho bibinadÿÿnyke. <sup>14</sup> Tahe ityhydÿÿdu seriòre mahãdu aõwesele Paulo riteònyrenyrene ahohokÿÿry-di. Sila, Tximòtxi taile rarire. <sup>15</sup> Hãbuõ rare Paulo-wana Atena hãwã-ò. Iribi tahe dòòsede hãbuõ. Paulo tamy tarybe riwahinyra Tximòtxi Sila-ò, wylemy kanakremy.

<sup>16</sup> Paulo Atena hãwã-ki riraòreu, tahe robire suritxoole rityhynymyhÿreò. Tai tahe tii rabadewore. <sup>17</sup> Idi tahe Paulo ralore dohodÿÿna mahãdu heto-ò judeu dee rarybekemy, tule judeukòdu ityhydÿÿdu dee rarybekemy. Tahe rarybemyhÿre txuõ txuõlemy. Tule hãwã ube-ki rarybemyhÿre hãwã-di reamyhÿre mahãdu-ò. <sup>18</sup> Aõtxumy tahe Epikuriu mahãdu Paulo-txi nade. Estòiku mahãdu ijòre. Tiiboho, aõbo rybe rare kia erydu roire. Tiiboho he Paulo raujòmorenyre: —Aõmy aõkò, kiarybedu rarybereri. Ijò tahe rarybere: —Tii Deuxu tÿmyramy rarybereri. Paulo dori juhoo Jesuisi ixixanamy relymy raremyhÿ. Tai kiamy raryberenyre. <sup>19</sup> Paulo tahe ridyrenyrene. Tai iny roholamy rÿimyhÿreò ridyrenyrene: —Rybe tÿmyramy telymahãtemy inihe bedelyyke wakoreny. Tamy kia rarybere. <sup>20</sup> Aõkòre inihe aõna aõnamy tarybemy atxiteri, aõwixira wixiramy. Tai aroholarenykemy wixirenyre. <sup>21</sup> Atena hãwã mahãdu, tule iwixira bede luduõ tai rasÿnymyhÿre, aõ tÿmyraòòle roholarenykemy ratxirenyre. <sup>22</sup> Tahe Paulo rÿire rybenatya-ki. Rexiòrarunymy rarybere: —Atena hãwã mahãdu, kaiboho Deuxu rybe hyky tahòtinymahãtenyete. <sup>23</sup> Jiarÿ hãwãmy rariamy wixireri, sòwemy xiwena-di retehera. Ijò-di kiamy retehera iritina-di: Kaa Deuxu heka inyò rieryòhyymyhÿre. Ka Deuxumy kÿny heka akoreny arelyyke, teerymahãtenyete-di aõkò tuu tealàmahãtenyete. <sup>24</sup> Ka Deuxu ibutumy bede riwinyrene. Ibutumy tuu rÿira tii riwinyrene. Tii heka biuwetyy wedu rare, su wedu rare. Aõ hãbu widÿÿna heto-ki aõkò tii rasÿnymyhÿre. <sup>25</sup> Tiu heka tii aõmy reaòtyhy hãbu aõ tamy riwahinyòtyhy. Tule tahe inydee ibutumy aõna aõna riwahinymyhÿre, ele wesena, umy, ibutumy inydee riwahinyrene. <sup>26</sup> Hãbu sohojiò-ribi ibutumy iny ròhònyrene iriòre riòremy bede wixira wixiramy rasÿnymy rÿirakemy. Urile wiribi rihitxihitxinyrene. Tiu tamy riteòsinyrene, tikibo rasÿnymy rÿirakemy. <sup>27</sup> Ibutumy Deuxu rajemyhÿkemy, raerykemy. Tii dori irehemy aõkò ihÿre iny-ribi. Iny sohoji sohojiò-ribi iòhòmy ratximyhÿre. <sup>28</sup> Deuxu òraru-ki inyboho ibutumy irumy ratximyhÿrenyrene, ririranymyhÿre, ihoòkeki tahe aõ rikiwinyrenyòtyhy. Atyyriti widÿÿduò kiamy rarybere: —Inyboho heka Deuxu riòre. <sup>29</sup> Inyboho Deuxu riòre rareki, urile nohòtiòmy womati tÿrÿrÿÿ ritxoo wesemy, womatiura wesemy, manaritxoo wesemy Deuxu-di nohòtiòmahãbeny. Hãbu rayky-ribi, hãbu debò Deuxu releremy nohòtiòmahãbeny. <sup>30</sup> Ihetxiu tii Deuxu rieryòhyrenyrene. Tai tahe iòrarunareny aõnihikÿmy aõkò Deuxu dee ihÿre. Wiji bededÿÿnana tahe, ibutumy taòraru-txi ixi-txi nohòti ijaranamy, tai tahe rabadewomyhÿkemy. Kia tahe ibutu iny-ò rarybereri, iny taòraru ririkemy. <sup>31</sup> Deuxu Jesuisi riixixanyrene rubu-ribi. Tai tahe ibutumy tii rityhynyrenyrene ihÿre. Aõtxumy tahe ibutumy iny ywisidÿÿdumy kanakremy ijÿre. Òbitina-di Jesuisi iny ritxuarenykre kia wiribi hitxi hitxina txuu.

<sup>32</sup> Paulo Jesuisi ixixanamy rarybereu, inyò tuu rirajuare. Ijò tahe rarybere Paulo-ò: —Ijò txuu arybe ini aroholatyhykemy wixireri. <sup>33</sup> Idi tahe Paulo rare iribireny. <sup>34</sup> Ijò iny tahe Jesuisi rityhinyrene, Paulo-ò tahe rixibutumyrene. Ijò Dionisiu inire, Areòpolo heto ube-ki tii iny mahãduò roholamyhÿre. Ijò, hãwyyò rityhinyrene, Damari inire, tule ijò mahãduò rityhinyrene.

## 18

<sup>1</sup> Paulo tahe Atena hãwã-ribi ròhònyrene Oritxi hãwã-ò. <sup>2</sup> Kia-ki tahe judeu

mahãduõ-wana witxi reare. Ini heka Akila inire. Tii Ponto hãwã-ki raumynyre. Urihimyõle Italia bederibi dehemynyde. Prisila ihãwyynire. Iòlò Laujiu Roma hãwã-ribi ibutumy judeu mahãdu diteõnyde. Tai heka nade kaweribi-ò. <sup>3</sup> Paulo iaõmysÿdÿÿna rierymyhÿre, tyyheto widÿÿ. Tai tahe tiiboho-wana raijoinymyhÿre wiwana raaõmysÿdÿÿrenykemy. <sup>4</sup> Sabado txuõ txuõlemy tamy reamyhÿre judeu mahãdu dohodÿÿna heto-ò. Tahe ritohonymyhÿre, judeu mahãdu judeukõdu mahãdu tule. Tamy rarybere tii Rybewihikÿ õbitimy rierykemy.

<sup>5</sup> Sila tahe Macedonia bedewe-ribi rehemynyre, Tximõtxi-wana. Paulo tai rybe ritÿÿnymyhÿhyy raremyhÿ. Aõu Paulo rarybere: —Inatyhymy Jesuisi Deuxu deòdÿÿna rare, Kristu rare. <sup>6</sup> Katahe judeu mahãdu tamy raykarananymy raremyhÿ. Aõbinahakÿlemy Jesuisimy rarybere. Tahe Paulo tatyy riohowire iixãwidinykemy riteòsinykemy. Tahe tamyreny rarybere: —Jiarÿ aõkõ bede òrarure. Kai aòraruna-di burukre-wana, ahãlubureny waki aõkõ rare, adeereny dori Deuxu rybemy rarybere. Tahe judeukõdu mahãdu-ò sohojile tuu arelyykre. <sup>7</sup> Iribi tahe inyõ heto-ò Paulo rare. Txisiu Justu inire. Tii judeukõdu mahãduõ rare, tahe Deuxu rityhynymyhÿre. Judeu dohodÿÿna heto bire-ki iheto rÿire. <sup>8</sup> Krispu judeu dohodÿÿna heto weduni rare. Tii tasÿreny ibutumy Inynyrÿ rityhynymyhÿre. Tule sõwemy Oritxi hãwã mahãdu rityhynymyhÿre. Paulo riratysebedÿÿrenyre. <sup>9</sup> Paulo tahe rummy rõõmy roire. Tai tahe rasina wesemy robire. Inynyrÿ tamy narybede: —Brebuõmy, Paulo. Marybeke aõmybo rybemy adee rewahinyré. Rybe tÿnydÿÿ lau brebuõmy. <sup>10</sup> Jiarÿ adi watxiwãhãre urenana. Inyõ adee aõhe rotÿÿnyõtyhy. Sõwemy iny rÿire kaki watyhydÿÿdu. Kia Jesuisi tamy rarybere. <sup>11</sup> Tai he Paulo bederijere sohoji beõra weeremy tai bederiere. Ribedeerynymyhÿre Deuxu rybemy.

<sup>12</sup> Roma dinodu tÿmyraõ ronyre Grecia bedeki. Ini heka Kalio inire. Dinodumy ronyrau tahe, judeu mahãdu wii dotyde. Wii ritobinyre Paulo dee aõbinabinahãkÿ riwinykemy. Tahe tiiboho Paulo rimyrenyre idi kanakremy ywisidÿÿdu dinodu-ò. <sup>13</sup> Kiamy raryberenyre: —Paulo, Deuxu deàlanamy iny dibedeerynymyhÿde. Tai bede ywina rityhynyõhyymyhÿre. <sup>14</sup> Tahe Paulo ixideele rarybekemy ratxireri, tahe Kalio judeu mahãdu-ò rarybere: —Kia rubudÿÿdu ada aõ ibinatyhymy ratxikeki, tai idi arohonykre, ariy-wisidÿÿnanyke. <sup>15</sup> Tahe aõkõre, urile abede ywina rybedile rarybemyhÿre, tai ywisidÿÿnamy idi araõkre. Kaibohole biywisidÿÿnanybenyke. <sup>16</sup> Tahe Kalio ibutumy diteõnyde ywisidÿÿna hetouberibi. <sup>17</sup> Tai tahe judeu mahãdu dohodÿÿna heto wedu rimyrenyre. Sòteni inire. Tule raòhòterenyre ywisidÿÿna heto ube-ki. Kalio tahe kia òhòtena-ò aõhe rotÿÿnyõhyllere.

<sup>18</sup> Oritxi hãwã-ki Paulo rare myhÿre sõwemy he tai txu riwyre. Idi tahe seriòre mahãdu-ò rarybere: —Arakre. Tahe hãwòõ-di he rare, reuròkemy Siria bede-ò. Tahe Prisila Akila-wana tii-wana ròirenyre. Paulo Deuxu-ò rarybere aõmybo rotÿÿnykemy. Idi tahe rexihumy kia rÿire. Tai tahe tarade risyre nohõti ijerana wesemy. Sekrea hãwã-ki tarade risyre. <sup>19</sup> Tahe ritehemynyre Efesu bede-ò. Prisila Akila-wana ririre. Iribi tahe rare tyyriti ritÿÿnyremy judeu mahãdu dohodÿÿna heto-ò. <sup>20</sup> Tii mahãdu tahe Paulo rexitòenyre tai aõutxumy tai ratxunykemy. Tahe rarikõkemy ratxireri. <sup>21</sup> Karibi ròhònyreu, tamy rarybere: —Deuxudeewikeki, ixyby adòòsekre. Efesu-ribi ròhònyreu, yhydynamawòõ rimyre.

<sup>22</sup> Ritehemynyre Cesaria bede-ò. Iribi resereu, Jerusalê hãwã-ò rare. Tahe rarybere riwehityhynanyre dohodÿÿna mahãdu. Iribi tahe Atxiòkia hãwã-ò rare. <sup>23</sup> Tai bededÿÿnana riijere idi tahe rara. Rariamy rare hãwã

hãwã-di, Alaxia bedede-di, Frigia bedede-di. Ibutu hãwã-ki ityhydÿÿdu rotohodÿÿnomyhÿre, riwiòhenanomyhÿre.

<sup>24</sup> Iu tahe inyõ judeu mahãduõ dehemynyde Alexÿdria hãwã-ribi. Apòlo inire. Tii ribedeeryny wihikÿmyhÿre tyyriti, tarybe-di rotohonomyhÿre, Deuxu rybe rieryeki. <sup>25</sup> Inyõ Apòlo rierynanyre timybo Inynyrÿ Jesuisi aõmydÿÿnana raremy. Tai Jesuisimy ribedeerynomy raremyhÿ, deysanatyhy-di rarybemyhÿre. Tii tahe Joaõ ratysebenale rieryre. <sup>26</sup> Apòlo rexidelenomy relyyre judeu mahãdu dohodÿÿna heto-ki. Prisila Akila-wana tai roholamy ronomyhÿre. Idi tahe tiiboho Apòlo ridyrenyry ibutomy Jesuisi aõmydÿÿnanamy tamy ritÿÿnykemy. <sup>27</sup> Iribi tahe Apòlo ratÿÿnykemy rexiwonyre Grecia bedey-ki. Ityhydÿÿdu seriòre tamy rybe riwahinyre, Grecia ludu seriòre mahãdu-ò, aõma, riryludonykemy, rehemynykeu. Tahe rehemynyreu, sõwemy riwiòhenanyre kia tyhydÿÿdu seriòre, Deuxu ruxetòena ityhydÿÿdu mahãdu. <sup>28</sup> Tii dori judeu mahãdu raykyrybe itxÿte riwitxiradÿÿnyre iny sõwe hekÿy-ki. Rybetyyriti ritina-di riurihimy rarybere iwese Kristu Jesuisi raremyhÿ wese, Deuxu deòdÿÿna wahe.

## 19

<sup>1</sup> Apòlo, Oritxi hãwã-ki rareu, Paulo rabetetÿinyre kabedey-ki idi rehemynyre Efesu hãwã-ò. Kowa ityhydÿÿdu mahãduõ-ki he rahare. <sup>2</sup> Tamy Paulo ritÿÿraxinyre: —Tetyhynyteu, Deuxu Tyytybytyhy ixidee aõbo temytenyete. Tahe rirawyònyre: —Aõkõre he, aõmybo tarybeteri. Deuxu Tyytybytyhy reeryòrenyry. <sup>3</sup> Paulo rÿÿraxire: —Taratysebetenyteu, mobohe tetyhynytenyete. Tahe rirawyònyrenyry ixityre: —Retyhynyrenyry ibutomy Joaõ Sebedÿÿdu riwabedeerynyremy. <sup>4</sup> Paulo tahe tamyreny ritÿÿnynyre: —Joaõ sebedÿÿna urihimyõ iwitxi rare. Tii kiawese rybe ritÿÿnynyre: iny taòraru-txi tõhõtí reakemy. Tahe Jesuisi Juaõ hewo-ribi kanakreu, tii tahe inatyhymy kanatyhydÿÿkre. Paulo kia tamyreny rarybere. <sup>5</sup> Kia-ò roholareu tahe, raratysebenyry Inynyrÿ Jesuisi nimy. <sup>6</sup> Paulo iratytyre tebò ritidire, tai Deuxu Tyytybytyhy tamyreny ralore. Tahe Deuxu rybemy raryberenyre, tule iwitxira rybemy raryberenyre. <sup>7</sup> Waòinatxi reurò hãbumy rÿiramy.

<sup>8</sup> Inataõ ahãdumy Paulo reamy raremyhÿ judeu dohodÿÿna heto-ò. Tiiemy rarybehymyryre, riòbitinomyhÿre, Deuxu Iòlònamy ritÿÿnynomyhÿre. <sup>9</sup> Paulo-ò ijohonaduõ rityhynyòhyomyhÿre, teramy reamyhÿre. Deuxu aõmydÿÿnanamy ibinamy rarybemyhÿrenyry iny sõwey-ki. Tai tahe Paulo rexihitxinyre judeu dohodÿÿna heto-ribi. Txirano kia tyyriti rybena heto-ò txuõ txuòlemy ralòmyhÿre taerydÿÿna-wana. Tahe rabeederynomyhÿre. <sup>10</sup> Tahe bedede riere inatxi beòramy. Tai tahe ibutomy iny Asia bedede ludu mahãdu Inynyrÿ rybe-ò roholamyhÿre, judeu mahãdu, tule judeukõdu mahãdu. <sup>11</sup> Deuxu aõna aõna wiwihikÿ riwinyre Paulo debò rihuòtere. <sup>12</sup> Paulo tykyryre riwyrenyry webinadutyre ritidirenykemy. Tyky òsuròna wesemy ijõmy riwyre. Tai tahe webinadu riteytenomyhÿre. Tule tyytybybinahakÿ iny-ki raremyhÿu, aõwesele iribireny ròhònymy reare tykyryre òraru-ki. <sup>13</sup> Ijõ judeu mahãduõ ratÿÿnyre hãwã hãwã-di inyõ ribi tyytybybina ritakemy. Tiiboho tyytybybina riteònykemy idi ratxireri. Tai tahe Inynyrÿ Jesuisini-di riteònyre. Kia wesemy rarybere: —Paulo, Jesuisi rybe ritÿÿnynomyhÿre, tai Jesuisini òraru-ki iribi bòhònykre. <sup>14</sup> Debòinatxi seriòre kia riwinyre. Sewa tybynire, judeu xiwena widÿÿdu kia wedu tii rare. <sup>15</sup> Tahe Jesuisi ni-di tyytybybina-ò rarybereu, tyytybybinaõ dirawyònyde: —Jesuisi reeryre, Paulo reeryre, tahe mobo atxiteri. <sup>16</sup> Tahe hãbu tyytybybina-di ratxirerí, ityrehekÿle dexiwatxinyde, rihetenyry, ibutomy riwotòmonyre ityky ritare tai hetowo-ribi hãbu mahãdu



tadehekÿlemy rahenyre. <sup>17</sup> Ibutumy Efesu hãwã mahãdu kia rieryrenyrene, judeu mahãdu, judeukõdu mahãdu. Tahe ibutumy ruberure, Jesuisi ni nityhydÿÿhÿkÿmy ini raremyhÿki. <sup>18</sup> Sõwemy ityhydÿÿdu taðrarureny riix-itòedÿÿnymyhÿre, dohodÿÿna mahãduy-ki. <sup>19</sup> Ijõ ityhydÿÿdu juhUU tyytybybina rierymyhÿrenyrene, tiiboho tahe tatyryiti diwyde itxenadÿÿmy rybetyryiti, òwòruwidÿÿ kia tyyryiti. Tahe iny retehemyhÿreruki kia tyyryiti sõwemy ritoonnyre. Idi ibutu tyyryiti juhUU òwy wese inyõ riritinyre. Iòwy tahe 50 mil womati ura nieru juhUU òwyre. Ihãrele tahe idi rahure. <sup>20</sup> Ibutumy kia bede mahãdu Deuxu rybe-di rõhõtinihikÿrenyrene.

<sup>21</sup> Idi tahe Paulo tarayky-ki rõhõtinyre: —Judeukõdu mahãdu bede-ò arakremy ixi-di watxiwãhãre. JuhUU Jerusalẽ-ò arakre Macedonia bede-di Akaia bede-di arariamy arakre. Adòðsekreu, tahe Roma hãwã-ò arakre. <sup>22</sup> Tai tahe tawiòhedÿÿdu Tximõtxi, Erasto-wana Macedonia bede-ò riteònyre. Tai Paulo Asia bede-ki naride. Bededÿÿnanaõ riwyre.

<sup>23</sup> Kia bededÿÿnanau aõbina nihikÿ rÿikemy riwisÿnyre Deuxury òbitina òraru-ki. <sup>24</sup> Dimitiu heka womati tÿrÿrÿ ura ritxoo widÿÿdu rare. Hãwyy ritxoo ihãwãreny deuxu rare. Diana inire. Nieru sõwemy ritamy raremy idi riwinymyhÿreki. <sup>25</sup> Dimitiu ributunnyre ibutumy womati ritxoo widÿÿdu, tamahãdu-wana. Tamyreny rarybere: —Wanyrÿboho adeereny ararybekre. Inyboho nieru ritamyhÿrenyrene kaa aõmysÿdÿÿ-ki. Kia tahe teerytenyete. <sup>26</sup> Paulo rarybemyhÿre kaa inywidÿÿnareny deuxu aõkõ rare. Tai tahe sõwemy iny tamy nariade irybe-di. Efesu hãwã sohojile-ki aõkõ, ibutumy Asia bede-ki irybe rityhynymyhÿre. <sup>27</sup> Iny aõmysÿdÿÿna òsana riixãwididÿÿnykre, ideuxu dohodÿÿna heto-wana, iny deuxu reny riixãwididÿÿnykre. Diana inyluure. Kaki sohojile aõkõ inyluure, ibutumy Asia bede-ki, tule bede bede ludu iluu inihikÿmy awireki. Paulo heka kia ibutumy rahukre. <sup>28</sup> Kia roholareu tahe, raykarananyrenyrene. Ryyryrenyrene: —Diana awi rare inydeereny. Tii Efesu hãwã deuxu rare. <sup>29</sup> Rirajuamy rÿimyhÿ hãwã-ki. Hãwã mahãdu, Kaio Aristarku-wana rimyrenyrene tahe ridyrenyrene butunaube-ò. Tiiboho Paulo tÿimahãdu rare, Macedonia hãwã mahãdu rare. <sup>30</sup> Tahe Paulo ralòkemy rexiwonyre tatÿi mahãduhe-ki, iny sõwey-ki tahe taerydÿÿna ijoi ritirÿre. <sup>31</sup> Tule ijõ bededinoduõ, Paulo wiðhedÿÿmy ratxireri. Tai tarybereny Paulo-ò riwahinyrene ibutunaube-ò raðkemy, brebunamy roireriki. <sup>32</sup> Tiilemy ijõ rarybemyhÿre. Ijõ iwitxiramy rirajuamyhÿre. Urile wimy rauriurire. Aõherekibo ibutumy rÿirerí, iny rieryòhyre. <sup>33</sup> Alexÿdre iny sõwey-ribi rimyrenyrene tahe, idi retÿhire, ritamadÿÿnyrene iny rudera-ò. Alexÿdre debò riteòsinyrene tamahãdumy rarybekemy. <sup>34</sup> Iny sõwemy idi retehereu, judeu mahãduõ raremy rieryre tahe rirajuatyhyre. Tahe inatxi òramy rirajuahyy rÿimyhÿ: —Diana awi rare. Tii heka Efesu deuxu rare. Kiamy ryyryrenyrene. <sup>35</sup> Idi tahe hãwã weduõ riixãwididÿÿnyrene. Tahe rarybere: —Hãbu, Efesu hãwã mahãdu. Ka hãwã Diana hãwã rare. Kaki tohodÿÿna heto reyrubuwãhãrenyrene. Kaki biu-ribi mana ritxoo desede. Ibutumy kia reeryrenyrene. <sup>36</sup> Kia inatyhy rare. Tai tahe rikiyrymy rokorokorenykre. Aõwesele aõwidÿÿõmy. <sup>37</sup> Kaa hãbu tedytenyteri. Aõhe rotÿÿnyõreri. Aõ-di rawasinyòhyreri dohodÿÿna heto-ribi. Aõbinahakÿ iny hãwyy deuxumy raryberenyòhyreri. <sup>38</sup> Dimitiu tamahãdu-wana aõbo tai reny ibinamy ihÿrenykeki, ywisidÿÿdu-ò idi rakre. Tiiboho heka wii ributunymy rÿireri. <sup>39</sup> Ijõ rybe tahe atxibenykeki, ijohonadu mahãdu adibutunnykre arybe-ò aroholarenykemy. Iwese inyboho rotÿÿnymyhÿre wese arieryrenykre. <sup>40</sup> Roma hãwã dinodu òsana aõmybo inymyreny kanarybekre. Wiji inyboho aõhebo rotÿÿnyrenyrenyrimy. Aõ kÿnyhe ò-ki ka wiji jei jei rÿireri wahe. Roma hãwã dinodu tarybe kidi-

wahinykre-wana wahe, timyhe warybeõna. <sup>41</sup> Tahe riixãwididÿÿnyre. Ròsere ibutumy.

## 20

<sup>1</sup> Kia jei jei rybe rexihureu, Paulo tahe taerydÿÿna mahãdu-ò tarybe riteònyre tiiboho kanakemy. Tahe rakrekou tyremy tamyreny Deuxu rybe-di rotohonnyreny Deuxudeewimy rierykemy. Idi tahe ritobinyreny. Rare heka Macedonia bedè-ò. <sup>2</sup> Ibutumy titxibo rexitomonymyhy rito-hodÿÿnymyhyre ityhydÿÿdu mahãdu-ò. <sup>3</sup> Tahe Akaia bedè-ki heka bedè riijere inataõ ahãdu. Tahe rexiwinymyhyre ratximyhy Siria bedè-ò rakremy hãwò-di ridymyhyredi heka rakremy rexiwiny. Idi tahe judeu mahãduõ irubudÿÿmy rarybemy nyimyhÿ. Inyõ Paulo rierydÿÿmy, tai ta Macedonia bedè-di ròsere Siria bedè-ò rakemy. <sup>4</sup> Hãbuõ ramyhyre tii-wana Jerusalè-ò, ta kamahãdu Asia bedèòle he roirenyre. Sopatu ijõnire, tii heka Bereia hãwã mahãdu rare, Biru heka Sopatu tybyni rare. Aristarku ijõre, adelahelÿÿna ijõni rare, tiiboho Tesalonia hãwã mahãdu rare. Ijõ Kaio inire, tii Debi hãwã mahãdu rare, Tximòtxi ijõ rare. Tule ijõ Asia bedè ludu rare, Txitxiò ijõ, Trofimo ijõre. Rarekie. <sup>5</sup> Kiaboho juhutyhy rexiraòmy roirenyre. Paulo riraòmy Troaji hãwã-ki. Tule riwaraokre —Luka jiarÿ ka tyyriti widÿÿdure. <sup>6</sup> Worana bedehesi ituereu tahe, jiarÿ Paulo-wana roirenyre heka hãwò-di Filiposi hãwã-ribi. Iruyre txu rÿidi tahe rehemynyre. Troaji hãwã-ò. Taita sohoji semanamy rewyreny.

<sup>7</sup> Tahe nobiutxu ityhydÿÿdu mahãdu iny wi ributumy, Inynyrÿ mona, rÿsÿna-wana tuu rihitxinymy rirÿsÿkemy. <sup>8</sup> Tahe Paulo iu rybe ritÿnyre itxu biòwamy rexiwinymy rÿimyhÿ tahe rakremy. Urile tahe rarybereri hyky tahe ruetya he wihe ritotynymyhyreny. Hetoranoa-ki biu-ki rÿimyhÿre. Kanoõtyhy-ki rabuturenyre. Tiu Paulo rarybemy rarybemy rexihukõhyre, biurasòmy rakreki. Tahe sòwemy heka lamparina rÿimyhÿre. <sup>9</sup> Ronymyhy, moma inire, Otxiu. Aõma-ki ronymyhy, heto janela tyre-ki biu-ki. Ta tòhòti rosare, ròròmy resere. Iribi reare, biuribihikÿle resere suò. Rurure. <sup>10</sup> Tahe Paulo robehemy rare tamy. Tatiowotimy resere weryrybò rinykremy iwetya-ki. Paulo rarybere: —Bedeòtidÿÿòmyke irulemy roire. Deuxu ixyby iumy tamy riwahinyre. <sup>11-12</sup> Weryrybòmy irumy robirenyre tahe, ibutumy reysarennyre. Tai tahe Inynyrÿ bemona, rÿsÿna-wana tuu rirÿsÿrennyre biu-ki wahe. Paulo ixityre rarybere. Txu iòlò iòlòmy rareri-wana tahe rarybere. Tahe Paulo rare. Tatilemy rare Aso hãwã-ò. Tii tamy tarybe ririrehe: —Kowa ayhywydyna lawò arimykre.

<sup>13</sup> Tahe jiarÿ, Luka, wamahãdu-wana roirenyre yhywydynalawò-di Aso hãwã-ò Paulo-wana rekoarennykemy. <sup>14</sup> Rehemynyrennyre tahe, Paulo ralòmy yhywydyna laworo-ki. <sup>15</sup> Imytxubiòwa tahe Kio hãwãko-txi rehemynyre. Ijõ txu tahe Samosi hãwã-ki rehemynyre. Ijõ tahe rehemynyre Mitilene-ò. <sup>16</sup> Paulo ixitamadÿÿ deramy reare Efesu hãwã-ò. Raeleemy ratximyhy Jerusalè-ò rehemynykemy, aõma, Pentecoste kia judeu worana bedehesi-ò raeleelere.

<sup>17</sup> Tahe Miletu hãwã-ki rehemynyrennyre, dohodÿÿna matuari mahãdu tamy he rarariòwyre tamy rarybekremy hãwò-ò kedehemynykemy. Tahe Efesu-ribi ditehemynydeu, kia tamy rarybere: <sup>18-19</sup> —Tahe tiemy Asia bedè-ki Inynyrÿ-ò raaõmysÿdÿÿhy watxiwãhãre. Aõmy aõkò ixidee rahòtinywãhãre. Rahinymahãre, Inynyrÿ dee rybe retÿnynmahãre. Warube resehy watxiwãhãre. Tai ta brebuna nihikÿ waumy-di rarewãhã. Judeu mahãdu heka sòwemy wamy rarybemy riwarubunnykemy. Kia ibutumy aõmydÿÿnana teeryteny. <sup>20</sup> Tiu raberuõhywãhãre Inynyrÿ nimy rybemy. Ibutumy

rarybewāhāre iny sōwey-ki tule heto hetowomy relyymahāre. <sup>21</sup> Judeu mahādu-ò retÿnynyre tule judeukōdu mahādu-ò taòraru ririkemy Deuxu dee taòraru-txi tōhōti reakemy rabadewokemy. Tule Jesuisi Kristu rityhynykemy. <sup>22-23</sup> Katahe wiji arakre karibi Jerusalē hāwā-ò. Deuxu Tyytybytyhy heka wadee dyrymyhÿde. Aõhebo arotÿÿnykre, reerykōre. Kiale reerywāhāre, aõma, Deuxu Tyytybytyhy wadee rarybemyhÿre ibutu hāwā-ki, aõma, aõhōkÿmy arotÿÿnykre kowa. Rotenawo-ki aroikre. Myle reeryre. <sup>24</sup> Tiiemy tamy raaõmysÿdÿÿmahāre. Kiale wadee Inynyryÿ Jesuisi rewahinyre urenana. Kia ariwinyōkeki, aõ aõkō heka jiarÿ waumy-ki. Tii arelyywāhāke inyko-ò rybe tÿmyra wihikÿ, timybo Deuxu inyluurenyre. <sup>25</sup> Araerynanywÿhÿrenyre Deuxu Iòlōnamy, wamy tahe bobibenyōtyhy ixityre. Kia reerywāhāre. Jiarÿ tule umyreny arobiōtyhy. <sup>26</sup> Tahe adeeremy aõmybo ararybekre. Ryranymy heka watxiwāhāre ibutu hālubu-ribi. Kaiboho aòraru-di burubenykeki, jiarÿ aõkō tuure. Inyō wamy rarybeōtyhy aõma Rybewihikÿ-di jiarÿ itÿnynyõmahāremy. <sup>27</sup> Tiiemy rarybehyy rarewāhā ibutumy Deuxu bede ywinamy. <sup>28</sup> Tai tahe ixi-di awimy boibekre. Iwese budoeni itxeredu tamy rÿsÿna riwahinyre wese, kaiboho ityhydÿÿdu mahādu-ò Deuxu rybe tamyreny biwahinybenykre. Deuxu dohodÿÿna mahādu tii rare. Jesuisi tahālubu-di tii riwyyre. Tai tahe ityhydÿÿdu mahādu wiòhedÿÿdumy kaiboho toite. <sup>29</sup> Karibi arohonykreu, aitxeredu mahādu kanakre. K reeryre. Adeeremy òbitimy aõkō rierynanykre. Tiiboho aholā wesemy ratximyhÿrenyre. Iwese budoeni-ò imynymy ròsemy ramyhÿre wese heka kedehemynykre. <sup>30</sup> Inyō heka aityhydÿÿdu seriòre yrìbi iwitxira aõna aõnamy kidierynanymyhÿkre. Taijoi kididymyhÿkre tarybe-ò ijohonamy. <sup>31</sup> Tahe biijemy boibekre. Inataõ beòramy awana rarewāhā. Kiamy rarybereri, irìbi nohòtilosarenyõmy. Txu-wana, ruwana adireny ròrenywāhāre. Rahinymy heka aòrarureny-ki watxiwāhāre. <sup>32</sup> Tahe ararirenykre Deuxu-wana ixi-di he awimy renykre. Tii heka adireny rarekre. Tii tahe nohòtilosarenyõmy, boibekre Deuxu rybe-di. Tii heka riwiòhenanykre atyhyna raumynykremy. Deuxu riywinyre wahe adee reny aõna aõna wiwihikÿ riwahinykre òbiti mahādu-wana kia bitabenykre. <sup>33</sup> Tiu heka jiarÿ ijò hābu-ribi nieru tarasamy rahòtinyòhyymahāre tyy wiwihikÿ tarasamy raruòhyymahāre. <sup>34</sup> Tiiemy wadebò-ribi hyy hyy raaõmysÿdÿÿmy rarewāhā waaõmydÿÿnana òwydÿÿmy. Tule rewìohenanywāhāre tii-wana watxiwāhāre mahādu. Kaiboho teerytenyte kia. <sup>35</sup> Ibutumy rewìohenanywāhāre iaõkō mahādu kia heka tuu tabitenyte kia rewinyamahāremy. Teerytenyte timybo Jesuisi rarybere: —Biwahinybenyke, kia dori iny-ribi ritamyhÿre ratyre awi rare.

<sup>36</sup> Tahe rybe-ribi rexihureu, tatiowotimy rotamanyrenyre wiwana rex-itàenyrenykre. <sup>37</sup> Tahe rahinyrenyre, rìmyrenyre tamy wòrenyre, aõna rakreki, kia-ki rexityhenyneri tamyreny. <sup>38</sup> Tiiemy rabadeworenyre tiu tuu robirenyōkremy. Tahe hāworo-ò tiiboho-wana roirenyre.

## 21

<sup>1</sup> Iribi ròhònyreu tahe, òbitihyy rare Kòsi hāwā-ò. Ijò txu tahe Rodesi hāwā-ò ritehemynyre. Iribi tahe Patara hāwā-ò ritehemynyrenyre. <sup>2</sup> Tai tahe rahare hāwò-ki, Senisia hāwā-ò rakremy rexiywinyneri. Roirenyre kia yhywydynalawò-di tahe rorukurenymy ròirenyre tamy. <sup>3</sup> Xibri bedebute weribi-ò reurore, inyhywenawe-ribi Siria bede weribi-ò. Tahe ritehemynyre Tiro hāwā-ki. Tai tahe hāwò-ribi aõna aõna-di rekoarenyre. <sup>4</sup> Tamy roirenyreu tahe, rÿÿraxirenyre kahāwā ityhydÿÿdu mahādumy. Tai raharenyre. Sohoji semanamy bede tiiboho-wana wadireny rÿire. Kiaerydÿÿna mahādu heka

Paulo dee raryberenyre: —Aõma noõmykre Jerusalẽ-ò. Deuxu Tyytybytyhy tuu tamyreny rarybemyhÿre. <sup>5</sup> Tahe semana ituereu, diòsedenyde ixyby hãworo-ò. Ibutumy diberenydenyde ityhydÿÿdu mahãdu tiiboho-wana ÿnyra-ò, hãwyy, uladu, ibutumy. Tahe rexitòenyreny. <sup>6</sup> Ritobinyreny tahe, riòòserenyre heto-ò ixyby.

<sup>7</sup> Idi tahe Tiro hãwã-ribi rare. Tahe Tolimaida hãwã-ki ityhydÿÿdu mahãdu rerybewãhãreny txu sohojilemy bedede reijereny tai. <sup>8</sup> Ijõ txu biòwamy tahe roirenyre Cesaria hãwã-ò. Tahe Filipisÿ-ki rasÿnyreny Rybewihikÿ-di tÿnydÿÿdusÿ-ki wahe. Tii juhuyu aõma ityhydÿÿdu mahãdu wiòhedÿÿduõ juhutyhy rare. <sup>9</sup> Tii heka inaubiòwa iriòre rare. Tahe heridu aõkõ ijadõma mahãdu rare. Ijadõma mahãdu heka Rybewihikÿmy rybeduõle rare. <sup>10</sup> Tahe aõutxu taile watxiwãhãreny. Tahe hãbuõ dehemynyde Judeia bedede-ribi, moma inire Abusi. Tii tule Deuxu rybe-di rarybemyhÿre. <sup>11</sup> Idi tahe nade inyorarenymy. Tahe rimyre tii Paulo wereysana. Tawahe idile rimyre rexitaare tebò-wana. Idi tahe rarybere: —Deuxu Tyytybytyhy wa kiamy rarybere: —Kia wereysana wedu heka iwese rataataamy rãire wesele heka tule rataataamy rÿikre Jerusalẽ-ki judeu mahãdu heka kia riwinykre ta riwahinykre judeukõdu mahãdu-ò. <sup>12</sup> Tamy raholarenyre tahe, raryberenyre Paulo dee raõkremy Jerusalẽ-ò. Jiarÿboho raryberenyre tamy tule ijõ tule tamy raryberenyre. <sup>13</sup> Tahe Paulo rarybere: —Hirenyõmyke, tiwabe-dewodÿÿnytenyteri. Rexiywinymy watxireri Jerusalẽ ròtena-ò aralòkemy. Tamy sohojile aõkõ kÿny, tule Deuxu dee wikeki tahe arurukre Inynyrÿni òraru-ki. <sup>14</sup> Timy heka Paulo nohõti rareadÿÿrenyõke tiemy tanonanamy rara. Tahe rarybemy rahudi kiamy tarybe-ò resere Deuxudewilemy rotÿÿnymy ratxike.

<sup>15-16</sup> Iribi tahe iny aõna aõna rexiywinymy Jerusalẽ-ò roirenykemy. Ijõ ityhydÿÿduõ Cesaria-ribi iny-wana roirenyre. Tahe rethemynyrenyre, Menasõ heto-ki rasÿnyrenykemy ityhydÿÿdu riwadyrenyre. Menasõ heka juhutyhy ityhydÿÿdumy ralòmny raremyhÿ. Juhuyu tii Xibri bedebute-ki rasÿnymy raremyhÿ.

<sup>17-18</sup> Jerusalẽ ityhydÿÿdu mahãdu ibutumy awimy riwamyrenyre. Jiarÿ, Luka wahe, Paulo-wana, ijõ ityhydÿÿdu-wana. Ijõ txu biòwamy tahe Paulo riwadyrenyre Txiaumy robikremy. Tule ijõ Jerusalẽ dohodÿÿna matuari mahãduõ tai ronyre. <sup>19</sup> Wirirybenymy rahudi tahe, Paulo tamy relyyre aõhebo Deuxu tamy rotÿÿnyremy. Timybo judeukõdu mahãdu Deuxu rityhynyremy. <sup>20</sup> Kiamy roholareu, Deuxumy realàrenyre ibrò-kí. Tai tahe inyõ rarybere: —Paulo, sòwemy judeu mahãdu rityhynyre. Kai teeryte, inyseriòre, ibutumy judeu mahãdu bedede ywina riywinymy ratximyhÿhy. <sup>21</sup> Inyõ umy rarybere, raroimyhÿre kaki Jerusalẽ-ki. Judeu ityhydÿÿdu mahãdu-ò rarybere: —Paulo he Moisesi bedede ywina-ribi nohõtirosakemy tii riteònyre. Paulo rierynanyreri judeu ityhydÿÿdu mahãdu-ò kia judeukõduy-ki rasÿnyre mahãdu-ò. Kia inyõ riki rarybere, Paulo uladunotyky resyna riteòdÿÿòreki riki. <sup>22</sup> Tii kÿnyhe roholarenykre kaò themynyterimy. <sup>23</sup> Tai kiamy rikiwinyrenykre. Inaubiòwa hãbu katxi rare tarade riwysynykremy. Deuxu-ò tarybetyhy riwahinyrenyre, tai tahe tarade riwysynykremy. <sup>24</sup> Kai tule makre iwesele arade riwysynykre Deuxu dohodÿÿna heto-ò. Tahe iradereny synaòwumy biòwynykre. Tai tahe ibutumy aluukre judeu mahãdu bedede ywina tetyhynmahãteki wahe. <sup>25</sup> Aõ inyboho ka judeukõdu mahãdu. Ka bedede ywinaõ rityhynykemy aõkõ tuu iny ratxirenyre. Kaa adeereny tuu rarybewãhãrele rityhynyrenykemy: —Ka aõma rÿsÿna ritxoo rÿsÿnamy iwahidÿÿnalemy irÿsÿõmy, tule iròdude ihãlubu

iijeradÿÿõreri, uritere irÿsÿõmy, tule òta òta òraru widÿÿõmy. <sup>26</sup> Tai tahe Paulo rarybere: —Hÿde, tii ariwinykre. Tahe Paulo rare Deuxu dohodÿÿna heto-ò kia hãbuõ-wana. Tahe ibutumy iny rieryre xiwenaõ riwinykre wahe, tamy dori raryberenyre.

<sup>27</sup> Tahe debòinatxi reurò txu-di riwinykremy. Idi ka debòinatxi reurò txu rexihudi tahe iòhòmy. Tahe Asia bedede ludu judeu mahãduõ tuu robira. Tiiboho iny-ò rarybere Paulo rimykre. <sup>28</sup> Sòwemy iny tamy wi rotyre Paulo òludumy. Tiiboho kiamy rirajuarenymy: —Haeli mahãdu, wylemy bodoike. Biwawiòhenanybenyke. Ka hãbu ratxireri iny bedede ywinareny òludumy ritÿÿnynymy rÿimyhÿre. Iny dee narybemyhÿde judeu mahãdu bedede ywina rityhynyòkemy, tule iny Deuxu dohodÿÿna hetomy, judeukõdu kawo-ò didyde tai tuu ribinadÿÿnyreri. <sup>29</sup> Juhuu tahe ijõmy robire hãbuõmy hãwãhãkÿ-ki Paulo-wana ratxirerimy. Trofimo inire. Tii heka Efesu hãwã mahãduõ ityhydÿÿduõ rare, judeukõdu mahãdu aõkõ tii ihÿre. Tahe judeu mahãdu ròhòtynyre Paulo dohodÿÿnahetowo-ò Trofimo ridyramy. Tahe Paulo ridyòlere. <sup>30</sup> Tahe sòwemy iny rakyarananyre tamy, aõma kia hãwã hãkÿludu mahãdu. Sòwemy iny rarybemy rÿimyhÿ, rajeijeimy rÿimyhÿ. Paulo tahe retÿÿhirenyre dohodÿÿna hetowo-ribi, ijòtòbòna riratòbònyre. <sup>31</sup> Tahe rirubunykeny rite-lenymy heka. Tahe soldado dinodu tyhy roholare aõma ibutumy Jerusalẽ hãwã-ki jei jei-di rÿireri. <sup>32</sup> Tai tahe soldado tawedu diteònyde kia tai jei jei mahãdu rÿireriò. Tahe soldado robirenyrau, riixãwidinyrenymy, Paulo òhòtedÿÿ-ribi. <sup>33</sup> Kia soldado wedu tyhy Paulo mynymy riteònyre. Tahe ritaataarenymy womati reroti-di. Tahe rexitònyre kia inydee mobo he ratxireri. Aõhebo he tii rotÿÿnyrerimy. <sup>34</sup> Ijõ heka iwitxiramy rarybemyhÿre, ijõ tiilemy rarybere. Tai tahe soldado dinodu bedede rieryòhyra timyrebomy, ibutumy iny rirajuareki. Tahe ridykemy riteònyre. Tahe soldado heto-ò Paulo-di roirenymy. <sup>35</sup> Ryòwòna-di rotuòrau tahe, hãwã mahãdu aõkõre he reburera. Soldado mahãdu Paulo taaxiò tyre ritidimy idi rara iny rimyheny. <sup>36</sup> Iny he rirajuamy rarybemyhÿre: —Bidybenyke, birubunybenyke wahe. Myhe soldado mahãdu hewomy rirahumyhÿre.

<sup>37</sup> Tahe rirònykremy roirau tahe, Paulo soldado dinodu-ò rarybera: —Adee inihe wanyrÿ, ararybekemy watxireri. Tahe soldado dinodu ritÿÿraxinyre: —Kai aõbo kreku mahãdu rybe teeryte. <sup>38</sup> Kai jiarÿ araeryre. Kai Egito mahãdu dinoduõ tate, ibutudÿÿdu wedu tate. Kai 4000 iny aõbina widÿÿdu tedyte bederahy-ò. <sup>39</sup> Aõkõre, Paulo dirawyònyde, tii aõkõ watxire. Jiarÿ Roma hãwã mahãdu tyhyre jiarÿ rare. Wahãwã, Tarso hãwã rare, hãwã riòre aõkõ Silisia bedede-ki. Judeu mahãdu tule jiarÿ rare. Kaki iny mahãdu-ò ararybekemy watxiwãhãre. <sup>40</sup> Tahe soldado Paulo —ò rarybere: —Tahe marybeke. Tahe lamamy rÿire inydee rarybekemy. Paulo tebò riteòsinyre riijohonadÿÿnykeny. Tai ibutumy iny riyrymy rÿirenyre. Judeu mahãdu rybe-di tamyreny rarybere.

## 22

<sup>1</sup> Kawese Paulo tamyreny rarybere: —Waseriòre, waluuboho, wabed-edÿÿnanamy adee arelyykre. Wamy bohولاتyhyke.

<sup>2</sup> Judeu mahãdu rybe-ò roholareu tahe, riyrytyhymy rorukurenymy. Tii heka rarybere: —Jiarÿ judeu mahãdu jiarÿ rare. Raumynymy Tarso hãwã-ki. Kia Silisia bedede-ki rare.

<sup>3</sup> Kaki Jerusalẽ-ki ratyryritinymy rarewãhã, Kamalie ninadu tyryritina-ki. Ibutu Judeu mahãdu bedede ywina bedede reeryre Kamalie-wana. Ibutumy Moisesi bedede ywina-di riwaerynanymyhÿre. Tii tahe reywinywãhãre, retyhynytyhywÿhÿre. Ibutumy Deuxu bedede ywina ariwinykeny ixi-di

rahõtinywãhãre iwese wiji iwidÿÿmy tarutenyteri wesele wahe. <sup>4</sup> Jiarÿ ka ityhydÿÿdu mahãdu aõhõkÿmy rotÿÿnynyhÿremy reteòwãhãre ihyyle ijõ rubudÿÿmy reteònywãhãre. Hãbu hãwyy-wana reròtenywãhãre ròtenawo-ò. <sup>5</sup> Waaõmydÿÿnanamy bierybenykre-wana, tamy marybeke dohodÿÿna wedu-ò, matuari mahãdu-ò. Dohodÿÿna wedu tyyriti rewyre Damasu hãwã dohodÿÿna heto-ò. Tai tahe tyyriti-di risÿnyre ibutummy ityhydÿÿdu mahãdu aõhõkÿmy rotÿÿnykemy, tule womati reroti-di rataataakemy Jerusalẽ-ò kididykemy. <sup>6-7</sup> Iòhòmy txutyemy iijira-ò, Damasu hãwãry-ki watxiwãhã. Tahe loosòna itÿnyhÿkÿmy wadee dehemynyde. Bedetxile resere. Tahe rybeõ raholare: —Salu, Salu, aõherekiwexe aõbina binahakÿle wadee tadiwinymahãte. <sup>8</sup> Tahe jiarÿ rarybere. Mowexe wadee rarybereri, Wanyrÿ. Tii rarybere: —Jiarÿ Nazare ludu watxireri, Jesuisi. Kai aõbina binale wadee tadiwinymahãte. <sup>9</sup> Hãbu wawana rÿimyhÿ, aõ rieryõhyyre aõmybo wadee rarybemyhÿre tahe loosònamy he robirenyre. <sup>10</sup> Tai tahe rarybere jiarÿ: —Aõwexe ariwinykre, Wanyrÿ. Rarybere: —Myike wahe, make Damasu hãwã-ò. Tai tahe inyõ adee kanarybeke aõbo biwinykemy. <sup>11</sup> Tai tahe rabiõmy rãiwãhã kia loosòna ritÿÿrÿhÿkÿreki. Tai wabiòwa ryy wadee ritÿÿnyre wadebò-ki riwamymy Damasu-ò arehemynykemy. <sup>12</sup> Tai tahe hãbuõ wadee rehemynyre, Ananiamy ninadu. Tii heka Deuxu tyhydÿÿduõ rare, bede ywina rityhynymyhÿre, ibutummy Judeia mahãdu, Damasu hãwã-ki heka tuure. <sup>13</sup> Tii tahe wadee rarybere: —Waseriõre, Salu, aruebimykexityre bobikemy. Aõwesele tahe rabimy reare. Ananiamy rabire. <sup>14</sup> Tahe ixityre wadee narybede: —Inytyby Deuxu juhUU aratare, aõbo tamywimy bierykemy. Tule Jesuisimy bobikemy, Deuxu òbiti hãbu. Tule boholakemy aõbo tii adee kanarybekeò. <sup>15</sup> Tai tahe biwykre irybewihikÿ tÿmyra ibutu bede bede iny-ò. Belyyke timybo taholatemy, tabitemy. <sup>16</sup> Tai tahe rooreheõmykre. Wijile makre maratysebekre. Aòraru-ribi yrahakÿlemy mabekre, Wanyrÿnimy tetyhynyte xiery. <sup>17-18</sup> Idi tahe Jerusalẽ-ò rehemynyreu wahe, aõutxummy ixitòenymy rarewÿhÿ Deuxu dohodÿÿna heto-ki. Tai raholarerasina wese-ki aõma Deuxu wadee rarybererimy: —Wylemy bòhònykre Jerusalẽ-ribi. Warybemy tamy marybekre, rityhynyrenyõtyhy. <sup>19</sup> Tahe Inynyrÿ-ò rarybere: —Ibutummy hãwã-ki aityhydÿÿdu mahãdu rehãtenyre, rewotomonyre, reròtedÿÿnyre. Ibutummy kaki kia rierymy roimyhÿre. <sup>20</sup> Arybe tÿnydÿÿdu rirubunyreu, moma Estevaõ, jiarÿ taile watxiwãhãre. Rewiòhenanywÿhÿ irubudÿÿdu mahãdu tyy reyrubunyre aõma mana-di rihurenyreu wahe. <sup>21</sup> Tahe Deuxu wadee rarybere: —Bòhònyke wa Jerusalẽ-ribi. Irehetyhymy arateòkre judeukõdu mahãdu-ò. Kia Paulo tamyreny rarybere.

<sup>22</sup> Tahe kia iny roholamy rÿimyhÿre kia Paulo iximy relyyreò. Tahe raykarananymy rryyre: —Bidyke karibi ahana-ò, birubunykexityre. Irumy rareòkre idi watxiwãhãrenyre. <sup>23</sup> Tatyky riohowire, brybysi-di biu-txi rehure, rryrymyhÿrenyre. <sup>24</sup> Soldado dinodu tahe riteònyre iwo-ò ridyrenykemy awaru òhòtenahãkÿ-di tuu raòhòtekemy. Soldado dinodu rierykemy ratxireri aõherekibo iny tamy rakyarananyraki wahe. Tii rarybekre òsana tuu raòhòtekeki. Kia soldado dinodu rõhõtinyre. <sup>25</sup> Tahe Paulo ritaataarenyre. Imy rahudi tahe Paulo rarybere soldado dinodu-ò: —Jiarÿ Roma hãwã mahãduõ rare. Wamy maòhòtebenyõtyhy, aywisidÿÿna mahãdu wadee roholare tebutunyõteki. Kia riwadÿÿkòkemy roimy rare. Abede ywinareny adee rarybere kia widÿÿõmy. <sup>26</sup> Tai tahe kia soldado dinodu tadinodu-ò rare. Tahe tamy rarybere: —Kowa hãbu, Roma hãwã mahãduõ rare. Tai tahe aõbina bina tamy iwidÿÿõmy. <sup>27</sup> Kia roholareu, tii rara Paulo-ò tamy rÿÿraxikemy:

—Inatyhybe Roma hãwã mahãduõ aõbo atxiteri. Paulo tahe narybede: —Kohe, jiarÿ, kia mahãduõ watzireri. <sup>28</sup> Tai tahe soldado dinodu narybede: —Jiarÿ tule watzireri. Nieru sõwe-di reòwynyire tuu aronykremy. Tahe Paulo rirawyònyre: —Jiarÿ tiu kia watzireri. Waha dori Roma mahãduõ raremyhÿ. <sup>29</sup> Tai he soldado mahãdu iribi ròhònyre aõwesele tii Roma mahãdu ratxire riki. Soldado dinodu tule ruberure tii dori rataataamy riteònyreki.

<sup>30</sup> Txu biòwamy ritare ròtena-ribi ròhònykemy. Judeu xiwewahidÿÿna dinodu inyõ ributunyre ywisidÿÿdu mahãdu-wana. Tahe Paulo ridyre tamy. Tii dori rierykremy ratxireri aõherekibo judeu mahãdu Paulo deramy rÿireri.

## 23

<sup>1</sup> Paulo tamyreny retehere, dinodu mahãdu-ò wahe. Tahe rarybere: —Waseriòreboho, Deuxudile watzimy ramahãre. Tiiemy aõbina binamy aõkõ watzireri, tamy iluuna-di tyhy watziwãhãre. <sup>2</sup> Anania hãbu-ò rarybere, iòhòmy Paulo-ribi rÿireriò: —Iry-ò bihetenybenyke. <sup>3</sup> Paulo tahe tamy narybede: —Kai wa aõ aõkõ tate. Hetotira ura wese tate, awo arayky isuisure. Waywisidÿÿdu wesemy talòmy atxiteri, tahe wahetedÿÿmy tarybeta. Kia bede ywina rarybera wesemy aõkõ tewisÿnyteri. <sup>4</sup> Tahe iòhòmy Paulo-ribi rÿireri, tamy rarybere: —Kia wesemy rybeõmy Deuxu xiwe wahidÿÿdu wedu-ò. <sup>5</sup> Tahe Paulo rarybere: —Aõkõre, reeryõhyre aõxiwe wedubo ratxireri. Tyyriti kiamy rarybemyhÿre: Tiu riki wedumy aõmy rybebinamy aõkõke. <sup>6</sup> Idi tahe Paulo rexieremy resere. Tahe ixidee røhòtinyre. Ka iny sõweyre fariseu mahãdu heka rare. Iyrejura tasÿ saduseu mahãdu rare. Tai tahe Paulo ryryre: —Waseriòre mahãdu, jiarÿ fariseu mahãduõ rare. Waha, wylabieboho ibutumy fariseu roire. Rubu-ribi ixixana retyhynywãhãre. Tai tyhy tahe kia-ò, ywisidÿÿdu-ò wiji diwadyde. <sup>7</sup> Imy rahudi tahe fariseu mahãdu saduseu mahãdu-wana wiribi rihitxinyre. <sup>8</sup> Saduseu dori rubu-ribi ixixana rityhynyõhyymyhyrenyire, tule ÿju, tyytyby-wana rityhynyõre. Fariseu mahãdu tahe, kia ibutumy rityhynymyhyre. <sup>9</sup> Tai tahe sõwemy rajei jeimy rÿimyhÿ. Tahe fariseuõ rarybere Paulo òbitimy ratximyhÿ. Aõ teòsamy tai tuu arobirenyke kÿnyhe aõkõre. ÿjuõ òsana tamy rarybera ada tyytyby aõbo. <sup>10</sup> Tai ta tarurutyhymy ryryrenyire. Tai tahe soldado dinodu ruberure aõma Paulo riykaykaketxi roholare. Tai rarybere tamy: —Iribi bitake, idi boibenyke ixyby soldado heto-ò.

<sup>11</sup> Rummy tahe Paulo weribi Inynyrÿ tamy narybede: —Brebuõmy aõ-di nohòtiõmyke ixi-di. Iwese kaki Jerusalẽ hãwã-ki wamy tarybete wesele heka Roma hãwã-ki wamy marybekre.

<sup>12-13</sup> Tahe biurasòtxu he judeu mahãduõ wi dotyde Paulo rubudÿÿmy. Iny inatxiwa ituemy hãbu kia wese raryberenyre: Rikiroxirenyõtyhy bemy rikiõrenyõtyhy. Paulo rurukeki xiery ta rikiroxirenykre. <sup>14</sup> Tahe xiwe wedu mahãdu-ò tiiboho roirenyre. Judeu matuari mahãdu-ò tule kia ibutumy relyyrenyire iwese Paulo rubudÿÿmy ratxireri wese. <sup>15</sup> Tule tamyreny rarybere: —Kaiboho ixityre marybebennyke soldado dinodu-ò manakremy Paulo-di ywisidÿÿdu-ò. Tamy dÿÿraximy idi ratxireri tiiboho røhòtinykre. Tai tahe ry kana-ò rearaki tahe ijoi rikirubunykre. Kia judeu mahãdu xiwe wedu-ò rarybere. <sup>16</sup> Tahe Paulo seriòre woludu, ilana rubudÿÿmy rarybereò roholare. Tahe ralore soldado heto-ò tahe tuu Pauloko relyykemy. Tahe relyyre. <sup>17</sup> Kia roholamy rahudi ta Paulo rariòwyre soldado dinodu tamy kanalokremy. Kiamy rarybere: —Ka weryry bidykre adinodutyhy-ò, aõma, ijyy-di ratxirerimy tamy relyykemy. <sup>18</sup> Tahe ridyre

soldado dinodu tyhy-ò tahe rarybere: —Paulo kÿny ka weryry-di riwateònyreri aõmybo ako relyykre. <sup>19</sup> Tahe dinodu weryry axiò iyre ribi rimyre, tahe iny-ribi rirehenyre rarybekemy: —Aõbo wexe wako belyykre, weryry. Tahe relyyre: <sup>20</sup>—Wylana Paulo ridykre judeu mahãdu adee rex-itòenykre ratxirenyre. Tiiboho adee raryberenykre: —Rikitÿÿraxinykre ijõ aõmydÿÿnana. <sup>21</sup> Uritere tamy boholaõkre, weryry rarybere, idyõmykre tamy. Hãwã mahãdu sõwere rexiwòmy rÿikre, iny inatxi wa itue hãbuny, wylana rubudÿÿmy. Tii ruruõkeki, riroxiõtyhy, bemy riõõtyhy. Kiawese ka hãbu mahãdu rarybemy ramyhÿre. Ahana õsana inyõ rÿireri wylana ridykre adee kedexitòenykre. Wylana òludu tahe ryijãti-ki rexiwòmy rÿireri. <sup>22</sup> Tai soldado dinodutyhy weryry-ò rarybere: —Uritere inyõ ierysõmykre wadee tuu telyyteri. <sup>23</sup> Tahe inatxi soldado dinodu rarariòwyre, tahe tamy rarybere soldado dinodu tyhy: —Aõma, 200 soldado widotykre inataõ òra txu dòhòny-ribi, ijõ 70 soldado awarutyre-ki, ijõ 200 soldado tõnori-di. <sup>24</sup> Kia ibutu-wana Paulo bidybenykre awarutyre-ki Cesaria hãwã-ò. Biyrubunymy boibenyke Feli, kia bededinodu-ò. <sup>25</sup> Tahe tyyriti riwinyre kia wese:

<sup>26</sup> —Jiarÿ Laujiu Lucio, warybe reritinyreri. Warybe wehityhyna re-wahinyreri Feli-ò, Wanyrÿtyhy, bede dinodu-ò rewahinyre. <sup>27</sup> Hãbuõ adee reteònyreri. Tii judeu mahãdu rimyre tahe rirubudÿÿmy riwisÿnyre. Tahe soldado reteònyre ritakremy rubu-ribi, tii Roma hãwã mahãdumy rareki. <sup>28</sup> Redyra heka ywisidÿÿna mahãdu-ò. Aõherekibo rimyrenyremy arierykemy. <sup>29</sup> Tabede ywina òrarukile teramy tamy reare, kia reerymy rawãhãre. Iny bede ywina òraru-ki aõ aõkõ tii riwinyre. Tai rurukemy aõkõ idi rewisÿnyre. <sup>30</sup> Judeu mahãdu rarybemy ramyhÿre irubudÿÿmy. Kiamy raholareu tahe, adee reteònykemy resere. Tule irubudÿÿmy rõhõtynyra mahãdu adee rarybekemy reteònyre. Tiiboho aõbo raremy rarybekre. My kie warybe re-wahinyre.

<sup>31</sup> Idi tahe soldado mahãdu Paulo ridyre, iwese idinodu riteònyre wese. Rudile ridyre Atxipatxi hãwã-ò. <sup>32</sup> Tahe biurasòtxumy tahe tatilemy rare mahãdu ròsere soldado heto-ò. Ijõ soldado awarutyre ludu Paulo iridyre Sesaria-ò. <sup>33</sup> Tahe rehemynyre Cesaria hãwã-ki. Rare he bede dinodu-ò. Paulo tamy riwahinyre tyyriti-wana. <sup>34</sup> Kia tyyriti-di tii rariareu tahe, tamy ritÿÿraxinyre: —Tiribibo tate Paulo. Tahe Paulo dirawyònyde: —Jiarÿ, Silisia hãwã mahãdu rare. <sup>35</sup> Tahe bede dinodu narybede: —Kaa hãbu mahãdu wii kodotykreu, kedehemynykreu, aroholakre inihe arybe-ò. Tahe iyrubudÿÿ idi risÿnyre Herodi ywisidÿÿna heto-ò, Pretòriu ninadu-ò.

## 24

<sup>1</sup> Iruyre txu reare rexihudi tahe, Anania, xiwena wedu tyhy, judeu mahãdu matuari-wana rehemynyre, ywisidÿÿna mahãduõ-wana rehemynyre, moma, Tertuliu inire. Paulomy aõbinabinahãkÿ rybemy rareri bede dinodu-ò. <sup>2</sup> Tahe Paulo didyde. Tertuliu rarybere Paulomy. Awiõmy rybe tahe ròhònyre. Juhuu Feli-ò rarybere: —Kai Wanyrÿ tyhy, awihyymy heka atximahãte wadeereny. Tiiemy bede ywina inydee tewahinymahãte. Ibutumy iny bede hãwã hãwã-ki iny tewiòhenanymahãte. <sup>3</sup> Tai tahe omy reàlãtyhymy he watxiwãhãre. Urihimyòle adee Paulo aõmydÿÿnanamy ararybekre. <sup>4</sup> Txioi inihe làhà, bohobeny. <sup>5</sup> Tiiemy jei jehy ratximyhÿre Paulo òraru-ki. Tiiemy judeu mahãdu, my heka rarybehyy ratximyhÿre. Tii Nazare hãwã dohodÿÿna mahãduõ rare, kia weduõ rare. Tii Jesuisi rityhynyre. <sup>6-7</sup> Aõkõre, iny Deuxu dohodÿÿna heto ribinadÿÿnyre, brebuna rÿirerimy ihÿre Paulo òraru-ki. Remyrenyre tahe, ywisidÿÿmy watxiwãhãre iny bede ywinareny



rarybere wesemy. Tahe aõkõre, Lisiu soldado dinodu tyhy ritare iny-ribi wotõmona-di. <sup>8</sup> Tahe inydee rarybere: —Boibenykre Feli-ò. Tii adee roholakre. Kia tahe Lisiu rarybere. Tahe jiarÿ tule rarybere. Boibenykre Paulo dÿÿraximy kia inatyhy aõbo ada aõkõre aõbo. Tertuliu kia ibutummy rarybere. <sup>9</sup> Ijõ judeu mahãduõ rarybere: —Kia inatyhy ibutummy inatyhyle ratxireri, aõmybo Tertuliu raryberemy.

<sup>10-11</sup> Tahe bedede dinodu Paulo-ò riteòsinyre rÿikemy, rarybekemy. Paulo tahe tamy rarybere: —Wanyrÿ bedede dinodu tyhy, sõwe beòra aõmydÿÿnana-di ywisidÿÿna-di atximahãte. Jiarÿ kia reeryre. Tai reysawãhãre adee ararybekremy. Waò inatxi reurõtsumy heka Jerusalẽ-ò adehemynyde. Iny-ò bitÿÿraxinykeki, wylemy ka bieryke inatyhy raremy. Jiarÿ Deuxu dohodÿÿna heto-ò rehemynyre Deuxu reàlakemy. <sup>12</sup> Tiu heka jei jei rewinyõhyywãhãre dohodÿÿnaõ-ki aõkõ, hãwãy-ki aõkõ. <sup>13</sup> Aõmybo wamy rarybemy rÿireri heka, aõ inatyhy aõkõ. <sup>14</sup> Sohoji aõmydÿÿnanamy tahe akoreny arelyykre, inatyhy rare. Retyhynywãhãre heka aõbo Jesuisi rierynanymyhÿremy. Ti-iboho watyhydÿÿna rininirenyre dohodÿÿna mahãdu iwitxira. Kia hãbu rityhynymyhÿre wesele jiarÿ tule Deuxu inytyby retyhynymyhÿre. Ibutummy bedede ywina tyyriti-ki riritinymy rÿimyhÿremy retyhynywãhãre. <sup>15</sup> Iny, òrarudu mahãdu, ityhydÿÿdu mahãdu kedeixixakremy rubu-ribi. Kia retyhynywãhãre. <sup>16</sup> Tiu ibutummy òbiti widÿÿmy raruwãhãre. Deuxu-txi tule ibutu hãbu rue-ki. <sup>17</sup> Jerusalẽ-ribi rarewãhãu, tiwese beòra rewyre tahe ixyby dòòsede Jerusalẽ-ò aõkõ mahãdu wahidÿÿna wesemy ariwahinykremy xiwena wese Deuxu-ò. <sup>18</sup> Deuxu dohodÿÿna heto-ki watxiwãhã, òbitimy rãire, ibutu bedede ywina reywinymy rawãhãre. Tahe waxiwenadi waòludu wamy robire. Iny sõwemy weroramy watxiwãhã. Rybe jei jei rarybeõhyyre. Tahe Asia bedede judeu mahãdu tai rÿimyhÿ. Tiibohole rybe jei jei riwinymyhÿreny. <sup>19</sup> Wamy aõmydÿÿnana rarybekremy ijõdikeki, rokoholakre. Kaki aõkõ ratximyhÿreny. <sup>20</sup> Aõbo waki teòsamy rahare ywisidÿÿna mahãdu-ko rãireu, tamy rokoholakre. <sup>21</sup> Sohoji aõmydÿÿnanalemy rarybere teòsamy. Kiamy rarybere: —Retyhynyre rubu ixyby kedexixakre. Tai ywisidÿÿna mahãduko-ki watxiwãhã.

<sup>22</sup> Feli bedede dinodu rierymy ratxireri aõmybo ityhydÿÿdu mahãdu rityhynyre. Tai rarybere judeu mahãdu-ò: —Lisiu, aõma, soldado dinodu tyhy rehemynyreu, bedede rikerydÿÿnanykre. <sup>23</sup> Tahe Paulo ròtena heto wese-ò ratximyhÿreki, riòòsedÿÿnyre. Ta rarybere he soldado dinodu-ò: —Ywimy idi ratximyhÿkemy. Tule rarybere: —Iò ixinamy terina mahãdu iroramy kanakre. Ixinamy uriònomy tamy kidiwahinykre awityhy roimyhÿkemy.

<sup>24</sup> Iribi nade Feli tahãwyy-wana Drusila. Ihãwyy heka judeu mahãduõ rare. Riteònyre Paulo-ò tamy kanakremy, tamy kanarybekremy. Paulo rarybere tamy: —Jesuisi Kristu kia tyhydÿÿnamy. Tii òbiti-di iny rõhõtinkyemy tule ywisidÿÿna txummy Deuxu kanakremy ritÿnynyre. <sup>25</sup> Tahe Feli ruberure. Makre, tamy rarybere, aõwaxiny tiubo wabededÿÿnana-di my kÿnykreu, ixyby adee ararãriòwykre. <sup>26</sup> Tule Feli ijõ nieru Paulo-ribi ritakemy ratxireri, tai rarariòwyre ijõttxu ijõttxu tii-wana rarybekremy. <sup>27</sup> Inatxi beòramy bedede idi rÿire. Iwitxira bedede dinodu ralore Feli deròwy. Porsiu Festu inire. Feli tahe judeu mahãdu tuure tamyreny aõõ riwinykemy ratxireri tahe Paulo ririre ròtenawo-ki.

## 25

<sup>1</sup> Cesaria hãwã-ki bedede dinodu tÿmyraõ ronyre. Festu inire. Inataõ txu-di tahe iribi rõhònyre Jerusalẽ-ò rakemy. <sup>2</sup> Tahe xiwe dinoduõ, judeu mahãdu dinoduõ tamy rarybere Paulo aõmydÿÿnanamy. <sup>3</sup> Tamy rexitòenyre Paulo-di

wylemy kanakremy. Kiamy heka rexinohõtidÿÿnyre ryrowetya-ki rirubun-  
yrenykremy. <sup>4</sup> Aõkõre, Paulo ratxirekre Sesaria-ki, Festu rarybere, jiarÿ tahe  
aròsekre ele elemy kowa-ò. Kaiboho adinodu mahãdu wadi roikre kowa-ò.  
Rokoholarenykremy ywisidÿÿna-ò. <sup>5</sup> Tule kaiboho aõrybedikeki, Paulomy,  
kowa-ò rarybekremy.

<sup>6</sup> Iribi tahe debòwiò txu òsÿny txu idi rÿidi tahe ixyby Festu dòðsede  
Cesaria-ò. Irootxu tahe Paulo ywisidÿÿna ròhõnyre. Tahe Paulo ridykemy  
riteõnyre ywisidÿÿna butuna-ò. <sup>7</sup> Tahe judeu ywisidÿÿna mahãdu heka  
sõwemy tuu aõbina binahakÿmy Paulomy rarybemyhÿre, Jerusalë-ribi rehe-  
mynyreu. Aõ inatyhymy aõkõ. <sup>8</sup> Paulo tahe rexitxiõnyre: —Jiarÿ kÿny  
kia-di aõkõ watxiwãhãre. Tii rarybere: —Tiu heka judeu mahãdu bede  
ywina ratyre aõna aõnamy ratÿÿkõre. Tiu heka Deuxu dohodÿÿna hetomy  
rewinyõwãhãre, tiu Roma dinodu bede ywina ratyre aõhe ratÿÿnyõwãhãre.  
<sup>9</sup> Idi tahe Festu rÿÿraxire Paulo-ò: —Kawexe texiywinymy atxiteri Jerusalë-ò  
makremy. Kowa ywisidÿÿna ariwinykemy adee roholakremy. Kiamy Festu  
rarybere aõwiihikÿmy riwinykemy ratxireri judeu mahãdu dee. <sup>10</sup> Tahe  
Paulo rirawyõnyre: —Aõkõre, arakre he Iòlò tyhyòhòkÿle arehemynykre.  
Tii wadee roholakre. —Jiarÿ dori ixiywinyhyy tamy arakre. Kai teeryte  
jiarÿ aõkõ tudÿÿduramy. <sup>11</sup> Aõma aõbo waki binamy relera-wana heka  
arurukre. Aõkõkeki tahe aõbo awihykyle rewinyre-wana heka timy inihe  
warubudÿÿõmy. Iòlò tyhyle wadee roholakemy he ixide rahõtinyreri. <sup>12</sup> Festu  
tawihedÿÿdu-ò rarybere. Idi ta dirawyõnyde: —Awire, iòlò tyhy-ò atxiteri  
urenana kÿnyhe aõwaxiny makre.

<sup>13</sup> Iribi tahe aõutxumy tahe iòlò Agripa dehemynyde, Benise tariòrese-wana.  
Festu roramy rareri. <sup>14</sup> Tahe tii-wana rarybemyhÿre aõutxu, Festu-wana.  
Idi tahe Paulo aõmydÿÿnanamy iòlò-ò rarybere: —Ròtenawoluduõ roireri  
ròtenawo-ki. Tai he Feli ririre jiarÿ iaõmydÿÿnana arierykremy. <sup>15</sup> Aõma  
Jerusalë-ki watxiwãhãu, dohodÿÿna wedu mahãduõ wadee heka rarybere:  
—Tii arirubunykemy heka wadee rityhenymyhÿre. Judeu mahãdu matuariõ  
tule kia rarybere. <sup>16</sup> Tahe tamy jiarÿ rarybere: —Aõkõre, aõma Roma mahãdu  
kia bede ywina dori tuu aõkõ roimyhÿre. Juhu heka rakre ywisidÿÿna-ò tahe  
relyykre heka iximy, taòludu mahãduko-ki. <sup>17</sup> Kaò juhu ditehemynydenydeu,  
tamy rarybere. Ijõ txu he reyrubunyre ywisidÿÿna-ò roholakremy tahe  
Paulo ridykemy aditeõnyde. <sup>18</sup> Tahe aõmybo tamy rarybere heka, iwese  
rahõtinyre wese aõkõ tii riwinyre. <sup>19</sup> Aõbo ityhynareki heka tuheka rÿire.  
Inyõ heka tii rarybemyhÿre Jesuisi rurulemy. Tahe Paulo rarybemyhÿre  
irulemy ihÿre. Tai kÿnyhe rimymy ramyhÿre. Riròtenymyhÿre. <sup>20</sup> Tai  
tahe tiemy rahõtinyre: Timy taheka aõhe arotÿÿnykre ka aõmydÿÿnana-di.  
Paulo-ò retÿÿraxire aõma Jerusalë-ò aõbo rakemy ywisidÿÿna-ò. <sup>21</sup> Tahe Paulo  
rarybere: —Iòlòle rakremy aõbo. Tii wamy roholakeki, teòdu waòrysmy  
ariraokre. Tai tahe ròtena-ò ixybyle rerutyre. <sup>22</sup> Tahe iòlò Agripa rarybere:  
—Jiarÿ aroholakre inihe kia hãbumy. Tahe Festu dirawyõnyde: —Biurasòm  
tamy bodoholakre.

<sup>23</sup> Idi tahe itxu biòwamy dehemynyde, iòlò, Benise-wana, ywisidÿÿna  
heto-ò. Ibutumy he iny ralore, soldado wedu mahãdu, iny ityhymy rÿira  
mahãdu, ibutumy raloralore. Tai tahe Festu Paulo didyde. Tahe rarybere:  
<sup>24</sup> —Iòlò Agripa, ibutumy ka wadee ijohonadu-wana, ka hãbu heka ibutumy  
iny he irubudÿÿmy he idi rÿireri, judeu mahãdu kaki tule Jerusalë mahãdu.  
<sup>25</sup> Jiarÿ rahõtinyreri aõ heka riwinyõhyyre tai rurukre wahe. Tai iòlòtyhy-ò  
rakremy heka ratxireri. Ariteõnykre nomy dori tii ratxireri. <sup>26</sup> Aõbo tamy  
ariritinykre. Aõ heka waritidÿÿkõnare. Aõ dori riwinykõre. Tai redyreri

adee iòlò Agripa. Tamy juhu boholakre. Iribi tahe wadee manarybekre aõbo ariritinykremy. <sup>27</sup> Tamy kÿny wateòdÿÿkõna uritere òhynaòhòkÿle Iòlòtyhy-ò ariteònyòtyhy.

## 26

<sup>1</sup> Tahe Agripa Paulo-ò rarybere: —Aõwaxiny belyykre aijyymy. Paulo he tebò riukore he rarybekremy.

<sup>2</sup> Wadeysamy he watrixeri, Iòlò Agripa. Jiarÿ dori iximy arelyykre ako. <sup>3</sup> Tule kai dori ibutu judeu bede ywina teeryte. Ibutu lahi rybe teeryte. Bodoholakre inihe wadee, ywina-di. <sup>4</sup> Tiiemy uladule aratyritinyde aõma judeu òbitina-di. <sup>5</sup> Judeu mahãdu kia rieryre. Txu rexidelenyry juhu judeu mahãduy-ki, idi tahe Jerusalẽ-ki ratyritinyre. Jiarÿ fariseu mahãduò òbiti jiarÿ rare. <sup>6</sup> Kia rybe òraru-ki wiji ywisidÿÿna-ki rãire. Jiarÿ dori retyhynywãhãre aõbo Deuxu inytyby-ò rarybere. <sup>7</sup> Jiarÿ Deuxu rybe òlona reraòwãhãre. Tule judeu ijoì riraòmyhÿre, waòinatxi reurò ijoì mahãdu. Tiiboho Deuxumy reàlãmy raremyhÿ, rummy, txummy. Iòlò Agripa, kia raròsòna òraru-ki judeu mahãdu wadee aõbina binamy rarybemyhÿre. <sup>8</sup> Rubu-ribi ixixana jiarÿ retyhynymy hÿre. Araÿraxikre iòlò. Kia aõbohe wadeòsana raremy kaiboho tahòtinytenytere. Deuxu heka ixiby iny kidiòkesedÿÿnykre taumy tuedeòna-ò. <sup>9</sup> Jiarÿ heka juhuy awimy heka aõbina binahakÿ widÿÿ dee rahòtinyre, Jesuisi Nazare hãwã ludu dee. <sup>10</sup> Sõwemy ityhydÿÿdu mahãdu reròtenyry ròtenawo-ò Jerusalẽ-ki. Dohodÿÿna heto wedu rewawiohenanyre tyyriti riwahinyreki. Kia irubudÿÿmy wi risÿnyrenyry, jiarÿ rarybere: —Awire heka birubunybenyke. <sup>11</sup> Jiarÿ heka ityhydÿÿdu mahãdu aõhòkÿmy rotÿÿnykemy wi resÿnyre bede bede-ki. Aõbinabinahãkÿlemy ityhydÿÿdu rerybedÿÿnywãhãre. Jiarÿ aõnimy reburemy rawãhãre. Resÿbinanyre tahe tii rahenyre irehetyhytyhy-ò iwitxira hãwã-ò. <sup>12</sup> Rare heka Damasus hãwã-ò ityhydÿÿdu òrysymy. Jiarÿ tyyritidi rare, dohodÿÿna wedu ritina-di. Tule ibede ywina-di rare. <sup>13</sup> Tahe Damasus iòhòmy rareu, loosònaò diwatoosònyde, txu loosòna ratyry ihÿre. <sup>14</sup> Jiarÿboho rejuxunyrenyry tahe raholare rybeò-ò judeu mahãdu rybe-di rarybereri: —Salu, Salu, aõhereki wexe aõbina binahakÿ tadiwinymahãte wadee wimy aõkõ. Aõbina binahakÿle ixidee tadiwinymy hÿte. <sup>15</sup> Jiarÿ rarybere: —Mowe, Wanyrÿ tate. Tahe dirawyònyde: —Jiarÿ wa, Jesuisi rare. Wadi aõbina bina tewisÿnyte. <sup>16</sup> Katahe myikre. Adee rehemynyryeri, aratara ixidee, wadeòdumy mabekremy. Warybeduò mabekre. Ibutumy wamy belyymy mabekre aõhebo adee wiji rotÿÿnyryeri. Iribi tasÿ ixityre adee adehemynykre. Tule kia-di marybekre. <sup>17</sup> Ibutumy asÿ-wana arayrubunykre. Tai ta judeu mahãdu-ò arateònykremy watrixeri, judeu mahãdu-ò tule. <sup>18</sup> Iwese iny ruetà-di rÿira wese tii ihÿre. Kai tamy bitÿnynykre Deuxu aõmydÿÿnana. Tai biruejuakre, rierykremy. Biòbitinykre tamyreny òrarudu roire aõma ixi-txi tõihti reakremy loosòna-ki rariakremy, Satanasi bedelorohokÿ-ki aõkõ, kia ryki aõkõ rariakremy. Deuxu uri bede ywina rimymy hÿkre ixidee. Ibutu bede bedemy rÿira wajioimykre. Tyramy taòraru-ribi rÿira, ritamy rÿira, riwatyhynymy rÿira. <sup>19-20</sup> Tai, Iòlò Agripa, iwese warasina-ki riwateònyre wese, retyhynyhyry. Juhuy Damasus hãwã-ki jiarÿ ròhãletere, iribi Jerusalẽ-ò, tule Judeia bede-ki, ibutu judeukõdu mahãdu-ò ròhãletere. Tamy rarybere taòraru ririkemy Deuxu dee kòdòòsekemy. Ixi-txi tõihti reakremy inatyhymy aõna aõna wiwihikÿ riwinykemy Deuxu dee. <sup>21</sup> Tai judeu mahãdu riwamyre Deuxu dohodÿÿna heto-ki, warubudÿÿmy ròhòtinyre. <sup>22</sup> Deuxu tahe wawiohedÿÿdu ratximy hÿre. Tai he rãire wiji ibutu-ò ararybekemy watxiwãhãre, aõma aõbo Deuxu rybedu

mahãdu iwese Moisesi rarybere wese tamyreny rarybewãhãre kia ibutumy kanakremy. Kia sohojilemy rarybewãhãre. <sup>23</sup> Juhutyhy rarybere: —Kristu, rurukremy iribi tahe kedexixakremy rybe loosõna kidiwykremy judeu mahãdu-ò, tule judeukõdu mahãdu-ò.

<sup>24</sup> Tahe Paulo iximy rarybereu, Festu ryryre: —Paulo, kai wa itxÿtere. Aõnityhymy tatyryritinymahãte. Tai arayky tebinanyta. <sup>25</sup> Tahe Paulo rirawyõnyre: —Aõkõre wa, wanyrÿ Festu, bededinodu tyhy. Jiarÿ itxÿte aõkõre. Inatyhyrybemy rarybewãhãre. Warybe awi heka rare. <sup>26</sup> Tule Iòlò Agripa rieryre ibutumy tuu tamy rarybere. Aõ wasina aõkõ rarybere. Iòlò Agripa. <sup>27</sup> Aõbo Deuxu rybedu mahãdu riritinyre aõbo, kai tetyhynymahãte. Reeryre jiarÿ, kai tetyhynymahãte. <sup>28</sup> Tahe Agripa riixãwididÿÿnyre rybe-ribi: —Kai, aõbo, Paulo, aõwesele ityhydÿÿdumy aronykemy wadi tahõtinyte, wadee tarybeteki. <sup>29</sup> Paulo rirawyõnyre: —Kohe, wadee awire, kai tulekemy. Ibutumy kaki wawesekemy adi rahõtinyre. Kai tule warybe sõwemy aõbo ada aõkõre aõbo Deuxu bityhynybenykemy watxiwãhãre tule waijohonana-wana. Aõna sohojidile taanamy aõkõ watxireri, wawomati reroti-di taanamy atxiteri.

<sup>30</sup> Idi tahe bede dinodu, iòlò, Benise, ibutumy he rÿire ròirenyre. <sup>31</sup> Widee reny wiwesele rõhõtinyreny. Ka hãbu timyhe rubudÿÿona he ròtena-ki irutysyõna he, tii dori aõhe rotÿÿnyõtyhy aõna aõnamy. <sup>32</sup> Tahe Agripa Festu-ò rarybere: —Rikiteõnyrenyke idi watxireri, tahe tii inihe iòlòtyhyle rarybekemy ixidi ratxireri. Tai kÿnyhe, txioinihe, aõkõre.

## 27

<sup>1</sup> Tahe rexiywinymy rexihurennyre Italia bede-ò, Roma hãwã-ò aroirenykremy hãwò-di. Tahe ròtenayrubudÿÿduõ tii-wana rakre, irubudÿÿdu renymy. Julio inire. Tii iòlò yrubudÿÿdu mahãdu dinoduõ rare. Ridyrennyre Paulo ròtena woludu mahãdu-wana. Jiarÿ, Luka tule ihemy rare. <sup>2</sup> Tahe rerõnyre yhywydyna lawò-ò. Adrÿmitxiludu tahe kia lawò rare. Tule hãbuõ wawana rare. Aristarku inire. Tii Macedonia bede luduõ rare. Tesalonia ihãwã rare. Tahe hãwò rexihynnyrennyre adòikemy Asia bede-ò. Tahe ròirenyre. Ijõtxu biòwa Sidoma beàbeà-ò rehemynyre. <sup>3</sup> Paulo taery mahãdu roramy rakemy ratximyhÿre. Tahe Julio Paulo-di itxeredu ririra. Tai tahe Julio awi heka rare Paulo dee. Julio Paulo riywiwinymy idi ratxirerimy ihÿre. Julio Paulo riteõnyre titxibo rakelemy. Paulo ery mahãdu aõna aõna tamy riwahinyre. <sup>4-5</sup> Tahe iribi ròhõnyrennyre. Xibri bedebute roosibymy ralore yhy dori tiribi tiribi reamyhÿreki. Tahe iribi riòlõnyre. Tahe Silisia bede-ribi riòlõnyre, tule Panfilia bede-ribi ijõ bede-ò reronyre. Tahe Miha hãwã-ò ritehemynyre Lisia bede-ki. <sup>6</sup> Tai soldado dinodu hãwò nihikÿ riijemyhÿu, ihe-ki roikemy, tahe ijõ-ki rahare Alexÿdria luduõ-ò. Hãwò tahe rexiywinymyhÿre rakremy Italia bede-ò. Tahe wadeereny rarybere: —Borukubenyke yhywydyna lawòro-ò. Tahe ixityre roirenyre. <sup>7</sup> Sõwemy heka txuu wadireny rÿire. Urihimyòle rexihewãhãrennyre. Isirare heka Kinidu hãwã-ò dehemynysÿ. Ihãrele tahe rethemynyre Samona hãwã mynatyhyle rarõrennyre. Iribi Kreta bedebute roosibymy ralore yhydori tiribi tiribi reamyhÿreki. <sup>8</sup> Tahe ywimy suò iòlò iòlò adoiwãhãdenyde ihyy tahe rethemynyre Rywihikÿmy ninadu-ò. Kia heka Laseia hãwã-ribi iòhõre.

<sup>9</sup> Sõwetyhymy txuu wadireny rÿire yhynihikÿ bina òraru-ki. Inarehe lisina txu-ribi ròhõnyre. Tai tahe bededÿÿnana ibutumy roimyhÿre. Tai brebunamy bede roimyhÿre. <sup>10</sup> Paulo tahe tamyreny rarybere: —Wanyrÿboho, ka tÿina isiratyhykre inydeereny. Inynonanareny iòhãrure aõna aõna ibutumy inyribireny ituekre, hãwò rabohokre ada ijõ aõbo rikururennyre. <sup>11</sup> Tahe

soldado dinodu Paulo rybe rityhynyõhyyre. Yhylawò wedu tòruludu-wana tii rityhynyre. <sup>12</sup> Yhylawò wedu, tòruludu-wana iwitxiramy rõhõtynyhyyre, beõra tai riekõkemy beà dori ibinareki. Ijõ tule tahe roirenykemy ixide ihÿrenyre rehemynykemy Fensia beà-ò. Kia heka Kreta bedebute beã rare. Biuweribitya-txi rõromyhyyre, tai awire kia beà, beõra bede riwykemy. <sup>13</sup> Ijõ rarybere: —Rikoirenyke, yhy dori rebonyreri, tamy rekehemynyrenyky. Tahe womatisana riukore. Roirenyre yhy-di. Tahe iõhõmy Kreta bedebute rotÏÏnyra. <sup>14</sup> Aõwesele heka yhy nihikÿ dehemynyde bedebrò-ribi. Kia yhy nihikÿ iraro bedebrò ludu inire. <sup>15</sup> Ka yhy nihikÿ taruru-di riwyre hãwò nihikÿ. Juhu yhynonana weribi-ò riwisÏnyre. Idi iwo rexieryre ixinamy riwyre yhyòkesena-ò. <sup>16</sup> Tahe rehemyhyyre Lauda bedebute-ò iroosibymy tahe ralore. Tai hãwò nihikÿwo-ki hãwòriõre riwyre. <sup>17</sup> Idi tahe rõhõtinyre hãwò nihikÿ rabòhòke-txi roholarenyre, tai tahe ritaarenyre iwetya-txi. Tahe ruberurenyre, Libiamy ninadu beõlau, tahe welòhòkÿ ritare iribi rexitarenyky. <sup>18</sup> IjõtXu roirenyre yhynihikÿ tamy realemy iu, tai tahe aõna aõna-di rehure ibutemy rawetariky. <sup>19</sup> Tasÿ txuõ idireny reare. Idi rehurenyre aõmybo rekoakõmyhyrenyredi rawetarityhyky. <sup>20</sup> Txu sõwemy rewyrenyre txumy, tainamy ribi renyõhyyre. Yhynihikÿ reamyhÿ. Tai sõwemy ruberumy rÿimyhÿ rubu lau. <sup>21</sup> Sõwemy heka bededÿÏnana riwyre roxiõhyy. Tahe Paulo iyreny-ki rÿire, tahe tamyreny rarybere: —Wanyrÿboho, warybe-ò taholaõhytenyete Kreta-ribi ròhònyrenyre. Aratohonyrenyre iribi inyboho kodoikõkemy. Boholabenybe-wana ta inihe aõna itueõhyyre. <sup>22</sup> Ihãrele tahe deysana-di adeereny ararybekre. Inyõ ruruõtyhy, hãwò nihikÿ sohojile rabohokre. <sup>23</sup> Jiarÿ dori Deuxu deòdu rare. Kaurumy dori Deuxu ÿju wadee nade. <sup>24</sup> Tahe rarybere: —Paulo, brebuõmy. Kai iòlòko-ò makre. Deuxu dori ruxetõena kidiwahinykre. Tiu heka aruburenÿõna aijoi-wana. <sup>25</sup> Tahe wanyrÿboho, brebuõmyreny. Jiarÿ dori Deuxu retyhynyre, iwese wadee rarybere wese, rarekre. <sup>26</sup> Urile tahe inyboho kiditehemynydenykre bedebuteõ-ò. Kia tahe Paulo rarybere.

<sup>27</sup> Waõinaubiõwa rummy beronihikÿ tya-ki bede riijemy roiremyhÿ. Adria beronihikÿ-ki roirenyreu, tahe rutya-txi hãwò nihikÿ aõna hydÿÿdu su iõhõmy roholarenyre. <sup>28</sup> Tahe beõ urihixina-di riurihire, wawiò dera urihixinamy beõ riurihire. Idi iko-txi ixityre riurihire tai waiyre dera urihixinamy rimyre. <sup>29</sup> Tahe rahõtynyrenyre manale tai roimyhÿremy. Tai tahe manatisana-di inaubiõwa lòru ludu-ribi rehurenyre. Iribi rexitõenyre wylemy txuu kanatÿnyky. <sup>30</sup> Hãwò aõna hydÿÿdu mahãdu hãwò riõre riwesere bera-ò. Idi risÿnyre ijõ manatisana ritidikremy hãwò jura-ribi. Urile tahe rahenykremy rõhõtinyre. <sup>31</sup> Paulo tahe rierymyhÿ tahe soldado wedu-ò rarybere: —Soldado mahãdu tule roholare: <sup>32</sup> —Hãwò aõnahydÿÿdu mahãdu hãwò nihikÿkÿro-ki rariõrenykeki, kaibohe atuerenyke. Tai tahe soldado hãwò riõre reroti riãrore tahe resere bera-txi rahenyre. <sup>33</sup> Txuu iõhõmy natÿnyde, tahe Paulo tamy rarybere: —Wiji waò inaubiõwa txumy kaibohe teraõtenyete tabyretenyõhyy. <sup>34</sup> Ijõ birÿsÿbenyke, arururenre rexiòlònyky, kaiboheõ dori burubenyõtyhy. Aradeti sohojiõ tiu iõõtyhy. <sup>35</sup> Rarybemy rahudi tahe, paõ sohoji Paulo rimyre. Ibutura-ò Deuxumy reàlãre. Idi tahe paõ riorore, riyre. <sup>36</sup> Ijõ reny reysarenyre, taita tule riyrenyre. <sup>37</sup> Tahe 276 iny hãworo-ki roirenyre. <sup>38</sup> Tahe ibutumy iwo rihyrenyre tahe maixõmo wesena-di rehurenyre hãwò nihikÿ rawetarinyky. <sup>39</sup> Bede ratÿnyreu, inyõ rieryõhyyre titxiribibo nade. Tuu robirenyre iworywo-ki ÿnyra tai roimyhÿremy tahe inyõ rieryõlemyhÿre. Widee raryberenyre: —Rikirõnyrenyke hãwò-di iwo-txi. <sup>40-41</sup> Tahe manatisana riukõrenyre tahe welò riderenyra hãwojura-ò iraròsõna

riesere. Tahe ritelenyrene ralòkemy. Urile esetere tiò tiòle hãwò ridymyhyẽ beò òhòkÿle idi rehure rorokòhòkÿle, rimyre taile òbò hãwòlòru ribohonyre. <sup>42</sup> Soldado mahãdu ròhòtinyre ròtena mahãdu rahenyketxi. Tai rirubunykeny ròhòtinyre bede-ò robunyke lau. <sup>43</sup> Soldado wedu tahe Paulo ritòenyre rubu lau, tai tahe riteònyre rirubunyòhyre: —Tibo alobueryre, juhoo suò rakemy, soldado wedu kia rarybere. <sup>44</sup> Tibo alobueryòke tahe òwòru àre hãwò-ribi rimymy idi rakre. Kiamy heka ibutumy retehemynyrene su-ò, inyò ruruòhyre.

## 28

<sup>1</sup> Tai tahe taisÿdu mahãdu-txi rekoare. Tii bedebutenimy inydee re-lyyre. Malta heka inire. <sup>2</sup> Biu riwasebenyrenyrene yhyjutyty riwasarenyrene. Tai tahe tiiboho heòty riworneyrenyrene wahetònarenymy. Tiiboho riwawisinanyrenyrene awimyy wadireny roiremyhyẽ. <sup>3</sup> Paulo hee ributunyrene heòtywonyrenyrene. Idi rehureu, hemylala he wo-ribi heòty lau ròhònyrene, tai ruruare Paulo debò-ki. <sup>4</sup> Tusÿdu mahãdu tuu robire tahe rarybere: —Ka hãbu rubudÿÿdu òsÿny rare. Tii heka ruruòre bera-ò, ka tahe kidiòwonykre inyò òsÿny rirubunyrenyrene wahe, rurukre heka. <sup>5</sup> Paulo tahe hemylala tebò-ribi riatyrene heòtyru-txi. Ta aòhòkÿmy rotÿÿnyòhyre. <sup>6</sup> Tahe imahãdu idi retehemyy rÿimyyhyẽ tarubulemy resekeò, ada tebò ratarinybohokeò aòbo. Sòwemy riraòre, aòhebo rotÿÿnyke, tahe aòkòhyre. Tai tahe iwitxiramy ròhòtinyrenyrene: —Tii deuxuòle òsÿny ratxireri. Tiiboho raryberenyrene kia.

<sup>7-8</sup> Hetoò tai iòhòmy rÿire, Publio iwedure. Tii heka ityhy rare iwedu rare kabedebute-ki, tii bedeòtiidÿÿna rare. Tai taheto-ò riwadyrenyrene. Awihyye wadireny raremyhyẽ. Publio tyby tahe rubunamy rurumyyhyẽ. Busu-di ratximyyhyẽ. Tai tahe Paulo iroramy rare. Tebò ityre ritidire, rexitòenyrene, tahe riteytenyrene. <sup>9</sup> Tai tahe ibutumy bedebute ludu webinadu Paulo dee wii rotyrene. Ibutumy reyterenyrene. <sup>10</sup> Tai tahe uriiòno inydeereny riwahinyrene aòna aòna. Sòwemy rÿsÿna hãworo-ò rahyre inydeereny. Kia hãwò beòra bede kia beà-ki riwyrene.

<sup>11</sup> Txuòkuro hãwò ni rare. Kia ni ihiju rare. Ideuxu ritxoo inatxi rare. Hãwò Alexÿdria hãwã ludu rare. Tahe rahònyrenyrene. Inataò ahãdumy bede wadireny rÿidi. <sup>12</sup> Sirausa hãwã-ò retehemynyrene. Tai tahe inataò txumy wadireny rÿire. <sup>13</sup> Iribi tahe Rejio hãwãmy rekoarenyrene. Ijòtxu tahe Pozuli-ò reòlònyrene. Inatxi txu-di retehemynyrene yhy ibòò-ribi debonydeki. <sup>14</sup> Tai seriòreò ratximyyhyẽ. Tiiboho rexitòenyrenyrene tii-wana ratxikemy debòinatxi reurò txumy. Kiamy heka Roma hãwã-ò roirenyrene. <sup>15</sup> Roma ityhydÿÿdu mahãdu roholare jiarÿboho retehemynyrenyrene. Tai tahe doidenyde Apio hãwã ube-ò. Tule aò-di ijohona Heto Inataò hãwã-ò doidenyde. Paulo tiiboho robireu, Deuxu reàlòmyyhyẽ, reysamyyhyẽ.

<sup>16</sup> Tahe Roma hãwã-ki Paulo ixideewimyy rasÿnyrene. Urile soldadoò aòu aòu tii-wana ratximyyhyẽ.

<sup>17</sup> Inataò txumy bede idi rÿidi, Paulo ributunyrene judeu mahãdu dinodu. Wii ributunyrene, tamyreny rarybere: —Wanyrÿboho, waseriòreboho, jiarÿ aò rewinykòre wajioi Judeu mahãdu dee. Tule lahirybe ònosòna ratyre aò rewinyòhyre. Ihãre judeu dinodu riwamyrene. Tahe diwahinyde Roma dinodu mahãdu-ò. <sup>18</sup> Tiiboho heka riwatÿÿraxinyrene ibutumy. aò heka waki ibinamy rahaòhyre. Tai tahe riwateònyrenykeny ratxirenyrenyrene. <sup>19</sup> Wajioi tahe Judeu ijoi heka waòludureri. Tai tahe Iòlò-ò jiarÿ rarybere arakemy. Aò dori wajioi dee waòraruòre. <sup>20</sup> Tai heka arabutun-nyrenyrene, warybe-ò bohòlabenykeny, wadi retehekemy womati reroti-di riwataataara. Judeu mahãdu raròsòna òraru-ki kawesemy watxireri. <sup>21</sup> Tahe

judeu dinodu mahãdu rirawyõnyre: —Aõkõre, inyõ rehemynyõre Judeia bederibi. Ijybinamy umy relyyõre. Inyseriore mahãduõ kaò dehemynyõde. <sup>22</sup> Aroholarenykemy timybo tahõtinyinmahãte-ò. Ityhydÿÿdu mahãdumy dori ibutumy aõbinahakÿlemy rarybereri. Kia judeu mahãdu dinodu raryberenyre.

<sup>23</sup> Tahe riywinyre itxu Paulo rybe-ò ijohonamy. Idi tahe Paulo heto-ò sõwemy iny doidenyde tamy roholakemy. Tii Deuxu ijy ritÿnynyre rudi rexidelenyde, txioromy rexihure Moisesi Tyyriti ritÿnynyre tule ijõ rybedu Tyyriti-di ritÿnynyre, iwese Jesuisi Iòlòtyhy kanatxikre wese kabede-ki. Kia Jesuisi aõmydÿÿnanamy ritÿnynyre. <sup>24</sup> Ijõ roholare aõmybo Paulo rarybereò, Jesuisi rityhynyrenyde. Ijõ tahe aõkõre, rityhynyõre. <sup>25</sup> Ijõ teramy reare. Rÿire, ròhònykremy. Tahe Paulo tamyreny rarybere: —Deuxu Tyytybytyhy booreny dee rarybere Isaia tyyriti-ki. Awimy rare. Kawese roire:

<sup>26-27</sup> —Makre tamy marybekre: —Boholabenyke, ta tiu aerysyrenyõna. Betehekre arue-di, ihãre tahe aerysyrenyõna. Iruereny, iraykyreny, tõhõtireny ritòbònymahãrenyde. Tai tiu tiiboho robirenyõtyhy, riryrenyõtyhy, roholarenyõtyhy. Tai diwatyhynyõhyymyhÿde. Tai heka iòraru-ribi ariteytenyõkre.

<sup>28</sup> Bierymy boibeke Deuxu tarasana judeukõdu mahãdu-ò rare. Tiiboho dori roholarenkyre. <sup>29</sup> Paulo tarybe rahudi tahe, judeu mahãdu ròhònyrenymy sõwemy widee rarybemyhÿrenyde.

<sup>30</sup> Roma hãwã-ki Paulo rasÿnyre inatxi beòramy tahetohuòtenawo-ki. Ibutumy heka dÿÿraximy iheto-ò rehemynyrenyde, Paulo ridyre tamy rarybekremy. <sup>31</sup> Deuxu Iòlònamy Paulo iruru-di relyyhyymyhÿre. Inynyrÿ Jesuisi Kristu aõna aõnamy rierynanymyhÿre. Tiu inyõ aõhòkÿmy risÿnyõmyhÿre Paulo rybe xãwikemy.

## Roma Paulo Ryberiti Roma mahãdu-ò

<sup>1</sup> Paulo jiarỹ rare, tyyritiwiidỹdure wahe. Jiarỹ heka Jesuisi Kristu deòdu rare. Tii riwatara rybe tỹnydỹdumy ararekremy. Deuxu Rybewihikỹ wahidỹdumy ararekremy. <sup>2</sup> Juhuu dori Deuxu rarybere Rybewihikỹ riwahinykemy. Deuxu rybedu mahãdu kia rybe riritinyre, Ritidỹnattyhy-ki. <sup>3</sup> Kiamy heka Deuxu Riòre rybe tyhydỹnany rarybere, Davi riòre riòkòreõ wahe. <sup>4</sup> Deuxu Jesuisi Kristu rubu-ribi riixixadỹnyreu, tariòremy tahe riteòsinyre rurunattyhy-di. Jesuisi tahe inatyhymy Inynyrỹ ihỹre. <sup>5</sup> Tii ruxetòena inydeereny riwahinyre. Irybe òraru-ki, jiarỹboho aròirenykemy watzireri. Ityhyna aritỹnykemy judeukòdu mahãdu-ò, tai tiiboho rityhynyrenycremy. <sup>6</sup> Kaiboho tule judeukòdu mahãdu atxitenyteri. Tahe Deuxu ityhydỹna mahãdu atxitenyteri, Jesuisi Kristu ijoimy rỹirakemy adeereny rarybereki. <sup>7</sup> Ibutumy adeereny warybe rewahinyre, Kia Deuxu taijoimy remyremy mahãdu wahe. Ruxetòena, ywina-wana adeereny-ò kanakemy watzireri, Deuxu inytyby-ribi tule Jesuisi Kristu iny wedu-ribi. Tii dori adeereny irybe riwahinyreki.

<sup>8</sup> Umyreny Deuxu-ò reàlamahãre, atyhynareny-ò iny ibutumy roholamyhỹreki. <sup>9</sup> Deuxu-ò rexitòenymahãreu, anirenymy rarybehymy watxiwãhãre. Kia heka Deuxu rieryre, waworibityhy tahe jiarỹ Deuxu deòdumy rare. Iriòre Rybewihikỹ-di wahe. <sup>10</sup> Jiarỹ rexitòenyhyy watxiwãhãre arorarenymy arakemy Deuxudeewikeki. <sup>11</sup> Umyreny arobikemy watzireri, tai adeereny arelyykemy aõmydỹ wihikỹõ Deuxu Tyytybytyhy. Tule kaiboho wadee tuu belyybenykre. Tai tahe atyhynareny-ki ityhymy relekre. <sup>12</sup> Jiarỹ arawiòhenanykemy watzireri, tule kai biwawiòhenanykemy watzireri. Tai rikexideysanytyhykemy inatyhyna-ò. <sup>13</sup> Sõwemy heka arahyykemy watxiwãhãre arorarenymy. Iribi nohõti losaõmy tahe wadi rarurunymyhỹre aõbo, riwateònyõhymyhỹre heka. Jiarỹ Deuxu dee waaõmysỹdỹna awikemy watzireri ayreny-ki. Tai kaiboho ako-ò boikemy wadee awire, iwese ijõ judeukòdu mahãduko-ò ararybekremy watzireri wese. <sup>14-15</sup> Tuheka ibutu iny-ò ararybekremy watzireri, hãwã witxira witxira mahãdu-ò, tule. Iny mahãdu-ò aõkõre mahãdu-ò tule. Tuu ariwinykre ibutumy iny-ò, iny bedeeryrenyõ mahãdu-ò tule. Adeereny tule Rybewihikỹmy arelyykemy watzireri Roma hãwã ludu mahãdu-ò.

<sup>16</sup> Jiarỹ dori Kristu Rybewihikỹ-ki araixỹruõtyhy. Irybe dori Deuxu ruru rare. Ibutumy iny rityhynykeki ritakemy ratxikre. Judeu mahãdu-ò juhUU nade tai tahe iuhe-ò judeukòdu mahãdu-ò. <sup>17</sup> Deuxu òbitina ratỹnynymy namyhỹde Rybewihikỹwo-ribi. Tyhyna-di ritelenyre tule tyhyna-di ihỹmyhỹre. Inyõ tyhyna-di òbitimy rỹikeki, tii ruruõtyhy, idi awimy rareki.

<sup>18</sup> Deuxu yarana biu-ribi namyhỹde ibutu òraruna hudunamy. Iwidỹdudunamy. Bina widỹdudori inatyhyna ribinanyhỹre, raruinymyhỹre Deuxu rybe ribynymyhỹre? <sup>19</sup> Deuxu eryna ibutumy iny-ò riwahinyre. Deuxule tamy riwahinyre. Tai timybo Deuxu raremy tahe tiiboho rieryhymyhỹre. Tai Deuxu aõhõkỹmy risỹnymyhỹrenyre. <sup>20</sup> Juhuhukỹle heka Deuxu aõmydỹnanamy iny robimyhỹre idi tii tyhynamy tule rierymyhỹre itỹnyhỹkỹlemy, irurunahyy wahe. Aõu aõu kia ibutumy iny rierymyhỹre, Deuxu widỹnany iny robireki wahe. Tai tiu iny ixitxiõdỹna. <sup>21</sup> Rieryrenyre tii Deuxumy raremy. Tahe rexiwowydynyõhyre timybo iny Deuxu dee



rexiwowydynymyhÿkemy wahe. Tamy àlànatyhy riwahinyõhyymyhÿre. Idi rõhõtinyinymyhÿrenyre Deuxu irayky rõhõtinyinymyhÿre wesemy idi rõhõtinyinymyhÿre. Irayky tahe reòsamy ratximahãre. <sup>22</sup> Tiibohole bedeerytyhymy ixidi rõhõtinyinrenyra. Tahe itxÿtele roire. <sup>23</sup> Deuxu rubutere rityhynykenawi tahe tiiboho heka ritxoo deuxuõ ireije riwinymyhÿrenyre tatyhydÿÿnamy. Ibinamy heka mywese riwinymyhÿre, nawii wesemy, iròdu wesemy, iròdu bedemy riradu-wesemy. Rexiòkamy riramy riradu wesemy tahe rityhynymyhÿrenyre.

<sup>24</sup> Deuxu heka òraruna-ò riwahinyrenyre, itxÿtenareny òraru-ki. Iny òta òtadu mahãdu heka wiwanale aõða ixÿruna riwinymyhÿrenyre. <sup>25</sup> Deuxu inatyhyna dori tiiboho riwiurònyra ruina-ò. Ritxoo dee rexitòenyrenyre, aõbo Deuxu riwinyre, kia. Deuxule iny reàlàkõmyta ratximyhÿrenyre.

<sup>26</sup> Deuxtutyhy tahe rityhynyõhyre, Deuxu ibutu widÿÿdu tiu riteàlànymy rakonananyõtyhy. Kia òraru-ki òtaõtana nade. Hãwyy, hãbu-wana aõkõ roimyhÿre wideele heka aõhebo rotÿÿnymyhÿre. Kia heka òbiti aõkõ rare. <sup>27</sup> Tule hãbu, hãwyy-wana aõkõ rõimyhÿre, wiwanale aõhebo rotÿÿnymyhÿre. Òbiti aõkõ heka kia rare. Riwyrenykre kia òraru òwydÿÿna, aõhõkÿmy dÿÿnana wahe. Iny sohoji sohoji taaõbina ixÿruna òraru-ki ixidee rimykre.

<sup>28</sup> Tõhõti heka Deuxu-txi reaõhyymyhÿre. Tai tahe timybo ixideewimy riwinyrenykemy roirenyre Deuxu-ribi. Tahe riwinyrenyre ibutumy aõbina binahakÿle. <sup>29</sup> Aõimy aõko ratximyhÿre aõbina bina-di roiremyhÿ: òtaõtana-di, aõbina binahakÿ-di, aõikõkõ-di, rarekemy ixidee ririmyhÿre, teramy heka rÿira. Ihãru-di rÿira iny rubudÿÿmy dori rõhõtinyinymyhÿre, rarybehymy ratxirerimy ihÿre, ruidu nihikÿ ihÿre, ujõmo-di rÿira. <sup>30</sup> Aõbinamy inymy rarybemyhÿre, Deuxu derare, ixiluulerenyre, rexityhynymyhÿre, òraru tÿmyra riwinyrenyre, tyby tadi-wana rityhynyõhyre. <sup>31</sup> Irybe sohoji aõkõ heka rare. Iluunaõre, ibinatyhyre, inydee iruxetòeõre. <sup>32</sup> Deuxu rarybere: inyõ kia riwinykeki heka ruruke. Tiiboho kia rieryrenyre. Ihãre tahe aõhebo rotÿÿnyre. Kia sohojile aõkõ. Reysarenymyhÿre iny witxira iherenyki aõhe rutÿÿnykreki.

## 2

<sup>1</sup> Tutyhy-ki aõkõramy rybeõmy. Kai dori tutyhyle òraru tewinymahãõte. Inyõ rybemy ywisidÿÿna ijõmy rarybeke-wana ixilemy ywisidÿÿna-ò rexytyhenyke. Tii dori kia ibutumy tule riwinymyhÿre ibinamy wahe. <sup>2</sup> Inyõ kia aõbina binahakÿ riwinymyhÿkeki, Deuxu ywisidÿÿna-ò inatyhynalemy tamy kòdòhònykre. <sup>3</sup> Kai tuleke —kiamy biwinykeki, Deuxu ywisidÿÿna-ribi mahenyõtyhy. Kai dori ywisidÿÿdumy texideòsinyte ihãre tahe iòraru we-sele tewinymahãte. <sup>4</sup> Deuxu ruxetòena sòwemy adi rexiruxetòenanymyhÿre. Kia-di bexirãhikemy adi ratxireri, tiemy ywimy aõna aõna bina riemyhÿre ratximyhÿre, awi heka adee rare. Kai aõbohe iribi õhõti rosakre kia heka arabedeòtiidÿÿnymyhÿre. Arabedewodÿÿnymyhÿre iòraru-ki. Kai aõbohe kia teeryõte? <sup>5</sup> Kai arybedÿÿsaeryõre rybe ijohona teeryõte õhõtiõre. Tai tahe Deuxu yarana ixideele tebutunymahãte. IjõtXu Deuxu yarana txumykre. Tai Deuxu ywisidÿÿdu òbiti rexitÿÿnymy rÿikre. <sup>6</sup> Iny sohoji sohoji taaõna aõna myna aõmy rotÿÿnykre, aõhebo rotÿÿnymyhÿreki wahe. <sup>7</sup> Inyõ aõwidÿÿlemy ratximyhÿre. Tiiboho heka Deuxu wowy-dyna, Deuxu wohyna, Deuxu loosõna widÿÿmy rarutaamyhÿrenyre. Tule iny rarehykykrena-di rarutaamyhÿrenyre. Imyna Deuxu tamyreny riòkre. <sup>8</sup> Kia ixidile rõhõtinyinymyhÿre mahãdu tahe, Deuxu woxibrunale, yaranale ritakre. Tiiboho dori inatyhyna rityhynyõhyymyhÿrenyre, aõ òbitile aõkõ riwinymyhÿrenyre. <sup>9</sup> Aõhõkÿmydÿÿnana, bedewona kanakre ibutumy aõbina

bina widȳȳdu mahādu-ò, judeu mahādu-ò juhūu idi judeukōdu mahādu-ò. <sup>10</sup> Wowydyna, àlàna, ywina tahe kanakre aōwiihikȳ widȳȳdu mahādu-ò judeu mahādu-ò juhu delemy idi judeukōdu mahādu-ò. <sup>11</sup> Deuxu-ò heka ibutūmy iny wiwese rare. <sup>12-16</sup> Tii heka aōhōkỹmy risỹnykre ibutūmy iny òrarudu mahādu. Moisesi bedē ywina ihoōrehārele tii rurukre. Judeukōdu mahādu heka Moisesi bedē ywina rybe ijōkōre. Tahe bedē ywina iny rierykeki, idile Deuxu iòraruna riywinykre. Inyō Deuxu bedē ywina rybe roholare tahe rityhynyōre, kia tahe Deuxu dee ibinatyhyre. Ibutūmy kia iny rurukre, òtỹȳ iraykywokile aōbo ibinare, aōbo òbitire rierymyhỹreki. Deuxu bedē ywina wesemy heka iraykywo-ki ratximyhỹre. Iraykywydyna rexinohōtinymyhỹre ada dexiòbitidỹnymyhỹde, Rybe wimy rarybemyhỹre Jesuisi Kristu heka hābu aōmydỹȳna ritỹnynykre imyna timy rarekremy. Deuxu dori iteradỹȳdure.

<sup>17</sup> Kaiboho, judeu mahādu, texinohōtinytenyta ibutūmy awiremy aDeuxu-ureny-wana. Tii adeereny bedē ywina rybe riwahinyreki, tii abiòwatyhy rareki. <sup>18</sup> Kai heka aōbo Deuxu-ò awire teeryte. Aōbo ibinare, teeryte. Uladuule ibedē ywina rybe teeryte, tai òbitityhyle adeereny awire. <sup>19</sup> Kai Deuxu-ò nonana bitỹnynyke iny ruetà mahādu-ò dori, kia teerytyhytenyteki. Ixi-di tahōtinytenyteki. Iwese, kaiboho loosòna wesemy toitemahā xixi-di tahōtinytenyte. <sup>20</sup> Tule kia xixi-di tahōtinymahāte. Kai bedē erydỹȳdukōdu mahādu erydỹȳdumy atxiterimy xixi-di tahōtinymahāte. Uladu erydỹȳdumy atxiterimy xixi-di tahōtinymahāte. Kai bedē ywina rybe tyyritiō dire. Kia adee ibutūmy inatyhyna rare bedēerydỹȳna. <sup>21</sup> Kai iny erydỹȳdumy atximahāte. Timyrekibo kai textierynanyōmahāte. Kai wasimy aōkō tōerydỹȳnanymyhỹte. Timyrekibo tawasinymahāte. <sup>22</sup> Kai hāwyy òta aōkō tetỹnynymahāte. Timyrekibo kai tuu tatỹnynymahāte. Suritxoo dee àlàna deramy iximy tarybemahāte. Aōherekibo erydỹȳ-ribi aōmydỹȳnana tewinymahāte. <sup>23</sup> Kai bedē ywina rybe luūmy iximy tarybemahāte. Kai Deuxu-di texixiwedenymyhỹte. Ihāre tahe bedē ywina rybe tetyhynyōte. Kiawese Deuxu texirudỹȳnymyhỹte. <sup>24</sup> Iwese juhūu riritinyre wese wiji roimyhỹre: —Aòraru-ki tahe bedemy iny rỹira Deuxūmy aōna aōnabinamy rarybemyhỹre. <sup>25</sup> Kai bedē ywina rybe bityhynykeki, òtyky resynadike, awire judeu mahādu dori rare. Tahe bedē ywina rybe bityhynyōkeki, òtykyresyna adee aō aōkōre. <sup>26-27</sup> Iwesetyhylemy iny rare tōtyky resynaō mahādu. Tiiboho bedē ywina rybe rityhynykeki, tōtyky resyna-di mahādu wesemy roirekre. Judeukōdu mahādu heka bedē ywina rybe rityhynykeki, kia adee ixỹruna rare. Kaiboho dori Deuxu bedē ywina rybe tetyhynyōte òtyky resyna dire hārele. Bedē ywina rybe dire hārele. <sup>28-29</sup> Inyō judeu mahādu wesemy ihỹre. Ihāre tahe judeu mahādu inatyhy aōkō rare. Tōtyky resyna-di judeu mahādu inatyhy aōkō rỹira. Judeu mahādu inatyhy tawokihyyle kia idi rỹira. Iwesele notyky resynadỹȳna kia rỹira. Inywokihyyle rare. Aō bedē ywina rybekile aōkō tuu rỹire inyrayky wydynadile kiawesemy inyō rỹira. Hābu-ribi wowydynamy ritaòtyhy. Deuxu ribile ritake.

### 3

<sup>1</sup> Tibohe judeu mahādu deewinare. Noty resynale tamywina. Kia aōbo ibuturatyre awire judeu mahādumy rareki? <sup>2</sup> Inatyhy rare, sōwemy, Deuxu dori tamy juhu Ritidỹȳna riwahinyre. <sup>3</sup> Inyō rityhynyōre-wana kia riwiurōnyōhyymyhỹre Deuxu heka òbiti rare. <sup>4</sup> Inatyhy urenanamy Deuxu raremyhỹ. Iny mahādu tahe roidumy rỹiramyhỹ. Iwese ritina-ki roire wese Deuxūmy rarybereri: —Kai arybe òbitina-di atximahāte urenana wahe. Inyō araurihikeki, kai inatyhyna-di biòlòdỹnynykre. <sup>5</sup> Inyboho òbiti aōkō roire. Kia tahe Deuxu òbitina riteòsinyre. Timykibo Deuxu inydee aōhōkỹmydỹȳnana

riwahinykre. Mobo heka kia òbitimy aõkõ rarybekre. Jiarỹ hãbu rayky-di wese rarybereri. <sup>6</sup> Kia òbiti rare. Kiaweseõkeki timybo Deuxu bede aõhõkỹmy dỹñnana riwahinykre. <sup>7-8</sup> Kai tarybete: —Jiarỹ raruirã. Urile kia Deuxu inatyhyna reteòsinyre. Aõherekibo Deuxu aõhõkỹmy riwasynyre. Kiarybe iwixira rybewesemy rare: —Ibinamy rakatximyhỹkeki, awihikỹ kia-ribi ròhõnykre. Aõkõre, kiamy rybedu mahãdu aõhõkỹmy dỹñnana ritamyhỹkre. Kia riki wamy rarybere, ruimy wahe.

<sup>9</sup> Aõhe aõbohe, inyboho aõbo inywitzira-ribi awityhyrenyrene. Aõkõre. Jiarỹ reteòsinmahãre ibutumy judeu mahãdu, judeukõdu mahãdu ibutumy òrarudu roire. <sup>10</sup> Kiamy Tyyriti-ki roire: —Tiu heka inyõ òbitiõre. <sup>11</sup> Inyõ heka Deuxu rieryõhyymyhỹre. Timy heka riòryõhyymyhỹre. <sup>12</sup> Ibutumy iny rexiõnonymyhỹre Deuxu-ribi wahe. Aõmy aõkõ tiiboho rexiwinyrenyrene. Iny riuheõhyymyhỹre aõbo awiré. Sohoji aõkõ aõhebo rotỹnyre aõbo awiré. <sup>13</sup> Ibõtõijõ heka rubuwabede iraymy roimyhỹre ròwese rare. Tiiboho iny itxenadỹdu rare. Irybe heka hemylalatyhyju wese rare. <sup>14</sup> Aõbina binahakỹlemy heka inymy rarybemyhỹre. <sup>15</sup> Iti heka teyrewere rare hãlubu txiwimy iny rubudỹmy tule. <sup>16</sup> Titxibo ramyhỹre-wana heka aõbina binanale riwahinymyhỹre, aõhõkỹle ririmyhỹre. <sup>17</sup> Tiiboho dori ywimyno rieryõmyhỹrenyrene. <sup>18</sup> Deuxu lau heka ruberuõtyhymyhỹrenyrene, Deuxu rityhynyõtyhy.

<sup>19</sup> Bede ywina rybe heka tatyhydỹna mahãdu-ò diõde. Kia tahe inyboho rieryrenyrene. Tai heka iny rexitxiõnyõtyhy Deuxu-ò. Tai heka ibutu dee aõhõkỹmy dỹñnana-ò riywinymy rỹikre. <sup>20</sup> Bede ywina rybe-ribi iny ibutumy rieryre ibinamy ratxireri. Inyõ heka bede ywina rybe heka rityhynyõhyre. Tai tahe inyõ kia-di rexitaõtyhy iywina òraru-ki.

<sup>21</sup> Wiji tahe Deuxu òbitina ratỹnynymy ihỹre bede ywina rybe-ribi lahiximy. Ihetxiu rybedu-di kia ritỹnynymy ihỹre bede ywina rybe ritina-di. <sup>22</sup> Deuxu riòbitidỹnyra. Ibutumy Jesuisi Kristu tyhydỹdu kanakre. Deuxu dee dori ibutumy bede bede ludu wiweselere. <sup>23</sup> Ibutumy raòrarunymyhỹre. Deuxu òbitina tamy rauhenymyhỹre. <sup>24</sup> Deuxu taruxetõena-di ibutumy riòbitidỹnyre Jesuisi Kristu tarasadureki. Tii iny-ribi iòwydimy aõ rexitõenyõhyre. <sup>25</sup> Deuxu Jesuisi-di rubuna iny òraru riixãwididỹnyre iòwy tii riòwynara, iny kamy rityhynykemy. Kawese-ki Deuxu òbitina ritỹnyra. Juhuu Deuxu iny òraruna-ò reteheõmyhỹre aõnityhymy iywisidỹna direki. <sup>26</sup> Tahe wiji inyòraru-ò retehemyhỹre riixãwididỹnykemy. Tai tahe tii òbitire tule Jesuisi Kristu tyhydỹdu òbitidỹndure. <sup>27</sup> Mobo Deuxu-ò rarybekre jiarỹ awiremy? Aõkõre, inyõ rarybeõtyhy. Bede ywina rybe tetyhynyõte. Deuxu iny òbiti widỹndure, ibede ywina ywidỹ aõkõre. Inatyhynadile awityhymy iny rare. <sup>28</sup> Kiamy tahe raraykynyrene iny ityhynadile riòbitidỹnyke bede ywina rybe ywidỹ aõbo? Aõkõre! <sup>29</sup> Deuxu aõbo, judeu mahãdu Deuxu sohojile rare? Aõkõre, judeukõdu mahãdu-ò tule Deuxu ihỹre. <sup>30</sup> Deuxu sohojile rare. Iny wiwanale riòbitidỹnykre judeu mahãdu judeukõdu mahãdu-wana. Ibutumy ityhyna òraru-ki riòbitidỹnyke.

<sup>31</sup> Ityhyna aõbo bede ywina rybe riixãwididỹnyra? Aõkõre, bede ywina ihãre rỹire.

#### 4

<sup>1</sup> Timybo ararybekre inytybyreny Abraõmy. <sup>2</sup> Aõbo riwinyrene aõkõ idi rexiòbitidỹnyre. Tai tahe rexitihynyke inyko-ò. Tahe Deuxuko-ò aõkõ. <sup>3</sup> Kamy heka Ritidỹna-ki roire: —Abraõ heka Deuxu rityhynyrene taile tahe rexiòbitidỹnyre. Deuxu dee tii òbitityhy rare tii rityhynyrekile.

<sup>4</sup> Iny aõmysydÿÿdu raòwymyhÿke iaõmysydÿÿna myna. Urimy aõkõ dori raòwymyhÿre taaõmysydÿÿnaòwyle dori ritamyhÿre. <sup>5</sup> Inyõ rityhynymyhÿkeki, tii òbitina ritamyhÿre Deuxu-ribi. Deuxu dori òrarudu mahãdu òbitina widÿÿdu rare. Kia uriõno rare. <sup>6</sup> Davi heka juhUU riritinyre iwese teysatyhymy iny rarekremy wahe. Deuxu dori òbiti mahãdu dee riraykydÿÿnyre òbitimy roirekemy. Tii ixidee aõ riwinyõre. Davi kiawese riritinyre: <sup>7</sup>—Teysatyhymy iny rÿirakemy Deuxu iòraru riixãwididÿÿnyreu tõhõti-ribi iòraru rosakeu. <sup>8</sup> Teysatyhymy iny rÿirakemy iòraru-txi Inynyrÿ nohõti ijeraõmy ihÿkre. <sup>9</sup> Deysana aõbo judeu mahãdu sohojile riteysanymyhÿre ida judeukõdu mahãdu tule. Tulere! Inyboho dori rarybere: —Abraõ tyhynale tamy òbitina diwahinymyhÿde. <sup>10</sup> Tiubo tahe Abraõ òbitina ritare notyky resynako-ki ada ihewo-ki aõbo, ikoure. <sup>11</sup> JuhUU dori rityhynyre idi ta notyky resyna tamy nade kia tyhyna Deuxu-ò riteòsinyreki. Tai tule òbitina Deuxu tamy riwahinyre. Kia butu tyhydÿÿdu tyby wese rare, Judeukõ mahãdu wahe. <sup>12</sup> Notyky resynako-ki òbitina ritare. Tõtyky resyna-di mahãdu tyby wesemy riki Abraõ ratximyhÿre. Tiile tõtyky resynakõ-ki Deuxu rityhynytyhymyhÿre. <sup>13</sup> Deuxu Abraõ-ò rarybere tii ibutu bede bede wedu wesemy ratximyhÿre iriòre iribi rimykemy. Tahe bede ywina rybe òraru-ki aõkõ tuu ihÿre, ityhyna òbitina òrarukile wahe. <sup>14</sup> Bede ywina rybe-ribi tybie tahe itarasadumy ratxikre, tai tahe inatyhyna aõ aõkõ rare. Aõbo Deuxu rarybere aõmy aõkõ rare. Tahe roirekre. <sup>15</sup> Bede ywina rybe dori Deuxu aõhõkÿmy dÿÿnana diòde iny ribedeerynykemy. Teysana aõkõ wahe. Bede ywina rybekõki, timyki iny aõ ityhynyõna. Bede ywina rybe ijõõre-wana òraruna ijõõre. <sup>16</sup> Tahe inatyhyna-di sohojile iny aõna aõna wiwihikÿ ritamyhÿke. Tai iruxetòena-ribi nade. Tahe aõmybo Deuxu rarybere ibutu riòrerìdremy tuu rÿikre. Bede ywina rybe mahãdu tule bede ywina rybekõdu mahãdu-wana wiwana Deuxu rityhynyre. Abraõ riòre wesemy ibutumy tai inyboho roire. <sup>17</sup> Iwese Ritina-ki roire wese: —Jiarÿ aratare ibutu inytyby wesemy mabekemy. Ibutumy iny rityhynyre-wana, iwese Abraõ rityhynyre wese, iwese-ki Deuxu ritake. Deuxu tahe rubu mahãdu riixixanymyhÿre rubu-ribi. Tii rarybekeu aõ aõkõ aõwesele tii aõ heka rare. Tii rarybere tule riwinyre. Abraõ heka Deuxu rybe rityhynyre. <sup>18</sup> Timy heka rariòrenykemy ixidee rõhõtinyõhyymyhÿre. Deuxu dori tamy rarybere: —Kai heka ariòkòrereny sòwemy atximyhÿkre. Kai hãwã hãwã tybomy mabekre. <sup>19</sup> Abraõ tatyhyna ritxiõnyõhyyre. Timy heka 100 beòramy idi ratximyhÿre, ixãwire uladu-ribi ramatuarinyreki. Tule ihãwyy Sara iuladu herina-di kòremy rõhõtinyre. <sup>20</sup> Timy heka ritxiõnyõhyyre Deuxu Rybe. Rityhynymyhÿre Deuxu dealãna riwowydynyre. <sup>21</sup> Tii heka rierymyhÿre Deuxu irurudire irybe wesemy aõ rÿikemy. <sup>22</sup> Tai tahe Deuxu tamy òbitina tamy diwahinyde. <sup>23</sup> Aõ iòraruki aõkõ kia ryberitina awimy raeryre, tamy sohojile aõkõ dori rarybere. <sup>24</sup> Iny òraru-ki tule kia tuu roire. Iny tule inatyhyna-di òbitina ritakre. Inyboho dori rityhynymyhÿre, Inynyrÿ Jesuisi rubu-ribi ixixana widÿÿdu Deuxu raremy. <sup>25</sup> Jesuisi iòludu-ò iwahidÿÿmy rara inyòrarureny-ki tai rurure. Tahe iny òbitina wahidÿÿna-ò diixixanyde rubu-ribi.

## 5

<sup>1</sup> Jesuisi tyhydÿÿ òraru-ki Deuxu inyboho rimyrenyrene. Idi awimy rokoirekremy tii-wana, Jesuisi Kristu-wana wahe. <sup>2</sup> Deuxu ruxetòenawo-ki inyboho rotamanymyhÿrenyrene. Jesuisi Kristu tyhydÿÿna òraru-ki tamy rotamanymyhÿre. Deuxu loosòna worojuxanaõ-di rokoirekre. Tai inyboho

reysamy ihÿre. <sup>3</sup> Inyboho bedewona-di hyy ihÿreny. Ihãrele tahe inyboho teysarennyre. Kia dori iny riwiòhenynymyhyÿre raròsòna ijòdikemy ruru inydeereny riwahinykemy. <sup>4</sup> Inyboho rikiijerenyhyÿkeki, Deuxudeewimy rikiwinyrenyke. Deuxudeewina rikiwinyrenykeki, raròsòna rikitarennykre. <sup>5</sup> Iny raròsòna tarasana aòkòkeki, uritere rakabedewoòtyhy, Deuxuluuna dori inywo-ki ratxireri. Deuxu Tyytybytyhymy inydeereny wahidÿÿna rare. Tii dori inyworeny-ki Deuxuluuna ritidire. <sup>6</sup> Iruruòmy inyboho roiremyhyÿre awimy riwinykemy. Tai tahe Kristu inydeereny, inyboho ibinare hãre rurure, Deuxudeewireu. <sup>7</sup> Isirare inyò hãbu òbiti dee ruruke. Tahe hãbu wiwihikÿ dee òsana iny rurukre, kia heka irutaòre. <sup>8</sup> Deuxu tahe luunatyhy inydeereny diteònyde. Iny òrarudurennyre hãre, Kristu inykireny rurure. Juhuu heka inyboho òrarudu roire. Ihãrele Deuxu taluuna nihikÿ inydeereny diteòsinyde. Tai heka Kristu inyòrarurenny-ki rurure. <sup>9</sup> Irubuna òraru-ki heka Deuxuru-ò inyboho òbitimy ihÿrennyre. Irubuna tahe kia riwinyreki irumy inonana tahe iratyre rarekre inydeereny wahe. Deuxu ykarana-ribi Kristu dori iny ritamyhyÿre. <sup>10</sup> Juhuu Deuxu òludu inyboho roire. Tahe wiji ibiòwamy inyboho roire, iriòre iny òrarurenny-ki rurureki, wahe. Wiji tahe rybe òludu mahãdu-ribi wiutàdànany rÿire. Ibutu kia heka Kristu òraru-ki sohojile ture. Tai iny teysamy roire Deuxu rityhynyreki. <sup>11</sup> Inyboho heka iwitxira Deuxu-wana ratximyhyÿrennyre. Tai tahe reysamy ratximyhyÿre. Inyboho Deuxu biòwamy ratximyhyÿrennyre. Jesuisi Kristu Inynyrÿ òraru-ki heka ture.

<sup>12</sup> Hãbu sohoji òraru-ki òraruna bedeki ralore juhuu, Adaò òraru-ki wahe. Taile tahe rubu nade bedeki. Idi ibutumy iny raòrarunnyre. Adaò òraruna-txi resereu, rubu ibutumy iny-ò resere. <sup>13-14</sup> Juhuu Adaò rurure. Iribi tahe ibutumy iny rurure. Moisesi tule rurure. Tahe bede ywina òraru-ki aòkò tiiboho rurure. Bede ywina dori Adaò rubu hewo-ò Deuxu riwahinyre Moisesi-ò. Deuxu heka iny òrarunany aòkò ròhòtynyre, tabede ywina dori kiau riwahinyòre. Adaò heka Deuxu rybe rityhynyòre, tai tahe rurure iwese Deuxu rarybere wese. Tule iòraruna òraru-ki ibutumy iny raòrarunymyhyÿrennyre. Adaò heka Jesuisi-ò rakewesenanykre. <sup>15</sup> Tiiboho wiwanale aò kabede-ò aò diwymyhyÿdenyde. Adaò heka rubu diwyde. Jesuisi heka runa diwyde. Adaò heka sòwemy iny-ò rubu riwahinyre. Jesuisi tahe sòwetyhy-ò Deuxu ruxetòena riwahinyre, tarasana tameny riwahinyre. Òraruna sohoji-di heka Adaò rubu riwahinyre ibutu iny-ò. Jesuisi tahe ibutumy iny-ò biu-ò hena riwahinykemy ratxireri iòraruna sòwere hãrele. Umytuedeòna wahidÿÿdu tii ratxireri. Kia awityhyre. <sup>16-17</sup> Inatyhymy Adaò widÿÿna ibinare. Jesuisi widÿÿna heka awityhymy rare inydeereny. Inyboho dori Jesuisi-wana irumy ratxirennyre aòu aòu kowa bede wihikÿ-ki, Deuxu òraru-ki. <sup>18</sup> Aòhòkÿmy dÿÿnana heka Adaò widÿÿna diwyde ibutumy iny-ò. Jesuisi tahe òbitina diwyde ibutumy inydeereny. <sup>19</sup> Adaò heka Deuxu rybe rityhynyòre. Tai iny sòwemy òraruna-txi resere. Jesuisi tahe Deuxu rybe rityhynyre. Tai iny sòwemy heka òraruna-ribi ritare. <sup>20</sup> Deuxu tabede ywina rybe riwahinyre. Tai tahe iny aòbina rierymyhyÿre. Òraruna-di sòwemy ihÿreki, tai Deuxu ruxetòena sòwetyhymy ihÿre. <sup>21</sup> Juhuu òraruna ratximyhyÿre iny umyrenny-ki. Inydeereny rubule riwahinyrennyre. Wijile tahe Deuxu ruxetòena riwahinyre inyumyrenny-ò, inyraykyrenny-ò. Òbitina inydeereny riwahinyre Deuxuko-txi. Jesuisi Kristu Inynyrÿ òraru-ki heka, umytedeòna inyboho ijòdire.

## 6

<sup>1</sup> Timykibo Deuxu inydireny rexiruxetòenykeu watxireri Deuxu ire inydireny raruxetòenykemy ire rexiòrarunanymyhyÿre hãrele. Timyki tuuòna.

<sup>2</sup> Aõkõhyyre. Inyboho heka òraruna dee rubumy ihÿrenyrene. Timykibo iny ihyymy òraruna-txi rekeseke? Aõkõhyyre. <sup>3</sup> Jesuisi Kristuni-ki inyboho raratisebenyreu, Tule Jesuisi rubu-my ratisebe-ò rururenyre. Kia teerytenynte. <sup>4</sup> Tiu inyboho risebenyrene Jesuisi òraru-ki, tii-wana inyboho rurure. Tai iru tÿmyra-di inyboho ihyre. Iwese Deuxu taruru-di Jesuisi riixixadÿÿnyre wese tule inyboho iru tymyra-di rokoireke. <sup>5</sup> Iwese tii rurure wese, inyboho tule rukurenykre òraruna dee. Iwese Kristu rexixadÿÿnyhe wese inyboho tule òraru-ribi ixãwira tii-wana rarehyykremy. <sup>6</sup> Iny umy tyby tule rurure Kristu itxeò-ki. Tai inyboho heka òraruna deòdumy aõkõ ihÿrenyrene. <sup>7</sup> Inyõ rurukreu, tii òraruna-ribi ixãwimy ihÿre. <sup>8</sup> Inyboho Kristu-wana rurukeki, tii Kristu-wana irumy ratxikre. <sup>9</sup> Kristu rexixare tii ixyby rurudoÿtyhy. Rubu ixyby tamy reaõtyhy. Kia tahe inyboho rieryrenyrene. <sup>10</sup> Jesuisi rurureu, iny òraruna ixãwina rubulemy rurure. Wiji tahe irumy ihÿre Deuxudeehyy. <sup>11</sup> Tule kai arumy atximahãte Deuxu dee iny aõbina bina-ò taruteki rubuwesemy arumy tahe Deuxu-ò. Inynyrÿreny Jesuisi Kristu tyhydÿÿki. Kiawesele mohõtinyke Deuxu dee, Jesuisi Kristu dee wahe.

<sup>12</sup> Kaiboho dori Jesuisi Kristu-wana atximahãtenynte. Òraruna-txi ixyby besekeõtyhy. Ixideewimy aõkõ rikiwinyrenyke, aõ ibina wahe. <sup>13</sup> Aumyreny biwahinybenyke Deuxu-ò iwese iny iru tÿmyra-di ihÿrenyrene. Tai tahe õbitile biwinybenyke, òraruna-txi beseõtyhy aõ iyja aõkõ. <sup>14</sup> Òraruna rybe-ò ijohorenyõmy. Tii dori awedu aõkõ rare. Deuxu ruxetòena-ò bexiweloromahãbenyke.

<sup>15</sup> Aõbo tahe awityhyre. Ruxetòena òraru-ki aõbo rekexiòrarunymyhÿke. Aõkõhyyre. <sup>16</sup> Òraruna rybe-ò heka bityhynybenykeki, òraruna deòdumy atxibenyke, rubu iòwy rare wahe. Deuxu rybe-ò tahe bityhynybenykeki, õbitimy boibenyke. Bexideòdunybonyõtyhyke òraruna bityhynybenykemy. <sup>17</sup> Wowydyna Deuxu-ò kanakemy watxireri. Juhuu kaiboho òraruna deòdumy ahãtenynte. Tahe wiji inatyhyna erydÿÿna tetyhynytyhytenynte. <sup>18</sup> Wiji tahe kaiboho õbitina deòdumy atxitenynte. Tahe Deuxu deòdumy wiji toite, tii ixideewimy timybo adirenykre. <sup>19</sup> Iwese juhuu òrarunawidÿÿna-ò texiwahinymahãte wese, wiji bexiwahinybenyke Deuxu-ò, õbitiwidÿÿna-ò wahe. Òbitimy rarybemahãre, itÿnytyhy kaiboho dori õhõtitymy toite aiximynatyhyrenyõ òraru-ki. <sup>20</sup> Òraruna deòdumy atxitenynte, Deuxu tetyhynyõtenynte. <sup>21</sup> Kia aõmydÿÿnana wiji ixãruna adeereny rare. Aõbo tahe awimy juhuu tewinytenynte. Kia heka rubule riwahinymyhÿre. <sup>22</sup> Òraruna-ribi ixinamy atxitenynte. Kaiboho Deuxu-ò ibutumy texiwahinynte. Tai umytuedeõna tetatenynte. <sup>23</sup> Òraruna òwy heka rubu rare. Inyõ òraruna riwinykeki, tii ruruke, kia òraruna òwy rare. Deuxu wahidÿÿna tahe umytuedeõna rare, Jesuisi Inynyrÿ rurureki wahe. Idi tiile-wana tukre.

## 7

<sup>1</sup> Waityhydÿÿdu seriòre, kaiboho bede ywinamy teerytenynte. Tai bieryke aõmybo ararybekre. Inyõ irulemy rariakekile, bede ywina tamy aõ rare. <sup>2</sup> Arawesenanykre. Hãwyy heka ihãbu-wana ihyymy ihÿre bede ywina myna. Hãbu rurukeki, tahe ixinamy ihÿre ijõ-wana roikremy. Hãbu rurukoeki tahe, ixinamy aõkõ ihÿre, ijõ-wana roikremy. <sup>3</sup> Inyõ-wana roikeki, hãwyy wedenamy raninikre. Ihãbu rurukeki, tii ixinamy rarekre. Ijõ-wana roike. <sup>4</sup> Kia wese rare, waseriòreboho, ayreny-ki. Kaiboho bede ywina dee tarutenynte. Kaiboho dori ityhydÿÿdu mahãdu atximahãtenynte. Kaiboho Deuxu hõrõ

mahādu atximahātenyete. Rubu-ribi ixixadu mahādu atximahātenyete, Deuxudeewina biwinybenykemy. <sup>5</sup> Juhuu ixideewile aō tewinymyhỹtenyete, rubu aōmydỹñana wahe. <sup>6</sup> Wijile tahe bede ywina-ribi ixinamy inyboho roimyhỹrenyete. Iwese ihetxiu tyryiti bede ywina rityhynymy aōkō ihỹreny, wiji Deuxu Tytybytyhy aōmydỹñana inyboho rityhynyrenyete.

<sup>7</sup> Timybo? Bede ywina aōbo ibinamy rare. Aōkōre. Ihoōkeki tahe òraruna jiarỹ arieryōtyhy. Bede ywina rarybere wasiōmy. Kiale reeryete aōbo wasimy rare, inyō aō arimykemy watzireriu, kia òraruna wasiweselemy rare. <sup>8</sup> Timyki, jiarỹ òraruna waerysōna bede ywina tuu rarybekōkeki. Bede ywina dori aōbina binamy riwabedeerynetye. <sup>9</sup> Jiarỹ juhuu bede ywina reeryōre. Reeryete tahe aōmydỹñana binale wadee rarerenyete. <sup>10</sup> Deuxu heka bede ywina riwahinyete juhuu. Tamy ruru riwahinyete bede ywina wahe. <sup>11</sup> Tahe bede ywina òraru-ki heka òraruna riwahinyemy. Tai tahe ònosōna riwarubunetye. <sup>12</sup> Kia bede ywina tahe awi rare, òbiti rare. Ōnosōna awi rare. <sup>13</sup> Timybo rare. Ōbitina aōbohe riwarubunetye. Aōkōre. Òraruna tiire. Tii tahe ibinatyhy rare. Bede ywina òraru-ki iny kia òraruna ibinatyhy reerynetye. <sup>14</sup> Bede ywina heka Deuxu Tytybytyhy aōmydỹñana rare. Jiarỹ heka inyle rare, òraruna heka wawedu rare. <sup>15</sup> Aōbo warayky dee ibinarele, kiale rewinywāhāre. Aōbo awimy warayky dee rare, kia rewinyōhyete. Aōherekibo? Reeryōre. <sup>16</sup> Rexierymyhỹre aōbo rewinymyhỹre. Reeryete kaa bede ywina awi rare. Tai heka rabadewomy watxiwāhāre. Jiarỹ dori bede ywina bede ywina riti reerymy watxiwāhāre. <sup>17</sup> Retxiōnymy watxiwāhāre. Waruruōhyete heka watxiwāhāre. Aōwi ariwinykeò. Òraru heka iòhōmy waribi ratximyhỹre waruru ratyre ratximyhỹre waribi. Tai heka òraru rewinyamahāre. <sup>18</sup> Waumy ehetyina tahe ibinatyhy rare. Aōbo awi rare heka ariwinykemy rewisyñnywāhāre ta heka rewinyōhyewāhāre. Aōwi rewinyōhyemahāre! <sup>19</sup> Jiarỹ rarurunymahāre heka aōbina ariwinykōkemy. Tahe ihārele heka rewinyamahāre. <sup>20</sup> Reeryetehe aōhebo ratỹñnymyhỹre. Jiarỹ ixiòrarudỹñ waòraruna wadi raitxỹteitxỹtenymyhỹre. <sup>21</sup> Deuxudeewimy heka ariwinykemy watxiwāhāre. Tahe araòrarunyhymahāre. <sup>22</sup> Waumy tỹmyra rarurunetyhymahāre Deuxudeewi widỹñna ariwinyke. Awityhy rare wadee. <sup>23</sup> Ijō tahe waumywo-ki, waraykywo-ki, ratximyhỹre, waumyehetyina waki ratximyhỹre. Wadi rarurunymyhỹre riwamymy ratximyhỹre. Aōbina widỹñmy heka wadi rimymy ratximyhỹre. Reòludunyōhyemyhỹre waraykymy heka rahañnanymyhỹre. Aōwesele heka tuu rahañnanymyhỹre, riòludunyōmyhỹreki wahe. Raraykynymahāre warayky-ki, Deuxudeewimy watzikemy. Tule tahe reerymahāre òraruna deòduō jiarỹ rare wahe. Waumy tỹmyra tahe wadee rarybemyhỹre òbitimy aōmydỹñana ariwinykemy. Waumyehetyina tahe kialemy wadee rarybemyhỹre —òraru ariwinykelemy. <sup>24-25</sup> Tai heka urile warayky raleileinymyhỹ. Moba riwatake waumyehetyina bina bina aōmydỹñana-ribi? Deuxudeewina-ki, Jesuisi Kristu Inynyrỹ heka iximynamy riwatakre. Tii riwateònymy wadi rarekre. Wowydyna tamy ariwahinykre.

## 8

<sup>1</sup> Tai heka Jesuisi Kristu tyhydỹñdu mahādu rubutyhy-ò heka raōtyhy. Deuxu heka tii ritarenkyete tii-wana rarehyete. <sup>2</sup> Deuxu-ò Tytybytyhy dori warurutymyra-di riwarurudỹñnytyhyete. Rubu-ribi dori Jesuisi Kristu riwatare ixinamy ararekemy. <sup>3</sup> Inyboho heka Deuxu Bede Ywina rierynetye, Moisesi tyryitina wahe. Tii heka iny òraruna-ribi iny ixinamy ririradỹñnymyhỹre. Jesuisi Kristule, aōbo, òraruna ruru rahumyhỹre. Aōma

rakahurenyõtyhy heka iny rururenydi aõma òraruna ixitawo-di. Rikityhynyrenyõtyhy heka aõma ixitawo-di aõbo bede ywina Tahe Deuxu tariòre diteònyde iny umyrenywesemy wahe. Tiu heka iòrarunaõhyyre. Tai heka rexiwahinyre iny òrarureny-ki. <sup>4</sup> Tai rikityhynyrenyke aõma Deuxu bede ywina. Iny nohõtireny rosake aõbo umy ehetchinareny inydeereny rarybemyhÿré. Ijohonarenyõmy ta, irybe-ò, Deuxu Tyytybytyhy rybeòle rokoholamyhÿreny. <sup>5</sup> Aõbo Deuxudeewimy biwinybenykeki, tai Deuxu Tyytybytyhy rybeòle heka iny roholamyhÿke. Ixideewimy widÿÿmy burubenykeki tahe, aõwaxina bohobabenyke umyehetxina rybe-ò. <sup>6</sup> Deuxu Tyytybytyhy rybe-ò ijohona heka iny umytÿmyra-ò ridymyhyre, umytuedeõna-ò, ywina-ò. Umy ehetchina rybe-ò iny rohola wana, tahe rubu-ò iny ridymyhyre. <sup>7</sup> Umy ehetchina dori aõma rare, Deuxu òludu. Deuxudeewimy aõkõ heka riwinymy ihÿre tiu riwinyõtyhy. <sup>8</sup> Inyõ ibutumy òraruna ixideewimy riwinykeki, tiu heka Deuxudeewina riwinyõtyhy. <sup>9-11</sup> Kaiboho tahe kiawesemy aõkõ heka toite. Deuxu Tyytybytyhy heka aworeny-ki rasÿnymyhyre. Tai heka umytÿmyraõ heka kaiboho ijõdirenyre. Deuxu Tyytybytyhy heka kaiboho ijõdirenyke. Inyõ Deuxu Tyytybytyhy ihoõkeki, tiu tii ityhydÿÿdu aõkõ rare. Aumytyhy heka rurukre aòrarunaõ direki wahe. Atytyby tahe iruhyymy ratxikre, Kristu dori aòraruna riixãwididÿÿnyreki wahe, Deuxu araòbitidÿÿnyre wahe.

<sup>12</sup> Tai waityhydÿÿdu seriòreboho. Umy ehetchina rybe-ò uritere ijohonarenyõmy. <sup>13</sup> Irybe deradÿÿna-ò beòbybenykeki, kaiboho heka burubenyke. Aõkõkeki arurenymy mariabenykre, Deuxu Tyytybytyhy-di wahe. <sup>14</sup> Ibutumy Deuxu Tyytybytyhy rybe-ò roholamyhÿre mahãdu, tiiboho tahe Deuxu riòre roire. <sup>15</sup> Deuxu rybemy bityhynybenyke. Deuxu Riòre wesemy tahe bityhynybenyke, òbitimy atxibenyke, deòdu wesemy aõkõ wahe, buberubenyõtyhy. Waha-my tahe marybemyhÿbenykre heka. Deuxu Tyytybytyhydile wahe. <sup>16</sup> Ijoiarenymy rakatxirenykre. Aõmybo Deuxu Tyytybytyhy-di inydeereny roimyhÿreki heka, tuu inatyhymy rakatximyhÿrenykre inyboho iriòre roiremy wahe. <sup>17</sup> Ibutumy aõbo Jesuisi Kristu inydeereny riwahinymyhyke heka, tule inyhõrõ reny heka rare. Iwese tii wowydyna iribi rikitarenykeki, tii-wana heka aõhõkÿmy rokotÿÿnyrenykre.

<sup>18</sup> Aõhõkÿmy rokotÿÿnyrenykre tahe aõnihikÿmy aõkõ rare, urihimyòle wahe. Inydeereny dori wowydynaõ kidiwahinykre, sòwetyhymy. <sup>19</sup> Ibutu bedede aõna aõna riraòmy roimyhÿre, aõma-ò, Deuxu Riòre mahãdu ibutumy rubu-ribi ixixana kiditynynykreu, rexixamy ibutumy rÿirakre idi biu-ò rirahukre wahe. <sup>20</sup> Kiatxu tahe ibutumy bedede raaòbinanyke. Iwese Deuxu juhoo riwinyre-ribi resere iny òraruna òraru-ki. Deuxu dori tuu bedede riywinyre txioinyhe tahe, raròsòna rÿire, riwitxiranyke. <sup>21</sup> Rekeysarenykre heka Deuxu riòremy heka rakatxirenykre. Tii ibutumy bedede-ribi iny ritarenykre ibutumy òraruna-ribi, rubu-ribi. Ibutumy òraruna aõbina bina deòdu heka rexihukre. Deuxu ibutumy aõna aõna ritÿmyranykre iwese tariòre itÿmyrare wese. <sup>22</sup> Kaa wiji tahe ibutu aõna aõna aõhõkÿmy rotÿÿnymy rÿira iròdu alòbòròna, ibutumy heka uladu ijira dese wese heka riijemy aõna aõna rÿira. Aõma, ixixanatxu dehemynekòlemy roimyhÿreki wahe. <sup>23</sup> Tiibohole sohojile aõkõ, tule inyboho Deuxu Tyytybytyhyre hãre, kia delemy inydeereny rawahinyre hãre, aõhõkÿmy rotÿÿnymyhyrenyre idi tiu Deuxu tariòremy risÿnyrenykeny riraòmyhÿre. Kia tahe inyboho riraòmyhÿrenyre. <sup>24</sup> Inyboho dori tararòsòna-ki kawese awirenyre. Inyõ iraròsòna itÿnykeki, aõbo tahe riraòmyhÿke. <sup>25</sup> Tai tahe Deuxu rikityhynyrenyke rikiraòrenymy aõma, inydeereny tuu raryberé, rikitarenykré. Rikiyrymy rikiraòmy rokokomyhÿrenykre.



<sup>26</sup> Iwesele tahe Deuxu Tyytybytyhy heka iny riwiòhenanyrenykre. Inyummy aõmydỹñnanareny heka aõhebo rotỹñnyhỹre txuõ txuõlemy iny riwiòhenanymyhỹrenykre. Inyboho riwiòhenanyrenykre aõma inyboho rierykõreki ixitõedỹñ. Deuxu Tyytybytyhy inydeereny dori rexitõenymyhỹre tii inyboho heka aõmy rybe inyboho rierykõmyhỹrenyre inydee risỹnynymy rarybemyhỹre tuu. <sup>27</sup> Inytybyreny heka ibutummy inyraykyreny, inyworeny, rierymyhỹre. Tii heka rexitõenymyhỹre inydeereny iny òbitinaren-y-di, iny ywinaren-y-di iny riixitõedỹñnyhỹrenyre. <sup>28</sup> Ibutummy aõbo inydeereny rabeledỹñnananymyhỹré heka inydeereny awire. Deuxudeewina heka rikiwinyrenyke inydireny ratximyhỹre Deuxu dori inyluuren-yre. Tii dori iny ridyre tariòre wesemy. Tii dori kiamy juhoo rõhõtynyre. <sup>29</sup> Juhudihikỹle Deuxu rõhõtynyre mobo tamy rakemy. Tahe tiu rierymyhỹre mobo aõma inyboho tamy kanakré. Tiu heka rierymyhỹre timybo widi rarekré, tariòre wesemy idi rarekré. Iriòre heka sõwemy iseriòre relekre. Iriòre tahe juhoo ityhydỹñdumy iuhe rỹire, iseriòre wesemy wahe. <sup>30</sup> Tii heka inyboho rihitxinyrenyre. Tii heka ryrymyhỹre tamy, kanakemy. Tii inyboho tamy ritehemynyreu, heka inyboho tamy ritehemynyrenyre. Iny òraruna-ribi inyboho riixãwididỹñny Deuxu, Jesuisi, Deuxu Tyytybytyhy ywina heka inydeereny riwahinyre.

<sup>31</sup> Ywimy rakatxirenykemy heka inydeereny rõhõtyny ihỹre. Wowydyna heka inydeereny riwahinykre. Timybo rakaryberenykre. Awire heka ibutummy. Nihikỹre. Deuxu heka inyworeny-ki ratximyhỹre. Tii heka inydinoduren-yre. Inyòluduren-ydỹhyre ratxirenyke, sohojiõ. <sup>32</sup> Ibutummy inydeereny riwahinykre —inydeereny dori taRiòretyhy dori diwahinyde. Diwahinyde heka inydeereny rurukremy. Deuxu heka iny riixãwididỹñnyrenyre. <sup>33</sup> Inyboho heka òbitimy ratximyhỹrenyre tamy rakatxirenykemy. Tii dori iny riwinyreny òbitimy. Inyõ rarybeõtyhy iny òbitimy aõkõ ihỹre. <sup>34</sup> Inyõ heka inymyreny rarybeõtyhy rukururen-ykremy. Jesuisi Kristu dori inydeereny rurure, iny òraruren-y-ki. Tii ixityre rubu-ribi rexixare inydeereny. Katahe ronymyhỹre Jesuisi heka rexitõenymy ronymyhỹre inykireny. Deuxu-ò heka iny riixitõedỹñnyremy inydireny ronymyhỹre. <sup>35</sup> Tiu heka rihitxinyõtyhy, aõma Jesuisi Kristu luureki wahe. Aõhõkỹmydỹñnana dori rakatxireny. Tii heka iny rirubunyen-yke. Iny rama rirubunyen-yke inieruõmy. Bede brebuwo-ki rakatxirenyke. Inymyreny rarybemyhỹkre. iny rirubunyen-ykre. Ta Deuxu inywanaren-yhy ratximy ihỹre. Tiu heka Deuxu-ribi aõ iny rihitxinyren-yõtyhy. <sup>36</sup> Inyboho heka rubu riraõhyky ratximyhỹrenyre, rexiywinyhykyle. Kia rikiwinyrenykre aõma Deuxu luuna-di xiery —iwese budoeni tarubuna riraõmy rỹimyhỹre wese. Deuxu rybe inykoreny tuu relyymyhỹre. <sup>37</sup> Taiki heka imahãduy-ribi rokotaren-ykre. Kia òlõna inyhõrõreny rare. Kristu dori inydeereny rurure. Aõ heka iny rihitxinyren-yõtyhy Deuxuluuna-ribi. Rubu dori iny rihitxinyren-yõtyhy. Umy tiu iny-ribi rihitxinyõtyhy. Ýju dori tiu iny rihitxinyõtyhy. Aõbinahakỹ heòty, rubu bina heòty dori tiu Deuxu luuna-ribi rihitxinyõtyhy. <sup>38</sup> Aõ heka iny rihitxinyõtyhy Deuxuluu-ribi. Biu wenonana dori, beheỹ ratyre, tiu Deuxu luuna-ribi iny rihitxinyõtyhy. Wiji aõna aõna itõmo rahudi aõna aõna, aõtxi aõna aõna tiu iluuna-ribi rihitxinyõtyhy. <sup>39</sup> Kia ibutummy wadee inatyhy rare. Jesuisi heka Deuxu inydeereny ritỹmynymyhỹre ibutummy iluuna iny òraruren-y-ki rurureu.

## 9

<sup>1</sup> Kaiboho waijoireny, waityhydỹñdu seriòre mahãdu. Kristu hõrõ jiarõ

rare, inytyhy rare. Deuxu Tyytybytyhy, Jesuisi Kristu-wanale rierymyhÿre kia inatyhy rare. <sup>2</sup> Rabedewomy heka watzireri waijoi rityhynyõreki. Deuxu Tyytybytyhy kia rieryre. Txuõ txuõlemy, ruõ ruõlemy rabedewomy watzihãre. Txiole txiole aõmydÿÿnanamy adeeremy ararybeke kaiboho tarasanaõ boibekemy. <sup>3</sup> Deuxu riwatzuhoke Kristu-ribi waijoi deròwmy, iwiòhedÿÿkeki. Jiarÿ heka ihyy arurukemy waijoi ityhydÿÿdukõdu mahãdu wahe ixi-di tamyreny rahõtyny watzireri. Kia biu-ò hena ritarenkemy wahe. Tahe aõkõre heka. <sup>4</sup> Deuxu heka tamyreny sòwemy diwahinyde. Ihãrele tiiboho ijohona deramy rekoamahãreny. Aõma, rihitxinyreny heka taijoi renymy. Ridyreny heka bederahy-ò loosõna-ki biuwetykywo-ki. Tahe tamyreny rarybere tii iluurenymy. Tamyreny heka sòwemy aõ kidiwahinykemy idireny ratximyhÿre. Tule tabede ywina rybe tamy diwahinyde. Tai tahe Deuxudeewina reeryreny. <sup>5</sup> Tamy heka Deuxu wowydynaõ riwahinyrenkemy Deuxu teòduõ kanake tii tamy rarybere. Tybyreny dori ilahiboho dori rityhynyreny, tii Deuxu sòwemy rityhynyreny. Kristu tahe tule judeu mahãduõ ratximyhÿre, waijoi wahe.

<sup>6</sup> Deuxu rybe inatyhytyhy rare. Sòwemy iny judeu mahãdu wese roire. Ibutumy tahe judeu mahãdutyhy aõkõ roire. <sup>7</sup> Ibutumy judeu Abraõ riòre riòre rÿira mahãdu aõkõ heka Deuxu riòremy rarekre. Deuxu heka Abraõ-ò rarybere: —Ijai riòrele ariòkõre rarekremy ijõ aõkõ. Ibutumy Abraõ riòre, Ijai riòre aõma ityhydÿÿdu aõkõ roire. <sup>8</sup> Ijõ iriòrekõna mahãdu tahe ityhydÿÿdu heka roire. Kia Deuxu rybe rityhynymyhÿrele heka ityhydÿÿdu mahãdumy rÿira —judeu mahãdu tyhy wahe. <sup>9</sup> Juhuu tahe Abraõ-ò Deuxu rarybere: —Ahãwyy Sara, iriòredikre ijõ beõrau wahe. <sup>10-11</sup> Iu tahe Ijai iriòre hãwyy-wana herinanyreu, Rebeka-wana roire tahe inatxi uladumy heka Rebeka tamy kidiwahinykremy riywinyra. Ijau juhutyhy iriòredelamy reakre riywinyra. Ijõ tahe Ijaò ini rarekre. Kawese Deuxu rarybere uladu reakõule: —Jiarÿ heka Ijaòmy retamy rarybere Ijau aõkõ. Jiarÿ aõna aõna sòwemy tamy adiwahinykre. Deuxu kiamy rarybere Ijau reakõule. Tiu aõwiwihikÿ aõbina bina riwinyke aõkõ. Myle roireri. Deuxu riteòsinyre ijõ tarasanamy reake-ribi tahe ijõle tuu reare. Aõ uladu tuu riwinyreriki aõkõ Deuxudeewimy tuu riwinyre. <sup>12</sup> Juhuutyhy Rebeka-ò rarybere: —Idela taseriòre deòdumy rarekre. <sup>13</sup> Iwese tyyriti-ki roire wese: —Ijaò iluure tahe Ijau aõkõre.

<sup>14</sup> Aõmybo tahõtynyteri? Deuxu aõbo adee ibinare kia riwinyreki? Aõkõre heka. <sup>15</sup> Deuxu rarybere Moisesi-ò: —Jiarÿ heka awimy inyõdee ariwinykre, tahe tuu ariwinykre. Inyõdee ruxetõena ariwahinykeki, tamy ariwahinykre iixideewimy. <sup>16</sup> Deuxu ruxetõenale heka rare, iny aõmysÿdÿÿ sòwehekÿmyreki aõkõ inydee tarasana riwahinykre. <sup>17</sup> Kaheka iny rieryre Faraò (Egito bede iòlò) ijyy dori inydee kia riteòsinyre iwese Deuxu rare wese wahe reteherenyké. Deuxu kiamy rarybere Faraò dee: —Adee kÿny ariwahinyre ruruõ kai bonyke iòlòm. Tai tahe ibutumy iny wani wiwihikÿ-ò roholakre. <sup>18</sup> Ibutumy Deuxu ixideewimy tuu riwinymy rÿirakre. Ruxetõena riwahinyke tamywi tahe riwahinyra.

<sup>19</sup> Inyõ tahe wadee timy rarybeõtyhy: —Aõherekibo kawesemy Deuxu inyõ aõhe risÿnykre ada amobohe Deuxu aõwidÿÿna deramy reakre. <sup>20-21</sup> Tiu moõ rarybeõtyhy Deuxumy ibinamy. Iu inyõ butxi riwinykreu, aõma sudeõ rimykreu, riwinykre heka butxiwihikÿõ tamywikeki. Ibinaõ riwinykeki tasÿ iwesele riwinyke ibinamy tuutyhymy. Bedenamy riwinyke noijaka tamy ridemyhÿkemy. Ijõ butxi tamy wikeki. <sup>22</sup> Iwesele heka Deuxu rare. Rebureke heka inyõdee raykarananyke. Ijõ-ò tahe awike ta ruxetõena-di riwiòhenanyke iaõna aõna riijemy. <sup>23</sup> Idi tahe rõkõhõtynyreny timybo Deuxu wina, Deuxu

loosòna awiremy iruxetòena inydeereny riwahinyhyymyhÿre. <sup>24</sup> Judeukòdu mahàdu Deuxu ritare. Judeu mahàdu yribi sohoji aòkò. Inyboho. <sup>25</sup> Osea tyyriti-ki rybeò kiamy tai roire Deuxu rarybere wahe: —Ijò mahàdumy sÿ aronykre wariòremy. Tahe waijoiy-ribi aòkò waijoio mahàdu aòkò waijoimy arininikre idi aritakre. Tuumy ararekre. Tiu heka luuna juhUU inyò rewahinyòhyre. <sup>26</sup> Deuxu rarybere tiu: —Kaiboho juhUU waijoio aòkò toite, tuuòmyta kowa-ki wariòerenymy boibekre. <sup>27</sup> Isaia tule rarybemyhÿre aõma judeu mahàdumy wahe. Sõwemy, sõwemy imahàduò hãre tahe, ibutumy tarasanamy reakre. <sup>28</sup> Deuxu ele elemy rotÿÿnykre timybo rarybere myna. Ijò-ò ruxetòena riwahinykre ijò-ò adehuna riwahinykre riixãwidinyrenykre. <sup>29</sup> Ijò Ritidÿÿna-ki Isaia rarybere: —Deuxu ibutu dinodu heka ruxetòena riwahinyòkeki, ibutumy judeu mahàdu riixãwididÿÿnykre iwese Sodoma hãwã Komora hãwã-wana riixãwidinyre wesemy wahe.

<sup>30-31</sup> Timybo rakaryberenykre kia aõmydÿÿnanamy? Kialemy: —Judeukòdu mahàdu-ò Deuxu tarasana riwahinyre tiu Deuxu riijeòhyymyhÿre hãrele. Judeu mahàdu heka rityhynykemy idi ratximyhÿre ibede ywidÿÿna-di tahe tiu heka ritaòhyymyhÿrenyre tarasana. <sup>32</sup> Bede ywina rybe riyrubunyekhãre awikehãre tiu tarasana ritaòtyhy. Rityhynytyhykekile heka tuuke. Tai tahe ritaòre tarasana, rityhynytyhyòrenyre. Tai tahe iwere mana iny riatymyhÿre were rydÿÿnarenyre. <sup>33</sup> Ijòti nihikÿ heka roimyhÿre. Tiu heka riòhòreòtyhy iweribi-ò. Deuxu rybe-ki kia wesemy roire: —Judeu mahàdury-ki mana nihikÿ wese retidimy doimyhÿde. Sõwemy heka iny rÿira tiu heka ityre-di rariaòtyhy biu-ò hena-ò dehemynydeki wahe. Kia iny rityhynymy Jesuisi Kristu rÿirale tahe ritakre tarasanaò heka inatyhymy.

## 10

<sup>1</sup> Waityhydÿÿdu seriòre, rexitòenymy wãhãre heka Deuxu-ò ibutumy judeu mahàdu biu-ò henamy rÿikemy. Kiamy tuu rarumahãre. <sup>2</sup> Reerymahãre tiiboho ibutumy rityhynymahãrenyremy Deuxu. Tiiboho ityhydÿÿnareny tahe òbitihyky aòkòre. <sup>3</sup> Tiiboho kiamy ròhòtinymahãrenyre aõma judeu mahàdu heka bede ywina rybe rityhynyrenykekile rexiòbitinykemy heka ròhòtinymahãrenyre Kristu-ò ta rexiwelòròkòlemy Kristu bede-ò rexihumyhÿre, tai Deuxu iny-di awimy rarekemy. <sup>4</sup> Bede ywina heka Deuxu aõmydÿÿna tarasana aòkò heka rare. Kristu rityhynymahãrenyke. Kia weseleke heka tii rinyrenyre rexiòbitinyre. <sup>5</sup> Moisesi dori ròritidÿÿre tuu: —Inyò tiu òraruna-txi reseòhy rarekeki, taile iny tarasanamy ratxike. <sup>6</sup> Kiamy heka ityhydÿÿna namyhÿde. Uritere inyò Kristu biu-ribi kòdidykemy ixinohòtidÿÿõna Kristu kidiwykredi uritere nohòtirenymy, isiratyhyre wahe. Tuu aòkò iny òbitidÿÿna-ki rahamyhÿre. <sup>7</sup> Uritere Kristu ixixana-di mohòtinynyòmyke isiratyhyre dori kia-ribi òbitidÿÿna kiditakremy. <sup>8</sup> Tii heka inyboho ribedeerynanyrehÿre. Iòhòlemy heka iny-ribi ihÿre warybereny wahe. <sup>9</sup> Iny taykyrenyke rityhynymyhÿre inykile. Tai tahe rarybere inywitzira-ò aõma Kristu iny wedureny ihÿremy wahe. Inyworeny-ribi rikityhynymyhÿrenykeki. Aõma Kristu heka Deuxu riixixanyre rubu-ribi. <sup>10</sup> Taiki tahe biu-ò hena rakatarenykre. Aworibityhy rikityhynymahãke. Kiamy heka iny òbitimy rekelerenyke Deuxu dee wahe. Rarybeke iny-ò rityhynymy ratximyhÿremy tai tahe tuu relemy ratxike. <sup>11</sup> Kiamy heka Ritina-ki roimyhÿre: —Inyò rityhynytyhyhyke heka teysamy ratxike. Tiu heka anabedewoòtyhy tatyhyna-ki. <sup>12</sup> Judeu mahàdu dori judeukòdu mahàdu-wana wiwesele rare. Ibutumy heka sohojihyyle iwedure, Inynyrÿ wahe. Ibutu heka inydee riwahinyrehÿre aõmybo iny rexitòenymyhÿre wahe.

<sup>13</sup> Iny rexitòeny-wana Inynyrÿni-di tarasanamy, tai iny-ò riwahinymyhÿre. <sup>14</sup> Teerykòte heka timybo idi ratximyhÿre rexitòenymy. Timybo bieryke inyò tuu relyykòhãre heka rityhynyke. Tamy heka roholaòtyhy inyò tuu relyyòkeki tiu ityhydÿÿna. <sup>15</sup> Inyò heka raòtyhy, inyò biteònyòkeki wahe. Kiamy tahe Tyyriti rarybereri: —Kia Rybewihikÿmy rybedu heka awi heka rare, dehemynyna heka awire, deysana rybe dori diwymyhÿde. Deuxu rybena ywina wihikÿ heka diwymyhÿde. Tai tahe iny reysamy heka aõma Deuxu Rybewihikÿ tamy riwymyhÿreki wahe.

<sup>16</sup> Ibutumy aõkò tahe rityhynymyhÿre. Iwese Isaia Deuxu rybedu rarybere wese: —Inynyrÿ, Rybewihikÿmy tamyreny heka rarybemyhÿreny. Ihãrele tahe rityhynyòhyymyhÿreny. <sup>17</sup> Ityhyna heka Rybewihikÿ-ò iny roholamyhÿreu, rityhydÿÿmyhÿre. Kristu ityhyna tamy kedehemynykre, rybe wihikÿ òraru-ki wahe. <sup>18</sup> Dÿÿraxinaõ ariwinykre. Taholatenyòte aõbo Deuxu rybe-ò? Kohe, ibutumy heka roholamyhÿre. Tyyritina-ki roire: —Deuxu rybe tÿmyra wihikÿ ibutumy riteònymyhÿre hãwã hãwãmy. <sup>19</sup> Ijõ arÿÿraxikre: —Judeu mahãdu aõbo kia rieryòmyhÿre? Moisesi tyyriti-ki roire: —Deuxu biu-ò hena judeukò mahãdu-ò ariwahinykre. Waijoi mahãdu ariwoxibronykemy. <sup>20</sup> Isaia tahe idi tuu rarybere: —Iny wiwana mahãduõ heka Deuxu riijemyhÿre. Tii rexitÿnynyre taòrysydu mahãdu-ò. Itxi reare. <sup>21</sup> Isaia rarybere Judeu mahãdumy kia: —Ihãrele Deuxu iny ritobinyrerimy ihÿre iny, iny nohòtibinaki wahe.

## 11

<sup>1</sup> Kaiboho heka timybo tahòtinymahãtenyete Deuxumy? Tii aõbo taijoi-ribi nohòti rosaremy —judeu mahãdu-ribi? Aõkòre. Jiarÿle, Paulo, judeu mahãduõ rare. Jiarÿ heka Abraõ riokoreõ rare. Benjami ijojio heka jiarÿ rare. <sup>2</sup> Deuxu taijoi-ribe nohòti rosaòtyhy. Tii juhoo ritare. Elia juhoo Deuxu-ò taijoimy rarybere. Ryberiti-ki kia roire: <sup>3</sup> Tiiboho heka rybedu mahãdu rirubunyre. Tule axiwena wahidÿÿna ribòhònyre. Jiarÿ sohojile aluure Deuxu. Tule ròrubudÿÿmy wadi ratxirenyreri. <sup>4</sup> Timybo Deuxu heka Elia-ò dirawyònyde: —Aõkòre, kai ihewoludutyhy waluunadu aõkò tate. Waluunadu 7000 inymy rÿire aribihiximy wahe. Tule Bali suritxoo tiu rityhynyrenyòhyymyhÿre. <sup>5</sup> Katahe wijile iwesele rare. Iny ibutemy Deuxu hõrò mahãdu rÿire. Tii taruxetòenadile ritareny. <sup>6</sup> Deuxu ruxetòena heka aõ iòwy-di aõkò riòwynymyhÿre Deuxu riwahinymyhÿre. Aõwihikÿ diwinymyhÿdenydeki aõkò heka tuu heka ratximyhÿreny iòwydikeki tahe aõ ruxetòe aõkò rare. <sup>7</sup> Deuxu heka judeu mahãduõ rihixinyre tarasanamy rekré. Ijõ tahe iwety mahãdu wesemy ijõ rÿira. Deuxu tamy tarasana-ò rryreri tiiboho roholaõre. <sup>8</sup> Tyyritina-ki rarybemyhÿre ròròmy ratximyhÿreny. Deuxu heka rirubereny ihãre ta tòhòtirenny ratòbònyreny. Taita rieryòhyreny heka Deuxu Tyytybytyhymy rarybemyhÿrenyeki wahe. Iwesele heka wijina roimyhÿre. <sup>9</sup> Ihetxiu Iòlò Davi iwesele rarybere: —Kia heka taworana bedehesina-ki, ramyrenykre, raborenykre, tabonahemy reserenykre idi aõhòkÿmy rotÿÿnykre. <sup>10</sup> Irue idymy releke tiu robiòkemy. Tiumy rarabunykre iaõbinabina-ki.

<sup>11</sup> Adeereny arÿÿraxikre kiamy: judeu mahãdu resereu ixãwire aõbo? Aõkòre. Urile tarasana nade judeukòdu mahãdu-ò tai. Judeu mahãdu ibinamy tai ròhòtinykemy. <sup>12</sup> Judeu mahãdu òraruna òraru-ki heka sòwemy iny-ò aõwihikÿ nade, judeukòdu mahãdu-ò wahe. Tahe awityhymy rarekre ibutumy judeu mahãdu ralokremy. <sup>13</sup> Jiarÿ, Paulo wahe, rybe wahidÿÿdu heka jiarÿ rare. Judeukòdu mahãdu-ò tii heka jiarÿ rare. Uritere nohòti

losarenyõmy kia waaõmysỹdỹna rare. Kia awi heka wadee rare. <sup>14</sup> Deuxu heka adeereny aõ nihikỹ adeereny riwinyre, kaiboho judeukõdu mahãdu rare. Judeu mahãdu robikre. Tai heka tiiboho biu-ò hena mahãdu-wana ratxikemy riwisỹnykre. Kia wese òsana ijõ tarasanamy rimykeny. <sup>15</sup> Judeu mahãdu wiji rityhynyõreri. Tai Deuxu ijõ mahãdu-ò biu-ò hena riwahinyre, judeukõdu mahãdu-ò wahe. Iny sõwemy tai ritamy rỹimyhỹre òraruna-ribi. Iwese inyõ rubu-ribi riixixanyre wese kia rare iu judeu mahãdu ralòkreu wahe. <sup>16</sup> Juhuu paõ ere awimy Deuxu-ò biwahinykeki, ibutumy paõ ihõrõ rare. Òwòru rutysõmo Deuxu-ò biwahinykeki, ibutumy òwòru ihõrõ rare. <sup>17</sup> Òwòru ere judeu mahãdu wese rare. Tiiboho òwòru-ribi raòròmy raremyhỹ. Kaiboho judeukõdu mahãdu teròwmy atximahãtenyete. Kia òwòruru wesemy òwòru-ò ralòmy atximahãtenyete, tai tahe arumy atximahãtenyete. <sup>18</sup> Ixityhymy nohõtirenyõmy. Kaiboho dori iratyre awimy aõkõ atximahãtenyete. Òwòru rutysõmo aramyre judeu mahãdu tyby wese wahe. Aõkõkeki, kai bedesekre òwòru desede wese. <sup>19</sup> Kaiboho òsana marybebenykre: Tiiboho òwòru-ribi ritamy raremyhỹ inyboho rikibynyrenykeny. <sup>20</sup> Inatyhy rare. Urile õhõtì-ribi losarenyõmy tiiboho iribi ritamy raremyhỹ rityhynyõrenyeki. Tule kaiboho talòmy tatemyhỹ tetyhynymyhỹtenyeki. Tai ixiwededỹõreny urile bexityhynymy. <sup>21</sup> Judeu mahãdu heka òwòru rutyhy wese raremyhỹ. Ihãrele tahe Deuxu òwòru-ribi ritare. Timybo tahõtinytenyeteri —Deuxu aratarenyõtyhy. Tule aratarenyke timykeki. <sup>22</sup> Deuxu dori ywimy rare ijõ-ò. Tule tii isirare ijõ-ò: —òraruna-txi besebenykeki, tii aratarenyke. <sup>23</sup> Judeu mahãdu ixyby rityhynyrenykeki, ixyby Deuxu ritidikre iherina-ò. Deuxu irurudirare ixyby ritidikremy —isiraõre Deuxu-ò. <sup>24</sup> Kaiboho heka òwòru bederahy ludu wesemy atxitenyete. Iwese òwòru ludu-ò tii aratidirenyre wese. Judeu mahãdu dori òwòru ludu wesele rare.

<sup>25</sup> Waityhydỹdu seriòre, inatyhynaõmy adeereny arelyykre. Deuxu riereyryre tiwesemybo judeukõdu mahãdu rityhynykre. Ikonana kaiboho bityhynybenykreu, judeu mahãdu ixybyle kanalokre. <sup>26</sup> Tai tahe ibutumy judeu mahãdu ritakremy. Tyyritina-ki heka kiaweselemy roire: —Siaõ-ribi tarasaduõ kanakre. Ibutumy heka judeu mahãdu òraruna-ribi kòdòòsekre. <sup>27</sup> Kia bedeu heka aritakre iòrarureny wahe iwese tuu rarybere wese juhuuhukỹle. <sup>28</sup> Katahe rasõwemy roira aõma judeu mahãdu wahe. Tiiboho Rybewihikỹ òludu roire. Tamyreny heka awi aõkõ Rybewihikỹ. Kia heka adeereny awimy ròhònyre. Tetatenyta dori Deuxu-ribi aõma iwahidỹna aõna aõnawidỹnamy. Deuxu juhuu taluunamy walabiereny-ò rarybere. <sup>29</sup> Deuxu heka tiu riwitxiranyõhyymyhỹre. Releke wana heka riwinymyhỹre tahõrõ mahãdu dee. <sup>30</sup> Judeu mahãdu heka Deuxu rityhynyõmy roimyhỹre wahe. Tai heka Deuxu ruxetòena adeereny diwahinyde. <sup>31</sup> Katahe judeu mahãdu heka wiji roire ityhydỹmy aõkõ. Aõtxu tahe Deuxu ruxetòena ixybyle rimykeny rỹira. Deuxu heka iximymy iny riteònyrerimy ihỹre. <sup>32</sup> Deuxu ibutumy òraruro-ò rityhere idi taruxetòena ritỹnykeny.

<sup>33</sup> Iny Deuxureny aõwi dinodu heka rare. Ibedeerytyhytyhy rare. Inyõ ibedeerywidỹna rieryõhyymyhỹre. <sup>34</sup> Tiu rikieryrenyõtyhy irayky, tiu rikibedeeryrenyõtyhy. <sup>35</sup> Inyõ tiu Deuxu tadiwidỹdumy isỹnyõna. <sup>36</sup> Ibutumy dori Deuxu-ribi hikỹle nade ixidee. Ibutumy iruru namyhỹde. Tai tahe ibutumy wowydyna tamy rikiwahinyrenykeny inyboho ratximyhỹreny.

## 12

<sup>1</sup> Tahe waityhydỹdu seriòreboho, aumyreny heka biwahinybenyke Deuxu-ò. Aramyrenykeny òbitihyylemy. Kia wowydynatyhy Deuxu-ò. Tii

dori ibutumy aõma inydeereny riwinyre. Kia ibutele rarekre tamy. Tii dori sõwemy riwinyre inydeereny. <sup>2</sup> Uritere riraõmy bede ludu mahãdu wesemy. Iwixiramy boibeke. Tai Deuxu dee awimy kia rarekre. Aumy tÿmyramy ibutumy biwinymahãke. Tai tahe Deuxu ribedeerynanykre aõbo awire.

<sup>3</sup> Jiarÿ heka Deuxumy rybeduõmy rare adeereny. Tai adeereny arary-bekre bexiijebenyke. Òbitimy marybemy aumy-ribi. Deuxu-ribi ityhyna adeereny diwahinydekí heka aõhe botÿÿnykemy mohõtinyinmahãbenyke. <sup>4</sup> Umy heka sõwemy txura txura roire, umy hitxi hitxinamy rÿire. Kristu ityhydÿÿdu mahãdu kia wese rare, Kristu woludu mahãdu wahe. <sup>5</sup> Tule Kristu mahãdu sõwemy aõmysÿdÿÿna wixira rÿire. Sõwemy iny wiribi hitxi rÿire. Iwese umy sohoji wese Kristu wo mahãdu rÿire. Ibutumy wiribi hitximy raaõmysÿdÿÿmy iwidÿÿmy rÿimyhÿke. Inyboho heka ibutumy iaõmysÿdÿÿna Deuxu-ò rikiwinymyhÿrenyke. <sup>6</sup> Deuxu heka aõwidÿÿna widÿÿna wixira iny sohoji sohoji-ò riwahinymyhÿre. Kai heka tÿnydÿÿna abrysikeki, awimy bexityhynyke awimy biwinykemy. <sup>7</sup> Awimy wiòhedÿÿmy atximahãte wana, bõwiòhenanyke awimy. Rybedÿÿdumy atxiteri-wana awimy òbitimy bibedeerydÿÿmy. <sup>8</sup> Deuxu rybemy rybedu atxiteri-wana marybeke inydee bexityhynymy. Deuxu sõwemy adee nieru riwahinyre-wana, bõwiòhenanyke inywixira. Inydinodumy atxiteri-wana, òbitimy maaõmysÿdÿÿ ibutu dee. Kia dohodÿÿdukeki botohodÿÿkre inyõ aõ biwahinykeki awowi-di bowahike.

<sup>9</sup> Wiribi ihitxidÿÿõmy. Tuu luu-di tahe inywixira hitximy. Uritere rybeõmy urirybele. Uritere rybe òbitikõmy rÿireò noõmy. <sup>10</sup> Kaiboho ityhydÿÿdu seriòre atximahãtenyete. Tai wiluumy atxibenyke. Widee biwowydynybenyke, ixidee aõkõ. <sup>11</sup> Aõmysÿdÿÿna-di boibenyke. Ibutumy Inynyrÿ-ò biwinybenyke eysareny-di. <sup>12</sup> Beysamy atxibenyke ywina-di aõkõkÿmy dÿÿnana-ki. Bexitòenyhyymahãbenyke. <sup>13</sup> Aityhydÿÿdu seriòrey-ki inyõ aõ ihoõkeki, tamy biwahinyke ahõrõ-ribi. Inyõ ihetoõkeki, bidybenyke aheto-ò. <sup>14</sup> Inyõ ibinamy adeereny riwinykeki, tahe ibinamy aõkõ biòwynyke. Bexitòenyke Deuxu-ò tamy. <sup>15</sup> Inyõ reysakeki, tii-wana beysake. Inyõ rahinykeki, robukeki, tii-wana mahinyke, bobuke. <sup>16</sup> Ywimy ibutumy iny-wana boibebenyke. Ixityhy aõkõ nohõtíõmy. Kai dori ibutumy aõkõ teeryte, tule aaõmysÿdÿÿ bina awimy bimybennyke. <sup>17</sup> Inyõ adeereny ibinamy riwinykeki, ibina-di aõkõ biòwynybenyke aõma uritere ywihyylemy boike. <sup>18</sup> Wiwesehyyle ywimy rÿimyhÿre. <sup>19</sup> Inyõ umy aõma rarybekeki, uritere ixiòwydÿÿmy nohõtíõmy. Deuxu-wana birimy. Tii heka riòwynykre iaõhõkÿmydÿÿnana-di. Kia tahe roire Tyyritina-ki. <sup>20</sup> Aõma aõludu ramamy ruru wana, tamy rÿsÿna biwahiny, bemy tii ruru wana, tamy bee biwahiny. Tai tahe tii raixÿrure aõbo adee riwinyre lau. <sup>21</sup> Aõbinahakÿ rÿira-wana, uritere iijiradÿÿõmy. Ibutumy aõwiwihikÿle aõ biwinymyhÿke. Tai tahe rexihuke aõbina bina.

## 13

<sup>1</sup> Bityhynyke bede dinodu. Deuxu dori risÿnyre bede dinodumy. Ibutumy dinodu heka Deuxule inydeereny riwahinyre. <sup>2</sup> Inyõ bededinodu rityhynyõkeki, tii heka Deuxu rityhynyõmyhÿre. Iny òbitimy ratxikeki, tiu bede dinodu rimyõtyhy ròtena-ki aõhõkÿmy dÿÿnana rotÿÿnyõtyhy. <sup>3</sup> Inyõ òbitimy ratxikeki heka tiu bede dinodu lau ruberuõtyhy aõhe risÿnyõtyhy. Urile iny aõòtaòtalemy rotÿÿnyre tahe, tiile ruberumyhÿre bede dinodu lau. <sup>4</sup> Bityhynybenyke ibutumy bede ywina aõbo dinodu mahãdu raryberé. Brebuõlemy botÿÿnybenyke. Deuxu diteònyde heka bede dinodu iny riwiòhenanykemy. Kai aõhõkÿmy botÿÿnymyhÿke aõòtaòtamy tatÿÿnymahãte-wana. Bede dinodu dori tuu nade. <sup>5</sup> Ibutumy bede dinodu

bityhynyke. Tii heka biwinybenyke Deuxu dee kia awire. Tai heka aõhõkõmy botỹnybenyõtyhy. <sup>6</sup> Tule iõwy biõwynymahãbenyke. Ibutumy heka biõwynymahãbenyke aõma tuu dinodu rarybemahãre wesemy. Tai dori riõwynymyhõre iaõmysõdõyõdu. Tii heka anawiõhenanymyhõde. <sup>7</sup> Biõwynymahãbenyke aõbo õbitire, ibutumy wahe. Aõma dinodu iõwydõyõmy rariõwymahãre-wana biõwinyke ibutumy awedu mahãdu wahe. Bityhynyke ibutumy.

<sup>8</sup> Inydee tanadevenymahãte-wana, biõwinyke õbitihyylemy. Inywitzira luumy atximahãke ibutumy iny wahe. Tii dori Deuxu bedeywina-ki bede õtiidõyõna xiery ratximyhõre. <sup>9</sup> Ibutumy Deuxudeewire heka kaa rare. Aeryna luumy iwese ixiluure wese, tahe tamy ibinaõre. Kai rubudõyõmy aõbo, ada wasimy iribi texiwonyte ada ihãwyy-wana maõtakemy aõbo, texi-nohõtidõyõnyte. Uritere aõbina-di ixinohõtidõyõmy aeryna-õ. Uritere aõbina widõyõmy. Aerynaluumy mabeke iwese kai ixiluure wese wahe. <sup>10</sup> Luuna inyõ-di rarekeki ibina inyõdee riwinyõtyhy rare. Ibutumy Deuxudeewina heka riwinymyhõre. Tii sohojile heka bede ywina-ki awityhyre.

<sup>11</sup> Tule heka õbitimy matximahãke. Bededõyõnana dori iõhõmy resera. Bede ityre reakremy namyhõde. Bexixabenyke wa, Inynyrõ heka iõhõmy ratximyhõre inonana-õ. Iõhõtyhymy relera juhu rityhynyrenyri-ribi. <sup>12</sup> Ruu heka rõhõnymy rare. Txuu tule iõhõmy wahe. Uritere aõbinahakõy bedeluruhukõy aõmydõyõnana widõyõmy. Diabo ijesu bitake aõwiihikõy widõyõ wahe. <sup>13</sup> Õbitimy biwinymahãke iwese txu rojuxana iny ratximyhõre wese. Tai ibutumy iny rarybemahãke kai iluumy atximahãtemy. Uritere abededõyõnana huduõmy —itxõyõteõmy, õtaõmy, adeburemy ijiraõmy, ihãruõmy. <sup>14</sup> Bexitõenymyhõke Inynyrõ Jesuisi Kristu-õ wahe anawiõhenanykemy. Tai tahe ibutumy õbitimy biwinymahãke. Uritere arayky aõmydõyõnabinabina nohõtiõmy.

## 14

<sup>1</sup> Ijoiõ ityhydõyõdu mahãduõ amahãdudõyõmy rurukeki, rõtana ixinamy ralõke iityhyna ibuterehãre tii-wana aõna aõnamy widee rybetyhymy ry-beõmyke. Aribi hitximy raraykynyke hãre, bidyke. Ihãrele birõtenybenyke. <sup>2</sup> Ityhyna irurukõmy ratximyhõre hãre birõtenybenyke. Tii õsana kiamy raraykynymyhõre: Iny rexiõwynyke irõdude rirõmyhõrenyremy ijõ rõhõtinyke. Kai tahe õsana mohõtinyke kiamy. Tuu ibinaõre. Ityhynareny urihimyoõle rare. Brebunale sõny roholamyhõre. <sup>3</sup> Inyõ tahe ibutumy rirõmyhõre. Awimy idi tahõtinymahãte-wana, wiribi hitximy aõkõ. Uritere iõhõresedõyõrenyõmy. Deuxu dori ridymyhõre iwesemy iweselemy. <sup>4</sup> Deuxu deõdumy tii rare. Eõdumy aõkõ. Deuxu-õ tii rirawyõnyre aõhebo rotõyõnymyhõremy. Deuxu rarybeke aõbo õbitire, aõbo teõsare. Deuxu heka tii ritamadõyõnymyhõre. <sup>5</sup> Kiamy rakaraykywesenanyrenykre. Txuõ aõworana bedehesi heka judeu mahãdu riywinymy roimyhõre. Kia txuule Deuxu-õ reãlananyyhõre rexinohõtidõyõnymyhõre. Tahe aõkõre. Ijõ ityhydõyõdu mahãdu tahe aõkõre. Tii iwitzira rexinohõtinymyhõre. Ibutu txuu tamy awire Deuxu àlana riwahinymyhõre. Ixideewimy iny sohoji sohoji raraykywydynanyyhõre. Ixitawimy Deuxu riwowydnyre. Ibutumy iny õbitimy ixidee raraykynyke. <sup>6</sup> Kaiboho atxu biywinymyhõbenykeki, kia tahe awire. Xiwenade rirõkeki, tii tule Deuxudeewire riwinyre. Inyõ aõkõ riwinyre. Tii tule awimy riwinymyhõre Deuxudeewina wahe. <sup>7</sup> Ixideewimy rikiywinyrenyõtyhy inynyrõ-õ dori inyboho roire. <sup>8</sup> Inynyrõdeewimy rikiwinyrenyke. Ihõrõ rare, aruruhãrele, aõkõhãrele. <sup>9</sup> Jesuisi Kristu rubu-ribi rexixare tai butu wedumy.

10 Inyboho heka ihõrõ mahãdu roire. Tai uritere inyseriõre rybeõmy ixiradỹỹõmy. Inyboho dori sohoji sohoji Deuxuru-ò rexideòsinyrenykre. Iu tii ibutumy iny riywisinykre. 11 Kiamy heka Ritidỹỹna-ki roimyhỹre. Inynyrỹ heka rarybere: —Inatyhymy, Ibutumy warue-ò tatiowotimy resekre. Rarybekre heka wamy Jiarỹ Deuxu raremy. 12 Iny sohoji sohoji iximy relyykre Deuxuko-ò.

13 Uritere inywixira-ò ryberenyõmy tii ibinamy rare uritere aõwidỹỹõmy, iòraru-ki ixihydỹỹdu òraruna-txi resehemy. 14 Jiarỹ tahe kiamy rahõtinyre. Kia aõmydỹỹnana aõ aõkõ rare Deuxu-ò. Xiwena rỹsỹna rirỹsỹkeki aõ aõkõ rare. Uritere kia nohõtidu dee ibinare. Tiibohe riròõke. Xiwena rỹsỹnarỹsỹ òraru-ki aijoiõ bibedewonyhenylau irỹsỹõmykre. 15 Aityhydỹỹdu seriõreõ òbitiõmy ratxikeki tahe iru-ki arawidỹỹõmy atximahã. Tamy dorihe òbitimy aõkõ heka idi rõhõtinyke. Tii heka tule riwinykelemy ixidi rõhõtinyke. Timy aõki teòsamy rahaõhyymyhỹre aõma, xiwena rỹsỹna-ki. Kai aõki awimy aõma awityhy irỹsỹõmyke Deuxu Riõreõ dibinadỹỹnyke lau wahe, Kristu dori iòraru-ki rure. 16 Kaki awimy òbitimy mahakeki. Biwinykeki inywixiraru-ki atxikeki, kia tai uritere rieryõmy aki rahake. 17 Riroximyhỹrenyke, riõmyhỹrenyke —kia Deuxu Iòlona dee aõ aõkõ rare. Aõmale tahe rõkõhõtinytyhymyhỹreny: wiòhedỹỹna, ywina eysana. Deuxu Tyytybytyhy inydeereny wahidỹỹna wahe. 18 Kia wese iny rỹikeki heka Deuxu dee wina rare, inydee tule. 19 Wii rikiwiòhenanymyhỹrenyke ibutumy wiwesehyyle ywina-di. Tai iny tyhynareny rikikyhynanyrenykeny. 20 Rỹsỹna òraru-ki aõhe wisỹdỹỹ renyõmy, butumy dori Deuxu riwinyre. Kia inyõ iòraru-ki aõwixiramy rõhõtinykeki tahe ibinare. 21 Aõ dee rỹsỹ vỹi momo heka ibinare, tai tii rexiòrarunyekeki aòraru-ki urile bexiijõnybenyke. 22 Kaa biwinykeki timybo Deuxu dee òbiti relemyhỹre, urile ibutu-ò tuu rybeõmy iny bedeõby, kia ira-ki aõ ibinakõre. 23 Ijõ urihimyõ tatyhynymy ratximyhỹre heka iximy riatyke. Adee tahe òbiti heka rare. Aõbo riwinyre heka òraruna rare. Tai iwidỹỹõmy.

## 15

1-2 Iny ixira-di heka rõkõhõtinyrenyke ibutumy aõbo iny riwinymyhỹredi. Idi rõkõhõtinyrenyke inywixira aõlaubo ruberumyhỹre. Iny òbiti erykõ mahãdu-di. 3 Kristu dori kaki raremyhỹu ixideewimy aõkõ tuu riwinymy raremyhỹ. Wiwana ritidỹỹdu wesemy riki riritinymyhỹre: nade aõhõkỹmydỹỹnana-ò tai heka bede-ò nade. Riòludunyre heka aõbo iòludu aõbinabinahãkỹ rarybere heka riwaòludunymy raremy. 4 Tuheka roimyhỹre ihetxi Tyyritina-ki inywiòhedỹỹna reny. Iny heka ribedeerydymyhỹreny ywina-di rakatxirenykemy rikiraòrenyke heka Deuxu aõmy bede dỹỹnana wahe. Rahykyu òraru rahykyu wahe rubu. 5 Tii heka wadee awire wii biwiòhenanyke. Deuxu anawiòhenanykemy adireny watzireri. Iwese Jesuisi Kristu riwinyre wese.

6-7 Iluu ratxirenykemy irumy wiluumy matxibenykemy. Iny sohoji sohoji raraykynyke Jesuisi Kristu rayky wese-di. Ityby Deuxu rayky wese-di rỹike òbitimy. Tai tahe inyboho ywinale rekealãmehỹre Deuxu-ò, tii Jesuisi Kristu tybyreki wahe. 8 Deuxu ihetxi mahãdu òraru-ki Jesuisi Kristu heka judeu mahãdu deòdurenymy ioxisỹnyre. 9 Iwese rybetyyritityhy rarybere wese: —Idi judeukõdu mahãdu Deuxu riwowydynykeny. Tai adee ariwiunykere judeukõdu mahãduy-ki. Jesuisi Kristu heka nade inatyhy riteòsinykemy. Judeu mahãdu riwiòhenanykemy Jesuisi Kristu nade. 10 Kiamy heka roire wiuna Ritidỹỹ-ki kia rarybere. Àlana adee ariwahinykre wiuna-ki judeukõdu mahãduy-ki ani-di arawunykere. Ijõ-ki tulekre: —Tuheka wiuna-ki raritidỹỹ



roimyhÿre judeukõdu mahãdu beysake wa judeu mahãdu-wana. <sup>11</sup> Ijõ-ki kiamy roire: —Àlana heka biwahinykemy Inyryrÿ-ò idi watzireri, kaiboho tule judeukõdu mahãdu. <sup>12</sup> Deuxu dee rybeduõ, Isaia tuu rarybere: —Rexiriòkòremy heka irybe roimyhÿre. Ijese riòkòre wahe. Tii judeukõdu mahãdu iòlòmý ronykre. Tiile heka riraòmý roimyhÿkre. <sup>13</sup> Jiarÿ rexitòenyre, Paulo, kaiboho, Deuxu heka arateysanyrenykre sòwemy ywina-di, tyhydÿna-di. Kiamy heka adireny heka watzireri, waseriòreboho. Jiarÿ heka rexitòenyhy watzimyhÿré Deuxu arawiòhenanykemy adeereny rexitereny watziwãhãre. Deuxu Tyytybytyhy ruruna-di raròsòna-di adeereny kidiwahinykemy watzireri.

<sup>14</sup> Kaiboho òbitimy ahãtenyete waityhydÿÿdu seriòreboho. Sòwemy aõna aõna witxira teerytenyete. Inywitxira bibedeerynybenyke dori teerytenyete. <sup>15</sup> Ihãrele taheka atxireny wanohõti reare inatyhymy tai warybe rewahiny Deuxu riwatyhynymy kawese riwasÿnyreki. <sup>16</sup> Biwateònyke taheka judeukõdu mahãdu-ò. Jesuisi Kristu dori riwatate tadeòdumy idi judeukõ mahãdudikemy. Iu Deuxu rybe wihikÿmy rarybemyhÿreu, xiwena wahidÿÿdu wese rare. Kia tahe judeukõdu mahãdu Deuxu-ò awike. <sup>17</sup> Tai tahe Jesuisi Kristu-wana rexibedesanyhÿre Deuxu-ki waaòmÿsÿdÿÿna òraru-ki. <sup>18</sup> Jesuisi Kristu Rybewihikÿ tÿmyra-di rareri. Rexitòenymy rare adeereny. Tai kaiboho òbitimy teletenyete Deuxu Tyytybytyhy òraru-ki wahe. Wadeysamy heka watziwãhãre. Jesuisi Kristu adeereny riwinyreki wahe. Jiarÿ reerykòre iwitxira mahãdu-di. Tahe aõma waaòmÿdÿÿnana reeryre. Tiu dori biwawiòhenanyke judeukõdu mahãdu aritakemy. Deuxu mahãdu judeukõdu rarekemy. Òbitimy ikoreny-ki raremyhÿ. <sup>19</sup> Rybe wihikÿmy rybe-di rarewãhã tamyreny. Aõna aõna wihikÿ irureny-ò rewinywãhãre. Deuxu Tyytybytyhy-di Jerusalẽ hãwã-ribi heka rybe-di rare. Iliri bede-ò wahe. Ibutumy bede bedemy rarybere. Jesuisi Rybewihikÿmy. Ibutumy waaòmÿsÿdÿÿna rewinyre, Deuxu wadee riwahinyre wahe. <sup>20</sup> Ihãre tahe ararybekemy watzireri tiu iny roholakòmÿhÿre mahãdu-ò. Ijõò dohodÿÿna iny rito-hodÿÿnymy hÿre. Tai ikomy ararybekemy ixidi watzireri. <sup>21</sup> Isaia dori kia Tyyriti roire: —Tiu iny tamy roholakòmÿhÿre tamy ijohonaòmý rarybere. Tai rierymy hÿre. Tai tahe roholakre tahe rityhnykre.

<sup>22</sup> Tai heka raraõlemy watziwãhãre —adeereny. <sup>23</sup> Katahe kaki rexihumy waaòmÿsÿdÿÿ ratxireri. Katahe arorarenymy arake watzireri beòrakòle arakemy ixidi watzireri. <sup>24</sup> Espanha bede-ò arakemy watzireri. Arakreu dori Roma-ò aroramy heka arakre. Iribi inyboho ibutumy rakatzimyhÿreu tahe tako-ò biwaixidÿÿnybenykre. <sup>25</sup> Ikoki taheka wahidÿÿõ ariwykre Jerusalẽ-ò. Jerusalẽ hãwã mahãdu dori aõhòkÿmy rotÿÿnymy rÿiramyhÿ. <sup>26</sup> Macedonia bede-ki Akaia bede-ki tamy nieruõ riwahinykremy ratxireri dohodÿÿna mahãduõ kia rama rahureri mahãdu wahe. <sup>27</sup> Tiiboho riwìòhenanyre deysana-di. Kia òbiti rare. Iribi tahe Deuxu rybe aòmÿdÿÿnana, Judeu mahãdu-ribi nade. Tai tahe judeukõdu mahãdu, tule judeu mahãdu riwòhenanyhÿke taaõwiwi-di. <sup>28</sup> Kaa nieru-di arakreu, tahe aroramy arehemynykre. Iribi Espanha-ò arakre. <sup>29</sup> Tuu awana watzikreu, tahe teysamy Inyryrÿ-di rakatzikre.

<sup>30</sup> Bexitòenyke wadee waòmÿsÿdÿÿna sòwemy watzireri ariwinykremy. Deuxu Tyytybytyhy heka sòwemy wadee nade adeereny ariwahinykremy, luuna sòwemy adeereny ariwahinykre. <sup>31</sup> Tule ityhydÿÿdukõdu mahãdu Judeia wadee aõbinahãkÿ wadi ratximyhÿre. Wadi bexitòenybenyke jiarÿ iribi arahenykre. Tule kaa nieru rewyreri waribi teysamy rimyrenykre.

32 Tai tahe awanareny tahe wadeysamy arehemynykre Deuxudeewikeki.  
 33 Deuxudeewikeki wii riki Deuxu ywina adeereny watzireri. Kie.

## 16

1-2 Fibi hāwyy ityhydỹdu seriòreõ adee rakre. Tii heka Sekrea hāwā ludu dohodỹna mahāduõ rare. Tii heka dohodỹdu mahādu riwiòhenanymhỹre aõu aõu aityhydỹdu seriòre wesemy. Tii kaiboho biwiòhenanykre, tii dori sõwemy riwawiohenanyre.

3 Birybedỹnyke Prisila Akila-wana. Tii wawiohenadỹdureny. 4 Tii wadee sõwemy riwinyre rubu lau ruberuõtyhy. Tai jiarỹ reālāwāhāre tamy, tule tuu ibutuma Judeukõdu dohodỹna mahādu. Iheto dohodỹna mahāduõ warybe wehityhyna biwahenyre. 5 Epenetu-ò biwehityhyny. Tii ibutumy ityhydỹdu-ribi juhuule rityhynyre Asia bedeki. Tii wabiõwa rare. 6 Marie adeereny raaõmysỹdỹtyhyre. Biwehityhyna wanimy. 7 Adroniko, Junia wana biwehityhynanykre. Tiiboho judeu mahāduõ roire. Rõtenawo-ki wawana roiremyhỹ. Dohodỹna mahādu rierytyhyre. Deuxu deòdỹna mahādu heka wakomy rityhynyre. 8 Ijõ waityhydỹdu biõwa Ampliato inire. Tamy kanarybekre tule. 9 Urbano, Estaki-wana tule Kristu dee wawiohedỹdu tule rybe wehityhyna tamy biwahinyke. 10 Apele heka ityhydỹdu tyhy rare. Biwehityhynanyke. Aristabulo-wana heto woludu mahādu biwehityhynanykre warybe tamy. 11 Tule biwehityhynanykre Herodiaõ — waijoiõ tii rare judeu mahāduõ wahe. Kristu dee dori kia iny õbiti rare. Narciso heto ludu ityhydỹduõ heka tule biwehityhynanykre warybe tamy. 12 Tule Trifena, Trifosa, Peside-wana raaõmysỹdỹmy Inynyrỹreny-ò biwehityhynanykre wary tamy. 13 Rufu tule Deuxu dee aõmysỹdỹdu rare ise tule. Tii dori nadi wesemy riwawisinanyre. 14 Asincrito, Flegonte, Hermes, Paroba, Hermas, tule biwehityhynanykre ityhydỹdu mahādu. 15 Filologo, Julia-wana, Nereu taseriòre-wana, Olimpa, ityhydỹdu mahādu tii-wana ratxireri ibutu-ò warybe wehityhyna. 16 Ibutumy aseriòre debò bimyke biwehityhynanybenyke ibutumy. Ibutumy Kristu tydỹdu mahādu-ò arawawehityhynanykre. Tule kaki dohodỹna irybe wehityhynanyre adeereny riwahinyreri.

17 Rybeõ roire kaa rybe tyyriti ixidyndako-ki. Ijõ aõhe dỹnana doimyhỹde kia hetowo hitxina-ki. Iwitxiramy heka taerydỹna mahādu —iwese inydeereny erydỹnamyhỹre wesemy aõkõ kia lau tahe bexiebenyke. 18 Aõ Jesuisi dee aõkõ raaõmysỹdỹnyre. Ixidee tule heka raaõmysỹdỹmyhỹre aõ ixidee ritarenkemy rõhõtynymhỹreny. Tiiboho heka rarybewihikỹmyhỹreny, aõma, ruikedỹmy timy bedeki erylõ tuu ratximyhỹreny. 19 Jiarỹ wadeysamy watzireri kaiboho õbitimy ibutumy toiteki. Araerywāhā jiarỹboho aõbo õbitire uritere aõbina widyyõmy. 20 Deuxu ywisidỹna wahidyyna dori Satanasi riixāwididỹnyke. Jesuisi Kristu Inynyrỹ wiòhedỹna adeereny riwahinykemy idi watzireri.

21 Tximõtxi dori wawiohedỹdu rare. Lucio, Ijasõ, Sosipatu, wajudeuijoi-wana tule adeereny irybe wehityhyna riwahinyre. 22 Jiarỹ, heka Tercio, reritinyreri aõbo Paulo rarybere adeereny. Jiarỹ adeereny warybe wehityhyna rewahinyreri. 23 Jiarỹ heka Kaio heto-ki watzireri, dohodỹna rabutunyreki watzireri. Kaio irybe wehityhyna adee riwahinyre. Tule Erasto hāwā nieru rubudỹdu rare. Tule Quarto inyseriòreereny rare. Ibutumy heka kaa irybe weityhyna adeereny rewahinyreny. 24 Inynyrỹ Jesuisi Kristu ruxetõena ibutumy adeereny kanakemy idi watzireri. Kie.

<sup>25</sup> Deuxu irurutyhy-di rare. Tii heka adi riyrubunykyemy adi watzireri. Iwese rybeweityhyna rarybere wesemy, ruru adee riwahinykre. <sup>26</sup> Kaheka Deuxu tarasana rare. Ibutumy iny mahãdu kaa tarasana rare. Katahe wiji ibutumy Deuxu rybemy rybena reamyhỹre. Iwese Deuxu rybedu mahãdu juhuu rarybere wesemy. Deuxu heka ibutu-ò tuu rarybere. Tai tahe ibutumy iny Deuxu Tyytybytyhy rierykre tule rityhinykre. <sup>27</sup> Deuxu-ò àlàna biwahinykeki tii dori bedeeryna ratximyhỹre Jesuisi Kristu òraru-ki wowydyna tamy biwahinybenykre aõu aõu. Kie, Paulo.

## 1 Oritxi Mahãdu-ò 1 Oritxi Hãwã Dohodỹna Mahãdu-ò

<sup>1</sup> Paulo jiarỹ Deuxudeewimy deòdumy wãhãre, Jesuisi Kristu deòdỹna-ki wahe. Jiarỹ waityhydỹdu seriòre Sòteni-wana adee warybereny adiwahinyde. <sup>2</sup> Oritxi hãwã dohodỹna mahãdu-ò heka watyyriti adiwahinyde, Jesuisi Kristu òbitidỹna mahãdu-ò, Deuxu hõrõ mahãdu-ò, hãwyy, hãbu-wana, ibutumy Jesuisi Kristu ityhydỹdu mahãdu-ò. Tii iny Iòlòrenymy heka ratximyhỹre. <sup>3</sup> Ruxetòena, ywina-wana adeeren kanakemyidi watzireri, Deuxu iny tyby-ribi, Jesuisi Kristu iny Iòlò-ribi.

<sup>4</sup> Deuxumy reàlãmy watxiwãhãre, Jesuisi Kristu adeereny ruxetòena diwahinydeki. <sup>5</sup> Ibutumy dori iribi tòerymy ahãte arybena-di, erysydỹna-di. <sup>6</sup> Kristu dee rybena akireny roimyhỹre. <sup>7</sup> Iribi awahidỹna rauhenyõreri, kaiboho dori Kristu deòsidỹnamy teraomahãte. <sup>8</sup> Jesuisi arawìhenanyhy rarekre bededỹnana konana-ò, tatxuu òbitimy ixiko-ò, rexilamadỹnykemy. <sup>9</sup> Deuxu òbitihyyra. Tii aratobinyra Tariòre Jesuisi Kristu-wana rarekremy, iny Iòlòrenymy.

<sup>10</sup> Jiarỹ adeereny rexitòenyneri Jesuisi Kristunimy iny Iòlòrenynimy wiwese wimy wimy bityhynymy marybebennykemy. Wade awiõre wiribi hitxi hitxidỹ. Wii bitotynytyhymy boibekemy adireny watxiwãhãre, araykyreny-ki, aerysynareny-ki. <sup>11</sup> Kaiboho waseriòre mahãdu, wimy taujõmotenyteri. Lòe hetowoludu mahãdu kia wako relyyra. <sup>12</sup> Inyõ wadee rarybemyhỹre. Ijõ mahãdu heka Paulo rityhynymyhỹre ihõrõ mahãdu wahe, ijõ heka Apòlo rityhynymyhỹre ijõ tasỹ Pedro rityhynymyhỹre, ijõ tahe Kristu rityhynymyhỹre. <sup>13</sup> Aõherewe, Kristu be iny rihitxihitxinymyhỹre. Paulo be itxeò nihikỹ tyre-ki rurure adeereny. Pauloni-di be rasebere. <sup>14</sup> Inyõ he ròratisebenyõre. Krispu, Kaiowanale tahe resebenyre. Tai tahe wabedesamy watzireri. <sup>15</sup> Kiamy ta heka inyõ rarybeke lau reijõnymahãre: —Jiarỹ Pauloni-di rexisebenyre. <sup>16</sup> Tefana hetowoludu mahãdu adiratisenbenyde. Inyõ reratisenbenykeki wanohõti reaõhyyre. <sup>17</sup> Kristu dori aõsebedỹmy aõkõ diwateònyde Rybewihikỹmy rybemy. Bede erydỹna nihikỹmy rybemy aõkõ diwateònyde, Jesuisi itxeò-ki lamana ariwòkemy aõkõ, kia inydeereny rurureki wahe.

<sup>18</sup> Kristu itxeò rubumy ijyy heka ityhydỹdukõdu dee itxỹtena rare. Biu-ò hedu mahãdu dee tahe, Deuxu ruru kia rare. <sup>19</sup> Kiamy tahe iritidỹna roire: ierysydu mahãdu erysyna-di ariixãwidỹnyke. Bede erydu rayky-di adiijõnykre. <sup>20</sup> Titxibo tahe bede erydu rare. Tyyritimy erydu heka titxibo rare. Titxibo tahe wiji dỹraxidu rare. Kabede ludu bede erysyna heka Deuxu-ò itxỹtedỹna rare. <sup>21</sup> Bede bede ludu mahãdu rõhõtinyre be deerytyhymy. Tai tahe Deuxu iximy rierynanyõhyyre. Kia tahe Deuxu deewire. Iny rybewihikỹmy rybe heka iny witzira-ò itxỹtere. Kia-di tahe Deuxu iny ritarereri iny rityhynyreki. <sup>22</sup> Judeu mahãdu aõwiwi rỹikemy aõbo raremy ratxireri. Judeukõdu mahãdu bede erysydỹna-di rarekemy riijemyhỹre. <sup>23</sup> Kristu itxeò-ki lamanamy iny rarybemyhỹrenyre. Kia tahe judeu mahãdu riojinyre, judeukõdu mahãdu dee itxỹtena kia rare. <sup>24</sup> Tahe Deuxu rariròwysyna judeu tule judeukõ mahãdu-ò heka Kristu erydỹna tule ruruna rare ihedỹnarenymy. <sup>25</sup> Deuxu itxỹtedỹnamy rybe hãbu bedeery ratyre rare. Deuxu iruruòkeki, tii hãbu ruru ratyre iruru rare.

<sup>26</sup> Waseriòre mahãdu arariròwysyna-di mohõtinybenybeke. Betehemy iny erysyna mahãdu-ribi sõweõre, Deuxu rariròwysyna mahãdu. Dinodu mahãdu

sõweõre, iny Iòlòtyhy mahãdu-ribi sõweõre. <sup>27-28</sup> Deuxu heka aõna aõna itxÿtena ritare bedeeryhykÿ mahãdu riixÿrudÿÿnykremy. Aõna aõna ruruõ Deuxu ritare aõna aõna ruru-di riixÿrudÿÿnykremy aõna aõna derare, aõ aõkõ rare Deuxu ritare aõ-di aõ aõkõ-ò riyjanykre. <sup>29</sup> Tai dorihe inyõ rexityhynykõkemy Deuxuko-txi. <sup>30</sup> Kaiboho dori Jesuisi Kristu hõrõ toite. Tii heka inydee ibutumy rare: ersynamy òbitinamy, tamanamy, tarasanamy rare biu-ò hena wahe. Deuxu kia ibutumy diwahinyde inydeereny. <sup>31</sup> Kia dori ritina rybe-ki roire: —Inyõ rexiwowydnykeki, Deuxu-ki rexiwowydnyke.

## 2

<sup>1</sup> Waseriòreboho aõ hãbu bede erynihikÿ wese aõkõ adeereny anade. Deuxu rybetyhydÿÿnanamy ararybekremy. Rybenihikÿmy heka rarybeõre. <sup>2</sup> Tii sohojile reeryre akireny rarewãhãu, Kristu itxeò-ki lamanale wahe. <sup>3</sup> Akireny rarewãhãu waruruõmy rarewãhã, ixÿru brebu tahe riwamy-tatadÿÿnyre. <sup>4</sup> Wabedeerydÿÿna erytyhy rybesirahakÿ-di aõkõ rarybereri iny rityhynykemy. Urile tahe Deuxu Tyytyby ruru-di rarybewãhãre. <sup>5</sup> Hãbu erytyhydÿÿna aõkõ bityhynykemy adi wãhãre Deuxu ruruna tahe atyhynarenmy heka idi toite.

<sup>6</sup> Ityhydÿÿdu umy-ò bede erydÿÿna-di rarybemahãre. Kabede aõmydÿÿnana bede ery aõkõ rare. <sup>7</sup> Kia tahe Deuxu erydÿÿna tyhyre. Kia heka hãbu mahãdu lau riwòmyhÿre. Juhu inydeereny riywinyre. <sup>8</sup> Kia bede erydÿÿna inyõ wiji Iòlòtyhy mahãdu rieryõre. Kia rierymyhÿkeki, Wanyrÿ wowydyna-ribi itxeò-ki ritamadÿÿnyõhyre inihe. <sup>9</sup> Iwese Ritidÿÿna roireri wese rare: —Rue lobixiõhyymyhÿre, nohõti heka roholaõhyymyhÿre, inywo rieryõhyymyhÿre, aõbo Deuxu riwinyre taluuna mahãdu dee, tamy riwahynykremy. <sup>10</sup> Deuxu Tyytybytyhymy kia inyboho riteðwarixinyreny. Ityytyby ibutumy rieryre. Deuxu raykywo-ribi aõ ritÿnynymyhÿre. <sup>11</sup> Inyle heka iny ixirayky rierykre, kawese tule Deuxu tyytybydile aõna aõna rierykre. <sup>12</sup> Bede aõmydÿÿnana aõkõ inydeereny wahisidÿÿdu rare. Deuxu Tyytyby tahe inydeereny wahisidÿÿdure. <sup>13</sup> Kiadile Deuxu wahisidÿÿna iny reeryreny. Kia iny reerydÿÿnanymahãreny hãbu bede erydÿÿna-di aõkõ, Deuxu Tyytyby rybe-di tahe reerydÿÿnanywãhãre. Kia iny retÿnynymahãre iny Deuxu Tyytybytyhy-di mahãdu-ò. <sup>14</sup> Iny Deuxu Tyytybytyhy-di rÿiõra mahãdu dee Deuxu Tyytybytyhy aõmydÿÿna dera. Tamy itxÿte rare. Rierykõre. Deuxu Tyytybytyhydile iny rierymyhÿre. <sup>15</sup> Iny heka Deuxu Tyytybytyhydikeki ibutumy rierymyhÿre. Inyõ tahe tuu aõmy tuu irybeõna. <sup>16</sup> Ryberiti-ki roire: —Mobo tahe rieryre Wanyrÿ rayky, mobo tamy aõ ritÿnynykre inyõ aõbo? Inyboho Kristu rayky ijõdire, iwesele raraykynymyhÿre.

## 3

<sup>1</sup> Waseriòreboho adeereny rarybeõhyre hãbu Deuxu Tyytybytyhy-di rÿira wesemy. Hãbu òrarudu wesemy rÿirawesemy adeereny ararybeke. Uladu wesemy Kristutyhydÿÿ-ki rÿira wesemy adeereny rarybere. <sup>2</sup> Huÿsy-di òedÿÿ araerynadÿÿnyrenyreu rÿsÿnatere wesemy aõkõ erydÿÿnasiramy aõkõ rybe. Kia rÿsÿna rÿsÿmy texiywinyõteny. Wiji tule texihumy aõkõ toiteny. <sup>3</sup> Òrarudu wesemy dori ahãteny. Ihãrumy, ijãmy atximyhÿteny. Tai tahe òrarudu mahãdu wesemy ahãte ityhydÿÿdukõdu mahãdu wesemy ahãteny. <sup>4</sup> Inyõ rarybekeki: —Jiarÿ Paulo erydÿÿnay-ki rare. Ijõ rarybekeki: —Jiarÿ Apòlo erydÿÿnay-ki rare. Tiiboho ityhydÿÿdukõdu mahãdu wesemy ihÿreny. <sup>5</sup> Aõbohe Apòlo, aõbohe Paulo. Deuxu deòdu heka inyboho roire. Inyribireny tetyhynmy teerymahãteny. Iwese Deuxu iny sohoji sohoji-ò aõmydÿÿna

riwahinyre wese, tai tetyhynytenyte. <sup>6</sup> Ta jiarÿle rybemy rarybere iny aõty ribòrònymyhÿre wese, Apòlo rybe ritÿnynyre iny alòbòròna ribenymyhÿre wese rituunyre. Deuxule tahe idimyhÿre iwese alòbòròna riumydÿÿnymyhÿre wese. <sup>7</sup> Tai tahe tòbòròdÿÿdu aõ aõkõ rare; ituudÿÿdu tule aõ aõkõ rare. Deuxule aõwedu wedu heka rare. Tiile ityhydÿÿdu widÿÿdu nihikÿ rarekre. <sup>8</sup> Tòbròdÿÿdu ituudÿÿdu-wana sohoji wesemy ihÿrenyre. Sohoji sohoji tauri wahisidÿÿ ritakremy, iwese sohoji sohoji raaõmysÿdÿÿmyhÿre wese. Wiwana dori Deuxu dee iny raaõmysÿdÿÿmyhÿre. <sup>9</sup> Inyboho heka Deuxu wiòhedÿÿdu mahãdu roire. Kaiboho tahe Deuxu oworu wese toite. Iwese tahe Deuxu heto wese kaiboho toite.

<sup>10</sup> Heto widÿÿdu deyrewewese retelenyre. Ibutumy Deuxu ruxetòenamy kia rewinyre. Juhumana retidire idi tahe itira ityre reòdònyra. Ywimy biwinybenykre. Awimy bitamadÿÿnykemy. <sup>11</sup> Jesuisi Kristu juhumana wese heka rare, inyõ tiile tarasadu wahe ijõ manaõ teròwomy ritidiòtyhy. <sup>12</sup> Ibutumy juhumanatyre-ki relereri. Ijõ womati tÿrÿrÿhÿkÿ, ijõ prata-di ijõ manatÿny-di, ijõ òwòru-di, ijõ òteti-di, ijõ horeru-di. <sup>13</sup> Kia txuu Kristu txu wahe riteòsinykre aõdibo sohoji sohoji raaõmysÿdÿÿmyhÿre heòty dori riurihixinanykre. Aõhebo iny rotÿÿnymyhÿreki. <sup>14</sup> Juhumanatyre-ki iny aõmydÿÿna rÿikeki, tii uri iwahisidÿÿnana ritakre. <sup>15</sup> Iny aõmydÿÿna rasòkeki tii ròònodÿÿkre. Ihãre tahe tarasana ritakre heòtyroobymy wahe.

<sup>16</sup> Kaiboho Deuxu heto wesemy toitemahã. Teeryõte aõbo. Deuxu Tyytybytyhy heka aworeny-ki rasÿnymyhÿre. <sup>17</sup> Inyõ Deuxu heto wesemy rahukeki, Deuxu tii rihukre, Deuxuheto dori rare. Kia tahe kaiboho toite Deuxu heto lytytyhy rare, ihòròtyhy wahe.

<sup>18</sup> Ixi itxenadÿÿõmy, inyõ bedeerymy ixi-di ròhòtinykeki, raitxÿteke tai tahe bedeery inatyhy-ki rareke. <sup>19</sup> Kabede bede eryna tahe Deuxu dee itxÿtena rare. Kia Ritidÿÿna-ki tahe roire: —Bede erynadu tyhy tabedeerydÿÿna-ki Deuxu-ò ròònodÿÿre. <sup>20</sup> Ijõ Ritidÿÿna-ki roire: —Wanyrÿ, bede erydu rayky rieryre. Kia raykywi aõ aõkõ rare, rybetyhy aõkõ. <sup>21</sup> Iny aõmydÿÿnana-di ixiwowodydÿÿõmy, ibutu dori ahòrõ rare. <sup>22</sup> Paulo, Apòlo, Pedro, bede, umy, rubu, aõmydÿÿna wijina, aõmydÿÿna bede kanakre, ibutumy ahòrõ rare. <sup>23</sup> Kaiboho Kristu hòrõ toite. Kristu Deuxu hòrõ rare.

## 4

<sup>1</sup> Inyboho Deuxu deòdu roire, ibutumy idi mohòtinybenyke tii inykireny ihÿre. Inyboho dori Deuxu aõmydÿÿnana erykõdu tÿnydÿÿdu roire. <sup>2</sup> Deuxu tÿnydÿÿdu òbitihyky rarekemy. <sup>3</sup> Wadi ròhòtinykeki awimy aõbo ibinamy aõbo kia tahe wadee aõ aõkõ rare. Aõbo dohodÿÿ tÿnydÿÿdu mahãdu wadi rohòtinyke kia wadee aõkòhykyre. Jiarÿ tahe ixi-di dehummy rahòtinyòhyymahãre. <sup>4</sup> Jiarÿ reeryõre inyõ aõbinamy wadee rexiwonyke warayky wadee òbiti rare. Tahe ihãrele òbitimy iko-ki rare. Wanyrÿ tahe wadi timy ròhòtinyke. <sup>5</sup> Kia tahe wiji idi timy nohòtiõmy. Jesuisi nonanako-ki. Tii tahe kanakreu, ibutumy wasimy aõ rÿira ritÿnynykre, ibutumy iny raykymy rÿira ritÿnynykre. Kia txule ibutumy iny tabedeòby ritakre Deuxu-ribi.

<sup>6</sup> Kia aõna aõna wawese riwawesenanyreri. Apòlo wese tule rewesenanyreri. Kaiboho dori bierybenykeny kia: ierysydÿÿrenyõmy aõbo iritidÿÿnawo-ki ihoõre. Kia wese keki, ijõ tÿnydÿÿdu ijõ ratyre ryiòtyhy. <sup>7</sup> Mobo iny wiribi iwitxiramy ihÿre. Aõbohe akire Deuxule aõwiwi adee riõre. Ibutumy iribi tetateki tahe aõherekibo axiwedere. <sup>8</sup> Kaiboho ibutumy aõ ijòdire. Tatyhytenyte, iòlò wesemy taditehemynyte iny arawiòhenanyrenyõre. Wade awire kaiboho iòlòmy ahãtenyte. Tai jiarÿboho awana ariòlònykre. <sup>9</sup> Kiamyre òsana. Deuxu dee heka inyboho deòdÿÿna mahãdu rurukrerke mahãdu roire

ibutuko-txi, ýjuko-txi, hãbukò-txi. <sup>10</sup> Kristu òraru-ki itxýtewesemy jiarýboho roire. Kaiboho Kristu erydure riki. Jiarýboho warurukòrenyre. Kaiboho orarudirenyre jiarýboho inyò waluurenyòre. Kaiboho tahe ibutu luuna toite. <sup>11</sup> Ihãre tahe wiji ramamy, bemomomy, tykyòmy rekoamyhýre. Tule sýywisidýýna rýiòre. Tule jiarýboho wahãwã òbiti ihokòre. <sup>12</sup> Ihãre inyboho naaòmysýdýýmyhýde iny debò-di irukemy. Inyò inydeereny aòbinamy rarybekeki, awilemy inyboho rirawyònymyhýre. Inyò aòsirahakýle inydee riwinykeki, aòmy rybeòmyke. <sup>13</sup> Rybebinamy inyboho dee reakeki, ihãrele Deuxumy tamy rarybemyhýre. Rýnysityby wese inydireny tiiboho retehemyhýre, ijese ijese wesemy.

<sup>14</sup> Kia ròritidýýreri aixýrudýýrenymy aòkò, tahe wiòhedýýdumy retirýreri binadýýna lau, iwese inytybyò tariòre rierynanyre wese. <sup>15</sup> Tahe sòwemy Kristu-ki bede erydýýdu rýire. Sòwemy aòkò bobohomy rýirenyre. Kristumy heka jiarý sohojile borenymy rare. Rybewihiký erysyna-di dori borenymy ráire. <sup>16</sup> Kia dori kaiboho wawesemy boibekemy adireny watxireri. <sup>17</sup> Tai Tximòtxi reteònyre adeereny. Tii wariòre luu wesemy ratxire. Tii òbiti rare Wanyrý-ò. Tai watxi òhòtirenny reake iwese Jesuisi Kristury wese rariamyhýreki, tule iwese reerynanyre wese ibutu dohodýýna hetowo-ki. <sup>18</sup> Inyò ixiwowydumy ixidi ròhòtinymyhý iwese arura-ò araòreki. <sup>19</sup> Wanyrýdeewikeki arakre wylemy arorarenny-ò. Tai arierykre ixiwowydumy nohòtidu irybe sohojile aòkò arierykre, aòhebo rotýýnyre tule arierykre. <sup>20</sup> Deuxu òlòna heka rybe sohojile aòkò rare, rurutyhy heka rare. <sup>21</sup> Aòbo tahe awityhyre òhòte-di adehemynny aòbo, ada luuna-di ywina-di adehemynny aòbo?

## 5

<sup>1</sup> Dohodýýna mahãduy-ki òrarutyhy-di riki toite kia tahe rare: hãbuò heka tybyhãwyytyby-wana roire. Kia òraru tahe ityhydýýdukòdu mahãdu riòludunyòhyymyhýre. <sup>2</sup> Kia hyyle ixidi aò aòkò tòhòtinymyhýte. Aòherekibo bede teòtiinyòtenyete tahinyòmy idi textidènyòhyytenyete. Hãbu kia riwinyre, ityhydýýdu mahãduy-ribi biòlòdýýnyke. <sup>3</sup> Jiarý akyneny-ki watxiòrerihãre, tahe warybetytyby awanarenny ratxireri, iwese jiarý awana ratximyhýre wesele. Tahe wadohodýýna ariwahinykre kahãbumy ibinamy riwinyremy. Tahe ityhydýýdu ributunykeu, <sup>4</sup> warybetytyby akireny rýireu, Jesuisi Kristu ruru akireny rýireu, kahãbu Satanasi-ò biwahinybenyke. <sup>5</sup> Tai kahãbu umy Satanasi-ò biwahinybenyke itytytyby tahe rahenykre Wanyrý Jesuisi kia nonanatzu-u. <sup>6</sup> Arybe iximy wydy awi aòkò rare. Taholaòtenyete aòbo kia rybe-ò; iuri ibutere paò widýýna sòwemy rauridýýra uridýýna heka òraru wese heka rare. <sup>7</sup> Idi behubenyke iuri hitxina-di, tahe paò iuriòmy rýirekre wese boibekemy òbitimy, Kristu tule buddèni xiwedýýna wesemy inydeereny rurure, iny Pascoarenny worana bedehesi dorihe rarýýnymy rare. <sup>8</sup> Tai tahe ixena roxina rikiwinyrennyke. Paò iuri-di ryiòmy rakatximyhýrenny. Kia uri paò òraruihetxina wese rare. Paò týmyra, òbitire, inatyhyre, tii rikiyrennyke. Kia tahe rare òbiti widýýna wahe.

<sup>9</sup> Adeereny watyyriti rewahinyre òrarudu mahãdu roo-ki risiòmy, òtadu mahãdu-wana boiòkemy. <sup>10</sup> Ibutumy òrarudu mahãdu-ò aòkò adeereny rarybere. Iny ibina mahãdu, wasidu mahãdu, Deuxutyhy luukòdu mahãdu. Kia-wana noòrennykeki, bede-ribi ihyye bexihitxinyke. <sup>11</sup> Wiji watyyriti kia wese rewahinyre. Ityhydýýduy-txi ròtedu òrarudu rarehykeki, kia roo-ki risiòmy tule iny ibina mahãdu, Deuxutyhy luukòdu, ujòmomomy rybedu, wasidu, axaxa momodu, kia mahãdu-wana tahe byreòmy. <sup>12</sup> Ityhydýýdukòdu mahãdu

ywisiðỹỹdu aõkõ jiar̃y rare. <sup>13</sup> Deuxu dohod̃ỹỹdukõdu mahãdu hitxid̃ỹỹdu rarekre. Deuxu Ryberiti-ki roire: —Òrarudu ay-ribi biòlòd̃ỹỹnyke.

## 6

<sup>1</sup> Iny ityhyd̃ỹỹduõ widee raurenanykeki, aõbohe awire? Erysydu-ò rikidy aõbo ada ityhyd̃ỹỹdu mahãdu-ò rybeke aõbo? Uritere ityhyd̃ỹỹduõle marybekre. <sup>2</sup> Ityhyd̃ỹỹdu mahãdu bedede mahãdu ierysyd̃ỹỹkre. Kia teerytenyõta aõbo. Ityhyd̃ỹỹdu mahãdu bedede mahãdu ierysyd̃ỹỹkeki, aõna aõna iyja tahe teeryõtenyete timy ras̃ỹd̃ỹỹnykemy. <sup>3</sup> Tahe inyboho ýju aõmyd̃ỹỹnana rikierenykre. Kiakeki iratyre kabede aõmyd̃ỹỹnana rakieryrenyhyyke. <sup>4</sup> Erysyd̃ỹỹnana ijõdikeki, aõherekibo erysydu ityhyd̃ỹỹdukõdu-ò radymyh̃ỹre. Ityhyd̃ỹỹdule aõtxi awire. <sup>5</sup> Kia heka adeereny ix̃yruna rare. Hãbu erysydu ityhyd̃ỹỹdu mahãduy-ki ratxiõre aõbo ierysyd̃ỹỹki. <sup>6</sup> Erysydu ijõdihãre ta ityhyd̃ỹỹdu seriõre wii ridyke aõbo ityhyd̃ỹỹdukõdu erysydu-ò, kia awiõre. <sup>7</sup> Ityhyd̃ỹỹdu wii ridykeki, kia tahe iaõ bedede eryõmy rare. Inyõ adeereny aõmy rot̃ỹỹnykeki, urile tahe aõhõk̃ỹmy rot̃ỹỹnykre. Kia heka Inynyr̃ỹ-ò õbitire. <sup>8</sup> Kaiboho ityhyd̃ỹỹdu hãre aõhõk̃ỹmy wii tes̃ynmahãtenyete. <sup>9</sup> Òrarudu mahãduõ-ò, Deuxu Iòlõna uri riwahiõtyhy. Kia teeryõtenyete, iny ywimynoduõ, Deuxutyhy luukõdu, wiriõrese-ò òtadu, hãbu hãwyy wese rexiwahinymyh̃ỹre ijõ hãbu-ò. <sup>10</sup> wasidu, ixidee imynomy nohõtudu, axaxamomodu, jei jeimy rybedu, inywitzira aõmyd̃ỹỹnana wydydu, kia-ò Deuxu Iòlõna uri rawahiõtyhy. <sup>11</sup> Kaiboho heka juhu kia wese toite. Wiji tahe iny Iòlò Jesuisi Kristu, anasuhode, anaixãwidinyde anatade Deuxu Tyytybytyhy-di.

<sup>12</sup> Ibutumy ariwinyke ixidee wikeki ibutumy aõmyd̃ỹỹnana tahe iwid̃ỹỹ awiõre. Ibutumy arot̃ỹỹnyke ixidee wikeki, aõ aõkõ tahe waumy-di rarekemy raremyh̃ỹ. <sup>13</sup> R̃ys̃ỹnaheka weryri-ò ralõmyh̃ỹ kia-ò heka ih̃ỹmyh̃ỹre. Kia heka Deuxu wiwanale rahukre ikonana-ò. Umy heka òraru-ò sohojile aõkõ r̃ỹire. Deuxu umydikemy dorihe riwinyre. <sup>14</sup> Deuxu Inynyr̃ỹ riixixanyre rubu-ribi. Tule iny kidiixixanykre taruru-di. <sup>15</sup> Iny umy heka Kristu rareasa rare. Kia aõbo teerytenyõte? Kabe Kristu rareasa aderana-wana rabutukre, aõkõrehe. <sup>16</sup> Inyõ hãbu aderana-wana roiikeki, sohoji umyhyyle wiwana roireke. Kia teerytenyõte aõbo? Kia Tyyriti Iritina-ki roimyh̃ỹre, hãbu hãwyy-wana sohoji umyhyyle wiwana roireke. <sup>17</sup> Moo Wanyr̃ỹ-wana ributunykeki, sohoji Deuxu Tyytybytle rareke. <sup>18</sup> Òraru-ribi teõrehemy atximyh̃ỹbenyke Ijõ òraru inyõ riwinykeki umywo-ribi nodu aõkõ rare. Òta òta òraru tahe inyõ riwinykeki, kia ixiumy òludu òraru-di reake. <sup>19</sup> Aumy Deuxu Tyytybytyhys̃ỹ rare. Kia aõbo teeryõte? Deuxu rexiwahinyre awo-ki ras̃ỹnyhyymy rarekemy. <sup>20</sup> Kaiboho aumy wedu aõkõ atxitenyteri. Jesuisi Kristu adee rurureki. Tii òwynihik̃ỹ-di anadyde, Kia tahe aumyreny-ki Deuxu-ò bealãbenyke, õbitimy bexis̃ỹnyke aumyreny-di.

## 7

<sup>1</sup> Atyyriti d̃ỹỹraxi rerawyõnyrereri. Kia rare: hãbu hãwyy-ò aderexiõhyykeki, kia heka awire. <sup>2</sup> Hãbu tahãwyydihyye rareke, tule hãwyy tahãbudihyye rareke òta òta òraru dori sõwerekí. <sup>3</sup> Hãbu tahãwyy-ò umy wahisid̃ỹỹna tamy riwahinyke. Hãwyy tahãbu-ò umy wahisid̃ỹỹna riwahinyke. <sup>4</sup> Hãwyy taumywedu aõkõ rare, ihãbu iwedure. Tule hãbu taumywedu aõkõ rare. Ihãwyy iwedure. <sup>5</sup> Wiòmysad̃ỹỹõmy. Urile rexitõenykemy aõutxu-ò wii riòmysanykre. Urile ixideewimy wiwana ratxike. Idi wiwana roikre Satanasi riixiranyheny beded̃ỹỹnana riijereki. <sup>6</sup> Kia warybe bedede ywina aõkõ rare. Urile wadod̃ỹỹna rare. Adee awikeki, tuu bityhynybenyke. <sup>7</sup> Ibutumy hãbu



wawese r̄yirakeki, awire. Iny sohoji sohoji tahe, Deuxu bede ywisid̄ȳna tamy riwahinyra ij̄o wiribi lahitxi ih̄ȳre.

<sup>8</sup> Ixihy mah̄adu-ò wytese mah̄adu-ò wadohod̄ȳna rewahinyre: wawese hyy r̄yirakeki, awire. <sup>9</sup> Ixiweduōkeki, tahe boikre, tii arasahyy mabeke-lau. <sup>10-11</sup> H̄abu h̄awyy my heridu-ò warybe rewahinyra, tahe warybe aōkō rare, Wanyr̄y rybe. Kia rare: H̄awyy uritere tah̄abu ririōhyyke. H̄awyyō tah̄abu-ribi rexihitxinykeki, ij̄o-wana roiōke ada tah̄abuwanale ixyby roike. Tule h̄abu uritere tah̄awyy risiōmy. <sup>12</sup> Ij̄o-ò warybe rewahinyra Wanyr̄y rybemy aōkō: Ityhyd̄ȳdu seriōre ih̄awyy ityhyd̄ȳdukōdukeki, uritere iatysyōmy h̄awyy tii-wana rarekemy ratximyh̄ȳreki. <sup>13</sup> H̄awyy ityhyd̄ȳdu ih̄abu ityhyd̄ȳdukōdukeki, tule uritere iatysyōmy tah̄awyy-wana rarekemy ratximyh̄ȳreki. <sup>14</sup> H̄awyy dori ta h̄abu ityhyd̄ȳdukōdu riōbitinymyh̄ȳre rityhd̄ȳnymyh̄ȳ tii-wana ratximyh̄ȳreki. H̄awyy ityhyd̄ȳdukōdu iwesele ta h̄abu ris̄ȳnyre. Aōkōkeki ariōre ityhyd̄ȳdukōdumy raremyh̄ȳ. Ka tahe rityhynreri. <sup>15</sup> Ityhyd̄ȳdukōdu resekeki ixinamy rake. Kia wesekeki, ityhyd̄ȳdu ritaamy aōkō ih̄ȳre. Kaiboho ywina-di boibekemy Deuxu ratximyh̄ȳre. <sup>16</sup> H̄awyy, teeryte ta h̄abu rityhynkre aōbo, ada aōkōre aōbo? Aōkō, teeryōte.

<sup>17</sup> Iwese Deuxu iny sohoji sohoji rihitxihitxinyre wese, boibemah̄ake. Iwese atximah̄atenyete wese Deuxu anatadenyedeu kia wese boibeke. Kiamy heka reerynanymah̄are ibutumy dohod̄ȳna-ki. <sup>18</sup> Inyō notyky resyna-di bityhinykeki, kaweselemy mabeke. Inyō ōtyky resyna-di aōkō bityhinykeki, juhuu tatemah̄a wese mabeke, notyky resyd̄ȳōmy. <sup>19</sup> Notykyresy aō aōkō rare, ityky resyōkō tule aō aōkō rare. Deuxu bede ywina ywid̄ȳna, kia heka aō wihik̄ȳ rare. <sup>20-21</sup> Iwese Deuxu ibutumy iny ditade wese, juhu wid̄ȳnalemy mabeke. Deōdumy aōbo tetyhynyete, tahe tuhyymy mabeke. Awedudeewimy bexihukeki tahe, idi make araokorore-ribi bohonykeki, tahe make. <sup>22-23</sup> Deōduō-ò Deuxu ritakemy rarybekeki, tahe rityhinykeki, tii raōkōrō-ribi rohonyra Deuxu rue-ō ōkresyō mah̄adu rityhynyrenykeki, tiiboho deōdu roire. Deuxu aradyra ōwyhyk̄ȳ-di tai tahe h̄abu deōdumy aōkō boibeke. <sup>24</sup> Ityhyd̄ȳdu seriōre, iwese atximah̄ate wese adee tarasanamy Deuxu rarybereu, kia wesele boibeke.

<sup>25</sup> Ijadōma-ò bede ywinamy Wanyr̄y Deuxu tarybe diwahinyōde. Ih̄arele wadohod̄ȳna adee ariwahinykre kialemy. Deuxu dori tatōenamy ri-waōbitinyre. <sup>26</sup> Aōhebo kowa rot̄ȳnyre, awi aōkō rare. Kia tahe aratohonykre: Iwese iny ratximyh̄ȳre wesehyy, boibeke. Tii tahe wadee awire. <sup>27</sup> Kai aōbo h̄awyy my heridu tate. Tahe ixihitxid̄ȳmy nohōtiōmy. Kai aōbo h̄awyy my heridu aōkō tate. Tahe h̄awyy my herimy nohōtiōmy. <sup>28</sup> Tahe h̄awyy-wana boikeki. Tii ōraruna aōkō rare. Tule ijadōma roikeki tule ōraruna aōkō rare. Ibutu iny heridu iaōmyd̄ȳ-ki aōhōk̄ȳmy rot̄ȳnyrenyke. Ilau jiar̄ȳ adeereny rarybere inyō aōhōk̄ȳmy rot̄ȳnyheny. <sup>29</sup> Beded̄ȳnana he iōhōre. Tai tahe adee rarybere waseriōreboho, inyō heridu ixihyno wese ratxikemy. <sup>30</sup> Iny bedewomy ratxirerí, ixibedewod̄ȳ-ribi tōhōti rosake. Iny deysamy ratxirerí, deysa-ribi nohōti rosake. Inyō aō ri-wymyh̄ȳré, ihokō wese rot̄ȳnyke. <sup>31</sup> Kabede aōna aōna kai bierysynanykeki iwese ierysyd̄ȳōmy bis̄ȳnyke. Kia aōna aōna ibutumy ituekre. Beded̄ȳnanahe aōwesele rexihukre. <sup>32</sup> Ixiraōmy ah̄abenyke, kiamy tahe adee watxiwāh̄are. Inyō heridu aōkō Deuxu aōmyd̄ȳna riywinymyh̄ȳke, iwese Deuxudeewimy ratximyh̄ȳkemy. <sup>33</sup> Iny heridu heka bede aōmyd̄ȳna riywinymyh̄ȳre, iwese tah̄awyydeewimy ratximyh̄ȳkemy. <sup>34</sup> Kiamy rihitxinyre. H̄awyy tule heridu aōkō Deuxu aōmyd̄ȳna riywinymyh̄ȳre taumy Deuxu Tyytybytyhy ōbitid̄ȳmy. H̄awyy heridu tahe bede aōmyd̄ȳna-di rōhōtinymyh̄ȳre

tahãbudeewimy riywinykemy. <sup>35</sup> Kia aratohodỹỹnyra adeerenywikremy. Kai-boho arataaõtyhy. Urile anawiòhenanymahãde Deuxu iòhòmhyhỹreki. Iòkõramy ibutumy arahenyrenyky watziwãhãre.

<sup>36</sup> Ijadõma tibiedỹỹdu tatibiena-õ òbitimy aõkõ risỹnyny rexi-nohõtinyinmyhỹre. Ijadõma tahãbumy herina bede-ò rehemynyre. Tahe tatibiedỹỹna-di inyõ-wana roikemy idi ihỹre, ixinamy roike. Kia òraruna aõkõ rare. <sup>37</sup> Weryrybò heriòkemy rarurunyaeki, tii tahe awire. Tii dori irurudire iheridỹỹnyke heny. Tii ixiumy wedu rare. <sup>38</sup> Tahe riheridỹỹnykeki, tii awire. Tule riheridỹỹnyòkeki, iratyretyhy awire.

<sup>39</sup> Hãwyy hãbu-wana rỹihyyke hãbu irumy. Rurukeu tahe hãwyy aõtxile roike. Urile Wanyrỹ Deuxudeewimy. <sup>40</sup> Tahe wytesetyhymy ratxihiyykeki, teysamy rỹikre. Tuheka jiarỹ rahõtinyreri. Deuxu Tyytybytyhy wawo-ki ratxirerimy idi rahõtinyreri.

## 8

<sup>1</sup> Katahe adeereny ararybekre: Suritxoo-ò rỹsỹna xiwedỹỹnamy. Inyboho ibutumy bedeery roire. Bede ery iny aõnityhymy rixinohõtinyre. Luuna tahe inywiòhedỹỹdure. <sup>2</sup> Inyõ aõerysydumy rexinohõtinykeki tii aõwihikỹ rieryõre. <sup>3</sup> Inyõ tahe Deuxu luukeki, Deuxu tii rierymyhỹre. <sup>4</sup> Kaa rỹsỹna suritxoo-ò xiwemy rawahimyhỹre. Kia tahe aritỹnynykre. Inyboho rieryrenyure suritxoo aõ aõkõ rare. Sohojihyy heka Deuxu rare. <sup>5</sup> Iny deuxu aõ òta òtalemy rininimyhỹre biu-ki, bede-ki. Iwese deuxu sõwemy ihỹre wese wedu sõwe rare. <sup>6</sup> Inydeereny Deuxu sohojile rare. Inytybyreny. Tii ibutu aõna aõna riwinyre. Tamy inyboho roire. Tule inydeereny Wanyrỹ sohojile rare, Jesuisi Kristu. Tii ibutu widỹỹdure. Tii ratximyhỹre xiery inyboho ratximyhỹrenyure. Tamy inyboho roire.

<sup>7</sup> Tahe ibutumy kia iny rieryõre. Iny sõwemy suritxoo iny reòwarimy rỹira. Tii riki ixiwenadumy riroxikeki, tai òraruna tuu relemyhỹre. <sup>8</sup> Rỹsỹna aõkõ riwatyhenyrenyura Deuxu-ò. Tai roxiheny rỹire. Rikirỹsỹrenyòkeki, rikiònonyrenyòtyhy. Rikirỹsỹrenykeki, aõ rikitarenyòtyhy. <sup>9-10</sup> Bexiebenyke. Urile ityhydỹỹdu aokõdu ixihe-ki iatysyõmy, aurihixinahe-ki. Suritxoo het-owo-ki inyõ umy robikeki teroxiterimy, tii tule ijõ rỹsỹmy rexiwonyre, xiwe rỹsỹmy. <sup>11</sup> Tai tahe aòraru-ki aseriòre atyhyna-ki òraruna-txi resekre. Tamy Kristu tarasamy rurure. <sup>12</sup> Kiamy ityhydỹỹdu seriòre-ò taòrarunyteki, tule Kristu-ò texiòrarunyte. <sup>13</sup> Tai rỹsỹna òraru-ki ityhydỹỹ-ki waseriòre òraruna-txi resekeki, jiarỹ kia rỹsỹna ariroxiòtyhy, waseriòre òraru-ki.

## 9

<sup>1</sup> Jiarỹ adeereny rexihyymy watziwãhãre. Jesuisi teòdỹỹnamy jiarỹ watziwãhãre. Jesuisimy, Inynyrỹrenymy rabiòremy tahõtinyinmahãtenyete aõkõ, Jesuisimy rabire. Waòraru-ki kaiboho ityhydỹỹdumy toite. Deuxu dee waõmysỹdỹỹ òraru-ki ayreny-ki. <sup>2</sup> Inywitziraõ-ò òsana Deuxu deòdỹỹnakõmy watziwãhãre. Adeereny tahe inatyhymy Deuxu teòdỹỹnamy wãhãre kaiboho dori wateòdỹỹna urihixinamy ahãtenyete Deuxu dee.

<sup>3</sup> Kia tahe warawyòdỹỹna rare iny witxiraõ-ò: <sup>4-5</sup> Jiarỹ ariroxikeki, ariòkeki, tai aõkõhe awilere. Ityhydỹỹdu hãwyyõ-wana, wawana aridykekõ aõbo awileke. Kawese ibutumy Deuxu teòdỹỹna mahãdu rotỹỹmyhỹre, tule Jesuisi seriòre, tule Pedro. <sup>6</sup> Jiarỹ, Banabewanahyyle raaõmysỹdỹỹwãhãre iny aõreny tarasanamy. Kia rikirirenykeki, awikeki, aõbo. <sup>7</sup> Inyõ aõbina-ò rakeki, ta aõ aõbo riòwynyke? Aõkõre. Inyõ oworumy uva bederaty ribrònyke-wana, bederatyõ aõbo ritòleke. Inatyhymy inyõ teòte asi-ò riyrubunymyhykeki,

ihowỹsomy aõbo riõmyhỹke? Kohe, riõmyhỹke. <sup>8</sup> Kabexe hãbu wese aõbo jiarỹ rarybereri? Tule tahe bede ywina tyyriti aõbo riritinomy rỹimyhỹre. <sup>9</sup> Moisesi bede ywina ritidỹỹna-ki rỹimyhỹre: —Broreniry itaaõmyhỹ maixõmo tyre rariamy risymyhỹreu. Deuxu aõbo broreni riwotõdenymyhỹre. Aõkõre. <sup>10</sup> Tahe waõrarureny-ki aõbo kia rarybere. Kohe. Inyõ ròbrõmyhỹreu, iyremy ritakemy rõhõtinyinmyhỹre. Tule inyõ riõrõmyhỹreu, ijõõ ixidee ritakemy rõhõtinyinmyhỹre. <sup>11</sup> Deuxu Tyytybytyhy aõmydỹỹnanamy adeereny anaerynanykeki, idi aõna aõna aribireny aritaleke, aõbo? Kia aõnityhyre aõbo? <sup>12</sup> Iny wixira aõ aribi ritake-wana, jiarỹboho iratyre iu arõtarenkemy arotỹỹnyrenyke. Tahe tiu ròtaõhyyre. Deuxu Rybewihikỹ tỹnydỹỹna ariokòròõtyhy. Tai ibutumy aõ wixira wixira riõludunywãhãre. <sup>13</sup> Dohodỹỹna heto deõdu irysyna ritamyhỹre dohodỹỹna heto-ribi. Xiwe dinodu aõ rỹsỹna ritamyhỹre xiwena-ribi. <sup>14</sup> Kia wese Deuxu rarybere; inyõ Rybewihikỹ ritỹnynykeki, ibutumy aõmy reamyhỹre ritamyhỹre, Rybewihikỹ aõmysỹdỹỹbro-ribi. <sup>15</sup> Tahe jiarỹ aõ aribi retaõhyyre tule kia reritinyreri aõ aritakemy aõkõ aribireny. Warybe inyõ riõnonykemy aõkõ watxiwãhãre iko-ki tahe arurukre. <sup>16</sup> Jiarỹ Rybewihikỹ retỹnynmahãre, rexierymahãre dori aritỹnydỹỹke. Kia heka aõhõkỹ aõkõ waloosõnadikemy rare. Rybe aritỹnynyõkeki, heka aõbinatyhyõ wadee kanake inyhe. <sup>17</sup> Ixidee wimy Rybe aritỹnynymyhỹkeki, tai ki aritakre. Ixideewimy aõkõ aritỹnynyke-wana, ihãrele tahe itỹnydỹỹmy iwahisidỹỹna wadee roire. <sup>18</sup> Kiake-wana, timybo wawahidỹỹna ihỹre. Kia heka rare. Rybewihikỹ tỹnydỹỹ-ò arexiõwynyõtyhy. Aõbo inatyhymy wahõrõre, retaõhyywãhãre.

<sup>19</sup> Jiarỹ inydeòdumy aõkõ rarehywãhã. Tahe iximy rexideòdunyre sõwemy iny òraru-ribi aritakemy. <sup>20</sup> Judeu mahãdu-ò judeu wesemy jiarỹ rexisỹnyre, judeu mahãduõ dori òraru-ribi aritakemy idi watxireri. Moisesi bede ywina yrubudỹỹdu mahãdu dee ixiwesemy rexisỹnyre iòraru-ribi dori aritakemy. Urile jiarỹ kia bede ywiny rubudỹỹna aõkõ rare. <sup>21</sup> Bede ywina aõkõ mahãdu dee ixiwesemy rexisỹnyre. Urile Deuxu bede ywina dire jiarỹ Kristu bede ywina yrubudỹỹdu jiarỹ watxiwãhãre. Kia iòraru-ribi aritakemy jiarỹ rexisỹnyre. <sup>22</sup> Irurukõdu mahãdu-ò waruru aõkõ wesemy rexisỹnyre, irurukõdu mahãduõ ritakemy. Ibutu iny deewesemy rexisỹnyny rarewãhã, aõtxile tiibohoõ aritakemy iòraruna-ribi. <sup>23</sup> Ibutumy rewinyre, Rybewihikỹ dee iwihedỹỹdukemy ixi-di wãhãre.

<sup>24</sup> Ijarana rõhõnykeu ijaramy ijaranadu sohojile rõhõnyra. Tiile wahidỹỹna ritake. Kaiboho maijarenybenyke tii bitakemy. <sup>25</sup> Ibutumy ijaradu ixidi rorenymyhỹre aõikõkõmy rexierynanymyhỹre. Kia riwinymyhỹ wahidỹỹna ritakemy. Kia wahidỹỹna retybykre. Inydee wahidỹỹna tahe retybyõtyhy. <sup>26</sup> Jiarỹ kawesemy raijaranyre aõ aritakemy. Axiõ ijesumy resuwãhãre yhyle rehetenyre wese aõkõ. <sup>27</sup> Waumy-di rõrenyhyywãhãre. Wadeõdu wesemy waumy resỹnyre. Tai dori resỹnyre. Jiarỹ inyõ-ò Rybewihikỹ aritỹnynykeki, ywiny dehudu wesemy aõkõ arareke, adehuky-ribi riwata lau.

## 10

<sup>1</sup> Boholabenyke weseriõre ityhydỹỹdu mahãdu. Inytybyreny kia biuwetyky nonoe rawo-di roimyhỹ. Tule ahobesòhòkỹ rawo-di reurõreny. <sup>2</sup> Moisesi, iwedu, ibutumy aho-di nonoe-di rexisebeny. Tai iwedu inatyhymy rityhynyreny. <sup>3</sup> Deuxu Tytytyby rỹsỹna sohojile wiwese wesele ibutumy rirỹsỹre. <sup>4-6</sup> Deuxu Tyytybytyhy mona sohojile ihỹre. Bee manay-ribi nade. Mana tahe Kristuweselemy ihỹmyhỹre. Inynyrỹ kiamy roiremyhỹu. Deuxudeewimy aõkõ riwinymyhỹre. Tai rurure bedero-ki. Kia tahe inydeereny bedeery urihixina erysydỹỹnamy ratxireri, inyboho-dori aõbina

widỹna aõkõ rokohotinyrenykemy, iwese tiiboho riwinyre wese aõkõ.  
<sup>7</sup> Inyboho suritxoo tyhydỹdukõmy rokoireke iwese ijõ mahãdu tuu reri-  
 nanymyhỹre wese kõkremy. Ritina-ki roimyhỹre: —Tiiboho ronymyhỹre  
 riroxikemy, riõkemy. Tahe ritamanyrenyre risinykremy. <sup>8</sup> Tule òta òtamy  
 rokotỹnyrenyõke iwese tii riwinyre wese —tai 23.000 iny rurure sohojixu-u.  
<sup>9</sup> Deuxu urihixirenyõmyke, iwese tii riwinyre wese. Tai rururenyre hemylala  
 jurutana-ki. <sup>10</sup> Iburaõmyke iwese tii ribuarenyre wese. Tai rubudỹdu  
 rirubunyre, Rubu Ýju wahe. <sup>11</sup> Kia tahe bede ery urihixidỹna eryllyna  
 inydeereny ratxireri. Riritinymyhỹre iny bede eryllynenymy. Bededỹnana  
 konana-ò iòhõmy inyboho roire. <sup>12</sup> Tahe inyõ òbitimy rỹimy rõhõtinkyeki,  
 tii rexijemy ratxike reseke lau. <sup>13</sup> Ixirana isirare inydee rehemynyõtyhy  
 rikiòludunyõtyhy. Deuxu awi rare. Riattyõtyhy iòlududỹna-txi. Tii inydeereny  
 ixirana-ribi ixtarasana riwahinyre. Iny rurureny wesele ixirana rare. Tai  
 rikiòludunyrekye.

<sup>14</sup> Waluuna mahãdu, kaiboho suritxoo luuna-ribi bexiebeny. <sup>15</sup> Adeereny  
 rarybere, kaboho dori abederyrenyre kai bederywesetyhymy toiteki.  
 Mohõtinybenyke aõmybo rarybereridi. <sup>16</sup> Deysanamona hyna aõbo ityhy-  
 dỹdu mahãdu wowydyna rare Kristu hãlubu wesemy tuu riõreki? Iny paõ  
 riyrerenyre, Kristu umy wesemy aõbo rare? Inydee aõbo wowydyna rare?  
<sup>17</sup> Inyboho sõwe roire. Urile tahe paõ sohojihyy rare. Sohoji butunahymy  
 rare, paõ sohojiribile yre yre rarỹsỹreu, inyboho sohojilemy roire. <sup>18</sup> judeu  
 ijoi-ò betehebennyke. Kia xiwe rirỹsỹrenyeki, xiweribile ritamyhỹre. Kia aõbo  
 òbitire. <sup>19</sup> Timybo jiarỹ rarybereri? Rỹsỹna aõbo xiwenamy diwahinydeki,  
 kia aõbo aõ rare ada ritxoo aõ aõbo rare. <sup>20</sup> Kiamy aõbohe jiarỹ rarybereri?  
 Aõkõre, tuu aõkõ rarybereri. Urile, kia raxiwemyhỹre, diabo tyytyby-ò rare.  
 Deuxu-ò aõkõ raxiwemyhỹre. Kaiboho diabo tyytyby-ò tamy bexijemy.  
 Tii-wana uritere noõmy. <sup>21</sup> Wanyrỹ monamy biõkeki, tai diabo monamy  
 tule biõke. Wanyrỹ roxi-ki biroxikreki, tule tai diabo rỹsỹna rỹsỹõmykre.  
<sup>22</sup> Deuxu aõbo iny kidihãrudenykre. Inyboho aõbohe ityhyrenyre iratyre?

<sup>23</sup> Aõwaxiny tuu botỹnyke. aõmydỹnana awire. Ihãre tahe awiõre.  
 Aõmydỹnana ixidee wimy botỹnyke. Urile aõmydỹnana riwiòhenanayõhyre.  
<sup>24</sup> Uritere aaõmydỹnana sohojidile nohõtĩõmy; tule inywitxira aõmydỹna-txi  
 õhõtĩ beake tai aõwiwihikỹmy tamy biwinykre. <sup>25</sup> Birõmyhỹke ibutumy  
 aõ rỹimyhỹre meriadu-ki, nohõtĩõmy aõbo raremyhỹmy. <sup>26</sup> Ibutu bede  
 aõmydỹna Wanyrỹ wahidỹna rare inydeereny. <sup>27</sup> Ityhydỹdukõdu  
 mahãduõ aratobinymy, kai makeki, biroxike ibutumy aõbo adee kidekre.  
 Dỹraxyõmy araykywydyna òraru-ki. <sup>28</sup> Tahe adee rarybekeki; kia ritxoo  
 xiwe rare. Irỹsỹõmy, kia hãbu raykywydyna òraru-ki tamy ibinare wahe.  
<sup>29</sup> Araykywydyna òraru-ki aõkõ jiarỹ rarybere, tahe iwitxira òrariki. Ijõ  
 hãbu witxira rayky-di aõkõ aritõhõtĩnymyhỹke. Kia òsana inyõ rarybekre.  
<sup>30</sup> Dealãnadile jiarỹ ariroxiwãhãkeki, timybo inyõ ibinamy wamy rarybeke.  
 Deuxu-ò dori rexideylydỹnyra. <sup>31-32</sup> Tai tahe, biroxibenyke-wana,  
 biõbenykeki, aõmy botỹnykeki, ibutumy Deuxu wowydyna-ò botỹnyke. Inyõ  
 atyhyna-di iatysyõmy, judeu mahãdu-ò, judeukõdu mahãdu-ò, tule Deuxu  
 tyhydỹdu-ò. <sup>33</sup> Ibutu dee rarurunywãhãre tamywikemy. Waaõmydỹnana  
 sohojile aõkõ rahõtĩnywãhãre ibutu iny aõmydỹna dee rahõtĩnywãhãre  
 tarasadỹmy.

## 11

<sup>1</sup> Iwese jiarỹ Kristu wesemy watximyhỹre wese kaiboho wawesele  
 boibekre.

<sup>2</sup> Ararybekre: —Kaiboho awirenyremy kaiboho dori iwese bede eryna araerynanyre wese ibutumy teyrubunymahātenyte. <sup>3</sup> Tahe ijōmy araerynanykre. Kristu iratiwi ibutu hābu ratyre rare. Hābu tahe hāwyyrati ratyre rare. Tule Deuxu tahe Kristu ratiwi ratyre rare. <sup>4</sup> Hābu rexitōenyreu, ritỹnynykeu tarahety-di, Kristu rityhynyōre. <sup>5</sup> Hāwyyō tahe rexitōenykeu, ritỹnynykeki tarahety-di aōkō, tii tahābu rityhynyōre. Tii dori tarade rasymyhỹre wese ratximyhỹre. <sup>6</sup> Hāwyyō tarade rihetynyōkeki, tii tarade riorokre. Hāwyy tarasyrau raixỹrukeki, tahe tara rihetynykre. <sup>7-9</sup> Hābu tara rihetynyōmyhỹkre dohodỹỹna heto-ki. Bera-ò tyytyby wesemy Deuxu dee hābu rare. Deuxu dee hābu rare. Hāwyy tahe hābu dee-ki rare. Hābu heka hāwyy-ribi aōkō dori iwidỹỹ rare. Hāwyy tahe hābu umy-ribi iwidỹỹ rare. Hābu hāwyy dee aōkō relere. Hāwyy tahe hābu dee relere. <sup>10</sup> Tai tahe hāwyy tara riwōmyhỹke. Iu tahe hābu rityhynymyhỹre ŷju òraru-ki. <sup>11</sup> Deuxu ityhydỹỹduy-ki wiwesele wiweselemy ratximyhỹre. Hābu hāwyy-di ratxikemy; hāwyy hābu-di ratxikemy. <sup>12</sup> Iwese hāwyy hābu-ribi relereu wese, hābu hāwyy-ribi reamy raumynymyhỹre. Deuxu ibutumy riwinyre. <sup>13</sup> Kaiboho mohotinybenyke: Hāwyy rexitōenyreu, tarade rihetynyke, aōbo ada aōkōre aōbo? <sup>14</sup> Hābu iraderehemy rỹira, tarati rityhynyōmyhỹre tuu rỹira. Kiamy bede riwaerynanyreny. <sup>15</sup> Hāwyy tahe irade rehely rỹira ixiruxeradỹỹmy rỹira, hety wese tamy iò rarekremy wahe. <sup>16</sup> Inyō iwitxiramy rexinohōtinykeki, tamy ararybekre, kia wese: Inyyreny-ki kia bede ywina rare ibutumy dohodỹỹna heto-ki.

<sup>17</sup> Aōwesebo botỹỹnykremy adee ararybekre. Wade awiōre iwese ahātenyte wese kaiboho tebutunytentyteu, kia arawiōhenanyōhyre urile tahe arabinanytyhyreny. <sup>18</sup> Juhuu ararybekre timybo raholaremy: kaiboho texihitxinytenyte dohodỹỹnaheto-ki, kia tahe retyhynyriōremy watxireri. <sup>19</sup> Wiribi bexihitxinybenykeki, tai iny òbiti rỹira bierybenykeny. <sup>20</sup> Bibutunymyhỹbenykeu, Inynyrỹ roxina aōkō terỹsỹmahātenyte. <sup>21</sup> Ijō detiteremy taroxina riwymyhỹre inywitxirako-ki. Ijō aō rimyōmyhỹreki rama risamyhỹre. Ijō tahe sōwetyhymy riōmy raitxỹtemyhỹre. <sup>22</sup> Kai aōbo ahetoōre, tai biroximyhỹkemy, biōmahākemy? Kia wese-ki Deuxu dohodỹỹna heto aōbo tetyhynyōhyymahāte. Iaōkō rỹira mahādu tule teixỹrudỹỹnymyhỹtenyte. Aōmybo ararybekre. Arawowydydỹỹnyrenykeny aōbo? Aōkōre. Tai arawowydydỹỹnyrenyōtyhy. <sup>23</sup> Kia Inynyrỹ-ribi retare, tule aerynamy adeereny rewahinyre. Kia wahisidỹỹnadyna txuu, Jesuisi Inynyrỹ orotxu rimyre. <sup>24</sup> Rexitōenyredi, riòròre, idi tahe rarybera:

—Kia heka waumy rare. Adeereny wahidỹỹmy watxireri. Kia biwinymyhỹkreu, watxi òhōtirenny reakemy.

<sup>25</sup> Tule riymyhỹre rahudi, tahe bemonā hyna rimyra, idi tahe rarybera:

—Kia heka wadeewimy Deuxu, iny-wana ratximyhỹre. Wahālubu òraru-ki kia riwinyre. Kia biōmahābenykreu, aōu watxi òhōtirenny reakemy.

<sup>26</sup> Tiubo paō biymahābenykreu, bemonā hyna-ribi biōmahābenykreu, warubu rybe tetỹnynytenyteri idi adòsekre. <sup>27</sup> Tai inyō òhōtiōmy riykeki-wana, riōkeki-wana, tii Jesuisi umymy hālubumy òraru-ki ratxireri. <sup>28</sup> Sohoji sohoji taaōmydỹỹnana-di rohōtinykre, idi tahe riymyhỹre, riōmyhỹkre. <sup>29</sup> Inyō Jesuisi umy-di rōhōtinyōkeki, ixidee aōbinahakỹ kidiwinyke. <sup>30</sup> Kia òraru-ki sōwemy binamy òhyyle toite, tule iny sōwemy rurumy rỹira. <sup>31</sup> Iny ixi-di rohōtinykeki, aōbinahakỹ rexierykeny, tahe iny rexiōbitinyke. Deuxu tai aōhōkỹmy rotỹỹnyōtyhy. <sup>32</sup> Inynyrỹreny inyboho riōbitinymyhỹre. Kiamy heka bede mahādu-wana aōkōkeki, aōhōkỹmy rotỹỹnyrenykeny. <sup>33</sup> Kiamy, waseriòreboho, roximy bibutunykrey, ijō wii biraòbenykre. <sup>34</sup> Inyō rama risamy rỹikeki,

taheto-ki riroxike tai rihuõmy rÿimyhÿkre Deuxu ywisidÿÿna-ki. Adee arehe-mynykreu, ijõ kia aõna aõnamy arðerynanyrenykre.

## 12

<sup>1</sup> Deuxu Tyytybytyhy bede eryna wixira wixiramy adeereny ararybekre, araerynanyrenykemy. <sup>2</sup> Ityhydÿÿdukõdumy toitemahãu, aõõ aradyrenyre suritxoo rybeõhõkÿ-ò. <sup>3</sup> Tai arabedeerynyreri: Inyõ Deuxu Tyytybmy rarybemyhÿkeki, tii rarybeõtyhy: Jesuisi ibina rare. Tule inyõ uri rarybeõtyhy: Jesuisi Wanyrÿ rare. Tii Deuxu Tyytybytyhydile tuu rarybekre.

<sup>4</sup> Deuxu Tyytyby bede eryna wixira wixira sõwemy rÿire. Deuxu sohojile tahe iwahidÿÿdu rare. <sup>5</sup> Aõmysÿdÿÿwi-ribi lahitxi rare, tahe Inynyryÿ sohojile rare tamy rakaaõmysÿdÿÿnyke. <sup>6</sup> Aõmydÿÿna wiribi lahitxi rare, tahe Deuxu sohojile ibutudÿÿdu rare. Tii iny-ò aõmysÿdÿÿna widÿÿna riwahinyre. <sup>7</sup> Sohoji sohoji tabedeeryna wixira wixira Deuxu Tyytybytyhy-ribi ritamyhÿre ibutu iny wiõhedÿÿmy. <sup>8-9</sup> Inyõ-ò bede eryhykÿ wahidÿÿmy ratxireri, Deuxu Tyytybytyhy iwahidÿÿdure. Ijõ-ò tahe rybe bedeerydÿÿ wahidÿÿmy ratxireri, iwahidÿÿdu tiile rare. Ijõ-ò tahe ityhydÿÿtyhy-ki rarekemy. Deuxu Tyytybytyhy iwahidÿÿdure. Ijõ-ò tahe, õhotibedumy rarekemy. Deuxu Tyytybytyhy risÿnyre rare. <sup>10</sup> Ijõ-ò tahe, bedeõby widÿÿdumy rarekemy, ijõ-ò rybe-di tÿnydÿÿdumy, ijõ Tyytyby erydumy, ijõ rybewixiramy rarybekemy, ijõ rybe wiuròdÿÿdumy. <sup>11</sup> Deuxu Tyytybytyhy sohojile tahe iwahidÿÿdu rare. Tii sohoji sohoji-ò riwahinymyhÿre ixideewimy.

<sup>12</sup> Iny umy sohojihyy rare. Urile iaõmydÿÿnana sõwere. Kia wese ityhydÿÿdu rÿira ityhydÿÿdu mahãduy-ki, Kristu-ki iny sohojihyyre. <sup>13</sup> Sohoji sohoji mahãdu-ribi rabutura, ijõ judeu mahãdu-ribi, ijõ judeukõdu mahãdu-ribi, ijõ deòdu mahãdu-ribi, ijõ deòdukõdu mahãdu-ribi. Wiji tahe Deuxu Tyytybytyhy-di sohoji hõrõmy iny rÿire. Idi tahe inyboho tÿximy rÿire. <sup>14</sup> Umy dori sohoji aõmydÿÿnana-di aõkõ rare, sõwere tahe. <sup>15</sup> Inywa rarybekeki kia rarybekre òsana: jiarÿ umy aõmydÿÿnana aõkõ watxireri, debò aõkõ dori rare. Kia rarybekeki, ihãre ta umy aõmydÿÿnanaõlemy ratxireri. <sup>16</sup> Nohõti rarybekeki: rue aõkõ jiarÿ rare, tai dori umy aõmydÿÿna aõkõ rare, Kia rarybekeki, ihãre ta umy aõmydÿÿnanale ratxireri. <sup>17</sup> Ibutumy umy ruelemy ratxikeki, timybo rokoholarenykre. Ibutumy nohõtilemy ratxikeki, timybo rue rareke timybo robirenykre. <sup>18</sup> Deuxu ibutumy aõ ritidire, titxibo ixideewimy rõhõtinyre. <sup>19</sup> Ibutumy aõmydÿÿnana wiweselehekÿkeki, timybo raaõmysÿdÿÿnyke? <sup>20</sup> Inatyhmy aõmydÿÿnana sõwere. Umy tahe sohojilere. <sup>21</sup> Rue debò dee rarybeõtyhy: Kai aõ aõkõ tate. Tule ratiheka waò rybeõmy: Kaikõkeki wadee awike. <sup>22</sup> Kia kÿnyhe. Aõ aõmydÿÿnana inydeereny iruruõmy aõmy aõkõ rÿire wese, tii aõwityhy rÿire. <sup>23</sup> Tule aõbo inydee aõmy aõkõ rÿira tamyhe woreke rÿimyhÿre iruxeramy aõkõ rare, iny woreke rÿimyhÿre. <sup>24</sup> Aõbo inyumy-ki iruxeramy rare, kia uridÿÿõmy. Deuxu tahe umy aõmydÿÿnana ibutumy ributunyre. Tii aõ ibuturatyre rityhynyre. <sup>25</sup> Kiawese alõreõmy umy-ki ibutumy umy aõmydÿÿnana wiwana raaõmysÿdÿÿnymyhÿre wii riwiõhenanymyhÿre. <sup>26</sup> Sohoji aõmydÿÿnana txubererekeki, iuhe rubererenyke. Ijõ teysakeki inyõ riwowydynykeki iuhe reysake. <sup>27</sup> Boholabenyke, kaiboho Kristu umy mahãduõ toite. Ityhydÿÿdu sohoji sohoji heka umy aõmydÿÿnanaõ wese rare. <sup>28</sup> Deuxu ityhydÿÿdu mahãduykile iny rihitxinyre. Juhuu Jesuisi teòdÿÿdu mahãdu, ihewo-ribi Deuxu rybe tÿnydÿÿdu mahãdu, idi ierydÿÿdu, aõwiwihikÿ widÿÿdu, õhotibedu mahãdu, wiõhedÿÿdu, dinoduwesedÿÿnadu, rybewixira erysydumy. <sup>29</sup> Ibutumy deòdu aõbo roire? Ibutumy tÿnydÿÿdu aõbo roire? Ibutumy erydÿÿdure aõbo? Ibutumy aõwiwihikÿ

widỹỹdure aõbo? Aõkõre wii ihitxihitxire. <sup>30</sup> Ibutumy ywisidỹỹ rieryre aõbo? Ibutumy rybe wixira rybedu aõbo? Ibutumy rybewixira wiuròdỹỹdure aõbo? Aõkõre. <sup>31</sup> Tahe, eryna wiwihikỹmy mynyny, atximyhỹbenyke. Tahe ariteòsynykre tibo ryy.

## 13

<sup>1</sup> Ibutumy iny rybe wixira wixira arierykeki, ýju rybe adrierykeki, kia tahe luuna-di aõkõkeki, jiarỹ aõwodỹỹna widỹỹna wesemy ararekre. <sup>2</sup> Jiarỹ ibutumy Deuxu rybewahidỹỹ eryna ijõdikeki, ibutumy bedeery ijõdikeki, hãwãlò iherina-ribi aritake watyhydỹỹna kiadikeki, tahe luuna-di aõkõkeki, aõ aõkõ watzireri. <sup>3</sup> Ibutumy waaõmydỹỹna iny aõkõ mahãdu-ò ariwahinykeki. Waumy Kristu Rybewihikỹ dee òraru-ki wòsikemy ariwahinykeki, tahe luuna ijoõkeki, kia heka aõkõweseleke. <sup>4</sup> Inyõ luunadikeki, ywimy rarekre, awimy rarekre, ihãrukõmy rarekre, luunadikeki, ixityhydỹỹdukõmy rarekre. <sup>5</sup> Inyõ luunadikeki ihỹkỹhỹkỹmy aõkõ rarekre. Ixisohojidile aõkõ rõhõtinykre. <sup>6</sup> Òbitiõna-di deysaõmy, inatyhyle kedeysakre. <sup>7</sup> Moõ iluunadireki ibutumy aõhebo rotỹỹnykre, ibutumy rityhynykre, ibutumy riraõkre, ibutumy riòludunykre. <sup>8</sup> Luuna tiu itueõtyhy, tahe rybe tỹnydỹỹna aõutxumy ituekre, rybewixiramy rybe ituekre, bede eryna erysynamy tule ituekre. <sup>9</sup> Inyboho iyrelemy rieryreny. Tule iyrelemy ritỹnynyre. <sup>10</sup> Aõutxumy tahe kia iyre rexihukre, ibutumy kanaerykre, kia hãbu òbiti tyhy kedehemynykeu, Kristu wahe. <sup>11</sup> Uladumy rarewãhãu uladu wesemy rarybere, uladu wesemy ixidi rarewãhã, uladu wesemy raykywydynanyra. Hãbumy relereu tahe, wauladumy nona rerire. <sup>12</sup> Wiji tahe inyboho robirenyre, iwese itxerenatỹnykowese-ki, kiatxuu tahe, wiòsanamy rokobirenykre. Katahe iny rieryreny txuraõ, kiatxu tahe, iwese tii inyboho dierydenyde wese rikierenykre. <sup>13</sup> Tahe inataõ aõmydỹỹna rỹire: ityhydỹỹna, iraròsõna, luuna. Ijõ ratyre tahe luuna rare.

## 14

<sup>1</sup> Luuna-di boibeke ibutu ijõ ratyre. Tytybytyhy erysyna biijebenyke. Iratyre biijebenyke Deuxu rybe tỹnydỹỹna erydỹỹna. <sup>2</sup> Inyõheka rybe wixiramy rarybekeki, hãbu-ò aõkõ rarybereri. Deuxu-ò sohojile rarybere. Inyõ irybe rieryõre. Deuxu Tytybytyhy rybe tii erydure. <sup>3</sup> Inyõ Deuxu rybemy rarybemyhỹreu, iny-ò rarybereri. Tai riwiòhenanymyhỹre, riòbitinymyhỹre, riteysanymyhỹre. <sup>4</sup> Inyõ rybe wixiramy rarybereu, tiilehyy rexiwiòhenanymyhỹre. Inyõ tahe rybe ritỹnynyke wana, dohodỹỹna mahãdu riwiòhenanyre. <sup>5</sup> Ibutumy rybe wixiramy rarybekeki, tii tahe wadee awire. Tahe ibutumy Deuxu Rybewihikỹmy rierynanykeki, kia iratyre tyhy wadee awire. Deuxu rybe tỹnydỹỹna tahe, rybe wixiramy rybedu ratyre rare. Wiuròsòdỹỹdudile rybe wixiramy rarybeke dohodỹỹdu mahãdu wiòhedỹỹmy rarekemy. <sup>6</sup> Jiarỹ adeeremy ararybekeki, rybewixira-di. Tiwesebo arãwiòhenanyrenyke. Urile bede erytỹmyra-di, erynatyhyhyky-di, inatyhyeryna-di araerynanykeki, kia-di tahe arãwiòhenanykre. <sup>7</sup> Ka tahe wiudỹỹna rare. Wyhyhykỹ jurònawesena ada rerotisõmo wiudỹỹna kidiwiunykeki, tahe awimy riwiunyõke, timykibo iny rieryke aõbo riwiunyreri. <sup>8</sup> Tule juròna òbitimy ritxurònyõkeki, timykibo aõbinadu mahãdu rierykre aõbina-ò nomy rexiwinykemy. <sup>9</sup> Kaiboho tule kiawesere. Inyõ arybe rieryõkeki, tiwesebo rieryke aõmybo tarybetenyteri. Kiawese dori yhydeele tarybetenyteri wese. <sup>10</sup> Inatyhymy sõwemy rybe wixira rỹire bede-ki, ibutumy tahe aõna aõnamy rybedu rarybere. <sup>11</sup> Aõmybo rarybere arierykõkeki, rybedu dee jiarỹ iny

witxira, rybewitxiraõ tamy rare, tule tii wadee rare. <sup>12</sup> Kaiboho Deuxu Tyytybytyhy eryna teijetenyeri. Tai dohodỹỹna mahãdu wiòhedỹỹmy maru-runybenyke. <sup>13</sup> Inyõ rybe witxiramy rarybekeki, iòbitidỹỹnamy rexitòenyke. <sup>14</sup> Rybe witxiramy arexitòenykeki, watyytybyle rexitòenyreri waraykywy-dyna-ò ralòòtyhy. <sup>15</sup> Tai tahe aõhebo arotỹỹnykre? Watyytyby-di, warayky-di arexitòenykre. Idi watyytyby-di warayky-di arawiunykre. <sup>16</sup> Kai atyytybyle-di textitòenymyhỹteu, timykibo inyõ rierykemy? Idi rarybeke aixitòedỹỹna rexihukeu. Tii dori arybe rieryõre. <sup>17</sup> Kai tahe inatyhymy awimy textitòenye, tai tahe iny aõ rieryõhyre, idi riwiòhenanyòtyhy. <sup>18</sup> Deuxumy reàlàwãhãre. Jiarỹ dori aratyrereny rybe witxiramy rarybemahãre. <sup>19</sup> Tahe dohodỹỹna mahãdu-ò iruyre rybe eremy ierysynamy ararybeke ada sòwemy rybe eremy iwitxira rybemy anarybekeki. Juhule wadee awityhyre ijõ ratyre-ki iny kiawese inatyhymy reernanyre.

<sup>20</sup> Waityhydỹỹdu seriòre uladu raykywesemy aõkõ bexiraykynymyhỹbenyke. Inyery bedeeryhykỹ wese maraykynybenyke. Aõibina erysynale uladu aõeryõ wesemy boibeke. <sup>21</sup> Bede Ywina tyyriti-ki kia rỹire: —Kia inydee, hãbu rybe witxira-di anarybekre. Ihãre ta warybe dee tiiboho roholarenyòkre. —Kiamy tahe Wanyrỹ rarybere. <sup>22</sup> Inatyhymy tahe iwitxira rybe rybemy ityhydỹỹdu mahãdu dee deòsina aõkõ rare. Kia ityhydỹỹdukõdu mahãdu dee deòsina rare. Tule Deuxu rybe tỹnydỹỹna ityhydỹỹdu mahãdu-ò rare. <sup>23</sup> Dohodỹỹna mahãdu wii ributunykre, rybewitxiramy rarybemyhỹreki. Ityhydỹỹdukõdu mahãdu ralòkeki, iny ierykõdu ralòkeki, timybo tii ròhòtinyke. taitxýtetenyerilemy idi ròhòtinyke. <sup>24</sup> Tahe ixityre ityhydỹỹdukõdu mahãdu ralòkeki, tahe Deuxu rybemy rarybereriò, ralòkeu, tii rexierykre òrarudumy rare, ibutumy aòwòmymy roholare tarayky riixixanyke. <sup>25</sup> Aõbo tawo-ki riwòmymy rỹimyhỹredi rexierymy ixi-di ròhòtinykre. Tai resekre tatiowomy Deuxu deàlànamy reàlàkremy. Tule rarybekre: —Inatyhymy Deuxu ayreny-ki ratxireri.

<sup>26</sup> Aõhebo dohodỹỹna-ki rokotỹỹnyrenykre waseriòreboho wii rikibutun-nyrenykre. Kia heka rare: Inyõ wiuòmymy kanawiunykre, ijõ tasỹ Deuxu rybe bede erydỹỹna kedeerynanykre, ijõ itỹnydỹỹnamy kanarybekre, ijõ rybewitxiramy rybena kanarybekre, ijõ iwiuròsòdỹỹnamy kanarybekre. Aõhebo botỹỹnybenyke ityhydỹỹdu wiòhedỹỹnamy rarekemy. <sup>27</sup> Inyõ rybewitxiramy rybemy ratxire riki, inatxi inataòlemy rarybeke, wihewomy, tule iwiuròsòdỹỹdulemy rarybekre. <sup>28</sup> Wiuròsòna ihoòkeki, rybeòlemy ronyke dohodỹỹna heto-ki. Ixiwanale Deuxu-di ròhòtinyre, rexitòenymy. <sup>29</sup> Urile inatxi, inataòlemy rybe tỹnydỹỹdumy rarybekre wana, ijohonadu mahãdu tahe irybe-di ròhòtinytyhyke timybo. <sup>30</sup> Ijõhonadu-ò itỹnydỹỹna rybemy ratxikeki, rybedu rexihudi rarybekre. <sup>31</sup> Ibutu dori Deuxu rybemy rarybekre, sohoji sohojimy. Tai ibutumy rierykre, reysakre. <sup>32</sup> Rybe tỹnydỹỹdu mahãdu rayky, tiile rexierymyhỹkre. <sup>33</sup> Deuxu tahe wimy uriuridỹỹdu aõkõ rare; tii tahe òbitina widỹỹdu rare. Ibutu ijõ dohodỹỹna heto-ki kia wesemy rare.

<sup>34</sup> Hãwyy tahe dohodỹỹna-ki roholamy rỹimyhỹre rybeòhykymy tai aõwedumy aõkõ. Ywilemy rỹirake iwese judeybedeywidỹỹna roimyhỹre wese. <sup>35</sup> Tỹỹraxinadikeki taheto-ki tahãbu-ò rỹỹraxike. Hãwyy dohodỹỹna-ki rarybemyhỹre heka ixỹruna rare. <sup>36</sup> Timywese tahòtinytenye. Deuxu rybe aõbo aykyreny-ki ròhònyre ada kaiboho sohojile aõbo ijòdire.

<sup>37</sup> Inyõ rybe tỹnydỹỹdumy ixi-di ròhòtinykeki ada Deuxu Tyytybytyhy-ò wiòhedỹỹnamy rarekeki. Timybo rarybekre. Kia waryberiti heka Deuxu bede ywidỹỹna rierykre. <sup>38</sup> Inyõ kia rityhynyòkeki, tii wile ratyhyòdỹỹòkre.



<sup>39</sup> Iribi tahe waseriòre tÿnydÿÿdumy boibekemy atxibenyke. Ixinamy rybewitxiramy iny rarybemyhÿke. <sup>40</sup> Ibutumy aõhebo botÿÿnybenykre. Òbitilemy, ywilemy.

## 15

<sup>1</sup> Aõtxi õhõtireny araijaradÿÿnykre. Kia tahe rare. Rybewihikÿ iwese adeereny retÿnynyre wese, tetyhynytenyete wese, tule tetyhynyhyy ahâtenyete. <sup>2</sup> Tai tahe tarasanawo-ki ahâtenyete rybe teeryhyy ahâtenyete ki iwese retÿnydÿÿnyre wese. Aõkõkeki arõtenareny aõtyhy aõkõ adeereny ihÿre. <sup>3</sup> Juhuutyhy adeereny retÿnynyre iwese raholare wesemy. Kia rare: Kristu iny òrarureny dee rurure. Kiamy heka ritidÿÿna roire. <sup>4</sup> Tule mana wabede-ò rahâluure. Inataõ txu idi rÿidi tahe, rubu-ribi rexixare, ritidÿÿna rarybere wese. <sup>5</sup> Rexideòsinyre Pedro dee, idi tahe waòinatxi mahâdu dee. <sup>6</sup> Idi tahe 500 iny ratyre tuu robire. Kia iny ityhydÿÿdu seriòre mahâdu ibutumy rexibutumyhyre Jesusimy robire. Ijõ rurure kia butudÿÿnay-ribi, tahe ijõ irulemy ihÿmyhÿre. <sup>7</sup> Iribi tahe Txiau tuu robire, idi tahe ierydu mahâdu ibutumy tuu robire. <sup>8</sup> Ihewo-ribi tahe jiarÿ tuu rabire. Iwese uladu ibededÿÿnanakõmy reare wese tuu rabire. <sup>9-11</sup> Jiarÿ ierydu hewo ludu rare. Uritere erydumy wanidÿÿõmy watxiwâhâre, raixÿrure wahe. Jiarÿ dori juhoo ityhydÿÿdu mahâdu aõhõkÿmydÿÿdu rare. Deuxu ruxetòenale dori aõmy watxiwâhâre. Iruketòena aõnihikÿmy waki riwinyre. Jiarÿ dori ibaturatyre aõmysÿdÿÿna rewinyre. Tahe jiarÿ aõkõ wâhâre. Deuxu ruxetòenamy wahâre jiarÿ aõbo ada tiibo ho aõbo adeereny relyyrenyete, idi kaibo ho tetyhynlyetenyete.

<sup>12</sup> Kristu rubumy roira-ribi rexixara, kiamy heka rarybemahârenyete. Aõherekibo inyõ rarybereri rurumyhyre-ribi inyõ rexixaõkremy. <sup>13</sup> Inyõ tiu rubu-ribi rexixaõkeki, Kristu tahe rexixaõre tarubu-ribi. <sup>14</sup> Kristu rubu-ribi rexixaõre wana, jiarÿboho aõmy waryberenyõna idi aõ atyhydÿÿnaõna. <sup>15</sup> Kristu inatyhymy rexixaõkeki, inyboho Deuxumy ruimy rybedu mahâdumy roire. Kristu ixixana rybemy dori jiarÿboho rarybemyhÿrenyete. Kiata bohe Deuxu, Kristu riixixanyõlere. <sup>16</sup> Rubumy roimyhÿre mahâdu rexixaõkeki, taita Kristu rexixaõre. <sup>17</sup> Kristu rexixaõkeki, ainatyhynareny aõ aõkõ rare. Aòrarudile ahâtenyete. <sup>18</sup> Tule, ityhydÿÿ-di rurure mahâdu, biu-ò ròiõtyhy. <sup>19</sup> Kabede-ki sohojile inyboho Kristu riraòmyhÿreki, inyboho bedewotyhytyhymy roire.

<sup>20</sup> Inatyhymy taheka Kristu rubumy roire-ribi rexixare. Tii juhuuludu rubu bede-ribi dòòsede mahâdumy roirekemy, tai iny tule rekekixarenyete. <sup>21</sup> Iwese hâbu sohojiõ rubu diwyde wese, tule hâbu sohojiõ rubu-ribi ixixana diwyde. <sup>22</sup> Iwese Adaõ-ki ibutumy iny rurukemy rÿimyhÿkemy tule Kristu-ki ibutumy ixixana kiditakre. <sup>23</sup> Kristu bededÿÿnana kedehemyhÿkreu, rubu-ribi ixyby ixixana kòdòhònykre. Kristu juhoo rexixare, ihewomy tahe taeryna mahâdu kidiixixanyete. <sup>24</sup> Tai tahe bede konanakre. Jesuisi ibutu wedu mahâdu, bede dinodu mahâdu, Iòlò mahâdu kanahukre. Tahe ibutumy tyby Deuxu-ò òlòna kidiõkre. <sup>25</sup> Jesuisi tahe ibutu ratyre Iòlòmymy ratxikemy rarehyete. Iòludu mahâdu ibutumy iwarawo-ki rÿikre. <sup>26</sup> Iòludu konana heka, rubu rare. Tii tule riixâwididÿÿnyete. <sup>27</sup> Ryberiti kiawese roire: — Deuxu tahe ibutumy iwarawo-ki ritidireri. Iximy ritidiõtyhy tii dori tidisidu rare. <sup>28</sup> Rexihudi tahe tule iRiòre ritidikre. Tai tahe Deuxu ibutu iòlòmymy rarekre.

<sup>29</sup> Rubumy r̄ira ixyby kedexixaõkeki aõherekibo iny deròwy teratisebenyteri, rubumy roira mahãdu hãrehek̄yle wahe. <sup>30</sup> Aõherekibo berebunatyhyhyk̄y-txi inyboho iòhãrumy ratximahãrenyre txuõ txuõlemy. <sup>31</sup> Ibututxu rubu reijemyh̄yre. Adeereny wawowydynatyhymy watzireri. Jesuisi Kristu Inynyr̄y òraru-ki. Tai heka kia lau rarybemahãre. <sup>32</sup> Hãbu mahãdu-ò Efesu hãwã-ki iròdu debure-ò aõbina wese resumahãreki aõtyhybo aritakre? Inatyhymy aõbo? Rubu rexixaõkeki, rikiroxiryrenyke, rikiõrenyke, biurasòmy dori rukururenykre. Aõ aõkõ inytyhyd̄ȳna. Kia riki ityhyd̄ȳdukõdu mahãdu tuu rexirybenyre, abiòwa mahãdukeki. <sup>33</sup> Ixi itxenad̄ȳõmy: kia biòwa bina dori iny ixihemy riatymyh̄h̄yre. <sup>34</sup> Ywityhylemy boibeke, òbitilemy òrarurenyõmy, sòwemy iny Deuxu rieryõre. Kia heka iny ix̄rud̄ȳnareny rare, tai rarybewãhãre.

<sup>35</sup> Tahe inyõ kanarybemyh̄kre: —Timybo rubu kedexixakre. Aõumywesemykre iumy? <sup>36</sup> —Itx̄yte, juhuhu alòboròna rabròõkeki tiu txuhuõna. <sup>37</sup> Telòho iny ribòrònyõtyhy, ityle iny ribòrònyke. Iwese maixõmoty ribòrònyke ada oworuty wese. <sup>38</sup> Ibututy-ò Deuxu iraty umy riwahinymyh̄yre ixideewireki. Deuxu ixideewimy alòbòròna ritxuhud̄ȳnymyh̄yre timybo? <sup>39</sup> Dee ibutumy wiwese wese aõkõ rare. Inyde, iròdude, nawiiide, uturade ibutumy tahe wiribi hitxi hitxire. <sup>40</sup> Biumy r̄ira mahãdu tule lahitxire, aõwitxira witxira bedemy r̄ira kia wowodynareny wiribi hitxire. Tii-wana wimy rahitxirananyre. <sup>41</sup> Txuu ahãdu, taina, iloosònareny wiribi hitxire. Taina ijõ taina-ribi iruxeratyhyre. <sup>42</sup> Tai tahe kia wese rubu-ribi ixixana r̄imyh̄yre. Umy rubu su-ò rahãlood̄ȳnymyh̄yre rarònyhe txu. Idi tahe irulemy kòdòhònykre, alòbòròna ruhunymyh̄yre wese tahe umy tuedeõnaõ. Bede luruhuk̄y-ki rahãlood̄ȳnymyh̄yre, tahe loosònatyhy-ki kòdòhònykre. <sup>43</sup> Iruruõ-di umy heka rahãlood̄ȳnymyh̄yre ibinare, tahe iruxeramy tarurutyhy-di kòdòhònykre. <sup>44</sup> Iny umy wesemy rahãlood̄ȳnymyh̄yre, tahe tyytyby wese kia umy-di kòdòhònykre, biuludu mahãdu wahe. <sup>45</sup> Kiamy heka ritid̄ȳna-ki roire. Iny umy riuhemyh̄reki, tule tyytyby umy riuhemyh̄remy r̄ire: Juhuhu inyiru Deuxu riwinyre Adaõ heka rare. <sup>46</sup> Juhu tahe inyumyreny tayry-di riwinyre idi tahe ritytybynyre. <sup>47</sup> Juhuhu ludu hãbu suribi ije rare. Ihewo-ribi Hãbu biu-ribi ih̄yre Kristu wahe. <sup>48</sup> Juhuhu hãbuwesemy ibutumy iny bede ludu ih̄yre juhuhu inytyhy wese wahe. Hãbu biuludu wesemy ibutumy biu ludu mahãdu ih̄yre. <sup>49</sup> Tai tahe kabede hãbu wesemy inyboho r̄imyh̄renyre wesereki, tule biu ludu Hãbu wesemy r̄yk̄irenyke.

<sup>50</sup> Waityhyd̄ȳdu Kia heka rarybemahãhyreri, iwese inyboho ih̄myh̄renyre wesemy tiu Deuxu Òlòna-ò ralòõtyhy. Iny umy heka ruruhyy umy rare, tai tahe Deuxu Òlòna ritaõtyhy, kowa-ò dori iny umy ruruõtyhy. <sup>51-52</sup> Tahe aõbo teeryõte adee arit̄nynykre: Ibutumy iny ruruõkre. Ibutumy ityhyd̄ȳdu iny ruruõòle iumy riwixirat̄myranykre, aõwesele reakre, iny tarue riberenymyh̄yre wese reakre, ikonana juròna ritxurònykre. Juròna ritxurònykre idi ibutumy ityhyd̄ȳdu rubumy r̄ira riumywitxirat̄myranykre umytuedeõna-di. Inyboho ityhyd̄ȳdu mahãdu tulekre. <sup>53</sup> Tahe rekexiwiurònyrenyke, iny bede umy dori rurumyh̄yre. Rakaumynykre umy witxira-di taita rukururenyõtyhy. <sup>54</sup> Iny umy witxiradikre, tahe kia rybe rexihumy r̄yikre: Ryberitina rarybere: —Rubu ijesu rikitarenykre: <sup>55</sup> —Aõherekibo rubu, aijesuna wawana tetaõta? Aõherekibo tiwamytxitid̄ȳnyõte? <sup>56</sup> Òraru rubumytxitid̄ȳdu rare. Bedeywid̄ȳ òraru rurud̄ȳna rare. <sup>57</sup> Deuxu umy rekealàm̄yh̄kre, tii dori ijesu inybohoreny ritakemy riwiòhenanymyh̄yre. Jesuisi Kristu Inynyr̄y-di diwiòhenanymyh̄de. <sup>58</sup> Tahe weseriòre luu mahãdu, bityhynyhybenyke,

ywihyymy ahābenyke, Wanyrỹ aōmysỹdỹỹna-ò hyy tiemy ahābenyke. Aaōmysỹdỹỹna Wanyrỹ dee, idi inydee awimy rarootinymyhỹre.

## 16

<sup>1</sup> Nierumy ararybekre. Kia bibutunykemy kowa tyhydỹỹdu mahādu-ò, Judeia mahādu wahe. Iwese Alatxia mahādu-ò ròerynanyre wese, kaiboho tule ijō dee bitabenyke. <sup>2</sup> Semana juhu ludu txuu, iny sohoji sohoji tiwesebo tōtatenyte jura birarenymahābenyke rawahikremy. <sup>3</sup> Tai adehemynykreu kia nieru rexihumy rỹikre myiōtyhy tahe ijō rarasamy. Tahe mobo kai tyryiti-di biditakre, tii-wana nieru iny ariteōnykre Jerusalē-ò. <sup>4</sup> Tahe jiarỹ arakewana iny dee wikeki, tuu wawana kodoikre. <sup>5</sup> Macedonia bede-ò arakre rahudi arehemynykremy adeereny watxireri. Macedonia-di delemy arakre. <sup>6</sup> Araroorehenykre òsana biubede taile arahukre awanarenhyhyle. Tai ele elemy biwatỹidỹỹnykre titxibo arakemy. <sup>7</sup> Deuxudeewikeki urihimyo aōkō akireny bede arieke bededỹỹnana arahukre akireny. <sup>8</sup> Efesu hāwā-ki Pentecoste woranabedehesi konana-ò ariijekre. Idi tahe arakre. <sup>9</sup> Ijòtòbònahakỹ wese irayhyky rỹimyhỹre waaōmysỹdỹỹ. Tai waaōmysỹdỹỹna irutaōre, ihāre ta wamy òludu sōwere. Namy sōwehyymy taheka òludu rỹire.

<sup>10</sup> Tahe, Tximòtxi rakeki, iixỹru lau biijemy tii dori Deuxu aōmysỹdỹỹna diwinymyhỹde wawese. <sup>11</sup> Inyō Tximòtxi-di aōmy aōkō ihỹkeki heka wadee awiōre. Wadee itỹina-ò biwiòhenanybenyke ywina-di. Reraòmahāre dori ityhydỹỹdu seriòreboho wana kanakemy. <sup>12</sup> Inyseriòre Apòlo-ò sōwemy rarybewāhāre arorarenymy rakemy ijō iny seriòreboho-wana. Tahe tii heka Deuxudeewimy aōkō idi rōhōtinymyhỹre. Idi tahe rakre ixideewimy tiu txumybo.

<sup>13</sup> Aōu aōu bexiywinylemy borukubeke. Inatyhymy òbitimy myibenyke, hābu rurutere wesemy bexirurudỹỹnyke. <sup>14</sup> Aōhebo botỹỹnybenykemy ywina-di luuna-di botỹỹnymy boibemahāke.

<sup>15</sup> Tefana, tasỹ mahādu-wana Akaia bede ludu-ki ityhydỹỹdumy juhū rare. Kia teerytenyte. Tiiboho ityhydỹỹdu mahādu wiòhedỹỹduhyymy ihỹrenyke. <sup>16</sup> Tamy boholabenyke, ibutumy tamy wityhymy biwinybenyke. Tule kia wese wiòhedỹỹdu biwiòhenanybenyke. <sup>17</sup> Tefana, Fortunatu, Akaio kaò ditehemynydenyde. Taita wadeysamy watxireri. Tiiboho riwawiòhenanyrenyke kaiboho kaki aōkō atximahātenyteki. <sup>18</sup> Tiiboho wawo-ribi riwateysadỹỹnyke, araykyreny òsỹny tule wahe. Kia mahādu heka ratyhydỹỹmyhỹke.

<sup>19</sup> Kaki Asia bede-ki ibutumy dohodỹỹna mahādu tarybe wehityhyna adeereny riwahinyreri. Akila, Prisila-wana taluuna Wanyrỹnimy rybe adee riwahinyrenyneri taheto-ki dohodỹỹnareny mahādu tule wahe. <sup>20</sup> Ibutu seriòre mahādu rybe wehityhyna adeereny riwahinyreri. Birybenybenykreu wii bimibenykre wiwetya-ki seriòrewesemy tamy luòsòna òbitityhyna-di buòbenyke.

<sup>21</sup> Iroo tahe jiarỹ ariritinykre wadebò-di wahe. Jiarỹ Paulo warybe wehityhyna rewahinyre. <sup>22</sup> Inyō Inynyrỹ luuōkeki, aōbinahakỹbo tamy kanake, ki-amy rexirybenyke: ‘Maranata’ kia heka Jesuisi wymy kanake rare. <sup>23</sup> Deuxu luuna adeereny kanakemy idi watxiwāhāre. <sup>24</sup> Ibutu-ò waluuna Jesuisi Kristumy. Kie.

## 2 Oritxi Mahãdu-ò 2 Oritxi Hãwã Dohodỹna Mahãdu-ò

<sup>1</sup> Jiarỹ, Paulo, Deuxu deòduõ watzireri Deuxudeewireki. Tahe katyryiti rewahinyrenyre Oritxi hãwã dohodỹna mahãdu-ò. Iny seriòereny Tximõtxi wawana ihỹre. Tule rewahinyrenyre ibutu ityhydỹdu mahãdu roholakemy Akaia bedeki. <sup>2</sup> Ruxetòena, ywina-wana adeereny kanakemy idi watzireri Deuxu inybyrenyre-ribi Jesuisi Kristu Inyry-ribi.

<sup>3-4</sup> Deuxu heka Jesuisi Kristu tyby rare. Iny wiòhedỹdu ihỹre. Ruxetòena sòwemy inydeereny riwahinymhỹre. Ibutumy aòmydỹna-di riwiòhenanymhỹre. Tai tahe iny witzira rikiwiòhenanyrenykre Deuxu wiòhedỹna-di. <sup>5</sup> Iwese Kristu aòhòkỹmy dỹnana kaiboho teerytenye wese, Kristu wiòhedỹna bitamy bierybenyke. <sup>6</sup> Jiarỹboho aòhòkỹmy arotỹnyrenykre, awiòhenadỹnyrenykre tuukre. Tai tahe tarasana iribi bitake. Deuxu-ribi wiòhedỹna arimynykeki, kia biu-ò hena iribi bimyke arawiòhenanyrenykre. Tai tahe kaiboho arururenydikre aòhòkỹmy botỹnybenykre. <sup>7</sup> Tahe wararòsòna sòwemy ihỹre akireny. Tiubo aòhòkỹmy dỹnanamy botỹnybenykre tule wiòhedỹna bitabenyke iwese aritarenykre wese. <sup>8</sup> Waityhydỹdu seriòre, Asia bedeki jiarỹboho sòwemy aòhòkỹmy ratỹny roiremahã. Wadeereny heka isiratyhyre ibedeki. Tai heka raberumy roiremahã arururenyke lau. <sup>9</sup> Rahòtinyrenyre tai wakonanareny sana. Kiamy heka wadeereny ditỹnynde bederynamy: ixi-di inyõ nohòtiõmy, Deuxudihyyle wahe. Tii dori rubu-ribi ixixadu rare. <sup>10</sup> Inatyhymy tii riwatarenyre kia brebuna-ribi. Ibutu aõna aõna-ribi riwatarenykre ixityre. <sup>11</sup> Kaiboho dori wadeereny Deuxu-ò texitòenytenyteri. Tahe ibutumy ixitòena-ò Deuxu kodoholakre tai riwiòhenanykre. Tahe ibutumyiny Deuxu riteàlananykre.

<sup>12</sup> Ibutumy jiarỹboho heka kia Deuxudeewimy rewinyryrenyre. Tai heka wadeysarenyre jiarỹboho. Awanareny heka tule rarybemahãrenyre: òbitinamy, Deuxu rurunamy. Iny raykywydyna-di aòkõ wahe, Deuxu raykywydyna-di. <sup>13-14</sup> Idi mariakele, biritinykele, bierykele, kia reritinyrenyre adeereny. Wiji urihimyõle teerymy toite. Jesuisi txu tahe ibutumy bierybenyke. Jiarỹboho areysarenykre bierybenykeki wahe. Tule kaiboho beysabenykre.

<sup>15-16</sup> Juhuu rahòtinyre kiawesemy: arakemy ixi-di rahòtinyre. Juhuu heka Macedonia hãwã bedeki arakemy ixi-di rahòtinyre. Iule tahe aroramy arakemy heka ixi-di watxiwãhã. Òkesu tasỹ tule, aroramy adehemynykre. Tai wiòhena inatximy bitake. Jiarỹ ayrenymy areakre, Judeia bedeki arakemy kaiboho biwawiòhenanybenykeny. <sup>17-18</sup> Reòsamy watzirerimy aõbohe wadi tahòtinytenyteri? Ixiòrarukile aõbohe tuuremy adee araỹraxikre? Tuu aõbo iximy rarybere kohe, myỹ, iule. Aòkõre, myy rarybere, iule wahe. Inatyhymy aõbohe rarybereri. Aòkõre rarybeõre. Jesuisi Kristu heka warybe rieryre. Kohe, myy, iule. <sup>19</sup> Tai heka raryberenyre: —Inatyhy rare. Myỹ wahe, Deuxudeewinamy. Sila Tximõtxi-wana kia Deuxu rybe-di adeereny ritỹnyre, Jesuisi Kristu iriòremy, jiarỹ tule adeereny kia retỹnyre. <sup>20</sup> Inyboho ratximyhỹre Jesuisi Kristu-ò. Kristu heka Deuxu widỹdu ratzireri. Inyummyreny ratximyhỹre. Deuxu heka tuu iny rierynanymhỹrenyre, tii inatyhy. <sup>21-22</sup> Tii heka iny ritamyhỹrenyre; rihitximyhỹrenyre; tahõrõ mahãdumy riwinyre.

Inydeereny riwahinyre Deuxu Tyytybytyhy inyworeny-ò risỹnyre. Tai heka inyboho rōhōtinyrenyrene inydeereny ibutumy riwahinykremy.

<sup>23</sup> Deuxu heka warayky rieryre. Tai heka rarybemahāre, inatyhy raōre Oritxi hāwā-ò. Tai heka adiride ixinamy. <sup>24</sup> Araryberenyōtyhy jiarỹboho aōbo bityhynybenykemy, marybebenykemy. Kaiboho dorihe inatyhyna tetyhynytenyte. Urile tahe arawiōhenanyrenykre deysana-di Deuxu Tyytybytyhy dee deysana-di.

## 2

<sup>1</sup> Tai wawo rerahòrera. Arakemy aōkō abedeòtiidỹnyrenymy ixityre. <sup>2</sup> Arabedeòtiidỹnyrenykeki tahe mobo riwateysanykre. Kaibohole toite. <sup>3</sup> Tai adeereny reritinyre. Anaōtyhy heka abedeòtiidỹnyrenymy. Kaiboho dori deysana-di biwasỹnybenyke. Iu wadeysamy watxireriu, kaiboho tule beysabenykre. Kia heka reerywiwire jiarỹ. <sup>4</sup> Adeereny reritinyre bedewona-di ranywāhāu; warube rytynymahā. Bedeòtiidỹnyna-di arasỹnyrenykemy aōkō kỹny. Tahe timybo aluurenymy kaiboho bierybenykemy adeereny reritinyre.

<sup>5</sup> Bedewonamy relyykeki, tiu inyō wii ribedewonyreu, riwabedewonyōtyhy. Aōtxi arabedewonyrenyrene. Waryberiti isirare aōkō ihỹre. <sup>6</sup> Aōhōkỹmy dỹnyanamy yla aōkō rotỹnyre. Tai ixinamy rarekre wiji. <sup>7</sup> Wiji tahe iwitxira aōmydỹnyana biwinyke: biwiōhenanyke iixāwididỹnyadikemy. Tai tahe bedewona-di sōwetyhymy riatyōtyhy bedewona-ribi wahe. <sup>8</sup> Tii luunatyhy-di bierynanybenyke.

<sup>9</sup> Tai heka adeereny ònosōna rewahinyre. Tai juhūu waritidỹnyna adeereny rewahinyre. Jiarỹ heka kaiboho rexiywinyry aōbo atxitenyterí ityhydỹny-ò. Kiamy adireny watxireri. <sup>10</sup> Kai biixāwididỹnykeki heka, jiarỹ tule ariixāwididỹnyke. Kia adeereny rikiwinyrenyke Kristu òraru-ki. <sup>11</sup> Tahe Satanasi tiu iny riatyrenyōtyhy. Inyboho rieryrenyrene tii kia riwinykemy riwisỹnymyhỹré.

<sup>12</sup> Jiarỹ heka ròirenyre Troaji-ò Rybewihikỹ tỹnydỹny Kristuni-di. Tamy retehemynyreu, isiraōlemy tai Rybewihikỹ dohodỹny, Inynyry riwawiōhenanyre wahe. <sup>13</sup> Tahe wabedewomy watxiwāhā inyseriòrereny Txitu-ki rahaōrekí. Tai tahe kia iny mahādu reteōwarinyre arakremy Macedonia hāwā-ò rare.

<sup>14</sup> Tahe Deuxu deysana! Deuxu-wana watxiwāhārenyrene. Tahe kia ijesu tai ritake. Kristu heka ridykre ijesu tarasadu mahādu. Rokoirenykre heka ihe-ki. <sup>15</sup> Iwese aderòna lỹnyrehekỹ ibutumy idi riālānymyhỹre wese heka, kia wese inyboho roire. Ibutumy iny rierykemy heka ityhydỹnydu mahādu rỹrerimy ihỹre. Lỹnyrena wihikỹ Kristu ritoonyre wese Deuxu-ò inyboho roire. Iny lỹnyrena wese heka rare. Ityhydỹnydu, ityhydỹnydukōdu mahādu-ò ramyhỹre. <sup>16</sup> Kia rityhynyōmyhỹre mahādu tahe, tỹnyre rirubunyrene. Rityhynymyhỹre mahādu tahe tỹnyre iruweselemy rare. Kia aōmysỹdỹny biwinybenyke. Isirare heka iaōmysỹdỹny. <sup>17</sup> Inyboho heka sōwemy inywese aōkō iny roire. Iwese iny riwymyhỹre aōdwyriòre idi ijohomy, kia wese karybe rare. Kia Deuxu deòdu mahādu heka iòwydimy aōkō rybe riwymyhỹre. Tahe inyboho heka inatyhymy rarybemyhỹrenyrene. Deuxu dori inydeereny rarybere òbitinamy. Riwateōnyrenyrene òbitina-di araryberenykemy.

## 3

<sup>1</sup> Timyre heka tyyriti ritididỹnynamy raruōhyymahārenyrene jiarỹboho awirenyremy. Tahe waribireny tule aribireny kia Ritidỹny arihurennyōtyhy.

<sup>2</sup> Kaiboho heka Kristu tyyriti wese aōma toite. Riritinymy heka

roimyhÿre inywo-ki, inyrayky-ki. Idi riramy kaiboho burubenykeki, aõbo kaiboho tewinymahãte heka tamy betehebonyke. Tai tahe rieromy idi rariake ixideele. Idi rariake hãre tahe idi rexibedeerynyke. <sup>3</sup> Kaiboho heka Kristu tyyriti wese heka toite. Inydeereny iwahidÿÿmy heka tii rare. Kia tyyriti wixiramy rare. Aõ ritidÿÿna manamy aõkõ riwinyreri. Deuxu Tyytybytyhy-di tahe riwinyreri. Aõ manatyre-ki aõkõ ròritidÿÿreri inyraykyreny-ki, inyworeny-ki ròritidÿÿmyhÿre. <sup>4</sup> Deuxu heka retyhynmahãre, Kristu òraru-ki wahe. Tai tahe tuu raryberenymahãre kiawesemy. <sup>5</sup> Jiarÿboho heka warururenyõhyyre kaa aõmysÿdÿÿna widÿÿna-ò. Iny ruruna heka Deuxu-ribi sohojile nade. Tii iny wiòhedÿÿdu, aõ iny rikiwinymyhÿrenyke-ò wahe. <sup>6-8</sup> Irybe tÿmyra dohodÿÿdumy heka inyboho roire. Ihetxiu bede ywina wesemy aõko heka ròritidÿÿre Deuxu Tyytybytyhy ihÿre. Ihetxiu bede ywina heka rubu diwyde. Deuxu Tyytybytyhy iruna riwahinyre. Ihetxiu heka manatyre-ki ròritidÿÿre. Deuxu loosona tule ròhònyre, riwahinyreu wahe. Moisesi òsÿny-ribi sòwemy loosona ròhònyre. Idi tahe riixãwididÿÿnyre. Tahe judeu mahãdu reteheòhyymyhÿre iòsÿny-ò, iòsÿny loosonadireki. Deuxu Tyytybytyhy heka iratyre awimy rare, iny-ò dori Deuxu irutyhy riwahinyre. Tahe bede ywina nade loosona wiwihikÿ-di bede ywina tÿmyra tahe iratyre awi rare. <sup>9</sup> Tii heka iny-di ixãwikemy ratxireri. <sup>10</sup> Tahe iratyre rybe tÿmyra rare. Iny òraruna-di ixãwikemy ratxireri. <sup>11</sup> Kia urihimyò rÿire awi rare. Iratyre tahe umytuedeõna rare.

<sup>12</sup> Iny raròsòna sòwemy ratximyhÿrenyre. Tai tahe inyboho ruberuòhyymyhÿrenyre. <sup>13</sup> Moisesi wesemy aõkõ rakatximyhÿrenyke. Imahãdu rayktxymy dori rÿirenyre. <sup>14-15</sup> Imahãdutxymy dori rÿirenyre. Moisesi bedeywina-di rariakeki, irayky ritòbonyke. Kia rieryõrenyre iraykyreny ratxynymyhÿrenyremy. <sup>16</sup> Kristu rityhynyre xiery, irayky raraymyhÿre. Iwese Moisesi òsÿnytòbòna iòsÿny-ribi resere wese kia rare. <sup>17</sup> Kia Tyyriti-ki Inynyrÿreny heka Deuxu Tyytybytyhy rare. Tikibo Deuxu Tyytybytyhy rÿikeki kowa ibutumy iny ixinamy rÿike. <sup>18</sup> Tahe ibutumy inyboho heka Deuxu wowydyna iny òsÿnÿreny-ki ijòdire. Iwese iny òsÿnyreny itxena-ki iny retehemyhÿ wese, Deuxu wowydyna ibutumy robimyhÿke iny òsÿnyreny-ki. Inynyrÿ he Deuxu Tyytybytyhy rare. Iribi tahe wowydyna nade. Kia wese inyboho heka Inynyrÿ wesemy relemyhÿrenyre. Inihikÿmy delemyhÿdenyde. Tii dori iny woreny-ki raaòòtaòtamyhÿre.

## 4

<sup>1</sup> Deuxu taruxetòena-di heka kia aõmysÿdÿÿna inydeereny diwahinyde. Tai heka ikonanakòdumy idi rakatximyhÿrenyke. <sup>2-3</sup> Ibutumy heka rikiwinymyhÿrenyke aõbo òbiti rare. Aõbina binahakÿ widÿÿ-ò heka rekexijerenyke aõbo òbitirele heka rikiwinyrenyke; rikiwiurònyrenyòtyhy heka Deuxu rarybereriki, tuu. Deuxuruòhyyle rikiwinyrenyke. Inatyhyna loosona-ki heka rakatxirenyke. Ibutumy heka rikiwinyrenyke ibutu itxerena òbitimy wahe. Inyboho ritÿnynymyhÿre Rybe tymyra wihikÿ. Inyò-ribi riwòmy roimyhÿkeki tahe kia rityhynyòmyhÿrele tuu ritidimy roike. <sup>4</sup> Kiakeki tahe Satanasi iitxeredÿÿ-ò riijònyreri loosonamy robike lau. Deuxu binadÿÿna rare. Ibinadÿÿdu wesemy ratxireri. Kaa loosona-ò iny riitxeredÿÿnyhyymyhÿre aõma Rybewihikÿ tÿmyra-ò. Rarybemyhÿre dori Kristu heka Deuxu yrubule rare. <sup>5</sup> Iximy aõkõ rarybemahãrenyre. Inynyrÿ Jesuisi Kristulemy heka rarybemahãrenyre. Inyboho heka deòdumy inyboho ratximyhÿrenyre adeereny. Jesuisi òraru-ki kia rewinymahãrenyre. <sup>6</sup> Juhuu Deuxu rarybere: —Bedeluru-ribi heka loosona doosòmyhÿde. Tii heka loosona-di

inyraykyreny ritoosònanymyhÿre. Tai heka iny Deuxu erysydÿÿna inyboho rieryreny. Kristu òsÿny-ki sohojile tuu rokobirenyke.

<sup>7</sup> Kia heka aõna aõna wiwi inydeereny heka rare. Ihyna òwy riòre wese my inyumyreny ratxireri, butxi weselemy wahe. Tai heka Deuxu sohojile irurudire, inyboho aõko irurudire. <sup>8</sup> Ihãrele heka aõbo iny riwinyke rieryõhymyhÿre timybo aõ iny riwinyke heka. <sup>9</sup> Aõhõkÿmy dÿÿnana heka inydeereny rehemynymyhÿre tai inyboho ikyhynamy riemyhÿreny. Inyboho heka bedewodihyy ratximyhÿreny, tahe tiemy iny raròsònarenidyhy inyboho ratximyhÿreny. <sup>10</sup> Inyboho heka itxi tõhõti reahyy inyboho ratximyhÿreny, Jesuisi rubuna-txi wahe. Kaki tahe iwese Jesuisi raremyhÿ wese heka rakatxirenyke. Tai iny witxira heka tuu robikre kiamy, Jesuisi rirudÿÿnanamy. <sup>11</sup> Jesuisi òraru-ki heka brebunahakÿ-ki inyboho roire. Kia wese-ki heka iny Jesuisi runamy robikre inykireny. <sup>12</sup> Kia-ki heka iny rubukonanareny inykireny rare. Tahe iruna akireny tule ratximyhÿre. <sup>13</sup> Kiamy heka Ritidÿÿna roire: —Jiarÿ retyhynyre. Taita rarybere: —Kia weselemy roire. Retyhynyrenyri tai heka jiarÿboho tule raryberenyri. <sup>14</sup> Jesuisi ixixadÿÿdu heka rare. Kaa tule inyboho tule riixixanyrenyke. Rikirònyke heka Deuxuko-txi. Kaiboho tule boibenyke wawanareny. <sup>15</sup> Jiarÿ wawanareny kia adeereny relere. Tamy Deuxu ruxetòena sòwetyhymy ramyhÿre-wana heka riwahinymyhÿre iratyre sòwetyhymy tamy deàlana riwahinymyhÿre. Kia heka Deuxu wowydyna-ò tuu ratximyhÿre. Bedewoõmy.

<sup>16</sup> Iny bedewonaõhyyre heka. Iny umyreny retybynyre. Txuõ txuõlemy heka ratÿmyranyke inywo-ki. Tiie heka aõbo rierynyre inatyhy wahe. <sup>17</sup> Iny bededÿÿnanareny heka urihimyoòle roimyhÿre. Iny wowydynarenyko-ki heka aõhõkÿmy dÿÿnana inyboho ritarenyke inydiyreny retehemyhÿre. Retyhenyreny wowydyna-ò awityhyreny inyboho idi retehemyhÿre iny idi retehõmyhÿredi. <sup>18</sup> Aõbo iny tuu robimyhÿre bede bedemy tuu iny robimyhÿre ibutumy idi reamy. Aõbo iny tuu robiõmyhÿre heka tiu itueõtyhy. Kia-di tahe inyboho rõhõtinyinymyhÿre.

## 5

<sup>1-2</sup> Inyummy tÿmyrahakÿ heka inydeereny kidiwahinykre Deuxu, iwitxira biu bede-ki wahe. Aõ hãbu wahisidÿÿna-ki aõkõ Deuxu-di wahisidÿÿna-ki heka tuukre kia umy tÿmyra wahe. Tiu heka itueõtyhy. Rakabedeworenyke heka bede-ki iny telesòreny-ki rasÿnyreki inywo-ki wahe. <sup>3</sup> Inyboho heka biubede-ki inysÿreny inyummytÿmyra-ki ròkõhõtinyinymyhÿrenyke. Kaa iny umyreny wahe. Rabedewomymyhÿreny. Umy tÿmyraõ heka rikitarenykemy inyboho ratximyhÿreny. <sup>4</sup> Aõherekibo inyboho wiji rabadeworenyre? Inyboho heka Deuxu bedewihikÿ-ò aròirenykekõ aõbo? Inyreny rikitarenykemy aõkõ wiji. Kaki aõhõkÿmy dÿÿnana riwawobededÿÿnyra. Kia aõbo umy tÿmyra tyre tahe rikirutyrenyke ijõ wahe. Ijõ rikitarenykre umytuedeõnaõ. Tiu itueõtyhy. Kia riwinyre inydeereny kia wahe. <sup>5</sup> Deuxu dori tuu rarybereri inydee riwahinykemy. Tatytybytyhy dori diwahinyde diteòsinyde. <sup>6</sup> Kia iwese juhoo rarybere wese heka tuu rotÿÿnykre. Tai heka inyboho teysamy ratximyhÿreny. Kabede-ki inyboho ratximyhÿre heka inyummyreny ratximyhÿre heka aõ Inynyrÿ-wana aõkõ ratximyhÿre. <sup>7</sup> Tiu heka rokobirenyõtyhy rikityhynyrenykekile ka idi rakatxirenyke. Inyboho rieryreny timybo rarekre wahe. <sup>8</sup> Jiarÿ wadee awire kabede-ribi arexitake Deuxu-wana arasÿnyke wahe. <sup>9</sup> Aõma tamydeewimy heka tuu iny riwinyke wahe iny-wana rasÿnyke. Kaki iny ratximyhÿre tahe aõbo awire heka tamy awire. <sup>10</sup> Inydiyreny retehemyhÿre. Aõbo inyboho riwinymyhÿreny. Aõbina bina rikiwinyrenyke heka

aõhõkỹmy dỹỹnana inydeereny riwahinykre. Aõwihikỹ riki rikiwinyrenykre wana tasỹ. Aõbo awityhy inydereny kidiwahinykre.

<sup>11</sup> Inynyrỹ heka inyboho rityhynymyhỹre. Tai inyboho iny witxira-ò tuu sõwemy relyymyhỹreny. Ibutumy heka Deuxu iny rierymyhỹreny. Kaiboho heka tule tiwaerymahãteny. <sup>12</sup> Kia heka reraõmy watzimyhỹreny biwaerybenyke. Ararybeõtyhy heka adeereny jiarỹ awiremy. Tahe wadee ka awire kaiboho waluurenyke. Hãbu iumyle awimy rỹirerimy ihỹremy idi rõhõtinyinmyhỹre. Tii heka õbiti aõkõ rare. Kia biwyõnybenykemy adireny watzireri. <sup>13</sup> Juhuu iny rierymy itelesõ. Inymyreny rarybekeki itxỹtemy inyboho roiremy. Rakaryberenyke heka aõbo inyboho dori Deuxu dee. Aõmysỹdỹỹrenymyhỹreki inydireny rõhõtinyinmyhỹre. Inymyreny rarybekeki inyboho awilerenyremy. Iõrarurenymy-ki tuu rakatxirenyke. <sup>14</sup> Kristu luuna heka kiamy iny riraykydỹỹnymyhỹre. Tii heka rurure iny ibutudee. Tii rurureu, ibutumy inyderõwrenymy rurure. <sup>15</sup> Rurure heka aõma iny ixidee sohojile irumy rareke lau. Kia tako-ò rakreu tamy heka irumy rakre. Tamy dori rurure tai rexixare rubu-ribi. <sup>16</sup> Rakaraykynyrenyke timybo hãbu awiré, ibinaré. Kaimy heka rakaraykynyrenyke. Aõ iwese iny witxira raraykynymyhỹre wese aõkõ raraykynyrenyke. Aõma inyboho aõbo Jesuisi Kristu-di raraykynymyhỹre heka. Ixityre aõbo tuukre. <sup>17</sup> Tii heka umy tỹmyra tuedeõna-di ratximyhỹre iwitxira ratximyhỹre. Juhu iaõmydỹỹnana iribi ixãwira. Tahe wiji raraykywydynanyre iwitxiramy. Ibutumy iaõna aõna ihetxiu heka rawitxiranyre, awi-ò. <sup>18</sup> Deuxu heka ibutumy kia riwinyre tamy. Inyboho heka iõludu roire, juhuu wahe. Wiji tahe iliinamy ijoj ratximyhỹre. Iny witxira heka iliinamy rarekemy idi watxiwãhãre. <sup>19</sup> Wiji tahe timybo Kristu rarybekremy heka adeereny rarybereri. Aõma Deuxu kia liinamy rarekemy wahe. Ixinamy Deuxu. Ka Deuxu aõ anaumywitxiranydenyke. Kia Kristu õraru-ki tuu ratximyhỹre.

<sup>20</sup> Jiarỹboho Deuxu deõdu roire. Tai Kristu derõwmy adeereny rarybereri: Iluuna ixidee ixiby bimybenyke. Wii biwowixinybenyke. <sup>21</sup> Deuxu heka iny õraruna ritidire Kristu tyre-ò. Kristu inyõrarunarenymy riwyre. Wiji tahe Deuxu õbitina inydeereny riwahinymyhỹre.

## 6

<sup>1</sup> Jiarỹboho tahe raaõmysỹdỹỹnyrenyke Deuxu dee. Deuxu ruxetõena dori tetateny, tai idi mohõtinyinbenyke, õhõtirenymy-ribi losaõmykemy. <sup>2</sup> Boholabenyke aõmybo Deuxu rarybereri. Jiarỹ heka aluurenyre iurenana tahe ka arybe-ò raholareri. Arawiõhenarenymy iu wadee textidõnyteu, wadee taryteu. Boholake wiji heka bitabenyke Deuxu ruxetõena. Wiji heka biu-ò hena txumy bede rỹire. <sup>3</sup> Inyõ iny aõmysỹdỹỹnarenymy ibinamy rarybekeki, uritere ijõ iny bedeworenyõmy, jiarỹboho õraru-ki. <sup>4-5</sup> Jiarỹboho dori Deuxu deõdutyhy roire. Tai rikiteõsinyrenyke ibutumy aõbo inyboho dori Deuxu deõdu roire. Tai riteõsinyke ibutumy aõbo iny riwinymyhỹke. Aõna aõna rikiteõsinyrenyke. Òhõte wakireny rỹimyhỹre. Rõtenawo-ò ralõmyhỹreny. Bedeweweky-ki aõhõkỹmy ratỹỹnymyhỹre. Sõwemy heka reõludunymy aõnana bina binahakỹ reõludunymy. Aõ õta õta reõludunymy. Sõwemy heka raaõmysỹdỹỹnynihikỹreny. Sõwemy heka aõmysỹdỹỹnadikre; tỹikõ bede reijereny; byreõmy bede reijereny; <sup>6</sup> õbitimy heka rewinyreny. Aõma, ywiny-di ròwidỹỹreny bedeeryna-di. Ka roirewãhã iny iwitxira rewiõhenanyre. Ibutumy kia rewiõhenanyroirewãhã. Deuxu Tyytybytyhy heka wawanahy roiremyhỹ. Luuna heka inydee reteõsinyreny Inatyhyna rybe heka retỹnynymahãreny. Sõwe heka ritỹnynymy, jiarỹboho Deuxu deõdu



roire wahe. <sup>7</sup> Òbitina dori wadebònareny wese rare Satanasi itxemy. Jiarýboho heka remymahãreny aritarenkyemy. Tule iny rexiijemyhýre òbitina-di. <sup>8</sup> Ijõ heka waluurennyre inyõ tasý aõbina binahakýle wadee riwinymyhýre. Ijõ heka Rybewihikýmy wadee raryberemyhýre. Ijõ tasý rybe binamy wamyre, raujõmo. Inatyhyna rarybemyhýre. Tai wamy ruidu riwaninimyhýreny. <sup>9</sup> Ibutumy heka iny riwayreny. Tahe rieryõhyemy heka inatyhy rare. Watxiwãhãreny rubu wese ihãre tahe warumy watxiwãhãreny. Tiiboho heka rubu wesemy iny direny ratximyhýreny. Aõhõkýmy ratýnyreny hãre raruõhyemy watximyhýreny. <sup>10</sup> Aõna aõna heka bedewonihikýmy rõhõnyre. Tiiemy wadeysahyy watxiwãhãreny. Jiarýboho heka urimynodule watxiwãhãreny. Ibutumy inyboho rityhydýnyreny. Aõhomy aõkõ inyboho ratximyhyreny tahe ibutumy iny dire roimyhýreny.

<sup>11-12</sup> Tahe kaiboho ityhydýdu seriõre mahãdu Oritxi hãwã-ki. Jiarýboho heka kaa òbiti-my aõna aõnamy rarybemyhýre. Kaiboho heka ijohona derarennyre aõmybo rarybemyhýreny. Jiarýboho heka aluurennyre. <sup>13</sup> Kai wariõre wesemy adee rarybereri. Umy iwese jiarý aluure wese, kai waluurennyre.

<sup>14</sup> Boholabenyke warybereny-ò ityhydýdukõdu mahãdu-wana aõmysýdýnyreõke. Timybo òbitinaõ heka aõbinaõ-wana raaõmysýdýnyre. Timybo heka loosõna bedeluru-wana ratxike? Aõkõre! Tiu wiwana rauriõtyhy. <sup>15</sup> Satanasi heka Kristu-wana raaõmysýdýnyreny. Ityhydýdu mahãdu wiwesehyyle raraykynykemy rýira. Ityhydýdukõdu mahãdu-wana tahe wiraykyweseke aõkõre. <sup>16</sup> Deuxu aõmysýdýnyre heka iwitxi rare, suritxoo aõmydýnyre-ribi, wahe. Kaiboho heka Deuxu dohodýnyre ijoimy toite Deuxu oworeny-ki ratximyhýre. Deuxule heka kawesemy rarybere: —Jiarý heka wasý ariwinykre ayreny-ki. Jiarý iDeuxumy aronykre tiiboho waijoimy. Rorokurennykre. Tai tahe Inynyrý rarybere wiribi bihitxinyke. Inybina-ribi bexihitxinybenyke.

<sup>17</sup> Bexiebenyke òbitikõre-ribi wahe. Uritere tamy adi rexihumy, ixierya aramynnykre ixidee wariõre wese.

<sup>18</sup> Warurutyhymy adee rarybere. Boomy heka adireny ararekre, jiarýle wahe. Deuxu rurutere rare Jiarý.

## 7

<sup>1-2</sup> Deuxu ibutumy tuu rarybere: —Kai ityhydýdu waseriõre mahãdu. Tai tahe rikexiõbitinyke ibutu aõmydýnyre-ribi. Iny umyrenny-ki roko-birenyke inyumyrenny-ki. Òbitimy heka rakatxirenyke iko-ò, Deuxuko-ò. Aõma waluumy heka atximahãbenkyemy rahõtinywãhãreny. Iny-ò aõ bina bina rewinyõhywãhãreny. <sup>3</sup> Tuhe kaa rarybere tahe ixityre anarybekre. Aluurennyre jiarýboho ibutuhyye ratximyhýre iny rummy ratximyhýre hãre tasý rukururennykre tulekre. <sup>4</sup> Wadee heka awire ibutumy kaiboho ratximyhýreny. Kai aõwixira wixira wadeereny rýira umy retyhynnyreki. Isirare heka wadee kia ratximyhýhãrele Wadeysatyhymy heka watxiwãhãre, wiõhedýtyhy òraru-ki, ijyy òraru-ki.

<sup>5</sup> Jiarýboho rethemynnyre Macedonia bede. Taita tule elehynaõhyre wadereny. Ibutumy heka aõna aõna, òta òta wixira wixira; bede bede ihyemy aõkõre rýire tai. Aõma bedewonihiký heka watelesõrenny-ò ralore. <sup>6-7</sup> Deuxu riwawiõhenanyrennyre; Txitu diteõnyde wadeereny. Tii rybereny heka awiremy kaiboho. Tai tahe reysarennyre jiarýboho. Kaiboho tabedewomy atxitenyteri waðraru-ki. Katahe wadeysa nihikýmy

watxireri. <sup>8</sup> Adeereny warybetyyriti rewahinyreki tabedewomy atx-itenyte. Tai tahe reysamy watxireri. Ihãrele heka tyyriti adeereny arawahinykre. Kaiboho heka tabedewotenyte iribi tahe aõmydỹña kaiboho tewitxiranytenyte teòbitinytenyte ibutumy. <sup>9</sup> Tai tahe jiarỹ reysamy watxireri. Aõbinare dori rewinykõre arawiòhenyrenyre heka. <sup>10-11</sup> Deuxu heka iny ribedeòtiidỹnymyhỹre iny ywimy riraykydỹnykemy. Kia kidiwymyhỹke inydee tarasana wahe. Tii heka awire. Ijõ bededeòtiidỹ tahe bede ludu bede òtiidỹ. Kia tahe rubu diwymyhỹde. Kaiboho heka tabedeòtiidỹnymyhỹtenyte. Deuxu heka kia riwinyre awiòhedỹnyamaõma kaiboho awirenyre. Aõ witxira witxira sõwemy akireny rỹireri, aõ òta òtareny. Kiadile tahe aõma òbitihyymy òhò ayreny-ribi kaiboho heka taykarananytenyte. Kaiboho heka waluudumy teletenyte. Kaiboho biwinybenykemy aõbo òbitimy ratximyhỹre iwidỹmy tarotenyte. Ibutumy heka òbitihyymy rarekemy idi tetehetenyte. <sup>12</sup> Tai kia tyyriti adeereny rewahinyre. Aõ kia rewinyre heka aõ iny iòrarudikekile aõkõre rewinyre. Idi aretehekemy heka. Kaiboho waluurenytyhyre aõbo òraru-ki wahe. <sup>13</sup> Tai heka wadeysamy watxiwãhãre. Aõ inyboho sohojile aõkõre teysa ratximyhỹrenyre. Txitu tule teysamy ihỹmyhỹre, kaiboho tawiòhenanyteki <sup>14</sup> Tu heka rarybere adeereny kaiboho dori awimy tai tahatenyta awityhy. Adeereny heka inatyhyhy rarybemahãrenyre, inatyhynamy. Tule mobo rarybere Txitxu-ò. Ka tahe inatyhy rarybemy ratximyhỹre. <sup>15</sup> Tai heka Txitu kia luuna heka aõnityhymy akireny rare. Itxi heka tõhõti akireny aõma Deuxu tetyhynymahãte-txi. Kaiboho tedytenyteki. Ihãrele urihimyò ruberumy ratximyhỹ. <sup>16</sup> Reerymahãre jiarỹ kaiboho òbitimy boibekre. Tai wadeysamy watxireri.

## 8

<sup>1</sup> Deuxu ruxetòena-ki heka sõwemy riwinyre Macedonia dohodỹña mahãduy-ki wahe. Jiarỹ tuu arelyykemy idi watxireri waseriòreboho. <sup>2</sup> Sõwemy heka iaõna aõnareny iaõòtaòtarenyre tiiboho. Aõhõkỹmy rotỹnyreri tiiboho. Ihãrele ka deysamy heka relerenyre. Reysareny heka. Tiiboho heka iaõkõrenyre. Aõhohomy aõkõ heka roiremyhỹ. Kiahãrele heka sõwemy riwahinyre tamahãdu wiòhedỹmy. <sup>3-5</sup> Riwahinyre heka sõwemy ixideewimy. Sõwemy riwahinykelemy wadee rarybere. Tiiboho heka sõwemy wiòhedỹmy rurumy roiremyhỹ. Tai inyboho ribedeòtiinyre sõwereki. Kia judea bede, dohodỹña mahãdu, kia wiòhedỹmy. Juhu heka tiiboho rexiwahinyrenyre Inynyrỹreny-ò. Tule Deuxu deewina inydee riwahinyre. Iny wiòhedỹnarenymy rexiwahinyre. <sup>6</sup> Tai tahe jiarỹ rarybereri Txitu-ò: —Kai biwiòhenanykemy iaõmydỹnareny-ò. <sup>7</sup> Kaiboho heka sõwemy tetyhynyteri. Kaiboho heka Deuxumy awimy tarybemyhỹtenyte. Kaiboho heka teerytenyte Deuxu aõmydỹnana. Kiaboho heka waluureny waluuurenymy boibeke wawiòhedỹdurenre. Biwawiòhenanybenyke. Tai heka sõwemy bexiòlòdỹnybenyke adireny watxireri. <sup>8</sup> Aõ bede ywinaõ heka adeereny rewahinyõhyreri. Arierykemy heka idi watxireri timybo aluuna ratximyhỹremy. Tii riteòsiny heka timybo ijõ dowiòhedỹmyhỹdemy. Tai tahe iwese tii rotỹnyre wese kaiboho tule botỹnykre. <sup>9</sup> Deuxu ruxetòena teerytenyte, Jesuisi Kristu ruxetòena wahe. Tii heka ityhy rare. Tii rikòdỹnyre heka aõrarurenre-ki. <sup>10</sup> Taihyky tetyhynytenyte Deuxu aõmydỹnana-di. Kiamy heka raraykynyneri. Arawiòhenanykemy heka adireny rahõtinyre kanau bedeu. Tewiòhenanytenyte inatyhymy. Tai tahe bikonananybenyke kia kanau bedeu tewinytenyte heka bikonananybenyke. <sup>11</sup> Aõma ireiõno, uriõno biwahinybenykeki, Deuxu heka rimyke. Kia-di

rõhõtinyke. <sup>12</sup> Kia uriõnomy idi teywinymy atxiteri-di rõhõtinyke. Tamy wahidỹỹmy aõkõhyykeki tahe Deuxu aõma raraykynyõtyhy. <sup>13-14</sup> Jiarỹ heka isiramy adee ariwinyõtyhy aõ. Kaiboho heka sõwemy kaa wiji toite, Tai tawowi-di inyõ ròõkeki, taaõnasõwe myna Deuxu-ò riwahinykre. Iaõkõkeki tai ibinamy Deuxu rahaõtyhy. Tai biwiõhenanybenyke heka ihoõmy rỹira mahãdu. Jiarỹ heka aõ retõenyneri aõkõ rare, biwahinybenykemy. Kai ihoõmy atxikeki tahe, tule inywitzira anawiõhenanykre. Taita wiwanale wiwesehyyle rõhõnykre. <sup>15</sup> Kiamy heka Tyyriti-ki Ritidỹỹna roire: —Hãbuõ heka sõwemy ributunyre. Tahe aõhe rauhenyõhyre tamy kia ibutuna-ribi wahe. Ijõ tahe ibutelemy ributunyre hãbuõ wahe. Tiile heka aõ tamy rasiranyõhyre.

<sup>16</sup> Txitu awiõhedỹỹrenymy rurumyhỹre iwese awiõhedỹỹrenymy rurumyhãre wesele wahe. Deuxumy reàlãre tai, Deuxu dori tuu rotỹỹnyre. <sup>17</sup> Taita ixinamy arorarenymy rehemynykremy. <sup>18</sup> Riwiõhenanyrenyneri iwitzira seriõreõ. Ibutumy dohodỹỹna mahãdu-ribi tii rityhynymyhỹre aõma Rybewihikỹ-di ritỹnynymyhỹre awimy. <sup>19</sup> Dohodỹỹna mahãdu rihitxinyre wawana kanakemy. Ibutumy Inynyrỹ loosõna heka tuu ratximyhỹre. Tule riteõsinymyhỹre ibutumy iny rikiwiõhenanymyhỹrenykemy. Tai heka inyseriõreney reteõnyrenyneri ityhydỹỹdu mahãdu. <sup>20</sup> Tai inyõ kia nierumy inyõ rarybeõtyhy. <sup>21</sup> Òbityhylemy rikiwinyrenyke ibuturu-ò. <sup>22</sup> Ijõ tii-wana rake. Reurihirenyre heka tii wiõhedỹỹmy rakeò, tai heka tii wiõhedỹỹmy ratxireri. <sup>23</sup> Txitu heka waliina rare; wawana raaõmysỹdỹỹnymyhỹre heka rare. Jiarỹboho heka awiõhedỹỹrenymy rarumahãrenyre. Ijõ seriõreneyõ nade dohodỹỹna-ò wiõhedỹỹmy. Tai kaiboho wowydyna tamy biwahinybenyke. <sup>24</sup> Tai tahe dohodỹỹna mahãdu kaki rierykre. Tai rityhynyrenykre aõmybo umyreny rarybere. Tule wiuumy atxiteri.

## 9

<sup>1</sup> Reerywãhãre jiarỹ wiõhedỹỹmy tarumahãtenyete Judeia bedeki. Tahe kiamy aõ aõkõ ariritinykre. <sup>2</sup> Reerywãhãre timybo akireny rare. Jiarỹboho heka awimy raryberenyre umyreny Macedonia hãwã mahãdu-ò. Myheka rarybere: —Akaia bedeki seriõre mahãdu wiõhedỹỹmy rexiwinymy ratximahãrenyre kau beõrau. Tai tiiboho rexideysananyrenyre. <sup>3</sup> Tai heka kaa seriõre mahãdu reteõnyneri. Tai heka awikre biwiõhenanybenykre dori. Kiamy iwese rarybereri heka inatyhy rare. <sup>4</sup> Araixỹrukre heka jiarỹ aõma bexiwinybenyõlemy wiõhedỹỹna-ò atxibenykre-wana. Tule kaiboho maixỹrubenyke. <sup>5</sup> Tai heka inyseriõreney reteõnyre akorenymy. Tahe iu arehemynykreu, bexiwinybenyke. Biwahinybenyke wiõhedỹỹmy atxitenyteri ixideewimy. Aõ jiarỹ adeereny rexitõenyneri aõkõ wiõhedỹỹmy.

<sup>6</sup> Kia hãbu ibutemy rõbòròmnyhỹre heka ibutelemy tamy aõna aõna ruhunykre. Kia hãbu sõwemy ribrònnyhỹre tahe tamy sỹ sõwemy aõna aõna ruhunymyhỹre tamy riwahinykre bederaty aõmydỹỹnana. <sup>7</sup> Tai heka iny sohoji sohoji ixideewimy tiwesebo riwahinymyhỹke. Riwahinyõke tahe aõ tuu rurukõreri urenana tuu ratxike. Deuxu dee riwahinymyhỹke mahãdu deysana-di riwahinymyhỹre kia iny mahãdu Deuxu tuure. <sup>8</sup> Deuxu heka riwahinymyhỹre sõwemy aõmybo tarumahãte kia inydeereny iratyre. Ibutumy aõmybo tarumahãte heka tule iny witzira biwiõhenanybenyke. <sup>9</sup> Kiamy Ritidỹỹna-ki roire: —Tii tawowi-di iaõkõ mahãdu-ò. Rõwahimyhỹre. Kia tahe iinydee wobrona tiemy rosaõmy rarekre. Deuxu heka riwahinymyhỹre tibo alòbòròdu-ò. <sup>10</sup> Inydee riwahinymyhỹre paõ iny rirỹsỹke. Tahe tule sohoji sohoji òwòrutymy rurumyhỹre heka tamy riwahinymyhỹre. Kia ribòrònnyhỹre tahe Deuxule ritxuhudỹỹmyhỹre. Tahe sõwemy bitakre Deuxu-ribi. <sup>11</sup> Kia

rimymyhÿre mahãdu tahe Deuxumy reàlàmyhÿre. Kia tewinymahãte heka Deuxudeewimyy tewiòhenanymahãte. Deuxu heka sówemy rimymyhÿre eàlànareny iòraru-ki. <sup>12</sup> Kaiboho heka Deuxu mahãdu teriwìohenanytenyete. Kia sohojile aòkõ. Tule aòraru-ki tiiboho Deuxu-ò wowydyna sówemy riwahinyrenyke. <sup>13</sup> Kaiboho Rybewihikÿ tÿmyra tetyhynytenyeteri, Kia ibutumy rierymyhÿre kaiboho dori uriõno tewiòhenanytenyete, tai iny wowydyna Deuxu-ò riwahinykre. <sup>14</sup> Adeerexitòenykre aluumy heka relekre Deuxu adeeruxetòena riwahinyreki. <sup>15</sup> Deuxu-ò wowydyna iny-ribi kanakemy heka idi watzireri. Wahidÿÿna wihikÿ dori Deuxu inydeereny riwahinyre.

## 10

<sup>1</sup> Jiarÿ Paulo heka aõmybo adeereny arexitòenykre. Aõherekibo tamy tarabemahãtenyete awanareny watziwãhãu urihimyoòle watyhyna watzirerimyy wamy tarybemahãtenyete. Jiarÿ heka awana rybetere-di rarybeõmahãre awanareny watzireri wana. Tiu rareu, taheka ròritidÿÿre rybetere-di wahe. <sup>2</sup> Rõhõtinywãhãre. Rexitòenyre. Awi heka rare. Ywina-di iny risÿnymyhÿre. Inyõ wamyreny ibinamy rarybekeki tahe tule ararybeke heka. <sup>3</sup> Inatyhymy kabede-ki inyboho rasÿnymyhÿreny. Rakaaõbinanykeki, inyumyreny aõbinana wesemy rare. Tebõnadirenyre. <sup>4</sup> Tebõnadirenyre. Aõ kabedemy iny rÿira kia debõna wese aòkõ kÿny. Deuxu debõna heka rÿira irurule heka rare. <sup>5</sup> Inyõ aõbinamy Deuxumy rarybemyhÿkeki, tai tahe kia wadebõnareny remymy resewãhãrenyre kia ixãwididÿÿnamy wahe. Ibutumy Deuxu òludumy ratximyhÿre heka remywãhãrenyre Deuxu rierykemy Kristu rityhynykemy wahe. Kaiboho heka ibutumy tetyhynymahãtenyete. <sup>6</sup> Kaiboho biatybenykeki, tahe, rexihuhyymy rÿimyhÿre aõhòkÿmy dÿÿnana-ò. <sup>7</sup> Kaiboho heka tetehemahãtenyete aõna aõna-ò ahana-ribi wesele wahe. Inyõrarakynykeki ratximyhÿreny ixinamy tuu raraykynyke. Jiarÿboho heka tule Kristu mahãdu hõrõ iny ratxirenyre. <sup>8-9</sup> Deuxu heka ruuõ wadee diwahinyde arawìohenanykemy tai raixruõmyhÿre. Tai heka abrebudÿÿrenymy aõbo kariti rewinyre. Urile tahe aumydÿÿreny adireny rewisÿnywãhãre aõ bede arãatyremy aòkõ. <sup>10-11</sup> Ityryiti rybetere heka ribrebudÿÿ tahe rehemynyreu heka tii aòkõ rybetere-di rarybemyhÿre. Awityhymy aòkõ rarybemyhÿre riritinyreu. Iwese ròritidÿÿre wesemy aòkõ rarybere. Iu adehemynykre tahe, iwese ròritidÿÿre wesele heka anarybekre. <sup>12</sup> Iny tai ratximyhÿre heka sówemy ixidi rõhõtinyinymyhÿre tii awiremy. Kia tahe watzimyhÿreny kia raryberenyõtyhy. Tii dori raitxÿtemy ratximyhÿ. <sup>13</sup> Aõmy iximyy rarybemyhÿre dori tii awimyy iximyy rarybemyhÿre heka urile tuu raraykynymyhÿ. Timybo Deuxu inydee raryberele rikiraòmyhÿke. Kiawesele inydeereny awire. <sup>14</sup> Iaõmysÿdÿÿna heka timybo rikiwinyrenykele iny riijemyhÿreny. Juhu heka Rybe tÿmyra wihikÿ heka adeereny adiwykemy idi watziwãhãre. Rewyrenyre heka juhuy Rybe tÿmyra wihikÿ adeereny rewyre. Tai heka tuu raryberenyõhyymahãrenyre timybo iny witxira aõmysÿdÿÿna riwinymyhÿreny. <sup>15</sup> Kaiboho heka aityhydÿÿnareny raumynykre. Tii heka wadeereny awire. Jiarÿboho heka aõmysÿdÿÿna wihikÿ sówemy ariwinyrenykele watzirenyre ayreny-ki, Deuxudeewireki. <sup>16</sup> Idi tahe aròirenykre rybe-di aritÿnynyrenykre ijõbede-ò, Rybe tÿmyra wihikÿ-di wahe. Aõmy ararybeõtyhy aaõmysÿdÿÿnareny iwitxira rewinyremy. Kiamy heka Ritidÿÿna-ki roire: <sup>17</sup> —Urile tuu rybe rÿike Inynyryÿ timybo riwinyrelemy. <sup>18</sup> Iny ixidi rõhõtinyinymyhÿre tii awireny. Tahe awi aòkõ rare Deuxu-ò. Deuxu tahe awimyy tai rahamyhÿre tii idile rõhõtinyinymyhÿreki.

## 11

<sup>1</sup> Jiarỹ òsana urihimyò raitxỹtemahãremy kaiboho wawana tòiterimy ixi-di atxitenyteri. Ihãrele taheka urihimyò reòludunymahãre. Jiarỹ heka okorenre iwese Deuxu ratximyhỹre wesele. <sup>2</sup> Ywimy atximahãbeny adirenre watxireri. Kaiboho iwese ijadòma hãbumy roikre wese toite. Hãbu heka Kristu rare. <sup>3</sup> Jiarỹboho raberuwãhãrenyre kaiboho Kristu-wana atximahãbenyke lau wahe. Iwese Eva hemylala riitxenanyre wese wahe. <sup>4</sup> Inyò kanakeki ròhãletedỹỹmy Jesuisi witxiramy. Tahe kaiboho bityhynybenykekile jiarỹ heka raberumahãre. <sup>5</sup> Ijõ dori ritỹnynymyhỹre iwese inyboho ritỹnynymyhỹrenyre wese aõkõ iwitxiramy. <sup>6</sup> Kaiboho heka tahõtynmahãtenyete tỹnydỹỹdu wihikỹmy inykireny ratximyhỹre. Tahe awiremy idi tahõtynmahãtenyete. Tai iwesele inyboho roire awi heka roire. <sup>7</sup> Tahe iwese tii awityhymy rarybemyhỹre wesemy aõkõ inyboho rarybemyhỹrenyre. Tahe iny rierymyhỹrenyre inraykyreny-ki. Sõwemy heka tuu adeereny rarybemahãrenyre. Iu jiarỹ rybe ritỹnynymy akireny rarewãhãu, kiau heka adeereny rexitòenyõhyre iòwydỹỹmy. Iyjamy heka ixidee reijenrenyre kaiboho bexiòlònybenykemy. Teòsare òsana iwese rewinyre wese. <sup>8</sup> Ijõ dohodỹỹna mahãduõ heka riwaòwynyre adeereny aritỹnynyrenykemy. Iwese iribi rawasinyre wesemy heka rahõtinyre. <sup>9</sup> Iu akireny rybe-di tỹnydỹỹmy rarewãhãu tiu rexitòenyõhyre adeereny biwawiòhenanykemy. Macedonia hãwã-ribi dori ityhydỹỹdu, mahãdu seriòreõ aõmybo raruwãhãre wadee diwyde. Tiu heka aõ aribireny aritaõtyhy. Tuu rarehy wese heka wiji rarekre. <sup>10</sup> Kristu inatyhynamy wadee rarybereri kia wese tule ararybekre ibutumy Akaia hãwã hãwã-ki. <sup>11</sup> Jiarỹ heka aluunihikỹrenyre. Taile heka tuu rarybewãhãre Deuxule rierey. <sup>12</sup> Kia rybe tỹnydỹỹdu heka iwese rewinywãhãrenyre wesele ròwidỹỹmyhỹre. Kia heka rewinywãhãrenyre heka kia rarybereri heka aõ wiribi lahixi aõkõmy rarybereri. <sup>13</sup> Kahãbu heka inatyhy Deuxu deòdỹỹna aõkõ ratximyhỹre. Ruile heka iaõmysỹdỹỹna-ki ròhònymyhỹre. Rexitỹnynykemy Kristu deòdỹỹna mahãdu-ò. <sup>14</sup> Tahe aõkõre heka Satanasi tule rexiwitxiranymyhỹre. Ýju wesemy tii rexideòsinymyhỹre. Kia hãbu teòdu rare. Tai heka irehemy iribi rexiijaranyre òbiti deòdu mahãdu ratxireriki wahe. <sup>15</sup> Urile tuu iny idi ròhõtinykelemy heka tuu ratxirerimy ihỹre. Tahe aõkõre. Ikonanau tahe aõhòkỹmy dỹỹnana ritarenkyre aõbo riwinymyhỹre òraru-ki.

<sup>16</sup> Ixityre tuu ararybekre. Inyò raykykõmy jiarỹ itxỹte raremy. Ararybekre heka waaõmydỹỹnanarenymy. <sup>17</sup> Teramy ijirarenyõmyke aõmybo ararybekre. Deuxu dori tuu arybedỹỹ-ò riwaijònomy, tai heka rarybere itxỹte wesele watximahãremy. <sup>18</sup> Kaiboho heka taholamahãtenyete itxỹte mahãdu-ò. Katahe bodoholabedenykre aõmybo ararybekre. <sup>19</sup> Inyò kedehemynykeki kaa biwinybenykre. Tahe tewinymahãtenyete aõna aõnany aõkõ wahe. <sup>20</sup> Inyò araitxenanyrenykeki uritere aõmydỹỹrenyõmy tamy. Jiarỹ heka ariwinyõtyhy tuu, wadee awiòre. <sup>21</sup> Ijõ rarybemyhỹre inyõ. Tule jiarỹ ararybekre. Itxỹte wesemy ratximyhỹremy. <sup>22</sup> Tii heka Hebreu mahãdumy tii rexininire. Jiarỹ tule kia tuu rare. Ijaò mahãdumy heka tiibohe rexininirenyre. Jiarỹ tule. Abraõ riokoremy rarybemyhỹre. Jiarỹ tuleri. <sup>23</sup> Kristu deòdumy heka tii rexininimyhỹre. Rarybemahãre itxỹte wesemy. Jiarỹ heka iratyre deòduwimy watxiwãhãre. Jiarỹ raaõmysỹdỹỹ nihikỹre. Ròtenawo-ò riwarutyrenyre iratyre. Riwhatenyrenyre iratyre. Arurure inihe iratyre. <sup>24</sup> Judeu mahãdu heka 39 hetenamy wamy raòhòtere iruyre sõwemy wahe. <sup>25</sup> Roma mahãdu tasỹ inataõmy riwhatenyre. Sohoji ta mana-di watyre rihure. Ijõtuxu heka hãwoninihikỹ heka riorore. Aõutxu heka bera-ki rãire ruu ibutumy

txuu tule ibutumy rehure. <sup>26</sup> Ibutumy reamy rarewāhā aōma wasidu bede aōmydỹnanamy bera-ki tule arurure inihe. Judeu mahādu warubudỹmy wadi riwisỹnyre. Tule judeukōdu mahādu tulere. Hāwāhākỹ-ki brebunatyhymy watxiwāhā, bede rahy-ki tule, ahohokỹ-ki tule. Waliinaō inatyhy aōkō tai ihỹmyhỹ. Tai heka riwaitxenanyreny. <sup>27</sup> Aōmysỹdỹ nihikỹ tai. Tỹikōhyky heka bede reijemy rarewāhā. Rama riwasare; bemy rarowāhāre. Timy heka tỹinatykyō ihoōhykyre sōwemy wahe. <sup>28</sup> Tai tahe rahōtinyre ibutu dohodỹna mahādu-di. <sup>29</sup> Urihimyòle taruru-di ratxireri wana jiarỹ tule iheki waruruhohomy aōkō relemahāre. <sup>30</sup> Inyō raòrarunymyhỹre wana jiarỹ rabe-dewowāhāre iòraru-ki. Jiarỹ rexideòsinywāhāre waaōkōre urityhywāhāre. <sup>31</sup> Deuxu Jesuisi Kristu tyby dori riwaerymyhỹre aōu aōu heka iny rakanihikỹnykre. <sup>32</sup> Iu Damasu hāwā-ki rarewāhāu, Iòlò Areta bede dinodu heka riwamymy riwateònyre. riwamykemy hāwāhakỹry ijò-ò. <sup>33</sup> Weriri nihikỹwomy riwawòmny riwatidire, Walina mahādu. Tahe heto raro-ribi riwaatyre hāwā ahana-ò. Tai tahe rahenyre iribi.

## 12

<sup>1</sup> Jiarỹ heka ararybekemy watxireri. Aō aōkō rarehārele heka ararybekemy watxireri. Wiòhedỹna aōkō heka rare. Wanyrỹ wadee riwahinyre aōna aōnamy heka rabire rasina wese jiarỹ sohojile wahe. Kiamy heka arelyykre wiji. <sup>2-3</sup> Tahe 14 beòramy heka Deuxu ityhydỹduō ridyre biu-ò tasỹ-ò wahe. Deuxule rierymyhỹre inatyhy aōbo rare ada aōkōre aōbo. <sup>4</sup> Kahābu Deuxu-ribi heka rybeòkemy roholare. Tahe rarybeòtyhy. <sup>5</sup> Iximy tahe ararybeòkre kia wadeysarehāre. Waaōhōkỹmy dỹnanadile areysakre. <sup>6</sup> Urile ararybekre timybo releremy. Taile tahe iny tuu rarybekre. Tuheka rabire sōwemy aōwiihikỹmy. Jiarỹ awiremy iny wamy raraykynyheny. <sup>7</sup> Tahe Satanasi aōbinana witxirahakỹbo wadee riwahinyre. Ixidi arōhōtinyòkre. Jiarỹ aōwiihikỹ jiarỹ raremy wahe. Araraykynyòkemy. <sup>8</sup> Inataōmy heka Inynyrỹ-ò rexitòenyre kiamy waribi ritakemy. <sup>9</sup> Tii wadee rarybere: —Waruxetòenale heka adee awire. Aōbo kai taaōkōteu heka waruru adee rewahinyre. —Tai tahe jiarỹ reysare, waaōkōreu wahe. <sup>10</sup> Tahe awire, waōkōna, warurukōna, ibutumy wadee awire. Kristu òraru-ki heka tuure. Tiubo ibinamy wamy riwinykre warurukōkre, warurudikre.

<sup>11</sup> Rarybere heka hābu itxỹte wesele heka rarybereri. Kaiboho iòrarureny-ki heka kia wesemy rarybereri. Inatyhymy heka jiarỹ kia rybe tỹnydỹdu mahādu bina ratyre watxiwāhāre. Ayreny-ki rarewāhāu heka teertyentye. <sup>12</sup> Aōna aōna wiwiihikỹ, deytenu wiihikỹ, bedeòtiidỹna ayreny-ki rewinyre kia Kristu deòdumy watximyhỹreki wahe. <sup>13</sup> Rybe tỹnydỹ òwyō heka aribireny retaōhyre.

<sup>14</sup> Ihewoludu txu tahe aroramy arakemy ixidi watxireri. Inataōmy reywinyra aroramy arakremy wahe. Aribi nieruō aritaōtyhy. Urile arawiòhenanyrenykremy adireny watxireri. Uladu riki heka tyby riyrubunyòtyhy. Tyby tahe uladu riyrubunymyhỹre. <sup>15</sup> Ibutumy idi watxireri heka arahukre arawiòhenanyrenykremy. Adeereny wylemy arihukre. Jiarỹ heka aluurenyre. Kaiboho aōbo tule waluurenykre? <sup>16</sup> Waòraru-ki heka adee isiraòkre heka. Ihārele tahe inybina wamy rarybemyhỹre: —Tii itxenadỹdu rare. <sup>17</sup> Wamahādu tule aribireny ritaōtyhy ijō. <sup>18</sup> Txitu reteònyraiō ityhydỹdu seriòreō-wana. Tii aōbo aō aribireny ritare? Aōkōre. Txitu wawesele heka tii rare.

<sup>19</sup> Taōmysỹdỹna heka awiòhedỹnarenymy rare. Aō wadi jiarỹ awiremy nohōtirenymy tuheka rarybereri adeereny. Deuxu, Kristudewinamy heka

tuu adeereny rarybereri heka. Deuxu kotxi heka adeereny rarybereri awiòhedỹrenemy. <sup>20</sup> Raberumahãre heka arehemynykreu, iwitxiramy atxibenybeke lau. Tule wadi iwitxiramy betehebennyke ixiweserenymy aõkõ. Ihãru, adebure. Aõkemy watzireri. Iny aõbina binamy wimy rarybemyhỹre. Iny ixidile rõhõtinyrerimy ihỹre mahãdu. Kia aroholakeki tahe wadee awiõre. Riyrubunymyhỹre. Riyrubunyõhyymyhỹre. <sup>21</sup> Raberuwãhãre heka arahinykre heka akotxireny iõhãru òraru-ki. Aõna aõna witzira witzira òta òtamy rõhõtinyryhỹre, raraykynymyhỹre. Sõwemy heka riwinyre ta ixi-txi tõhõti reaõhyymyhỹre kia riwinyretxi.

### 13

<sup>1</sup> Tahe ikonana txu roraludu heka jiarỹ rare. Inyõ aõbina binamy wimy rarybemyhỹreki waribi ihitxihitximy heka tuu rarybemyhỹre. Iny rimymyhỹre heka tuu robimyhỹre; tuu rarybemyhỹre. Wiweselemy heka tuu rarybekre. <sup>2</sup> Iny iòrarudimy rỹikre-wana, ibutumy heka aõhõkỹmy rotỹỹnykre arehemynykreu. <sup>3</sup> Aõmy Kristu rybemy heka rarybekre. Tai bierybennykre. Aõmy warurudỹỹdure heka bierybennykre Kristu wahe. <sup>4</sup> Kristu heka itxeò-ki rurure irururenyõ wahe. Jiarỹ warurunarenykõ òraru-ki. Tahe Deuxu ratximyhỹre, iruruna-di. Tii-wana heka inyboho heka ratximyhỹrenyire iruruõmy. Tai awanarenyle watzireri, tahe tii-wana Deuxu ruruna-wana watzireri. <sup>5</sup> Ixi-di heka betehebennyke. Bexiurihibennyke tyhyna-di atxitenyterimy. Jesuisi Kristu awo-ki ratxireri. <sup>6</sup> Kia terytenytemy, inatyhy. Tahe jiarỹboho inatyhymy aõna aõna riiijerenyire. Kia aõbo teerytenyete. <sup>7</sup> Jiarỹboho rexitõenyrenywãhãrenyire. Òraruna widỹỹrenyõmykemy. Kaiboho aõwiwi biwinybennyke. Kia òbitimy watzimyhỹrenyireki aõkõ, kiemy òbitimy boibenykemy. <sup>8</sup> Aõbo heka inatyhyna wiòhedỹỹnale rikiwinyrenyke. <sup>9</sup> Kaiboho arurudimy atxitenyteri-wana heka, jiarỹboho warurudimy watxiwãhãrenyire, kia wadeereny awi rare. Rexitõenymahãrenyire kaiboho òbitimy matxibenybekemy, ywimy ahãbenykemy. <sup>10</sup> Tai heka adeereny ratyritinyreri kiamy. Aribireny irehemy watxiwãhãre taheka arawiòhenanyrenyke. Arehemynykreu tahe timy heka aõhõkỹmydỹỹnanamy arõhõtinyõtyhy, kia waaõmysỹdỹỹna rare. Inynyrỹ dori iny wiòhedỹỹnarenymy nade. Iny aõhõkỹmy dỹỹnanamy aõkõ.

<sup>11</sup> Arakre tahe waseriòreboho. Idi biwisỹnybennyke ibutumy òbitimy biwinybennykemy. Warybe-ò heka boholabennyke. Wiwese weselemy maraykywydynanybennyke wiribihitximy aõkõ. Ywina-di matximahãbenyke. Deuxuluuna heka tule akireny ratxikre. <sup>12</sup> Wii birybenymyhỹbenyke ityhydỹỹdu seriòre mahãduõ tai wiluumy atximahãbenyke. <sup>13</sup> Ibutumy Deuxu ijoi mahãdu heka adee rybe riwehityhynanyreri. <sup>14</sup> Jesuisi Kristu Inynyrỹ ruxetõena heka akirenykemy watzireri. Deuxu luuna aki rỹikre. Deuxu Tyytybytyhy awana rỹikre.

## Alatxia Paulo Tyyriti, Alatxia Mahãdu-ò

<sup>1</sup> Jiarỹ Paulo, rybeõmy nodu rare. Inyõ riwateònyõhyyre. Jesuisi Kristule, Deuxu inytyby, Kristu ixixadỹỹdu-wana riwateònyre. <sup>2</sup> Jiarỹ ityhydỹỹdu seriòre-wana. Kaa watyyritireny rewahinyreri Alatxia bedeludu mahãdu-ò, ibutummy dohodỹỹna mahãdu-ò, ityhydỹỹdu mahãdu-ò wahe. <sup>3</sup> Ruxetòena ywina-wana adeeremy kanakemy idi watxireri Jesuisi Kristu-ribi, Deuxu inytybyreny-ribi. <sup>4</sup> Jesuisi rexiwahinyre iny òrarureny-ribi iny ritarenykemy. Wiji bede aõmydỹỹnabina-ribi iny ritarenykemy. Kia dori Deuxu-ò inytybydeewimy rare. <sup>5</sup> Tamy àlàna aõu aõu kanawahimyhỹke.

<sup>6-7</sup> Jiarỹ bede reòtiinyra, rybe wixiraõ elelemy tetyhynymahãteki. Rybewihikỹ wixira ihoõre. Juhuu Kristu taruxetòena-di bedebina-ribi aratarenyire. Inyõ adee rare. Idi Deuxu Rybewihikỹ riwitxiranykemy. Tai tahe atyhydỹỹna ribinadỹỹnyra. Tai tahe kiamy adee rarybera. <sup>8</sup> Inyõ aõbo, jiarỹ aõbo, ada biludu ýju aõbo, adee Rybewihikỹ wixiraõ rarybekeki, Deuxu kyarana tamy kedesekeki idi watxireri. Rybewihikỹ-ò juhu waribi taholatenyete. Kia sohojile inatyhyre. <sup>9</sup> Iwese rarybere wese ixityre ararybekre. Inyõ Rybewihikỹ riwitxiranykeki, aõmybo juhuu taholateny-ribi, Deuxu kyananamy resekre. <sup>10</sup> Deuxudeewimy taheka watxireri hãbudeewimy aõkõ. Jiarỹ hãbudeewimy aratximyhỹkeki Kristu deòdu aõkõ jiarỹ rare.

<sup>11</sup> Aõmybo rarybemyhỹre hãbu-ribi rare. Kia Rybewihikỹ tyhy rare. Kia bierybenyke. <sup>12</sup> Kia tihãbuõ-ribi adoholaõhyymahãde. Hãburybe-ki aõkõ reeryre Jesuisi Kristule dori kia riwaerynanyre. <sup>13</sup> Kaiboho taholatenyete, iwese jiarỹ judeu mahãduy-ki raremahãu Iu Deuxu ityhydỹỹdu mahãdu aõbinamy rewinydỹỹnanymyhỹre. Idi ariixãwididỹỹnykemy rarewãhã. <sup>14</sup> Wamahãduy-ki sõwemy iratyre raremahã judeu mahãdu bede ywina ywidỹỹ-ki. Idi retyhynyhyymahãre wahona mahãdu ratyre, byrena erỹdỹỹna-ki. <sup>15</sup> Iribi tahe Deuxu riwamyre taruxetòena-ki. Ratohouãnyõlemy rareõ juhu riwahitxinyre. <sup>16</sup> Wadee Deuxu tariòre riteòsinykremy ratximyhỹ judeukõdu mahãdu-ò tuu ararybekemy wadi ratximyhỹ. Iu inyõ dee aõmy rarybeõhyyre Jerusalẽ hãwã-ò raõhyyre. <sup>17</sup> Ròtyhydỹỹõmy raremahãu. Deuxu deòdỹỹna mahãdule rỹiramyhỹ. Ihãrele tahe tamy rybemy raõra. Iribi tahe rahònyra Arabia-ò. Idi tahe ixityrele adòòsede Damasu-ò.

<sup>18</sup> Inataõ beòramy heka kowa-ki reijere. Idi tahe rare Jerusalẽ-ò Pedro roramy. Tahe bede reijere waiyre txummy tai. <sup>19</sup> Ijõmy heka rabiõhyyre deòdỹỹna mahãduõmy. Txiaulemy heka rabire, Kristu seriòremy. <sup>20</sup> Ka heka watyyriti inatyhy rare. Deuxuko-txi inatyhy rare. <sup>21</sup> Idi Siria bedeõ-ò rare, tule Silisia bede-ò. <sup>22</sup> Judeia bede-ki Kristu dohodỹỹdu mahãdu wamy lobixidu aõkõ rỹira. <sup>23</sup> Uritỹỹna roholamyhỹre: —Kia juhu inyhudurenymy inydireny raremyhỹ, wiji tahe tyhyna-di dobedeerydỹỹnanymyhỹde. Juhu tahe tii tyhyna rahukemy riwisỹnyre. <sup>24</sup> Kia ibutu òraru-ki tahe Deuxu-ò dealãmehỹde wamy, Paulo wahe.

## 2

<sup>1</sup> Waòinaubiòwa reurò beòra-di rexihureu, ixiby Jerusalẽ-ò ròòsere. Banabe, Txitu-wana redyre. <sup>2</sup> Rawãhãre heka rasi wese-ki aõmybo rabireki. Retỹnyre iny-ò iwese inywixira-ò rarybemyhỹremy. Dohodỹỹdu mahãdu ratyre retare tamy rihitxinyre rarybekemy. Tuu arierykemy watxireri



wimyy watxiwãhãremy. <sup>3</sup> Txitu wawana ihÿre, tii judeukõdu mahãduõ hãrele tahe itõtyky resymy rarybeõhyrenyrye. Tiiboho waki ibinamy rahaõhyrenyrye. <sup>4</sup> Idile rõhõtinyinmyhÿre ityhydÿÿdukõdu mahãdu. Tiiboho nalõdenyde waixãwididÿÿnarenny-õ retehekremy, iny Kristu-ki ijõdiwãhãre-õ. Tiiboho ixiwesemy iny-di risÿnykemy ratxirenryeri. Tiiboho ityhydÿÿdu wesemy rexisÿnymyhyre. <sup>5</sup> Tamy jiarÿboho raholarenyõhyymahãre inatyhymy Rybewihikÿ aribireny ritaõhykemy. <sup>6-9</sup> Dohodÿÿdu mahãdu ratyre mahãdu heka Joaõ, Txiau, Pedro-wana rare. Tiiboho ibutu erysyna ratyre rÿiraki, kia aõ aõkõ wadee rare. Tiiboho aõ tÿmyra riwabedeerynyõre. Deuxu-õ tahe ibutummy iny wiwesehy rare. Deuxu riwateõnyrenyrye judeukõdu mahãdu-õ Rybewihikÿ wahisidÿÿmy. Kia Joaõboho wiwesehyylemy widi rõhõtinyre riwawehitynanyra jiarÿ Banabe-wana. Tai tahe iwese Pedro judeukõdu mahãdu-õ rare. Tiiboho tahe ritÿÿnynmyhÿke judeu mahãduõle wahe. <sup>10</sup> Urile riwatyhenyrya iny aõkõdu mahãdu ariwiõhenanymahãkemy. Kia juhuu ariwinykemy watxiwãhãre.

<sup>11-12</sup> Atxiõkia-õ Pedro rehemyyhÿreu jiarÿ tuu rarybere timybo ibinamy riwiny my ihÿremy rexiitxenany myhÿreki. Hãbuõ Txiau-ribi rehemynyõrau, tii judeukõdu mahãdu-wana riroxire. Irahudi tahe dehemynydenydeu, riroxiõhyylemy rexitare. Judeu mahãdu rybe lau ruberure. <sup>13</sup> Ijõ judeu iwesele rotÿÿnyre. Ihewoludu Banabe tulere. <sup>14</sup> Tuu rabireu, õbitimy aõkõ Rybewihikÿ inatyhy wesemy aõkõ rotÿÿnymy raremyhÿ tahe rarybere ibuturu-õ, Pedro-õ. Kai judeu mabekeki, tahe judeukõdu mahãdu wesemy tanabededÿÿnanamy ahãte. Uritere judeukõ mahãdu judeu mahãdu wesemy isÿdÿÿõmy. <sup>15</sup> Jiarÿboho tahe judeu mahãdumy reamahãrenyrye. Judeukõ mahãdumy aõkõ watxiwãhãrenyrye. <sup>16</sup> Iny bede ywidÿÿna aõkõ iny ritamy roire. Kia Kristu iny rityhynmyhÿrele iny ritamy roire. Bede ywina ywityhydÿÿna iny ritaõtyhy. <sup>17</sup> Iny Kristu-ki tarasana ritamy ratxikeki, tahe õrarudu tyhymy ronykeki, Kristu aõbo õraruna widÿÿna rare? Aõkõre. <sup>18</sup> Jiarÿ bede ywiny ywidÿÿna-õ arõðsekeki, õrarudumy ararekre. Kia jiarÿ idi ariatymy rÿimyyhÿre ixityre ariwinykeki õrarudumy arareke. <sup>19</sup> Jiarÿ bede ywina rarumy rãire wese, Kristu-õ warumy ararekremy. Kristu-wana jiarÿ raitxeõkirubudÿÿnanymahãre. <sup>20</sup> Jiarÿ ixidee warumy aõkõ wahãre. Kristu tahe wawo-ki riwarudÿÿnanymy ihÿre. Warumy watxireriwana Deuxu iriõretyhydÿÿna õrarukile warumy wãhãre. Tii waluumy ratximyyhÿre. Tahe wadee rexiwahinyra. <sup>21</sup> Deuxu ruxetõedÿÿna aribynykemy aõkõ watxireri. Bede ywina tyhydÿÿna õraru-ki ywityhydÿÿna tahe inyõ ritakemy ratxireri. Kia-di inatyhymy inyõ rexitakeki tahe, Kristu uriõle rurure.

### 3

<sup>1</sup> Alaxia mahãdu timybo tahõtinyteri kaiboho õhõtibede-di rierykõrenyrye. Kia-di õsana tahõtinyre. Moòwòru ijeranamy ahãtenyrye. Jesuisi Kristu itxeò-ki rururedi taholatenyryhyta. Õhõt-ribi aõbo kia rosare. <sup>2</sup> Kiale arierykemy watxireri timybo tahõtinytenyteri: Deuxu Tyytybytyhy temytenyrya bede ywina widÿÿnany aõbo ada inatyhyna tyhydÿÿnany aõbo. <sup>3</sup> Juhu urile tetyhynytenyrye idi ixiumykile tadexityhynmy ahãtenyrye, bede ywina ywisidÿÿna wahe. <sup>4</sup> Kaiboho õbitimy tahõtinyõtenyrye. Kia aõbo aõhõkÿmy tatÿÿnytenyrye uriõhyõle? <sup>5-6</sup> Aõkõre, uriõkele aõkõre õsana tahõtinyteri. Deuxu Tatytybytyhy adeereny diwahinyrye. Kia aõbo riwinyrye bede ywina ywisidÿÿ kaiboho tamahãtenyryeki? Aõkõre, tetyhynmahãteki kia riwinyrye. Deuxu aõna aõna wiwihikÿ akoreny-ki riwinyrye. Kia sohojile iny ritake. Abraõ Deuxu rityhynyrye. Tai tahe tamy õbitimy rare Deuxu-õ, iõraru iribi

riixãwididỹnyraki. <sup>7</sup> Tai ibutumy rityhynymyhỹre mahãdu Abraõ riòremy rỹira. <sup>8</sup> Tyyriti-ki roimyhỹre kia: —Deuxu heka judeu mahãdu sohojile aõkõ riòbitinykre. Ibutumy iny riòbitinykre ityhydỹỹ erylidyỹna òraru-ki. Rybewihikỹ erylisyne Abraõ-ò juhoo dehemynyde. Kia wese Tyyriti doide: —Aòraru-ki ibutumy iny-ò deysana kanakre. <sup>9</sup> Tahe ityhydỹỹdu mahãdu Abraõ wesemy teysare. Abraõ dori ityhydỹỹdu rare. <sup>10</sup> Inyõ bede ywina rityhynyõkeki, Deuxu txuhòbina kedeake. Jesuisi-ò tyhynale iny kiditakre. Kia Tyyritidỹỹna dori roire: —Inyõ ibutumy bede ywina riywinyõkeki, tamy Deuxu txuhòbina kedealeke. <sup>11</sup> Òbiti mahãdu rityhynymy ronykre. Kia riki Ritidỹỹna roire. Tahe bede ywina heka inyboho aõkõ riòbitidỹỹnyre. <sup>12</sup> Bede ywina heka iwitxi rare ityhyna-ribi. Tahe inyõ bede ywina rityhynymy ratxikeki, tii ibutumy rityhynymy rarehyyke. <sup>13</sup> Inyboho Deuxu bede ywina rikiywinyrenyõkeki, Deuxu txuhòbina inydeereny kedeakre. Kristu tahe kia-ribi iny ritare. Tule inyòwòruna òraru-ki rexilamadỹỹnyre inydee iòwydỹỹna-ki. Beteheke Tyyritidỹỹna roire: —Inyõ òwòru itxeò-ki ritamadỹỹnykeki, tamy txuhòbina kedealekre. <sup>14</sup> Deuxu narybede heka Tatytybytyhy iny-ò riwahinykemy. Wiji tahe inyõ rityhynykeki, Deuxu Tyytybytyhy ritakre. Tai Abraõ deysana inydeereny rehemynyre Jesuisi Kristu òraru-ki.

<sup>15</sup> Waseriòreboho, jiarỹ hãbu wesemy ararybekre. Iny inatxi jurasadỹỹna ritina riwinykeki, inireny ritidikeki, inyõ riwitxiranyòtyhy. Tai ijõ wixira riritinyòtyhy. <sup>16</sup> Boholabenyke, Deuxu juhoo Abraõ dee narybede: —Abraõ riòre hewoluduõ Kristumy. Abraõ riòre sòwe dee rarybeòre. Sohojideele rarybere. Tahe tariòre-ò Kristumy rarybere. <sup>17</sup> Tuheka rarybereri: —Deuxu juradỹỹna wese juhoo rarybere, 430 beòra bede rỹire idi tahe bede ywina nade. Kia Deuxu juradỹỹna riixãwidinyòtyhy. <sup>18</sup> Tarasany bede ywinawidỹỹna òraru-ki kidiwahinykeki, wahisidỹỹna aõkõ heka rare. Tai Deuxu heka Abraõ-ò jurasadỹỹna riwahinyre. Iòwydimy aõkõ juhoo dori rarybere tii kidiwahinykemy. <sup>19</sup> Aòherekibo heka nade? Kia nade òraruna òraru-ki Kristu nadeule kỹny juhu ludu wese aõkõ roire. Kristu heka Deuxu deòdỹỹna rare. Iwese Deuxu rarybere wese riwahinyre. Tii Abraõ riòre riòre-ribihyy reare. Yjummy bede ywina nade. Iny itya ludu debò-ki rehemynyra. Moisesi iwahidỹỹdure. <sup>20</sup> Boholake, Moisesi sohojile aõkõ itya ludu ratxireri bede ywina riwahinyreu. Deuxu tahe sohojile rare irybe riwahinyreu. <sup>21</sup> Bede ywina aõbo Deuxu jurasadỹỹna riixãwidinyke? Aõkõre. Bede ywina umy ituedeõna riwahinykeki, òbitidỹỹna inatyhymy bede ywina nade. Tahe aõkõre. <sup>22</sup> Deuxu Tyyriti rarybere: ibutumy iny òraruna-di ratxireri. Kristu iny rityhynykeki, Deuxu jurasadỹỹna tamy riwahinyke.

<sup>23</sup> Ityhydỹỹna rehemynymynykoki bede ywina iny rityhynymyhỹre ròtenawo-ki inyboho roire wese. Kia-ò iny riraòhyymy rỹimyhỹre inatyhydỹỹna kedehemynykemy. <sup>24</sup> Uladu bedeerydỹỹdu wese bede ywina rare inydeereny. Kristu rehemynyko, inyboho bede ywina rityhynyrenyre. Tai Kristu-ò inyboho òbitimy ronykremy ityhydỹỹna òraru-ki. <sup>25</sup> Ityhydỹỹna-ò iny rehemynyreu, uladu bede erydỹỹdu-ribi ixãwimyhỹre. <sup>26</sup> Kristu-ki ibutumy Deuxu riòre atximahãtenyete ityhydỹỹna-ki. <sup>27</sup> Ibutu dori Kristu-ò taratisebenyete, Kristu wesemy tatỹỹnyte. <sup>28</sup> Kristu tỹnydỹỹna-ki wiribi hitximy aõkõ boibe, judeukòdu mahãdu, iny-wana, deòdu deòdu aõkõ-wana, ijoi hãwyy-wana ibutumy wiwese wesele Kristu-ki rỹike. <sup>29</sup> Kristu-ki mabekeki, Abraõ riòre riòrelemy mabekre. Jurasadỹỹna rareasadỹỹdumy atximahãtenyete.

## 4

<sup>1</sup> Ijyyõ arelyykre —rareasadỹduõ deòdu wesemy raremyhỹ tii uladumy rareu, ibutu wedu rare hãre wahe. <sup>2</sup> Urile tyby rarybere raumynykõule, tii tatibiedỹdu rybe rityhynymyhỹre. <sup>3</sup> Kia wese iny rare. Uladu wesemy bede aõmydỹnana rityhynymyhỹre juhUU. <sup>4-5</sup> Iribi tahe bededỹnana he rehemynyra. Deuxu tahe Tariõre diteõnyde ijadõma ririõredỹnykremy. Bede ywina tyhynakremy reare. Tii nade bede ywina tyhydỹdu mahãdu tarasamy kia tyhyna-ribi ritakemy tariõre wesemy ritibienykemy. <sup>6</sup> Deuxu Riõre wesemy iny ihỹreki iny-ki ratximyhỹreki, Tatytybytyhy inywo-ò risỹnyre. Tai inywo-ribi rarybemyhỹre: —Waha, Waha. <sup>7</sup> Wiji tahe deòdu wese aõkõ atxiteri, Deuxu riõretyhy wese atxiteri. Tule Deuxu rareasadỹduõle tate.

<sup>8</sup> JuhUU Deuxu teeryõtenynte. Kaiboho deuxu wixira wese tetyhynytenynte —deuxu inatyhy aõkõ tetyhynytenynte. <sup>9</sup> Ka tahe Deuxu teerymy ahãtenynte tetyhynmahãte. Deuxu anaerynymyhỹdenyde. Ixyby bede aõmydỹnana-ò òòsedỹõmy, arawiõhenyõreki. Deòdumy aõkõ ixyby rỹimy boibeke. <sup>10</sup> Txu yrubudỹõmy, ahãdu yrubudỹõmy, beõra yrubudỹõmy. <sup>11</sup> Inatyhymy ada aõkõre aõbo waaõmysỹdỹna adeereny reõnonyra?

<sup>12</sup> Wawesehyymy boibeke. Jiarỹ dori tatemahã wese raremahã, waseriõreboho. Kaiboho wadee aõbina tewinyõmahãtenynte. <sup>13</sup> Kia teeryte. Jiarỹ juhUU adeereny Deuxu rybemy rarybereu, jiarỹ iu wabinawãhãu. <sup>14</sup> Wabinana heka isirare adeereny, ihãre tahe waderaõre tahe wadi arukirenyra, iwese yju Deuxu-ribi jiarỹ anade wese kaiboho tiwamytenynte, iwese taheka Jesuisi Kristule jiarỹ rare wese wadi tewisỹnytenynte. <sup>15</sup> Titxibo rare eysanareny juhUU adi toite wahe. Kaiboho aruereny wii tesỹnymy toitemyhỹ kaiboho wakyyrenyreki. <sup>16</sup> Jiarỹ aõbohe aõludumy relera, inatyhy rybe adeereny rarybereki? Aõkõhyre. <sup>17</sup> Hãbuõ arãitxenanyhỹrenyre. Aluu wese heka ratxirerimy ihỹre. Aõlõnamy dori rarunyreri. Tiiboho wabiõwana-ribi atarasamy adi ihỹrenyre. <sup>18</sup> Aõwihikỹ erysomy marurunyke. Tii tahe awire, awanale watxireriki aõkõ. <sup>19</sup> Wariõre wese, adeereny aõhõkỹmy ratỹnyre, hãwyy reamyhỹre mytxitxi wese jiarỹ rare adeereny Kristu awo-ki rexilamadỹnyhykemy. <sup>20</sup> Awanareny ararekemy watxireri. Tai tahe warybe wixira-di kia anarybekemy watxireri. Aõhebo adeereny heka arasỹnyre arawiõhenanykemy watxiwãhãre. Timybo reerykõre dori.

<sup>21</sup> Inyõ bede ywina tyhydỹdumy ratxikeki, wadee manarybeke kiamy: aõmybo bede ywina raryberamy teeryteri? <sup>22</sup> Kia Tyyritidỹna-ki roire Abraõ riõre inatxire. JuhUU ludu teòdu-ribi, Haari-ribi, reare tabireludu-ribi. Ijõ, Sara-ribi, ihãwyytyhy-ribi reara, deòdu-ribi aõkõ. <sup>23</sup> Deòdu riõre ibutu dee wese nade. Abraõ hãwyy riõre aõkõre Deuxu rybewahisidỹna xiery reare. <sup>24</sup> Kia ijyy-di rawesenanyreri. Inatxi hãwyy inatxi jurasadỹna wese heka rare. <sup>25</sup> Ijõ Haari inire, deòduni. Iriõre deòdumy rarekemy reare. Sinai Hãwãlò wese tii rare. Kowa tyre-ki bede ywina inydee riwahinyre. Jerusalẽ wesemy roimyhỹre kia mahãdu deòdumy dori rỹira, tariõre-wana. <sup>26</sup> Jerusalẽ tyhydỹna mahãdu, biu ludu tahe deòdu wese aõkõ rare, ixinamy inyboho roire. Abraõ hãwyytyhy riõre wese inyboho roire. <sup>27</sup> Tyyritidỹnaõ dori roire: —Hãwyy ariõreõ beysakre. Birajuakre ariõrekõhãrele beysamy ariõredikire heka. Hãwyy risina riõre sõwetyhyre, hãwyy ihãbu-di ratyre. <sup>28</sup> Waseriõreboho, kaiboho rybe ywisidỹna riõre wesemy ahãtenynte, Ijai wesemy. <sup>29</sup> Iwese ibutu ludu wesemy reareõ aõbina riwidỹnanymyhỹre. Deuxu Tyytybytyhymy reareò. Wiji, tahe kia weselemyhỹre. <sup>30</sup> Tyyritidỹny rarybera: —Biteõnyke deòdu tariõre-wana. Rareasadỹdu ibutumy rimykre. Hãwyy deòdu aõ aõkõ

rimykre tariòre-wana. <sup>31</sup> Waseriòreboho, deòdu riòre wese aòkõ inyboho roire. Hãwyytyhy riòre tahe iny roire.

## 5

<sup>1</sup> Kristu inyboho ritare ixinamy inyweduduõduõlemy roirekemy. Kawese rokoirekemy. Deòdu wese ixyby rukunynenyõkre.

<sup>2</sup> Jiarỹ, Paulo, adeereny rarybereri: inyõ notykyresyna-ò ròðsekeki, Kristu riwiòhenanyõhyymyhỹre. <sup>3</sup> Ixityre ararybeke. Inyõ rinotykyresynanykeki, bede ywina ibutumy tii riyrubunyhyke. <sup>4</sup> Inyõ bede ywina rexiòbitinyemy ratxikeki, Kristu-ribi rexihitxidỹỹnynymyhỹre, ruxetòena tyhyna-ribi rexitare. <sup>5</sup> Deuxu riwaòbitinyrenyryre Tatytybytyhy òraru-ki kia retyhynynyrenyryre. Kia reraòrenyryre. <sup>6</sup> Jesuisi Kristu-ò notyky resyna aõ aõkõ rare. Notyky resynakõ tule aõ aõkõ rare. Inatyhynamy luunamy aõ rare. <sup>7</sup> Juhuu awimy tuu tatyynymahãte, inatyhyna-ki ijera wihikỹmy teamyhỹte, moõ inatyhyna-ribi anaixãwididỹỹnyde. <sup>8</sup> Deuxu aõkõ atarasadu juhUU ixãwididỹỹnyde. <sup>9</sup> Inyõ paõ riwinykeu, ibutenode ritxiwikeki ibutumy ratarinyke. Inyõ ibinamy urihimyò arabedeerynykeki sõwemy ribinadỹỹnyke. <sup>10</sup> Jiarỹ Wanyrỹ retyhynynyryre, kaiboho wawesemy mohõtynybenykemy adireny watxireri. <sup>11</sup> Waseriòreboho jiarỹ waòludu dire. Kia tahe riteòsinyryre notyky resynamy rarybeõre ijõ wamy raryberẽhãre. Kia ararybekeki sõwemy wahemy kanakre. Itxeò tỹnydỹỹna rybe rityhynkremy. <sup>12</sup> Kowa mahãdu òte rexihukemy idi watxireri. Adeereny aõbina diwinymyhỹdenyde.

<sup>13</sup> Kaiboho Deuxu arateònyrenyryre, urile òraruõmy boibeke kaiboho bede ywina-ribi ixinamy boibeke. Wii biwiòhenanymyhỹbenyke, wiluurenkyemy. <sup>14</sup> Bede ywina ibutumy rexibutunynyryre rybe-ki kia tahe rare: —Inyluuke ixilure wese. <sup>15</sup> Wiwana bõrenybenykeki, kaiboho widi buruakeki, bexihãrubeny ibutumy wii mahubenyheny.

<sup>16</sup> Tai jiarỹ rarybere, Deuxu Tyytybytyhy deewimy boibekemy deòbiredỹỹna iwidỹỹõmy boibeke. <sup>17</sup> Deòbiredỹỹna dori Deuxu Tyytybytyhy òluduna-ki ramyhỹre. Wimyy òludurenynyryre. Tai aõbo adeereny awire iwidỹỹ adeereny isirare. <sup>18</sup> Tahe, Deuxu Tyytybytyhy arateòsinyrenykeki, bede ywina ywidỹỹna aõkõ bityhynyke. <sup>19</sup> Deòbiredỹỹna aõna aõnamy dỹỹnana-ki kia roire: aderanadino, aõbinade, raykyõmy, òta òta, <sup>20</sup> suritxoomy àlàdỹỹna, òwòruna wii, òlududỹỹna, aõbinaluu, ihãru, kyara, wobiredỹỹna, wiribihitxina, <sup>21</sup> ibutu aõmydỹỹna ixixiburedỹỹ, axaxaluu, rỹsỹnaluu byrehekỹ, tule ijõ aõna aõna sõwemy kawesere. Inyõ kia aõna aõnawidỹỹ rierykeki, Deuxu òlõna rareasadỹỹdu aõkõ roikre. Tuu rarybere juhuule. <sup>22</sup> Ka heka Deuxu Tyytybytyhy aõmydỹỹnanamy rybena roire: iwahidỹỹna kia rỹire, tii dori inywomy rỹira. Wiluuna, deysana, ywina, ruxetòena, wina, òbitidỹỹnana, <sup>23</sup> ibutu-ò awina, ixidee inytyhyna, ixirydyỹỹna, tai bede ywina ihoõhyryre kia-ò. <sup>24</sup> Kristu hõrõ mahãdu kia itxeò-ki ritidirenynyryre: deòbiredỹỹna, aõmydỹỹnana bina-ribi, deòsana aõmydỹỹnana-ribi

<sup>25</sup> Inyboho Deuxu Tyytybytyhy-di rokoirekeki Deuxu Tyytybytyhyry-ki rakariarenkyre <sup>26</sup> Ixi deàlãnararòsò luukemy aõkõ rakatximyhỹrenyke. Tai tahe ixixiburedỹỹna-di aõkõ, rakatxirenynyke. Wiòbiredỹỹna-di rakatxirenynyõke.

## 6

<sup>1</sup> Waseriòreboho. Inyõ òraruna-txi resekeki, kaiboho ywina-di biòbitinybenyke. Bexihãrumahãbenyke kia òraruna-txi ixẽõmy boibekõkemy. Kaiboho dori, Deuxu mahãdu toite wahe. <sup>2</sup> Wiitxykywydywesemy wii

biwiòhenanybenyke ibutu aõmydỹỹnana-ki. Iwesekeki, Kristu bede ywina tetyhynmahãtenyte. <sup>3</sup> Inyõ ixidee aõlemy rõhõtinykeki, tahe tii aõhyy aõkõ rare, tii rexiitxenanymyhỹre. <sup>4</sup> Ixinamy iny sohoji sohoji taaõmydỹỹna-ò retehemyhỹke, aõhebo rotỹỹnomyhỹremy wahe. Idi tahe ixi aõmydỹỹnale-di kedexityhynomyhỹkre, tabireludu aõmydỹỹna-di aõkõ. <sup>5</sup> Iny sohoji sohoji dori taitxyky riwymyhyke.

<sup>6</sup> Inyõ Deuxurybe erydỹỹna ijõdikewana tabedeerydỹỹna mahãdu-ò ibutumu erylasya wiwihikỹle-di rirareamahãke. Tule bedeery mahãdu heka tohodỹỹna mahãdu-ò aõna aõna wihikỹ riwahinomyhỹre. <sup>7</sup> Ixiitxenadỹỹõmy. Inyõ heka Deuxu itxenadỹỹõmy alõbõrõna-ò iny ribõrõnykeki, tiile tahe raumynyhyymyhyre. <sup>8</sup> Inyõ òraruna ribõrõnykeki, rubule taumy-ki ritake. Inyõ Deuxu Tyytybytyhy deewimy tuu rotỹỹnykeki umytuedeõna ritake. <sup>9</sup> Aõwihikỹ widỹỹhy boibeke. Kia-ki elemy ruburenyõmy. Aõwihikỹ widỹỹhy boibekeki, adeeremy aõwihikỹ wahidỹỹna wese kanake. <sup>10</sup> Ibutumu inydeeremy aõwihikỹ widỹỹ-ki inyboho abededỹỹnanawikeki ibutumu iny rikiwiòhenanyrenomy, rỹkỹirenyke, ityhydỹỹdu mahãduõ bexiywinyhy ahãbenykemy iwiòhedỹỹ-ò.

<sup>11</sup> Tuhe, jiarỹle ariritinykre, Paulo wahe. Betehebemy inihe ritidỹỹna nihikỹ reritinyra wadèb-ò-di. <sup>12</sup> Inyõ ayreny-ki wohyna ixidee rinykemy ratxireri, kia adeeremy õtyky resynamy adi ratxirerihyymyhyre. Kristu itxeòmy tiiboho ritỹnynyrenykeu aõhõkỹmy rotỹỹnyõmykemy rõhõtinyhyre. <sup>13</sup> Notyky resyna mahãdu bede ywina rityhynyõre. Tiile rexityhynomyhyre. Kaiboho irybe-ò boholakemy atxiteri. <sup>14</sup> Jiarỹ arexiwowydynanyõhyymahãkre, Wanyrỹ Jesuisi Kristu itxeò-di areysakre, biu-ò hena òraru-ki wahe. Bede aõmydỹỹnana waki rỹimyhỹre, itxeò-ki retamadỹỹnyra waribi ixãwira. <sup>15</sup> Notyky resynadỹỹ aõ aõkõ rare. Notyky resynadỹỹkõ tule aõ aõkõ rare. Urile biu-ò hena-di boibekele tahe aõ rare. <sup>16</sup> Kia bede ywina bityhynybenomy boibekeki, Deuxu-ribi ywina, ruxetõena, adeeremy kanakemy idi watxireri. Tule Deuxu mahãdu ibutu-ò, judeu mahãdu wese dori ratxireri.

<sup>17</sup> Karibi tako-ò tahe inyõ waixiradỹỹõmy ararekre. Beydỹỹna dori waumy-ki roimyhỹre, Jesuisi rybe rybemy rybedu òraru-ki.

<sup>18</sup> Waseriõreboho, Jesuisi Kristu ruxetõena akireny rỹikemy watxireri. Kie.

## Efesu Paulo Tyyriti, Efesu Hãwã-ò

<sup>1</sup> Paulo, Jesuisi Kristu deòdỹna jiarỹ rare. Deuxudeewimy tahe kia rare. Efesu hãwã ityhydỹdu mahãdu —ò kalemy warybe rewahinyreri. Kai-boho ywimynodu mahãdumy toimahãte. <sup>2</sup> Ruxetòena adeereny kidiatykemy Deuxu-ribi idi watzireri tule Jesuisi Kristu Inynyrỹ-ribi.

<sup>3</sup> Deuxu, Inynyrỹ tybyreny, inyboho tuu reàlãmihỹreny. Tii dori inydeereny wihikỹ inywo ywinamy diwahinyde Jesuisi òraru-ki biukihikỹle wahe. <sup>4</sup> Deuxu inyyreny-ribi rihitxinymy ritare. Inyboho heka tuu roire. Ihetxiu heka inyho aõkõu tii rihitxinymy ritakremy rỹimihỹre, inyboho wahe. Kristu-ki iny rihitxinymy rỹire. Iny òbitimy rỹirakemy rihitxinymy, ywimy nodumy wahe. Kiamy heka rokoirekre Kristuko-txi luuna-di. <sup>5</sup> Ihetxiu tamywimy Deuxu rihitxinymy ritare, inyboho wahe. Iriòreny wesemy rokoirekemy. <sup>6</sup> Kiamy heka Deuxu riwinyre àlana, wohyna-wana tamy rikiwahinyreny tii dori inyluurekí wahe. Kristu hãlubu òrarukile biu-ò henareny iny nade. Iny òrarureny riòwyny taruxetòena wihikỹ òraru-ki. <sup>7-10</sup> Ruxetòena sòwemy inydeereny diwahinyde tii dori ibutumy aõna aõna erydu rare. Deuxu dee wina rybe wòte wese rare. Tahe inydeereny kiditynynykemy idi ratxireri. Tamywimy tahe inydeereny riteòsinyre. Iwese tii ròhòtinyre wese. Bededỹnana rexihukreu. Kristu-ki ibutumy aõna aõna biu-ki bede-ki rỹikremy ihỹre. Kiamy tahe Deuxu ròhòtinyre. <sup>11-12</sup> Kristu òraru-ki Deuxu juhoo iny mahãduy-ribi inyboho rihitxinymy. Tii diwahinyde inydeereny uriònojura jurana. Tii dori ixideewilemy ibutumy aõhebo rotỹnymihỹre Deuxu kia hitxidỹna mahãdu ixidile wowydyna mahãduò rỹirakemy rỹimihỹre. Inyboho juhoo rityhynyreny Kristu-ò. <sup>13</sup> Kaiboho kiaõ toimahãte. Juhoo rybe inatyhy-ò taholateny teu, tetyhynymihỹteny te tarasa Rybewihikỹ-ò wahe. Tai tahe Deuxu Tyytybytyhy-di ratidỹna wesemy iny dee ritidimihỹre. Deuxu Tyytybytyhy dori tii kidiwahinykemy rarybere, ihetxiu wahe. <sup>14</sup> Uriòno jura jurana Deuxu Tyytybytyhy rare inydeereny. Deuxu tahòrò mahãdu ritakreu, tuu reàlarenykre tuu, inyboho dori kia mahãduò roire.

<sup>15</sup> Tahe jiarỹ, Paulo, tule umy raholamahãre Jesuisi Kristu atyhydỹna-ò, tule aluuna ityhydỹdu-ò. Tai tahe Deuxu-ò àlana-di araxitòedỹnyrenymahãre. Wanohòti aribireny rosaõhymihỹre. <sup>16-17</sup> Deuxu tahe Jesuisi Kristu biu loosòna tyby rare. Tii araykyreny-ò bedeeryna kidiwahinykemy watzireri, awolyrana kidiwahinykemy watzireri. <sup>18</sup> Tai tahe araykyrawoni ritỹnynykemy watzireri. Tai kaiboho bierybenykre Deuxu iryna. Tule ityhyna biu loosòna-di bierybenyky watzireri. <sup>19</sup> Deuxu taruruna sòwemy diwahinymihỹde ityhydỹdu mahãdu-ò. Iruruna tahe aõni rare inydeereny uriòno jura jurana. Kia tule bierybenyky watzireri. <sup>20-21</sup> Kia irurumy inyboho tuu robirenyre, Kristu rubu-ribi rexixixanyreu, taruruna weribi ronykemy disỹnydeu, biukihikỹle wahe. Kristu tahe ibutu ruruna wixira wixira ratyre rare, ibutu wedu ratyre, ibutu dinodu ratyre, ibutu deòdỹdu ratyre. Ibutuni ratyre tii rare. Wijnani ratyre, tule kanakremy ihỹreni ratyre rare. <sup>22</sup> Deuxu tahe ibutu aõna aõna wixira wixira Kristuwarawo-ò ritidire tai tii ibutuwedukremy. Tii ibuturati wesemy rare. Kia tii ihỹre dohodỹdu mahãdu-ò, iwedu wahe. <sup>23</sup> Dohodỹdu mahãdu tahe Kristumy wese rare. Kristu dori ibutu aõna aõna ritỹxinymihỹre.

## 2

<sup>1</sup> Juhuu kaiboho rubumy tãimahãte òraruna òraru-ki. <sup>2</sup> Juhuu kaiboho bedeaõmydỹnana bede-ki toitemahã juhUU Satanasi deòdỹna tetyhynomy toitemahã. Tii bedeyhy ruruna dinodu rare. Ityhydỹdukõdu mahãdu wiji dori rityhynomy rỹira, itxiòdỹdu mahãdu wahe. <sup>3</sup> Ityhydỹdukõdu mahãduy-ki juhUU tule inyboho roiremahã —ibutumy ixideerenywymy inyboho riwinyreny; inyraykyreny wydyna-deewimy tule inyboho riwinyreny. Ehehewidỹdu inyboho roiremyhỹ, tuu ratybienymy rarehy dori tuu rare. Iwese ijõ roiremyhỹ wese. <sup>4</sup> Deuxu tahe sõwetyhymy ruxetòena diwahinymyhỹde, inyluurenyreki. <sup>5-6</sup> Deuxu inyboho rurudỹnyre Kristu-wana rubu-ribi riixixanyreny. Kristusỹ-ki biu-ki tii inyboho risỹnyre tai rokonyrenykemy. Iruxetòena òrarukile abiu-ò henareny dire. <sup>7</sup> Iruxetòena kiditeòsinykre bededỹnana robehemy roireki wahe. Iwese sõwehyymy iruxetòena diwahinyde wesemy. <sup>8</sup> Tarasana Deuxu ruxetòenaribile nade aityhydỹnareny òraru-ki tuu rare. Iny-ribi aõkõ nade. Deuxu wahidỹna rare. <sup>9</sup> Iny-ribi rarybekre inyõ ixityhydỹmy tahe aõkõre Deuxu ruxetòenakile tuu rare. <sup>10</sup> Tii tahe ibutumy iny riwinyreny. Òbiti aõmydỹnana widỹdukemy iny riwinyre Jesuisi Kristu òraru-ki. Deuxule juhUU rõhõtynyre òbiti widỹdumy aõbo rokoirekemy.

<sup>11</sup> Tahe kaiboho uritere nohõti losaõmy kaiboho judeukõdu mahãdu toite juhUU mahã. Kiamy judeu mahãdu arãninimyhỹreny, notykyresykõdu mahãdu wahe. Tii dori notyky resydu mahãdu roire, iyresynadireki wahe. <sup>12</sup> Juhuu tahe aruta wesele toite Kristu-ki aõkõ. Judeu mahãdu-ribi ri-hitxinymy nyimyhỹde. Deuxu rybe ywisidỹna ludu aõkõ toite. Araròsõna renyõhyre. Adeuxurenyõhyre bede bedemy. <sup>13</sup> Juhu irehemy Deuxu-ribi toite mahã. Tahe wiji Jesuisi Kristu hãlubu òraru-ki araòhòdỹnymy toite. <sup>14</sup> Jesuisi Kristu tahe iny ywidỹna rare. Kyarana tahe òtity wese itya-ki rỹimyhỹre judeu mahãdu aribi kia rihitxinynyre. Tahe kia òtity ritxiwire tahe sohoji mahãdulemy riwinyre. <sup>15</sup> Tahe Kristu rurureu tahe ixãwire kia bede ywina. Tahe inatxi wimy òludu mahãdu sohoji iny tỹmyrahyylemy riwinyre. Tahe ywina ròhònnyre wiwana ributunyra tahe Deuxu taluuna tamy riwahinyra. <sup>16</sup> Jesuisi taitxeò-ki rurureki, ywina rieryreny. Tahe kyarana-ribi riixãwididỹnyre. <sup>17</sup> Jesuisi tahe ywinamy rarybere iòhò ludu kaiboho wahe tule irehe ludu, judeukõdu mahãdu wahe. <sup>18</sup> Tahe kaiboho jiarỹboho-wana sohoji Deuxu Tyytybytyhy òrarukile Deuxu-ò rekexitòenyrenyke. <sup>19</sup> Kawese tahe kaiboho ityhydỹdu mahãdu-ò talote. Iny-ribi lahitxi aõkõ toite, Deuxusỹ mahãduõle heka toite. <sup>20</sup> Deuxu rybedu, tadeòdu-wana hetoõ wesemy kaiboho boibekre. Jesuisi Kristule iko ludu mana wese rare. <sup>21</sup> Jesuisi Kristu òraru-ki wiwesehyyle heto awimy rỹire. Tai Inynyrỹ hetotyhy relemy rexihumyhỹre. <sup>22</sup> Kaiboho tule matybienybenykre Deuxu Tyytybytyhy hetoõ wese wahe.

## 3

<sup>1</sup> Tai jiarỹ, Paulo, rotena-ki nodu wesemy rare Jesuisi Kristu òraru-ki. Judeukõdu mahãdu dee kiamy heka watxiwãhãre, adeereny wahe. <sup>2</sup> Deuxu ruxetòena wadee riwahinyre. Kaiboho aõbo tuu taholatenyõmahãte. <sup>3</sup> Deuxu dori tawòtena diteòsinyde wadee. <sup>4-5</sup> Jiarỹ kiamy juhUU reritinyriòrere katyyritikile wahe. Idi mariabenykeu bierybenykemy idi watxireri, timybo Kristu wòtena rybe reeryremy wahe. Kristu wòtena tahe ihetxiu ibutu inyõ riteòsinyõhyre. Wiji tahe riteòsinymy ihỹre Deuxu Tyytybytyhyle tahe deòdu-ò, rybedu-ò ritỹnynymy ihỹre. <sup>6-7</sup> Kiamy heka rare: kaiboho, judeukõdu

mahādu, wii ributunyre inyboho-wana judeu mahādu wahe. Uriōnowi jurawi juramy idi rokoirekre, sohoji mahādulemy wahe. Kristu Rybewihikỹ òraru-ki ityhydỹỹdu mahādu-ò rirònyrenyrene. Kia rybe-di rybedumy diwateònyde, ruxetòena wahidỹỹnaò wadee nade Deuxu ruruna sòwe-ribi. Ityhydỹỹdu mahādumy-ribi jiarỹ aò aòkòmy watxiwāhāre retyhynytyhymy aòkò watxiwāhāre. <sup>8</sup> Ihārele Rybewihikỹ rybedumy ararekre Kristu aòmỹdỹỹnana heka iny raykywydyna ratyre awimy ihỹre. Kiamy judeukòdu mahādu-ò arelyykemy riwahitxinyre. <sup>9</sup> Ibutu inyò rybe wòtena aritỹnynykemy watxiwāhāre juhū Deuxu Jesuisi-wana ibutumy aōna aōna riwinyre kiau rybewòtena riwòmỹ roimyhỹre Deuxu-ki. <sup>10</sup> Wijina tahe riteòsinykemy ihỹre dohodỹỹna-ki. Tai tahe ibutumy biu-ribi rurunadu, bedeerydỹỹdu rierykemy timykibo Deuxu bede erysyna-di raremyhỹ ibutumy aōna aōna erysyna-di. <sup>11</sup> Iwese Deuxu ibutumy aòhebo rotỹỹnykemy ratximyhỹre wese iny rierykre, Inynyrỹ Jesuisi Kristu òrarukile wahe. <sup>12</sup> Tai tahe iny rexideòsinymyhỹre brebuòlemy Deuxu ixitòenadỹỹna-di Kristu dori inyboho rityhynymyhỹre. <sup>13</sup> Tai kaiboho ixiiiodỹỹrenyòmỹ ahāke, jiarỹ aòhòkỹmy ratỹỹnyreki kia dori awowydyna rare, waaòhòkỹmy dỹỹnana wahe.

<sup>14</sup> Tai tahe umyreny Deuxu-ò rexitòenyre Inynyrỹ Jesuisi Kristu tyhy-ò wahe. Ibutu sỹ mahādu tyby Deuxu rare. <sup>15</sup> Ruruna adeereny kidiwahinykemy idi watxireri, tawowydyna sòwe-ribi wahe. <sup>16</sup> Deuxu Tyytybytyhy rurutyhy araykywo-ò kidiwahinykemy watxireri. <sup>17</sup> Tai Kristu aworeny-ki kanasỹnymyhỹkemy rahòtinymahāre atyhyna direki kaiboho heka wiluutyhymy boibekemy watxireri. <sup>18</sup> Tai ibutu ityhydỹỹdu mahādu-wana Kristu luuna bierybenyke. Inyò Kristu luuna awire rieryòtyhy. Ihārele tahe bierybenyke iwese rare wesemy. <sup>19</sup> Tai Deuxu-di bexilỹxinykemy idi watxireri.

<sup>20</sup> Deuxu iruruna dire. Tai iny ixitòena ratyre inydeereny kidiwahinykemy idi ihỹre. Iny irurudireki wahe. <sup>21</sup> Dohodỹỹdu mahādu wowodyna riwahinykemy tamy watxireri, aōu aōu wahe. Bededỹỹnana konana-ò wahe. Kie.

## 4

<sup>1</sup> Inynyrỹ deòdu arixidu jiarỹ rare. Arexitòenykre inihe adeereny. Yrubuna-di aòhebo botỹỹnybenykeny adireny watxireri. Tai tahe Deuxu-deewimy boibekre. <sup>2-3</sup> Tii dori juhū adeereny irydu rare òbitimy boibekemy xiwedeòmỹ boibeke, ele eleòmỹ; wii biwiòhenanymy; luuna-di marurunymy boibeke. Ixi wesehyylemy boibekemy. Tai tahe Deuxu Tyytybytyhy aratorabutenyrenykre ywimy nodu dori kia diwiòhenanymyhỹde. <sup>4</sup> Sohoji mahādule rare, sohoji Deuxu Tyytybytyhydile. Umy sohoji wese, ityytyby sohojilemy wese rare. Kaiboho tule araròsònareny sohojile rare, kaiboho ityhydỹỹdumy terònyteki wahe. <sup>5</sup> Inynyrỹ sohojile rare inytyhynareny sohojile rare. Tule iny ratisebena sohojile rare. <sup>6</sup> Deuxu tule sohojilere, ibutu tybomy rare ibutu ratyre rare. Ibutuy-ki tii rare. Tule ibutu rawo-ki ratxireri. Ibutumy aòhebo rotỹỹnykemy iny-di riwisỹnyreri tawowina-di. <sup>7</sup> Kristu tahe iny sòwemy rareki sohoji ruxetòena sòwemy sohoji-ò riwahinyre. <sup>8</sup> Kiamy heka ritina-ki roire: —Iu Jesuisi raòwònyreu biu-ò ròtena ludu mahādu ridyre idi wahidỹỹna inydeereny diwahinyde. <sup>9</sup> Betehebenyke rybeweereò-ò raòwònyremy. Aòmỹbohe kia rarybereri. Tahe juhū dori surawo-txi robehere kiakékile tahe idi raòwònyke. <sup>10</sup> Kia robeherele taheka raòwònyre biu-ratyremy ibutu aōna aōna-di rexilỹxinykemy. <sup>11</sup> Inyò-ò deòdỹỹna mahādumy rarekemy diwahinyde aòwihikỹ widỹỹ wahidỹỹna wahe. Ijò-ò Deuxu rybedumy mahādu rarekemy diwahinyde. Ijò-ò Rybewihikỹmy rybedu



mahādumy rarekemy diwahinyde. Ijō ityhydỹỹdu mahādu yrubudỹỹdu mahādumy rarekemy. Ijō bedeerydỹỹdumy mahādu rarekemy. <sup>12</sup> Ibutumy kia mahādu ityhydỹỹdu riwiòhenanykemy idi ratxireri. Tai ityhydỹỹdu iaõmysỹdỹỹna riwinykre. Kristu umy wesemy ritibiedỹỹnykemy. Ibutu dee diwahinyde. <sup>13</sup> Ikonanau tahe ibutumy wiwese wesemy rōkōhōtinyrenyke, iny tyhynareny wahe. Deuxu Riòre rikierytyhyrenyke, iny òbitimy rokoireke, Kristu òbiti wesemy rokoireke. <sup>14</sup> Tohouā wesemy aōkō rokoireke inytyhynareny-ki. Uritere witxiradỹỹrenyōmy ibutu bedeeryna witxira witxira-di. Iwese yhy tiò tiò aō riwymyhỹre wese kia bedeerydỹỹdu rare. Iwitxira tyhydỹỹna-ò kia ityhydỹỹdu mahādu ridykemy ratximyhỹre. Ijō inatyhy rybe weselemy rarybere. Tahe aōkōre. Kia-ò ijohonarenyōmy. <sup>15</sup> Tahe luuna-di inatyhymy marybebenyke. Kristu aōmydỹỹnana-di bexilỹxinybenyke idi maumynybenyke. Tii dori iny wedureny rare. <sup>16</sup> Ityhydỹỹdu mahādu heka Kristu umy wese rare. Ityhydỹỹdu sohoji sohoji wijura jura weselemy rỹira. Kristu ibutumy riwiòhenanymyhỹre iwese umy hona umy wese. Umyjura kia ibutumy iaõmysỹdỹỹ dire. Wiweselemy tahe raaõmysỹdỹỹnykeki tai tahe umy awimy rariamyhỹke. Ijō widerakeki tahe, Kristu umy raumynyōtyhy.

<sup>17</sup> Katahe Inynyrỹnimy adeereny kiamy rarybemyhỹre. Ityhydỹỹdukōdu mahādu wesemy aōkō boibenybeke. <sup>18</sup> Iraykyreny bedeluru-ki ihỹrenyke. Ieheherenyre, rieryōrenyke. Tai tahe Deuxu biu-ò hena umyuedeõna rieryōrenyke. <sup>19</sup> Ixāruna ihoōhyre. Urile ibutumy òraruna-txi rexiwahinyrenyke. <sup>20</sup> Kia Jesuisimy aōkō teerytenyke inyribireny wahe. <sup>21-22</sup> Jesuisi inatyhyna teerytenyteki, ibutumy aōbina bina ixi-ribi bihitxinyke. <sup>23</sup> Ibutumy awo arayky-wana bexitỹmyranyke. <sup>24</sup> Deuxu umy tỹmyra wesena-di bexityhinybenyke. Kia heka òbiti rare; inatyhy rare.

<sup>25</sup> Tai tahe ruirenyōmy wahe. Inatyhymy iny witxira-ò marybemahābeny. Wiwese hyylemy widi rakatximyhỹrenyke. <sup>26</sup> Makyarananymahā-wana tahe urile òraru-txi ixēõmy. Ixi-di txu irōtedỹỹõmy awobinana-di <sup>27</sup> Tule Satanasi deradỹỹna-ò nokõmy. <sup>28</sup> Inyō juhuu wasidureki, ixityre tii wasiõmy. Tii wiji raaõmysỹdỹỹkre aõna aõna wiwihikỹ tebò-di riwinykemy wahe. Tai tahe iaõdikre iny aōkõmy rỹira riwiòhenanyke. <sup>29</sup> Kai uritere rybebinaõ ary-ribi iòlòdỹỹõmy Rybewiwihikỹlemy marybemahā. Kia rybe-di ijohodu riwiòhenanymyhỹrele kynyhetuukre. <sup>30</sup> Bibedeõtiidỹỹõmy Deuxu Tyytybytyhy. Tii dori arayrubunymyhỹre tarasanatxu-ò. <sup>31</sup> Òbina rybemy widi nokõmy, wimy ujõmoõmy, adebure ijà ijàõmy, aōbinamy inymy ijyyõmy, rybe-bina-di iny ihetedỹỹõmy. <sup>32</sup> Tahe ibutu dee ywimy boibekre, awimy wahe ainytyhymy iny-di boibekre. Aōbinamy iny adee rarybe-wana tahe iribi bexinohōtilosanymy biixāwididỹỹnymy Deuxu dori inyòraru riixāwididỹỹnyreki wahe.

## 5

<sup>1</sup> Deuxu inytybytyhyreny rare. Tai tahe iwese uladu tyby wesemy rotỹỹnymyhỹre wese, kaiboho Deuxu wesemy matximahābenyke Deuxu riòre luunadu wesemy matximahābenyke. Wiluurenyke, Kristu dori aluurenyre. <sup>2</sup> Tule rexiwahinyre xiwe wesemy iny ritarenykemy. Tai tahe Deuxu dee kia lỹnyrena wiwihikỹ wese rare.

<sup>3</sup> Tahe òta òtarenyōmy. Ibutumy aõna aõna bina bina widỹỹrenyōmy. Kai-boho dori ityhydỹỹdu mahādu toite. <sup>4</sup> Rybebinamy uriteretere rybeõmy. Ixideòsidỹỹõmy. Kia widỹỹna tahe ibinare. Tahe aōwihikỹõ biwinyke, Deuxu deàlànamy. <sup>5</sup> Òta òtadu tahe Deuxu òlòna wahidỹỹna ritaõtyhy, iny binaõ aōkō, inywobire aōkō. Kia Deuxu tyhy biukōdu mahādu rare. Bierybenyke kia.

<sup>6</sup> Itxenadỹỹ rybe-ò ijohonarenyõmy. Ityhydỹỹdukõdu mahãdu Deuxu rybe riywinyõmyhỹre. Tai tahe Deuxu reburemyhỹre tamyreny. <sup>7</sup> Tiiboho-wana ratxiõhyymyhỹrenyre iaõmydỹỹnana binareki. <sup>8</sup> Hỹỹnau kaiboho bedeluru-ki toitemahã. Tahe wiji Inynyrỹ loosõna-ki toite. Loosõnadỹỹdu riõre we-selemy boibeke. <sup>9</sup> Aõbo loosõna-ribi nade tahe awire, õbitire, inatyhyre. <sup>10</sup> Tai aõbo Inynyrỹdeewi kia riteðsinyre. <sup>11-12</sup> Iwese bedelurubina widỹỹdu aõhebo rotỹỹnyre wese uritere iwidỹỹrenyõmy tahe teðsaremy tamy mary-bebenyke. Aõbo tiiboho wasimy aõhebo rotỹỹnymyhỹre ixỹruna adee rare tuu maryhemahãkeki. <sup>13</sup> Ibutumy aõna aõna loosõna ritỹnyre. Tai tahe iny aõmydỹỹnana loosõna ritỹnyrekeki, iny rierykre itỹnydỹỹna dori loosõna rare. <sup>14</sup> Tyyritiõ kia wesemy rỹire: —Inyõ rõrõmy rỹikeki, rexixake rubuy-ribi rỹike. Kristu tahe araloosõnanykre.

<sup>15</sup> Aõhebo botỹỹnybenykeð bexiije benyke. Itxỹte widỹỹdu mahãdu wesemy aõkõ ahabenyke, bedeerydu mahãdu wesemy ahãbenyke. <sup>16</sup> Iõnodỹỹõmy abededỹỹnana. Wiji txu bededỹỹnana tahe ibinatyhymy rare. <sup>17</sup> Tai tahe itxỹteõmy ahãke. Bierybenyke aõbo Deuxu dee wire. <sup>18</sup> Vĩĩ mona-di axaxa rubudỹỹna wesemy aõkõ matxibenyke. Kia tahe aõnityhyre, tumodu wahe. Tahe Deuxu Tyytybytyhy heka atykymy ralõmy boibeke. <sup>19</sup> Mawinymy bexirybenyke awo-ki. Bexirybenybenyke Inynyrỹ-ò awi-ribi bitxienymy mawiunyke. Rybewiumy marybeke. <sup>20</sup> Deuxu inytybyreny-ò ibutumy bealãmahãbenyke Jesuisi Kristu Inynyrỹni òraru-ki tahe bexitõenyke. <sup>21</sup> Kaiboho ibutumy widee bexiywinyhyymy ahãbenykre.

<sup>22-24</sup> Iwese dohodỹỹna mahãdu Kristu rybe rityhynymyhỹre wese, hãwyy tahãbu rybe riywinyke, ibutu aõmydỹỹnana-ki wahe. Hãbu dori tahãwyy dinodu wese rare. <sup>25</sup> Ibutumy hãbu tahãwyy luukemy. Kristu dori dohodỹỹna mahãdu luureki ture. Tamy tii rexiwahinyre rurukemy. <sup>26</sup> Tai tahe kia õbitidỹỹnamy rurure. Iwese bee aõ rasuhõmyhỹre wese, tarybe risuhõmyhỹre. <sup>27</sup> Iòraru-ki tahe Jesuisi dohodỹỹna mahãdu wiwihikỹõ ixidee rinykre. Òbiti mahãdulemy rarekre, aõbina binaõ heka tai rỹiõhyymyhỹre. Awi mahãdu widỹỹdumy rarekre. <sup>28</sup> Kiamy heka hãbu tahãwyy-di rỹirake. Iwese hãbu taumy luure wese tahãwyy luumy rỹirake. Iny tahãwyy luukeki, kia-di ixiluuke. <sup>29</sup> Iny taumyderamy rỹiõhyymyhỹre. Tahe aõkõre tule rexiõwenymyhỹre rexiwesenanyymyhỹre. Iwese Kristu dohodỹỹna mahãdu riwisinanyymyhỹre wese. <sup>30</sup> Inyboho dori Kristu mahãduõ roire. <sup>31</sup> Kiamy heka Ritina roire: —Tai heka hãbuõ tybyboho heto ririmyhỹre tahãwyy-wana wii ributunymy roirekemy. Inatxi umy ribi sohoji umyhyymy rònõnymyhỹre. <sup>32</sup> Kia aõmydỹỹnana heka ierysysirare. Tahe Kristu tohodỹỹna mahãdu-wana rarybereri. <sup>33</sup> Ihãrele tahe hãbu tahãwyy luumy rỹira iwese ixiluumy rỹira wese. Tule hãwyy tahãbu rityhynyke.

## 6

<sup>1</sup> Uladu mahãdu tybyboho rybe rityhynymyhỹre Inynyrỹ òraru-ki. Kia tahe õbiti rare. <sup>2</sup> Boo adi-wana bityhynybenyke. Kia tahe bede ywina rybe juhoo rare. Tule Deuxu rarõsõna kia bede ywina rybe-wana rare. <sup>3</sup> Kia biywinybenykeki, awimy mabeke, abededỹỹnana irehemy mabeke kabede-ki. <sup>4</sup> Uladu tyby, uladuse, ariõrereny adeburehyymy idi iwisỹdỹỹrenyõmy. Tahe aõki reðsakeki tii riõbitinykemy tamy marybebenyke. Inynyrỹ deõsidỹỹna-di tamy marybebenyke.

<sup>5</sup> Deõdu mahãdu kabede-ki awedureny bityhynybenyke. Awo-ribi tyhy tamywimy biwinybenyke. Bexiijemy ywimy biwinymy. Iwese Kristu dee tewinymahãte wesemy. <sup>6</sup> Aõ tabiteriki aõkõ biywinyke. Iwese Kristu deõdu

wesemy mabeke. Deuxu dee wina awo-ribi biwinyke. <sup>7</sup> Deysana-di ibutumy òbitimy bisyðdÿÿnyke. <sup>8</sup> Ibutumy deòdu ada deòdukòdu Inynyrÿ-ribi aõna aõna rimyke. Tamy aõwihikÿ riwinykeki. <sup>9</sup> Tahe wedu mahãdu, kaiboho eòdu mahãdu-ò kia weselemy mabeke. Brebudÿÿ rybe-di eòdureny-ò rybeõmy. Awedu dori eòdureny wedu tule biu-ki ratximyhÿre. Tamy dori ibutumy wiwese wesele rare.

<sup>10</sup> Ibutu-ò tahe ikonanamy ararybekre. Inynyrÿ ruruna-di bexirurudÿÿnyke. Iruru tahe aõni rare. Tahe ixidee bimyeke. <sup>11</sup> Bexityynyke aõbinanatyy-di, debõna aõmydÿÿnana bimyeke. Tai tahe Diabo rybemy nodu biòludunyeke. <sup>12</sup> Iny ijusunareny dori moo iny-wana aõkõ rare. Iwitxira Satanasi ruruna-di rare. Dinodu ruru-di rare, kabede luruhukÿ wedu-di wahe. Tyytybybina ruru-di rare, biukihikÿle. <sup>13</sup> Tai tahe ibutumy Deuxu debõna aõna aõna bimyeke. Idi txubina-ki biòlòdÿÿnyke. Aijesu bitakeu tahe, òraru rÿike. <sup>14</sup> Inatyhyna-di awereysana birarutxynyke. Òbitina-di abreti bitòbònyke. <sup>15</sup> Bexiywinyke ywina Rybewihikÿ rybena-ò. Tii heka adikre. <sup>16</sup> Ityhyna tahe awyhyitxenamy ihÿre, idi eorutà bitÿtenyke. Idi tahe Satanasi heòty wyhy biturinyke. <sup>17</sup> Tarasana tahe arataana wese rare. Deuxu Tyytybytyhy mayrehe heka Deuxu rybe rare. <sup>18</sup> Deuxu Tyytybytyhy-ki ibutumy ixitòedÿÿhyemy atximahãbenyke. Kia-di tahe biriranymy, boibeke. Ityhydÿÿdu mahãdu ibutumy bexitòenyhyemy boibeke. <sup>19</sup> Tule wadee, bexitòenybenyke. Deuxu wadee rybe kidiwahinykemy wahe. Tai brebukòlemy Rybewihikÿ aritÿnynykre, ierysy siramy wahe. <sup>20</sup> Jiarÿ Rybewihikÿ deòsidÿÿdu rare wawomati rerotidire hãrele wahe. Kristumy arelyykemy watzireri. Tii heka wawidÿÿnare.

<sup>21-22</sup> Txitxiò tahe ityhydÿÿdu seriòreõ rare, waluunaduõ rare. Inynyrÿ rybe-di òbiti aõmysÿdÿÿdu rare. Tai tahe tii adeereny reteònyre waaõmydÿÿnana adee ritÿnynykemy. Awo riteysadÿÿnykremy.

<sup>23</sup> Ywina ibutumy ityhydÿÿdu mahãdu seriòreõ kanakemy watzireri. Luuna tyhyna-wana kanakemy Deuxu, inytyby-ribi, Jesuisi Kristu, Inynyrÿ-ribi wahe. <sup>24</sup> Ruxetòena kanakemy watzireri Jesuisi inatyhymy luunadu mahãdu-ò wahe. Tii Kristu rare, Inynyrÿreny wahe.

## Filiposi Paulo Tyyriti, Filiposi Hãwã-ò

<sup>1</sup> Paulo, Tximòtxi-wana Jesuisi Kristu deòdureny roire. Ka tyyriti tahe rewahinyrenyleri Filiposi hãwã-ki ityhydỹỹdu mahãdu-ò. Ityhydỹỹdu yrubudỹỹdu mahãdu-ò tule rewahinyrenyra dohodỹỹna wiòhedỹỹna mahãdu-wana. <sup>2</sup> Ruxetòena, ywina-wana Deuxu-ribi adeereny kanakemy watzireri tule Jesuisi Kristu Inynyrỹreny-ribi.

<sup>3</sup> Rexitòenyreu, tiu aribireny wanohòti rosaòhyymyhỹre. Deuxumy reàlàwãhãre umyreny. <sup>4-5</sup> Wadeysamy watxiwãhãre Rybe tymyra wihikỹ tewiòhenanymahãtenyteki, juhuu, wiji tule ahãtenyete. <sup>6</sup> Deuxu iaòmỹsỹdỹỹna wihikỹ inyworeny-ki rexideleny. Tahe Jesuisi Kristu bededỹỹnana txuu heka rexihumy kia rỹikre. Kia tahe reerytyhyre. <sup>7</sup> Kaiboho wawana Deuxu ruxetòena luuna-wana widee inyboho riubỹtỹnyre. Ròtena-ki rarewãhãu, tule ròtenaribiòlòmy rarewãhã. Tule Rybewihikỹ retỹnynymy rarewãhã kiamy heka rahòtinymahãre, wawo-ki adireny rahòtinyhyymahãre. <sup>8</sup> Sòwemy arawehityynanyleri. Deuxule kia rierymyhỹre. Jesuisi Kristu ruxetòena uludumy iny widi roire. <sup>9</sup> Kia ixitòedỹỹna tule Deuxu-ò rewahinyre umyreny. Aluunareny sòwemy rỹikemy rexitòenyre. Tule araykywydynareny riixidorudỹỹnymyhỹke. <sup>10</sup> Tibo awityhymy rỹira kaiboho biijebenykemy rexitòenymahãre. Tule inatyhywidỹỹdumy rarekremy tamy rexitòenymahãre òbitihyylemy rarekemy Jesuisi Kristu bededỹỹnanatxu-ò. <sup>11</sup> Òbitidỹỹna bederaty wesele rare. Kaiboho oworu taraty-di rỹimyhỹre wese tỹxihikỹlemy òbitidỹỹna-di matxibenykemy rexitòenymahãre.

<sup>12</sup> Jiarỹ ròtena-ki rãireu, kia tahe Rybewihikỹmy rybe riwiòhenanyra. <sup>13</sup> Kowa dori ibutumy yrubudỹỹdu mahãdu roholare, dinodu heto itxeredu mahãdu wahe. Tai tahe bierybenykemy tuu rarybere. <sup>14</sup> Jesuisi Kristu òraru-ki tahe ròtena-ki rãimy rarewãhã. Ibutumy iny tahe kia rieryre, iòraru-ki. Waròtena òraru-ki tahe ityhydỹỹdu mahãdu Inynyrỹ aòmỹdỹỹnadile ròhòtinyre, tule Deuxu rybe rarybemyhỹre ruberuòhyylemy ixitòedỹỹna-di. <sup>15</sup> Ijò heka ixityhydỹỹmy Rybewihikỹmy rarybemyhỹre. Ijò tahe inatyhymy Rybewihikỹmy rarybemyhỹre. <sup>16-17</sup> Rierymyhỹre waròtena Rybewihikỹ òraru-ki rare. Ixityhydỹỹna mahãdu tahe inatyhy òbiti aòkò rare. Aòhòkỹmy adotỹỹnykemy wadi ihỹre Rybewihikỹ-di. <sup>18</sup> Aòhebohe arotỹỹnykre? Arabedewomy aòbo ada areysakre aòbo. Areysahyymy ararekre. Kristu rybe dori rarybemy rarehyymy iny inatyhynadiremy ada aòkòremy. <sup>19</sup> Jiarỹ areysatyhykre ròtenawo-ribi dori aròhònykre. Aixitòedỹỹna, Jesuisi Kristu Tyytybytyhy riwawìòhenanykreki. Kia tahe reeryre. <sup>20</sup> Deuxu aòmỹdỹỹnana ariwiòhenanykemy watzireri waumy-di. Jiarỹ arurukeki ada aòkòkeki aòbo. Jiarỹ araixỹruòtyhykemy watzireri aòhebo arotỹỹnykreki. <sup>21</sup> Kristu dee warumy ararekre. Tahe arurukeki kia tule wadee awire. <sup>22</sup> Tahe ararekeki Kristu dee araaòmỹsỹdỹỹmy arareke iny-ò Rybewihikỹmy ararybekre. Tibo awityhyre reerykòre. <sup>23</sup> Tahe ixityre aròhòtiwydynanykeki kiamy heka rahòtinyreri. Arakre Kristuòhyyle heka Kristu-ò arakele awire. Tii heka awityhyre. <sup>24-25</sup> Atòenarenykile tahe warumy ararekre. Tai tahe kabede-ki ararikre aityhydỹỹna-di beysakemy maumynykemy. Tai tahe kaki ararekre. <sup>26</sup> Iu ayreny-ki aralokreu, Deuxumy beàlàbenykemy watzireri, ayreny-ki ixityre watzireriki wahe.

<sup>27</sup> Biyrybenykemy adireny watzireri iwese Kristu tyhydỹydu mahãdu rỹira weselekemy adireny watzireri. Ayreny-ò arakeki aõbo ada araõkeki aõbo ijyy wihikỹ-ò adoholamyhỹkemy watzireri. Kaiboho wiwana wanale inatyhyna rybe-di tarybemahãtenyete. <sup>28</sup> Uritere brebuõmy aõludu lau Rybewihikỹ òludu lau wahe. Tamyreny tahe kia rubu bina bede urihixina rare. Tahe adeereny biu-ò hena rare. Kia Deuxu-ribi nade. <sup>29</sup> Aõ Kristu tetyhynytemy sohojile aõkõ tahe tamy aõhõkỹmy tatỹỹnytenyete tule. <sup>30</sup> Inyboho dori ibutummy wiwana aõhõkỹmy rotỹỹnykre. Jiarỹ sõwemy aõhõkỹmy adotỹỹnymahãde. Kia-ò tahe taholatenyete wamy.

## 2

<sup>1-3</sup> Kaa aõbohe rỹire wiõhedỹỹna luuna-wana Kristu-ki, biõwana aõbo Deuxu Tyytybytyhy-ki. Kohe, kia ibutummy Jesuisi Kristu kilehekỹ rỹire. Ibutummy tahe wiluumy boibeke, wiwesehyyle mohõtinybenyke, wii bitõrabutenybenyke. Tai tahe areysakre aõrarureny-ki. <sup>4</sup> Iximy xiwederenyõmy. Tahe wiribi lahitximy boibeke, aõkõmy ix-di marãkyknybenyke. Iny sohoji sohoji aõna aõnadirenyremy ix-di nohõtirenyõmy. Tahe hitxihitximy bõwidỹỹke iny sohoji sohoji iny witzira aõmydỹỹnana yrubudỹỹmy marãkykywydynanyke. <sup>5</sup> Iwese Jesuisi Kristu inywitzira aõmydỹỹnana-di rõhõtinyinmyhỹre wesele, kaiboho mohõtinybenyke. <sup>6</sup> Jesuisi Kristu juhuhyy raremyhỹ, Deuxule rarehãre. Deuxururu tahe rimoõhyyre. <sup>7</sup> Tahe iribi ritare kaò idi kodobehekemy deòdu weselemy. Tahe inyumoõ rimyre kaki inylemy rarekemy. <sup>8</sup> Tamy tahe ibinatyhymy nade itxeò-ki rurukemy wahe. Ibutu aõbo kaki riwinyke heka, riwinyre. Tai tahe ibutu ratyre Deuxu Jesuisi risỹnyre. Ibutuni ratyre ini rare. <sup>9-11</sup> Kiani-ò tahe ibutummy tatiowomy resekemy rỹire, biu mahãdu, bedeludu mahãdu, suwomy rỹira mahãdu. Tahe ibutu rybe witzira witziramy iny rarybemyhỹre: —Jesuisi Kristu ibutu wedu rare. Deuxu inytybummy ibutummy reàlãmehỹre. Kiamy waseriòre waluuduboho. Awana watzireriki tule iwitzira bede-ki aratxikre hãrele. Deuxukihyyle atximahãbenyke. Warybe bityhynyke.

<sup>12</sup> Aityhydỹỹna-di òraru-ribi bexitabenyke, bexiebenyke òraru-txi ixelau. <sup>13</sup> Deuxu heka adeewina riwahinyhỹre òbiti widỹỹna. Tiile riwiõhenanymyhỹre òbitina widỹỹna. <sup>14</sup> Uritere rybe binamy rybeõmy. Adeburemy iny iijeõmy. <sup>15-16</sup> Tai tahe inyõ rybe binamy umy rarybeõtyhy. Òbitityhymy boibeke kaiboho dori Deuxu riòremy toite. Kristu kodobehekere, aõrarureny-ki areysakre. Retare dori aõmydỹỹnana wihikỹõ ayreny-ki. <sup>17</sup> Arurukewana ayreny-ki rybe wihikỹmy rybe òraru-ki, taile areysakre. Deuxu-ò dori rexiwahinyre xiwena wesemy arurukremy wahe. <sup>18</sup> Kaiboho tahe wadi beysahyummy boibekre ixideewimy tahe adeereny arurukremy wãhãre.

<sup>19</sup> Aõwesele Tximõtxi ayreny-ò ariteònykemy idi watziwãhãre. Jesuisi Inyryrỹ dee wikeki. Tai tahe arierykre timybo kaiboho toite wahe. Tai heka areysakre. <sup>20</sup> Tximõtxi tahe arawiõhenanyrenykre iny witzira witzira ratyre wahe. <sup>21</sup> Ijõ dori ixidile rõhõtinyinmyhỹre Jesuisi Kristu aõmydỹỹnana-di aõkõ. <sup>22</sup> Tximõtxi tahe teerytenyete iwese riwawiõhenanyre wese Rybewihikỹmy rybe-ki. Iwese tyby iriòre riwiõhenanymyhỹre wese Tximõtxi riwawiõhenanyre. <sup>23</sup> Aõbo wadee rõhõnyke arierykre, tai wylemy ayreny-ò aditeònykremy idi watzireri. <sup>24</sup> Jiarỹ òsana tule wylemy Deuxu riwateònykemy wadi ratxireri ayreny-ò. <sup>25-26</sup> Ijõ hãbuõ iteòdỹỹmy raruwãhãre ayreny-ò, Epafroditu wahe. Tii wawana noduõ rare. Kaiboho juhoo wadee teteònytenyete wawiõhedỹỹdumy rarekemy. Tii heka awehityyrenymy

rurumyhyre. Tai tahe reòkesedỹnyreri kaiboho iwebinaduna-ò taholatenyete. Tai heka òkesemy riwisỹnyre. <sup>27</sup> Inatyhy rare rurure inihe. Tahe Deuxu riruxetòenyreki riteytenyere. Jiarỹ tule Deuxu wadi raruxetòere. Tai rabede-woõhyre aõwixira wixiramy ratỹỹnymahãreki. <sup>28</sup> Tahe aõwesele ariteònykemy watzireri. Kaiboho beysabenykre kia araerymahãrenyere. Jiarỹ tahe urihimy-ò arexielehynykre wanohõti yrena-ribi. <sup>29</sup> Tii kedehemynykre, tahe bididybedenykre biwowodynybenykre. Rexiòhãrunymy rare Kristu òraru-ki riwawiòhenanykre. <sup>30</sup> Tahe tii inihe heka rurure iòraru-ki. Arokoreny-ki tii riwawiòhenanyre.

### 3

<sup>1</sup> Ikonanamy tahe ararybekre: —Beysabenyke, Inynyrỹ deysanamy. Jiarỹ heka riwaixiranyõhyymyhyre heka tuu rybe. Awire tahe boholabenykeki. <sup>2</sup> Bexiijebenyke iny ijòròsa wesena-lau tii iixỹruterere aõbinawidỹỹdu mahãdu tahe tii rare. Bexiijebenyke notykyresydu mahãdu lau. <sup>3</sup> Inyboho dori notyky resydu mahãdu òbiti rare. Deuxu Tyytybytyhy deewimy nodu roire. Jesuisi Kristu dee winale inydeereny awire. Inyboho dori aõwiihikỹwidỹỹ-ò rikityhynyrenyòke. <sup>4</sup> Jiarỹ, Paulo ariòludunyleke aõbo ixi-wana ariwinyke. Jiarỹ ijõ hãbu ratyre waaõmydỹỹnana diremy arexityhynyke. Jiarỹ dori judeu mahãdu ijoi tyhy-ki tybie rare notyy resyna ijoi tyhy rare. Debò inatã reurotxu-di reareu. <sup>5</sup> Bejami mahãduõ jiarỹ rare. Judeu mahãdu tyhy wãhãboho roire. Iriòremy jiarỹ rare. Fariseuõ jiarỹ rare. <sup>6</sup> Tai tahe bede ywina rybe retyhynyre. Jiarỹ heka iijaramy raeleemy reamahãre ityhydỹỹdu mahãdu aõhòkỹmy arisỹnykre-ò. <sup>7</sup> Wabede ywinareny òbitimy rare sana raholamahãre, ibutumy retyhynymy rarewãhã. Ibutumy wahe aõmydỹỹnana reatyra Kristu luuna òraru-ki. <sup>8</sup> Inatyhymy Kristu wabiu-ò hedu reeryre, ibutu aõmydỹỹnana-ribi wanohõti rosare. Ibutumy retxiwire iòraru-ki, kia ibutumy aõ aõkõ rare, Kristu wabiu-ò hedu arimykere wabiu-ò hedukremy rare. <sup>9</sup> Waòbitina tahe aõ wawidỹỹna aõkõ rare. Jesuisi retyhynyre urenana tahe tii riwaòbitinyre. <sup>10</sup> Kristu arierykemy idi watziwãhãre. Rubu-ribi ixixana arierykemy, aõhòkỹmy arotỹỹnykre iòrarakile, iwese tii rurure wesemy wahe jiarỹ heka arexiywinykemy watzireri. <sup>11</sup> Tai rubu-ribi ixixana mahãdu-wana arexixakre. <sup>12</sup> Jiarỹ òbitityhy aõkõ rare ada ibutumy òbitina wadee riwahinyòre. Jesuisi riwamyre aõmysỹdỹỹnaõ ariwinykemy. Tai tahe wako-ò rawãhãre araòbitinykemy watzireri. Tamy tahe araaõmysỹdỹỹnykemy watziwãhãre. <sup>13</sup> Òbitityhy aõkõ jiarỹ rare. Kia sohojile tahe ariwinykre. <sup>14</sup> Tahe arehemynykre watzireri titxibo Kristu diwateònyde. Kowa bede wihikỹkile uriòno aritakre. <sup>15</sup> Tahe ityhydỹỹdu iumy kia-di mohõtinybenyke. Inyõ aõ rieryòkeki Deuxu tamy kia ritỹnynykre. <sup>16</sup> Uritere biijebenyke inatyhyna bityhynybenyky wiwese weselemy ròkõhõtinyrenyke.

<sup>17</sup> Ityhydỹỹdu seriòre, iwese rewinyumy rarewãhã wese biwinyumy boibeke. Tule ijõ-ò betehibenyke wawese dori riwinymyhyre. <sup>18</sup> Sõwemy dori iny òbiti aõkõ rỹira, Kristu òludumy wahe, itxeò aõmydỹỹnana òludu wahe. <sup>19</sup> Kia iny tahe Deuxu rahukre. Rỹsỹnale ta ideuxure. Tiiboho tahe aõbina binaòle awirenyre. Bede aõmydỹỹnanadile ròhõtinyre. <sup>20</sup> Iny bedereny tahe biu-ki roimyhỹre. Kowa-ribi reraòrenyneri iny tarasadu dehemynyna-ki. Inynyrỹ Jesuisi Kristu wahe. <sup>21</sup> Tii inyumyreny riwixiranykre. Tii taumywesele iny ritxienykre, taumy wihikỹtyhy wesemy. Tii ruru dire. Tahe ibutu aõna aõna wedumy ronykre irurudireki.

## 4

<sup>1</sup> Waluunadu, waseriòreboho, kaiboho wadeysana warataana wesemy toite. Ywihyylemy boibekre, waluunaduboho.

<sup>2</sup> Warybe rewahinyre inatxi hãwyy-ò Eòdia, Sintxiki-wana. Kialemy wahe Inynyrỹ tyhydỹna-di wiwesehyylemy maraykynyke. <sup>3</sup> Adees tule wawiòhedỹdu tyhy waryhe rewahinyre. Kai biwiòhenanykre hãwyy Rybewihikỹ wiòhedỹdu mahãdu wahe. Tule Lemetxi riwawiòhenanyre ijõ-wana wahe. Ibutumy inireny heka Tyyritina rubuonanakõdu-ki rỹire.

<sup>4</sup> Inynyrỹ-wana beysahyybenyke. Tahe ixityremy ararybekre. Beysabenyke. <sup>5</sup> Ywina-di bisỹnyke ibutu iny-ò. Inynyrỹ dehemynyna dori iòhòmy ihỹre. <sup>6</sup> Ibutumy aõmydỹnana heka biyrydỹnybenyke. Ibutumy bexitòenyke Deuxu-ò, àlàna-wana bexitòenyke. <sup>7</sup> Deuxu ywina awo-ò bitidikre arayky ibutumy riyrubunyke. Deuxu ywina dori inyraykyreny rieryòtyhy timyrekibo awityhyre.

<sup>8</sup> Ikonanau tahe ibutumy aõmybo ararybekre maraykynybenyke ibutu inatyhyna, ibutu aõeryhykỹ, ibutu òbiti, ibutu tihiyyle, ibutu iluuna, ibutu tyhyna awimyy tahe roirekeki àlàna-wana rỹikeki, tahe kia-di ibutumy maraykynybenyke. <sup>9</sup> Araerynanyreny, kaiboho teerytenyete, rarybereò tahe taholatenyeta. Timybo watxireri wese kaiboho wamy tabitenyeta. Tai iwesemy boibeke, ibutumy wahe. Deuxu heka ywina rare. Tii umywanarenyle rarekre.

<sup>10</sup> Jiarỹ heka reysare Wanyrỹ dee. Kaiboho heka ixityre watxi òhõtireny reare. Tiu waribi òhõtireny rosaòhyre urile kaiboho wawiòhedỹmy tarutenyete tahe isirare. <sup>11</sup> Kaa tuu rarybereri heka aõmy raruòhyreri. <sup>12</sup> Jiarỹ dori reeryre aõbo wamy rỹira idi reysamy watxiwãhãre. Ibutumy waki rỹimyhỹre-wana tule awilemy rahõtinyinmahãre. <sup>13</sup> Reeryre dori awimyno tule ramamy rubu reeryre. Xiwersyna wese reeryre tule aõhòkỹmydỹ reeryre rama jubreré. Kia tahe reeryre. Ibutu ariwinyke Kristu dori ruru wadee riwahinyre. <sup>14</sup> Tule umy arealækemy watxireri tiwawiòhenanyteki. <sup>15</sup> Filiposi hãwã dohodỹna mahãdu, kaiboho sohojile nieruò wadee tewahinytenyete, juhuu Macedonia hãwã-ribi rareu wahe. <sup>16</sup> Tesalonia hãwã-ò wadee nieru tewahinytenyete, inatxi nonanamy taditeònytenyete. Tahe riwamyre wadee rasiranymy idi rewyré. <sup>17</sup> Aõ rexitòenyre aõkõ nierumy. Sohojile aõmydỹnanamy aribi aritakemy watxireri. Deuxu aõmydỹnanale aritakemy rarumahãre. Umyreny Deuxu wehityhynamy arobikemy. <sup>18</sup> Remyre awahidỹna. Epafroditu aribi riwawahinyre. Tai tahe sòwemy waki rỹireri. Iwese lỹnyrena sòwemy watxi reamyhyre wese awahidỹna wadee rare. Iwese Deuxu-ò xiwenaò awire wese wadee ihỹre. <sup>19</sup> Aõhere inyDeuxureny ihewoludu atyhyna loosòna adeereny kadiwahinykre, Jesuisi Kristu òraru-ki. Aõbo adeereny rasiranyreri. <sup>20</sup> Deuxu kidiwahinykemy adeereny watxireri. Kia tahe inyDeuxureny-ò loosòna kidiwahinykemy watxireri tiemy heka rarehykre. Kie.

<sup>21</sup> Iny sohoji sohojimy warybe-di biwehityynanykre Jesuisi Kristu òraru-ki. Kaki ityhydỹdu mahãdu tarybe wehityyna adeereny diwahinyde. <sup>22</sup> Ibutumy ityhydỹdu arãrybeweityhynanyre. Iòlò heto ityhydỹdu mahãdu yribihyyle adeereny diwahinyde.

<sup>23</sup> Inynyrỹ Jesuisi Kristu ruxetòena adeereny kanakemy watxireri.

## Òlòṣò Paulo Tyyriti, Òlòṣò Hãwã-ò

<sup>1</sup> Paulo, Jesuisi Kristu deòdu Deuxudeewimy rare kia tyyriti rewahinyre. Tule Tximòtxi inyeriòre rybe weityhyna riwahinyre, ibutumy ityhydỹỹdu seriòre-ò Òlòṣò hãwã-ki. <sup>2</sup> Wiòhedỹỹna, ywina, Deuxu inytyby-ribi adeereny kanakemy watzireri.

<sup>3</sup> Jesuisi Kristu-ò àlàna rewahinyhyymahãre, tule Deuxu Inynyrỹ tyby-ò. Adeereny dori rexitòenyhyymahãre. <sup>4</sup> Kaiboho Jesuisi Kristu tetyhynmahãtenyete. Tule kowa ityhydỹỹdu mahãdu wiluurenyre. <sup>5</sup> Rybewihikỹ inatyhyò juhuhu taholatenyete. Idi tahe araròṣòna tetatenyete. Tai tahe biu-ribi kia ibutumy kanakre. <sup>6</sup> Iwese Rybewihikỹ bede bedelemy rariamyhỹre wese adeereny tule dehemynyde. Rybewihikỹ aòwihikỹ adireny riwahinyre. Iwese òwòru taraty riwahinyhyỹre wese, kaiboho inywitxira-ò aòwihikỹbo tewahinytenyete. <sup>7</sup> Epafa jiarỹ wiwana Deuxu deòdurenyre. Kia iribi tadoholamahãte. Tii Kristu rybemy rybedu òbiti rare. <sup>8</sup> Tule wadee relyyre Deuxu Tyytybytyhyòraru-ki wiluuna-di ahãtenyete.

<sup>9</sup> Kia inyboho roholarenyre, adeereny rexitòenyhy watziwãhãrenyre. Rexitòenyhyhỹ Deuxu dee wityhymy kaiboho bedierybedenyke. Deuxu Tyytybyerynatyhy-di boibekemy, bedeerydỹỹna-di. <sup>10</sup> Deuxudeewihyymy kaiboho atximahãtenyete maratynyke wesemy aòwihikỹmybo. Biubỹtỹnymy boibeke Deuxumy bierybenytyhykre. <sup>11</sup> Ibutumy ruruna-di boibeke Deuxu ruruna wityhy-di texihymy tadonymahãte ibutumy aòhòkỹmy bodotỹỹnykre deysana-di. <sup>12</sup> Deuxu inytybyreny-ò àlàna biwahinybenyke. Tii iny riy-widỹỹnyrenyra inyjura juramy ritakemy. Kia jura jura ityhydỹỹdu mahãdu hõrõ rare Deuxu loosònawo-ki ratximyhyỹrenyeki. <sup>13</sup> Tii bedeluru òlòna-ribi di-watade tahe diwadyde taRiòre luuna òlòna-ò. <sup>14</sup> Kristu heka iny ritare. Tii iny òrarunareny riòwynyre. Ibutumy òraruna riixãwidinare. <sup>15</sup> Jesuisi heka Deuxu lobixidỹỹna rare. Deuxu tahe alobixina aòkõ rare. Ibutumy widỹỹna-ribi tii juhuhu rãire. <sup>16</sup> Tii tahe ibutumy bededỹỹnana widỹỹdure. Ibutumy biu-ki bede-ki lobixina lobixiõna-wana riwinyre. Iòlòna wedu tyhydỹỹna ruruna. Dinodu widỹỹna. Ibutumy tii riwinyre ixidee. <sup>17</sup> Tii ibutu aõna aõna-ribi juhuhu rỹire. Ibutumy aõna aõna taruru rimireri tai. <sup>18</sup> Iwese umyriti umy wedu rare kia wese Jesuisi ityhydỹỹdu mahãdu riti rare. Tii juhuna rare. Iwedu rare. Tii rubu-ribi ixixana juhuhu ludu rare ibuturatyre dori Deuxu risỹnyre juhuuludumy ratxikemy. <sup>19</sup> Jesuisi-ki ibutu wiwihikỹ rarekemy. Kia tahe Deuxu dee wire. <sup>20</sup> Deuxu ywina diwahinyde Jesuisi hãlubu-di itxeò-ki. Jesuisi hãlubu xiery ibutumy Deuxu riwaaxidỹỹnyre biu-ki bede-ki. <sup>21</sup> Kaiboho Deuxu ery aòkõ juhuhu toite. Iòludu toite, arayky-ki aòbinahakỹ widỹỹ tadexinohòtinytenyete. <sup>22</sup> Jesuisi umy-di Deuxu arainytyhydỹỹnyre Jesuisi rurureki. Tai Deuxu tako-ò akanatamadỹỹnykre taòbitidỹỹnyteki aòraru lyrana-di, aòraru tuedena-di inyò umy ibinamy rarybeòtyhy. <sup>23</sup> Urile tyhydỹỹna-ki boibe benyhyyke araròṣòna-ribi ixihitxidỹỹõmy. Araròṣòna dori Rybewihikỹ-ribi nodu rare. Tii-ò tahe taholatenyeta. Ibutumy iny biura-woludu-ò Rybewihikỹlemy narybede. Iribi jiarỹ, Paulo, Rybe wihikỹmy rybedu ròhònyre.

<sup>24</sup> Wijile reysamy watzireri adee aòhòkỹmy ratỹỹnyreriki, aò aòhòkỹmy dỹỹnanabo Kristu-ò rauhenyre. Tai jiarỹ aòhòkỹmy arotỹỹnykre waumy-ki hyymy. Kristu-ò rỹira mahãdu dee kiamy ratỹỹnyre, dòhòdỹỹna mahãdu



dee. <sup>25</sup> Iribi jiarỹ Rybe wihikỹmy rybedu ròhònyre. Kiamy Deuxu dee wimy diwateònyde tarybemy rybedumy. <sup>26</sup> Tii ihetxiu rybe inatyhy ibutu lau rexiwore. Wiji tahe rexitỹnynyre ityhydỹỹdu mahãdu dee. <sup>27</sup> Kia-ò Deuxu rexitỹnynykemy ratxireri iwese aòwiihikỹ, taloosòna ratxireri, ibutu iny witxira dee. Kristu inywo-ki, kia tahe iny iraròsòna rare. <sup>28</sup> Kia Rybewihikỹmy relymahãrenyryre ibutumy iny-ki reerydỹỹnanyamahãre bederysyna-di. Kia wesele ibutumy ityhydỹỹdu mahãdu òbiti Kristu-ò ariteòsinykre. <sup>29</sup> Kiaòle tahe rexirurudỹỹnyhyymahãre, Kristu rurudile waki rỹimyhỹre.

## 2

<sup>1-2</sup> Warayky-ribi ijesu nihikỹmy resumahãre awo umyreny rahòtieremahãre reysakemy Òlòsò hãwã-ki. Laodisia mahãdu tule wamy robiòmyhỹre mahãdu tule wiluutyhyrenykeny kaiboho ibutumy Deuxu bedeerysynatyhy bierybenykeny adireny watxireri. Kristu-ki tahe bede erysynatyhy-di atxiteri idi watxireri. <sup>3</sup> Kristuwo-ki ibutumy bedeerydỹỹna bede erysynatyhy ityhyna wesemy riyrubunymy rỹire. <sup>4</sup> Kawese rarybera inyò arãitxenanyòmyhỹkemy rybe rayky-ribi ije-di. <sup>5</sup> Waumy awanareny ratxiòreri, watyytyby tahe awanareny ratxireri, riwadeysanyreri, aòwityhy òbiti-di riwaerynanyreri Kristu-ki aityhydỹỹna-di riwaerynanyre.

<sup>6</sup> Iwese Jesuisi Kristu heka Inynyrỹhyny tetyetynte wese. Tai tii-wana mabehyybenyke. <sup>7</sup> Iwese oworu irarutiò rimymyhỹre wese myike. Anaerynadỹỹnymahãde wese maumynyke àlàdỹỹnamy.

<sup>8</sup> Bexihãrubenyke, inyò anaitxenadỹỹnyke lau. Tarayky-ribi ije rybe-di lahirybe-di anaitxenanykeny ihỹre rybe uritere ije ije-di. Kia rybe iny aòmydỹỹnana-ki rỹire bede tyytyby aòmydỹỹnana-ki. Kia Kristu aòmydỹỹnana aòkòhyymy rỹirake. <sup>9</sup> Kristu umy-ki tahe ibutumy Deuxu ixitỹnydỹỹna rỹire. <sup>10</sup> Tule Kristu-ki kaiboho tyhynamy toite, texihutenynte. Tii heka ibutumy hãbu rurudỹỹna ratyre rare, iòlòdỹỹna ratyre rare. <sup>11</sup> Iwese uladunotyky riòròre wese Kristu aòraru urarina aribi diorode. Notyy resyna inatyhy aòkò rare. Kristu iwesenalemy riwinyre. <sup>12</sup> Taratisebenytenynte, Kristu rubu wesemy tewesenatenynte deledede. Tule beribi tadòhònytenynte irubu-ribi ixixanamy tewesenanytenynte. Deuxu tyhydỹỹna-di rubu-ribi texixatenynte. <sup>13</sup> Kaiboho aòraruna-ki tòimyhỹteu rubu wesemy notyynaresy aòkò-di toimyhỹteu, adeeremy runa Deuxu diwahinyde, aòrarureny di-ixãwidinyde. <sup>14</sup> Kristu iny òraruna widỹỹnareny-ribi tòhòti rosara. Kia tyyritina-di riixãwididỹỹnyre taitxeò-ò rareu. <sup>15</sup> Rurudỹỹna mahãdu ruru dinodu mahãdu ruru ritara, ibutumy iitxerenarenymy ibutu-ò riteòsinyre. Kristu taitxeò-ki irurureny ritara.

<sup>16</sup> Kaiboho tahe uritere iny rybemy deòbyrenykoomy roxina bemomo, ada ahãdu herinau ixenamy, ada sabado bededỹỹnanamy. <sup>17</sup> Kaiboho dori aò kanakre wesemy rare. Kristu tahe ibre tuu rare. Kia aòmydỹỹnana aò aòkò. <sup>18</sup> Inyò adeeremy rarybekeki: bexitxiònyke ýju biteàlànykeny, rasina-ki ierysomy mohòtinkykeny. Tamy ijohonarenymy urile erydỹỹdumy rohòtinyra. Tii tahe Kristu rityhynyòhyymyhỹre. <sup>19</sup> Inyummy wese inyboho ihỹrenyryre. Kristu tahe umy ratiwesere. Umybutule-ribi ibutumy iukỹna wiwana reare. Ibutumy òhòna tusina-wana umy rabutumyhỹre. Deuxu umyna-di umy raumymyhỹre.

<sup>20-22</sup> Kai Kristu-wana taruta-wana bede aòmydỹỹnana-ribi, aòherekibo wiji bede aòmydỹỹnana-wana arummy ahãte. Aòherekibo bede ywina witxira witxira tetyhynymy ahãte: imyny wedeydỹỹòmy. Tamy ade rexiòmy, roxina urihixiòmy. Kia wese hãbu bede ywina tetyhynymahãtenynte. Kia

aõmydỹdỹkeki, rexihuke. <sup>23</sup> Bede erydỹna wese ratxireri. Kia dori ixidee rexityhydỹnyre iyubu wesemy rawesenanyreri, taumy ixidee aõhõkỹmy rexisyre. Ibutumy kia tahe riwiõhenanyõhyymhỹre umy òraluna lau.

### 3

<sup>1</sup> Kaiboho Kristu-wana texixatenyteri wana, biu ludu aõmydỹnana-di mohõtinybenyke, tai Kristu Deuxu ruruna weribi rasỹnomy rononymhỹreki. <sup>2</sup> Biu ludu aõmydỹnana-di mohõtinybenyke, kabede ludu aõmydỹnana-di aõkõ. <sup>3</sup> Rubu wesemy dori ahãtenyete, aumy tuedeõna runa Kristu-wana rare —Deuxu-ki riyrubunomy ratximyhỹre. <sup>4</sup> Kristu rehemynyreu, tule tii-wana rakatxirenyke.

<sup>5</sup> Tai õhõti bitosanyke bede ludu aõmydỹnana aki rỹire: uri uri rỹira mahãduhemy ijara, òbitiõna, deõsana hemy nodu, iõbi retỹnyre òbiti-di aõkõ rare. Inyõ rỹire-di òtena kia ritxoo àlàdỹna wese rare. <sup>6</sup> Kia aõna aõna Deuxuwo binana rare, kia-ò Deuxu ykarana kanakre kia òrarudu mahãdu-ò. <sup>7</sup> Kaiboho kia tewinytenyete aõrarunareny òrarudumy toiteu. <sup>8</sup> Wiji tahe ibutumy kia aõmydỹnana aribi rexihukemy idi watxireri —wobinana, ujõmo, rybe ije ije. <sup>9</sup> Iny wixira-ò ruiõmy, araybidinatyby dori aribi dexihude, iwidỹnabina-di. <sup>10</sup> Araybidina tỹmyra-di tahe texiumy-dỹnyete tii araijõnyre bedeerysynahakỹ-di, Kristu raybidina wesemy araybidina rarekre òbitimy araijõnykre. <sup>11</sup> Kowa-ki wii rikininirenyõkre: judeu mahãdumy, judeukõdu mahãdumy, notyky resydumy, bedeeryõ mahãdumy, txiebese wese mahãdumy, deòdu mahãdumy, deòdu aõkõ mahãdumy ibutumy Kristu dee wiwese weselemy rỹire. Kristule tahe ibutumy ihỹre inydeereny. Tii ibutu inywo-di ratximyhỹre.

<sup>12</sup> Kaiboho Deuxu ijeseemy anadymyhỹde tahõrõ luunana mahãdukremy. Tai ruxetõena-di boibekre ixãwidina-di, inytyhyna-di, ywina-di. <sup>13</sup> Wii riwiõhenanomy rỹike. Wii riixãwididỹnyemy rỹike. Inyõ adee aõmy rotyynykeki ixirawomy biijeranyke. Iwese Inynyrỹ araixãwidinyre wese iny biixãwidinyke. <sup>14</sup> Ibuturatyre wuluurenykemy kiadile kaiboho wiwana ibutumy boibeke iweselemy mohotinybenykemy. <sup>15</sup> Kristu ywina heka umyy-ki itxeredumy rarekre. Kristu hõrõ mahãdu sohojilemy mabeke. Tai tahe àlàna tamy biwahinybenyke. <sup>16</sup> Kristu rybe-di awo-ki mabehyymy mabekre idi watxireri. Wii bierynadỹnyemy bitohonymahãbenykemy bede erysyna-di. Deuxu-ò àlàna biwahinymahãke wiurybe-di, wiu-di Deuxu Tyytybytyhy wina-di. Mawinyke àlàna-di aworeny-ribi. <sup>17</sup> Ibutumy tuu marybekremy, ibutumy tuu botỹnykremy Wanyrỹni-ò, tuu botỹnykre Jesuisi Kristuni-ò. Inytyby dee àlàna biwahinykre, Deuxu-ò wahe.

<sup>18</sup> Hãwyy! Kai ahãbu bityhynyke, Deuxu erysydỹna-di. <sup>19</sup> Hãbu! Kai ahãwyy luuke, idi tudõrenyõmy. <sup>20</sup> Uladu! Borybe, adirybe-wana bityhynyke. Kia tahe Inynyrỹdeewire. <sup>21</sup> Uladuse, uladutyby! Kai ariõre ikyaradỹõmy, bede wona-di aõkõ ratxikemy. <sup>22</sup> Deòdu mahãdu! Kai kabede-ki awedurybe-di ibutumy bityhynyke aõ idi retehererikile aõkõ, awedudeewi sohojilemy aõkõ, awo-ribi tyhy Inynyrỹdeewimy tuu botỹnyke. <sup>23</sup> Aõbo botỹnymahãke ibutu Deuxudeewimy botỹnyke. Hãbudeewimy aõkõ. <sup>24</sup> Deuxu-ribi aõwydỹna kanakre. Kristu-ò dori taaõmysỹdỹnymahãte. Adeereny rahetoõ riyrubunomy roimyhỹre. <sup>25</sup> Inyõ tahe aõbina riwinymyhỹkeki, ihewomy aõbinale ritake. Deuxu dori ibutu dee wiwese weselemy idi rotỹnymahãre.

## 4

<sup>1</sup> Wedu mahādu, kai eòdureny dee òbitimy idi ahābenyke. Kai tahe tule awedu dire biu-ki. Kia nohōti losaōmy.

<sup>2</sup> Bexitòenyhyymahābenyke. Betehehybenyke. Beàlàhyymahābenyke. <sup>3</sup> Inydeereny kia bedexitòenykre. Deuxu rybe wihikỹ-ò iny dee hāwā wixira-ò kidiraynykre, Kristu inatyhynamy arelyyrenykremy. Iòraru-ki womati reroti nihikỹ-di watxiwāhāre. <sup>4</sup> Kia ritynynykremy idi watxiwāhāre. Waaōmysydỹna kiemy dori ihỹre. <sup>5</sup> Biu ludu bedeerydỹna-di boibeke ityhydỹdukōdu mahāduy-ki. Aōwihikỹrybe bexitỹnynykeki, turybelemy idi beake. <sup>6</sup> Arybe aōwi weselemy biyrubunyke, iwese rỹsỹna juwyrā-wana raurinymyhỹrewi wesemy. Tai arawyōna ijōdikre tỹraxina-ò.

<sup>7</sup> Txitxiò ibutumy waaōmydỹnana adeereny relyykre. Tii waityhydỹdu seriòre waluumy rare. Tii rybedu òbiti iny-wana ratxireri. <sup>8</sup> Adeereny reteònyreri waaōmydỹnanareny erydỹnamy awo deysadỹmy. <sup>9</sup> Onesimo heka tii-wana ariteonykre. Tii tule òbiti ityhydỹdu seriòre ratxireri. Ahāwāreny yluduō rare. Tiiboho kedelyydenykre ibutumy timybo wāhāremy.

<sup>10</sup> Aristarku wawana ròtenawo-ki wāhāre. Tarybe adeereny diwahinyde. Marku adeereny tarybe tule diwahinyde. Tii Banabe exi rare. Markumy, warybe teeryte, adeereny rybe rewahinyre wahe. Tii adeereny kedehemyneki, bidiwiòhenanyke. <sup>11</sup> Josue-Justu ibutumy eryna rare. Jesuisi inityhy rare. Kaiboho sohojile tahe judeu mahādu-ribi iny-wana raaōmysydỹreri Deuxu òlona òraru-ki. Tiiboho riwawiòhenanyhyymyhỹreny.

<sup>12</sup> Epafa tule aeryrenyō rare tarybe adeereny diōde. Tii adeereny rexitòenytyhyhyymyhỹre kaiboho Deuxudeewimy boibehyykemy. <sup>13</sup> Jiarỹ reeryre tii adeereny tòemy ratximyhỹre, tule Laodisia mahādu dee tule Ieryopoli mahādu dee. <sup>14</sup> Luka, tarybe diwahinyde. Tii ityhydỹ òhotibedu rare. Dema tule tarybe diōde. <sup>15</sup> Warybe wehityhyna biōke Laodisia ityhydỹdu seriòre. Ninfa-ò tule wehityhyna biwahinyke dohodỹna mahādu taheto-ki rỹireriwana. <sup>16</sup> Watyryiti-di dohodỹnaheto-ki rariakreu, idi tule Laodisia mahādu-ò biōkre tako-ò rariakemy. Tule watyryiti kowa-ò rewahinyre, wimyke amahāduko-ò rariarenykremy. <sup>17</sup> Arikipu-ò warybemy marybeke. Tii aōmysydỹnaō ritare Deuxu-ribi. Kia-di tii ratxihyykemyidi watxireri.

<sup>18</sup> Kia tyyriti wadebò ritidỹna tyhy rare. Womati reroti-di rataataamy nadoimyhỹderibi òhōtireny lusarenymy. Deuxu wohyna adee kanakemy idi watxiwāhāre. Paulo.

## 1 Tesalonia Mahãdu-ò Juhuu Tyyriti Tesalonia Dohodỹna Mahãdu-ò

<sup>1</sup> Jiarỹboho, Paulo, Sila, Tximòtxi-wana heka Tesalonia hãwã ityhydỹỹdu mahãdu-ò tyyriti ariwinyreny Deuxu ijoimy kaiboho toiteki. Deuxu wohyna, Deuxu ruxetòena heka Waha-ribi, Jesuisi Kristu Iòlò-ribi akirenykemy he wadee awire.

<sup>2</sup> Aõu aõu Deuxu deàlànamy adeereny rexitòenymahãre. <sup>3</sup> Atyhyna tiu inynohòti-ribi rosaõtyhy. Aluunareki dori Deuxu dee taaõmysỹdỹỹmahãte, Jesuisi Kristu iny Iòlò dehemynyna teraòteri. <sup>4</sup> Kaiboho, Deuxu luuna mahãdu, Deuxu iyreny araijere. <sup>5</sup> Rybewihikỹ adee retỹnynymahãre. Kia heka rybe sohojile aõkõ rare. Tii ruruna rare Deuxu Tyytybytyhymy. Erynatyhy teeryte. Iwese iny ako-txi ratỹỹnyreny wese, kaiboho teerytenyta. Aluureki dori kawesemy ratỹỹnyreny. Tai tahe iwese inyboho ratỹỹnyre wese tule kaiboho tatỹỹnytenyete. Tule Inynyrỹ-wesemy tatỹỹnytenyete. <sup>6</sup> Aõhõkỹmydỹỹnana hãrele heka kaiboho rybe-ò taholatenyete. Tii aradeysarennyre, aõhõkỹmy dỹỹnana-ki hãrele. Eysanarenny dori Deuxu Tyytybytyhyribile namyhỹde. <sup>7</sup> Kaiboho tahe ityhydỹỹdu mahãdu wihikỹ toite. Ibutumy ityhydỹỹdu mahãdu heka awesereny roirekemy ratxirennyre Macedonia bedeki, Akaia hãwãdỹỹna-ki tule. <sup>8</sup> Aeryna ibutumy hãwã hãwã rieryra Deuxu tetyhynyteki, Macedonia bedeki tahe tule Grecia bedeki. Tahe kia-ò ixyby boholabenykekõ dori rare. <sup>9</sup> Iny arora-ribi dehemynydeu inyko relyymyhỹre. Kaiboho asuritxoo deuxu-di tehutenyete tahe inatyhy Deuxu tetyhynytenyete, Deuxu iru wahe. <sup>10</sup> Iriòre biu-ribi kanakremy teraòmahãtenyete. Kia heka Deuxu rubu-ribi riixixanyré rare. Jesuisi sohojile heka Deuxu debure-ribi riwatarennyre. Deuxu dori òraruna òraru-ki sòwemy rakyaranynihikỹmyhỹre. Tule kia umy inydee relyymyhỹreny.

## 2

<sup>1</sup> Kaiboho teerytenyete arora-ò roirenyre, jiarỹboho Deuxu aõmysỹdỹỹna sòwemy rewinyreny. <sup>2</sup> Jiarỹboho aõhõkỹmy ratỹỹnyreny Filiposi hãwã-ki. Tai tahe adee rehemynyre Tesalonia hãwã-ò wahe. Deuxu taruru diwahinyde. Tai heka jiarỹboho adeereny roirenyre Deuxu ijyywihikỹmy arelyrennykemy. Sòwemy inydeereny òbinadu rỹire. <sup>3</sup> Iny rybe-di tỹnydỹỹnarenny inatyhymy rare. Inyboho òbitimy ròhòtinyrenny. Jiarỹboho anaitxenanyrennyõtyhy. <sup>4</sup> Iwese Deuxu inydeereny riwateònyre wese kialemy heka rarybeke. Aõbo inysòwehekỹ deewimy aõkõ raryberenyre, tahe Deuxu deewimy. Tiile rieryre aõbo inywo-ki ratximyhỹ. <sup>5-6</sup> Tii rieryre iwese inyboho adeereny rarybemahãrennyre wese. Nieru tarasakemy aõkõ inyboho watxirennyre rui-di raryberenyremy rybewihikỹ adee rewahinyõhyymy. Awowydyna, arybe wihikỹ heka inydee aõkõhyymy idi watxirennyre. Ijõ iny-ribi tule aõkõ kia rybe idi watxirennyre. <sup>7</sup> Jiarỹ tiu ararybeõmahãrennyre idi anierurenny aritakemy. Kia ariwinyrennykeki tahe, tule awire. Inyboho dori Jesuisi Kristu deòdỹỹna inyboho ratxirennyre. Tahe iu jiarỹ ayrennyki raremahãu, aluurennyre. Iwese hãwyyõ tariòre riyrubunnyre wese adireny watximahãre. <sup>8</sup> Deuxu Rybewihikỹ sohojile aõkõ adeereny ariwahinykemy aõkõ, tule wabededỹỹnana tule adeereny ariwahinykemy watxireri, aruruke adeereny, jiarỹboho sòwetyhymy aluurennyreki wahe. <sup>9</sup> Sòwetyhymy jiarỹboho raaõmysỹdỹỹnymahãre ayrennyki raremahãu, tai tahe òwyyõ aõkõ

teòwynymahātenyete. Rummy raaõmysydỹmahārenyete, txummy tule. Tai ix-iaõmysydỹnadile inyboho rỹimahārenyete. <sup>10</sup> Jiarỹboho ayreny-ki òbitimy roiremahā. Aõhe inatyhy, waityhydỹdu seriòreboho. Kia teerytenyete. Deuxu tule riwaeryete. <sup>11</sup> Iwese tybyõ tariòre riywinyete wese, jiarỹ araywinyete, wariòre wesemy. <sup>12</sup> Arāwiòhenanykemy adi watzireri arateysadỹkemy. Warybe dohodỹna-ò boholabenyke. Tai tahe kaiboho Deuxudeewina-ki atxibenyke. Tule tii-wana masỹnybenyke taòlòna-ki, toosòna-ki.

<sup>13</sup> Tai tahe àlàna sòwemy Deuxu-ò rewahinyrenyete. Ayreny-ki raremahāu, Deuxu rybe tỹnydỹmy, kaiboho tetyhynytyhymahātenyete. Deuxurybele taholatenyete. Tii heka inatyhy kia rare, Deuxu ijyityhy wahe. Waityhydỹdu seriòre, Deuxu ayreny-ki ratximyhỹre. <sup>14</sup> Waseriòreboho, iwese Judeia ityhydỹdu mahādu heka aõhõkỹmy rotỹnyete wese, kaiboho iwesele aõhõkỹmy tatỹnytenyete. Kaiboho aõwitxira witxira aõbina bina teòludunymahāte aõhõkỹmy dỹnana-ki. Abede ludu mahādu tuu riwinyete. Iwese Judeia mahādu heka judeu mahādu debò-ki aõhõkỹmy rotỹnyete wese, kaiboho tule aõhõkỹmy tatỹnytenyete. <sup>15</sup> Judeu mahādu heka juhū Deuxu rybedu mahādu rirubunynyete. Jesuisi tule rirubunynyete. Inyboho tule ribinadỹnykemy ratxireri. Deuxummy dòdu tiiboho roire. Ibutummy inummy òludu ratxireri. <sup>16</sup> Tiiboho iny ribinadỹnykemy ratximyhỹre, iny dori rybe tỹnydỹdumy inyboho ratxireri judeukòdu mahādu-ò. Kia-di heka ijõ òraruna tiiboho ributunynyete. Deuxu tahe wiji tiiboho ribinadỹnykre. Ityreny-ò Deuxu kyarana bededỹnana kedeseke.

<sup>17-18</sup> Waityhydỹdu seriòre, aribi irehemy watzireri, awehityhyna sòwemy wadi ratxireri. Sòwemy adi aretehekemy watzireri ixityrele. Tiubo aroramy arake, Satanasi riwabinadỹnyra. Tahe aõkõre. Araõke. <sup>19-20</sup> Kaiboho dori iny raròsonatyhy, inydeysana, iny biu-ò hena Inynyrỹ Jesuisi òraru-ki atxitenyete. Tii dori kanake. Kaiboho ixityhydỹnaõ heka toimahāte.

### 3

<sup>1</sup> Ikonanau tahe reòludunynyetyhy. Tai tahe ixisohojile Atena hāwā-ki rỹikremy watzireri. <sup>2</sup> Tai Tximòtxi adee reteònyete, inyseriòre wahe. Tii heka wawanareny Deuxu aõmysydỹna-ki riwiòhenanyete Kristu Rybewihikỹ tỹnydỹmy. Adeereny dori reteònyete aityhydỹna wiòhedỹmy. <sup>3</sup> Tai tahe bede jei jei òraru-ki, kaiboho ahewo-ò booseòtyhy. Kia ibutummy Deuxudeewina inydeereny rare. <sup>4</sup> Iu ayreny-ki rarewāhāu, kiamy rarybewāhāre aõma adeereny aõhõkỹmy dỹnana kanake. Kiale tahe inatyhymy nade. <sup>5</sup> Tai tahe Tximòtxi reteònyete, omy arierykemy timybo aityhydỹna-ki tatỹnytenyete. Satanasi òsana waaõmysydỹna ayreny-ki ribinadỹnyete. Aõkõre, tii Deuxu aõmydỹnana ribinadỹnyetyhy. <sup>6</sup> Tximòtxi heka Tesalonia hāwā-ribi ròsera. Ijyy Wiwihikỹ tahe raholara. Aityhydỹna aluuna wana raumynyete. Tule tii relyyete iwese kaiboho awehityhyna dire inyluure wese. Wadeysamy watzireri, waseriòreboho, aòraru-ki. <sup>7</sup> Waaõhõkỹmy dỹnana hārele heka wadeysamy watzireri, aityhydỹna awireki wahe. <sup>8</sup> Kaiboho awimy matxibenykeki, awimy jiarỹ watzimahāre, warummy watzimahāre. <sup>9</sup> Aòraru-ki tahe Deuxu-ò àlàna rewahinyete. Deuxu-ki tahe wadeysamy watzireri. <sup>10</sup> Rummy txu-wana adeereny arexitònykre arora-ò arake, aityhydỹna wiòhedỹmy wahe.

<sup>11</sup> Deuxu Inytyby, Jesuisi Kristu Inynyrỹ-wana riwawiwòhenanykemy idi watzireri arora-ò arake. <sup>12</sup> Wiluumy ibutummy ityhydỹdu mahādu luummy

idi watzireri. Iwese aluure wese wiluuke. <sup>13</sup> Tii inydeereny ruruna riwahinykemy idi watzireri. Òbitimy tahe rakatxirenyke Deuxuko-ò, Inytybyko-ò. Inynyrỹ Jesuisi kedeheminykreu, tamahãdu-wana, tai iny imahãdule rakatxirenykre.

#### 4

<sup>1</sup> Waityhydỹdu seriòre, timybo òbitimy ahãbenykemy rebedeerynyre Deuxudeewina wahe. Iratyre tahe arexitòenykre Inynyrỹ Jesuisi òraru-ki, òbitityhymy boibenybekemy. Kia tahe teerytenyete. <sup>2</sup> Jesuisi bede erydỹna heka adeereny rewahinyrenyrene. Kia teerytenyete. <sup>3-4</sup> Kia tahe rare. Òbitityhymy ahãbenyke, òta òtarenyõmy. Iny sohoji sohoji òbitimy ahãwyy-wana matxibenyke. <sup>5</sup> Iwese ityhydỹdukõdu mahãdu riwinyre wese aõkõ idi ahãke. Tii dori Deuxu rierykõrenyrene. <sup>6</sup> Tuleke kia aõmydỹnana-ki iny sohoji sohoji aityhydỹdu seriòre ibinadỹõmykemy. Iwese rarybere wese ixityre ararybekre. Inyõ kia aõmydỹnana riwinykeki, debure bededỹnana tii ralòke. <sup>7</sup> Òta òta aõmydỹnana aõkõ Deuxudeewire, òbitina aõmydỹna tamywire. <sup>8</sup> Inyõ kia bede erydỹna rityhynyõkeki, Deuxule heka tii rityhynyõre, hãbu bede erydỹna aõkõ. Deuxule Tatytybytyhy inydee riwahinyre.

<sup>9</sup> Kaiboho aityhydỹdu seriòre mahãdu luurennyre. Tai ixyby kia adeereny ariritinyõtyhy. Deuxu dori araerynanyrennyre timybo wiluummy boibekemy. <sup>10</sup> Kia luuna-di tahe ibutumy Macedonia hãwã hãwã mahãdu luummy. Ihãrele tahe waseriòreboho iratyre wiluummy. <sup>11-12</sup> Ywina-di wi-ò wi-ò boibeke. Aaõmysỹdỹna-di iximynamy boibeke. Tai ibutumy ityhydỹdukõdu mahãdu umyreny robikre anatyhynyrennykre. Tai tahe ijõ iny aaõmydỹnana ixi-di nokõmy. Ixisohojilemyta ixi-di maaõmysỹdỹnyke.

<sup>13</sup> Waseriòreboho araerynanykre rubu mahãdu aõmydỹnanamy. Tai ijõ inywese mahinybenyõke, bobubenyõke. Tii dori raròsòna-di aõkõ ratxirenyre <sup>14</sup> Kristu heka rubumy roire ribile rexixare. Kia tahe retyhynyrennyre. Kiawesele tii-wana heka Deuxu taityhydỹdu mahãdu kididyke, rityhynymy rurure mahãdu tule. <sup>15</sup> Inynyrỹ riwabedeerynyrennyre kiamy: inyboho irumy ratxikeki kiatxuu juhuummy timy inorenykõna. Rubu mahãdu tuukre. <sup>16</sup> Tahe yju wedu juhuu rarybekre. Deuxu juròna-di ritxurònykre. Idi Inynyrỹ kodobehekre biu-ribi. Juhuu ibutumy ityhydỹdu rubumy rỹira riumynykre, riumywitxiratỹmyranykre, riixixanyrennykre. <sup>17</sup> Tahe ibutumy inyboho irumy rỹira mahãdu heka Inynyrỹ-wana ributunyrennykre biu-ki. Tai tiwanahyy roirennyre <sup>18</sup> Kia rybe-di wii beysabenyke.

#### 5

<sup>1</sup> Ityhydỹdu seriòre, tiubo kia ibutumy aõhebo rotỹnykre. Kiamy adeereny ariritinyõtyhy. <sup>2</sup> Rummy wasidu wesemy kia txu kanakre. Kia teerytenyete. Ibededỹnana iny rieryõtyhy. <sup>3</sup> Inyõ rarybekeki: —Ibutumy awire. Ibutumy ywina-di ratxireri. Kiatxuu kedexihukre. Inyõ rahenyõtyhy. Iwese hãwyy txuberere wese, uladu ijera iòhòreu kia rare. <sup>4</sup> Kaiboho, waseriòreboho, tetyhynytenyete tai kiatxu adeereny bede òtiidỹ aõkõ rarekre. Kaiboho dori kia teerytenyete, wasidu wesemy kanakemy wahe. <sup>5</sup> Inyboho ibutumy txuu mahãdu atxitenyete, loosòna mahãdu wahe. Bedeluruhukỹ mahãdu aõkõ inyboho ratxireri. <sup>6</sup> Tai tahe ròkòrònyõtyhy. Bexixabenyke. Ijõ iny wese aõkõ atxibenyke. Betehebennyke. <sup>7</sup> Rummy ibutumy iny ròròmyhỹre. Tule kiau ibutumy riòmyhỹre, axaxaluudu mahãdu wahe. <sup>8</sup> Inyboho tahe iximy rekesiòbitidỹnyke ywina-di. Ityhyna, luuna-wana heka iny òrarunarenny itxena wesenamy rikitidikre. Tarasana tahe inyratiywina wesena rare,

tarasana raròsòna wahe. <sup>9</sup> Debure bededỹnana-ò aõkõ inyboho ralòõtyhy. Deuxu aõhõkỹmy dỹnana kia Deuxudeewina aõkõ rare inydeereny. Biu-ò hena-ò tahe inyboho ralòrenykre Jesuisi Kristu Inynyrỹ òraru-ki. <sup>10</sup> Tii dori inydeereny rurure. Tai tahe tii-wana rarehyymy rỹikre irumy ada rubumy iny ratxirehãre.

<sup>11-13</sup> Kiarybe-di widee beysadỹnynmahãbenyke. Deuxu rybe tỹnydỹỹdu mahãdu biwiòhenanybenyke, bityhynybenyke. Kia tahe wadee awire. Tii dori awiòhedỹỹdu ratxireri Inynyrỹ òraru-ki. Ibutumy widee òbitimy atxibenyke, tii Deuxu deòdu rareki. <sup>14</sup> Tule adeereny ijò dohodỹỹnaõ aratohodỹỹnykre. Iehehe mahãdu biòbitinybenyke. Ityhyna kyhynakõ mahãdu bikyhynanybenyke. Ibutumy widi atximyhỹbenyke. <sup>15</sup> Inyõ aõbinamy adee rakeki, ixiòwydỹỹõmy. Ywina-di tamy bisỹnyke. <sup>16</sup> Beysahyybenyke. <sup>17</sup> Ixitòedỹỹhyymy boibehyybenyke. <sup>18</sup> Ibutumy beàlãmahãbenyke. Kaiboho dori Kristu ijoi atxitenyte. Kia adeereny Deuxudeewinare. <sup>19</sup> Deuxu Tyytybytyhy-ò boholake, awo-ki arayky-ki tii ratxire. <sup>20</sup> Deuxu dee rybedu mahãdu awire irybe awire. Ibinamy aõkõ tai marybebenyõtyhy. <sup>21</sup> Ibutumy biurihibenyke. Aõbo awirele tahe idi bimyyke. <sup>22</sup> Ibutumy òraruna-ribi irehemy atximahãbenyke.

<sup>23</sup> Deuxu heka ywina rare. Tii araòbitidỹỹnytyhyke. Adeereny rexitòenyre. Araykywydyna, õhõtiwydyna, aumy-wana ibutumy raywidỹỹmy ratxike idi watxireri. Jesuisi dori eleeemy kodobehekre. <sup>24</sup> Tii kia ibutumy juhuhu rarybere wese, tii adeereny riwinyhykre.

<sup>25</sup> Waityhydỹỹdu seriòre, inydeereny bexitòenybenyke.

<sup>26</sup> Deuxu deysana òlusò-di wii birybebenyke. <sup>27</sup> Wadee boholake Inynyrỹ òraru-ki. Kia watyyriti heka ibutumy ityhydỹỹdu seriòre roholakemy watxireri. Idi mariake.

<sup>28</sup> Jesuisi Kristu Inynyrỹ ruxetòena heka adeereny ratximyhỹkemy idi watxireri. Kie.

## 2 Tesalonia Mahãdu-ò 2 Paulo Ryberiti Tesalonia Hãwã-ò

<sup>1</sup> Paulo, Sila, Tximòtxiboho-wana tyyriti rewahinyrenyre Tesalonia dohodỹna mahãdu-ò. Deuxu Inytyby, Jesuisi Kristu Inynyrỹ ijoi toiteò. <sup>2</sup> Wiòhedỹna, ywina-wana adeereny kanakemy watzireri Deuxu Inytybyreny-ribi, Jesuisi Kristu Inynyrỹreny-ribi.

<sup>3</sup> Inyseriòreny, Deuxu-ò adee reàlamahãreny. Kia tahe awi rare. Kaiboho aõu aõu texityhydỹnytyhymy atximahãtenyteki, ityhydỹdu seriòre wiluuna-di iluutyhymy teletenyteri. <sup>4</sup> Tai heka ijõ Deuxu dohodỹna heto-ki aõwihikỹmy umy rarybemahãre. Kaiboho dori aõwitzira witxira aõbina bina teòludunymyhỹtenyete, aõhõkỹmy dỹnana-ki ixiwesehyymy toitemahã ire tetyhynytyhymahãtenyete. <sup>5</sup> Kiawesele Deuxu aõna aõna òbitimy riwinymyhỹre. Kaiboho Deuxu teywinytenyteri Iòlòna-ò malòbenykre, aõhõkỹmy tatỹnytenyteriki wahe. <sup>6</sup> Deuxu, tiiboho aõbina bina-di riòwynyrenykre, aõhõkỹmy dỹnana dori adeereny riwahinyreki. Kia tii òbitimy rõhõtinyre. <sup>7</sup> Biu-ribi Inynyrỹ Jesuisi tarurunareny ýju-di kodobehekrey, aõhõkỹmy dỹnana-ribi elehyna adeereny, tule inydeereny Deuxu kidiwahinykre. <sup>8</sup> Heòtyloona-di tii kanakre riòwynykre Deuxu rieryõmy rỹira mahãdu dee, tule Inynyrỹ Jesuisi Rybewihikỹ riywinyõmy rỹira mahãdu dee. <sup>9</sup> Kia mahãdu aõu aõu aõhõkỹmy rotỹnykre Inynyrỹ òsỹnỹ-ribi iteòdỹna-ki taruruloosòna-ribi. <sup>10</sup> Tii kanakre tahe ibutumy iijoi mahãdu tamy làhàna riwahinykre. Ribedeòtiidỹnyrenykre ibutumy taijoi dee aõmydỹnana riwinyreki. Tetyhynymahãtenyete, Deuxu rybe dori jiarỹboho adeereny rewahinymahãreki. <sup>11</sup> Kaiboho iwese Deuxudeewimy rarekemy boibeke. Tai tahe adeereny rexitòehymahãreny. Deuxu ruruna-di atyhydỹna-di sòwemy aõwihikỹ riwinykemy idi watzimahãre. <sup>12</sup> Tai tahe ibutumy Inynyrỹ Jesuisi Kristu nimy sòwemy beàlamyhỹkemy. Tii loosòna adeereny riwahinykemy watzireri. Kia Deuxu dee, Inynyrỹ Jesuisi dee awi rare. Wiòhedỹna iribi bitabenyke.

## 2

<sup>1</sup> Waseriòreboho, Inynyrỹ Kristu òkesenamy iximy iny ritakemy adeereny warybe ariwahinykre. Inyõ rarybekeki Inynyrỹ òkesena txumy rehemynymy rỹire, kia rybe-di iòtiidỹõmy. <sup>2</sup> Inyõ rarasinykeki, Deuxu-ribi ijyy ritakeki, urile ityhydỹnyrenyõmy. Inyõ waribi tyyriti itarasamy rarybekeki, ityhydỹnyrenyõmy. <sup>3</sup> Inyõ aitenadỹõmy boibeke. Ityhydỹdu atysyna nihikỹ juhoo kanakre, idi tahe kia txu kanakre. Juhoo hãbu ibinatyhy kedexideòsinykre. Heòtybedeluduõ tii rare. <sup>4</sup> Tii ibutu Deuxumy òludunadu rarekre Deuxumy iny rininire mahãdu wahe. Ibutumy àlàna aõmydỹnana riatykre. Deuxu dohodỹna hetowo-ò ralore tahe Deuxu weselemy ronykre. Iximy rarybekre tii Deuxu raremy. <sup>5</sup> Tuu heka adeereny rarybere, akireny raremahãu, òhõtireny aõbo itxi rearenyõra? <sup>6</sup> Ibededỹnana raòbitikre xiery, kanakre. Deuxu ruru dori rimymyhỹre. Kia tule teerytenyete. <sup>7</sup> Iaõbinahakỹ aõmydỹnana inyy-ki ratxireri. Tii tyhy wiji kanaõkre. Imynydu iribi rexitare xiery, tahe tii kanakre. <sup>8</sup> Taile tahe hãbu ibinatyhy kedexideòsinykre. Inynyrỹ Jesuisi kanakrey, tii tuu kidirubunykre taryeledile. <sup>9</sup> Juhoo tahe kia hãbu Satanasi deòdu tahe iruru-di kedehemynykre. Aõna aõna wihikỹ widỹmy



ròitxenadỹreri. <sup>10</sup> Inyõ sõwemy riitxenanykremy bededòbydỹỹ wesemy. Ityhydỹỹdukõdu mahãdu tii riitxenanytyhykre. Tiiboho dori inatyhyna rybe rityhynyõmyhỹre, tuuõmyhỹre, tai rexirutaõrenyre. <sup>11-12</sup> Deuxu dori rilawere tuu rityhynyrenykremy ibinare hãrele. Kia ruina rityhynyrenykre, tai Deuxu rihitxidỹỹnykre inatyhyna rityhynyõreki, taðrarudỹỹna luureki.

<sup>13</sup> Deuxu tahe juhuutyhylemy aratarenyre, waseriðreboho. Biu-ò hena adeereny riwahinyremy inatyhyna tetyhynytenyteki. Deuxu Tyytybytyhy aralyradỹỹnyrenyre. Tai, Inynyrỹ luuna mahãdu, Deuxu mahãdurenymy belebenykemy atximahãtenyte. <sup>14</sup> Deuxu adeereny Rybewihikỹ diteðnyde. Inyboho tahe ijyydumy roire. Iny òrarureny-ki tahe Inynyrỹ Jesuisi Kristu loosõna bitabenykremy idi toite. <sup>15</sup> Kia ibutumy, waseriðreboho, itxi õhõtireny reake. Aõmybo araerynanymahãre kowa-ki raremahãu, tule watyryiti-di rebedeerydỹỹnymahãrenyre, idi mohõtinytyhybenyke, òbitimy idi boibeke.

<sup>16-17</sup> Inynyrỹ Jesuisi Kristu Deuxu Inytyby, luuna luuna, wiòhedỹỹna, raròsõna sõwemy inydeereny diwahinyde. Inyboho aõhyymy aõkõ roire. Iribireny raybidina adeereny kanakemy watzireri. Tule umy kanawiðhenanykemy watzireri ibutumy aõhe botynyke, marybemahãbenyke.

### 3

<sup>1</sup> Watyryiti-di konanamy tahe adeereny ararybekre. Waseriðreboho, inydeereny bexitðenyke. Inynyrỹ rybemy araryberenykemy, inywitxira-ko arelyyrenykemy, tule Inynyrỹ rybe-di iwese rybe ayreny-ki aõwiwihikỹmy raremyhỹ wese. <sup>2</sup> Tule bexitðenyke kia iny iehehe-ribi arexitarenykemy. Ibutu iny dori inatyhyna rityhynyõreri. <sup>3-4</sup> Tahe Inynyrỹ òbiti rare tii arawiðhenanykre. Tii ararurudỹỹnykre kia reeryre. Satanasi-ribi arayrubunyrenykre. Tahe, aõmybo reerynadỹỹnyre wese kaiboho aõhebo tatỹỹnytenyterimy heka adireny watzimahãre tule kia wesehyyle rakatxirenyke. <sup>5</sup> Inynyrỹ-ribi Deuxu luuna, Kristu itxõmotxina bederynahakỹ adeereny kanakemy watzimahãre.

<sup>6</sup> Kia Jesuisi Kristu Inynyrỹ bede ywina wese rare adeereny ararybekremy. Waseriðreboho bexiweresynyke iny deoruxere-ribi, ibutumy iny waerysydỹỹna roholaõre mahãdu-ribi, tii ityhydỹỹdu mahãdu hãrele. <sup>7</sup> Ayreny-ki roiremahãu, raaõmysỹdỹỹhyymy roiremyhỹ. Tai kaiboho teerytenyte iwese mabekemy. <sup>8</sup> Tiu iny witxira rỹsỹna rerỹsỹrenyõhyre, iðwyõmy. Txuu ruwana raaõmysỹdỹỹre waaõna aõna òwydỹỹmy. Tai tahe adeereny isiramy aõkõ ayreny-ki jiarỹ raremyhỹ. <sup>9</sup> Inyõ-ribi rỹsỹnaõ arirỹsỹmahãkeki, kia tahe ibinamy aõkõ rare, jiarỹ Deuxu rybemy rybedu-ki wahe. Tahe aõkõre urile rexideòsinykemy rerỹsỹõmahãrenyre. Iwese aõmysỹdỹỹna awirewesele umy reerynanyrenyre. <sup>10</sup> Tai rarewãhãu kia bede ywina rewahinyre: — Iny raaõmysỹdỹỹõmyhỹre riroxiõtyhy. <sup>11</sup> Jiarỹ raholawãhãre iny deoruxeretyhy-ò ayreny-ki ratximyhỹrenyre, tiiboho aõmysỹdỹỹ derarenyre, urile raujõmomyhỹrenyre. <sup>12</sup> Jesuisi Kristu Inynyrỹni-di tamyreny ararybekre rayruburennykemy, raaõmysỹdỹỹrenykeny ixideereny. <sup>13</sup> Tahe adeereny, waseriðreboho, ararybekre. Aõwiwihikỹ widỹỹ-ò ixirarenyõmy. <sup>14</sup> Inyõ ka waryberiti riywinyõkeki, mobo tii rare bierybenyke tahe kie-ribi irehemy biijeke, tai tii raixỹrukemy. <sup>15</sup> Urile tii aòludumy aõkõ ratxireri. Aseriðre wesemy tamy marybeke. Biijemy idi ahãke.

<sup>16</sup> Inynyrỹ ywina wedu rare. Tii adeereny ywina ibutumy aõmydỹỹnana-ki kidiwahinykemy idi watzireri. Inynyrỹ awanareny ratxikemy idi watzireri.

<sup>17</sup> Kia konana warybewehityyna jiarỹle ariritinykre wadebò-di. Ibutumy waryberiti-ki rỹire wese kawesele wani retidire. Paulo. <sup>18</sup> Jesuisi Kristu Inynyryỹ wiòhena ibutumy adeereny ratximyhỹkemy idi watzireri.

## 1 Tximòtxi-ò Paulo Juhuu Tyyriti Tximòtxi-ò

<sup>1</sup> Jiarỹ Paulo watxiwãhãre. Jesuisi Kristu deòdỹna watxiwãhãre. Deuxu iny tarasadumy riwateònyre, tule Jesuisi Kristu Inynyrỹ riwateònyre. Tii tahe inyaròsònareny rare. <sup>2</sup> Katyyriti adee rewahinyreri Tximòtxi. Kai inatyhymy wariòre wesemy atximyhỹte ityhydỹdu mahãduy-ki. Tahe Deuxu-ribi Jesuisi Kristu-ribi luuna, ywina, ruxetòena, adee kanakemy watzireri.

<sup>3</sup> Jiarỹ Macedonia-ribi rareu, adee warybe rewahinyre kai Efesu hãwã-ki mabekemy. Kia adiwahinyde warybe tamy kia beòbykemy; kowa dori inyò Bede ywina tyyriti witziramy ròerydỹnanyre riki. <sup>4</sup> Ihetxiu ijyymy heka rusake kiawesemy heka kai tamyreny marybekre. Talahi talabie òraruòraru-di he ròhòtinyòhyymyhỹkre. Kia aõna aõna tahe rybenatyhytyhyre. Kia aõna aõna iny lahi òraru rybena-di ixinohòtidỹõmy. Kia ityhydỹnadile kanakre. <sup>5</sup> Kia wiluuna tahe inywolyrahakỹwo-ribi ròhònymyhỹre, iny raykylrahakỹ wo-ribi, iny ityhydỹnatyhy-ribi. <sup>6</sup> Kia aõna aõna wihikỹ-ribi iny rexixãwididỹnyre. Tai tahe aõmybo rarybemyhỹre heka rieryòhyymyhỹre. Aõtyhymy aõkõ widee rarybemyhỹrenyre. <sup>7</sup> Bede ywina tyyriti erysydỹdu wesekemy rexinohòtinymyhỹre, tahe rieryòhyymyhỹre aõmybo raremy. Aõmy rierynanyymyhỹrenyre tahe timybo ihỹremy rieryòlemyhỹrenyre. <sup>8</sup> Katahe inyboho rieryrenyre. Inyò bede ywina tyyriti òbitimy rityhynykeki, Bede ywina tyyriti heka awi rare. <sup>9</sup> Inywihikỹ-ò heka tiu bede ywina tyyriti riwahinyòhyymyhỹre. Inybina binaòle iwahidỹna rare, iny òrarudu-ò, iny ityhydỹdukòdu mahãdu-ò, iny aleerydu-ò, iny tadi tyby-wana rirubunymyhỹre mahãdu-ò. <sup>10-11</sup> Kia iny-ò bede ywina tyyriti rỹimyhỹre. Ibutumy bina bina widỹdu-ò. Bede ywina tyyriti rỹimyhỹre ka mahãdu-ò: inydỹwe mahãdu dee, taòtaòta witziramy òtadu mahãdu-ò, inywasidỹdu-ò, ruidu mahãdu-ò. Deuxu ijyy tỹmyra wihikỹ dee wiòkeki, tii aõna aõna riwinykeki, tamy. Deuxu bede ywina tyyriti roimyhỹre. Deuxu bedeerydỹna òbiti aõkòreki, Deuxu wiwihikỹ loosònadewimy aõkòreki kia erysydỹnadu jiarỹ rare.

<sup>12</sup> Jesuisi Kristu, iny wedu waruruixiòlòdỹdu rare. Jiarỹ tamy wawimy raremyhỹ. Tai tarybe-di wiòhedỹdumy riwatare. Kia-ò Jesuisi Kristu heka jiarỹ rewowydynyre. <sup>13</sup> Juhuu jiarỹ tuu rarybere. Ityhydỹdu mahãdu-ò wadeburemy rarewỹhỹ. Tule Jesuisi-ò wedeburemy rarewỹhỹ. Tahe wadee raruxetòenyrenyre. Tahe ibutumy kia reerykòlemy rewinyumy raremyhỹ, retyhynyòlemy rewinyumy raremyhỹki. <sup>14</sup> Inywedu sòwemy wadee raruxetòere. Tii riwasỹny ixiluuwehikỹkemy, rikityhynymyhỹrenykemy. <sup>15</sup> Jesuisi Kristu kabede-ò dobehede òrarudu ritakemy. Ka rybe heka inatyhy rybe heka rare. Jiarỹ heka òrarudutyhy nihikỹ rare. <sup>16</sup> Iurenanamy tahe tii riwaruxetòenyre. Tiu heka waki rexiraòre. Tii riwateòsinyre juhuu ityhydỹdu wesemy. Ityhydỹdu mahãdu-ò itxerenamy, iwese tii mahãdu kidityhynykremy. Tai umy tuedekòdu mahãdu-ò ralòkemy. <sup>17</sup> Bealàmahãbenyke Deuxu-ò. Tii heka bededỹnana tuedeòdu hukỹ Iòlò rare. Tii lobixina aõkõ rare. Tii sohojile rare. Bealàmahãbenyke aõu aõu, wowydyna tamy biwahinyke. Kie.

<sup>18</sup> Ka inatyhymy rybemy adee ararybekre Tximòtxi —kai dori wariòre wesemy tate. Kia rybe heka ihetxinarybe wesele rare. Deuxu aratareu, kia biyrubunywihikỹke. Besuke arurutyhymy aõbo òbitimy ratximyhỹre wihikỹ-ò. <sup>19</sup> Aõhewe òhòtiwydynawimy mabekre. Bityhynymy mabekre. Inyò heka idi ròhòtinyrenyòra, tai reserenyra ityhydỹ-ribi. <sup>20</sup> Ijõ Imineu inire,

Alexȳdre ijõre. Jiarỹ rewahinyre Satanasi-ò, Satanasi bedeburana tamyreny riwahinykre. Tiibofo rybebinamy tii Deuxu-ò rarybeõtyhy.

## 2

<sup>1</sup> Delemy kamy ararybeke: Àlana sõwemy idi rawahinyke, ibutumy iny-ki bexitòtenykre. <sup>2</sup> Iòlò dee, ibutumy dinodu dee tule bexitòenykre. Tamyreny bi-ixitòedỹnanany Deuxu-ò, tule Deuxumy beòbykemy, tai ibutumy iny iworana bedehesimy rỹikre. Deuxumy iny røkõhõtynyrenykeny idi òbitimy tamy rokoirekemy. <sup>3</sup> Kia wese awire Deuxu dee. <sup>4</sup> Deuxudeewimy ibutumy iny ritakemy raerykemy tibo inatyhy raremy. <sup>5</sup> Deuxu sohojile rare iny-ki rybedu tule sohojile rare, Deuxu-ò iny mahãdu tii sohojile kia riwinyre. Tii hãbutyhyhykỹ rare. Tai tahe tii tiò tiò rare, Deuxu, iny mahãdu-wana widee ributunykeny, Jesuisi Kristu wahe. <sup>6</sup> Jesuisi rexiwahinyre ibutumy iny òraruna òwydỹmy. Tii heka riòwynyre sohojihyylemy. Kia heka tiiehyymy deòsidỹmy rarekemy. Tiu iny mahãdu rahenykeny Deuxu rexinohõtinyre. <sup>7</sup> Jiarỹ heka imynynamy riwamyre kia rybe-di arelyykeny. Tule jiarỹ rybe-di dohodỹdukremy riwamyre iny witxira bedeerydỹmy judeukõdu mahãdu wahe. Kia raerykeny tibo inatyhy raremy. Kia dori inatyhy rare.

<sup>8</sup> Ibutumy dohodỹna hetowo-ki ibutumy rexitòenyre rexitihynymy. Ujõmomomy rõhõtynymy aõkõ. <sup>9</sup> Hãwyy uritere ixidi nohõtityhyõmy ix-iaõmydỹnadỹmy urile ywilemy ixidi rõhõtinkykeny. Hãwyy ityhydỹydu ixiy-widỹna tahe tyywihikỹ aõkõ, iradesihodỹtyhy aõkõ, deorutylududike aõkõ. <sup>10</sup> Urile tahe iyrubukemy Deuxu-di rõhõtinyke tamy aõwihikỹ riwinykre. <sup>11</sup> Hãwyy ityhydỹydu mahãdu ròeryrenykre yrubu-ki. <sup>12</sup> Jiarỹle heka hãwyy ariwahinyõtyhy hãbumy hỹnakemy, hãbu erydỹdukemy tule tuu areònyke aõkõre, hãwyy heka urile iyrubumy rỹike. <sup>13</sup> Adaõ heka Deuxu juhule riwinyre idi Eva riwinyre. <sup>14</sup> Tule tahe Satanasi Eva juhuu riitxenanyre, Adaõ aõkõ tai raòrarunyre. <sup>15</sup> Hãwyy uladu reakeule rexitake. Idi ròtyhydỹmy. Inyluumy idi rexitihynykreki.

## 3

<sup>1</sup> Kia rybe inatyhy rybe rare: —Inyõ dohodỹydu dinodumy rarekeki. Kia heka rexiburemyhỹre aõwihikỹmy ratximyhỹre. <sup>2</sup> Tahe rybe-di dohodỹy aõmysdỹdumy ralòkeki, tii heka òbitimy rareke, tahãwyy sohojidile, rexitihynymy rarekemy, iny inatyhy, iny aòraru rarekemy, erynadỹdutyhymy rarekemy. <sup>3</sup> Tii heka iaxaxa luuõre aõbina lumy aõkõ rare tule iyrubure. Tahe tule iaõmy nohõtidu aõkõre. <sup>4</sup> Tii heka taijoimy reònymyhỹre, tariòre rierynanywihikỹmyhỹre ixirybe rityhynykeny. <sup>5</sup> Inyõ tahe taijoi reònyõkeki, Deuxu aõmydỹna-di òbitimy raaõmysdỹdõtyhy. <sup>6</sup> Tii ityhydỹydu tỹmyra aõkõmy rarekemy. Raxiwedenymy rarekeki tahe urile Satanasi alòsena-txi tii reseke. <sup>7</sup> Ihãrele tahe ityhydỹydu mahãdu aõkõ rare ihỹre, awimy tuu rarybemyhỹre. Tuu heka raujõmorenyõtyhy tule tii Satanasi ireitidisi-txi reseõtyhy. <sup>8</sup> Tule dohodỹydu wiòhedỹydu mahãdu, kiawesele rarekemy. Tii tule òbitimy rarekemy irybe òkese òkese aõkõ, iaxaxaluu aõkõ rare, tule aõna aõna sõwemy nohõtidu aõkõ rare. <sup>9</sup> Iny inatyhydỹnareny òbitimy tuu rotohodỹnananyhỹrenyke, tarayky òbiti-di. <sup>10</sup> Tule kia wesele raurihikre. Iribi òbitimy ròhònykeki, tai dohodỹydu wiòhedỹydu mahãdu-ò ralokre. <sup>11</sup> Ihãwyy tule òbitimy rarekre. Ujõmodumy aõkõ rarekre, iyrubukemy, urileta rexitihynymy rarekemy. <sup>12</sup> Tule dohodỹydu wiòhedỹydu mahãduõ ihãwyy sohojidilemy rarekre. Tariòre, taijoi-wana reònymyhỹkre. <sup>13</sup> Kia mahãduõ Deuxu

aõmysydÿÿna òbitimy riwinymyhÿreki, inatyhymy tii iny rityhynykre. Tai Deuxu aõmydÿÿna tii riòbitinykre ibutumy inydee.

<sup>14-15</sup> Aroramy jiarÿ wylemy arakemy watxireri. Aõkõkeki urile warybe ritina adee rewahinyreri. Kia warybe-di bierynanybenyke aõhebo ityhydÿÿdu mahãdu warybe-di rotÿÿnykemy. Ityhydÿÿdu mahãdu Deuxu ijoiõ rare. Inatyhy rybe yrubudÿÿdu rare. <sup>16</sup> Iny tyhydÿÿnareny awi tyhytyhy rare. Kia wese rare: —Jesuisi heka hãbu wese nade. Tii Deuxu Tyytyby-di òbitimy rityhynyreu, ÿjurenny tuu robirenyre. Taaõmydÿÿnanarenymy ibutu bede bedemy relyyreny. Sõwemy iny rityhynyreny. Roosere biu botorahakÿ-ò.

#### 4

<sup>1</sup> Deuxu Tyytyby rarybera: —Ihewoladu bededÿÿnana txuu hãbu tyytybybina rybe-ò roholakre. Tai iny tyhydÿÿnanareny ririkre. <sup>2-3</sup> Tahe ruina rybe rityhynyre, hãbu aõmy nohõti erykõ rybe-ò. Kia heka hãbu raerynadÿÿmyhÿre uritere hãwyyemy heriõmykremy, ijõ rÿsÿna aõtxi irÿsÿõkremy. Kia rÿsÿna iny rirÿsÿke Deuxu riwahinyre. Juhuu àlàna Deuxu-ò rawahikre. <sup>4</sup> Kia heka ibutumy Deuxu riwinyre awire. Aõ aõkõ heka awiõre. Deuxumy beòbyke, kia tahe ibutumy awike. <sup>5</sup> Ixitòedÿÿna Deuxu rybe kia ibutumy awimy risÿnykre.

<sup>6</sup> Kai heka ityhydÿÿdu mahãdu bierynanykeki, kai heka Jesuisi Kristu aõmysydÿÿdu mahãduwihikÿõ tate. Kia inytyhydÿÿnareny erydumy mabekre. <sup>7</sup> Kai ihetxiu nohõtividÿÿna ijyy bityhynyõtyhy. Marurunymy mabeke Deuxu aõmysydÿÿnana-ò. <sup>8</sup> Aumyruru urihimyoõmy idi mohõtinykre, atyytybywi-di tahe kia idi sõwemy mohõtinykre kai kabede-ki adeewikre tule tiu bede-ki awikre. <sup>9</sup> Kia rybe heka òbiti rare. Ibutumy iny rityhynyke. <sup>10</sup> Inyboho raaõmysydÿÿnymyhÿre inatyhymy. Deuxu dori iny rityhynyre. Tii ibutumy iny tarasadu ratximyhÿre, ityhydÿÿdule tarasadure. <sup>11</sup> Kia warybemy bierynanybenyke. <sup>12</sup> Iny aratyhynyõkeki kai matuari aõkõ tateki, tai ityhydÿÿdu wihikÿ mabekremy bexityhynyke. Tai tahe arybe-ò aratyhynykre aityhydÿÿna, aluuna, òbitina òraru-ki wahe. <sup>13</sup> Adehemynykre kotyre, Deuxu rybe-di mariakre dohodÿÿna heto-ki, idi belyykemy mabekemy tule bierynanykemy. <sup>14</sup> Uritere nohõti lusaõmy kai erydÿÿdu wihikÿ tatemyhÿ. Dohodÿÿna matuari mahãdu debòtidina-di arateònyrenyreu, wahisidÿÿna weseõ tetate rybe-di tÿnydÿÿna òraru-ki. <sup>15</sup> Kia aõmydÿÿnanamy mohõtinywityhymyhÿ. Ixidile bexiywinytyhymyhÿke bede erydÿÿnana-di tule bexiywinytyhymyhÿke. <sup>16</sup> Tai kai òraru-ribi bexitake tule aijohonana-di òraru-ribi bitakre.

#### 5

<sup>1</sup> Matuari ityhydÿÿdu mahãdu-ò ywimy aõki tamy marybemyhÿke, bowese idi atximahãke Weryrybò mahãdu, aseriõre wesemy bitohodÿÿnyke. <sup>2</sup> Senadu mahãdu adi wesele bierynanykre. Ijadõma mahãdu aseriõre wesere ibutumy òbitilemy biywinykre. <sup>3</sup> Inatyhytyhy wytese mahãdu kai bityhynykre iòsÿnÿ biywinykre. <sup>4</sup> Iriòredikeki, iriòkòredikeki, juhuu iriòre bierynanyke imahãdule òbitimy biwiòhenanyke idi watxireri. Kia dori Deuxu dee awire. <sup>5</sup> Wytese mahãdu ixisohojilemy rasÿnymyhÿre iriòrekõkeki, Deuxu-ribi aõna aõna riraòmyhÿre. Deuxu dee sõwemy rexitòenymyhÿkemy. <sup>6</sup> Kia tahe wyteseõ òraruna luukeki kia tahe irulemy ratximyhÿre hãre rubu rare. <sup>7</sup> Tximòtxi, kia bede ywina tahe rewahinyreri urile wytese mahãdu òwe òweõmykremy bibedeerynanykre. <sup>8</sup> Inyõ juhuu tasÿreny dee idi aõna aõna taijoi dee kanawyõkeki, tii ityhydÿÿdukõdu mahãdu ratyre rabinare. Tii ityhydÿÿdu mahãdu wese aõkõ dotÿÿnymyhÿde. <sup>9</sup> Wytese tÿmyranyi tyyriti-ki iritidÿÿõmykre 60 ibeòraõkeki. Tule tii sohojihyyle roire hãbumy. <sup>10</sup> Tule

tii aõna aõna wihikỹ riwinymyhỹre, tariõre ritybienyre, taroraludu-ò awimyraremyhỹ, ityhydỹdu mahãduwa risuhòmý raremyhỹ, aõhõkỹtyhytyhymy rotỹnymy rare mahãdu riwiõhenanymy raremyhỹ. Aõu aõu heka iny wixira riwiõhenanymy raremyhỹ taworana bedehesi-di. <sup>11</sup> Wytese tỹmyrani heka tyyriti-ki iritidỹõmykre. Hãbумы herimý rõhõtinyinymyhỹre wana, tai Kristu-ribi tõhõti rosamyhỹre. <sup>12</sup> Tarybe ywidỹna riywinyõlemyhỹre, tai iurenana tahe tuudỹdumy Deuxu-ò ratximyhỹre. <sup>13</sup> Hetomy rawerywerynymyhỹre kia urenana urile raujõmomomyhỹre aõna aõnalemy. Aõ heka riwinyõlemyhỹre. Kia ratyre bina tahe tuu rybenanamý aõkõ rybebinamý rarybemyhỹre. <sup>14</sup> Kia heka wadee awire wytese tỹmyra hãbумы roikre, rariõrerenykemy, tule taheto riywinykemy. Kia wese iõludu inydeereny aõna aõnabinamý rarybeõhỹkỹkre. <sup>15</sup> Wyteseõ dori Satanasi hemý roire. <sup>16</sup> Wyteseõ ityhydỹdusỹ-ki rarekeki, tii heka riwiõhenadỹ rỹikre. Kiawese dohodỹdu mahãdu nieru tamý ritakre. Kia nieru rayrubunykre. Tahe rawahikre ixisohojile ratximyhỹre-ò.

<sup>17</sup> Matuari ityhydỹdu mahãdu iny rityhytyhynykre. Dohodỹna mahãdu aõmydỹnana õbitimý retehemy ratximyhỹkeki, ratyhytyhynykre. Inatyhytyhywityhymý kowa õbitimý relyymyhỹre tule rybe wihikỹ rierynanymahãre kia heka raõwywikre. <sup>18</sup> Tai tahe raritidỹmy roimyhỹre: —Broreni maixõmotyre iwysydỹmy rariamyhỹu, iry ratõbõnyõtyhy ibyre lau. Tule rõritidỹmy roimyhỹre:

—Mobo raaõmysdỹmyhỹre, tii heka iny riõwynymyhỹre.

<sup>19</sup> Matuari mahãduõ iny tuu raujõmokeki, tuu arityhynyõtyhyke. Tuu lobixidu inatxi ada inataõkekile, aratyhydỹkre. <sup>20</sup> Tii inatyhymý õraruna-txi resereu, kai tamý marybeke iõrarumý ibutumý inyko-txi. Iurenana tahe ijõ iny ruberumý rỹimyhỹkremý. <sup>21</sup> Adee ararybekre. Deuxu, ýjureny, Jesusi Kristu-wana ibutumý warybe-ò roholareri. Kai warybe biywinykre. Myheka wiratyre widi rõhõtinyinõtyhy. Tiiemy wiwese weselekemy rỹikemy. <sup>22</sup> Uritere rybe-di tỹnydỹdu tỹmyra juhu biurihike idi tahe debõtìdina-di biteõnyke rybe tỹnydỹmy. Kawese aõkõkeki heka hãbu õrarunamý tudỹdukremý õsana mabekre. Aõmydỹnana tiiemy õbitimý biywinyhỹ. <sup>23</sup> Bee sohojilemy aõkõ biõkre urihimýòmý vỹimý biõkre. Kai dori awo ibinareriki tiiemy tuu abinareri. <sup>24</sup> Ijõ õraru aõwesele iny kanatỹnykre, bedeluura aõwesele kòdòhõnykre. Ijõ õraru taheka idile kanatỹnykre. <sup>25</sup> Ruxetõnawihikỹ iwesele rare. Ele tii raeryõtyhy idi tahe iny rierymyhỹre.

## 6

<sup>1</sup> Ibutumý wetxuõ tawedu rityhynykre. Tawedu rityhynyõkeki heka Deuxu nibinarybemy iny rarybekre. Tule ityhydỹdu eryna binamý rarybekre.

<sup>2</sup> Weduõ ityhydỹdukeki, kia heka ire ratyhydỹmyhỹke tule aõnityhymý tamý aõmysdỹkre. Tii dori ityhydỹdu seriõre wese rare. Kia dori taaõmysdỹnyteri ityhydỹdu widee. Kaiboho ixideerenyle wiluukemy. Kia tule bierydỹnykre.

<sup>3</sup> Inyõ erydỹna wixira rõerynanykeki kia õbitimý aõkõ Jesusi Kristu Rybewihikỹ wese aõkõ ratxikeki, <sup>4</sup> kia hãbu ixiwede rare, aõ rieryõlere. Kia hãbu urile dỹraxidỹ luure. Kia dỹraxidỹ-ribi ibutumý rybe jei jei rõhõnymyhỹre. Iribi tahe tule rexinaanymyhỹre, raujõmomomyhỹre, rexiwodohonanymyhỹre. <sup>5</sup> Raruimyhỹre. Kia ibutumý rotỹnyrerí, hãbu tõhõtina õweòwere. Inatyhyna-ribi kia hãbu tõhõti rosare. Ityhydỹdureki tii rõtakemy ixidi ratximyhỹre. Kiamý heka rõhõtinyinymyhỹre. <sup>6</sup> Inatyhymý ibutumý

heka tai iny aõtyhydỹỹdu-ki taaõ-di teysakreki. <sup>7</sup> Aõ kabede-ò iny ixi-hemy diwyõhyhydenyde inatyhymy heka rukururenykreu tule aõ ixihemy kabede-ribi rikiwyõtyhyrenykre. <sup>8</sup> Iny tydirenykeki, iny rỹsỹnadirenykeki, urile reysarenykre. <sup>9</sup> Tahe inyõ ityhymy ixidikeki, tii òraruna-txi resekre. Kia heka iny rexiburemy, rexibinanymyhỹre, tule rexiraykyitxỹtenymyhỹre. <sup>10</sup> Inyõ nieru luukeki, tii aõ òta òta òraruna-txi resekre. Kia-di heka iny sõwemy ityhydỹỹdu mahãdu-ribi ròhònnyra aõhõkỹmy rotỹỹnyrenyre.

<sup>11</sup> Kai Deuxu ijoi tate. Ibutumy kia-ribi bexiemy mabekre. Uritere ityhymy ixi-di nohõtiõmy tahe awimy mabekremy mohõtinkyre. Deuxu wiwese, ityhydỹỹdutyhy wese, Deuxuluu wesemy. Tiiemy heka òbitimy atximahãke, ywimy ainytyhymy atximahãke. <sup>12</sup> Aõu aõu òbitimy atximyhỹkemy marurunyke, umy tuedekõnahakỹ bitakemy, kai tule inatyhy rybemy tarybete inysõweko-ò, Deuxu dori adee rarybere juhUU. <sup>13</sup> Inatyhymy adee ararybekre. Deuxu adee ijohonadu rare. Tule Jesuisi Kristu wadee ijohonadu rare. Tii inatyhy rybemy tarybete Ponsiu Pilatoko-txi. <sup>14</sup> Kaheka warybe rare: Kai heka bedede ywina bityhynyke aõ bedede ywina tyryiti òraru-ki aõhe botỹỹnyõtyhy. Biraðke InywedU Jesuisi Kristu dehemyynyna txuu. <sup>15</sup> Tiutxukremybo Deuxule kedexitỹnynykre, tii deysana wedu rare. Tii sohojile heka IòlòmY rare. Ibutumy IòlòwedU rare. Ibutu wedu wedumy rare. <sup>16</sup> Tii sohojile heka tiu ruruõhy rarekre. Tii irehetyhymy loosònawo-ki rasỹnymyhỹre. TiimY heka inyõ tuu robiõtyhyre. Inyõ tiu iòhòmY tamY rehemynyõtyhy. TamY rikiwodeysanyrenykre. Tiòhe aõu aõu taruru-di ratximyhỹ.

<sup>17</sup> Kai marybekre iaõdi mahãdu-ò uritere ta aõna aõna-di rexiwowy-dynyõtyhy, iaõna aõna dori rỹiõhykre. Tahe Deuxule rityhynykre. Tii dori ibutumy aõna aõna wiihikỹ inydeereny riwahinyre. <sup>18</sup> Tii aõna aõna wihikỹ inydeereny riwahinymyhỹre. Iaõdi mahãdu uritere aõwihikỹ-di ijõ-ò rawiòhedỹỹnykre. Aõu aõu ròwirareamyhỹke iny-ò. <sup>19</sup> Kia wese tiiboho ributunyrenykre. Aõna aõna wihikỹ biu-ki awimY idi rarekre. Tule umytuedekõnahakỹ tiiboho ritarenykre.

<sup>20</sup> Kai Tximòtxi, aõbo adee rawahidỹỹre, kia biyrubunykre. Rybe òwe òwe-ribi irehemy mabekre. Aõbo heka raninireri bederydỹỹ kia heka inatyhy aõkõ rare. <sup>21</sup> Inyõ kia aõ erydumy ixi-di nohõti-ki, rexitara ityhydỹỹdu mahãdu-ribi. Deuxu deysanamY adee ratximyhỹkemy idi watzireri.

## 2 Tximòtxi-ò Paulo Inatxina Tyyriti Tximòtxi-ò

<sup>1</sup> Paulo jiarỹ rare. Jesuisi Kristu deòdu jiarỹ rare. Kia jiarỹ rare Deuxu-udeewireki wahe. Jesuisi Kristu juhuu rarybere, umy tỹmyra tuedeõna inyeeremy kidiwahinykremy. Tii kia wedu rare. <sup>2</sup> Kai Tximòtxi, wariòre waluunadu wesemy atximahãte. Kia tyyriti adee ariwahinykre. Wiòhedỹyna, ruxetòena, ywina, Deuxu Inytyby-ribi, Jesuisi Kristu Inynyrỹ-ribi adee kedehemynykemy watzireri.

<sup>3</sup> Deuxumy reàlãreri iwese wahabohomy reàlãre wese. Wanohõti Deuxu-ò ywile jiarỹ rare. Aõu aõu adee, Tximòtxi, rexitòenymahãre. Txuõ txuõlemy, ruwana Deuxu-ò rexitòenymahãre. <sup>4</sup> Iu rareu, arube-ribi wanohõti rosaõhyymyhỹre. Arora-ò arakemy watzimãhãre, wadeysatyhymy ararekemy. <sup>5</sup> Atyhydỹyna-ribi wanohõti rosaõtyhy. Alahi, Lõide, juhuu rityhynymyhỹre. Idi adi, Eunisi, tule rityhynymyhỹre. Kai tule wiji tetyhynymyhỹte inihe. <sup>6</sup> Kia dorihe itxi õhõti reijaranyreri. Wadebò tahe aratityre retidireu, arayky-ò Deuxu aõ riwahinyre awahisidỹyna wesekremy. Wiji kia arayky woludu rõrõra wana biixixanyke. Kia dori Deuxu wahisidỹyna rare. <sup>7</sup> Deuxu-wana iny ruberuõtyhy. Tii dori inydee ruru riwahinyra, luuna riwahinyra, tule bedeerydỹyna riwahinyra. <sup>8</sup> Tule Deuxu rybemy rybe-ki ixỹruõlemy. Deuxu rybemy rybe-ki wamy maixỹruõtyhy. Deuxu rybemy rybe-ki tahe, ròtenawo-ò riwatidire. Kia tahe awire. Deuxu rybe wityhydỹyna-ò aõhõkỹmy rokotỹnykre. Deuxu dori inydee ruru riwahinyryhỹre. <sup>9</sup> Tii heka iny ritarenyre biu-ò hena riwahinyre wahe. Tai taaõmysỹdỹyna inydee diwahinyde. Iny awireremy rareki aõkõ inydee diwahinyde. Taruxetòenale-ki inydee diwahinyde ixideewireki. Juhu bedeu Jesuisi Kristu òraru-ki ruxetòena inydee diwahinyde. <sup>10</sup> Kia ruxetòena wijile rehemynyra inydee. Jesuisi Kristu iny tarasadu kia diwyde. Tii rubunale riixãwididỹnyre. Biu-ò hena Rybewihikỹmy kia ritỹnynymy diwyde. <sup>11</sup> Riwatate tarybemy rybedumy. Rybedumy riwateõnyre, tule bedeerydỹdukemy riwateõnyre. <sup>12</sup> Tai judeukõdu mahãdu òraru-ki aõhõkỹmy ratỹnymahãre. Ihãrele tahe raixỹruõlemahãre. Rexieryre dori tii retyhynymahãre. Reeryre dori tii ruru dire waaõmydỹynana tamy retidire iyrubudỹny kiatsu-ò. <sup>13</sup> Waòbiti rybe biywinyke juhuu kia wamy taholate, ityhydỹyna-di. Biywinyke luuna-wana. Jesuisi-ki tahe luuna tyhy rare. <sup>14</sup> Timybo Deuxu adee diwahinyde, biyrubunyke. Deuxu Tyytybytyhy dori inywo-ki ratzireri.

<sup>15</sup> Ibutumy kabede ludu Asia ludu riwarira. Fikelu ijõnre. Erimojini tahe ijõre. Kia tahe kai teeryte. <sup>16</sup> Inynyrỹ ruxetòena kidiwahinykemy watzireri Onisiru sỹmahãdu-ò. Tii dori aõu aõu riwawiòhenanyre areysakemy. Tiu riixỹrudỹnyõtyhyre wawomati reroti-di jiarỹ ranyreriki. <sup>17</sup> Tai tahe Roma hãwãhãkỹ-ò ritehemynyre, riwaijehyyre; idi tawa-ki rahare. <sup>18</sup> Iny Iòlò ruxetòena tamy kidiwahinykemy watzireri kia txuu. Efesu hãwã-ki dori Onisiru riwawiòhenanytyhyre. Kia teeryte waratyremy.

## 2

<sup>1</sup> Kai tahe wariòre wese tate. Jesuisi Kristu làhãna-ribi ruruna bitake.  
<sup>2</sup> Aõbo wary-ribi taholatemy iny sõweko-ò relyyreu, kia ijõ iny òbiti-ò tuu



belyykre. Iny rexihumy rarekoòle tuu belyykre. Idi tahe tiiboho iny-witxira ribedeerynyrenykre. <sup>3</sup>Waaòhòkỹmydỹñana wawana tuu botỹñnykre. Jesuisi Kristu soldadowihikỹ-wesemy kai mabeke. <sup>4</sup>Soldadoò tadinodu aòmydỹñanale rityhynymyhỹre. Tii ixideewimy rarutaaòtyhy. <sup>5</sup>Ijesudu ijesu ritake òbitimy resukekile. <sup>6</sup>Oworuwidỹñdule juhuu suribi bederaty ritamyhỹ. <sup>7</sup>Aòmybo wiji raryberadi mohotinyke, raweseranyreki. Inyiòlò ibutumy araerynanykre. <sup>8</sup>Jesuisi Kristu rubu-ribi ixixadu-txi òhòti reake. Ihetxiu Davi Jesuisi labiemy raremyhỹ, iwese inyrybewihikỹ rarybere wese. <sup>9</sup>Rybe wihikỹmy relyyrekiki dori womati reroti-di rataamy aòhòkỹmy ratỹñnyreri, aòbina widỹñdu wesemy. Deuxu rybe tahe, inyò ritaaòtyhy. <sup>10</sup>Ibutumy reòludunymahãre ityhydỹñdu mahãdu dee, Deuxuhòrò dee. Kiaboho Jesuisi Kristu tarasanamy ritakemy idi watzireri. Tarasana, làhàna aòu aòu ritakemy idi watzireri. <sup>11</sup>Rybe inatyhy rare. Jesuisi Kristu-wana iny rurukeki, irumy tii-wana aroireke. <sup>12</sup>Inyboho rikityhynyhyrenykeki, tii-wana riòlònyrenyke. Inyboho Jesuisi rikitxiònyrenykeki. Tii tule iny ritxiònykre. <sup>13</sup>Iny rikityhynyònyrenykeki, ihãrele tii ityhyhyymy rarekre. Tii rexitxiònyòtyhy. <sup>14</sup>Iny nohòti kia-txi reakemy biwisỹnyke. Tamy marybeke ujòmohyyòmy rarekemy. Ujòmo tahe wiòhedỹñna aòkò rare. Ujòmo-ò ijohonadu urile ujòmodumy relekre. <sup>15</sup>Kai tahe marurunya Deuxudeewimy belekemy. Kai Deuxu deòdu tate. Kia rybe inatyhy-di òbitimy maraykynyke, idi tahe, bierynanyke. Tahe bexiixỹrudỹñnyòtyhy. <sup>16</sup>Rybe òweòwemy rybedu-ribi irehemy bexieke, rybebina-ribi tule. Kia rybedu urile raòrarunynihikỹmyhỹke. <sup>17</sup>Kia erydỹñna reuròmyhỹre yjy wese. Imineu, Filetu-wana kia wese rierydỹñnanyre. Kia rybe inatyhy-ribi rexihitxinyre. <sup>18</sup>Tii rarybemyhỹre: —Iny ixixana dorihe reara. Kia rybe-di ityhydỹñduò wimy uriurile rityhynyreny. <sup>19</sup>Deuxu hòrò tahe inatyhymy rỹirakre. Kia tahe urihixina rare: —Deuxu tahòrò mahãdu rierymyhỹre.

Ijò tahe:

Inynyrỹ ijoimy iximy rybedu, òraruna heka riatykre.

<sup>20</sup>Ityhy mahãdu hetonihikỹwo-ki womati tỹrỹrỹhỹkỹhyna, pratahyna sohojile aòkò rỹire. Òwòruhyna, suhyna tule rỹire. Hynaò tahe rỹsỹnawihikỹ hyna rare. Ijò tahe rỹnysi-di dehuna rare. <sup>21</sup>Kia hyna wese iny rỹira. Ijò rỹnysihyna wese rỹikeki, idi rexisuhokeki, rỹsỹnalralyra wesemy reuròke. Tawedu-ò awimy rỹike, tawedudeewimy. Tai tahe aò wihikỹhynamy rexiywinymy rỹire. Kai tahe iwesele mabeke. <sup>22</sup>Kai ijoi tỹmyra tate, amahãdu òraruna-ribi bexiekemy; ixi-ribi aò-di ròhòtynyreny, kia-ribi mahenyke. Òbitina, ityhyna, luuna, ywina-wana biheludunyke. Deuxu-ò rexitòenyke òbiti mahãdu-wana. <sup>23</sup>Erysydỹñna itxỹtemy wiribi rybeòmyke. Kiaribile ujòmo ròhònomyhỹre. <sup>24</sup>Deuxu deòdu raujòmonyòtyhy. Tii tahe iny ibutu dee ywimy risỹnomyhỹre, erydỹñnany rexihumy ihỹmyhỹre. <sup>25</sup>Ywina-di riòbitynyreny iny ixitxiòdỹñna mahãdu. Tii heka riraòreri Deuxu worahòresena tamy riwahinykemy. Idi tahe inatyhymy rierykemy. <sup>26</sup>Tule itxỹte-ribi ròòsekemy, Satanasi reroti-ribi rexitakemy. Tai tahe Satanasi rimyrau tahe ritaataara teewimy riwinykemy.

### 3

<sup>1-2</sup>Bededỹñana konanamy bededỹñana sirahakỹ kỹnyikre. Kia tahe bieryke. Iny ixideewimy riwinykemy ixi-di ratxikre. Nieru tarasalemy ixi-di rexinohòtidỹñnomyhỹke. Rybetyhyhỹkỹlemy iximy rarybekemy ratxikre. Ixidee awihikỹlemy ròhòtynykemy ratxikre. Rybebinalemy rarybemyhỹke. Tyby ise-wana riwinyòhyymyhỹke. Inyò-ò aòmy reàlàòhyymyhỹke. Òbitiry rityhynyòhyymyhỹke. <sup>3</sup>Iny-ò tuuna ihoòhyre. Inyò ibiòwamy rareòtyhy.

Aõbina binalemy inymy relyymyhÿkre. Rexiywinyõhyymyhÿkre. Reburehekÿ rariamyhÿkre. Òbitimyno ibinahyymy rarekre. <sup>4</sup> Iny deòsadÿÿdumy rarekre. Ixiluunadumy rarekre. Ywimy aõkõ rarekre. Iwisÿdÿÿna luhyymy rarekre. Deuxu tahe tuuõkre. <sup>5</sup> Òbitimy risÿnymyhÿre wese tahe òbitiruru ritxiõnymyhÿke. Kai, Tximòtxi, kia iny-ribi irehemy mabeke. <sup>6</sup> Kia hãbu tahe hetoõ-ò ralòmÿhÿre. Hãwyy uri uri rÿira xiwedeõ-ò òrarulÿxina-di ralòmÿhÿre. Kia tawisÿdÿÿna-di rierynanyhÿre tarybewiwidile, tahe hãwyy rityhynymyhÿre. <sup>7</sup> Kia hãwyy aõu aõu ròerykemy ixidi røhõtynymyhÿre, urile tahe inatyhyna tiu rieryõtyhy. <sup>8</sup> Iwese ihetxiu Ijãni, Ijãbri-wana Moisesi òludumy rÿire wese. Wiji tule kia hãbu inatyhyna òludumy rare. Irayky rawerynyre. Ityhydÿÿna-di deòsanamy rÿimyhÿre. <sup>9</sup> Tiu tako-ò raõtyhy, iitxÿtereriki, kia iruina òraruna ibutumy iny rierykre, iwese Ijãni, Ijãbri òraruna ibutumy iny raeryre wese. <sup>10</sup> Kai, tahe waerydÿÿna-ò taholahyymahãte. Iwese raremahã wese tiwaheludunymahãte. Watyhyna teerymahãte, wadeybina, waywina, waluuna, waixiòlòdÿÿna. <sup>11</sup> Aõu aõu inybinahakÿ wadi riwisÿnyreri, tule aõhøkÿmy ratÿÿnyreri. Kia ibutumy teerymahãte. Kia wade rotÿÿnymy rÿire Atxiòkia hãwã-ki, Ionio hãwã-ki, tule Listra hãwã-ki. Aõwixira wixiramy aõhøkÿmy ratÿÿnymahãre. Wanyrÿ tahe ibutu-ribi riwatare. <sup>12</sup> Inyõ òbitimy ratxikeki Jesuisi Kristu-ò, tii aõhøkÿmy rotÿÿnykre iòraru-ki. <sup>13</sup> Hãbu bina bina rabinahykymy rarekre, tule hãbu inatyhy aõkõ rabinahykymy rarekre. Inyõ tiiboho riitxenanykre, tule tiiboho inyõ kidiitxenanykre. <sup>14</sup> Kai tahe aõbo teeryte, kia-di mohõtinyke aõbo tetyhynymahãte-di. Tahe tiribibo teeryte, õhõtikile idi mabeke. <sup>15</sup> Uladuribile teeryte Deuxu Tyyriti. Kiadile bierykre Jesuisi Kristu tarasadÿÿna idi bimykremy. Kia adee kanake bityhynykekile kÿnyhe. <sup>16</sup> Ibutumy Tyyritityhy Deuxu elewesenamy nade. Bedeerysyna urenana heka rare. Òrarudu òbitidÿÿna heka rare, ibutumy riòbitinykemy. Tule aõbo awihikÿmy raremy rierynanykre. <sup>17</sup> Deuxu deòdu dori òbitile rÿirakemy. Aõwiwihikÿ widÿÿna aõbo dori rexihulemy rÿirakemy.

#### 4

<sup>1</sup> Deuxu, Jesuisi Kristu kiaru-ki arãteònykre. Jesuisi Kristu dori rubu mahãdu iru mahãdu-wana wiribi rihitxinykre, tii taòlòna kaò kidiwykreu. <sup>2</sup> Belyyke Deuxu rybemy, inydee awikeki, tule inydee awiõkeki. Ywina-di iny biòbitinyke. Iny biwiòhenanyke. <sup>3</sup> Bededÿÿnanabina kanakre. Kia txuu erydÿÿdu òbiti-ò roholaõhyre. Erydÿÿdu ributonykre tamydeewimy. Iwese iny tõhõtì nohõtijuty-ò rotÿnymyhÿre wese tamy wimy aõna aõnaòle roholaamyhÿkre. <sup>4</sup> Inatyhyerydÿÿna-ò roholaõhyymyhÿre. Urile ihetxiu ijyyòle roholakemy ixidi ihÿre. <sup>5</sup> Kai tahe ywimy maraykynyke. Ibutumy aõhøkÿmy botÿÿnyke. Deuxu Rybewihikÿmy belyyke kia tahe aõmysÿdÿÿnare Deuxu adee riwahinyre. Idi hyylemy mabeke. <sup>6</sup> Iny riwawahinyke xiwena wesemy rubu-ò. Waixituededÿÿnana heka rehemynyre. <sup>7</sup> Ijesu wihikÿwesemy tahe rexiijesudÿÿnyre wese. Rekonananyra heka waumy ijera. Retyhynyhyra tahe ityhyna. <sup>8</sup> Òbitiwidÿÿna raheto wese wadee rexihumy roire. Wanyrÿ, ywisidÿÿdu òbiti, riwawahinykre kiatxuu. Jiarÿ sohojiòle aõkõ. Tahe tule iraròsòdu mahãdu-ò. Jesuisi dehemynyna lumy kia mahãdu roimyhÿre. Tamy tule rataanaõ raheto wese riwahinykremy.

<sup>9</sup> Wylemy inihe waroramy manake. <sup>10</sup> Dema riwarira Tesalonia hãwã-ò rara. Tii bede aõmydÿÿnana luure. Kalatxia bede-ò Kresetxi rara. Dalimasia bede-ò Txitu rara. <sup>11</sup> Luka-wanale watzireri. Tahe kai Marku bididykre, wawiohedÿÿdu wihikÿmy rarekemy. <sup>12</sup> Txitxiò heka Efesu-ò reteònyre. <sup>13</sup> Kai tahe manakreu warahana bidiwykre. Troaji hãwã-ki

Karpu heto-ki tahe warahana rerire. Watyyriti tule bidiwyke tyyriti welÿte tule nohòti losaòtyhymy. <sup>14</sup> Alexÿdre womati loresedÿÿdure warybe dibi-nanymyhÿde. Wanyrÿ iòwydÿÿna tamy kidilidikre riwabinanyreki. <sup>15</sup> Kai bexiekre kowa-ribi, inyrybe dori rityhynyòhyymyhÿre. <sup>16</sup> Juhuu dinodu-ò rewyònyreu inyò riwawiòhenanyòhyyre. Ibutumy rirahure waribi. Aòbo wabinamy riwinyre-ribi Deuxu tòhòti rosamy watzireri. <sup>17</sup> Wanyrÿ tahe, riwawiòhenanyra Deuxu rybemy rybe-ki. Iny witxira dori, judeukòdu mahãdu roholamyhÿre. Leaòry-ò, wadi rehukòra. <sup>18</sup> Wanyrÿ tule riwatakre ibutumy aòmydÿÿnana bina bina-ribi. Kowa bede wihikÿ-ò riwadykre. Tuu rekealàkre aòu aòu bededÿÿnana roobymy. Kie.

<sup>19</sup> Warybe wehityyna Prisila-ò, Akila-ò biòkre tule Onisiru sÿ mahãdu-ò. <sup>20</sup> Erasto, Oritxi hãwã-ki rarire. Trofimo, Miletu hãwã-ki binamy resere. Taile heka rarira ibinamyhÿreki. <sup>21</sup> Wylemy manake inihe beòrako-ki. Ubulu tarybewehityyna adee riwahinyre. Tu Prudente, Lino, Laujia ijòre. Tule ibutumy ityhydÿÿduseriòre rybe wehityyna adee riwahinyreri.

<sup>22</sup> Wanyrÿ awana ratxikemy watziwãhãre. Tule làhàna umy-wana ratxikemy watzimahãre. Kie. Paulo

## Txitu-ò Paulo Tyyriti Txitu-ò

<sup>1</sup> Jiarỹ Paulo rare. Deuxu deòdu rare. Jesuisi Kristu riwamyre inatyhyna aritỹnynykemy. Kia tyhydỹyna, Deuxu tarasana mahãdu hõrõ rare. Kia ityhydỹyna dee inyõ rierykeki, rityhynykeki, Deuxu deewimy tii rarekre. <sup>2</sup> Umytuedeõnahakỹ iny riraõmyhỹre. Deuxu dori tuu rarybere ihetxi bedeu. Deuxu heka tiu raruiõtyhy. <sup>3</sup> Ibededỹynana òbiti dehemynydeu, Deuxu aõmydỹynana rarybekemy rotỹnyre. Kia aõmysỹdỹyna wadee Deuxu riwahinyre, iny tarasadurenymy rybe-ò. <sup>4</sup> Txitu-ò kia warybe rewahinyra. Kai iny-wana Deuxu tetyhynyteri, kia dori inatyhymy wariõre wesemy Tate. Deuxu, iny tyby-ribi, Jesuisi Kristu, iny tarasadu-ribi, Deuxudeysana-di, ywina-wana adee kanakemy watzireri.

<sup>5</sup> Inyaõmydỹynana biòbitinykemy dori adee adiride. Kreta bede-ribi rõhõnyreu, dori waaõmysỹdỹyna rehuõre. Kia-ki dori kowa-di anaride. Ibutumy hãwã hãwã-ki ityhydỹydu mahãduy-ribi kai matuari mahãduõ bimykere. Iwese jiarỹ rarybere wese kai bimykere. <sup>6</sup> Matuari òbiti bimykere. Matuari ihãwyy sohojiõ rỹira bimykere. Inyõ ityhydỹydumy riõrenadule bimykere. Iriõre iõraruluukeki, iehehekeki, kia hãbu bimyoke. <sup>7</sup> Ityhydỹydu mahãdu yrubudỹydu òbitilemy dori ihỹkemy. Inyõ-ki heka ibinamy mahakeki, imynyõmy. Tii dori, Deuxu dee raaõmysỹdỹykre. Ixidile nohõtidu mynyõmy. Hãbukyara rybebyby, mynyõmy, vỹ luudu aõkõ, hãbu aõbinaluudu aõkõ, hãbu ityhymy nohõtidu aõkõre. Kia mynyõmy. <sup>8</sup> Iny inatyhyle, òbiti luunadule, taroraludu-ò awire mahãdu, iny aõwityhy luunadule, ixiwedule, Deuxu rybe tyhydỹydu, kiale bimykere. <sup>9</sup> Deuxu rybe-di kia hãbu òbitimy rõhõtinkyre, òbitityhylemy rierynanykemy. Inyõ ierysydỹyna rityhynyõkeki, erydỹydu irayky riywinkyre tai ihewo-ribi rieryke, rityhynykemy. Tule iny iwitxira erydỹyna-di rarybemyhỹreki, tii riòbitidỹnyke.

<sup>10</sup> Iny sõwemy inatyhymy rityhynyõreri. Tii dori aõna aõnalemy rarybemyhỹre, ityhydỹydu mahãdu riitxenanyhỹkemy. Kia mahãdu-ribi, judeu mahãdu ibutu ratyre kia aõna aõnany rotỹnyhỹre. <sup>11</sup> Inyõ kowa mahãdury riyrykemy tany rarybeke. Iny sõwemy heka riitxenanyhỹre. Òbitimy aõkõ heka iny rierynanyhỹre. Nieruòle heka iny rierynadỹnyhỹre. <sup>12</sup> Kowa mahãduõ, ierydỹyduõ rarybera:

—Inyboho, Kreta bedeludu mahãdu, ibutumy ruidu roire. Iròdu brebuna wese iny roire. Inyboho heka teoruxere roire. Byrelemy inyboho rõhõtinyhỹrenyre.

<sup>13-14</sup> Aõmybo kahãbu rarybera heka inatyhy rare. Urenana tahe arurumy rityhynykemy. Judeu mahãdu ihetxiu ijyy-ribi tõhõtireny rosakemy kai marybeke. Hãbu mahãdu bede ywina rityhynyõkemy. Kia hãbu dori inatyhyna aõkõ rityhynyre. <sup>15</sup> Òbiti mahãdu dee ibutu òbitire. Ityhydỹyduõ mahãdu-ò aõ aõkõ òbitire. Tõhõtinareny dori aõbina binalemy rõhõtinyhỹre. Aõu tii rixieryre aõbinahakỹ riwinykemy. Deuxu-ribi tõhõtireny rosare. <sup>16</sup> Tiibohe rarybemyhỹrenyre: —Deuxu inyboho reeryrenyre. Tiibohe tahe Deuxu erydu wesemy aõkõ aõna aõnany rotỹnyhỹrenyre. Tiibohe iny riojinyrenyre rybemy reòbyõlemyhỹrenyre. Aõwiihikỹ widỹrieryõrenyre.

## 2

<sup>1</sup> Kai, Txitu, aõernawihikỹdibo bierynanymyhỹke. <sup>2</sup> Matuari mahãdu kai bierynanyke hãbu ixiwedu mahãdulemy roirelemy, ywimy nohõti wydynadu mahãdu roirekemy, òbitilemy rityhynykemy, ibutu òbiti luukemy, iixiratererekemy. <sup>3</sup> Senadu mahãdu tule bierynanyke iyrubumy rỹikemy iujõmoõmy rỹikemy, tule vỹi luuõmykemy. Aõernawihikỹdibo bierynanybenykemy. <sup>4</sup> Hãwyy tỹmyra hãbumy heridu tỹmyra tahãbu luukemy, tariòre luukemy, kia senadu mahãdu rierynanykre. <sup>5</sup> Tuu iyrubumy rỹikemy, òbitimy raraykynymy rỹikemy, taheto riywinymy rỹikemy, awimy rỹikemy, tahãbu rybe riywinymy rỹikemy. Kia wesekeki, Deuxu rybemy inyõ ibinamy rarybeõtyhy. <sup>6</sup> Weryrybò mahãdu tule bierynanyke iyrubumy rỹikemy. <sup>7</sup> Kai, Txitu, aõna aõna wiwihikỹmy botỹỹnykre, tai tahe ityhydỹỹdu mahãdu awesele aõna aõnamy rotỹỹnykre. Kai bierynanykeu, òbitilemy inatyhymy bierynanykre. <sup>8</sup> Arybe òbitityhydile bierynanykre. Tai tahe aõludu raixỹrukre aõmy dori umy rarybeõtyhy. <sup>9</sup> Kai bierynanyke urideòdu mahãdu tawedu rityhynykemy. Tamy awimy raaõmysỹdỹỹnykemy. Tamy heka ròrawyòdỹỹõtyhykemy. <sup>10</sup> Rawasinyke aõkõre, ibutumy òbitilemy riwinykemy. Kiawesekeki, ibutumy Deuxu inytarasadu deewimy riwinykemy. <sup>11</sup> Deuxu taerydỹỹna-di taluuna ibutumy iny-ò rexideòsinyre. Taluuna tahe inytarasana-ò rehemynymy raremyhỹ. <sup>12</sup> Kia heka iny tuu robikeu, awimy erydỹỹna rahake. Riwaerynanymyhỹ aõbina bina widỹỹmy tule òbitina-di yrubudỹỹna-di iny rariakemy kabede-ki. <sup>13</sup> Tule iny riraõmyhỹrenykemy iny Deuxu wihikỹ iny tarasadu Jesuisi Kristu loosõnatyhywo-ki kedehemynykre. <sup>14</sup> Iny òwymy dexiwahinyde iny òraru òwydỹỹrenymy. Kiawese heka iny riwyre idi riratisebenyre iny ijoi lyrahakỹ ixidee rimyre. Kia ijoi iluure.

<sup>15</sup> Kai, Txitu kia aõna aõna inyko belyyke. Tai Deuxudeewimy riwinykemy urenana rakatxirenykemy. Iny bierynanykre. Iny biòbitinykre. Iny ibutumy rityhynykemy matxibenyeke.

## 3

<sup>1</sup> Kai ityhydỹỹdu mahãdu ixi bitõhõtijeranyke ibutumy hãwã dinodu, beded dinodu rityhynykemy, tabede ywina rityhynykemy. Tule aõmysỹdỹỹnana wihikỹ riywinykemy. <sup>2</sup> Modee heka ibinamy rarybeõtyhy, raaõbinanyõtyhy ywimy rarekemy, moheka iehehemy riywinyõmyhỹre. <sup>3</sup> Inyboho heka tule iehehe roiremyhỹ, iitxỹtemy roiremyhỹ, òraruluunamy iny riitxenanyroiremyhỹ, òtaluumy roiremyhỹ. Aõbina bina luumy iny witxira aõna aõna-di wii risỹnymy roiremyhỹ, wideramy roiremyhỹ. <sup>4</sup> Tahe Deuxu iny tarasadu luuna, ruxetòena-wana inydeereny dehemynde, tii kia-ribi iny ritarenyre. <sup>5</sup> Kia aõna aõna wihikỹ iny riwinyrenyreki aõki, iny Deuxu ritarenyre, taluuna-di tahe iny ritarenyre, Jesuisi òraru-ki xiery heka Deuxu riwatỹmyranyre Tatytybytyhy-di. Umytỹmyra riwahinyrenyre, riwasuhòrenyra. <sup>6</sup> Tatytyby inydee riwahinyre Jesuisi Kristu iny biu-ò hedureki. <sup>7</sup> Kiawese iny riwaòbitinyrenyre taluuna-di. Katahe inyboho umytuedeõna ijõdire. <sup>8</sup> Kia heka inatyhy rare. Ka aõna aõna bierynanytyhykeu, tahe wadee awikre. Kia wese Deuxu ityhydỹỹdu mahãdu aõwihikỹlemy ròhõtinyinmyhỹke tule rewinymyhỹkemy. Kia heka awire. Kia iny riwiòhenanymyhỹre. <sup>9</sup> Yraxina itxỹte kai rỹỹraxidỹỹõmy, iwyòdỹỹõmy, rybe jei jei-ribi irehemy mabekre, tule lahi òraru rybe-ribi. Kia rybe aõ aõkõ rare. Awi aõkõ rare, iny riwiòhenanyõtyhy. <sup>10</sup> Hãbuõ rybe òwe òwe-di ityhydỹỹdu rierynanykeki, aruru rybemy tamy marybeke. Kai inatxi rybemy marybekeki, tii rexiòbitinyõkeki, tahe uritere

aõna aõnamy tamydỹỹõmy. Tii òrarudu dori ratximyhỹre. Hãbu òbiti aõkõ.  
<sup>11</sup> Tiile rieryre tuudỹỹdumy ratximyhỹre.

<sup>12</sup> Jiarỹ, Txitxiò, Atema-wana aòrysomy ariteònykreu. Niòpòli hãwã-ò wadee manakre. Kowa arasỹnykre ibutumy biu bedeu. <sup>13</sup> Zena, bede ywina erydỹỹdu, Apòlo-wana kai itỹinareny-ò biteònylebenyke aõmybo tamy biwahinymyhỹke. <sup>14</sup> Bierynanyke iny aõmysỹdỹỹ wihikỹkemy rotỹỹnymyhỹkemy. Kia wese aõbo rauhenyneri tamyreny ijõdikre. Tai riwiòhenanykre.

<sup>15</sup> Ibutumy kaki jiarỹ-wana iny rybe weityhyna adee rewahinyrenyneri. Warybe biwahinyke ibutumy inyluudu ityhydỹỹdu mahãdu-ò ibutumy adeereny Deuxu deysanamykre. Kie.

## Filemo-ò Paulo Tyyriti Filemo-ò

<sup>1-2</sup> Jiarỹ Paulo rare. Jesuisi Kristu òraru-ki ròtena-ki wãhãre. Tximòtxi iny seriòre wese jiarỹ-wana adee Filemo-ò rybe rewahinyrenyire. Kai inyluunareny, iny wiòhenadỹỹdu tate. Tule Afia-ò, rewahinyreri, tii iny wyòrenyõ rare. Tule Arikipu-ò, rewahinyreri iny rybe tỹnydỹỹdu-ki ijoiõ rare. Tule ityhydỹỹdu mahãdu-ò rewahinyreri, aheto dohodỹỹna ijoi-ò wahe. <sup>3</sup> Ruxetòena ywina-wana Deuxu iny tyby-ribi, Jesuisi Kristu iny iòlò ribi adeeremy kanakemy watzireri.

<sup>4</sup> Deuxu-ò rexitòenyreu, atxi, Filemo, wanohõti reamyhỹre. Tai umy rarybera. <sup>5</sup> Kai dori Jesuisi tetyhynyte, inyiòlò luomy, ityhydỹỹdu mahãdu luomy atximahãte. Kia-ò raholamyhỹre. <sup>6</sup> Tule rexitòenymahãreu kiamy jiarỹ rarybe-mahãre. Kai iny witzira-ò Deuxu aõmydỹỹnanamy belyykeu, Kristudeewimy bierynanyke. Kia inydeeremy rexitòenyre Deuxu-ò. <sup>7</sup> Jiarỹ wadeysatyhyreri, kai dori aluuna iny witzira dee ratximyhỹre. Kia heka deysana nihikỹ ityhydỹỹdu mahãdu-ò rare, tii riwawowesenymyhỹre.

<sup>8</sup> Jiarỹ timy atxikemy adee ararybekeki, tule ke heka arateranyke. Jiarỹ dori aityhydỹỹdu seriòre rare. <sup>9</sup> Tahe aluudỹỹna òraru-ki tahe adee arexitòenykre. Jiarỹ Paulo rare. Ròtenawo-ki jiarỹ roire Jesuisi Kristuluu òraru-ki. <sup>10</sup> Wariòre wese dee rexitòenyre. Onesimo wariòre wesemy redyreri Kristu tyhydỹỹna-ò waribi umy wese kaki ròtenawo-ki rare. <sup>11</sup> Tiu heka adee riwahinyõmyhỹre tii dori juhUU awiòhedỹỹdutyhy aõkõ rare. Wijile tahe iny diwiòhenanymyhỹde adee wadee tule. <sup>12</sup> Tii adee reteònyreri. Ixyby araòkesedỹỹnyreri. Kai ixi-ki bimye wawesemy, wadee dori tii awityhy rare. <sup>13</sup> Jiarỹ dori ixideele remyòre wawiòhedỹỹdu kaki ròtenawo-ki Rybewihikỹ dohodỹỹ òraru-ki. Kia òsỹny adee awire. <sup>14</sup> Urile aõkõmy marybekeki tii arimyõthy. Kai aõ wadee bidiwahinykeki, kai ixi sohojile inihe biwahinykre. Waixitòena-ki aõkõ. <sup>15</sup> Onesimo heka aribi irehemy rexiijere ijõ bededỹỹnana witzirau, tahe wijile tiemy abrysimykre. <sup>16</sup> JuhUU wesemy aõkõ ihỹre deòdumy wahe, wiji aseriòre wesemy heka rare. Tii heka waluutyhy rare, adee tulekemy ityhydỹỹdu wese wiluukemy wadee awire. <sup>17</sup> Kai wabiòwakeki, tii birybenyke iwese tiwarybenymyhỹte wese. <sup>18</sup> Aõ adee rasiranyreki, jiarỹ ariwyònykre teròwmy. Jiarỹ iximyna kaa retyyritinyre: Jiarỹ Paulo ariòwynykre. <sup>19</sup> Kai waòraru-ki ityhydỹỹdumy atximahãte. Kia tahe adee tuu ararybeõtyhy.

<sup>20-21</sup> Warybe mynamy ta kai bòwidỹỹkre Kristu òraru-ki, tai ta biwadeysanykre. Jiarỹ warybe rewahinyreri, araeryre, waixitòedỹỹna ratyre biwinykre. <sup>22</sup> Ijõmy adee arexitòenykre: wasỹ waherina aheto-ki biwinykre. Deuxu-ò bexitòenykreki, tai jiarỹ aõhe-wana adeeremy aròòsekre.

<sup>23</sup> Epafa wabiòwa ròtenawo-ribi adee riwehityhynanyreri (jiarỹboho kaki watximyhỹrenyire Jesuisi Kristu Rybe òraru-ki), <sup>24</sup> tule Marku, Aristarku, Dema, Luka-wana rexiwehityhynanyreri. Kia ibutumy heka Deuxu-ò aõmysỹdỹỹdumy roire.

<sup>25</sup> Jesuisi Kristu làhàna awo-ki ratximyhỹre.

## Hebreu-ò Tyyriti judeu ityhydÿÿdu mahãdu-ò

<sup>1</sup> Juhuu Deuxu inytybyreny-ò rarybemy raremyhÿ. Deuxu rybe-ò ijohonadu-di tamy rarybere. Tule sòwemy aõna aõna wixira wixira rarybere tamy. <sup>2</sup> Tahe ikonana wiji txuu inydeereny tariòre diteònykemy rarybera. Tii rarybere tybyderòwomy. Iriòre tahe ibutumy aõna aõna wedu rare. Deuxu iriòre kia rarekemy rarybere. Tii tule juhoo bede widÿÿdu rare. <sup>3</sup> Tii Deuxu loosòna tÿnydÿÿdumy ratxireri. Deuxu wesehyymy ihÿmyhÿre. Iriòre, taryberuru-di, ibutumy aõna aõna rimymy roimyhÿre. Iny òrarunareny riixãwididÿÿnymy rahudi, biu-ki Iòlò Deuxu ruruna weribi ronyre. <sup>4</sup> Iriòre ranire niwihikÿmy. Tii dori ÿjuratyre awityhyre. <sup>5</sup> Tiu heka ÿjuò-ò rarybeòhyymyhÿre: —Kai wariòre tate. Bohyymy wiji wãhãre. Ijò ritidÿÿmy rÿire, kawesemy: —Jiarÿ tybomy ararekre. Tii wariòremy rarekre. (Kia tahe ÿju-ò tii rarybeòhyymyhÿre.) <sup>6</sup> Iriòredela kabede-ki reareu ixityre ijòmy rarybere: —Ibutumy Deuxu ÿju tuu reàlakemy. <sup>7</sup> ÿjummy tahe kawesemy Deuxu rarybere: —Jiarÿ ÿjuboho tahe yhy ele elewesemy retxienyre, wadeòduboho heòtyloosòwesemy retxienyre. <sup>8</sup> Tahe tariòremy kawese rarybere: —Wariòre, Deuxulemy atxiteri. Kai ibutumy inyiòlòhyymy rare. Aruru tuedeõna debòna dire. Wiwesemy nonana-di ibutu-ò atximahãte, òbitimy. <sup>9</sup> Òbitinaluumy kai atximahãte òraruna deramy tahe atximahãte. Tai tahe Deuxu, aDeuxu amahãdu ratyre awimy teleta adee riwahinyre deysana. <sup>10</sup> Ijòmy Deuxu rarybere tariòremy: —Kai Wanyrÿ juhoo bede widÿÿdu tate. Bede ibutumy tewinyte. Tule biuludu aõmydÿÿnana tewinyte. <sup>11</sup> Kia bede aõmydÿÿnana ludu ibutumy rexihukemy. Kai tahe tiu atuedeõna. Iwese uwòhi retybyre wese, kia aõna aõna retybyke. <sup>12</sup> Tule wesirahana rawerasemy roimyhÿre wese ibutu tyy retybomyhÿre, rawitxiradÿÿmyhÿre. Kai tahe ixiwesehyy ahãte. Abede dÿÿnana tahe tiu itueòtyhy. <sup>13</sup> ÿjuò-ò Deuxu tiu rarybeòmyhÿre: —Bodonyke waruruna weribi. Aòludu mahãdu ako-txi resemyhÿkemy. Eòdumy rarekemy. Kiamy tahe tariòre-ò rarybere. <sup>14</sup> Ibutumy ÿju mahãdu Deuxu deòdu rare tyytyby wesemy rare. Deuxu diteònyde ityhydÿÿdu mahãdu wiòhedÿÿmy tule ibutumy biu-ò hedu mahãdu wiòhedÿÿmy.

## 2

<sup>1</sup> Tai tahe, waseriòreboho, ityhyna rybe-ò rokoholarenreki, tamy tahe rikimynrenkre rikityhynyrenkre. Tai tahe iribi tiu ròkòirenyòtyhy. <sup>2</sup> Ibutumy ÿju rybe inatyhymy raremyhÿ. Ibutu òrarudu rimyre aõhòkÿmydÿÿnana-ò irybe riywinyòreki. <sup>3</sup> Kia inatyhy rare. Tarasana rybe wityhy-ò rokoholarenreki, timybo inyboho rikiòlònyrenreki. Kia rybe wityhy Wanyrÿ Jesusile juhoo inydeereny relyyre. Idi tahe, ijohonadu mahãdu tuu rarybere tule. <sup>4</sup> Deuxu irybe myna rotÿÿnyre, ròbedeòbydÿÿnyre tai ròbedeòtiidÿÿnyrenymy tai Deuxu ruru ritÿÿnyre. Tule Deuxu Tatytybytyhy iaòwidÿÿnamy ixideewimy inymy riubÿtÿÿnyre.

<sup>5</sup> ÿju-dee aòkò bede riwahinyre-kia iòlòmy rarekemy. Jesusi-ò kia riwahinyre. <sup>6</sup> Juhoo inyò rybe txiòdÿÿnamy rarybere: —Ritina-ki kia rybe roimyhÿre: —Aòbo heka hãbu tyhy riòre rare? Tii aõ aòkò rare. <sup>7</sup> Ijò bededÿÿnanaõ Deuxu riòre ÿju-ribi tyhymy aòkò ihÿre. <sup>8</sup> Tahe wiji wowydyna tamy rawahire iwese iòlò dee iny riwahinyre wese, tamy rawahire. Tule ibutu wedumy rarekemy. Iny ruereny dee ibutu ihòrò aòkò òsana rare.



Ibutu rurudu wese aõkõ iny ruereny-ki rỹire. <sup>9</sup> Tahe inyboho Jesusimy robirenyre. Tiile tuu ihỹre. Urihimyò bedede aõmydỹnana bedeu ýju-ribi tyhymy aõkõ Deuxu tii relere aõhõkỹmy dỹnana rymykremy. Tahe rurure. Rubu riurihire inyderòwrenymy. Tai tahe rataana raheto wesena Deuxu tamy riwahinyre deàlana-wana. <sup>10</sup> Deuxu riwinyre ibutu aõna aõna ix-idee. Tii kõkeki, bede ihoõhyymy roike. Tii ityhydỹdu mahãdu ridymyhỹre taloosõnasy-ò, taijoimy. Tai tahe Jesuisi aõhõkỹmy rotỹnyre Deuxudeewireki. Tarasana wydydumy heka wityhymy Deuxu delede aõhõkỹmy rotỹnyreki, tai awityhymy ròhònykemy tarasadudikemy. <sup>11</sup> Òbiti widỹdu tahe òbitina mahãdu-wana wimahãdu wese roire. Wiwanale sohoji tybyribile doidenyde. Tai tahe raixỹruõlemy Jesuisi seriòremy rininire. <sup>12</sup> Ritina-ki rarybere: — Ani aritỹnykyre waseriòreboho-ò. Dohodỹna heto-ki àlànawiu-di adee ari-wiunykre. <sup>13</sup> Ijõ Ritidỹna-ki rarybere: Tii arityhynyhykre. Ijõ: Kak-ile wahe watzireri, tule roire wariòre Deuxu diwawahinyde. <sup>14</sup> Iwese ibutumy inyummy wiwesele roire wese, tule Jesuisi umyò rymyre, inyummy wesele, tai inywesemy rurukremy. Tai tahe rubu dinodumy rahaananyre, Diabo wahe. <sup>15</sup> Kia rubu mahãdu lau ruberumyhỹre mahãdu, ibrebu iribi ritare. Kia mahãdu dori rububrebu deòduhyymy ihỹrenyre. <sup>16</sup> Ýju aõkõ ritakemy namyhỹde, Abraõ riòre riòre ritakemy namyhỹde. Tahe wiji tule ihỹre. <sup>17</sup> Iseriòre wese hyymy roirekemy ihỹrenyre. Tii dori Deuxu Xiwena widỹdumy rarekemy inydeereny tai ruxetòena wahidỹdu òbiti tii ihỹre. Ibutumy iny òraru òwydỹnamy rỹimyhỹkemy. <sup>18</sup> Ibutumy ixiradỹna mahãdu tii riwiòhenanymyhỹre, ibutumy ixirana-di aõhõkỹmy rotỹnymyhỹreki.

### 3

<sup>1</sup> Tai tahe, waityhydỹdu seriòreboho, boholatyhyke Jesuisi rybe-ò: — Kaiboho dori tule bimybennykemy biu bede aõmysỹdỹna. Jesuisi iny ityhydỹna Xiwena wahidỹdu wedu tyhy rare tule inatyhyna deòdỹna tyhy tii rare. <sup>2</sup> Deuxu tii riwinyre Xiwena wahidỹdu wedumy. Tai tahe tii òbitimy riywinyre Moisesi riywinyre wese Deuxu sỹmahãduy-ki raaõmysỹdỹnymyhỹreu. <sup>3</sup> Jesuisi-ò tahe sòwemy wowydyna rawahikremy. Moisesi wowydyna ratyre rawowydynanykemy. Hetowidỹdu iny riwowydynymyhỹre, hetoratyremy. <sup>4</sup> Ibutuheto iwidỹdu dire. Ibutu widyydu tahe Deuxu rare. <sup>5</sup> Moisesi Deuxu heto-ki òbitimy rybe riywinymyhỹre teòdu aõmysỹdỹnanamy. Tai tahe teòsidỹna ririre ijesenareki. Deuxu rybe tỹnydỹdu tahe Moisesi rare. <sup>6</sup> Kristu tahe Deuxu sỹmahãdu wedu rare Deuxu riòre rareki. Inyboho Inynyrỹreny-ò ròkòtyhydỹrenykeki tuu rokoirekre. Tai iny brebutererenymy iny raròsònareny inatyhymy rakatximyhỹrenykeki tahe Deuxu ijoi inyboho roire. <sup>7</sup> Kiawesemy tahe Deuxu Tyytybytyhymy narybede: — Wiji tahe tamy boholabenyke aworeny iòlududỹrenyõmy. <sup>8</sup> Judeu mahãdu wesemy aõkõ boibeke, tybyboho wesemy aõkõ wahe boibeke. Tiiboho dori tamy raujòmomyhỹre bedero-ki Deuxu riurihirenyreu. <sup>9</sup> Deuxu rarybere: —Aõbede wiwihikỹ rewinyre hãre, alabiereny riwaitxenanyrenyre tamyreny watzireri iny inatxiwaitue beòramy aõbedewiwihikỹ riraòmyhỹre. <sup>10</sup> Tahe Deuxu rarybere: —Waky reamy tamy wãhãre. Tiu heka wawana ratxiõhyymyhỹre ryòbiti tamy retỹnyre hãrele. Tawo-ki teòsahyymy ratximyhỹre. <sup>11</sup> Deuxu rarybere: Waky reatyhymy tai tahe ixidee resere, inatyhymy rarybere: —Tiu tiiboho elehyna bede-ò ralòõtyhy. <sup>12</sup> Bexiijebenymy waseriòreboho uritere awo-ò ròtedỹỹõmy raykyitxỹtena. Kia òraru-ki aDeuxu tyhy-ribi irehemy bexilòhòrarienyheny aDeuxu tyhy dori irumy ratximyhỹre.

Tii inatyhy rare. <sup>13</sup> Txuõ txuõlemy wii biòbitinybenyke. Òraruna dori itxenadỹỹdu nihikỹ rare. Tai tahe wiji kiamy botỹỹnybenyke. <sup>14</sup> Deuxu rikityhynyrenyhyymy rakatxirenyke. Irybe rikiywinyrenykemy rakatxirenyke iwese juhu rityhynyrenyra wese. Kia wesekeki, Kristu leinamy rakatximyhỹrenyke. <sup>15</sup> Kiawesemy tahe Deuxu Tyytybytyhymy narybede: —Wiji tahe tamy bohlabenyke aworeny iòlududỹỹrenyõmy. Iwese ihetxiu mahãdu riwinyre wese aõkõ boibebenyke. <sup>16</sup> Timahãdubohe roholare Deuxu rybe-ò iribi tahe wimy raòludure. Kowa Egito bede-ribi doimyhỹde mahãdu roire. Moisesi tamahãdu-wana doimyhỹde. <sup>17</sup> Mobohe Deuxu kyaradỹỹdure 40 wyra sõwe. Kia mahãdule bederahykile rexihure raòrarunyreki. <sup>18</sup> Moòbo Deuxu rarybere taelehyna bede-ò ralòõtyhymy? Rybe ywisidỹỹdukõdu mahãdu-ò rarybere. <sup>19</sup> Inyboho tuu rieryrenyre. Rirònyrenyõremy rityhynyõrenyreki.

## 4

<sup>1</sup> Deuxu juhoo rarybere: —Inyõ taelehynabede-ò ralokremy. Inatyhymy heka aõmybo rarybere rỹire. Inyõ òsana kaibohoõ tamy rehemynyõtyhy rityhynyõmyhỹrenyreki. Tai tahe bexityhynymyhỹbenyke kia-ò. <sup>2</sup> Inydeereny tahe Rybewihikỹ tỹmyra ròhònymy roimyhỹre, iwese Moisesi mahãdu-ò ròhònyre wese. Tamyreny tahe awityhymy aõkõ tamy ròhòtinymyhỹre rityhynyõhyymyhỹreki. <sup>3</sup> Deuxu tyhydỹỹdu mahãdu ralòke taelehyna bede-ò. Deuxu dori rarybere: —Jiarỹ inatyhymy anarybede. Iny rityhynymyhỹrele tamy ralokre. Deuxu kiamy rarybere: —Taelehynabede tamy rewinyre xiery juhoo bededỹỹnana rewinyroire. <sup>4</sup> Inyboho rierymyhỹrenyre tii riraòmyhỹremy Ritidỹỹna roireki: —Deuxu taelehyna-ki ele rihynyre debòinatxixu bededỹỹnanamy. Taaõmysỹdỹỹna ibutumy rahure aõbo riwinykemy idi raremyhỹ riwinyre. <sup>5</sup> Ijõ rybe tule kia-wana roire: —Tiu ralòõtyhy waelehyna bede-ò. <sup>6</sup> Tuu heka Deuxu rarybere inatyhy raremy. Ijõ mahãduõ ralòmyhỹre Ijõ mahãduõ ralòrenykre. Moisesi mahãdu tahe ralòõre Deuxu rybe riywinyõreki. <sup>7</sup> Wiji bededỹỹnanamy heka Deuxu rarybereri. Kia rybe rare iwese Davi rarybere wese: —Wiji tamy bohlabenykeu, aworeny iòlududỹỹrenyõmy. <sup>8</sup> Josue ridyre Moisesi mahãdu Suwitziraõ-ò. Kasu tahe kabede aõkõ rare Deuxu elehyna bede. Deuxu idihyy tuu rarybemy ihỹre. Wijina ròtena bededỹỹnanamy Deuxu rarybemyhỹre. <sup>9</sup> Tai tahe Deuxu mahãdu dee elehynasu bede roimyhỹre. Deuxu elehynatxu wese heka rare, iwese Deuxu debò inatxixu-di rexielehynyre wese. <sup>10</sup> Iwese Deuxu raelehynanyre wese raelehynanyre inyboho taaõmysỹdỹỹna-ribi, inyboho rukururenykre. <sup>11</sup> Awityhymy rokoireke tamy rikirònyrenykemy tule. Rekeixijerenyke. Deuxu rybe rikiywinyõrenykeki iwese judeu mahãdu wese rikirònyrenyõtyhy. <sup>12</sup> Ibutumy Deuxu inydeereny rarybere iruru dire. Iwese mayrehe wiòtxureemy rỹrira wese Deuxu rybe rare. Inyrayky wydyna riòròmyhỹre, òhòti wydyna-wana. Mayrehe rayky riraynymyhỹre aõmybo inyrayky Deuxu ibutumy rierykemy. <sup>13</sup> Ibutumy Deuxu rierymyhỹre inyraykyreny. Iny Deuxureny irumy ihỹre. Ibutumy aõna aõna tamy itỹnyhỹkỹle rare. Aõ heka iwasi aõkõ tamy rare. Ikonanau ilau ibutumy aõhebo iny rotỹỹnymyhỹrenyre rikitỹnyrenykre.

<sup>14</sup> Jesuisi Deuxu riòre iny xiwenadỹỹdu tyhy rare. Tii rare biu-ò iny wiòhedỹỹmy. Tai tii rikityhynyrenyhyymyhỹke. <sup>15</sup> Tii iny aõkõnareny rierymyhỹre; ixiradỹỹna rierymyhỹre tai iny riruxetòenyre. Tii kabede-ki tiu heka raòrarunyõhyre, ixiradỹỹna hãrele. <sup>16</sup> Tai tahe rekexiterenymy rekex-

itòenyrenyke iny iòlòreny rynana-ò. Tai tahe ruxetòena sòwemy inydeereny kidiwahinykre. Bedeòbyna kidiòkre tuu rokorurenykreu.

## 5

<sup>1</sup> Hãbuõ Deuxu rimyre xiwena widỹỹdu mahãdu wedumy rarekemy. Tii ibutu iny deròwumy Deuxu-ò rybedumy raremyhỹ. Tii iny uriònosõna Deuxu-ò riwahinyre. Tule òraruna brò-ki xiwena tamy riwahinyre. <sup>2</sup> Tii dori hãbu rare tamahãdureny-ò dori ywina-di ixi-ki ratxireri iòrarureny rierymyhỹreki. Imahãduõ ibedeeryõre ijõ tahe reòsamyhỹre tiemy aõna aõna bina riwinyhyymyhyre. <sup>3</sup> Tai tahe xiwena riwahinyhyymyhyre tamahãdu òraru-ki tule ixiòraru-ki. <sup>4</sup> Inyõ ixideewimy aõkõ xiwenawidỹỹdumy raremyhỹ Deuxudeewi xiery tahe tuu rareke. Deuxu tamy rarybemyhỹrekile tahe tuu rỹike. Iwese Araõ-ò Deuxu rarybere tuu rarekemy. <sup>5</sup> Tahe Kristu tule reximyõhyre xiwena widỹỹdu wedumy rarekremy Deuxu tuu rimymy rarybere: —Kai wariòre tate wijile kai inihe anatara. <sup>6</sup> Ijõ ritina-ki ijõ rỹire: —Kai xiwena wahidỹỹdu atximahãte urenana. Xideki xiwena wahidỹỹdu wesemy atximahãte. <sup>7</sup> Jesuisi kaki raremyhỹu hãbu wesemy iruberytynymy rexitòenymy reàlãmhyre. Rahinymy riajuamy Deuxu-ò rarybere. Tii heka Deuxu rityhynyre tai tamy roholare. <sup>8</sup> Deuxuriòre heka tii rarehãrele tahe aõhòkỹmy rotỹỹnymyhyre. Tai tahe ròeryre rybe ywidỹỹmy. <sup>9</sup> Tii heka raòbitinytyhyre. Tai tarasana widỹỹdu rỹimyhỹre iywidỹỹdu ityhydỹỹdu mahãdu dee. <sup>10</sup> Deuxu dori tii rimyre xiwena wahidỹỹdu wedu rỹirakremy Xideki wesemy.

<sup>11</sup> Sòwemy tuu adee ararybekemy watxireri. Urile adee isirare ierysyna, teeryõhyymy taholamahãte. <sup>12</sup> Kaiboho ihetxiu tetyhynytenyete. Tahe inyõ bibedeerynybenyke. Ihãre tahe teerynanyõhyymahãte. Ihyymy texiòkesedỹỹnyta tai tahe inyõ anaerynanykemy adi ratxireri timybo ityhydỹỹdu-ki tatemahãmy. Juhuu erydỹỹna wahe. <sup>13</sup> Tohouã howỹtòdu weselemy atximahãtenyete, ityhydỹỹdu aõmydỹỹnana teerytyhyõmahãtenyete, rybeerysydu òbiti aõkõ atximahãtenyete. Kaiboho taumynyõmahãtenyete iwese ityhydỹỹdu mahãdu rỹirawesekemy. <sup>14</sup> Deuxu erysynatyhy inyumy rỹsỹna wesemy roire. Aõbinahakỹ aõwihikỹ erysyduòle kia rỹsỹna roire, tiiboho dori rierymyhỹre aõbo awire aõbo ibinare, tuu rotỹỹnyrenyke aõbo awireki.

## 6

<sup>1</sup> Tikiemy juhuu Kristu rybetyhynamy araerynanymahãre. Rekexitòmonyrenyke. Iwitxira erysyna rikieryrenykeny. Tai tahe rakaumynyrenyke ityhydỹỹdu tyhymy ityhydỹỹdu rurudỹỹna-di. Inyõ rarybemyhỹre. Iny raòbitinymy ratxike xiery iny ratakemy ihỹre. Kia aõmydỹỹnana reerydỹỹnanyòkre tahe. Iny rityhynymyhyhỹkekile iny ratake. <sup>2</sup> Ratisebenamy heka anaerynanyòkre, tule debòlidisinamy, tule rubu-ribi ixixanamy, tule bede konana ritxuakre txumy ibutumy heka tuu ararybeòkre. Tii heka juhuu erydỹỹna rare. Kaiboho dori teerytenyete. <sup>3</sup> Wanyrỹ dee wikeki tahe iwitxira erysyna heka ariwiuronykre. <sup>4-6</sup> Inyõ biu-ribi loosõna wãhidỹỹna riurihimy ritakeki. Deuxu Tyytybytyhy aõmydỹỹnamy ijõ ritake wana, Deuxu rybe riurihike wana, kowa bede wihikỹ ruru rieryke wana. Tii ibutukeki tahe Deuxu-ribi tahewo-ò dòòsede inatyhyna ririre. Isiratyhyhyre ixityre ròte taòraruna Deuxu-ò relyyòtyhy. Tii dori Deuxu riòre ixityre itxeònihikỹ-ki ritidire, inyru-ò ritidire ibinamy rarybemyhỹre. <sup>7</sup> Biu heka suõ risebenymyhyre. Òwòruty iribi ritxuhudỹỹnymyhyre tòbòròdỹỹdu-ò. Aõratybo raratynykeki tahe Deuxu

bedeòbydỹna kia rare. <sup>8</sup> Tahe edeweweju kidiwahinykeki, awiõre heka inydee kia sumy ibinamy rarybere. Urile roomyhỹre. Kia suu tahe iny ityhyna ririre mahãdu wese rare.

<sup>9</sup> Kiawese jiarỹ urile rarybereri. Ihãrele tuu aõkõ umyreny rahõtinereri. Inatyhymy rahotinyreri kaiboho aõ òbiti tewinymahãtenytemy. Iwese tarasana mahãdu wese kemy kaiboho ahãtenytemy. <sup>10</sup> Deuxu dori òbitityhy rare. Kaiboho tamy taaõmysỹdỹnihikỹmahãtenytemy tai aribireny tõhõti rosaõtyhy. Iwese Deuxu-ò aluunareny teteòsinyta wese ityhydỹdu seriõre tewiõhenanytenyteki ihãre tadiwiõhenanymahãte. <sup>11</sup> Wiluu hyymy boibeke bede dỹnana konana-ò. Tuu raruhyymahãre. Tule iny raròsònareny-di mohõtinybenyke. <sup>12</sup> Tai tahe ityhydỹdu aõmydỹna irisirenyõmy boibeke. Òbiti widỹdu iele ele aõkõ rare. Rityhynynereri Deuxu wahisidỹna ritakremy iwese Deuxu rarybereri. Kaiboho òbiti widỹdu mahãdu wesemy ahãbenyke.

<sup>13</sup> Deuxu Abraõ-ò rarybereu, inatyhymy ixideele rarybere. Inyõ dori Deuxu ratyremy ratxiõmyhỹre. <sup>14</sup> Kawesemy rarybere. Deuxu tiemy ixirybe riwinyhyymyhỹre Inatyhymy anabedeòbynykre, idi anaixijuradỹnykre tai ariokoreõ rasòwekremy. <sup>15</sup> Tahe Abraõ riraõmyhỹre, raeleleõmy. Idi Deuxu tarybe myna rotỹnyre. <sup>16</sup> Inatyhymy aõmy inyõ rexirybenykre aõmy rarybekre. Kai tahe aõ ijyy riixãwididỹnymyhỹre. <sup>17</sup> Deuxu tule ixidee rexirybedỹnyre inatyhy rybe-di. Tai rybe tarasadu mahãdu rierymyhỹre Deuxu rawitxiranyõtyhy. <sup>18</sup> Inatxi aõmydỹnana iny rieryreny. Deuxu rarybere-wana tiu raruiõtyhy. Tai tahe inyboho inyararòsònareny rimymyhỹre. Iny ixiwõtèna-ò ralòmmyhỹre tarasana-ò ralòmmyhỹre wese. <sup>19</sup> Inywo-ki inyrayky wiõhedỹdu ijõdire hãwòjura rimymyhỹre wese iny roire Jesuisi koludu wesemy inydeereny ralòmmyhỹre wesirahana webòrò-ribi, Deuxusỹ wahe. <sup>20</sup> Jesuisi juhoo ralore tai. Tai tahe Jesuisi Xiwena wahidỹdu wedu rỹihyky Jesuisi tahe Xideki axi weseõ xiwena wahidỹdure.

## 7

<sup>1</sup> Xideki tahe Salẽ hãwã iòlò rare. Deuxu Tyhydỹdu Xiwe wedu rare. Abraõ heka aõbina ritara. Xideki ròhònnyre itxi reakemy, tahe ribedeòbyrybedỹnyre. <sup>2</sup> Tai Abraõ tamy riwahinyre ibutu aõbina aõmydỹna-ribi, debòwiò-ribi sohoji riwahinyre, Xidekini tahe òbiti iòlò rare iwitxira rybe-ki. Salẽ hãwã iòlò tahe ywina nodu rare iwitxira rybe-ki. <sup>3</sup> Tybyõre, iseõre, isỹõre. Tii heka itxu ròhònnyõhyre tule bedekonanaõhyre. Tii heka Deuxu riõre weselemy ihỹre. Tii Xiwena wahidỹdu urenana ratxihyymyhỹre.

<sup>4</sup> Kaiboho mohõtinybenyke timybo tii aõnityhymy raremyhỹdi. Abraõ inytybyreny tamy diwahinyde: debòwiò aõmydỹna-ribi sohoji tamy riõre. Iòlò taòludu aõbina aõbina aõmydỹna-ribi tamy riõre. <sup>5</sup> Xiwena wahidỹdu mahãdu Levi sỹriõre mahãdu-ribi doidenyde. Tamy bede ywina riywinymy riteònyre debòwiò-ribi sohojina ritakemy iny-ribi. Taijoityhy-ribi. Tiiboho dori Abraõ sỹjioiludu tule roire. <sup>6</sup> Xideki tahe Levi sỹjioiludu aõkõ rare. Ihãrele tahe Abraõ tamy debòwiò-ribi sohojina riwahinyre. Xideki tahe bedeòby rybe-di heka Abraõ rirybedỹnyre. Abraõ juhoo ityhydỹdu rare Deuxu dori tamy ityhyna rybe riwahinyre. Xideki tahe ityhytyhy rare. Aõhe inatyhy? <sup>7</sup> Bedeòbmy rybedỹdu aõnityhy rare. Moòbo rarybemyhỹre ratyre aõnityhy rare. Ibutumy kia rierymyhỹre. <sup>8</sup> Levi xiwedỹdu mahãdu hãbumy ituerenyre. Xideki tahe ruruõhy ihỹre. Kia ritina-ki roimyhỹre. <sup>9</sup> Levi debòwiò-ribi sohojina tarasadu rare. Ihãrele tahe Abraõ teròwmy debòwiò-ribi sohojina riwahinyre. <sup>10</sup> Levi dori natibienyõde, ihãre Abraõ-ki ratximyhỹ iu witxi Xideki-wana witxi reareu.

11 Bede ywina rybe xiwedÿÿdu mahãdu-wana iny rataõtyhy. Tai tahe iwitxira xiwe wahidÿÿdu inyboho riijemãhãrenyre. Araõ ijoi ribi aõkõ nade, Xideki nade wese tahe Kristu nade. 12 Xiwena aõmydÿÿnana rawitxirakeki, tule rybe bede ywina rawitxirake. 13-14 Inynyrÿ tahe Levi xiwe-wahidÿÿdu mahãdu-ribi aõkõ nade. Tii Juda mahãdu-ribi nade. Tiiboho heka tiu xiwewahidÿÿdu mahãdu-ki riwiõhedÿÿõhyymyhÿre. Moisesi dori tamy kia aõmysÿdÿÿna riwahinyõre. 15 Kristu iwitxira xiwewahidÿÿduõ rõhõnyre Xideki wesemy raremyhÿ. Tuu heka teerytenyte. 16 Tii heka bede ywina rarybere wesemy aõkõ nade. Tahe iwitxi rare. Tii umy wixira tuedeõna-di nade. Kia ruru òraru-ki nade. 17 Rybe riti-ki rÿire, Kristumy rarybereu: Kai xiwewahidÿÿdu mahãduõ tate Xideki wesenamy ahãte. 18 Aõmydÿÿna tyby rawitxiradÿÿre awimy aõkõ dori rare. Irurudimy aõkõre dori rÿire tarasana wiõhedÿÿmy aõkõ. 19 Kia iny riõbitidÿÿnyre aõkõ. Wiji tahe rarõsõna wihikÿ rõhõnyre inydeereny Kristu dori Deuxu-ò inatyhymy iny ridymyhÿre. 20-21 Deuxu rexirybedÿÿnyre inatyhymy Kristu xiwena wahidÿÿdumy rarekemy. Tahe iwitxira xiwenadÿÿdumy aõkõ kiawese narybede. Kristu-ò tahe Deuxu rarybere: —Deuxu rexirybedÿÿnyre. Tiu rawitxiranyõtyhy arybe. Kai xiwena wahidÿÿdu atximahãte urenana. 22 Tai tahe Jesuisi riõludunyre wijina aõmydÿÿnana tÿmyra. 23 Xiwedu sõwekemy idi rõhõtinyymyhÿre, ijõ rurumyhÿreki. Ijõ tahe terõwymy ralõmyhÿre. 24 Jesuisi tahe xiwena wahidÿÿdu mahãdu-ribi rõhõnyõtyhy. Kristu tahe aõu aõu ratxihyymy rarekre. Tai ixiwe òlõdÿÿnamy aõu aõu iweselemy rarekre. Ijõ-ò tiu raõtyhy. 25 Tai tahe moõ Deuxu-ò Kristu-di kanakeki, tii tahe Jesuisi ritalekemy ratximyhÿre. Tii dori Deuxu-ò inydeereny rexitõenyhyymyhÿre.

26 Tii dori iny derõwymy rarehyymy rareke Deuxu sÿdee. Jesuisi biu-ki rononymhÿre Deuxu-wana. Sÿwihikÿ worana bedehesina-ki rononymhÿre urenana. Tai tahe tii xiwenadÿÿdu wedumy inyboho rurumyhÿrenyre. Tii õbiti rare, tyrare, iõraruna-ki aõkõ, òrarudu mahãdu-ribi hitximy. 27 Xiwena wedu txuõ txuõlemy xiwena diwinymyhÿde juhoo taõraru hetydÿÿnamy riwinymyhÿre idi tahe ibutumy inyõraru hetydÿÿnamy riwinyre. Jesuisi kia Xiwena wedu wesemy aõkõ ihÿre. Tii xiwena wahidÿÿdu mahãdu-ribi lahitxi rare. Sohojihyy dori xiwenamy rexiwahinyre rubu-ò ikonana xiwena wahe. Tii txuõ txuõlemy aõ rubu xiwe wesemy riwahinyõre, iwese iwitxira xiwedÿÿdu riwahinyre wese. Juhoo taõraruna òraru-ki raxiwenyre idi iny òraruna òraru-ki raxiwenyre. 28 Bede ywina hãbule ritidire xiwena wedukremy. Hãbu tahe iruruõre idi tahe sohoji rybeõtyhy bede ywina hewomy nade. Kia tahe Deuxu riõrele tuu risÿnyre, tii õbitityhyreki.

## 8

1-2 Kiamy heka jiarÿ rarybere. Kia awese iny xiwena wedu ijõdire. Iòlò tarynana-ki rononymhÿre. Jesuisi tahe Deuxu ruruna-ribi ronyre. Iheto-di itxeredu tahe Jesuisi rare. Deuxusÿle iyrubudÿÿdu rare. Kia hãbu aõkõ riwinyre Deuxule riwinyre. 3 Kristu iheto raroowo-ki Deuxu deewina riwinymyhÿre. 4 Kristu kabede-ki ratxikeki tii xiwena wahidÿÿduõmy aõkõ ratximyhÿke. Kabede ludu dori bede ywina rybe riritinymyhÿre wesemy riwinymyhÿre. 5 Tiiboho biu aõmydÿÿnana wesemy urihimyoõlemy aõna aõnamy rotyynymyhÿrenyre. (Deuxu Moisesi-ò riteõsinyre aõwesemybo tealãna heto-ki raremyhÿ. Tai tahe Moisesi riwinykemy timybo riteõsinyre wesemy hãwãlò ratyy-ki riteõsinyre.) 6 Kristu tahe iwitxira aõmysÿdÿÿna iaõmysÿdÿÿnare. Bede òtiidÿÿna urenana heka Kristu aõmydÿÿnana rõimyhÿre bede ywina widÿÿdu aõmydÿÿnana ratyremy ihÿre. Kristu tahe bede ywidÿÿna tÿmyra riwinyre

Deuxu iny-wana heka widee rilorore. Deuxule rarybere tahe juhoo-ribi awityhyre irybe. <sup>7</sup> Juhoo bede ywidỹna awi aõkõ rare. Awikeki tahe ijõ tỹmyraõ rõhõnyõtyhy. <sup>8</sup> Deuxu dori ihetxina-ki tamy awimy aõkõ ihỹre. Kawesemy dori rarybere: —Txuõ kanakreu tahe, bede ywidỹna tỹmyra aritobinykremy Juda sỹmahãdu-wana judeu sỹmahãdu-wana. <sup>9</sup> Bede ywidỹna tỹmyra ihetxina-ribi iwitxira rarekere. Ihetxina retobinyre tybyreny-ò. Iu Egito-ribi retareu, retobinyre. Tiiboho bede ywidỹna tỹmyra-ò rieryõre. Tai riywinyõre bede ywidỹna. <sup>10</sup> Kiawese bede ywidỹna tỹmyra rarekre, Wanyrỹ Deuxu rarybere: —Wabede ywina iraykywydyna-di ariritinykre iwo-ò aritidikre wabede ywina. Jiarỹ iDeuxumy ararekre, tule tiiboho wasỹ ijoimy roirekre. <sup>11</sup> Kia txuõ rahukredi tahe ibutumy riwaerykre tasõmo-wana, tanihikỹ-wana. Tiu wii rierynanyõtyhy Wanyrỹ Deuxumy. <sup>12</sup> Ruxetõena tamy ariwahinykre taòrarutedenamy. Iòrarureny ibutumy wanohõti iribi rosakre. <sup>13</sup> Bede ywidỹna tỹmyramy Deuxu rarybereu, ihetxina retybyra raseruserunyra. Taita awiõra heka.

## 9

<sup>1</sup> Juhoo bede ywidỹna-ki bede rybe ritina rỹimyhỹre Deuxu-ò dealàna timybo rawahinykemy. Tule rỹimy raremyhỹ tykyheto bederahy-ki. <sup>2</sup> Iwo-ki inatxi rareamy rỹimyhỹre. Juhoo irareasana-ki Deuxu iõhõnasỹ heka inire iwo-ki tahe adỹỹ loosõna rỹimyhỹre. Tule tii paõ brebuna deõtena òwòrubesetyre-ki rỹimyhỹre. <sup>3</sup> Tyky ijõtòbõna hewo ludu rareasa tahe Deuxu sỹle inire. Òkòsy nihikỹ rihitxinyre ijõ-ribi. Tule tahe òwòruwodỹỹ rỹire womati tỹrỹrỹhỹkỹle ihetyre. Iwo-ki tahe xiwena deõtena. Tai riwosinymyhỹre tỹnyre reakemy. <sup>4</sup> Òwòrudỹrãwo-ki tahe womati tỹrỹrỹhỹkỹ butxi riòre ibòbese-di rỹire, iro-ki ihina rỹire mana ta irybereny-ki inire. Tule Araõ hoju rỹimyhỹre tai ruhunymy raremyhỹ. Tule bede ywidỹna riti mana tyre-ki tai roimyhỹre. <sup>5</sup> Tule iratyy tyre-ki rỹimyhỹ yju ritxoo inatximy. Teubrorodile tahe riwòmymhỹre. Òwòru wodỹỹ ratòbõna tikibo Deuxu iny òraruna riixãwidỹnynymyhỹre wahe. Tahe tuu rỹbeõnyrenykre kia aõmydỹnana tai rỹiremy. <sup>6</sup> Kia ibutumy rexihureu xiwena wahidỹỹdu mahãdu ralòmymhỹre juhoo rareasanawo-ki taaõmysỹdỹỹna tyhy widyymy. <sup>7</sup> Ihewoludu rareasana-ò iwedule ralòmymhỹre. Beòra bededỹnana sohojimy sohojile tamy ralòmymhỹre. Iròdu riwymyhỹre ihãlubu ritxiwikemy xiwenamy. Taòraru-ò iny witxira òraru-ò tule. Inyòraru-ki tii mahãdu aõna aõnamy rotỹnyrenyrexierenyõhyylemy, kiabro-ki. <sup>8</sup> Deuxu Tyytybytyhy kia ijyy-di iny ribedeernymyhỹre. Juhoo tyky heto rỹireu, inybohoõ heka Deuxu iòlõnasỹ-ò ralòmymhỹre. <sup>9</sup> Kia heka wijina bedeernare. Juhoo dori xiwena witxira witxira wahidỹỹna witxira witxira uriõno rare. Kia urile iwahidỹỹdu iwo irayky-wana riòbitinyõhyyre. <sup>10</sup> Juhoo ludu aõmydỹnana bede ywinale rare. Rawitxirakekile tahe rõhõnyke. Tii tahe rỹsỹna bede ywinamy rare, monatyhy bede ywinamy, aõna aõna surona bede ywinamy. Iny kia bede ywina ibutumy rityhinykemy rỹimyhỹre.

<sup>11</sup> Kristu dehemynydeu, iu tahe rawitxiradỹỹre. Kristu Xiwena wahidỹỹdumy ratximyhỹre. Tai tahe ibutumy rawitxiradỹỹmy roimyhỹre. Tii ralòmymhỹre tyyheto tỹmyra-ò. Itỹmyra tahe biu-ki rare. Kabede-ki aõkõ ihỹre; hãbu iwidỹỹdu aõkõ rare. <sup>12</sup> Kristu ralore Deuxu Tyytyby sỹnawo-ò tahãlubu òrarukile ralore. Sohojihyyle ralore iny tarasanarenymy inydeereny riwahinykremy. Iròdu hãlubu-di aõkõ ralore, broreni riòre-di aõkõ, budoeni hãlubu aõkõ wahe tahãlubudile. Tai iny tarasanareny rimyhyyre. <sup>13-14</sup> Juhoo budòe broreni Oriòre hãlubu-di raxiwenanyreny. Broreni bryby

riubÿtÿnyre iny tyre-ki iaòsusu-ribi rahòkemy. Juhuu xiwena iny taòraru-ribi risuhòkeki, iratyre tyhy Kristu hãlubu iny risuhòke. Tai iny raykybina bina ritamyhÿre tule inywo aò aòkò rare, ritamyhÿre. Idi tahe iny Deuxu irumy ratximyhÿre dee wimyri kiwinyrenykre. Tii òbitimy ihÿre iny dee rurureki. <sup>15</sup> Kristu tahe bede ywidÿÿna tÿmyra wedu rare. Tai tahe ibutumy bede ywidÿÿna tÿmyra mahãdu namyhÿde ibutumy aòmybo rarybere ritakemy. Tii dori rurure iny òrarureny dire-ki ihetxiu bede ywina aòmydÿÿnana rÿimyhÿreu, tii rubu-ò rexiwahinyre. Tai inyboho òraruna-ribi rexitarenyre. <sup>16</sup> Inyò rurumyhÿre-wana tii iny dee ritinaò ririmyhÿre kia ritina rarybere: — Moòbo taaòna aòna riwahinymy ririkre. Iny rururemyhÿre xiery tahe, ritina awi rare. <sup>17</sup> Kia ritina aò aòkò rare iwidÿÿdu tyhy irumy ratxikeki, rubumy roimyhÿrele ritina aò rare. <sup>18</sup> Tai tahe juhoo bede ywidÿÿna ijò hãlubu txiwixina dire. <sup>19</sup> Moisesi Deuxu bede ywina wahidÿÿ rahudi, tii bede ywina tyre ritxiwire, iny ratytre riubÿtÿnyre budoeni hãlubu-di broreni riòre hãlubu-di bewana riurinyumy riubÿtÿnyre. Tule budòe siratykysò-di riubÿtÿnyre. <sup>20</sup> Iu tahe tuu rarybere: —Kia bede ywidÿÿna tÿmyra hãlubu rare. Deuxu wadee rarybere kaiboho bityhynkemy. <sup>21</sup> Tule tykyheto-ki hãlubu riubÿtÿnyre deàlàna aòmydÿÿnana-ki <sup>22</sup> Bede ywina rybe ditÿnynyde ibutumy hãlubu-di risebenyre, hãlubu txiwixina ihoòkeki òraruna rexihuòtyhy.

<sup>23</sup> Kabede aòmydÿÿnana biu aòmydÿÿnana wesele rare. Tai tahe Kristu tahãlubu-di kia ibutumy risuhore. Tai iratyre tyhymy ihÿre. <sup>24</sup> Kristu heka templo hãbu widÿÿna-ò ralòòre. Kia tahe inatyhy heto aòkò rare. Biu-ò Kristu ralore Deuxuko-ki kia tahe isÿtyhy rare. <sup>25-26</sup> Tii sohojihyyle heka rare iny òrarureny riixãwididÿÿnykemy rubu-ò rexiwahinyre. Xiwena wedu wesemy aòkò ralòre. Kia xiwena wedu aòu aòu beòralemy hãlubu-di rara xiwemyhÿre. Kristu tahe sohoji hyyle rubu-ò rexiwahinyre. <sup>27-28</sup> Iny rurumyhÿre sohojihyylemy idi tahe Deuxu ywisidÿÿna hitxinatxu kanakre ibutu iny. Kristu rurure sohojile sòwemy iny òraru ixityre riatykemy. Inyò tamy retehemy riraòmyhÿre wana, tamy ixityre kanakre òraru ixãwididÿÿnamy iny tarasanarenymy.

## 10

<sup>1</sup> Juhu bede ywina rybe urihimyòle iny ribedeerynyre Kristu aòmydÿÿnamy. Bede ywina itÿnytyhymy aòkò iny dee roire aòmybo Kristu inydeereny riwinykre. Ubòròròna wesemy inydeereny dobehede bede ywina. Tai tahe tiu iny riòbitinyòtyhy xiwena-di reamyhÿre beòra ihyymy aòkò. <sup>2</sup> Aòkòkeki beòra beòrau idi reaòtyhy. Aòkòkeki sohojihyylemy xiwena riwinykre. Sohoji bede dÿÿnanadile iòrarureny rexihuke. Tahe aòkòre beòra ihyymy aòkò xiwena-di reamyhÿre. <sup>3</sup> Tai tiiemy òraru-di hyy heka ròhòtinymyhÿre. <sup>4</sup> Broreni hãlubu, budoeni hãlubu òraruna rahuòtyhy. <sup>5</sup> Tai Kristu kabede-ò dehemynydeu, rarybere: —Deuxu, broreni hãlubu budòe hãlubu adee awimy aòkò ihÿre. Tai tahe waumy teywinymy ahãte axiwenamy aroikremy. <sup>6</sup> Kai heka awimy tai tahaòhyte iròdu hãlubu xiwena-ki òraru tuedenamy. <sup>7</sup> Tahe jiarÿ rarybere: —Betehe inihe waumy rubu-ò rewahinyraò iwese ritidÿÿna rybe roimyhÿre wesemy, adeewina ibutumy arityhynkemy wahe. <sup>8</sup> Tai Kristu juhoo rarybere: —Deuxu, broreni hãlubu budòe hãlubu adee awimy aòkò ihÿre. Tai tahe waumy teywinymy ahãte axiwenamy aroikremy. Kai heka awimy tai tahaòhyte iròdu hãlubu xiwena-ki òraru tuedenamy. Kia rarybere bedeywina rybe hãrele. <sup>9</sup> Tahe ixityre rarybere: —Deuxu kakile watxireri adeewimy ariwinykemy. Juhoo bitake xiwena ihewoludu ritidikemy, Kristu xiwena wahe. <sup>10</sup> Kristu rurure iny òraru-ki. Ixiwena sohojilemy rÿire tuhyy ramyhÿre

Deuxu deewina wahe. Kabede ywidỹna tahe itỹmyra ihỹre. Tai tahe iny riòbitidỹny hyy rarekre. <sup>11</sup> Xiwedỹdu txuõ txuõlemy rixiwenanymyhỹre. Tii tahe tiu inyòraruna ritaõtyhy. <sup>12</sup> Jesuisi tahe sohojihyulemy òraru xi-wena riwinyre. Iny òrarunareny riixãwidinymy rahudi Deuxu rurunawe-ribi ronyre, riwowydynymyhỹreki. <sup>13</sup> Tahe Kristu riraòmy rononymyhỹre. Taòludu ruru iribi ritakemy tawarawo-ò Deuxu ritidikemy. <sup>14</sup> Jesuisi dori sohoji xiwehyy-di, iny riòbitidỹnyhyymyhỹre. <sup>15</sup> Deuxu Tyytybytyhy tule kiamy rarybere. Kiawese ritidỹna roire: <sup>16</sup> —Kiawese bedede ywidỹna tỹmyra rarekre. Wanyrỹ Deuxu ijòmy rarybere: —Wabede ywina irayky wydyna-ki ariritinykre, aritidikre wabedeywina iwo-ò wahe. <sup>17</sup> —Idi ixityre rarybere: Ruxetòena tamy ariwahinykre iòrarutuedenamy. Iòrarureny ibutumy wanohòti-ribi rosakre. <sup>18</sup> Òraru wanohòti-ribi rosareu, idi rehureu, tiu xiwena rỹiòtyhy tuu rahukemy.

<sup>19</sup> Katahe, waseriòre, rekexiuwaresemy rikirònyrenykre Deuxusỹ-ò. Tamy rekexitòenyrenykeny Jesuisi hãlubu dejuxuna òraru-ki sohojile rikirònyrenykre. <sup>20</sup> Jesuisi dori rytỹmyra riraynyre Deuxu-ò wesirahana yra-di ralòkemy. (Iwese xiwedỹdu wedu ralòmyhỹre wese, inyboho wiji ralorenyke.) <sup>21</sup> Tule iny xiwe wahidỹdu nihikỹ ijòdirenny Deuxu heto-ki. <sup>22</sup> Tai rikitehemynyrenykre inyraykytyhy ywinakemy inatyhynatyhymy òbitinatyhymy nohòtimy, rati betyhy ixãwina-di sebena-di inyumyreny. <sup>23</sup> Inatyhyna rikiyrubunyrenyke inyararòsònareny wahe. Aòbo Deuxu inydeereny riwahinykeny rikiraòrenyke. Tii dori inatyhy rare. <sup>24</sup> Tule widi ròkòhòtinyrenyke wiluurenymy rakatxirenykeny wiwiòhedỹny rakatxirenyke. <sup>25</sup> Uritere ixihitxidỹõmy tamy beahyy rakatximahãrenyke. Ijò dori dohodỹna-ò noderamy reamyhỹre kia awi aòkò rare. Inyò ryribi rexidòrarienyymyhỹkeki, tamy rakarybemyhỹrenyke kòdòòsekemy ixyby. Inynyrỹtxu dori iòhòmy resera. Tai tahe sòwemy ròkòteòsidỹnyymyhỹke.

<sup>26</sup> Iribi inyboho inatyhyna ibutumy rieryrenymy rahudi, tahe kia hãrele heka òraruna-di rariamyhỹkeki, òraruna xiwena roiòmyhỹre inydeereny iny òraruna tarasana wahe. <sup>27</sup> Kia-ribi tule brebu rỹimyhỹre Deuxu ywisidỹnatxu lau. Deuxu heòty ratyradyỹdu lau ruberumyhỹre. Kia Deuxu òludu rahukemy rỹimyhỹre. <sup>28</sup> Ruxetòena-di aòkò inyò rurure Moisesi bedede ywina riywinyòreki. Itxeredu inatxi ada inataò-di aòbo raryberenykeny. Tai rirubunyre. <sup>29</sup> Kia-di dori mohòtinybenyke. Inyò Jesuisi rybe-di risinykeki, iratyremy ibinatyhymy rarekre tamy. Tii sòwetyhymy aòhòkỹmy rotỹnykre ibutu ratyre. Inyò Deuxu Tyytybytyhy ruxetòena aò aòkòmy idi ròhòtinyre ibinamy tuu rarybemyhỹre. Jesuisi hãlubu aò aòkòmy idi ròhòtinyre ibinamy tuu rarybemyhỹre. <sup>30</sup> Deuxu kia rarybere: —Txìòhe iny òwydỹdu jiarỹ rare. Inymy jiarỹle arexiòwynykre.

Inyboho rierymyhỹreny kiamy rarybemyhỹre. Tii kiawese rare. Tule ijòmy rarybere: —Inynyrỹle taijoi-di ywisidỹna-di riywisidỹnykre. <sup>31</sup> Deuxu irumy rare. Tii brebuna-di tyhy rareke. Iu iny tamy ibinakeki, tii dori idi reheke.

<sup>32</sup> Juhuu Kristumy teerytenyete, awimy heka ahãtenyete. Kia-ribi òhòti losarenyõmy. Kristu òraru-ki aòhòkỹmy tatỹnytenyete. Ihãrele tahe Kristu-wana hyy toitemahã. <sup>33</sup> Inyò umyreny robireu, tai akireny rutxuenyete, tule akireny òhòte itamadỹnyre. Ityhydỹdu seriòre mahãdu inyò aòhòkỹmy risỹnyre, kaiboho tewotòenytenyete. <sup>34</sup> Inyò ròtenawo-ò ridykeki tai tewotòenymahãtenyete. Inyò ahòrò-di rawasinyre, urile teysate. Ahòrò dori iratyre sòwemy rỹimyhỹre biubede-ki. Tai aòna aòna tiu rabinaòtyhy. Kia teerymahãtenyete. <sup>35</sup> Uritere araròsòna-ribi awo



xierysyõmy. Kai dori uriõno nihikỹ bitakre. <sup>36</sup> Ywinihikỹ-di heka rokoireke Deuxudeewimy rikiwinyrenykemy. Tai aõwihikỹmybo Deuxu rarybere, rikitarenkre. <sup>37</sup> Ritinamy tahe rỹire: —Txiokre inihe. Urihimyò biraòke. Kia kanakre inatyhymy. Tii raroorehenyõtyhy.

<sup>38</sup> Waityhydỹỹdu mahãdu òbiti iruhyymy rỹirake, riwatyhynyreki. Inyõ tahe ròðsekeki tamy wadeysaõtyhy.

<sup>39</sup> Inyboho heka tahewo-ò òkòsedu aõkõ roire. Ityhydỹỹdu dori roire, iruhyymy nodu, biu-ò hena mahãdu wahe.

## 11

<sup>1</sup> Aõbohe ityhyna rare. Aõna aõnaõ iny inatyhymy riraðmyhỹreu, kia tahe ityhyna rare. Inatyhymy dori kanakre iny rierymyhỹre, iny tuu ro-biõlemy. <sup>2</sup> Ihetxina mahãdu Deuxudeewimy tuu ihỹre, rityhynymyhỹreki. <sup>3</sup> Juhuu Deuxu aõna aõna bede bedemy riwinyre. Iny inatyhy hynale kia rierymahãrenyre. Deuxu lobixiõna-di ibutumy aõna aõna riwinyre. Idi tahe lobixinamy ròhònyre iny itxerenarenymy. Deuxu rarybere. Tai tahe aõna aõna ritxienyre. <sup>4</sup> Taityhydỹỹna òraru-ki Abeli Xiweõ riwahinyre Deuxu-ò. Kaĩ xiwedỹỹna ratyre tamy riwahinyre. Abeli rityhynyrekile riwahinyre, tai tahe Deuxu reysare, òbitimy rareki. Tai ixiwedỹỹna Deuxu riwyre. Abeli tahe rurure. Ihãrele, iwese tii ityhyna-di raremyhỹ wese rokoireke. <sup>5</sup> Enoi tatyhydỹỹna òraru-ki tiu ruruõhyyre. Enoi Deuxudeewimy riwinyre tuu Deuxu juhuu rarybere. Aõwesele iõmy reare. Deuxu ridymy reare. <sup>6</sup> Inyõ ityhynaõkeki, tiu Deuxudeewimy aõ iwidỹỹõna. Inyõ Deuxudee iòhòmy ratxikeki, tii rityhynymyhỹke inatyhymy Deuxu-wana ihỹre. Deuxu dori tamy rexideòsinykemy ratxireri. <sup>7</sup> Noe tule ityhyna dire. Tii hãwò nihikỹtyhy riwinyre. Aõhebo rotỹỹnykremy robiõhyyre. Ihãrele tahe Deuxu rybe rityhynyre. Tai tahe tasỹ mahãdu ritare rubu-ribi. Bedeludu mahãdu tahe rurure. Noe tahe Deuxu riòbitidỹỹnyre, ityhyna òraru-ki. <sup>8</sup> Abraõ tule Deuxu rityhynyre. Deuxu ijõ bede-ò diteònydeu, Abraõ irybe riywinyre, rare taijoi-wana. Deuxu tamy rarybere suõ tamy rihitxinykemy isỹmy. Tai Abraõ rexitare, rare ihãwã bede ierykõna-ò. <sup>9</sup> Ityhyna-di rasỹnyre kia bede-ki. Tyky heto-ki rahetonymyhỹre iwese ijõ bedeludu witxira mahãdu rahetonymyhỹre wese. Ibede rarehãrele tahe ihõrõmy aõkõ ròhòtimyre idi tuu aõkõ rexinohòtinyre. Tariòre Ijai, Ijaò-wana rasỹnyre. Tamy tule Deuxu rarybere iwese tyby-ò narybede wesemy. <sup>10</sup> Abraõ tahe hãwãõ riraðmyhỹre. Deuxu widỹỹna hãwã biu ludu-ki. Kia hãwã Deuxu nohòti-ribi nyide. Kia hãwã dori tiu rabinamy rejuxunyõtyhy ihetotira kyhyna direki. <sup>11</sup> Sara ityhyna dire. Tai ruru dire uladusemy ronykemy ibeòra sòwere hãrele. Tii tahe rityhynyre tuu raryberemy. <sup>12</sup> Sara iòhòmy irubu roire rasenadunyreki. Ihãrele tahe sòwemy rariòreriòrenyre. Iwese taina rudera wese, ÿnyra sòwewese.

<sup>13</sup> Kia heka ibutumy rityhynymyhỹre. Idi tahe ituerenyre aõ heka rimoõre Deuxu rybe lidisinaõ. Ireheribile tuu robirenyre; reysarenyre. Tiiboho rarybemyhỹrenyre kabede ludu mahãdu aõkõ raremy, isỹreny mahãdu aõkõ raremy. <sup>14</sup> Tii heka rarunymyhỹre sỹwihikỹmy tai raerymyhỹre tuu raryberekiki. <sup>15</sup> Tamy wikeki riòkeserenyra inihe tahe aõkõre, noderare. <sup>16</sup> Wiji tahe tii sỹwihikỹmy biu-ki rarunymyhỹre. Tii dori ijõ ratyre rare. Deuxu isỹ wihikỹ riwinyre tai tahe inyõ iDeuxurenymy rarybekeki, tai Deuxu tiu raixỹruõtyhy.

<sup>17</sup> Deuxu Abraõ urihixina-di reareu riwahinyre Ijai xiwenamy. Tariòre sohoji riywinymy rỹire xiwenamy rurukremy. Tii Deuxu rybena-ki iriòre rarehãre. <sup>18</sup> Deuxu dori juhuu rarybere: —Ariòre Ijai ariokoretybymy rarekre. <sup>19</sup> Abraõ rieryre Deuxu iruru dire rubu-ribi riixixadỹỹnyke, tii

Deuxu rityhynyreki. Abraõ dori röhötinyre rawasenanyre. Ijai juhoo rubu-ribi ixixa wesemy reare, raumynyre. <sup>20</sup> Iribi tahe Ijai tyhyna-di rarybere Ijaò dee, Ijau dee aõbo kabede-ò kanakremy aõwihikỹ wahe. <sup>21</sup> Iribi tahe tule Ijaò rarybere Jyje riòre dee, tariokoreboho-ò. Ityhyna-di rarybere. Ijaò iòhòmy rubu-ò ihỹre, òwòru-ò reximymy rariamyhỹre. Tahe òwòru-di rexilamadỹnyny rỹire rexitòenykemy Deuxu-ò, riwowydynyremy wahe. <sup>22</sup> Iribi tahe tule Jyje iòhòmy rubu-ò ihỹre. Tule ityhyna-di rarybere judeu ijoi Egito bede-ribi kòdòhònykemy. Tule tahe tarybe ririre titxibo itityby rỹikremy. <sup>23</sup> Iribi tahe Moisesi reareu, tybyboho iseboho riwòreny inataõ ahådumy tatyhynareny-di ihỹrenyeki. Moisesi itohouã ruxerare. Iòlò rubudỹy bede ywina rybemy rarybere. Moisesi tyby-wana kia bede ywina rybe lau ruberuõhyre. <sup>24</sup> Moisesi raumynyreu, Faraò riorerieremy noderare tii tatyhydỹna òraru-ki. <sup>25</sup> Tii heka tamywire Deuxu erydu mahãdu-wana aõhòkỹmy rotỹnykre. Urihimyò òrarumy reòwarike derare heka rare. <sup>26</sup> Moisesi, Egito bede-ki aõna aõna wihikỹ rỹiramyhỹ derare. Iny tamy aõmy rarybehinamyhỹre. Tahe ibinamy röhötinyõmyhỹre. Kristu dori riraòmyhỹre, biu-ki uriòno idi röhötinyomyhỹre. <sup>27</sup> Moisesi Egito bede-ribi röhònyre, ityhyna direki wahe. Ruberuõhyomyhỹre heka tii iòlò deburehekỹ lau. Iwese Deuxumy lobixiõnadu iko-txi robire wesemy, röhònyre. Tii tahewo-ò ròdseõhyre. <sup>28</sup> Moisesi heka Deuxu rityhynyre. Tai tahe pascoa worana bedehesi riywinykemy beòra beòramy rarybere. Hãlubu ijò-ò ritxi-wire. Tai yju heka iny riòre delareny rirubunyõre. Egito riòre delareny rurure tai. <sup>29</sup> Iwese surubu tyre-di reurore wesele judeu mahãdu Ahobesò rawo-di reurore beõlemy. Iu Egito mahãdu reuròkemy rareu, urile bee idi raratòbòre. Kia riwinyreny ityhydỹnadireki. <sup>30</sup> Ijeriò hãwã mana òtity nihikỹ resere judeu mahãdu rityhynyreki. Debò inatxi reurò txuumy hãwã rora-ki rariare tahe resere. <sup>31</sup> Raabe heka hãwyy uriuri ixidinodu rare, wedena wahe. Tahe Deuxu tyhydỹdukòdu mahãdu rexihureu, Raabe ruruõre tatyhydỹna-ki. Bede-di itxeredu riwòreki.

<sup>32</sup> Timybohe ijõmy ararybekre? Wasirare heka ibutumy tuu ararybekre, sòwerekiki. Kideõ ijo, Barake, Sansaõ, Ijete, Davi, Samueli, tule Deuxu rybemy rybedu mahãdu sòwerekiki. <sup>33</sup> Kaheka ibutumy riwinyre tyhyna-di. Ijõ iòlòhãwã-di rahỹnanyre. Òbitina riwinyreny. Ritareny aõmybo Deuxu rarybere. Leaõry dori rirarytxinyre. <sup>34</sup> Rirònyre heòtywo-txi ihãrele ruruõreny. Mayrehe rubudỹna-ribi rexitareny. Bina-ribi ixyby rarurunyreny. Ijõ aõbina-ki irurudityhymy ratximyhỹre. Tai sòwemy aõbinadu iribi rahenyre. <sup>35</sup> Tasỹõ rubu-ribi riixixanyre hãwyyõ rityhynyreki. Ijõ mahãduõ aõhòkỹmy dỹnana-ki tamy reare. Ixitarasamy röhötinyõhyre aõhòkỹmy dỹnana-ribi. Tii dori umytuedeõna wihikỹ-di rubu-ribi rexixakredi röhötinyomyhỹre. <sup>36</sup> Ijõ ityhydỹduõ idi rybe jei jeina-ki ratximyhỹre. Tule tai òhòte rỹire reruti òhòte-di. Tule ijõ womati reroti-di rataataare, ihyyemy idi rehure ròtenawo-ò. <sup>37</sup> Ijõ mana-di riwerekiki. Ijõ sehòtxi-di riwetyaòròre, wiere riatyre. Ijõ mayrehe-di rirubunyre. Ijõ ityhydỹdu-ò budoeniy-di watxinityy-di idi rexitynyre, rama risareny, aõhòkỹmy risỹnyny inyõ tòtxi ririõhyre. Ijõ heka aõbinalemy tamy reare. <sup>38</sup> Kia ityhydỹdu mahãduõ ibutu iny ratyre Deuxu dee wire. Kabedeludu ityhydỹdukòdu mahãdu wese aõkò tiiboho roire. Hãwãlòmy, bederahymy, hãloomy, kia ibutumy bede-di rariamyhỹre iwese iny isỹkòmy rỹire wese. <sup>39</sup> Ibutumy iribi rakaraykynyrenyke tiiboho dori inatyhynarenydireki. Tahe urile Deuxu rybe wahisidỹna ritaõmyhỹreny. <sup>40</sup> Deuxu dori iny-ò riraòmyhỹre Kristu dehemynyna wahe. Ihewo-ribi tahe kia inydeereny ri-

wahinykre, wiwanahyyle. Tai tahe idi awityhymy iny ibutumy ròhònykremy.

## 12

<sup>1</sup> Sòwere inydireny itxeredu. Iny robirenylemy rýirerimy ihýre. Tai tahe tako-ò rekekoamyhýrenykre. Deuxu dori inydeereny riwahinyre. Òraru iutxiere inykireny rýire. Tai tahe rikiatyrenyke òraru ibutumy inyboho dori rimymyhýreny. <sup>2</sup> Jesuisi-ò sohojile reketehemynyke. Tii dori inatyhydýña deledýñdu rare tule inatyhydýña konanadýñdu rare. Jesuisi deysana kanakredile ròhòtinymyhýreny. Tai tahe rahòtinymyhýre. Tai tahe aòhòkýmy rotýñnyre, itxeò nihiký-ki rurure. Tai tahe ixýru tamy reaòhyy rurureu. Wiji tii ronymyhýre Deuxu ryna ruruweribi-ki. <sup>3</sup> Jesuisi dee hàbu binahaký aòbinamy reare. Tahe rawobinarybenyòhyre. Tai tahe idi ròkòhòtinynyke iwese rakatxirenykemy. Uritere bede worenymy bede òtiidýñnyre. <sup>4</sup> Boholabenyke, òraru ijesu òraru-ki inyò aribireny ruruòhyymy ihýre. <sup>5</sup> Deuxu tariòre dee rybe wesele adeeremy rarybemyhýre. Kia-ribi aòbohe òhòtirenny rosara. Kia wese Deuxu rarybera: —Wariòre, araòbitidýñnyre, uritere adebureòmy, alisina aòkò dori rare. Deòsana rybemy adee ararybekeki, uritere bedewoòmy. <sup>6</sup> Deuxu dori aluurekile araòbitidýñnykre. Deuxu tariòre wesemy inyò rimykeki, aòhòkýmy risýnynymyhýre iòbitidýñny. <sup>7</sup> Tybydiò aòbohe uri tariòre-di uri aòbohe tyby idi rýira tariòre riòbitinyòmy? Aòkòre. <sup>8</sup> Ibutumy iny òbitidýñny Deuxu rurumyhýre. Inyò òbitidýñnadiòkeki tii iriòre inatyhy wesemy aòkò rare. <sup>9</sup> Tule inytybyrenny inydeerenny retehemyhýre inyboho riòbitidýñnymyhýreny. Tai tahe iny riywinymyhýreny. Deuxu tahe inytybyrenny rare. Inytybyrenny ratyre tahe tuu rikiywinynyke, tahe irumy rokoireke iurenana. <sup>10</sup> Iny tybyrenny urihimyo bededýñnana-di riòbitidýñnyre iwese tamywimny ròhòtinnyre wese. Deuxu tahe iny riòbitidýñnyre rekexiwinynyrennykemy. Iwese òbitimny tii raremyhý wese rokoirekemy. <sup>11</sup> Inyò òbitidýñnany deramy reakeki, tii deysamy aòkò rareke. Òbitidýñna bedewona-di rare. Rexihuredi, tahe wiòhedýñnany reamyhýre modeebo reamyhýreò, irumy ywina-di rarehyke. <sup>12-13</sup> Kai bedewokeki, aumy-di, arayky-di iruruòra, ihàrele tahe birurudýñnany bimnyke. Ati tule iruruòre ihàrele tahe, myike òbitimny. Betehe, biywinymny ryòbiti-di mariake. Tai tahe ijò iny reyterenykre, raòwenyòtyhy.

<sup>14</sup> Ainytyhymy inydee ibutumy ahàbenyke tule bexiòbitidýñnany ahàbenyke. Iny òbitimny rýiòkeki, tiu Deuxumny robiòtyhy. <sup>15</sup> Inyò tahewo-ò Deuxu ruxetòena-ribi ròòseke lau kaiboho bexiebenyke. Tule amahàdurenny-ki alòbòrònahyre wesemy inyò ihýke lau kaiboho bexiebenyke. Kiakeki, sòwemy iny rahyrennyke òraruna uri wesemy. <sup>16</sup> Tule bexiebenyke inyò òta òta òraru-txi reseke lau ada Deuxu tòhòti ribi rosake lau. Ijau tahe Deuxu-di ròhòtinnyre. Tyby rurukreu aò tarasana-di tii rohonyre byrena sohoji òwylemy tahelýña-ò rohonyre. <sup>17</sup> Iribi tahe òhòtirenny losarenymny. Tii dori ròhòtinnyre taaòwi-di ixyby imynymny reare. Tahe aòkòhyre rahinyrehàrele. Rabedewomy ronyre Ijau dori rýsýna deròwymny taaòwi riwahinyre taexi-ò. Inyboho tahe rekexiwinymahàrennyke itxýte lau.

<sup>18</sup> Deuxu tabede ywina rybe heka judeu mahàdu-ò riwahinyre, tiiboho Sinai hàwàlò heòtyko-txi rýire. Sòwemy heòty bedeluru yhynihiký tai reare. Tiiboho rubuerurenny. Kaiboho tiu breburenymny ahàbenyke iwesereny. <sup>19</sup> Txurònaò rurònyre nihikýmy. Tule rybeò rarybere. Iny ibinamy tai ròhòtinnyre. Tai tahe riixàwidinykemy Deuxu dee rarybere. <sup>20</sup> Iròduò hàwàlò-di tawa ritidikeki, iny mana-di tamy rehuke irubudýñny Deuxu rybemynamny. <sup>21</sup> Tai tahe iny tahewo-ò rexihejire brebumny. Moisesi tule, rexiòhàrunnyre

tuu robireu. Ramytatamy brebумы. <sup>22-23</sup> Kaiboho dori iwitxira hãwãlò-ò tetehemynyta, Siaõ hãwãlò-ò, Deuxu hãwã-ò. Kia biu-ki Jerusalẽ rare. Sõwetyhymy tai ýju mahãdu rýire bedede hesina-ò. Ibutu butuna rare. Deuxu riòre sohojile butuna-ò tetehemynyte, dohodýýna mahãdu wahe. Ibutumy ityyriti-ki ini roimyhýre tamy rehemynyre. Deuxu-ò tetehemynyte ibutumy erydumy ratximyhýreò. Inyhýkýna mahãdu òbitimy rýira mahãdu-ò tetehemynyta. <sup>24</sup> Tule Jesuisi-ò tetehemynyte. Tii iny lobitýmyradýýdu rare. Ihãlubu-ò tetehemynyte. Abeli hãlubu ratyre awimy ihýre. Jesuisi hãlubu dori inydee aõwiwihiký rare iny òrarureny òraru-ki dori ritxiwire iny riòbitidýýnykremy. <sup>25</sup> Boholabenyke Deuxu rarybemyhýre, boholabenyke. Kia Deuxu roholaõmyhýre mahãdu, rexihumyhýre kabede-ki. Tii biu-ribi narybedeò, rokholaõrenykeki, tule inyboho rekexihurenyke. Inydeereny aõnityhykre. <sup>26</sup> Iu rarybereu, bedede ramytatatyhyre. Tahe tii rarybere: —Sohojimy ixityre bedede biumy arimytatadýýnykre. <sup>27</sup> Kiamy heka rarybereri. Aõbo relemy, urile ixãwikre aõbo ixãwidikõnalemy rýirakre. <sup>28</sup> Tai tahe Deuxumy rikiàlãrenyke. Inyboho dori Iòlõnasýõ rokoirenykre kia rýihyummy rarekre. Iwese Deuxudeewire wese rikiàlãrenyke ityhyna-di òhãruna-di. <sup>29</sup> Deuxu ykarana dori heòty riworonmyhýre wese rare.

## 13

<sup>1</sup> Ityhydýýdu seriòre wiluummy ahãbenyke. <sup>2</sup> Aõtxile aroraluduõ bimyhymy ahãbenyke. Inyõ kawese risýnykeu, ýju dori riwiòhenanyre, rieryòhyyre mobo rare. <sup>3</sup> Ròtenawo-ki rýire mahãdu-ribi nohõti losarenyõmy. Iwese kai tii-wana atximahã wesele, aõhõkýmy botýýnykre. Aõbinahakýlemy tamy reamyhyre mahãdu-ribi nohõtilosaõmy. Iwese inyõ adeereny aõbinahaký riwinymyhýre weselemy idi mohõtinybenyke. <sup>4</sup> Ibutumy bityhynybenyke ahãwyyemy herina, hãbu tahãwyy-wana sohojile roike. Deuxu dori aõhõkýmy risýnykre òta òtana nodu tule òbitimy raòdõnyõre mahãdu ixi-di ròtemy aõkõ boibeki. <sup>5</sup> Aõnihiký nieru tarasamy ixinohõtidýýrenyõmy. Aõbo akireny rýiredile, beysabenyke. Deuxu dori rarybere: —Tiu kaiboho wanohõti aribi rosaõtyhy. Tiu heka araatyrenyõtyhy. <sup>6</sup> Tai tahe rikityhynymy rakaryberenyke: Inynyrý iny wiòhedýýdurenyre. Tai tahe tiu rukuberurenyõtyhy. Inyõ wadee aõbina riwinyõtyhy.

<sup>7</sup> Aerydýýdureny-ribi nohõti losarenyõmy, tii adeereny Deuxu rybe rotohodýýmyhýreki. Aõbo iruna konana-ò riwinymyhýredi, mohõtinybenyke. Iwese inatyhyna-di rýimyhýre wese kaiboho inatyhyna-di atximahãbenyke. <sup>8</sup> Kanau, wiji, Jesuisi Kristu wiwesele ratxireri. Tiiemy iwesele rarehyykre. <sup>9</sup> Deuxu ruxetõena ixinamy arayky rirurudýýnyke. Roxina bedede ywina wiòhena aõkõ ratxireri. Kia heka moo tiu riwiòhenanyõhyyre. <sup>10</sup> Inyboho ixiwena witxiradirenyre. Iribi tyby hetowo xiwena widýýdu mahãdu riroxiõtyhy. <sup>11</sup> Iròduõ didyde tykyhetoworanora-ki hãlubu ritxiwikemy. Xiwena widýýdu mahãdu wedu tuu ritxiwire òraruna tuedenamy. Uritere iròdu umy hãwã òtity webrò-ribi riwòsinyre. <sup>12</sup> Tai tahe Jesuisi tule hãwãhãký ijò webòrò-ribi aõhõkýmy rotýýnyre, iu tahãlubu ritxiwireu inydeereny tòemy, iny riòbitidýýnykemy. <sup>13</sup> Rokoirenyke tahe tamy hãwã webòrò-ribi rikimyrenykemy iixýrunayreõ. <sup>14</sup> Inatyhymy inydeereny tiemy hãwã kabede-ki ihoõre. Tahe inyboho riraõmyhýrenyre biu-ki ijòdikre. <sup>15</sup> Jesuisi òraru-ki tahe Deuxu rikiwowydnyrenyke. Kia iny xiwena wahidýýreny rare tamy. Tii iny rityhynyrenymyhýre, tai tuu rekeàlãrenyke. <sup>16</sup> Tiu rikiwinyrenyke aõwiwidýý. Tii Deuxudeewire. Tule wii rikiwiòhenanyrenyke.

<sup>17</sup> Aerydỹỹna mahãdu biywinybenyke. Bityhynybenyke. Tiiboho dori aijesedureny ratximyhỹrenyre. Tii idi Deuxu-ò rirawyònymyhỹre. Kaiboho bityhynybenykeki, tii teysamy raaõmysỹdỹỹkre. Aõkõkeki bedewomy ratxikre. Tai arawiòhenanyõtyhy.

<sup>18</sup> Wakireny bexitòenyhyymahãbenyke. Jiarỹboho wodeysanale-di rahõtinyinmahãre, òbitina widỹỹdu-di rahõtinyinmahãreki. <sup>19</sup> Tule Deuxu-ò bexitòenyhyyke jiarỹ ele elemy adeereny aròòserenykemy.

<sup>20</sup> Inynyrỹ Jesuisi Kristu heka Deuxu rubu-ribi riixixadỹỹnyre. Tii iny-di itxeredureny nihikỹ rare. Budoeni-di itxeredu weselemy inydireny retehemyhỹre. Tii tahãlubu ritxiwire iny-wana bede ywina iixihudunakõna riwinykemy. <sup>21</sup> Deuxu adeereny ibutumy riwahinyke tamy wimy kaiboho biwinybenykemy. Kia heka wadeewire. Jesuisi Kristu-ò wowydyna ibutumy rarehyykemy watzimahãre. Kie.

<sup>22</sup> Waseriòreboho, kia watyyriti nihiỹmy aõkõ rewinyre. Tai tahe ywinamy idi boholabenyke rybe wiòhedỹỹna rybe tahe rare. <sup>23</sup> Iny seriòreneny Tximõtxi heka ròtena-ribi riteònyrenyre. Ele elemy kanakeki, rakre wawana arorarenymy. <sup>24</sup> Wawehityyna rybe ibutu dohodỹỹna mahãdu-ò biwahinykre, aerydỹỹdu mahãdu-ò tule. Italia bede ludu mahãdu irybe wehityhyna adeereny diwahinyde.

<sup>25</sup> Deuxu ruxetòena akireny ratxikemy watzimahãre.

## Txiau Txiau Ryberiti

<sup>1</sup> Jiarÿ Txiau rare. Deuxu Jesuisi Kristu Inynyrÿ-wana deòdu rare. Ròritidÿÿreri Deuxu mahãdu inatyhy-ò. Ubÿtÿÿmy iny rÿira mahãdu-ò. Warybe weityhyna adeereny rewahinyreri.

<sup>2</sup> Waityhydÿÿdu aõna aõnasira seriòre, araurihixinanykeki adeereny kanamyhÿkeki, beysamahãbenyke. <sup>3</sup> Kia-di tahe ityhydÿÿdu tyhymy beleke. <sup>4</sup> Aurihixina ixinamy rexiòlònyke atyhykemy. Ixinamy kanake araurihikemy. Tai tahe raòbitidÿÿnykre adee aõ rasiranyòtyhy.

<sup>5</sup> Inyõ bedeery ihoõkeki, rexitòdenykre Deuxu dee, tii dori ibutu dee riwahinymyhyre. Inyõ lau dori ritòenyòhyymyhyre. <sup>6</sup> Urile tii iseòdÿÿõmy bexityhynymy tamy bexitòdenykre. Riseònykeki yhy òbò-di tiò rehumyhyre wese rare. <sup>7-8</sup> Kia hãbu iòreki, awimy aõkõ aõhebo rotÿÿnymyhyre ywiòreki, tii Deuxu-ribi aõ ritaòtyhy, irybe inatxire.

<sup>9</sup> Iny aõ ijòkõmy rÿimyhÿre, teysamy rÿirake, aõ ijòdikreki Kristu dori rityhynyre. Kia iaòdimy ityhymy rÿira, tule teysamy rÿike ityhydÿÿdumy. Rÿiraki aõ ijòðkre hãre. <sup>10</sup> Ityhyna heka iny-ribi wylemy ituemyhyre kie iwese noijese ramorõmyhyre wese. Tahe ityhydÿÿdu mahãdu dee kia aõ aõkõ rare. <sup>11</sup> Txutòteetyhy ròhònymyhyre dori alòbòròna rimoròdÿÿnymyhyre. Tahe noijese rejuxunymyhyre. Tahe iruxerana riixãwidinymyhyre. Kia wesele hãbu ityhymy rÿire rexihumyhyre. Aõhebo rotÿÿnymyhyre wetyatxile.

<sup>12</sup> Urihixina inyõdee kanakeu, tahe ijesu binaõ wesemy ritakeki. Tai tahe tii reysakre. Tii tahe umytuedeõna heka Deuxu-ribi ritakre. Deuxu dori kia wahidÿÿnamy rarybere taluunadu mahãdu dee. <sup>13</sup> Inyõ aõbina bina ixirana-di rexirakeki. Tii rarybeòtyhyke Deuxu riixiranymyhyremy. Inyõ dori Deuxu tiu riurihiòtyhy. Tule Deuxu riixiranyòtyhy aõbina bina widÿÿ-di. Ixiradÿÿdu aõkõ tii rare. <sup>14</sup> Kia wese iny ixiribile rexirake, aõ-di sòwemy ròhòtinykeki, tii arabònyre, araitxenanyre. <sup>15</sup> Kia urari-ribi tahe òraruna ròhònymyhyre. Iribi tahe òraruwidÿÿna-ribi rubu rÿimyhÿre. <sup>16</sup> Ixitxenadÿÿõmy waluuna mahãdu, waseriòre mahãdu. <sup>17</sup> Wahidÿÿna ibutumy bedeerydÿÿnatyhy Deuxu biu-ribi diwahinyde kia ibutumy loosònatyby-ribi naderi. Tiu heka rawitxiraòtyhy, tii aõu aõu iweselere. <sup>18</sup> Tii iny ixityre riwinymyhyre ritÿmyranymyhyre tatyhyna rybe-di. Tai ibutumy iwidÿÿna-ribi inyboho juhuurenyre, awirenyre.

<sup>19-20</sup> Idi mohòtinybenyke waluu waseriòre mahãdu. Ibutumy bexiwinymahãbenyke iny-ò boholamyhÿbenyke, tahe aõwimy aõkõ marybeke lau, wymy adebureõmy. Hãbu debure-ribi Deuxu òbitina rahenyòtyhy. <sup>21</sup> Abinamy aõhebo tutÿÿnymyhyte ixi-ribi bitake idi biatyke. Tahe Deuxu rybe-ò bohola, kia dori iruruna dire atyytyby kanatakemy. <sup>22</sup> Kaiboho bede ywina widÿÿdumy, bede ywina tyhydÿÿdumy boibeke. Aõ ijohonadu mahãdulemy aõkõ boibeke. Kia wesekeki bexiitxenanyke. <sup>23-24</sup> Inyõ ijohonadule ronykeki, rybemynamy nodu aõkõ rare. Tii hãbu itxerena-di itxerenadu wese rare. Itxerena-di ixidee retehereu, rexieryre iwese raremy. Tahe rexitareu, aõwesele ixi-ribi tòhòti rosare timybo tii rare wahe. <sup>25</sup> Inyõ tahe bede ywina òbiti-ò retehemyhÿreki, rityhynymyhyreki tii tahe teysamy ratxikremy ibutumy aõhebo rotÿÿnykremy. Tii dori ijohonamy nohòti losadu aõkõ rare. Bede ywina rybe widÿÿdu rare, ityhydÿÿna wahe. <sup>26</sup> Inyõ bede ywina rybe widÿÿduõmy ròhòtinykeki, tahe tòròtò riyrubunyòhyymyhykeki, tabedeywidÿÿna aõ aõkõ rare. Tii tawokile rexiitxenanyhyre. <sup>27</sup> Iny Deuxu, Inytyby-ò kia bede

ywina widyŷna òbiti rare. Uladuwyte, wytese-wana riwiòhenanykemy. Tule aòbina bina aòmwydŷnana widyŷomy.

## 2

<sup>1</sup> Waseriòre mahādu, kaiboho Inynyrŷ Jesuisi Kristu, tetyhynytenyte loosòna wedu tii rare. Tai iny wiribi lahitxiòmy, wiweseweselemy iny-di atximahābenyke. <sup>2</sup> Kie inyō tahe dohodŷŷnawo-ò kanalòkeki, womati debo tŷrŷrŷ-di tywihikŷ-di kanalòkeki, tahe tule iny aòkòdu mahāduò kanalòkeki. <sup>3</sup> Kai tywihikŷ dinodu-ò marybekeki: Kaò bodonyke ry-nawihikŷ-ò. Tahe marybekeki iaòkò-ò: Kiakile myike lamalemy ada bedetxi aòbo bonyke. <sup>4</sup> Kia wese wiribi hitxidŷŷ-ki tatŷŷnymyhŷtenyte, araykyreny rabinamy kia wese tumahāre. <sup>5</sup> Boholake, waseriòreboho, kaiboho juhūu iny aòkò mahādu wese toite. Iribi ityhy ityhydŷŷdukòdu mahādu iaòrarumy roirekemy, kaiboho Deuxu weselemy tadeletenyte atyhyna òraru-ki. Aratamyhŷrenyre inatyhyna-di ityhydumy boibekemy, tule kaiboho kowa biu-ò hena bitabenykre. Deuxu dori rarybere: —Waluudu mahādu tuu arisŷnykre. <sup>6</sup> Kiawese, kaiboho urimynodu derarenyre aòhebo tatŷŷnyteri. Ityhy mahādu tahe ararutŷkŷnymyhŷre tule aradyrenymyhŷre soldadu dohodŷŷna heto-ò. <sup>7</sup> Tiiboho tule Kristunimy aòbinamy rarybemyhŷrenyre. Kaiboho ini-di texininimyhŷtenyte. <sup>8</sup> Kia bede ywina rybe-ki roire: iwese ixiluure wese, aerykòdu mahādu luuke, wiery mahādu wahe, abireludu wahe. Kia bede ywina biywinykeki, awimy botŷŷnymy mabeke. <sup>9</sup> Tahe iny wiribi lahitxinykeki, taòraruntyteri, teywinyòteri. Bede ywina aòkò atximahāte. <sup>10</sup> Inyō tahe bede ywina rybe ibutumy riywinykeki, tahe sohoji aòmwydŷŷna riywinyòreki, tai tahe bede ywina rybe ywidŷŷdu aòkò ratxireri. <sup>11</sup> Deuxu tarybe ririre. Kia rarybera: —Òta òta widyŷomy. Tule rarybera: —Rubudŷŷomy. Tai òta òta biwinyòkeki tahe inyō terubunytteki, kai bede ywina rybe yrubudŷŷdu aòkò atxiteri. Òrarudumy tate. <sup>12</sup> Iwese iny bede ywina rybe-di tŷmyra ahābenyke. Deuxu dori bede ywina-di arararutxŷnyrenykre. Taita òbitimy botŷŷnybenyke, marybebennyke. <sup>13</sup> Inyō riwotòenyòmyhŷkeki, tule tamy riwotòenyòleke tawiribihitxinatxu-u. Wotòedŷŷna wiribihitxina ratyre rare.

<sup>14</sup> Waseriòre mahādu, inyō rarybekeki: —Jiarŷ watyhyna ijòdire. Tahe iaòmwydŷŷna wihikŷ-di aòkò rare. Kia tahe aò aòkòhyky heka rare tamy. Ityhynale kahābu ritakekò aòbo. Tahe reruinyreri. <sup>15-16</sup> Inyseriòreò tyy, rŷsŷna ihoòke-wana. Tahe inyō tamy rarybekeki, ywina-di bòhònyke, aheto-ki biroxikemy. Tahe aò riwahinyòra tyy, rŷsŷna-wana. Aòbohe irybe rare. Aòkòhykyre irybe. <sup>17</sup> Kiawese taheka kia hābu inatyhyna rare, iaòywidŷŷna ihoòkeki kia ityhyna ihoòke wese rare. <sup>18</sup> Inyō rarybeke-wana: —Kai atyhyna dire. Jiarŷ waòwidŷŷna ijòdire. Biteòsinyke wadee atyhyna sohojile tamyreny wina-di aòkò. Tahe jiarŷ tamyreny waywina-di adee ariteòsinykre kia òraru-ki bobike jiarŷ Kristumy retyhynyrimy. Watyhyna iny idiòre waòwidŷŷna ijòòre-wana. <sup>19</sup> Kai bityhynyke Deuxu sohojile raremy. Kia tahe awire urile diabo tyytybybina tule Deuxu rityhynyre. Tai ilau ruberumyhŷre. <sup>20</sup> Inatyhyna iaòmwydŷŷnana ihoòkeki, aò aòkò wese rare. Kia tetyhynyòlemahāte aòbo, hābu itxŷtere. <sup>21</sup> Inylabiereny Abraò tariòre-di Ijai rixiwenykemy idi ratximyhŷu, kia-ki Deuxu riòbitinyre. <sup>22</sup> Tabimahāte aòbo. Abraò tatyhyna iwidŷŷna-wana aòna aòna riwinyre. Ityhyna riwiòhenanyre. <sup>23</sup> Tahe iwese ritidŷŷnamy roire wesemy tuu rotŷŷnyre aòmwybo heka rarybera Abraòmwy: —Boholake, Abraò heka Deuxu rityhynyre. Tai Deuxu tii riòbitidŷŷnanyre. Tule, Deuxu tabiòwamy rininire. <sup>24</sup> Betehebeny

ini. Inyõ ìòbitidỹỹmy ronyke-wana inatyhyna sohojidile aõkõ tii ihỹke, tahe iwidỹỹna-di tule wahe. <sup>25</sup> Ijõre tahe: Raabe, aderanamy raremyhỹ. Iribi tii Deuxu rybedeòdu mahãdu riyrubunyra rubu lau, tahe riteònyre rywasi wixira-di. Kia widỹỹna Deuxu Raabe riòbitidỹỹnyre. <sup>26</sup> Iwese umy tyytyby-di aõkõ rubumy rỹimyhỹre wese, tule inatyhyna sohojile aõ aõkõ rare tamywina-di aõkõreki heka rubu wese rare.

### 3

<sup>1</sup> Uritere, waseriòreboho, bedeerydỹỹdu mahãdumy aõkõ ixidi norenykõmyke. Ibede õnana hitxina txuu dorihe aõnihikỹkre bede erydỹỹdu mahãdu dee. <sup>2</sup> Inyboho ibutumy sõwemy òraruna-txi aõu aõu resemyhỹreny. Inyõ tarybe-ki raòrarunyõkeki, tii iny òbiti rare. <sup>3</sup> Iwese awaru iny riraòmyhỹre wese taumy ibutumy riraòmyhỹre. Awaruru-ki juraròsõna rirutymyhỹreu, tii iraròsõna-di rare. Tai tahe awaru iny riywinymyhỹre iumy ibutumy iny riraòmyhỹre. <sup>4</sup> Betehebenyke iny heòty lawò nihikỹ-ò iraròsõna iyjatyhyre tahe iraròsòdỹỹdu idile riraòmyhỹre titxibo inonana-ò yhy nihikỹ iwetxi kedeakreki, ihãrele iraròsõna riraòmyhỹre. <sup>5-6</sup> Iwesele iny dòròtò rare. Iyjatyhyre ihãrele aõnihikỹmy rarybemyhỹre. Betehebenyke iny heòty helỹỹresi iyjare, ihãrele òtiranihikỹ ritoonymyhỹre. Dòròtò tahe heòty wese rare. Sõwemy heka òraru riwinymyhỹre. Dòròtò bede aõmydỹỹnanabina dinodu wese rare, inyumy susudỹỹdu dòròtò rare. Sõna bede tòtee-ribi diabo mahãdu-ribi heka nade. <sup>7</sup> Ibutumy iròdu brebuna, nawii wixira wixira, iròdu beraludu, utura, riinytyhydỹỹnymyhỹre. Iny mahãdu iratyre irurudỹỹna dire. <sup>8</sup> Inydòròtò inyõ tahe riinytyhydỹỹnyòtyhy. Ibinatyhy rare. Rubudỹỹna uri-di ratxireri. <sup>9</sup> Inydòròtò-di Deuxu inytybymy iny reàlãmehỹre tule idi inymy raujòmomyhỹre. Deuxu ixiwesemy iny riwinyre, ihãrele iny wimy raujòmomyhỹre. <sup>10</sup> Inyõ tary-di Deuxu rirowòwdynmahãre tule idi ujòmomy reamyhỹre. Waseriòreboho, kiamy aõkõ idi boibeke. <sup>11</sup> Beijirana-ribi ibree ihỹre-wana wiule heka ròhònyòtyhy. <sup>12</sup> Òwòru inatxi wiribi lahixire. Ijõ aõbo wiraty-di raratynyke aõkõre? (Figueira azetonamy raratynyòtyhy) Videira figomy raratynyòtyhy. Juwyrabe hãloo-ribi bebreke ròhònyòtyhy.

<sup>13</sup> Inyõ bederykeki ibedeerynadikeki, tii ywimy ratximyhỹke. Ibutumy òbitimy ratxirerimy aõ riwinymyhỹremy rexityhynymy ixidi ròhòtinyòtyhy tyhymy rabekemy. <sup>14</sup> Kaiboho awo-ki ixiburena ijòdikeki, inywixira hãrosu ijòdikeki tai tii deysamy atxiòke tai tuu marybeòke. Kai ruiwidỹỹõmy. <sup>15</sup> Kia bederyna biu-ribi aõkõ nade, bederibile, iny hãrosu diaboribile nade. <sup>16</sup> Inywixira hãrosu ijòdike-wana, tai jei jeina rare. Ibutumy aõbina bina. <sup>17</sup> Bedeerydỹỹna biu ludu juhule òbiti rare, idi ywina rare, rutaõna rare, wityhyna rare, ruxetòena rare. Awihyymy nodu widỹỹna rare. <sup>18</sup> Òbitina aõu aõu kanakre ywinawidỹỹdu-ò. Iwese aloborodu rehumyhỹre wese, tiiboho ywinamy rekoamyhỹreny.

### 4

<sup>1</sup> Aõherekibo ayreny-ki jei jei rỹimyhỹre. Awo-ribi namyhỹde araykywydyna ribi. <sup>2</sup> Kai sõwemy aõdikemy tahòtinmahãte aõhebo aõkõ tetate. Tahe terubunymahãte. Inywixira aõmydỹỹna-di òbire, tahe aõkõre. Tai aõbina tetelenymyhỹte ijei jei-di. Aõ ijõre textiòenyõma hãteki. <sup>3</sup> Textiòenyteki, tetaõmahãtenyete. Teòsamy dori textiòenymahãtenyete. Ixidee sohoji dehnalemy tahòtinamahãtenyete aumydeewimy behukelemy. <sup>4</sup> Bede aõmydỹỹnana luudu mahãdu heka Deuxu òludumy ihỹre. Kia aõbo teeryòtenyete, òbitiõna, mahãdu. Inyõ bede aõmydỹỹnana bina biòwamy ratxikeki, Deuxu òludumy



rare. <sup>5</sup> Aõ aõkõ aõbohe rybe riti kawese roire: Aõhe rare. Deuxu taTytybytyhy inywo-ki heka Deuxu risÿdÿÿnymyhÿre. Tai tahe iny-di riijetyhymy ratximyhÿre. Aõbo heka kia rare? <sup>6</sup> Tii tahe iny rirurutedÿÿnymyhÿre. Kawesemy ritina rarybere: —Ixiwedu mahãdu heka Deuxu ixi-ribi riredhÿÿnymyhÿre. Tahe ruxetõena sõwemy ixiwedekõ mahãdu-ò riwahnymyhÿre. <sup>7</sup> Deuxudeewi biwinymahãke. Diabo ixi-ribi birehedÿÿnykeki, tahe tii aribi rahenyke. <sup>8</sup> Deuxu-ò bexiõhòdÿÿnykeki. Deuxu adee rexiõhòdÿÿnkre. Òrarudu mahãdu, ebõmy bexilyraranyke aòraru-ribi bexitake, rybe inatxi mahãdu, araykyworeny biõbitinybenyke. <sup>9</sup> Mabedewoke, bobuke, mahinyke aòraruna òraru-ki. Ajuedena-ribi arube rytynkre, eysa-ribi mabedewomy atxikemy. <sup>10</sup> Ayrubumy Inynyrÿko-txi boibekeki, tii aratamadÿÿnykre; tii ixideewimy riwinykemy.

<sup>11</sup> Waseriõreboho, uritere aõmy wimy ryberenyõmy. Inyõ taityhy-dÿÿduseriõremy tuu ibinamy rarybekeki, iaõna aõna riaõkõkeki tii bede ywina ibinamy rarybereri. Bede ywina rybe riaõkõdÿÿnyreri. Inyõ bede ywina rybe riaõkõnykeki, tii bede ywina ywidÿÿdu aõkõ rare. Tii bede ywina rybe hitxidÿÿdu rare. <sup>12</sup> Deuxu sohojile dori bede ywina hitxidÿÿdure. Bede ywina dohodÿÿna dinodu tii rare. Tii itarasadÿÿdu rare ihãre irubudÿÿdule rare. Mobohe kai atxiteri; abireludu hitxidÿÿmy aõbo texinohòtidÿÿnyteri? Aõkõre.

<sup>13</sup> Boholabenyke, tuu tarybetenyteri: wijile aõbo ada biurasõmy aõbo rokoirenykre hãwãõ-ò. Tai bededÿÿnana sohojimy rikierenykre. Tai nieru tarasamy rakaõmysÿdÿÿrenykre. <sup>14</sup> Txiohe rare. Kaiboho dori teeryõlemahãtenyete aõhebo bede rotÿÿnykre. Timybo mabekre? Iwese biuwetty yja aõwesele rexihymyhÿre wese heka timybo mabekre? Kiawesemy aõkõ marybeke. <sup>15</sup> Kamy heka marybeke: —Inynyrÿdeewikeki iny rummy rokoireke, tai tahe kia ada kowa aõbo rikiwinyrenyke. <sup>16</sup> Iwese wiji ratximyhÿre wese. Biurasou aõnihikÿ widÿÿmy marybekeki, kia tahe awi aõkõ rare. <sup>17</sup> Inyõ aõwiwidÿÿ rierykeki, tahe riwinyõmyhÿ-wana kia rexiõrarunanymyhÿre.

## 5

<sup>1</sup> Boholabenyke warybe-ò ityhy mahãdu. Mahinybenyke, bobubenyke aõhõkÿmy botÿÿnybenykreki. <sup>2</sup> Aõmydÿÿnana wiwihikÿ rabinamy rÿire. Attywityhy isibrey tysini rirõre. <sup>3</sup> Aorotÿÿrÿreny awomatiurarenny raruxinyra tabededÿÿnana riõnonyrerimy. Anieru susudÿÿna awobiredÿÿnamy kid-itÿÿnykre. Iwese dee heòty risõmyhÿre wese, kia sudÿÿ anasõmyhÿkre. Aõna aõna sõwemy ixidee tebutunymahãte kia atxukonana-ò. <sup>4</sup> Abaderòwysydÿÿdu òwydÿÿdu aõkõ dori kai tate. Kai ixideele tebutunymahãte iribireny tawasinyamahãte. Tiiboho rahinymy rirajuamyhÿreny tahe kia wysydÿÿdu mahãdu hina-ò Deuxu roholare. Tii ruru mahãdu wedu rare. <sup>5</sup> Kaiboho abeõrarenny teõnonytenyteri isikile. Ixideehyyle texideysadÿÿnymyhÿte. Ibutumy aõbo adeereny wiwi ixidee temytenyete, iwese rubutxudÿÿnatxu broreni riõwenymyhÿre wese. Kai ahãte. Deuxu akanarubunykre. <sup>6</sup> Òbiti mahãdu teteõnymahãte terubunymahãte. Tii tiu adee rexiõwynyõtyhy.

<sup>7</sup> Ixieleledÿÿõmy tahe waseriõreboho. Inynyrÿ kanakreu. Betehe in-ihẽ. Òworudu heka taaõwi riraõmyhÿre biu bedeu. <sup>8</sup> Kia wese kaiboho tule elelemy aõkõ biraõmyhÿke aworeny-ki beximymyhÿbenyke, Inynyrÿ nonana dori iõhõrehe. <sup>9</sup> Waseriõreboho uritere wimy ibinamy ryberenyõmy Deuxu dori arahitxinyreny. Ihitxidÿÿdu nonana tahe iõhõre ijõkiwesele riijemy rÿimyhÿre. <sup>10-11</sup> Waseriõreboho ihetxiu Deuxu rybemy rybedu mahãdu iyrubumy rÿiramyhÿ. Iwese tiiboho rÿiramyhÿwese boibeke aõhõkÿmy dÿÿnana-ki rare. Kia aõhõ kÿmydÿÿnana-ki õbitimy rotÿÿnymyhÿre. Iwese

Jòò iyrubumy raremyhÿre taholamahãtenyete. Tule iwese ionanau Deuxu riwiòhenanyre wesemy teerytenyete. Inynyrÿ dori ruxetòenatyhy-di rare làhànatyhy-di.

<sup>12</sup> Ibutu ratyre waseriòreboho inatyhymy sohojilemy marybeke ijõ rybemy rybeõmyke Deuxu arybe ritxiõnyõtyhy. Aõna aõnamydÿÿnanaribike aõkõ ix-imyhyyle marybeke. Kohemy marybekeu kohelemy marybeke. Aõkõmy marybekeu, aõkõlemy marybeke. Kawese-ki inyõ aratxiõnyõkre.

<sup>13</sup> Inyõ aõbo ayreny-ki aõhõkÿmy rotÿÿnyreri. Tahe tai bexitòenykre. Inyõ aõbo ayreny-ki teysamy ratxireri. Àlànawi-di tii wana mawiunykre.

<sup>14</sup> Inyõ aõbo ayreny-ki webinadumy roireri wana. Tahe dohodÿÿna rybedu mahãdu-ò tamy bididybedenyke tamy rexitòenyrenykemy. Adÿÿ ityre ritxi-wikemy Inynyrÿni òraru-ki. <sup>15</sup> Ixitòedÿÿna tyhynale webinadu riteytenykre. Inynyrÿle ritamahÿÿnykre. Tii òraru-ò raòrarunymyhyke-wana Deuxu iòraru riixãwidinyke. <sup>16</sup> Iny wiò wiòmy aõna aõnarenymy belyybenyke. Wiò wiòmy wii biixitòedÿÿnybenyke, ibutu-ribi beytebenykemy. Inyòbiti ixitòedÿÿna iru-rudire, aõna aõna sõwemy riwinymyhyke. <sup>17</sup> Eliasi heka inywesereny rare. Tii rexitòenyhyymyhyre biu ràaõtyhykremy bede-ò. Tahe inataõ beòra-di biu ràaõhyre. <sup>18</sup> Tahe ixityre rexitòenyre. Tai biu ròare. Tahe oworu-ki ixityre aõwi ruhunyre.

<sup>19-20</sup> Waseriòreboho, inyõ ay-ki inatyhyna-ribi ròhònykeki. Inywitxira tuu rarybekeki, teòsary-ribi ridykeki, tahe ityytyby ritara, rubu konana ixãwina lau sõwemy araru-di riixãwidinyre. Kie.

## 1 Pedro 1 Pedro Tyyriti

<sup>1</sup> Jiarỹ, Pedro warybe ritina rewahinyreri ubýtỹ deòdỹna jiarỹ rare. Ibutumy judeu mahãdu-ò rewahinyreri Ponto-ò, Alaxia-ò, Apadosia-ò, Asia-ò, Bitinia-ò. <sup>2</sup> Kaiboho heka iitxe itxemy toite Deuxu Inytybyreny-ò, Deuxu Tyytybytyhy araòbitinyrenyra, Jesuisi Kristu bityhynybenykemy tule tahãlubu-di arasebenyrenykemy. Wiòhedỹna sòwemy ywina-wana adeereny kanakemy watzireri.

<sup>3</sup> Ibutumy àlàna Deuxu Inynyrỹ tyby-ò rikiwahinyrenyke. Tii dori sòwemy ruxetòena inydeereny diwahinyde. Tai inyboho ixityre reamyhỹrenyke ratybienyrenykemy Deuxu sỹ mahãdu wo-ki. Inyboho wijile iraròsònareny dire, Kristu rubu-ribi rexixareki. <sup>4</sup> Tii wiòhedỹna wiwihikỹ inydeereny ririre. Biu bedekile riyrubunymy roire. Tiu rasunyòtyhy, retybyòtyhy, iruxerahakỹlemy lyrahakỹlemy roire. <sup>5</sup> Deuxu tarurusòwe-di arayrubunyrenyke kia wiòhedỹna bitabenykemy tetyhynyteki. Tarasana heka kia rare. Ikonanatu Deuxu bedexiteòsinykre. <sup>6</sup> Tai tahe beysabenyke. Bededỹnana tòbò reakreu, mabedewobenykre òsana aòmydỹnana sira òraru-ki. <sup>7</sup> Tii tahe kawese-ki atyhydỹnareny ityhymy ròhònykre. Atyhydỹnareny womati tỹrỹrỹhỹkỹ òwy ratyre iòwy dire. Tiu rabinaòtyhy. Heòtyru-ribi womati tỹrỹrỹhỹkỹ ròhònyre wese atyhynareny kòdòhònykre àlàna, wowodyna, luuna Jesuisi Kristu-ò, tii kedehemynykre. <sup>8</sup> Kaiboho tuu tabitenyòte ihãrele tuure. Tetyhynytenyteri, tai tahe tỹxihikỹlemy deysatyhy-di ahãtenyete. <sup>9</sup> Tai atarasadỹna-di teteheteri, tetyhynytenyteki. <sup>10</sup> Juhuu Deuxu rybedu mahãdu ritỹraxinyra kia tarasanamy. Tule wiòhenadỹmy rarybere adeereny kanakemy. <sup>11-12</sup> Idi tahe dierydenyde ibededỹnanau kanaòkre urile ihewo-ribi kanakemy. Katahe adeereny reare Deuxu Tyytybytyhy nade òraru-ki. Ýju mahãdu dori tamywimy tuu rieryrenykemy ihỹrenyke. Jesuisi Kristu aòhòkỹmy dỹnanamy tule toosònadỹnamy rarybemyhỹrenyke, tiubedemybo kia kanakemy riijemyhỹrenyke.

<sup>13</sup> Arayky-ki birarutxynybenyke wereysana rara rotỹnynyhỹre wese. Òbitimy maraykynybenyke wiòhedỹna-di bidimybedenykre-ki Kristu kedehemynykre. <sup>14</sup> Wijile kaiboho ywimy nodu riòre wesemy boibeke. Iwese juhu aykaraòtamy tatỹnyny tatemahã wese noòmy, abedeerykòmy tatemahãu. <sup>15</sup> Iweseòmy. Uritere adee rybedu òbitimy raremyhỹwesemy kaiboho ibutumy tuu botỹnybenyke kia-ki òbitimy boibeke. <sup>16</sup> Raritinymy dori rỹre: —Òbitityhymy boibeke, jiarỹ dori òbitityhymy raremahã. <sup>17</sup> Deuxu iny wiribi rihitxihitxinyre aòbina bina widỹ òraru-ki. Deuxu iwese wesele iny luure tuu rarawetyynyòhymy hỹre. Iwese bodee textitòenymahãte wese tamy bedeerykò rira wese boibeke. <sup>18-19</sup> Kia teerymahãtenyete tuu ararybekre. Ixinamy rexihumy hỹredi aòkò iwese womati tỹrỹrỹhỹkỹ iurahakỹ-di aòkò atarasanareny riòwinyre. Tahe Kristu hãlubu-di aòhebo ibina botỹnybenyke-ribi textitatenyete aòwidỹnabo booreny-ribi teerytenyete. Kristu tahe budoeni òbiti lyrahakỹ wesemy rare. <sup>20</sup> Tii juhu bededỹnanau taumy rubu-ò riwahinykemy rexieryhymy raremyhỹ, wijile kaò nade rurukemy aluunareny òraru-ki. <sup>21</sup> Tule Deuxu tetyhynymahãtenyete Kristu òraru-ki, Deuxu rubu-ribi riixixadỹnyre tahe tamy loosòna riwahinyre, tai araròsònareny aityhydỹna Deuxu-ki roimyhỹre.

<sup>22</sup> Kaiboho atyytyby tesurònanytenyete inatyhyna dori teywinytenyeta. Tai tahe wiluuluutyhymy rakatxirenyke. Wiluummy wesenedȳrenyõmy atximahãtenyete. <sup>23</sup> Wiji umyd̄ȳna juhu wese aõkõ iny bõtòd̄ȳna raumyd̄ȳre wiji tahe Deuxu Rybe aumyd̄ȳnamy ih̄ȳre. Kia tahe ituerenyõtyhy. Umytuedeõna diwahinyde. <sup>24</sup> Iwese ryberiti rarybere wese:

—Ibutu iny asi wese rare. Inyloosõna asi noijesa wese rare. Asi ramoenymyh̄ȳreu tõijsa rejuxunymyh̄ȳre.

<sup>25</sup> Deuxu Rybe tahe aõu aõuhyy r̄yira. Rexihuõtyhy r̄yira. Kia rybemy tahe adeereny rarybemyh̄ȳre, Rybewihik̄y wahe.

## 2

<sup>1</sup> Ibutumy idi behuke ixi-ribi, aõbinatyhyna-di, rui-di, inywitxira aõmyd̄ȳna xibure-di aõ ikõkõmy ujõmo-di ibutumy. <sup>2</sup> Tahe iwese tohouã how̄sy luure wese rybe-ò bexiborenanyke. Atyytyby how̄syna wese rare. Idi maumynykemy tarasana inatyhy-ò. <sup>3</sup> Wanyr̄y dori wihik̄y rare. Kia teerytenyete. <sup>4</sup> Tamy bodoibedenyke. Tii dori manairuhyk̄y wese rare. Heto tira wid̄ȳdu kia mana-di rehura. Tahe Deuxu dee kia ixitarasanamy rare. Awimy heka tai rahare. <sup>5</sup> Kaiboho tule mana iruhuk̄y wesemy tõimahãte heto òbiti wesemy aijõreny-di kanaijed̄ȳnydenykemy. Xiwena wedu mahãdu òbitimy boibeke, Deuxu dee wina xiwed̄ȳna òbiti biwinybenykemy Jesuisi Kristu wowydynamy. <sup>6</sup> Kawese dori Ryberitina-ki r̄yire: —Betehebeny inihe Siaõ bede-ki iny mana heto tiramy iwid̄ȳ wesemy ritidire. Tii aõwihik̄ytyhy wadee rare. Kia iny rityhynymyh̄ȳkeki, tiu raix̄yruõtyhy bede òtiid̄ȳ ribedewonyõtyhy. <sup>7</sup> Kaiboho ityhyd̄ȳdu mahãdu, adeereny tii aõwihik̄y rare. Ityhyd̄ȳdukõdu mahãdu dee tahe kawese tii rare: —Hetotirawid̄ȳdu kia mana-di rehura. Kia mana tahe wiji juhuludu mana ritidimy roire. <sup>8</sup> Tule ijõ kiamy rare: —Mana idireny kedese denykre. Kia mana awi aõkõ tamyreny rare. Reserenykre rybe ritxiõnymyh̄ȳrenyeki Deuxu heka rierymyh̄ȳre reserenykre. <sup>9</sup> Kaiboho tahe iny iitxese itxesemy aratareny, xiwena wedu mahãdu òbiti boibe benykemy, inyijoi òbiti boibeke, Deuxu hõrõ mahãdule, iruxeranamy marybe benykemy adee dori bededorohok̄y-ribi anadydenyde taloosõna wiwihik̄y-ò. <sup>10</sup> Kaiboho juhoo inyijoi aõkõ toitemahã tahe wiji Deuxu taijoimy aratara. Juhoo ruxetõena tuu inyõ riwahinyõhyre adeereny, wiji tahe tii riwahinyra adeereny.

<sup>11</sup> Waluuna mahãdu adeereny ararybekre. Kaiboho iwitxira bedeludu mahãdu wese atximahãtenyete. Uritere òtaõtarenyõmy atyytyby òludu dori kia rare. Atyytyby aõbina d̄ȳnana adeereny diwahinyde. <sup>12</sup> Ahotiludu mahãduy-ki òbitimy boibeke. Tai omy ibinamy rarybekeki, tiiboho aumytuedeõnamy robimyh̄ȳkemy tahe Deuxumy kiditoosòd̄ȳnadenykre Deuxu hitxid̄ȳna txuu.

<sup>13-14</sup> Bede dinodu bede ywina rybe biywiny mahãbenyke Wanyr̄y òraru-ki Iòlòrybe, aõbo kai deòdu rybewydydu aõbo ibutumy birarennybenyke. Iòlò deòdu mynyduhyk̄y doidenyde aõbinahak̄y wid̄ȳdu aõhõk̄y my ris̄ynymy rimymy ris̄ȳd̄ȳnykemy ritamad̄ȳnykemy tule aõwihik̄y wid̄ȳdu ritealad̄ȳnykemy. <sup>15</sup> Aõwi wihik̄y wid̄ȳna-di kaiboho hãbu bina biyryd̄ȳnybenyke. Kia Deuxudeewi rare. <sup>16</sup> Kaiboho hãbu ixihyyludumy ahãtenyete urile aõbina bina wid̄ȳõmy boibeke. Deuxu deòduweselemy boibeke. <sup>17</sup> Iny ibutumy iõsana biwinyke. Ityhyd̄ȳdu seriõre lumy boibeke. Deuxu biwowydynybenyke. Iòlò bede dinodu biwowydynybenyke.

<sup>18</sup> Deòdu mahãdu, awedu bityhynybenyke awedu wiwihik̄yle-ò sohojile aõkõ ibina bina-wana dori bityhybenyke uritere bedeòtiid̄ȳmy r̄yiõmy.

<sup>19</sup> Aõbina riwinyõhyymyhÿre deòdu tawedu-ò. Tahe wedu teòdu-ò aõhõkÿmy risÿnyre. Deòdu riòludunymyhÿre aõmy rarybeõhyymyhÿre, Deuxu rityhynymyhÿreki. Kia wese tahe Deuxudeewina rare. <sup>20</sup> Iny raòrarunymyhÿkeki, tai tahe òhòtenamy inyboho ratximyhÿrenykeki, aõloosòna widÿÿna bohe kia rare. Inyboho riòludunymyhÿreki. Aõwiihikÿ widÿÿna-di inyboho ywina-di òhòtenamy riòludunymyhÿrenykeki, kia Deuxudeewina rare. <sup>21</sup> Kaiboho biòludunymyhÿbenykemy tai iitxemy aratarenyra. Kristu tule dori òrarureny-ki aõhõkÿmy rotÿÿnyre. Iwese tinybo tii riwinyre wese kaiboho biwinybenyke. <sup>22</sup> Kristu dori tiu raòrarunyõtyhy, tule aõbinahakÿmy rarybeõtyhy, raruiõtyhy. <sup>23</sup> Tamy adebure iràmy rryreuwobinamy aõkõ dirawyònyde. Rihetenyre, aõma aõkõ dirawyònyde. Urile tii rexiwahinyre Deuxu dee. Deuxu dori òbitina-di rihitxidÿÿnyre. <sup>24</sup> Inyòrarureny dori riwyre itxeò nihikÿ tyre-ki. Tai tahe òraruna dee rakarurunyrenykre, tahe òbiti widÿÿna-ò rakatximyhÿrenykre. Kristu wotòmomy iny riteytenymyhÿre. <sup>25</sup> Iwese budoeni reòsamyhÿre wese kaiboho toite. Wijile tahe kaiboho tòðemy atxitenyte aitxeredu-ò atytyby wiòhedÿÿdu-ò.

### 3

<sup>1-2</sup> Hãwyyreny, ahãbureny rybe bityhynybenyke. Tai inyõ ihãbu ityhydÿÿdu aõkõkeki, tii kidityhynykre tahãwyyhe-ki, aõrybebo aõkõ roholareki ihe-ki robireki. <sup>3-4</sup> Hãwyy ruxerana heka ixidee itidisirenyõmy atximahãbenyke aõ taumy-ki ritidimyhÿre aõkõ hãwyy ruxerana rare. Aõ iwo-ribi teysare, Deuxu Tyytybytyhy widÿÿna inytyhyna tii tahe hãwyy ruxerana rare. Rade sihodÿÿtyhy ibutu ratyre aõkõ rare. Womati tÿrÿrÿ noho tule aõkõre, tyy wiwiihikÿ-di rariamyhÿre tule aõkõre. Kia tahe Deuxu dee aõwiihikÿtyhy aõkõ rare. <sup>5</sup> Tule ihetxiu hãwyy òbiti tuu rotÿÿnyre, tahãbu riywinyre, Deuxu rityhynyre. <sup>6</sup> Sara, Abraõ riòrese, tahãbu riywinyre. Itxi õhõtireny beake tawedumy tamy rarybere. Kiaboho hãwyyreny iriòre riòre atximahãtenyte. Tai aõwiihikÿ widÿÿnamy botÿÿnybenyke. Bededÿÿnana jei jei lau brebuõmy.

<sup>7</sup> Hãbu mahãdu, kaiboho tule asÿreny-ki abedeeryna biyrubunybenyke. Ahãwyyreny biywinybenyke hõraõmy idi ahãbenyke, tiiboho dori itxõmotxirenyre iruruõreny. Iòsÿny bityhynybenyke. Wiwana Deuxu ruxetòena tarasadÿÿdu atximahãtenyte. Tai aixitòedÿÿnamy òbitimy bexitòenybenyke.

<sup>8</sup> Tahe kaiboho ibutumy widi mohõtinybenyke wiwesewesele. Ityhydÿÿdu seriòre dee tòena luuna-wana biwahinyke. Ruxetòena-di boibeke iny-ò ityhydÿÿ aõkõ. <sup>9</sup> Inyõ aõbinamy adee rakeki, ixìòwydÿÿõmy. Inyõ rybe-ki aõbinamy adee rakeki, irawyòdÿÿõmy. Wityhymy tamy marybeke. Kia-ò tahe Deuxu aõwiihikÿ adee riwahinykre, tai ijõtXu Deuxu wityhynamy adee riwahinykre. <sup>10</sup> Tai inyõ tabededÿÿnanaluumy ratxike-wana, tatxuu teysamy ratxikeki, tahe dòròtò rexitaake rybe bina lau iry riyryke wobina rybe lau. <sup>11</sup> Aõbina bina-ribi bihenybenyke aõwiihikÿlemy botÿÿnymahãbenyke. Ywina biijemahãbenyke ywina-di ahãbenyke. <sup>12</sup> Deuxurue tahe òbiti mahãdu-di rethemyhÿre. Tanohòti tahe ixitòena-ò riijohonanymy rononymhÿre. Aõbina widÿÿnadu-ò tamyreny rayaranymy idi rethemyhÿre.

<sup>13</sup> Kai aõwiihikÿ widÿÿlemy tiu matxibekeki aõhe iny adee rotÿÿnyõtyhy. <sup>14</sup> Kai òbitiwidÿÿ òraru-ki aõhebo bõtÿÿnykeki, deysamy atximahãke. Breburenyõmy iwese ilaureny ixìòhãrudÿÿrenyõmy. <sup>15</sup> Urile Kristu awedurenywesemy bisÿnybenyke aworeny-ribi. Inyõ adeeremy aratÿÿraxinyke-wana aõherekibo Kristu tetyhynymyhÿtemy, kai bexiywinyhy tamy ixidee rybena bydÿÿna biywinyhyymy idi ahãke. Arawyòdÿÿna ywina-di tamy marybeke

iòsŷny bityhynomy arayky òbiti-di marybemahãke. <sup>16</sup> Tai tahe biixŷrudŷŷnyke umy ibinamy rarybekeki, tai dori òbitilemy Kristuko-txi tariamahãte. <sup>17</sup> Tahe Deuxu dee wikeki, aõwiihikŷwidŷŷ òraru-ki inyõ aõhõkŷmy rotŷŷnykeki, kia tahe Deuxu dee awi rare. Aõbinahakŷwidŷŷ òraru-ki aõhõkŷmy rotŷŷnykeki, kia tahe Deuxu dee awi rare. <sup>18</sup> Kristu tahe sohojihyyle rurure iny òraruna òraru-ki. Òbitiwidŷŷdu tahe rurure òbitiwidŷŷdu aõkõ òraru-ki, kai-boho ruruweselemy atximahãtenyete. Deuxu Tyytybytyhy direki kaiboho iruweselemy atximahãtenyete. <sup>19</sup> Kristu Tyytyby rara rotenawo-ò, tyytyby-ò ritŷŷnynomy rarybeke. <sup>20</sup> Noe hãwò nihikŷ riwinyreu, Deuxu riraòmy raremyhŷu urile hãbu mahãdu rityhynyõmyhŷre. Debò inataõ reurò inomy rohonyre rubu-ribi bera-ò rabòròròre. <sup>21</sup> Wiji, kia sebedŷŷna ijyy wese heka rare. Tahe aõsebedŷŷna aõkõ iny tarasanare. Sebedŷŷna-ki Kristu rubu-ribi ixixana inyboho riteòsinyreri iny Deuxu-ò rethemyhŷre tarasana ritakemy. Bee tahe hãlubu suròdu aõkõ rare. Rexitòenymyhŷreki inywo rityranymyhŷre risuhònymyhŷre. <sup>22</sup> Kristu tahe wijile biu bede ronyre Deuxu rurunawe-ribi tii ŷjuboho, dinoduboho, rurunaduboho wedu Kristu rare.

#### 4

<sup>1</sup> Tahe Kristu taumy-wana aõhõkõmy rotŷŷnyre. Tai tahe iwesemy mohõtinybenyke. Inyõ dori aõhõkŷmy rotŷŷnyre. Tai tahe òraruna-ribi ixiixãwididŷŷmy rõhõtinyreri. <sup>2</sup> Tai kabede-ki iny bededŷŷnanareny uhe hãbu òta òtawidŷŷ nohõtina wesemy aõkõ rakatximyhŷrenyke. Deuxu deewina widŷŷna-ò rakatximyhŷrenyke. <sup>3</sup> Juhuu kaiboho sõwemy taòrarunyenye, iwese ityhydŷŷdukõdu mahãdu wiji rŷira wese. <sup>4</sup> Aòraru-ò biòwa mahãdu wiji bederiòtiinyre kai tii-wana taòrarunykõmahãteki iwese tiiboho naòrarunymyhŷdenyde wese. Tai adee ibinamy rarybemyhŷrenyke. <sup>5</sup> Tule tiiboho ywisidŷŷdu Deuxu-ò rirawyònykre. Idi dori òbiti ywisidŷŷna-di rihitxidŷŷnykre iru mahãdu, rubumahãdu wana. <sup>6</sup> Tai tahe inyõ ituekre mahãdu-ò Rybewihikŷmy rarybemyhŷre iumy dori rihitxidŷŷnykre ibutu hãbu wesemy. Tahe ityytyby Deuxumy irumy rarekre.

<sup>7</sup> Boholabeny inyhe, bededŷŷnana konana iòhòra. Tai tahe inatyhymy mohõtinyke Deuxu-ò òbitimy bexitòenykemy. <sup>8</sup> Ibutu ratyre wiluutyhymy atximahãbenyke. Kaiboho dori aluunadirenykeki wiòraruna-di itxerekõmy ahãbenyke. Inyõ dori iluunadikeki, wiòraruna-di itxerekõmy ihŷke. <sup>9</sup> Iny witxira dee awimy rŷira, roraludu isŷõmy rŷira aheto-ò bisŷdŷŷnyke. Bitŷhidŷŷnyke roraludu luumy atximahã. <sup>10</sup> Wii biwiòhenanomy ahãbeny iwese bede teerytenyete wese biwiòhenanybenyke. Deuxu wiòhedŷŷdu wi-itxura wahidŷŷdu wiwihikŷmy boibeke. <sup>11</sup> Inyõ rarybekeu, Deuxu rybedile kana rybeke. Inyõ reòbykeu. Deuxu ruudile kedeòbyke. Tai tahe Deuxule loosòna kia-ribi kanatake Jesuisi Kristu òraru-ki ibutumy aõna aõna-di. Aõu aõu ibutumy ruruna, loosòna Jesuisi Kristu hõrõ rare. Kie.

<sup>12</sup> Waluuna mahãdu, ixibedeòtiidŷŷõmy bede aõmydŷŷnana sira adee kanakreu. Kia tahe aõ brebudŷŷna aõkõ rare aõhebo adee kodotŷŷnykeki. <sup>13</sup> Tŷxihikŷlemy deysa-di atximahãke kia aõhõkŷmy dŷŷnana dori Kristu aõhõkŷmy dŷŷnana-ò biòwa atximahãte. Idi tahe tule kedeysakre Kristu loosòna òraru-ki. <sup>14</sup> Inyõ adee ibinamy Kristuni òraru-ki rarybekeki beysake. Kiau Deuxu Tyytyby heka loosòna sõwe-di atyre-ki kanakre. <sup>15</sup> Kaibohoò rubudŷŷrenyõmy, wasirenyõmy, aõna aõna bina widŷŷõmy, inywitxira aõwysyna-txi ròte. Kiake-wana iòwydŷŷnamy aõhõkŷmy botŷŷnybenyke. Tii dori wadee awiòre. <sup>16</sup> Inyõ tahe aõhõkŷmy rotŷŷnykeki, ityhydŷŷdumy rare òraru-ki tai ixyrũmy mabeke. Urile Kristunimy riwowydynykemy idi rare.

Bededỹnanaha rehemynomy roire ityhydỹdu mahãdu-di rihitxidỹnanany riteranykemy. <sup>17</sup> Tahe inydee ywisidỹna ritelenykeki, timybohe Deuxu Rybewihikỹ ityhydỹdukõdu mahãdu-ò kòdòhònykre. <sup>18</sup> Ryberiti-ki roimyhỹre kia: —Òbiti mahãdu dee tarasana isirakeki, timybohe òrarudu mahãdu ròhònyke. <sup>19</sup> Tahe inyõ Deuxudeewi òraru-ki aõhòkỹmy rotỹnykeki, Tatytyby Deuxu-ò rawahike tahe aõwihikỹ widỹmy rareke. Deuxu dori aõu aõu iny widỹdureny rare; iny wiòhedỹdureny rare.

## 5

<sup>1</sup> Ityhydỹdu-ò itxeredu mahãdu-ò aritohonykre ararybekre. Jiarỹ tule itxeredu-ò rare. Kristu aõhòkỹmy rotỹnyreu, jiarỹ tuu rabire. Taloosõna kiditeòsinykreu jiarỹ awana watre tewebyromy rikitarenykemy. <sup>2-3</sup> Biwisinanyke aityhydỹdu butuna iwese itxeredu budoeni-di rethemyhỹre wese idi beteheke. Ixideewimy kia biwinyke. Inywitxira deewimy aõkõ. Aõ nieru tarasa sohojilemy aõkõ, ityhydỹdu wiòhedỹmy. Aõ ityhydỹdu wedu wesemy aõkõ bisỹnybenyke, urile bexideòsinyke iwese ityhydỹdu òbiti rỹira wesemy. <sup>4</sup> Tahe itxeredu mahãdu wedutyhy kedehemynyke, tii adee kidiwahinykre loosõna araheto. Tii tiu toosò ixãwiòtyhy. <sup>5</sup> Itxeredu mahãdu tỹmyra bierybenyke itxeredu mahãdu matuari-ribi widee ixiwedeõmy ahãbenyke. Ixiwede mahãdumy dori Deuxu rarawetyynymyhỹre. Ixiwede aõkõ mahãdu-ò tahe ruxetòena riwahinyke.

<sup>6</sup> Ywimy ahãke Deuxuru-ò iximy xiwedeõmy. Tii dori bede òbiti kanakeu akanaloosònykre. <sup>7</sup> Aõmydỹna witxira witxira biwahinybenyke Deuxu-ò tii dori arawisinaymyhỹreny. Anawiòhenanykre. <sup>8</sup> Bexihãrubenyke aòludureny Satanasi-ò. Òbitimy mohòtinybenyke. Tii dori leaõ reburemyhỹre wese rare. Tii rariarerimy ihỹre tibo riròkemy. <sup>9</sup> Atyhynatyhy-di idi bexi-umynyke. Aityhydỹdu seriòre-dori awana aõhòkỹmy rotỹnyreri kia ixiradỹduhukỹle-wana. <sup>10-11</sup> Iny Deuxu ruxetòenatyhy rỹire. Kaiboho urihimyò aõhòkỹmy botỹnybenykeu akanawiòhenanykre, akanarurudỹnykre, akanaòbitidỹnykre, anaijohonadỹnykre. Ibutumy ruruna ihòrõmy aõu aõu rarekehymy idi watximahãre.

<sup>12</sup> Kia waryberatiyla Sila-wana adeeremy riritinyre. Tii iny seriòreny òbitityhy rare. Jiarỹ rarybereri kia Deuxu wiòhedỹna inatyhy rare. Kaiboho idi tyhy mohòtinybenyke. <sup>13</sup> Kowa hãwyy Babilonia hãwã ludu tule tarybe weityhyna adee diwahinyde. Tii tule itarasana mahãdu-ò. Tule wariòre Marku arãrybeweityhynanyreny. <sup>14</sup> Widee buòbenyke narybewehityhynanyde. Ywina adeeremy kanakemy watxireri Kristu tetyhynmahãtenykeki.

## 2 Pedro 2 Pedro Tyyriti

<sup>1</sup> Jiarÿ, Simaõ Pedro, Jesuisi Kristu deòdu rare. Jesuisi Kristu rybemy rybedu rare. Warybe ritina rewahinyre ityhydÿÿdu mahãdu-ò, Deuxu ywisidÿÿna mahãdu-ò, Jesuisi Kristu inyтарасаду òbitina òraru-ki, inatyhyna inyboho ijòdirennyreki. <sup>2</sup> Ruxetòena wiòhedÿÿna-wana adeereny kanakemy watzireri Deuxu erydÿÿna-ki, Inynyrÿ Jesuisi erydÿÿna-ki. <sup>3</sup> Tahe Deuxu rurutyhy-ribi inydeereny aõna aõna sòwemy riwahinymyhÿre òbitimy inyboho rokoirekemy iny bededÿÿnanarenny-ki. Tii inyboho ridyrennyre taloosòna òbitiwo-ò, tii inyboho rieryrennytyhyreki. <sup>4</sup> Tai inydeereny tuu rarybere, sòwemy aõna aõna kanakremy awityhymy inydeereny kia rybe rare. <sup>5</sup> Kia rybe bityhynybenykeki, bede aõmydÿÿnana bina-ribi bexitabenyke, òta òta widÿÿna-ribi bexiebenyke. Tule Deuxu rayky wesena-di urihimyo boibeke. <sup>6</sup> Tai tahe ibutummy aruru-di marurunyke aityhydÿÿna-ò òbiti widÿÿna bibutunyke, kia-ò bederydÿÿna bibutunyke, kia-ò ixiwedudÿÿna bibutunyke, kia-ò widÿÿnahyyna, kia-ò òbitimy nonana. <sup>7</sup> Kia-ò ityhydÿÿdu seriòre luuna, kia-ò wiluuna bibutunyke. <sup>8</sup> Kia aõna aõna dori awo-ki ratximyhÿkeki, rexiòlònykeki, arawiòhenanykre Jesuisi Kristu Inynyrÿ bierybenykeny. Tai ityhydÿÿdu wihikÿmy boibekemy. Iny witzira biwiòhenanybenyke. <sup>9</sup> Kia aõna aõna inywo-ki ratxiòmyhÿkeki, tii heka iruetàlemy ihÿre. Aõbo iòhòmy ratxirerilemy robimyhÿre. Juhu òraruna iribi risuhoremy idi tòhòti rosare. <sup>10</sup> Tai waseriòreboho marurunybenyke atyhymy boibekemy, aityhydÿÿna tyyhydÿÿmy boibekemy. Tai tiu òraruna-txi aixeõna. <sup>11</sup> Kia wesekeki tahe deysana-di birònybenykre Jesuisi Kristu inyтарасаду òlòna bede-ò.

<sup>12</sup> Kia aõna aõna teerytenyete. Inatyhyna tetyhynyhyy atximahãtenyete. Ihãrele tahe itxi aròhòtijiрадÿÿnyhyrennyreki. <sup>13</sup> Tule warummy mahãreu, awimyy idi rahòtinymahãre kia inatyhyna-di akanaixixadÿÿnydenykeny. <sup>14</sup> Waummy dori kaki ele elelemy aririkre reeryre. Inynyrÿ Jesuisi Kristu dori kia wadee diteòsinyde. <sup>15</sup> Aõu aõu tahe ararurunytyhymy ararekre kaiboho kia ibutummy òhòti-ribi rosaòtyhykeny. Tule warubuhewo-ribi kia-di mohòtinnyhy boibekre. <sup>16</sup> Tahe adeereny Jesuisi Kristu themynynamy rarybereu, aõ uritere tere ijyymy aòkò heka relyyreri hàbu ijyyna-ribi aòkò ijyutyhymy. Inyboho dori iny iòlòreny loosònatyhymy robimyhÿrennyre. <sup>17</sup> Tii dori Deuxu inytyby-ribi loosòna wowydyna-wana ritare. Tuu Deuxu loosònawo-ribi narybede: Kai heka Wariòre waluu tate. Jiarÿ reysamy watzireri adee. <sup>18</sup> Kia rybe-ò jiarÿboho raholarennyre tii-wana hãwãlò ratyy tyre-ki roiremyhÿu. <sup>19</sup> Iwese juhu rybemy rybedu mahãdu rarybere wese, kiamy heka wiji inydeereny ritÿnynymy roimyhÿre. Kaiboho tule kia-ò bohohamahãbenyke bityhynymahãbenyke. Iwese iny loosòna-di bedeluru-ki, retehemyhÿre wese. Idi tahe Kristu kòdòhònykre, iwese tainahakÿ ròhònyre wese. Tahe aworeny-ki kanasÿnykeny ratxikre. <sup>20</sup> Kia heka juhuy bierykre: Tyyritirybeò tiu ixivanale ritÿnydÿÿnyòtyhy. <sup>21</sup> Deuxu rybe dori hãbudeewimyy aòkò heka nade juhu Deuxu Tyytybytyhy hàbu dee rybe ritÿnynnyre aõmybo rarybekemy.

## 2

<sup>1</sup> Iwese juhuy inyy-ki rybedu inatyhyõna rarybere wese, tule ayrenny-ki rybedu inatyhyõna kidierydÿÿnykeny. Tiiboho kedeernanykre aõbinabinahãkÿmy. Tiiboho kidiitxenanydenykre. Tule Inynyrÿ kidiseònykre.



Tai tahe aõwesele rexihukre. <sup>2</sup> Sõwemy iny iòta òta erydỹnyra rityhynykre. Tai iny wixira inatyhyna ery dee ibinamy rarybekre. <sup>3</sup> Kia rybedu inatyhyõna adyna-di ratxihyymy roireke tai adeereny raruimyhỹke. Anieru tarasanareny-ò. <sup>4</sup> Iatysyna heka iòhòmy namahãde tule idi dehuna inatyhymy kòdòhònykremy ihỹre. Ýju mahãdu raòrarunyreu Deuxu tõtxi ririõlemy reare tahe idi rehulemy reare bedebina heòty-ò. <sup>5</sup> Iu bee-di Deuxu suu ritỹmynyreu, òrarudu mahãdu ituere Deuxu tõtxi ririõre. Noe, òbitina rybedule, ritare debò inatxi reurò iny-wana. <sup>6</sup> Sodoma hãwã Omora hãwã-wana aõwesele Deuxu ritoonyre, raòrarunyreki. Brybymy relere. Tai heka iny ribedeerynymyhỹre òraru lau. <sup>7</sup> Kia hãwã-ribi heka Lòjoi sohojile ritare. Lòò òbiti rare. Tii heka terare òrarudu mahãdureki. Tõtxi ririõhyyre. <sup>8</sup> Imahãdu-ki Lòò rasỹnyreu, txuõ txuõlemy iwo rabedewotyhyymyhỹre, aõbinawidỹmybo robire idi roholareki. <sup>9</sup> Tahe òbiti widỹdu urihixina-ribi Inynyrỹ ridykemy rierymyhỹre. Tule ibinamy widỹdu mahãdu aõhòkỹmy dỹnana riraòmyhỹre. Ywisidỹnatxu kedehemynykreò. <sup>10</sup> Ibutu ratyre urari òta òta widỹdu mahãdu aõhòkỹmy rotỹnykre. Tiiboho Deuxu ruru riseõnyrenymyhỹre. Ixi-di xiwededu wesemy rỹirenyre, ixiluudu wesemy rỹirenyre. <sup>11</sup> Aõbinahakỹlemy biuludu mahãdumy rarybemyhỹrenyre. Tahe ýju mahãdu iruruna ratyre-di hãre tamy ibinamy rarybeõmyhỹre, Deuxuko-txi. <sup>12</sup> Tahe kia iykaraluu mahãdu iròdu deborehekỹ wesemy ratximyhỹre. Iròdu debore tahe bedehuduna widỹmy rare ada ròtenawo-ò rakelemy. Kia hãbu mahãdu aõmybo ròeryõhyymyhỹre dee ibinamy rarybemyhỹ. <sup>13</sup> Tiiboho ixi-di dehuna-di ixi dee kedexiixãwinykre. Tiiboho òraru luumyhỹre txumy dori raòrarunyrenymyhỹre. Awanareny dori riroximahãre, aõbinahakỹtyhy wesemy ayreny-ki ratximyhỹ iòrarunarenymy rybe luureki. <sup>14</sup> Tiiemy iru hãwydyhy retehemy ihỹre tamy òta òtalemy ròhòtinymyhỹre. Kia hãbu hãwydyhỹweduna rierymyhỹre. Hãwy urihimyo tỹwekeki kia hãbu idyna rybe-di rierymyhỹre hãwy-di aõbo tai riurariny my taòbirenareny rihydỹnymyhỹre aõbo tai riurariny my idi ratximyhỹre. Tiiboho tuedena nihikỹ-di ituerenykre. <sup>15</sup> Òbitiry ririmyhỹrenyre. Reòsamyhỹrenyre. Balaaõry dori riheludunymyhỹrenyre Balaaõ, Beoro riòre òraruòwydỹnany ritakemy ratxireri iòraru luureki. <sup>16</sup> Aõbinahakỹ riwinyreki rexiòwinyre. Kiamyre heka. Jumenta wesena rybeteremy tamy rarybere inyrybe wesemy iitxỹtena-ribi riixãwidinykemy. <sup>17</sup> Tiiboho bedidehuna wese roire bee ihoõreki. Yhy biuwetyy tiò ridymyhỹre wese kia hãbu mahãdu roire. Tamy bede luruhukỹ bede riyrubunymy rỹire. <sup>18</sup> Tiiemy taòrarumy rarybehyymy raremyhỹ inyõ aòta òta rybe-di ridykemy. Inyõ deòsary-ribi ròhònykeki, tii ridylemyhỹre ixybyle òraruna-ò. <sup>19</sup> Tamyreny rarybemyhỹre ixideewimy boibekemy. Urile irybedureny òrarunawidỹna deòdumy ihỹrenyre. <sup>20</sup> Iwese inyõ ijesuna-ribi riatymyhỹkeki, iatysydỹdu deòdumy rarekre wesemy. Kiawesele tahe òraruna rare. Inyõ bede aõmydỹnana òraru-ribi ròhònykeki, tahe ixybyle ròòsekeki, teleu raremyhỹ ratyre ikonanau ratỹnykre. Inynyrỹ Jesuisi Kristu dori tii rierymyhỹre juhoo tahe idi rexideyresanyre kia aõmydỹnana òraru-ò. <sup>21</sup> Tiiboho ryòbiti rierymyhỹrenyre. Tahe bede ywina òbiti-ribi rexiòlòdỹnyre. Rieryõhykeki tamy wimy tuu raremyhỹ, rytỹmyra erysy-ribi rohonyrenyreki. <sup>22</sup> Tiiboho kia rybedỹna hitxina wesemy ihỹrenyre: —Ijòrsa tahylòina-ò ròòsere. Tule ijò rybedỹna wesemy: —Ixỹni bedi risuhòkeki, tii tasu burena-di ixybyle rexisunyke.

### 3

<sup>1</sup> Kia, waluuna mahãdu warybe ritidỹna juhuludu aõkõ rare ihewoludu

rare. Warybe riti wiwanadile anohōti ijiradỹmy watxireri anohōti ri-raixixanykemy. <sup>2</sup> Deuxu rybemy rybedu òbitimy rarybemyhỹre òhōti-ribi rosaōkre, tule Inynyrỹ iny tarasadu bede ywina nohōti losaōmy iwese tarybe deòdu adeereny rierynanyre wese. <sup>3</sup> Ibutu ratyre, kia-ribi nohōti losaōmy. Ikonana txuu hābu binahakỹ rybe binatyhy-di kòdòidenykre. Kia hābu òta òta widỹylemy rōhōtinymyhỹre. <sup>4</sup> Kiamy hābu rarybekre. Tiubo Jesuisi Kristu nonana kanakre. Juhu inytybyreny ituereu wiji bededỹnanau tiu naōhyymyhỹde. Ibutumy heka juhu bedeu ixi wese hyylemy bede roimyhỹre. <sup>5</sup> Iribi tōhōtirenny rosare ixideewimy Deuxu irybedile biu bede-wana riwinyre. Beribi riwinyre, bedi riwinyre. Iribi tahe bedi bede rahure. <sup>6</sup> Bedi juhuu bede ibutumy rexihura. <sup>7</sup> Tule wiji irybedile bede rỹimyhỹre. Tahe ixybyle kanahukre. Heòty-di kanahukre. Kia txuu ibutumy inybinahakỹ ituekre kia-ribi ixideewilemy kia hābu tōhōti rosare.

<sup>8</sup> Tahe aōsohojibo, waseriòreboho, nohōti-ribi loosarennyōmy. Kia heka rare: Inynyrỹ dee. Txusohoji 1000 beòra wese heka rare. Tule 1000 beòra txusohoji wese rare. Tamy bededỹnana aō aōkō rare. <sup>9</sup> Inynyrỹ tarybewesele aōna aōnamy kodotỹnykre. Aō raroorehenymyhỹre aōkō rare urile tahe hābu riraōhyymy rỹimyhỹre hābu taòraru-txi tōhōti reakemy. Ibutumy tarasana-ki rỹikemy dori idi ratxireri. <sup>10</sup> Wasidu namyhỹde wasimy Inynyrỹ txuu kòdòhònykre. Biuwetyy, bede-wana rexihukre. Ibutu suludu heka ramyijy heòty adỹwesemy ritxiennykre. <sup>11</sup> Òbitimy rakatxirenyke. Kia ibutumy ròhònyreki. <sup>12-13</sup> Inyboho heka riraòmyhỹrennyre biuwetyy tỹmyra sutỹmyra-wana. Inynyrỹ dori rarybere kia kidiwahinykremy.

<sup>14</sup> Tai heka waseriòre waluuboho, òbitimy atximahābenyke kia-ò dori teraòmahātenyete. Tii kanakreu umyrenny robikre ywimy, òbitimy, inyò heka umyrenny ibinamy rarybeòtyhy. <sup>15</sup> Rexiroorehenymyhỹre ibutumy iny tarasanarenny. Tule inyseriòre Paulo adeereny ròritidỹre ibede eryna Deuxu tamy riwahinyre. <sup>16</sup> Kiamy tule aōna aōnamy tii ròritidỹre. Tahe iritina-ki aōbo isiratyhyre ierykònatyhymy roire òbiti mahādu aōkō kia rybe-di aōwitxiramyo rierynanyymyhỹre. Iwese ijō Ryberiti-di riwinyre wese. Tai heka tiiboho ituereny. <sup>17</sup> Kaiboho tahe waityhydỹdu seriòre bexihārubenyke ilau teòsana-di aradyrenny. Tai kaiboho beòsabenyke. <sup>18</sup> Inynyrỹ Jesuisi Kristu wiòhedỹna-di ibedeerydỹna-di maumynybenyke. Wowydyna ibutumy tamy kanakemy idi wāhāre wiji tyhymy rareke. Kie.

## 1 Juaõ

### 1 Joaõ Tyyriti

<sup>1</sup> Jiarÿboho akoreny retÿÿnynyneri, Jesusimy. Tii Rybe rininirenyra. Tii juhubeu raremyhÿ. Jiarÿboho rabirenyra, tarybemy aholarenyra, tamy reteherenyre, aõbo riwinyreò, tule tamy iny rerimyhÿre. Tii inydeereny umytÿmyra riwahinyneri. <sup>2</sup> Umytÿmyra tuedeõna Deuxu inytyby-ribi rehemynyra. Kia umytÿmyra tuedeõna Jesuisi-di rare. Jiarÿboho tuu rabirenyre. Tii rexideòsinyre inyrenyko-ò. Kia tahe adeereny relyreri iwese raremyhÿ wese. <sup>3</sup> Aõòbo iny roholare wese, tuu rabire wese, kia tahe tuu relyreri inyboho wiluurenykemy winohõtiewesele røkõhõtinyrenykeny. Inyboho rahõtinyrenyneri iwese Deuxu inytybyreny, Jesuisi Kristu Deuxu Riõre-wana wiwese røhõtinyre wese. <sup>4</sup> Kia tahe waryberiti adee rewahinyneri adeysamy rakatximahãrenykeny.

<sup>5</sup> Kiamy tahe Jesuisi inydeereny relyreri: —Deuxu txuloosõna wese ratximyhÿre. Deuxu-ò bedeluru aõmydÿÿnana rehemynyõtyhy kiamy adeereny relyreri. <sup>6</sup> Inyõ rarybekeki: —Jiarÿ Deuxu-wana winohõtiewesele rahõtinyrahãre. Kia iny bedeluru aõmydÿÿna-di ratxireriki, kia iny raruimyhÿre. <sup>7</sup> Tahe inyboho loosõna waõmydÿÿna riwinymyhÿrenykeki iwese, Deuxu loosõnawo-ki ratximyhÿre wese, tai inyboho wiwesele røhõtinyrahÿke. Tahe Jesuisi, Deuxu Riõre hãlubu ibutumy iny òraru-ribi iny risuhòmymhÿke. <sup>8</sup> Inyõ rarybekeki: —Jiarÿ raòrarunyõhywãhãre, kia rybe-di tii ixidee riitxenanyimyhÿre. Tii raruire rityhynyõre. <sup>9</sup> Iny taòrarurenymy relyrenykeki, Deuxu tiemy òbiti rare, tii iny òrarurenymy iny-ribi riixãwididÿÿnykre. Aõbo iny iwo-ki isuisumy ihÿre tii rityranyke. <sup>10</sup> Inyõ òrarudikemy aõkõ raryberenykeki, inyboho Deuxu ruidumy rarybemahãreny. Kia iny Deuxu rybe rieryõhyimyhÿre.

## 2

<sup>1</sup> Kaiboho wariõre wese atximahãtenyete. Adeereny waryberiti rewahinyneri, kaiboho òrarurenymykeny. Iny òraruna-txi resekeki, iny wiòhedÿÿdureny dire. Tii Jesuisi Kristu rare. Òbiti rare òraru ijydydumy rarekeny Waha Deuxuko iny wiòhedÿÿmy. <sup>2</sup> Tii dori itxeònihikÿ-ki rurura iny òraruòwydÿÿ-ki. Inysohojile òraru aõkõ rurura tahe ibutumy iny òraruòwydÿÿ-ki. <sup>3</sup> Tiwesebo inyõ rexierykre Jesuisi rieryrenykeny rityhynymyhÿkeki karybe bede ywina wese rierykre tii rexierykre Jesuisi rityhynyneri wana. <sup>4</sup> Inyõ rarybekeki: —Jiarÿ Jesuisi reeryre. Irybe bede ywina riywinyõkeki, iny ruidu rare. Inatyhyna rityhynyõre. <sup>5</sup> Inyõ Jesuisi bede ywina riywinykeki, inatyhymy tawo-ki Deuxuluu rare. Kiawese heka iny rierykre Jesuisi mahãduwo-ki ratxireri-wana. <sup>6</sup> Inyõ rarybekeki: —Jiarÿ Jesuisi mahãduwo-ki watzireri. Tamy kia wese rÿikeki. Aõmybo Jesuisi rotÿÿnyre wese, tii tule rotÿÿnyke. <sup>7</sup> Ityhydÿÿduseriõre, adee bede ywina tÿmyra aõkõ rewahinyneri. Bede ywina tyby kia rare. Kia juhuu teertytenyete. Inyboho wiluurenykeny, kia bede ywina tyby rare, juhuu taholatenyete. <sup>8</sup> Kia rybe bede ywina itÿmyra rare. Jiarÿ adee rewahinyneri. Kristu dee inatyhy rare tule adee inatyhy rare. Bedeluru røhõnyra, loosõna inatyhy bede-ò ralòmymhÿre. <sup>9</sup> Inyõ rarybekeki: —Jiarÿ loosõnawo-ki watzireri. Kia iny taityhydÿÿdu seriõre luuõkeki, bedeluru-ki ratximyhÿre. <sup>10</sup> Inyõ taityhydÿÿdu seriõre luukeki, kia sohojile loosõnawo-ki ratxireri. Aõ aõkõ

tii riatydyñnyra. <sup>11</sup> Inyõ taityhydýñdu seriõre rexihitxinykeki, bedeluru-ki rariamyhýre. Titxibo rakre rieryõhymyhýre. Bedeluru dori ruetàna rare.

<sup>12</sup> Adeereny warybe rewahinyreri wariõre wese aõraru dori, tii ri-ixãwididýñnyre Jesuisi õraru-ki. <sup>13</sup> Iumy mahãdu-ò warybe riti rewahinyre adiwahinyde, kaiboho dori tuu teerytenyte. Tii hykyle dori juhUU raremyhý. Ijoityhy-ò waryberiti rewahinyre, Satanasimy tahañnanytenyte. <sup>14</sup> Wariõre, inytyby Deuxu teerytenyte. Iumy mahãdu, adeereny aratyyritinykre, kaiboho dori tuu teerytenyte. Tii hykyle dori juhUU raremyhý. Ijoityhy, adeereny aratyyritinykre, Deuxu rybe dori õhõtireny-ki ratxireri, arurudireny dori. Satanasimy tahañnanytenyte. <sup>15</sup> Bede aõmydýñnana luurenykõmy boibeke. Inyõ bede aõmydýñnana luukeki, Deuxu inytyby luuna rieryõke. <sup>16</sup> Kia bede aõmydýñna rare: õraruluuna, aõmy robira-wana tuure, aõna aõnamy ixityhydýñna. Kia Deuxu-ribi aõkõ nade. Kia bede aõmydýñna-ribi nade. Kia bede aõmydýñna-ribi nade. <sup>17</sup> Kabede ixãwikre taaõmydýñna òta òta-wana. Deuxudeewimy widýñdu tiu ixãwiõtyhy. Tii awimy rýirakre.

<sup>18</sup> Wariõre wese. Ikonana bededýñnana iõhõmy roire. Adeereny narybede Kristu òludu kanakemy. Betehe inihe, Kristu òludu sõwemy dehemynyde. Kiawese inyboho rieryrenyre ikonana bededýñnana iõhõmy roire. <sup>19</sup> Kia Kristu-ò òludu iny mahãdu wotya-ribi rõhõnyrenyra. Tii ityhydýñdutyhymy aõkõ ratximyhýre. Ityhydýñdu mahãdu tiu rõhõnyõtyhy. Rõhõnyrenyreu, ibutummy rieryre, kia iny mahãdu aõkõ ratximyhýre. <sup>20</sup> Kaiboho aõmydýñnana ibutummy teerytenyte Deuxu Tyytybytyhy direki. <sup>21</sup> Kia rybe adee aratyyritinyke, kaiboho dori Deuxu rybe inatyhyna teerytenyte. Tiu rui Deuxu inatyhyna-ribi rõhõnyõhymyhýre. Kia tahe teerytenyte. <sup>22</sup> Moheka ruidu rare. Inyõ rityhynyõkeki Jesuisi Deuxu deõdýñna raremy, tii tahe ruidu rare. Inyõ Kristu Deuxu-wana ritxiõnykeki, tii Kristu òludu rare. <sup>23</sup> Inyõ Deuxu Riõre ritxiõnykeki, tii Deuxu-wana aõkõ ratxieri. Inyõ rarybekeki: — Deuxu Riõre retyhinyre, tii Deuxu-wana ratxireri. <sup>24</sup> JuhUU aõõbo roholare taholamy toitemyhý idi mohõtinybenyke. Idi mohõtiny mahãbenykeki, Deuxu, Iriõre-wana aõu sõu matxibenyke. <sup>25</sup> Jesuisi Kristule juhUU inydeereny narybede, umy ituedeõna inydeereny kidiwahinykemy. <sup>26</sup> Kia waritina jiarý wiji rehura. Aitxenadýñdu lau adee reritinyra. <sup>27</sup> Abedeerydýñna Kristu tatytyby adeereny riwahinyre. Tii tahe awanale ratxireri. Aerydýñdu aõkõ adeereny rauhenyrenyeri. Tii tahe inatyhy bedeerydýñna ibutummy araerynanyeri. Rui aõkõ rare. Iwese tii araerynanyreri wese, ibutummy biyrubunymahãbenyke. Kia tahe Kristu-ki hykyle bexiemyhýbenyke. <sup>28</sup> Wiji, wariõre wese aõu aõu boibekemy Deuxu mahãduy-ki. Tai Jesuisi kaõ kedehemynekeu, buberuõtyhy ada maixýruõtyhy ilau. <sup>29</sup> Deuxu õbitityhyhy ratximyhýre. Kia teerytenyte. Inyõ õbitimy rarekeki, Deuxu riõremy rareke. Kia tule teerytenyte.

### 3

<sup>1</sup> Boholake, inytyby Deuxu taluuna nihiký inydeereny riwahinyre. Inyboho dori tii rininirenyre Deuxu Riõremy. Inatyhymy inyboho Deuxu Riõremy roire. Kia tahe ityhydýñdukõdu mahãdu rieryõre. Tiibocho dori Deuxu inytyby rieryõhymyhýre. <sup>2</sup> Waluuna mahãdu, inyboho Deuxu Riõremy roire. Rierykõrenykre timybo iny rokoirekemy. Kia inyboho rieryrenyre: Jesuisi kodobehekrey, inyummy taumy wese risýnykre. Inyboho dori kodobidenykre iwese rarybemyhý wese. <sup>3</sup> Inyõ Jesuisi wesemy rarekemy ratxikeki, iwese Jesuisi õbitimy raremyhý wese tii rareke. <sup>4</sup> Inyõ Deuxu bede ywina rybe rityhynykeki, tii rexiõrarunyke. Kia heka õraruna rare. <sup>5</sup> Jesuisi dobehede õraru

tarasadumy rarekemy. Kia teerytenyte. Jesuisi inatyhymy raòrarunyõhyy raremyhỹ. <sup>6</sup> Inyõ Jesuisirykihyy rarialeke, tii òraruõmy rareõtyhy. Inyõ òrarumy rarehyykeki, tii Deuxu rieryõhyyemy rareke tuu robiõhyyemy rareke. <sup>7</sup> Wariòre wese, itxenadỹỹdu lau bexiyrubunyke iny aõmydỹỹnana òbitimy riwinykeki, iny òbitilemy rareke, iwese Jesuisi òbitimy raremyhỹ wese. <sup>8</sup> Inyõ òrarunadityhy raretyhykeki, tii Diabo mahãdu-di rareke, Diabo heka òrarauna-ki hyy nodure. Tai kaò Deuxu riòre nade Diabo aõmydỹỹnana ixãwikemy. <sup>9</sup> Inyõ Deuxusỹ riòrekeki tii òraruna-txi reseõlemy ratximyhỹre Deuxu dori iwo ritymyranyre. Tii reseõhyky rareke. Deuxusỹ dori rare. <sup>10</sup> Kia wese iny rieryrenykre inyboho iriòre Deuxu riòremy roire ada Diabo riòremy aõbo, inyõ Deuxu deewimy riwinyõkeki, tii Deuxu Riòre aõkõ rare. Inyõ taityhydỹỹdu seriòre luuõkeki, tule Deuxu Riòre aõkõ rare. <sup>11</sup> Kia bede ywina rybe juhUU taholamy tatemyhỹ ihãre tadoholamahãte. Kia heka rare: iny wiluukemy. <sup>12</sup> Iwese Kai taseròre rirubunyre wese aõkõ rikiwinykre. Tii dori Satanasi mahãdu rare. Aõherekibo tasewriòre rirubunyre. Iaõmydỹỹna Deuxu dee awiòre Iseròre aõmydỹỹna Deuxu dee òbitire tai tahe rirubunyre.

<sup>13</sup> Waseriòreboho, ityhydỹỹdukõdu mahãdu eramy ratximyhỹ. Kia-di be-deòtiidỹỹomyke. <sup>14</sup> Inyõ ityhydỹỹdu seriòre luukeki, tii rubumy rỹire wese mahãdu-ribi ròhònyre. Kia reerymyhỹrenyre. Tahe umytuedõna-ki rahara. Inyõ luuõkeki, tii rubumy rỹirawese mahãdu-ki ihỹmyhỹke. <sup>15</sup> Inyõ taseriòre derakeki, tii rubudỹỹdu wese rare. Boholake, kia teerytenyte. Rubudỹỹdu umytuedeõna-ki rahaõtyhy. <sup>16</sup> Kiawese luuna rikierenyre dori Kristu rubu-ò rexiwahinyre inydeereny tòemy. Tai tahe inyõ taseriòre dee rurukeki iluuna sòwerekiki. Tii tahe awire. <sup>17</sup> Inyõ ityhydỹỹdu seriòre aõhokỹmy rotỹỹnykeki, rama rahukeki, tuu robike aõ ijòdikeki, tahe iny riwiòhenanyõkeki, tii Deuxu luuna-di aõkõ ratximyhỹre. <sup>18</sup> Wariòre wese, luuna urile tuu rybena aõkõ rare. Aõhebo rotỹỹnykemy ihỹre. Kia tahe aluuna inatyhymy biteòsinyke. <sup>19-20</sup> Kiawese iny reeryrenyre inatyhyna mahãduwo-ki ratximyhỹre. Jiarỹ arahõtinykeki. Jiarỹ aõkobo ityhydỹỹdumy watzimahãre. Deuxu warayky riwiòhenanany ratxireri. Deuxu warayky ratyre raraykywydynananyhỹre. Tii ibutumy aõ rieryre. <sup>21</sup> Waluuna mahãdu, ruberuõhyyemyhỹre tahe iny ityhydỹỹdu mahãdu-ki ratximyhỹre wana rieryreki Deuxu iny rityhynyre. <sup>22</sup> Tahe aõmy iny rexitòenykeki tii inydee kidiwahinyke. Iny dori ibede ywina rybe rityhynymyhỹre. Deuxu deewimy iny riwinymyhỹre. <sup>23</sup> Kia heka Deuxu bede ywina rare. Jesuisi Kristu, iriòrenimy rikityhynykemy. Tule iny wiluuna wiluukemy. Iwese tabede ywina rybe diwahinyde wese rarekemy. <sup>24</sup> Inyõ Deuxu bede ywina rybe rityhynykeki, Deuxu-wana rareke. Tii-wana ratxikemy. Kia wese heka iny rieryrenyre Deuxu-wana iny ratxireri. Deuxu Tatytybytyhy dori inydee riwahinyre.

## 4

<sup>1</sup> Waluuna mahãdu, ibutumy rybe bityhynybenyõke inihe ityhydỹỹrenyõmy. Tai biurihike iny rybe Deuxu-ribi inatyhy aõbo ada aõkõre aõbo. Sòwemy rybedu mahãdu ròhònymyhỹre. Tahe inatyhymy Deuxu rybemy rybedu aõkõ rare. <sup>2</sup> Kiamy Deuxumy rybedu mahãdu inatyhymy bierykre, inyõ rarybekeki: Jesuisi Kristu hãbu wesemy nade, tii inatyhy Deuxu mahaduõ ihỹre. <sup>3</sup> Inyõ kiamy rarybeõkeki, tii Deuxu mahãdu aõkõ ratximyhỹre. Kia Kristu òluduõ rare. Tamy taholamahãte kanakreò, tahe, kia ratximyhỹre. <sup>4</sup> Wariòre wese, kaiboho Deuxu mahãdumy toite. Rybedu inatyhy aõkõ rare, kia ruru tetatenyte. Deuxu dori aworeny-ki ratximyhỹre Deuxururu, Diabo ruru ratyre rare. <sup>5</sup> Inatyhymy rybedu aõkõ aõmydỹỹnana binamy relyymyhỹre. Tii

dori ka bede aōmydŷŷnana bina mahādu rare. Tahe ityhydŷŷdukōdu mahādu tamy roholamyhŷre. <sup>6</sup> Inyboho Deuxu mahādu roire. Inyō Deuxu rierykeki, inydeereny roholamyhŷre. Inyō Deuxu rieryōkeki, inydeereny roholaōtyhy. Kiamy rikierymyhŷrenyke inatyhyna mahādu inatyhyna aōkō mahādu.

<sup>7</sup> Waluuna mahādu, wiluummy rakatximyhŷreny. Luuna dori Deuxu-ribi nade. Inyō luukeki, Deuxu-ribi tibie rare. Iny Deuxu rieryre. <sup>8</sup> Inyō luuōkeki Deuxu rieryōre. Deuxu dori luuna rare. <sup>9</sup> Kiawese inyboho rieryrenyre Deuxu inyluuremy ratxire. Deuxu Tariōre sohojile diteōnyde bede-ō inyboho Iriōre-ki umy tŷmyra-ki rahakemy. <sup>10</sup> Kia heka luuna rare. Juhuu Deuxu iny tuu aōkō rare. Tii tahe inyluure. Tule tariōre diteōnyde inyōraru òwy òwydŷŷnanykremy. <sup>11</sup> Waluuna mahādu, Deuxu inyluurenytyhyreki, tai tahe inyboho wiluummy rokoireke. <sup>12</sup> Tiu Deuxummy inyō robiōhykyre. Inyboho wiluummy rŷikeki, Deuxu inywo-ki ratxike. Tai tahe inatyhymy Deuxu luuna inywo-ki ratximyhŷre. <sup>13</sup> Deuxu iny-ō Tatytyby riwahinyre. Kiamy tahe inyboho rieryrenyre tamahādu-ki ratximyhŷre. Tule rierymyhŷreny tii iny-wana ratximyhŷrenyre. <sup>14</sup> Deuxu Riōremy inyboho robirenyra Tulobixidummy inyboho roire. Tuu adeereny relyreri. Deuxu Tariōre diteōnyde iny tarasadummy rarekemy. <sup>15</sup> Inyō rityhynykeki idi rarybekeki: Jesuisi Deuxu Riōre rare, tii Deuxu-di tawo-ki ratxireri. Tii Deuxu-wana ratxireri. <sup>16</sup> Inyboho rieryrenyre Deuxu inyluurenyre. Kia iny rityhynyrenyre. Duexu heka luuna rare. Inyō luuna-ki ratxihyykeki Deuxu tii-wana ratxihyyke. Tii Deuxu-wana ratxihyyemyhŷke. <sup>17</sup> Iny luunareny Deuxu-ō rauhenyōreri. Tai tahe Deuxu wiribi ritxuakre kia txuu inyboho kiatzulau ruberuōtyhy. Iwese tii ratximyhŷre wese inyboho kabede-ki ratximyhŷrenyre. <sup>18</sup> Inyō luuna-di ratxityhykeki, tii ruberuōtyhy. Luunatyhy brebuna-di rehumyhŷre. Aōhōkŷmydŷŷnana brebuna kidiwahinyleke. Inyō brebuna-di ratxikeki, tamy aōhŷkŷmy dŷŷnana kanakre. <sup>19</sup> Juhuu Deuxu inyluurenyre, tai tahe inyboho iluurenyre. <sup>20</sup> Inyō rarybekeki: —Jiarŷ Deuxuluure. Tai tahe tii ityhydŷŷdu seriōre luuōkeki, tii ruidu rare. Inyō taityhydŷŷduseriōre luuōkeki, timykibo Deuxu luummy rarekemy iximy rōhōtinyke Deuxu dori tiu tuu robiōhyymyhŷre, taseriōremy tahe robihyky ihŷre. <sup>21</sup> Kia bede ywina rybe heka Kristu inydeereny riwahinyre: Iny Deuxuluummy ratxikeki, tule tii taityhydŷŷdu seriōre luummy ratxikre.

## 5

<sup>1</sup> Jesuisi inatyhymy Kristu rare, Deuxu deōdŷŷna rare, inyō rityhynykeki, tii inatyhymy Deuxusŷ mahāduwo-ki ratximyhŷre. Inyō Deuxu luukeki, tule iriōre luukre. <sup>2</sup> Inyboho Deuxuluukeki tarybe ywina rikiywinykeki, tai Deuxu tibiedŷŷna mahādu luummy rikierymyke. <sup>3</sup> Deuxu rybe ywina rityhynykre, irybe ywina dori isiraōre. Tai inyboho Deuxu luuna riteōsinykre. <sup>4</sup> Deuxusŷ mahādu bede aōmydŷŷnana bina bina ruru ritamyhŷre iny Deuxu rityhynykeriki, kia bede bina bina ruru ritareri. <sup>5</sup> Mo tahe kia ijesu tarasadure. Inyō Jesuisi Deuxu Riōre raremy rityhynykeki, tii bedebina bina ijesu tarasadu rare. <sup>6</sup> Jesuisi Kristu nade. Inyō tii riratisebenyre idi rare rurukremy tahālubu ritxiwikremy. Rexiratisebenykemy sohojile aōkō nade, tule tahālubu ritxiwikemy nade. Kiamy heka Deuxu Tyytyby tuu rarybere. Deuxu Tyytybytyhy tahe inatyhymy rare. <sup>7</sup> Inataō aōmydŷŷnanamy inydeereny rarybere: Deuxu Tyytybytyhy ijōre, Jesuisi ixirati sebedŷŷna ijōre, Jesuisi rubudŷŷna ijōre. <sup>8</sup> Kia inataō aōmydŷŷnanamy wiwese wiweselemy rarybereri. <sup>9</sup> Hābu rybe iny rityhynymyhŷre. Deuxu rybe hābu

rybe ratyre rikityhynomy rakatximyhÿrenykre. Kiamy Deuxu Tariðremy rarybereri. <sup>10</sup>Inyõ Deuxu Riðre rityhynykeki, aõbo inatyhy ixidee rieryre. Inyõ rityhynyõkeki, tii Deuxu-di ruidumy røhõtinyreri. Tii dori rityhynyõreri timybo Deuxu tariðremy rarybere. <sup>11</sup>Kia rybe rare: Deuxu inydeereny umytuedeõna riwahinyre. Tii tiu umy ituedeõna iriðre-ki inyboho rakaharenyke. <sup>12</sup>Inyõ Deuxu Riðredikeki, tii umytÿmyra tuedeõna-ki rahake. Inyõ Deuxu Riðre-di aõkõkeki, tii umytÿmyra tuedeõna-ki tahasaõna.

<sup>13</sup>Kia aõna aõna adeereny retyyritinyre kaiboho umytuedeõna-di atxitenyteri bierybenykemy. Deuxu Riðre tetyhynytenynte. <sup>14</sup>Inyboho Deuxu-deewimy rexitðenymyhÿrenyreu, Deuxu iny-ò roholamyhÿre. Kia tahe inatyhymy rybena rare. <sup>15</sup>Inyboho rierykeki tii inydeereny roholamyhÿre, tai rierymyhÿrenyre tii inydeereny riwahinyke aõmybo iny tamy rexitðenyneri. <sup>16</sup>Iny ityhydÿÿdu seriðre rubu-ò aõkõ òraruna-txi resekeki, tamy Deuxu-ò rexitðenyrenyke, Deuxu kia riwiðhenanykemy ixyby Deuxu-ò ròðsekemy. Tii rubu-ò òraruna-txi resekeki, jiarÿ adee ararybeõkre tamy bexitðenykemy. <sup>17</sup>Ibutumy òbiti aõkõkeki, òraruna rare. Òraruõ rubudÿÿnahyky kidiwahinyõkre.

<sup>18</sup>Inyõ Deuxu-ribi tybiekeki, òrarunahyy-ki rareõtyhy. Kia inyboho reeryrenyre. Deuxu Riðre ryrubunymyhÿre. Diabo iribi ròtaõtyhy. <sup>19</sup>Deuxuhõrõ inyboho roire. Kia inyboho rieryrenyre. Kabede bina mahãdu taaõmydÿÿna-wana Diabo hõrõ rare. <sup>20</sup>Tule inyboho rieryrenyre: Deuxu Riðre inatyhymy kaò nade. Tii rierynanyre mobo Deuxu inatyhy raremy. Deuxu-wana inyboho ratximyhÿrenyre, inyboho-dori Jesuisi Kristu Deuxu Riðre-wana ratximyhÿrenyre. Kia heka inatyhymy Deuxu rare. Kia inatyhymy umytuedeõnamy rare. <sup>21</sup>Wariðre wese, bexihãruke ibutu bedeòraruna lau.

## 2 Juaõ

### 2 Juaõ Ryberiti

<sup>1</sup> Jiarỹ dohodỹyna matuari mahãduõ warybe rare. Watyyriti rewahinyreri Deuxu ywisidỹyna hãwyyõ-ò, iriòre-ò. Jiarỹ ibutumy inatyhyerydu mahãdu-wana tiiboho inyluutyhyrenyrene. <sup>2</sup> Inatyhyna dori inyworeny-ki ratxireri. Ratxityhyhyymy ratxike. <sup>3</sup> Kia dori inatyhy inydeereny tate luuna-di. Deuxu deysana, ruxetòena, ywina adeereny kanakemy watzimahãre Deuxu Waha-ribi, Jesuisi Kristu, Iriòre-ribi.

<sup>4</sup> Ariòre mahãduy-ribi inatyhymy ijõ ityhydỹdumy ralore. Kia reeryreu, jiarỹ wadeysatyhyre ariòre Deuxu bede ywina rityhinyreriki. <sup>5</sup> Adee arex-itoenykre hãwyy. Bede ywina rybe tỹmyra rewahinyreri wese aõkõ rare. Juhuu-ribi teeryte. Urile bede ywina hetxina õhõti reijeradỹnyreri. Kia heka rare: iny wiluukemy rakatzimyhỹrenykemy. <sup>6</sup> Bede ywina rybe rikityhynyhyykeki, kia heka inatyhy luuna rare. Kia bede ywina juhUU Deuxu-ribi taholate. Tuu txuõ txuõlemy biwinyke. <sup>7</sup> Sõwemy hãbu itxenadỹydu tyhy kabede-ò dòhõnyde. Tiiboho Jesuisi hãbuwesemy nade rityhynyõlemyhỹre. Kia itxenadỹydu tyhy tule Kristu òludutyhymy roire. <sup>8</sup> Tamyreny bexiebeny, inyaõmydỹynana aõmysỹdỹynatyhy-di ritaremy iõkõkemy, Deuxu wahidỹynaòwy ibutumy ritakemy. <sup>9</sup> Inyõ Kristu erydỹynana-ribi rõhõnykeki tule iwitxira erysyna rierynanykeki, tii heka Deuxu hõrõ aõkõ rare. Inyõ Kristu erydỹynana-ribi rõhõnyõkeki, tii Deuxu dire iriòre dire. <sup>10</sup> Tai tahe itxenadỹydu Kristu erydỹynana erydỹydu aõkõ aheto-ò rehemynykeki, uritere iròtedỹyõmy, irybedỹyõmy. <sup>11</sup> Inyõ rirybenykeki, iaõmydỹynanabina-ò ri-wiòhenanyreri.

<sup>12</sup> Jiarỹ warybe sõwemy adibutumy wãhãde. Urile tyyriti-di ariritinyõkre. Arorarenymy dori arakemy watzireri. Kiamy rybe sõwemy rõhõnykre in-ysõwemy reysakemy. <sup>13</sup> Aseriòre Deuxu ywisidỹyna mahãdu senadu, kia riòre tarybe wehityhyna adee riwahinyreri. Kie.



## 3 JuaŌ

### 3 JuaŌ Ryberiti

<sup>1</sup> Jiarỹ, dohodỹyna matuari mahãduŏ rare. Wabiŏwa-ŏ, Kaio-ŏ watyyriti rewahinyreri. Inatyhymy aluummy watzimahãre.

<sup>2</sup> Waliina, juhuutyhy Deuxu-ŏ arãixitŏedỹnyra aaŏmydỹyna tule aumy wihikỹhykymy mabekemy, iwese atyytyby awire wesele ratxireri. <sup>3</sup> Inyseriŏre wese aribi rehemynyrenyreu, wako relyyrenyre umy iwese kai ŏbitimy tate wese tule inatyhyna-ki tateri wese. Tai wawo reysamy watzimahãre. <sup>4</sup> Jiarỹ raholamahãreu wariŏre wese Deuxu inatyhyna rityhynyreeriki, kia ibutu ratyre wawo riteysadỹnytyhyre.

<sup>5</sup> Kai tahe, Kaio, kowa inyseriŏre tule iwitxira ludu seriŏre teeryŏteki, tewiŏhenanyteu aŏmydỹynana wihikỹ tewinymahãte. <sup>6</sup> Inyboho wirotyra-wana, kia hãbu iny seriŏre aluunamy rarybera. Ibedetỹinana-ŏ biwiŏhenanykeki, aŏwihikỹ biwinymahãke. Tuhyykeki Deuxu deewimy atximahãke. Tii dori iny-wana Deuxu inatyhyna-ŏ raaŏmysỹdỹnykre. <sup>7</sup> Kia dori kianimy rŏhŏnyre. Ityhydỹydukŏdu mahãdu-ribi aŏ ritaŏhykyre. <sup>8</sup> Kia wese tahe tuu rikiwiŏhenanymyhỹke. Tai tahe Deuxu aŏmydỹynana tỹnydỹyna riwiŏhenanymyhỹre.

<sup>9</sup> Ratyyritinmahãre kowa ityhydỹydu mahãdu-ŏ. Inyŏ tahe warybe-ŏ roholaŏmyhỹre. Tiiboho dori juhuludukemy ratxireri. Diŏtesi inire. <sup>10</sup> Aŏu arehemynykreu, ararybekre aŏmybo tii rotỹnyre tule aŏbinamybo rarybere inymy. Aŏ tiihykyle aŏkŏ, iny ityhydỹydu seriŏre hãwãwitxira ludu ixidee tarora-ŏ rimyŏtyhy. Inyŏ kia seriŏreŏ rimykeki, tii riixãwidinyre idy-ribi tii seriŏredyna-ŏ dohodỹydu mahãdu-ribi hitximy riteŏnyre. <sup>11</sup> Waleina, kai Kaio, ŏrarudu mahãdu aŏhebo rotỹnyre wese aŏ kai tate. Iny wihikỹ wese kai tate. Inyŏ aŏwihikỹ riwinykeki, Deuxu hŏrŏ tii rare. Aŏkŏkeki Deuxu rieryŏre. <sup>12</sup> Ibutumy Dimitiu dee inatyhyna-di aŏwihikỹmy rarybere. Inyboho tule. Kaile teeryte inyboho inatyhy rarybere.

<sup>13</sup> Sŏwemy rybe adee ariwahinykemy watzireri. Tahe aŏkŏre tyyriti ritina-ki. <sup>14</sup> Eleelemy arakemy dori watzireri aroramy tai tahe widee rakarybekre. <sup>15</sup> Deuxu awo-ki riirykemy idi watzireri. Abiŏwaboho kaki awehityhy risareri. Wabiŏwaboho sohoji sohoji kowa-ŏ warybe wehityhyna biwahinykre.

## Judas Judas Tyyriti

<sup>1</sup> Jiarỹ Juda rare. Jesuisi Kristu deòdu jiarỹ rare, Txiau exi wahe. Deuxu heka aluudu rare. Tii arayrubunymyhỹre òraruna-txi reseke lau. Tai òbitimy ahãbenyke Kristu nonana-ò. Watyyriti adee rewahinyre. <sup>2</sup> Ruxetòena adee kanakemy watzireri Deuxu-ribi. Ywina sòwemy aworeny-ki atxibenykemy adireny watzireri. Wiluuna sòwemy akireny ihỹke, Deuxu-ribi.

<sup>3</sup> Jiarỹ kaiboho ibutumy aluurenyre. Deuxu ibutumy inyboho ritarenyre. Kia ibutumy ariritinykemy idi rahòtinyra. Inyboho heka ibutumy Deuxu sỹ mahãdu roire. Iwese iny rityhynymyhỹre wese tii iny ritỹnynymyhỹre. Iribi tahe iny mahãduò adee nade iny inytyhyna riwitxiradỹnykemy adireny ratxireri. Iny heka inatyhyna biyrubunybenyke òbitimy rarehyyke.

<sup>4</sup> Kia òbitikõ mahãdu ayreny-ò ralòra. Tiiboho Deuxu rityhynyõre. Deuxu indeereny awi heka rare òraru-ribi iny ritarenyreki. Kia òbitikõ mahãdu tahe kia wese rarybere: —Òraru-di atxikeki, kia aõ aõkõ rare. Deuxu dori iny òraru-ribi ritare. Jesuisi iny wedu rare, iny Iòlò wahe. Tiiboho tule rarybere: —Deuxu bityhynybenyõke. Deuxu ihetxiu rieryre kia wese tiiboho rarybekemy. Tai tahe tii ritỹnynymyhỹre tiiboho bedehetybina-ò riteònyke.

<sup>5</sup> Deuxu inatyhymy riteònykre ritỹnynyraki. Iwese tii ihetxiu iny-di rehure wese, tii wiji iny rehukre. Judeu mahãdu heka Deuxu ritare Egito bede-ribi. Idi tahe imahãduò rityhynyõre. Tai tahe imahãdu rahurenyre. Kia teerytenyete. Itxi òhòtireny reakre. <sup>6</sup> Ýju mahãduò tule juhúu Deuxu deòdumy ihỹre. Idi tahe taaõmysỹdỹna ririre. Tai Deuxu ròtena bedeò-ò riteònyre. Bedeloro-hokỹ ihỹre. Kabederawo-ki roire. Tiu heka iribi riòlòdỹnyòtyhy. Deuxu bededỹnnana riywinymy roimyhỹre aõhòkỹmy isỹdỹnnana-ò. Tai tahe ýju wesemy kia òbitikõ mahãdu rỹike, Deuxu itỹnydỹdumy rỹikre. <sup>7</sup> Ijõ ijyy teeryte. Inatxi hãwã ihetxiu ibinatyhy rare: Sodoma, Omora-wana. Ijõ hãwã tule ibinatyhy rare. Kia hãwã yludu mahãdu ibutumy heka òta òtanale riwinymyhỹre.

Hãbuò dori wiwana rexiòrarunymyhỹre, hãwyy tule wiwana wahe. Tai tahe Deuxu ihãwã rahure. Biu-ribi heòty diteònyde. Idi Deuxu dibedeerynyde òraruna derare tii. Tiiemy aõhòkỹmy dỹnnana riwahinyre. <sup>8</sup> Kia tule òbitikõ mahãdu-ò riwahinyre. Tiiboho dori ibinamy riwinymyhỹre. Aõbinalemy raraykynymyhỹreny, taumyreny risurisunymyhỹreny òraruna-di. Deuxu rityhynyõre tule ýju ruruna-di risinymyhỹreny. <sup>9</sup> Tiiboho Mieli wesemy aõkõ riwinyre Mieli heka Deuxu ýju dinoduò rare. Tii Satanasi-wana wiribi òtumy rarybemyhỹreny, Moisesi umy òraru-ki. Mieli heka ritirỹmyhỹre iumy ridyke lau. Iu Mieli Satanasi-ò rarybereu urihimyo rityhynymy rarybere, ixinohòtidile ritehiòtyhy. Urile rarybere: —Deuxule aratehikre. <sup>10</sup> Kia òbitikõ erydu mahãdu aõbina riwinymyhỹreny. Aõbinalemy tyytyby bede aõmydỹnnanamy rarybere kia rieryõmahã hãrele. Kabede aõmydỹnnanale rierymyhỹre iwese ibutu iròdu mahãdu rierymyhỹre wese. Tiiboho heka iròdu aõna aõna nohòtijuranadile aõna aõnamy rotỹnynymyhỹre. Tai rexihurenyre.

<sup>11</sup> Deuxu heka kia mahãdu kiditynnyke, Kaĩ reòsamy raremyhỹ wese dori reòsareki. Aõbo Kaĩ ixidi riwinykemy ròhòtinymyhỹré heka riwinymyhỹre. Kia mahãdu tule Balaaõ wesemy riwinymyhỹre. Balaaõ nieru sòwemy ritakemy ixidi ihỹmyhỹ. Tai tahe Deuxudeewimy riwinyõre. Tule kia mahãdu Kore wesemy riwinymyhỹre. Deuxu òludumy rexisỹnyre. Tai rexihurenykre iwese Kore mahãdu rexihure wesemy.

<sup>12</sup> Kaiboho wiluuna roxina-ò tebutunyteu, kia mahādu tule ayreny-ò ralòra. Aworana bedehesi tiiboho ribinadỹnymyhỹre òbitimyno rieryòreki. Urile rexihydnymyhỹre, inywitzira-txi tòhòti reaòhyymyhỹre. Iwese yhy debure wese tiiboho roire. Urile yhy biu ridyòtyhy. Ròaòtyhy. Sòwemy taheka relemyhỹre, ihārele aòhomy aòkò namyhỹde. Òwòru bederaty wahidỹỹdu wese tiiboho roire. Iratydikemy ratxireriu, ihārele aòkòlere. Òwòru rubu wese roire tiiboho. Raòromyhỹre, rurumyhỹre. Kia wese heka kia mahādu rare. <sup>13</sup> Kia òbitikò erydu mahādu tiu ele risaòhyymyhỹre. Ahohokỹ aòwetari òbòhòkỹ idi rehumyhỹre wesemy tiiboho inyrenyrene. Iwese òbòbexi-di ròhònomyhỹre wese. Iòraruna òraru-ki aòbina bina iribi ròhònomyhỹre. Tiiboho dori Deuxu inatyhyna ririrenyrene. Iwese taina resemyhỹre wese tiiboho iribi resemyhỹrenyrene. Deuxu kia mahādu-di ritỹnynomy riteònyke bede luruukỹ-ò. Iribi ròhònyòtyhy. <sup>14</sup> Enoi heka Adaò dee yreò rare. Adaò juhū hābu rare. Debòinatxi riòreky-ribi Enoi rare. Enoi Adaò riòre roko rare. Ihetxiu Enoi rarybere wijinabòdu mahādumy. Iwese òbitikò erydu mahādumy roirekre. Enoi rarybere Kristu nonanamy: —Tii kanakre tamahādu sòwe-wana. <sup>15</sup> Idi ibutumy iny ritỹnynomy. Inyò tii taaòhòkỹmyna aòhòkỹmy rotỹỹnykre òraruna òraru-ki. Ibutumy òrarudu mahādu rehukremy Deuxu-my ralahatxinanomyhỹreki. <sup>16</sup> Tiiboho rexirahemyhỹre, tiu reysaòhyymyhỹre, aòdibo tamywimy rabinadỹmyhỹreki ratxikelemy. Rarybenihikỹmyhỹre. Riwiòhenanomyhỹre aò ritamyhỹre xiery.

<sup>17</sup> Waluuna mahādu, òhòtirenny reake aòmybo Wanyrỹ Jesuisi Kristu teòdỹỹna mahādu juhū raryberé. <sup>18</sup> Tiiboho adeereny rarybere: —Bededỹỹnana roomy tahe ijesu kòdòhònykre, ixidee wilemy tuu rotỹỹnymyhỹre. <sup>19</sup> Kia hābu iny wiribihiximy risỹnykemy, bede aòmydỹỹnana luudu mahādu. Deuxu Tyytybytyhy-di aòkò ratximyhỹre. <sup>20</sup> Kaiboho waluuna mahādu aityhydỹỹna-di arurumy bitỹnynnyke, Deuxu Tyytybytyhyna-di bexitòenyberihy. Deuxu luunay-ki iximy boibeke. <sup>21</sup> Wanyrỹ Jesuisi Kristu ruxetòena biraòbenyke. Tii heka umytuedeòna kidiwahinykre. <sup>22</sup> Biwiòhenanomyhỹke ka ritxiònomy rỹira mahādu. <sup>23</sup> Kia mahādu iworonawe-ribi wese bitake. Ijò-ò ywina-di brebuna-di bisỹnykemy taòraruna deramy bekowabenyke. Iòraruna aòna aòna-ò akyrenny reake.

<sup>24</sup> Òraruna lau taruru-di Deuxu arayrubunomy ratximyhỹre. Tii arateòsinykre yramy, tako-ò wowydyna-wana. <sup>25</sup> Wowydyna, àlàdỹỹna, ruruna, Iòlòtyhydỹỹna, iny Deuxu sohoji-ò kanakemy watxireri tule Inynyrỹ Jesuisi Kristu iny tarasadu-ò. Kata juhuuna-ribi, wiji aòu aòu-ò rahyykre. Kie.

## Apocalypse Deuxu heka Joaõ-ò bede ritỹnynyre

<sup>1</sup> Katyyriti-ki tahe bede aõmydỹnana roire. Kia heka Deuxu Jesuisi-ò ritỹnynyre. Idi Kristu Joaõ-ò ritỹnynyre. Aõhebo ele elemu rotỹnykre heka inydeereny riteòsinyreri, teòdu mahãdu wahe. Ýjuõ heka Kristu riteònyre Joaõ-ò ibutumy relyykemy, ritỹnynykemy. <sup>2</sup> Iribi tahe Joaõ ibutumy relyyre. Kaki heka riritinyre. Kia heka ijyy rare. Jesuisi Kristu inatyhyna rare. <sup>3</sup> Inyõ katyyriti-di rariakeki, eysamy ratxireri. Inyõ kiamy roholakeki, eysamy ratxireri. Inyõ kia rityhynykeki, eysamy ratxireri. Bededỹnana dori iòhòmy ratxireri. Kia ibutumy rotỹnyke.

<sup>4</sup> Jiarỹ heka, Joaõ wahe, dohodỹna mahãdu-ò watyyriti rewahinyreri. Debò inatxi reurò mahãdu Asia bede-ki watyyriti rewahinyreri. Ruxetòena, ywina-wana adeereny kanakemy idi watzireri. Deuxu-ribi dori ratxireri, ihetxiu rare, tule tiemy rarekre. Tii dori ruxetòena adee riwahinykre, tule irynana tyytyby riwahinyke, debò inatxi reurò mahãdu wahe. <sup>5</sup> Jesuisi Kristu tule adee kia riwahinykre. Tii tahe inatyhyna ijyydu rare. Tii juhuru rubu-ribi ixixadu rare. Tii ibutu iòlò dinodu heka tii rare. Tii inyluure. Inyòraru iny-ribi tii riwatarenyre tahãlubu òraru-ki. <sup>6</sup> Tii Xiwe wahidỹdu mahãduò ixidee riwinyre, inyboho wahe. Ibutumy ityhydỹdu heka xiwe wahidỹdu mahãdu wese rare, iòlò mahãdu wese wahe. Deuxu rekealàmhyhỹke. Ibutumy wowydyna, ruru-wana heka Jesuisi Kristu-ò rawahidỹmy rarekre ihyy hyymy. Kie <sup>7</sup> Beteheke, tii biuwetykywo-ki naderi. Ibutumy iny tuu robikre. Irubudỹdu tule tuu robikre. Ibutumy iny rahinykre, robukre iòraru-ki. Inatyhy rare. Kie.

<sup>8</sup> Jiarỹ AA rare YY rare. Juhuru ludu rare, tule ikonana ludu rare. Deuxu jiarỹ rare ibutu ruru wahòrò rare. Aõu aõu jiarỹ watxiwãhãre.

<sup>9</sup> Jiarỹ Joaõ rare, aityhydỹdu seriòre wahe. Jiarỹ tule awese aõhebo ratỹnyre. Jesuisi Iòlòna òraru-ki. Patmos bedebute-ki jiarỹ ratxire, ròtena wese heka tai ratxire. Jesuisi inatyhyna dori retỹnynyre. <sup>10</sup> Nobiuotxuõ heka jiarỹ aõma Deuxu Tyytybytyhy wadee dobehede. Iu tahe rybeò-ò raholare, juròna wodỹ wese heka rare. <sup>11</sup> Tahe wadee rarybere: —Biritinyke aõma ibutumy aõbo kai bobikre. Ibutumy dohodỹna mahãdu-ò kia tyyriti biwahinyke. Ka tyyriti tahe biteònyke heka debò inatxi reurò hãwã-ò: Efesu hãwã-ò, Esmirna hãwã-ò, Pergamo hãwã-ò, Txiatira hãwã-ò, Sardesi hãwã-ò, Filadelfia hãwã-ò, Laodisia hãwã-ò. <sup>12</sup> Retehera wahewo-ò mobo wadee rarybereò. Tahe debò inatxi reurò loosòna mynynalemy rabira, womati tỹrỹrỹle wahe. <sup>13</sup> Itya-ki tahe hãbuò wese rare. Ityky urarehe heka ratxire. Iwereysana heka womati tỹrỹrỹ heka rare wyò wòtena-ki roire. <sup>14</sup> Irade iurahakỹ ratximyhỹre. Iruue heka heòty wese rare. <sup>15</sup> Iwa tahe bronze womati wese rare. Irybe wodỹ heka bee ijiranahakỹ wese heka rare. <sup>16</sup> Iruruwe-ribi debò-ki heka taina debò inatxi reurò sòwe rimyke. Irybe mayrehe wiòtxu wese iry-ribi ròhònymyhỹre. Iòsỹny tahe txu tòtee wese heka rare, itỹnytyhyre. <sup>17</sup> Kia ibutumy rabireu, jiarỹ resera bede-ò rubu wesemy. Tii ruruwe-ribi debò watyre-ki ritidire, rarybere: —Buberuòtyhy! Jiarỹ juhuludu rare, ihewoludu rare. <sup>18</sup> Jiarỹ rurure, iribi tahe rexixare rubu-ribi, aõu aõu tahe jiarỹ watzireri. Tiu aruruòtyhy. Rububede dinodu heka jiarỹ watzireri, ityre waruru rare. <sup>19</sup> Biritinyke ibutumy tuu tabita wiji. Tule aõbo idi kanakemy biritinyke. <sup>20</sup> Adee aritỹnynyke aõbo kia ibutumy rare. Debò inatxi reurò

taina heka wadebò-ki rare. Kia taina heka dohodỹỹna mahãdu ŷju wese rare. Loosòna mynyna heka dohodỹỹna mahãdu wese rare.

## 2

<sup>1</sup> Kia heka biritinyke Efesu dohodỹỹna ŷju-ò: —Kaa heka inyõ rybe rare. Tii taina debò inatxi reurò rimymy idi rỹimyhỹ iruruwe-ribi debò wahe. Tii loosòna mynyna yky-ki rariareri. Kia womati tỹrỹrỹhỹkỹ-di relere wahe. <sup>2</sup> Aaõmysỹdỹỹna wiwihikỹ reeryre, awoxierysytere tule. Hãbu bina tiu aitx-erenaõna toite. Inyõ Deuxu deòdumy iximy uritere rybedu, teurihitenyete. Kia iruirybe teerytenyete. <sup>3</sup> Kaiboho tawoxieryterenytenyete. Tule aõhõkỹmy tatỹỹnytenyete waòraru-ki, wijile tule wahe. <sup>4</sup> Kiaremy tahe sohojile wadee ibinare. Iwese juhoo waluu wesemy aõkõ wiji ahãtenyete. <sup>5</sup> Kaiboho heka atyhyna-ribi ahewo-ò taddòsetenyete. Kiaremy ta idi bexinohõtinyinmy bexirãhĩbenyke. Iwese juhoo atximahãte wese, ixityre boibekemy. Kiamy aõkõkeki, aloosòna mynyna ay-ribi aritakre. <sup>6</sup> Kiaremy ta akireny sohojile awire wadee. Kaiboho heka Nikolaita mahãdu iaõaõna widỹỹ derarenyete wawesemy. <sup>7</sup> Iny rybeõ ijohona mahãdu bohohabenyke Deuxu Tyytybytyhy rybe-ò timybo Ityhydỹỹdu mahãdu-ò rarybemyhỹre: —Inyõ òraruna ijesu ritakeki, tamy jiarỹ umytuedeõna ariwahinykre. Kia tahe Deuxu bederaty ritokre, Deuxu oworu-ki rỹimyhỹre wahe. Kia bederaty inyru wahidỹỹdu rare.

<sup>8</sup> Kia heka biritinyke Esmirna dohodỹỹna ŷju-ò: —Kia heka Juhuuludu rybe rare, Ihewoludu rybe rare. Tii rururibile rexixare. <sup>9</sup> Aõhõkỹmy dỹỹnana reerymyhỹre. Uriterenodu wesemy toite. Ihãre tahe aõna aõnawiji ahõrõreny rare. Aòludu mahãdu umy rarybereri ibinamy. Tiiboho Satanasi mahãdu roire. Judeu mahãdu aõkõ roire tiiboho tuu raryberẽhãre. <sup>10</sup> Buberuõtyhy kaiboho! Aõhõkỹmy dỹỹnanaõ kanakre debò wiò txumy wahe. Tahe buberuõtyhyke. Rõtenawo-ki boibenykre. Burubenyke hãrele heka òbitimy biwatyhynybenyke. Iribi tahe irudỹỹna rataana adee ariwahinykre. <sup>11</sup> Kaiboho nohõti-di mahãdu, bohohake timybo Deuxu Tyytybytyhy heka ityhydỹỹdu mahãdu-ò rarybemyhỹre.

<sup>12</sup> Kia heka biritinyke Pergamo dohodỹỹna ŷju-ò: —Kia inyõ rybe rare. Tii mayrehe wiòtxuree dire:

<sup>13</sup> —Jiarỹ reeryre asỹ, ahãwã wahe. Kaiboho Satanasisỹ-ki tasỹnyteri, irynana rareri wahe. Tahe Kaiboho aityhydỹỹna teriõtenyete. Tai tiiboho warybedu Antipasi òbiti rirubunyrehãrele.

<sup>14</sup> Ihãre tahe akireny sohojile wadee ibinare. Ayreny-ki inyõ Balaaõ erydỹỹna rityhynyre. Tii ihetxiu Balake òraruna-txi aatysydỹỹmy ribedeerydỹỹnyre resedỹỹkemy. Tii Israeli mahãdu-ò rarybere:

—Xiwena aõma ide tahe biròbenyke tule òta tahe urihimyo tahe ibinare.

<sup>15</sup> Tule ayreny-ki tahe Niolaita tohodỹỹna ijõreny rityhynyre, timybo rexiòrarunanykemy. Kia ibinare wadee. <sup>16</sup> Tai marybeke tiiboho rexirahĩkemy idi iribi rexixãwidỹỹnykemy. Tukõkeki, anakre warymayrehe wiòtxuree-di iòludumy areakre wou-ki. <sup>17</sup> Iny nohõti-di mahãdu, bohohake Deuxu Tyytybytyhy rybe-ò timybo Ityhydỹỹdu mahãdu-ò rarybemyhỹre: —Inyõ òraruna ijesu ritakeki, tamy biu-ribi rỹsỹna rỹikre. Manauratyre-ki heka nii tỹmyra raritimy roire. Òmo nii rieryõre. Tunidukrele rieryre.

<sup>18</sup> Kia heka biritinyke Txiatira dohodỹỹna ŷju-ò: —Kaa heka Deuxu Riòre Rybe rare. Irue heka heòty wese rare. Iwa bronze womati wese rare.

<sup>19</sup> Aaõmysỹdỹỹna reeryreri, luuna, ywina, tyhydỹỹna, juhoo ratyre wiji aaõmysỹdỹỹna. <sup>20</sup> Kiaremy tahe sohojile wadee ibinare: Kaiboho heka

Jezabel teijemahātenyte. Kia hāwyy dori Deuxumy rybedu ixī-di rare. Ihāre tahe òtaòtamy, xiwe rỹsỹmy rotohodỹmyhỹre, ritxoo hõrõ wahe. <sup>21</sup> Jiarỹ tule txiò reijere òtaòta-ribi ixāwikemy. Tahe tuuõhyyre. <sup>22</sup> Idi herina-ò arilidikre ihābu mahādu-wana. Tai aõhõkỹmy rotỹnyrenykre. Tiiboho kia rexirāhĩnyõrenykeki, tuu ele elemy ariwinykre. <sup>23</sup> Iriòre bina arirubunykre. Tai ibutumy aõwidỹnamyna ityhydỹdu mahādu riwaerykremy. Jiarỹ heka inywo erydu dori rare. Kiaremyta iny sohoji sohoji ariòwinykre. <sup>24</sup> Ayreny-ki tahe inyõ rỹre. Tiiboho bedeeryna bina rityhynyrenyõre. Tiiboho bedeeryna bina rieryõhyyre. Txioinihe, bede ywina sira aõkõ adeereny ariwahinykre. <sup>25</sup> Iwese kaiboho tetyhynyte wese wiji bityhynybenyhyyke. Ele ele dori arehemynykre. <sup>26-28</sup> Kaiboho heka òraruna ijesu bitakeki, adeereny ruru ariwahinykre. Kaiboho ihyemy wadeewimy biwinybenykeki, bede bede dinodu mahādumy boibebenyke, iwese ruru Waha-ribi remyra wese wahe. Tamywikeki womati òhòte-di bede bede mahādu rihukre, iwese butxi ribòhõnyre wese wahe. Tule adeereny ariwahinykre aõma biuràsò taina wahe. <sup>29</sup> Iny nohõti-di mahādu, boholake Deuxu Tyytybytyhy rybe-ò, timybo tii ityhydỹdu mahādu-ò rarybemyhỹre.

### 3

<sup>1</sup> Kia heka biritinyke Sardesi dohodỹna ŷju-ò: —Deuxu Tyytybytyhy debò inatxi reurò dinodu, taina debò inatxi reurò dinodu kia rybe rare: —Aõhebo tatỹnymahātenyte reerymyhỹre. Arumy anireny ratỹnymyhỹre ihāre tahe tarumy ahātenyte. <sup>2</sup> Bexirawahatebenyke ainatyhydỹna-ki, urikõ-ribi kiemy ixāwiheny. Deuxuko-ki awityhymy aõkõ ixī-di textiemyhỹtenyte. Kia reerymyhỹre aõmysỹdỹnareny tewinymahāte. <sup>3</sup> Inatyhyna juhu taholatenytedi, bexinohõtinybenyke. Idi bityhynybenyke aõnanabina-ribi bexirāhĩke. Tukõkreki wasidu wese ierykõmy adeereny anakre. <sup>4</sup> Ihāre tahe Sardesi hāwā-ki inyõ reximymy òbitimy rarekremy ihỹre. Tiiboho wahe-ki tyky lyra urahakỹ-di kanariarenykre kiemy dori òbitimy reximyrenyre. <sup>5</sup> Mobo ròtarenykre, tyurahakỹ-di rexityynyrenykre. Inireny Rutyyriti-ribi aritaõtyhy. Idi Wahakõ-ò wahõrõrenymy aritỹnykre tule iŷjuko-ki. <sup>6</sup> Kaiboho nohõti-di mahādu, boholake timybo Deuxu Tyytybytyhy heka, ityhydỹdu mahādu-ò rarybemyhỹre.

<sup>7</sup> Kia heka Filadelfia dohodỹna ŷju-ò biritinyke: —Kaheka inatyhymy Deuxu deòdỹna rybe rare, òbitimy nodu wahe. Tii Davi ijò rayna dinodu rare. Tii ijò riraynykeki tiu inyõ riratòbònyõtyhy. Tii riratòbònykeki tiu iny riraynyõtyhy. <sup>8</sup> Aõhebo tatỹnymahātenyte reeryre. Akyhynakõmy atximahātenytemy rieryre warybe dori tetyhynymyhỹtenyte. Tai ijò adeereny reraynyra. Tii inyõ riratòbònyõtyhy. <sup>9</sup> Bodoholabenykre. Satanasi mahādu heka Judeumy rexininimyhỹre tukõdu hārele. Idi adidydenykre akoreny-ò tatiowotimy kedeseke. Iu aluurenymy riwaeryrenykre. <sup>10</sup> Aõhõkỹmy dỹnana kanake ibutumy iny urihidỹmy. Kaiboho warybe tetyhynyta, ywina-di tetyhynyta. Tai ilau arayrubunyrenyke. <sup>11</sup> Ele elemy dori adehemynykre. Ahõrõreny biyrubunyke inyõ aribi rawasinyheny arudỹna rataana wahe. <sup>12</sup> Oraruna ijesu inyõ ritakeki. Tii ixyby rubumy ruruõkre. Tii Deuxu heto-ki rasỹnyihyykre. Deuxuni ityre raritinykre tule Kristuni tỹmyra wahe. Jerusalēni tỹmyra tule ityre raritidỹmy rỹkre, biu-ribi dobehede wahe. <sup>13</sup> —Iny nohõti-di mahādu, boholake Deuxu Tyytybytyhy rybe-ò timybo ityhydỹdu mahādu-ò rarybemyhỹre.

<sup>14</sup> Laodisia hāwā dohodỹna mahādu ŷju-ò heka biritinyke: —Kie rybe kaa rare. Tii inatyhyna inatyhy rybe rare. Tii Deuxu-wana bede relereu,

ratximyhÿ. <sup>15</sup> Aõhebo tatÿÿnymyhÿtenyete ibutumy reeryre. Ainatyhyna-ki inatyhymy aõkõ, txiõlemy aõkõ toite tule. <sup>16</sup> Tai tahe iòraru-ki ixi-ribi aratarenykremy rexinohõtinyre. <sup>17</sup> Kaiboho tarybetenyte: —Waaõwiwi-di roire. Awityhymy watxirenryeri. Wadeereny aõ rasiranyõhyyreri. Idi urile texibõnytenyteri. Kaiboho dori abina, iaõkõ mahãdu, adehekÿ, aruety toite. <sup>18</sup> Kia aratohonykre: —Waribi womati tÿrÿrÿhÿkÿ aworibityhy biõbranykre, aityhynamy wiwihikÿ. Tasÿse tyyurahakÿ tule, ade wõtenamy. Tasÿse rueluahina tule, arue ywinamy. <sup>19</sup> Waluuna mahãdu òhòte-di aribedeernymyhÿre warybemy tule. Tahe eryrewemy aõsusu-ribi bex-itabenykre wadee. <sup>20</sup> Bodoholabenyke. Ijõ-ki rarymy watxireri. Inyõ roholakeki ihetowo-ò aralokre. Tai tii-wana ariroxikre. <sup>21</sup> Òraruna ijesu inyõ ritakeki, tii wawana waryna-txi ronykre iwese jiarÿ waha-wana nadonymyhÿde wese. Rõtare dori wawouna-ki. <sup>22</sup> Iny nohòti-di mahãdu, boholake Deuxu Tyytybytyhy rybe-ò, timybo tii ityhydÿÿdu mahãdu-ò rarybemyhÿre.

## 4

<sup>1</sup> Iribi tahe biu-ki ijòmÿ rabira rasina wese. Rybeõ raholare, jurònajurò wesemy. Iwese wadee rarybere wese. Kiamy narybede: —Mana òwònyke, aõhebo itxõmo rahudi rotÿÿnykre ini ariteòsinykre. <sup>2</sup> Iule tahe Deuxu Tyytybytyhy riwamyre. Iu, inyõ rynanamy rabira biu-ki. <sup>3</sup> Iòsÿny heka roosònymyhÿre womatiwihikÿ rÿsÿ wese, Jaspe wesena, Sadonio wese. Uwajiõ wixira tÿre heka rare iryna rirurawonyre. <sup>4</sup> Tahe 24 ryna iryna rirurawonyre. Ityre tahe 24my wedu mahãdu ronyre tyyurahakÿ-di. Irati-ki womati tÿrÿrÿhÿkÿ-di rarataanany. <sup>5</sup> Biudelaa, biumyta, irynana-ribi dohonyde. Heòtyloo heka debo inatxi reuròmÿ sòwe iko-ki rÿire. Kia heka Deuxu Tyytybytyhy tuu sòwedu rare. <sup>6</sup> Tule iko-ki mana aho roire iuramy raurananyre. Irurawona-ki wiòwiò-ki aõni inaubiòwa rãire, irue sòwe ihewo-ki, iko-ki. <sup>7</sup> Aõni delena heka hãlòehékÿ wese rare. Ijõ heka karòtihikÿ wese rare. Ijõ tahe hãbu òsÿny wese rare. Ikonanareny tahe nawiihikÿ dowòmÿ nade wese rare. <sup>8</sup> Ibutumy tiiboho debò sohoji reuròmÿ tesòwereny. Ta tiiboho tetya wirawyò rawyò irue dire. Tahe tiiboho rexielehynyõhyylemy txumy rummy rawiunymyhÿ: —Òbitityhy tate, Òbitityhy tate, Òbitityhy tate Inynyrÿ Deuxu rurutere. Kai tate, tule kai mabekre. <sup>9</sup> Kia heka inaubiòwa boho rawiunyre: —Wowydyna, àlàna-wana rynana-ki rÿdu-ò, iki kiemy nodu-ò wahe. <sup>10</sup> Iu tahe 24 wedu mahãdu heka tatiowotimy taòsÿny sutxi ritidimy riwowydynymyhÿreny resemÿ iko-ò. Tamy tarataana-di rehumy raryberenyre. <sup>11</sup> —Wadinodureny, waDeuxureny adee sohojile heka wowydyna, loosòna, àlàna rawahike. Ibutumy dori aõna aõna tewinyte. Adeewimÿ rÿimyhÿre idi rariamÿhÿrenyre.

## 5

<sup>1</sup> Ryna-ki rÿdu ruruna debò-ki heka tyyriti werywery wesemy rabira. Tyyriti tahe wirawyò rawyò-ki iriti dire, tii debò inatxi reurò iratòbòna sòwe. <sup>2</sup> Ýju ruru ruruhukÿ-my ryrymy dÿÿraxi-di: —Mobo ityhykre tyyriti ratòbòna aresydÿÿdukre iraydÿÿ-ki tule. <sup>3</sup> Tai tahe inyõ ijõhyyre: —Biu-ki, bede-ki, surawo-ki ijoõhyyre. <sup>4</sup> Inyõ ityhyòre iraydÿÿ-ki tamy itxere-ki. Iòraru-ki ta urile jiarÿ rahinymyhÿre. <sup>5</sup> Iule tahe matuariõ wadee narybede: —Hiõmyke, betehe ta inihe Juda mahãdu hãlòehékÿ-ò, Iòlò Davi iriòre riòre wahe. Tii dori tyyriti ratòbòna riorokre idi riraynykre, tii sohojile dori wou-ribi rõtare. <sup>6</sup> Kiamy tahe rabira, Budoeni Riòre wahe. Tii rynana ubey-ki rÿimyhÿ. Aõni

inaubiòwa ijõre. Tiiboho-wana tahe matuari mahãdu rỹire. Budoeni rurure wesemy rỹire. Iò tahe debò inatxi reurò rare. Irue tahe tule. Kia rare Deuxu Tyytybyõ rare, tii bede bedemy nodu mahãdu. <sup>7</sup> Budoeni riòre tahe rynana-ki rỹdu ruru debò-ribi ditade, aõma tyyriti wahe. <sup>8</sup> Iule ta aõni inaubiòwa, 24 matuari boho-wana tatiowotimy rejure budøeni riòreko-ò. Tii sohoji sohoji wiuna-di, womati tỹrỹrỹhỹkỹ hyna-di ratximyhỹreny. Sohoji sohojiro-ki tahe òwòrusõ wydysilỹnywi-di wese rare. Kia Deuxu tyhydỹỹdu mahãdu ixitòedỹỹna violão wese tule ratximyhỹreny. <sup>9</sup> Tiiboho wiutỹmyramy rawiunymyhỹrenyre kamy wahe:

—Kai atyhy tate Tyyriti raydỹỹ-ò, iratòbòna eresydu tule. Arubumy heka Deuxu-ò Ixỹju ixỹju teõbranyte. Irybe wixira wixira, ibede wixira wixira iixỹjuna tule.

<sup>10</sup> Iòlòmý tewasynyteny Deuxu dee tule xiwena wahidỹỹny mahãdu wahe. Idi hãwã hãwã ariwedunyrenykremy. <sup>11</sup> Ýju sówetyhymy rabira rynana werora-ki, aõniboho matuariboho tule. Miliaõ hõkỹmy rasõwerenyre. <sup>12</sup> Tiiboho rirajuahakỹmy rawiunymyhỹrenyre: —Wowydyna, ruruna, deysana, àlàna, loosòna tamy sohojile rawahinyrenyke budøeni riòre-ò. Tii dori rurure ityhymy <sup>13</sup> Tai tahe ibutumy biu iròdu iròdu, suityre iròdu, bera iròdu iròdu ibutumy aõna tule rawiunymyhỹrenyre rynana-ki rỹdu-ò. Budoeni riòre-ò tule kia rawiunymyhỹre. Rarehykyle, rarehykyle heka rarekre. Kie. <sup>14</sup> Aõni inaubiòwa rirawyònyre: —Kie, Matuari 24 tahe reserenyre iko, kiemy noduko-ò.

## 6

<sup>1</sup> Tahe Budoeni riòre heka tyyriti ratòbònaõ riòròre. Kiamy rabire. Tule aõni inaubiòwa mahãdu-ò narybede rybenihikỹmy biummyta wodỹỹ wese. Mana ini itxeremy. <sup>2</sup> Tai retehere awaru urahakỹmy rabire. Tairỹdu iwaxiwahate dire. Tamy irudỹỹna rataana riwahinyrenyre. Tahe rare wou ròtakremy.

<sup>3</sup> Tahe ijõ ratòbòna riorore. Ijõ aõni tahe narybede inatxina wahe: —Mana ini itxeremy. <sup>4</sup> Idi awaru sòhòkỹ ròhònyre. Inyõ ityre rỹdu-ò ruruna riwahinyre, wou ritelenykemy bede bedemy. Tai hãbu mahãdu wii rahukremy. Tule inyõ mayrehe ityre rỹdu-ò riwahinyre.

<sup>5</sup> Tahe inataõna ratòbòna riraynyre. Ixyby inataõna aõni rybe-ò raholare: —Mana ini itxeremy. Tai retehere. Awaru lybmy rabire, ityre rỹdu urihina-di tebò-ki. <sup>6</sup> Tahe aõniy-ribi rybeò-ò raholare: —Womati nieru sohoji-di heka urihina sohojile heka trigo rawykre, txusohoji aõmysỹdỹỹna òwy wahe. Tule inataõ urihina sevada rawykre, txusohoji aõmysỹdỹỹna òwy. Uritere ta uva-ò, adỹỹ-ò aõhe isỹdỹỹõmykre.

<sup>7</sup> Tahe inaubiòwana ratòbòna riraynyre, Budoeni riòre wahe. Ixyby inataõna aõni rybe-ò raholare: —Mana ini itxeremy. <sup>8</sup> Tai retehere. Awaru bisamadòbòlỹre wesemy rabire. Ityre-ki rỹdu heka Rubu inire, heòty bede rubunana iheludumy. Inyõ ityre rỹdu-ò ruru riwahinyre. Tai ròhònyre iny rirubunykremy. Inaubiòwa iny-ribi heka, sohoji rirubunykremy. Wou-ki, rama desemy, rubutyhy-di, iròdu debure-di heka iny rurure.

<sup>9</sup> Tahe iruyrena ratòbòna riraynyre. Tahe Xiwena wahedỹỹna rawo-ki iny mahãdu rabire Deuxu rybe òraru-ki, tatyhydỹỹna òraru-ki rururenyre mahãdu wahe. <sup>10</sup> Tiiboho rirajuamyhỹre: —Deuxu Inynyrỹhỹkỹ, kai tyhy tate, òbiti tule. Tiu wexi waòwyreny bilidikre, warubudỹỹdureny-ò? <sup>11</sup> Tahe iximynamynamy tyyurahakỹ-di rexityynyrenyre. Tahe tamyreny rarybere urihimyo rexielehinyrenykre. Ijoiireny iwesereny rurukreu riraõrenykremy. Isõwereny rexihureu wahe.



<sup>12</sup> Tahe debò sohoji reuròna ratòbòna riraynyre. Kiata idi suu ramytywatare inihikỹmy. Txuu urile rurunyre, ahãdu isòmý relere, halubusò wese. <sup>13</sup> Taina tahe sutxi dejujude iwese bederaty yhydebore ritxiwimyhỹre wese. <sup>14</sup> Biu titxibo ikõre, iwese tyyriti rarasemyhỹre wese. Ibutumy hãwãlò bedebute tule taherina-ribi ratare. <sup>15</sup> Iu tahe ibutumy iny rexiwore hãloohokỹwo-ò, manahakỹ hewo-ò tule. Tii roire Iòlò mahãdu, bededinodu mahãdu, soldado dinodu mahãdu, ityhy mahãdu irurutere mahãdu, ibutumy ijõ mahãdu rexiwore. <sup>16</sup> Tahe taixiwotena-ribi rirajuamyhỹreny: —Waxireny mana heka bedesede rynana-ki rỹdu lau rekexiwòrenykemy. Budoeni riòre debure lau tule. <sup>17</sup> Deburena txu, kyarana txu heka reare tamy, mobo riijekre.

## 7

<sup>1</sup> Idi tahe inaubiòwa ýjumy heka tuu rabire. Tiiboho heka inaubiòwa bedehitxihitxi bedemy rỹire. Tahe rimyreny yhyhykỹ tebò-ki heka rimyreny. Tiu heka òwòru radeõ raykỹhyky roire. Bede-ki aõkõ, aho-ki aõkõ rebònyra? <sup>2-3</sup> Tule ijõmy rabire ýjuõmy ibryra-ribi rarerimy. Deuxu irumy nonadu hãletena nihikỹ widỹña heka diwymy idi nade. Iribi tahe inaubiòwa ýju-ò tii rryre: —Txiokre inihe. Iwotõmodỹõmyke wa suu, bee, òwòru. (Kia ýju mahãdu dori, bede, bero, wotõmodỹõdu mahãdu ihỹre.) Biraòriòreke heka Deuxu hãletena deòdu òru-ò aritidikre. <sup>4-8</sup> Tiwesebo kia ritidỹña rimymy idi rare. Tahe raholare heka jiarỹ tiweserebo. Ta 144.000 iny ibutumy. Israeli ijoi waðinatxi reurò kia ijoimy heka ixidee rimyre. Sohoji sohoji ijoi-ribi 12.000 inymy heka rimyre: Juda ijoi-ribi, Gade ijoi-ribi, Asser ijoi-ribi, Naftali ijoi-ribi, Manases ijoi-ribi, Simeaõ ijoi-ribi, Levi ijoi-ribi, Issacar ijoi-ribi, Zebulõ ijoi-ribi, Jyje ijoi-ribi, Benjami ijoi-ribi, Kia ibutu ijoi-ribi heka 12000 inymy rimyre.

<sup>9</sup> Iribi tahe sòwemy inymy rabire. Timy heka idi wariramahãduõkre. Ibutu 12.000 hãwã hãwã-ribi wirotyre. Bede ibutu rybe witxira witxira rybedu ibutu ijoi witxira wahe. Tai tahe Budoeniube-ò tiiboho rotamanyreny. Budoeniko-txi ryanako-txi wirotyre. Ibutumy tiiboho ityyurahakỹlemy roiremy. Horeni iru-di heka roiremyhỹ. <sup>10</sup> Tahe rryreny —irariemy rryreny: —Biu-ò hena waDeuxu-ribi nade rynana nihikỹ-ki ronyreri. Tule Budoeni-ribi nade. <sup>11-12</sup> Tahe ýju ibutumy heka widotyde ryanawerora-ò, tule matuari mahãdu tule iwo-ki. Inaubiòwa aõni ibutumy resereny rynana nihikỹko-txi resere taòsana sutxi ritidimy Deuxu kia wowydynamy relere. Kie, myheka rarybere: —Wowydyna, Bedeerydỹña, deàlana, loosòna, aruru, aixiòlòdỹña. Ibutumy heka kia kanakre inyDeuxu-ò. Rarehykyle, rarehykyle heka rarekre. Kie. <sup>13</sup> Tahe wawì inaubiòwa matuari mahãduõ wadee rỹraxire: —Kai aõbo teerymahãte kia tykyurahakỹ-di ratxirenyreriõ, tule tiribibo ròirerí? <sup>14</sup> Tahe rarybere: —Aõkõre wanyrỹ, reerykõre. Bedelyyke wako. Tahe wako tuu delyyde. Kia heka dòhònyde heka aõhòkymy dỹñnana-ribi dòhònyde rare. Ityky rityranyre heka Budoeni riòre hãlubu-di. <sup>15</sup> Taiki heka rynana nihikỹko-ki ratxirenyreri Deuxuko-ki. Kaha heka ruu, txuu-wana heka rããhimy ratximyhỹreny taheto bededỹñnana-ki. Kia rynana-ki rỹdu tahe riyrubunyrenykre. <sup>16</sup> Tiu rama rirubudỹñnyõmy heka bemomo boho. Tiu txutòteehekỹ-wana wirisỹnyòtyhy ybòtò boho-wana, txutye boho-wana. <sup>17</sup> Budoeni riòre dori rynana nihikỹko-ki ratximyhỹre. Tii heka aryña adee riwahinymyhỹkre. Tii heka adi itxeredukre heka aradykre heka Umyituedeõna ube-ò. Deuxu irube rirubudỹñnykre.

## 8

<sup>1</sup> Budoeni riòre debò inatxi reurò hãletenamy ribòhònyreu, aõdee biu-ki

roholaõhyyre heka byy, myle roire: aõwodỹỹ wodỹỹhomy aõkõ. Wadee meia hora txумы bedemy bede rewyre. <sup>2</sup> Debò inatxi reurò ýjummy tuu rabire Deuxuko-ki nyidemy. Tahe inyõ tamy riõremy idi retehere debò inatxi reurò ajurõnamy.

<sup>3-4</sup> Tahe iwitxira ýju nade. Tii womati tỹrỹrỹhỹkỹ atara nihikỹ. Tahe xiwenatyre orarade rỹny wihikỹ ritoonyre. Inyõ riwahinyre ýju-dee sõwemy. Riurinykemy Deuxu ijoi ixitõedỹỹna-wana xiwenatyre-ò risõkemy aderõna rỹnyrehekỹ heka womati tỹrỹrỹ xiwenatyre-ki ritxiwire Deuxu ryanako-txi. Ýju iribi tahe kia ibutummy raõwõnyre Deuxu-ò. <sup>5</sup> Tahe heõty-di heka ýju atara ritỹxinyra idi heõty-di rehure biu-ribi bede-ò. Tai tahe biumytxi ramytxynihikỹnyre heka suu biu tawe rihetenyre rybe wese wodỹỹ ramytatare.

<sup>6</sup> Tahe debò inatxi reurò ýjummy heka rexiywinymy rỹire ajurõna-di jurõnykremy.

<sup>7</sup> Juhu ýju heka rurõnyre. Iribi tahe bedejutytyhykỹ heõty hãlubu-wana raurinymy bede-ò rejuxunyre. Bedejura tahe roomyhỹ asirade, bedero-wana inataõ-ribi, sohoji roomyhỹ.

<sup>8-9</sup> Iribi ihewoludu txurõna-di rurõnyre. Tahe berahakỹ-ò resere hãwãlò nihikỹ wesemy. Tai ibutummy heõtylawò txuramy ituere. Iyre bee tahe hãlubuhukỹlemy relere. Iyre utura tahe ituere.

<sup>10</sup> Tahe ihewoluduhe txurõna-di rurõnyre. Iribi tahe tainahakỹõ berohokỹyre-txi resere berayre-txi tule. <sup>11</sup> Tainahakỹ heka ihyre inire. Tahe sõwemy iny ituere ihyre bee riurinyreki.

<sup>12</sup> Tahe ihewotyhy tyaludu txurõna-di rurõnyre. Tahe aõwesele txutyemy txuu roosõõhyyre. Tahe ahãdu tawekremy turutyhy inihe relere taina tule. Tahe bederurunytyhyre heka.

<sup>13</sup> Tahe idi retehemy jiarỹ rãiwãhã. Tahe tuu rabire nawii nihikỹõ ruõmy ratxireriõ. Tii iryru-di heka rarybemyhỹ: —Bede heka rabinakre. Bede heka rabinakre. Suludu bede iny-ò ryrymyhỹ: —Txioinihe sõwemy aõbina binahakỹ rexiõtỹmyranykre. Tahe hewotyhyludu ýju txurõna-di kudurõnykreu heka bede rabinatyhykre.

## 9

<sup>1</sup> Ijõ ýju tajurõna rurõnyre. Tii heka iruyre hewoludu rare. Tahe ijõ inymy rabire. Biu-ribi suò taina resere wese tii resere. Tamy ijõ raynaõ diwahinyde, hãloo nihikỹ ratõbõna rayna wahe. Hãloo nihikỹ heka irehehekỹ rare. <sup>2</sup> Tahe riraynyre. Wãdãsi iribi tahe dõhõnyde. Iwese tahe bede rurunyre wawerorareny-di. Txuu, ibutummy rurunyre wãdãsi lybyhykỹ òraru-ki. <sup>3</sup> Tahe seihikỹlyby wese heka wãdãy-ribi dõhõnyde tahe desede suò. Seihe heka itytibòròhòkỹ wese heka ihe rare. <sup>4</sup> Asi rubudỹỹõmykre bederaradeõ tule, òwòru tule. Inyõ Deuxu kia ritidỹỹna iòru-ki rỹiõkeki, tahe tule tamy ijira rỹikre. <sup>5</sup> Iny rubudỹỹmy aõkõre. Tahe iny aõhõkỹmy rotỹỹnykemyre heka iruyre ahãdumy. Aõhõkỹmy rotỹỹnymyhỹre kia ihe juberereri riijererimy ihỹre. <sup>6</sup> Kia txuu tahe ixirubudỹỹmy reamyhỹre. Tahe aõkõre heka timyhe ixirubudỹỹkõmy tamyhe rubu dehemynyõhyymyhỹde. Tukemy heka riwisỹnymyhỹre. Tahe aõkõre rubu iribi rahenymyhỹre. <sup>7</sup> Seihikỹ heka awaru wese rare. Iwese awaru rexiywinymy wou-ki ralòkremy rỹimyhỹre wese heka rare. Irati-ki rỹire womati tỹrỹrỹhỹkỹle irataana wahe. Iõsana heka iny òsana wese rare. <sup>8</sup> Irade irehehekỹre hãwyw radehekỹ wesele. Txuu tahe leaõ juhukỹ wesele rare. <sup>9</sup> Wyhy itxena ibreti-ki roimyhỹre. Womatile ibreti rare. Bede heka urile rawodỹỹnyhỹkỹmyhỹre. Iwese tewe awaru-di nodu sõwe iwodỹỹ rare. Iwese aõbina-ò rajaramyhỹre wodỹỹ wese wahe.

<sup>10</sup> Seihikỹ heka bòròhywe nihikỹ wese heka rare. Tahe iruru-di rare. Iny riwotòmonymhỹkemy iruyre ahādumyhỹmy. Iherona ramytxytxyre iruyre ahādumyhỹmy. <sup>11</sup> Iiòlò heka hãloo rahejihikỹ wedu heka rare. Ini heka hebreu rybe, Abadu rare. Grego rybe heka, Apoliõ heka rare. Iny rybe heka iny hàdu hàduhukỹ rare.

<sup>12</sup> Juhuu bedebinahakỹ ituera ròhònrya. Katahe ijõ iwitxira kòdòhònkyre inatximyhỹmy wahe.

<sup>13</sup> Ijõ ýju tajuròna-di rurònrye. Tii heka debò sohoji hewoludu rare. Raholare heka rybeõ-ò. Womati xiwena-ò-ribe ròhònrye. Xiwena-ò heka inaubiòwa sòwe. Kia womati tỳrỳrỹ xiwena heka Deuxu ryanako rỹire.

<sup>14</sup> Kia ýju-ò heka rarybere ijuròna dinodu wahe: —Inaubiòwa ýju besedỹnyke ixinamy ròhònkye. Tii heka Bero nihikỹ ròtena-ki, bero Eufratesi-ki. <sup>15</sup> Tii heka ròtena-ki ratximyhỹre kia bededỹnanau, kia txuu, kia ahãduu kia beòrau. Iribi tahe riòlòdỹnyrenyere. Iribi tahe ihewoludu iny ibutumy rahure. Iyreyre inataõ hãwã jurajuramy heka rahure. Inataõ jura-ribe sohoji sohoji rirubunyere.

<sup>16</sup> Tahe jiarỹ raholare tiweserebo aõbinadumy rỹire. Iny 200.000.000 inymy rỹire. <sup>17</sup> Tahe aõbinadumy rabira awaru tyre ronyreri. Awaru tyre ludu tahe iwyhy itxena dire. Ibutumy wako-ki rỹire. Ibutumy rabire. Womatihikỹle, heòtyhykỹwesele heka rare. Ijõ heka tỳreura rare safira wese. Ijõ tahe tỳre raramadòbò wesele. Awaru rati heka leaõ ratihikỹ wesele rare. Heòtyle iry-ribe ròhònryeri wàdàsi enxofre-wana wahe.

<sup>18</sup> Kia heòty heka inataõ jura-ribe sohoji jura iny rahure. <sup>19</sup> Tule awaru nohewòru heka iruru dire. Iryribile tahe iheòty ròhònrye. Taile iruru rare. Hemylala rati wese dire ruròmny heka inatxi hemylala juwesele. <sup>20</sup> Iny ituere sỹtybymy tahe rarònyere. Deuxu deàlana dee heka reòbyòhyre. Diabo mahãdu luulemy ratximyhỹnyere. Aõma rityhynyrenyere womati tỳrỳrỹhỹkỹ ritxoo, òwòru ritxoo suritxoo, mana ritxoo. Kia ritxoo heka aõki robiòhyymyhỹre, aõ roholaòhyymyhỹre. Rariaòhyymyhỹre. <sup>21</sup> Iòraru-ribe roxirãhiòtyhy iribi tahe rahòtynyrenyere aõ òtaòtamy, rubudỹnyamy, wasinamy, òwòrumy. Kiale ròhòtynyrenyere.

## 10

<sup>1</sup> Tahe iwitxira ýjuhukỹ rabira biu-ribe suò robehererimy. Biuwetykywesehekỹle iweroramy rỹireri. Tahe owaji wese iratikile roireri. Iòsỹny tahe txuwewehekỹle, iwaube tasỹ heòtyhykỹwesele roosòmny. <sup>2</sup> Tii heka tyyritinadile debò ritỹtenymy ratximyhỹ. Tahe itỹte heka deboube-ki roimyhỹre. Tahe tawaube ruruludu heka betye ritidimy idi rỹire. Tawahyweludu tasỹ ityti-ò ridemy idi rỹire. <sup>3</sup> Tii ryryre heka tarurumy. Leaõ iràhàkỹwesele ryryre. Iu tii rarybereu, debò inatxi reuròmny heka ramytxynymy dirawyònyde.

<sup>4</sup> Tahe riritinyre heka aõmybo timykira raryberenyre wahe. Tahe rybeõ-ò raholare: —Kia widỹyòmny. Kia rybe hewa ierysyna aõkõ rare ixinamy tahe tuu roike. Biritinyòke aõmybo ramytxyna rarybere? <sup>5</sup> Tahe ýju suki ratxireri, beki ratxireri ruru ludu debò biu-ò riteòsinyre: <sup>6</sup> —Deuxu-ribe heka tuu raryberé, warybemy inatyhymy. Deuxu heka tiemy rarehyyle rare. Ibutumy heka riwinyre biu-ki rỹira bede-ki rỹira-wana. Tai heka warybe inatyhymy rare. Ararybekre heka raroorehenyòtyhy kaki. <sup>7</sup> Debò inatxi reuròna ýju tajuròna ritxurònykreu heka, Deuxu ibutumy relemy rỹikre iwese rarybere wese. <sup>8</sup> Iribi tahe rybe biu-ribe wadee nade. Wadee rarybere: —Biòryke hewa tyyritina ýjudebò-ki naderí suki bera-ki kia rỹireri. <sup>9</sup> Tai tahe tamy rehemynyre iòhòmny tyyriti tamy rexitònyere. Tahe wadee rarybere: —Biwyke. Birỹsỹke. Juhuu tahe bidi wesemy ary-ò bidekre. Birỹsỹkreu

tahe ibutumy rahyrenykre awo-ki. <sup>10</sup> Iribi rewyrā rerỹsỹra. Iwese tii juhūu rarybera wese rare. Ibreere juhūu. Iribi rerỹsỹreu tahe, wawe rubererenyre. <sup>11</sup> Tahe wadee rarybere: —Kai heka dohodỹmy makre ixityre ibutumy inywitziramy heka botohodỹkre. Ibutumy inywitzira witzira-my botoho. Ibutumy rybewitzira witzira botohomy. Ibutumy iòlòmý botohodỹkre.

## 11

<sup>1</sup> Iribi tahe inyõ wadee diwahinyde urihixinaõ. Wadee rarybere: —Biurihikesỹ titxibo Deuxusỹ rỹimyhỹré. Iwo tule xiwena wahidỹna biurihike. Idi mariake tiwesebo iny iwo-ki rỹirémy. <sup>2</sup> Tahe ahana-ki iube idi riraõmyke. Tii dori ityhydỹdukõdu mahãdu dee wahisidỹna rare. Tiiboho dori 42 ahãdumy idi rariakre. <sup>3</sup> Jiarỹ dori inatxi rybedu idi watxiwãhãre. Tamy ruru ariwahinykre. Tii heka saumytkyle rariakre. Tii heka rybe ritỹnynykre beõra inataõ weeremy. <sup>4</sup> Rybedu inatxi heka bederaty òwòru inatxi wese rare. Tahe tule inatxi loosõna mynydu wese heka rare. Kia Deuxuko-txi rỹire wese heka rare. <sup>5</sup> Inyõ idi ibinamy riwisỹnykeki, tahe ixirubudỹmy rorukumyhỹre. Heòty iryribihikỹle ròhònyke heka iny rirubunyke. <sup>6</sup> Tii heka irurudire biu dejuxu lau riekemy. Tahe tiu biu reseõtyhy heka inataõ beõra weeremy wahe tii Deuxu rybemy rarybereri wahe. Ihãre tahe tii rexirahòreke bero nihikỹmy aho nihikỹmy hãlubumy rexirahòreke. Ihãre tahe ibutudee bina riwahinyke, rubuna riwahinyke tiiboho awimý tai raharenykeki. <sup>7</sup> Kia heka inataõ beõra weere rikonananykeu, rybe tỹnydỹdu inatxi rikonananykeu, hãloo rehe nihikỹwo-ribi aõni kòdòhònykreu, tahe aõbina nihikỹ-ki heka iu rỹikre. Tahe inatxi rybedu rirubunykre. <sup>8</sup> Iumy rubu tahe hãwãry-ki roikre, tibo inyry rirubunyrele. Rawesenanyre, kia hãwã arininikre Sòdõma ada Egitto wese. <sup>9</sup> Inataõ txuu weere riwydi hãwã ube-ki iumy rubu roikre. Inyõ heka tiu rituunyõtyhy. Ibutu iny hãwã hãwã-ribi ibutu rybe witzira-ribi heka tamy itxeremy rehemynykre. <sup>10</sup> Ibutumy heka iny teysamy rỹikre urile iny widee aõna aõnamy riwahinymyhỹkre. Tiiemy inyõ raaõmysỹdỹõtyhy kiatxuu. Tai heka tahõti heka itxi reakre kia inatxi rybedu rurure tahõti itxi reakre. Lisini heka rỹikre, worana bedehesi. <sup>11</sup> Kia txu inataõ txuweere-di, iumyreny iruna kòdòòsekre tamy Deuxu-ribi. Tiiboho lamamy rotamanykre. Iny rarokonykre heka ruberu nihikỹmy rỹikre heka. <sup>12</sup> Inatxi rybedu-ò heka rybetereõ biu-ribi nade: —Kaiboho bòdòibedenyke kaò. Tahe biuwetyky raòwònyrenykre kia iòludu mahãdu idi retehemy rỹireri yrubule. <sup>13</sup> Kiaule tahe bedede ramytatakre. Debò wiò heto jura jura-ribi heka sohoji resere. Tahe 7000 inymy rurure. Tahe iny rarokonykre tahe iuhe ruberu nihikỹmy rỹikre. Tahe wowydyna riwahinykre Deuxu biu-ki ratximyhỹreò.

<sup>14</sup> Inatxina bedede dỹnana bina tahe ròhònyre. Tahe ijõ kanakre.

<sup>15</sup> Debò inatxi reurò ýjumy heka juròna rurònyre. Tahe sòwemyhe iny rarybemy rỹimyhỹ, ryrymy rỹimyhỹ: —Kia bedede dỹnana, iòlòna, inyryrỹ hõrõ rare. Kristu hõrõ rare. Aõu aõu tii ibutu ibutu iòlòmý ronykre.

<sup>16</sup> Wawiò inaubiòwa matuari tahe, rynana-ki ronyrenyleri Deuxuko-txi. Tahe Deuxuko-txi reserenyre. Wowydyna tamy riwahinyrenyre:

<sup>17</sup> —Kai Deuxu, tuu tate ihyymy, ibutururu ratyare aruru rare. Aruruteremy bonykre bedede dinodumy. Umy reàlãmý kia-ò.

<sup>18</sup> Iny heka ibutumy alau ruberumyhỹre ibutumy òludumy rỹire, adee deburemy rỹimyhỹre. Rubu hitxidỹna heka bedede reamy heka roire. Eòdurenyle heka riòwynykre, aijoi riòwynykre, rybedu mahãdu wahe. Ibutumy ani rityhynymy rỹira, nihikỹ iyja-wana, kia bedede huduhukỹ rare. Ibededỹnana reamy heka roire.

<sup>19</sup> Biuwetty riraynyre Deuxu heto. Ibutumy heka lobidÿÿna tyyriti hyna iwo-ò iny robimy rÿire. Iu tahe biumytxi, biudelaa ibutu yhynihikÿ, ibutumy bede ramytatamy rÿire, berahakÿ tule resere.

## 12

<sup>1</sup> Iribi tahe ròhònyre warasina-ki aõbo. Aõhebo bede ritÿÿnykremy, biuwetty-ribi hãwyyõmy rabire. Txuu wese tahe itykyra. Tii lamamy rÿire ahãdu tyre. Tarati tyre-ki tahe tainahakÿ rataana idi rÿire, waòinatxi taina wahe. <sup>2</sup> Tii heka bòtòmy ihÿmyhÿ. Ryrymy heka txubrere riijemy tabededÿÿnana-ò resera uladu reakremy. <sup>3</sup> Iribi tahe aõna aõna biu-ki rexisÿnymy, aõni hemylalasò nihikÿ wese wahe. Irati tahe debò inatxi reurò sõwe iratimy. Debòwiò sõwe heka iòmy. Irataana heka iratimyna myna rÿimyhÿre. <sup>4</sup> Tii tahe tõhewòru-di taina ributunymy ridyre. Bede tyre-ki idi rehure, taina juràõ. Tii hãwyyko-txi rÿire. Uladu reakreule tahe uladu riròkremy. <sup>5</sup> Tahe tohouã reare, hãbumy heka reare. Tii iòlòmy heka ronykre, ibutu bede bede iòlòteremy wahe. Ihãre tahe Deuxu ridyre. Raòwònyre heka Deuxu rynana-ò. <sup>6</sup> Hãwyy tahe rahenyre bederahy-ò. Tii 1260 txumy heka tii bederahy-ki bede riekremy. Deuxule heka tii riywinyre.

<sup>7</sup> Biu-ki heka aõbina nihikÿ rÿire. Mieli, ÿju dinodu heka, tajjoi-wana raaõbinanyre aõni-wana tajjoi-wana. <sup>8</sup> Aõni tahe resera tajjoi-wana. Ròtara. Biu-ribi ròhònykemy tahe idi ratxireri. <sup>9</sup> Riteònyre biu-ribi, aõni nihikÿ heka ròhònyra. Tii heka hemylala nihikÿ wese rare. Satanasi inire, Diabo wahe. Itxenadÿÿdu heka rare ibutumy iny. Suki resera, tajjoi-wana. <sup>10</sup> Raholare tahe biu-ribi rybeò-ò: —Deuxu tarasana heka rehemynyre. Tii taruru riteòsinyre iòlòtyhy raremy. Kristu taruru riteòsinyre. Aõbina bina rybedu tahe Deuxu-ò rarybehymy ratxireri, txu-wana, ruwana. Tii tahe ròhònyra biu-ribi. <sup>11</sup> Waityhydÿÿdu seriòre mahãdu heka ròtara Budoeni hãlubu-di, inatyhyna hãletena-wana. Rurukemy ratxireri tiiboho tamydeewikeki. <sup>12</sup> Beysabenyke biu mahãdu. Koityhyxe tahe ahohokÿ, bede-wana. Diabo dori adee rehemynyre. Tii reburere, ibededÿÿnana dori iòhòmy reare.

<sup>13</sup> Iu hemylala aõni heka bedekile ratxirerimy rieryreu, tahe hãwyy tohouã-wana kia-ò aõhòkÿmy rotÿÿnykemy risÿnykemy idi ratxireri. <sup>14</sup> Tahe hãwyy heka nawiihikÿ-ribi idei rihuòtera, tahe idi ruòra bederahy-ò, tasÿ-ò. <sup>15</sup> Hemylala aõni tahe bee sõwemy tary-ribi rarybexinyre hãwyy ribòròbòròdÿÿkemy. <sup>16</sup> Tahe aõkõre. Suu tary riraynyre tahe ibutumy bee riõre. <sup>17</sup> Hemylala aõni tahe reburemy reare hãwyy dee. Ibutumy hãwyy ijoi mahãdu rirubunykemy idi ratxireri. Kia mahãdu tahe Deuxu bede ywina rityhynyre, iwese Jesuisi tuu ritÿÿnyre wese. <sup>18</sup> Tai hemylala aõni ÿnyrakile rÿire.

## 13

<sup>1</sup> Iribi tahe aõniny rabire berawo-ribi ròhònyre warasina-ki. Tii heka debò inatxi reurò iratimy tahe debò wiò iòmy ijòdire. Rataanaõ tahe sohoji sohoji iò-ki rÿire. Irati-ki tahe nibinamy heka rÿire. <sup>2</sup> Tii heka hãlòe wesetyhymy rare. Iwa heka ursowa wesele heka rare. Iry heka hãlòery wese rare. Aõni heka tamy ruru sõwemy riwahinyre, irynana wahe. <sup>3</sup> Iribi heka rabire iratiò, sohoji heka wotòmonahakÿ dire. Tahe reytereri. Ibutumy iny riòtiinyre. Aõni riheludunyre. <sup>4</sup> Aõni hemylala heka taruru riwahinyre aõni-ò. Tai tahe ibutmy iny heka aõni riwowydunyre. Iny rarybere: —Mobo heka aõni wese rare? Mobo ijesedukre? <sup>5</sup> Aõni heka aõbina bina rarybere. Inyò ribyrenyòtyhy. Ahãdu 42 tii heka kiawesemy rÿikre. <sup>6</sup> Tii Deuxu

dee heka aõbinamy rarybere, Deuxusÿ dee, ibutumy biuludu mahãdu tule rybebina-di ribinabinadÿÿnyre. <sup>7</sup> Inyõ tamy ruru sõwemy riwahinyre Deuxu ijoi mahãdu-wana raaõbinadÿÿkemy. Tuu rahaÿnanykemy heka ibutumy iny wixira wixira, ibutumy rybe wixira mahãdu, ibutumy bede bede mahãdu. <sup>8</sup> Ibutumy iny ityhydÿÿdukõdu mahãdu tamy wowydyna riwahinyke. Budoeni Riõre ijoi mahãdu tahe aõkõre, kia dori ini rÿirenyre tyyriti-ki. Juhu bededÿÿnana inireny iwo-ki roire. <sup>9</sup> Tahe inyõ roholakeki heka, boholake. <sup>10</sup> Inyõ ridyke. Rirõtenyke rõtenawo-ki. Ijõ tahe rirubunyke. Deuxu ijoi mahãdu tahe rexityhynykre idi õbitimy roirenyrekremy. Kie.

<sup>11</sup> Tahe ijõ aõnimy rabira. Tii ròtuõreri bede-ribi. Iõ heka inatxire. Budoeni wese heka rare. Ihãre tahe aõni wesele rarybere. <sup>12</sup> Tii juhu aõni wese rare, iruru. Rarybere: —Juhuludu aõni biwowydynyke. Kia ratiwotomona-di. <sup>13</sup> Budoeni aõni heka aõna aõna wiwihikÿmy riwinyre. Tii heõty biu-ribi resekemy tii rotÿÿnyre. Ibutumy iny tuu robire. <sup>14</sup> Tii ibutumy iny riitxenanyre kia aõna aõna wiwihikÿ õraruki. Iny ibutu-õ rarybere: —Suritxooõ nihikÿ biwinyke aõni dee. Tii mayrehe-di rawotõmore hãrele ruruõre. <sup>15</sup> Tahe ihewoludu aõni heka rabunyra suritxoo-õ tahe irumy rÿire. Idi suritxoo rarybere. Inyõ tamy wowydyna riwahinykeki, tii tahe rirubun-nyre. <sup>16</sup> Tii rarybera ibutumy iny-õ: —Kaiboho waritina bitidike aõru-txi, eboreny-txi, ruruweludu wahe. <sup>17</sup> Aõkõkeki tahe aõhoho aõkõ riwyke. Iny kia ritina ijõdiõkeki aõhoho aõkõ rohonykre. <sup>18</sup> Kai erydÿÿna sõwekekile, aõhebo tatÿÿnytemy kaiboho bierybenykre. Kai erydÿÿnadikeki, aõni heka rieryke. Ini heka iritina rarõsõna wese rare 666 ihÿre.

## 14

<sup>1</sup> Idi tahe budoenimy rabire lamamy nyidemy Jerusalẽ hãwã-ki. Aõma Siaõ hãwãlõkile rÿiremy. Tii-wana heka rÿire 144.000 kia inymy heka tii-wana rÿire. Ibutumy tiiboho heka tybynimy, inymy heka ibutumy iõru-ki raritinymy rÿire ibutu õru-ki. Tahe tuu rabire rasinaõmy. <sup>2</sup> Biuwodÿÿ nihikÿmy raholare, tule biuwodÿÿhÿkÿ ada benihikÿ lesetere wese iwodÿÿ rare. Tahe sõwemy iny rawiunymy rare violaõ-wana, kia wodÿÿ wesehekÿle wahe. <sup>3</sup> Kia heka wiu tÿmyra riryrymy ròirenyre kia iny tÿmyra rirahura mahãdu. Kia Deuxu ry-nana nihikÿko-txi heka rotÿÿmynyrenyra. Kia inaubiõwa aõnityhy heka waitue inaubiõwa matuarimy tahe ijõmy rÿire. Tahe 144.000 kia inyle heka rawiun-nykeki, awimy rÿike. Tii dori aõma tarasadumy ratximyhÿrenyke. <sup>4</sup> Tiiboho heka tyra roire, tiiboho heka õbiti roire iwese ijadõma ratxirerimy ihÿre wese õtadu mahãdu aõkõhÿyke. Tahe budoeni riõrehemy heka rare titxibo tii rare hemy. Tii dori wydynamy rare. Kia hãbuy-ribi. Bede ywisidÿÿna juradÿÿna kia dinodumy heka rare. Deuxu heka Budoeni Riõre-wana wahidÿÿnamy heka roiremy. <sup>5</sup> Tiiboho heka raryberenyõtyhy tiiboho ruidu roiremy. Õbiti heka tiiboho roire. Tiiboho heka rahitxirenyre Deuxu dee.

<sup>6</sup> Tasÿ ijõmy rabire ÿjuõmy aõma biuwetyky kiako-txi raramy ruõmy rabirerimy. Tii heka Rybewihikÿ tÿmyra rimymy idi rara aõ inywixira-õ ritÿÿnynykremy. Ibutu bede bede inywixira-õ ritÿÿnynykremy. Ibutu rybe-di ritÿÿnynykremy, Rybewihikÿ tÿmyra wahe. <sup>7</sup> Kiamy heka ryryre: —Deuxu bityhynyke. Marybebenyke tii awi raremy nihikÿ raremy. Bededÿÿnana rehemynymy roire ihitxidÿÿdu bede-õ. Bityhynybenyke tii dori bede ibutumy riwinyre bee, biu ibutumy riwinyre.

<sup>8</sup> Tahe ÿjuõ heka ihewomy ruõmy ratximyhÿre. Babilonia hãwã nihikÿ rexihura. Ibutu iny dori õraruna-txi resera. Kia hãwã mahãdu dori ibutumy iõrarudÿÿnyra.

<sup>9</sup> Iribi tasỹ iwitxira ỹjusỹ tamy nade iheto-ò. Tii tahe ryrmy nade: —Inyõ aõnimy ada iritxoomy rityhynykeki, iribi riwykeki iwotõmona iòru-ribi tebò-ribi riwykeki iritidỹyna, tii tahe Deuxu ykarana heka iribi riwykre. <sup>10-11</sup> Tiiboho heka aõhõkỹmy rotỹnyrenykre ỹjuko-txi. Budoeni Riòreko-txi aõhõkỹmy rotỹnyrenykre. Heòty kia bede dỹynana tyhy tiemy raòwònyhy rarakre. Tiiboho dori tiemy aõnityhy nihikỹle, iritxoo-wana rityhynymyhỹrenykeki, tiiboho heka iritidỹynale ixi-ki riwymyhỹrenyre. <sup>12</sup> Tai tahe ibutumy iDeuxuhe ywina-di heka iwitxira iny ronykemy heka ratximyhỹre. Ibutu aõ òta ibina bina biòludunybenykeny, tiiboho dori aijoi òbitihy boibekemy ikonana-ò. Jesuisi bityhynykeny.

<sup>13</sup> Iribi tasỹ ixityre ijõ rybe-ò raholare watyre-ki. Rarybere: —Kiahe bir-itinyke: Aõ roorehemy aõkõ heka dehemynymy deade. Kia Jesuisi-ò rurure heka uriõno heka tamy dehemynymy deade. Iribi tahe tule rarybere: atyytyby reysamy ratxireri. Myle. Tahe rexielehynymy heka rorukumyhỹrenyre aõhõkỹmy dỹynana-ribi. Tii dori aõwihikỹle riwinyrerimy ihỹre. Reerye heka.

<sup>14</sup> Idi tahe iwitxiramy aõmybo rabire wiribi hitxiramy. Nonoe wetyky urahakỹle wese heka rare. Inyõ ityre-ki ronymyhỹ. Hãbuõ wesehekỹlemy heka rare. Irataanadihikỹlemy ronymy heka tarati-ki heka idi ronymyhỹ. Womati tỹrỹrỹhỹkỹle wesehekỹle irataana rare. Tahe ijõ heka itieresyna-ò-di heka tebòkihikỹle heka rỹire. <sup>15</sup> Ijõ heka Deuxusỹ-ribi nade, ỹjuõ. Tamyhe ryrre: —Bexitỹmyranyke, itieresyna-di tasỹ bexitỹmyranykre. Bededỹynana rehemynymy roire adee aõ biòròòrokemy. <sup>16</sup> Tahe kia nonoe wetyky tyre-ki ronyreriri tahe rexidelenyre riòròrerihe. Riwyrehe ibutumyhe aõna aõna riwyre tahe ributumyhe.

<sup>17</sup> Kia ijõ Deuxusỹ-ki ratxireri tasỹ tule debònadimy ratximyhỹ kia tieresy-nadile ratxireri. <sup>18-19</sup> Kia ỹju aõma heòty kia loo-di ratxireri tahe dyryde heka tieresy-nadile tamy rehemynykeny. Tieresy-nadile biorobeke idi atxibeke. Ibutumyhe bede bede kia biorobeke. Ceifale dori biorobeke. Rubumy dori rỹire hitxidỹyna-ò. Iribi tahe reare. Tiò tiò idi reamy tahyna-ò rabutumy reare kia Deuxu ykarana-ò. <sup>20</sup> Tai tahe bederatyhe risorunyrenyre hãwã-ribi hitximy. Sõwemy hãlubu ròhònyre. Kia urihixina heka sohoji metro weere heka rare. Irehere heka bero wese 300 quilometros irehemy. Awarulomy heka rabeheõmy roire ibero.

## 15

<sup>1</sup> Ijõ aõna aõnamy rabire biu-ki ihewo-ribi riteòsinyreriri. Debò inatxi reuròmỹ ỹjumy heka rimyra kaa aõmysỹdỹyna. Kidiwydenykre heka debò inatxi reurò aõhõkỹmy dỹynanamy. Idi tahe Deuxu ykaranamy rexikonanamyhe roikre.

<sup>2</sup> Iribi tahe bero nihikỹmy rabire wako-txi aõma heòty wese, womati tỹrỹrỹ wese. Sõwemy heka inymy rabire kia sutyre-ki nyidemỹ bero iòhòmỹ. Ibutumy heka aõni debure deburehekỹ kia rubu-ribi ritamy nyide. Iu heka aõni tai roiòhykyre heka, aritidỹyna roiòhykyre heka. Tahe aõma aõnimy rahaỹnanyrenymy ratximyhỹre iritxoomy tule violaõ oworuwodỹkỹhe tai rỹire, Deuxu rawiunyrenyneriri riryryreriri. <sup>3</sup> Moisesi Inynyrỹ deòdu wiu riryryneriri. Tule Budoeni Riòre wiu riryryrenyneriri. Kiamy heka rare: —Oi Deuxu, Kai heka aruru-di tate. Aõni tewinymahãte. Ibutu tarasana tewinymahãte. Ibutu heka ary òbiti rare. Awi heka rare. Kai heka ibutu iòlò tate. <sup>4</sup> Iòlòhyky tanamahãte. Tiiemy heka rityhynymy hyky hyky tanamahãte Inynyrỹbohomy. Wowydyna heka adee riwahinymahãke. Kai sohojile heka òbitityhymy atximahãte. Ibutu bede bede ludu heka anatyhynykeny kede

kedeakre. Ibutumy aõbo tewinyte. Ibutumy bede òbitidỹỹnymahãte heka rieryre.

<sup>5</sup> Kia bedeõ heka Deuxu hetomy roimyhỹre ierykõnamy roimyhỹre. Iwòte ierykõna. Tii heka riraynyrenyre heka kia bede. <sup>6</sup> Kia debò inatxi reurò kia ýjuhe ròhònyre Deuxu heto-ribi. Diwydehe debò inatxi reurò aõhòkỹmy dỹỹnana. Aõma itykyrenyre, linho urahakỹ itykyrenyre. Irawo-di ibreti wereysanamy tahe womati tỹrỹrỹhỹkỹ reare. <sup>7</sup> Sohoji aõniõ aõma Deuxu ykarana hyna sohoji sohoji-ò tamy diwahinyde. <sup>8</sup> Deuxu hetowo heka aõma wàdàhàkỹlemy reare. Loosòna dori iruru dori sòwemy rỹimyhỹ. Tai heka urile roosòhòkỹmy ratỹrỹrỹhỹkỹmy. Inyõ heka iròteõna. Debò inatxi reurò ýjumy. Kia ritxiwimy rexihudile tahe iny ralòke.

## 16

<sup>1</sup> Deuxu hetowo-ribi ijõmy raholare rybetereõ-ò. Rarybereri ýju mahãdu-ò: Boibenyke hewa abede-ò. Debò inatxi reurò hyna bitxiwibenyke kia Deuxu ykarana hynamy. Tahe ýjumy dòhònymy deade tahyna-di ditxiwide bede-ò.

<sup>2</sup> Iribi tahe rexidelenymy reare aõma juhoo ýju ihyna ritxiwire bede-ò. Ýju binahakỹmy ròhònyre ibutu inymyhe robỹtỹmy reare. Kia aõma aõni kia ritina iòru-ki rỹirele kỹnyhe tuu rỹximy. Tule suritxoo rityhynymyhỹrele kia mahãdule heka yyy ýju ròhònyre.

<sup>3</sup> Tahe ihewoludu heka tahyna-di dòhònymy deade. Betyre ritxiwire. Bee hãlubu hukỹlemy reare. Ibutumy bera-ki raremyhỹre ituere.

<sup>4</sup> Juhu ludu hewoludu tahe ritxiwire berohokỹ tyre heka ritxiwire. Bee ibutumy bewydysyna rihòrònyre. Ibutumy hãlubu hukỹlemy relere. <sup>5</sup> Tahe ýju rybe raholare aõhebo bera-ki rotỹỹnyrerì: —Kai Deuxu, Kai awi tate. Kai òbiti tate. Tuhyy ahãte ihãre tahe tuhyy ahãte. <sup>6</sup> Rybe tỹnydỹỹdu mahãdu heka ituere, rurure. Deuxu ijoi hãlubu ritxiwire suò. Katahe rubudỹỹdu kaihe iòwydỹỹdukre. Hãlubu tetxiwiteriki tule iòwydỹỹdukre. <sup>7</sup> Tahe raholare ijõ ýju rarybereri-ò, Xiwena-ribi heka ròhònymy: —Kia InyDeuxu heka ibutumy ruru dìre. Ibutumy tewinyte òbitimy awimy.

<sup>8</sup> Tahe ihewotyhy konana ludu tahe ritxiwire hyna txutyre-ki. Tahe txuu ratòteenyre itòtee nihikỹmy relere. Sòwemy heka iny risòre bedetòtee. <sup>9</sup> Tai tahe rirajuamyhỹre Deuxu nibinahakỹmy rirajuarerimy ihỹre Deuxu dori diteònyde heka bededỹỹnana binahakỹ. Tahe inyõ heka tòhòti rawitxi-ranyòhyre iraykywydyna. Kiamy ixiwesehyy ròhòtinyrenyre. Kia iny heka aõhe rotỹỹnyòhyre wowydyna loosònabo.

<sup>10</sup> Iwixira ýju tahe aõma ritxiwire tahyna aõni ryna tyre. Kia heka aõni beludu rare. Tarynana tyre ronymyhỹ. Tahe ibutu irynanareny torohokỹlemy reare. Ibutu iòlòna torohokỹlemy reare. Tahe tòròtò-ki ruruare taaõhỹkỹhỹkỹnareny-di. <sup>11</sup> Tiiboho heka Deuxu nibinahakỹmy rryre webinadumy roireki taaõhỹkỹhỹkỹnareny-di. Timy heka rexi-nohòtilosanyòhyymyhỹre aõbina binahakỹ riwinymy roiremyhỹ-ribi.

<sup>12</sup> Tahe iwixira ýju tahyna ditxiwide. Eufratesi berohokỹ tyre ritxiwire. Tahe ibutumy heka ruỹre. Oriente iòlò mahãdu dee tahe ryy kia riraynyre. <sup>13</sup> Tuu rabire heka inatxi tyytyby binahakỹ. Rexitykynyre òrò tykyhykỹ wese rexitykynyre. Aõni heka hemylala aõni inire tahe iry-ribi rexiòlòdỹỹnyrenyre. Tule aõnibina wixirary-ribi, tule aõni rybedubina-ribi.

<sup>14</sup> Iribi heka aõni bina tyytyby kia tyytyby ibutumy heka bede dinodu iòlò ributumy. Raaõbinanykemy heka dirahude Deuxu kia mahãdu-ò. Deuxu ihitxidỹỹnatxumy rỹikemy heka anade tii dori ibutu ratyre aõna aõna-ki.

<sup>15</sup> Kristu rarybere: —Tahe boholabenyke. Aõwesele heka anakre. Wasidu



wesemy heka adehemynomy adeakre. Ibutumy iny wararòsòdu mahādu teysamy r̄yikre. Atyky heka biywinymahābenyke tai timyki maix̄yrubenyōtyhy adehemynykreu. <sup>16</sup> Kristu rarybere: —Ibutumy heka widotyde aōbinakedu Mikidu hāwā-ki wahe. Hebreu rybe-ki tahe Armagedom inire.

<sup>17</sup> Tai tahe ikonanatyhy ŷju tahyna ritxiwire yhykile. Tahe raholare biumytxihik̄y raholare Deuxus̄y-ki. Deuxu rynana-ribi dōhōnyde: —Ibutumyhe rakonanamy roire. <sup>18</sup> Tahe biumytxihik̄yle ibutumy rawod̄ȳnyre. Tule biu relaanyra. Biu ramytataōmyh̄yre idi tahe ramytatare. Tii heka lahityhy rare. <sup>19</sup> Tai tahe Babilonia hāwā rabòhòre inataō jura juramyh̄ymy. Ibutumy hāwā nihik̄y-ribi hetohok̄y rejuxunyre. Tai tahe kia Babilonia kia òraru-txi tahe Deuxu tōhōti reare. Tai tahe aōhōk̄ymy ris̄ynymyhȳ ibutumy aōbede binahak̄y tamy riwahinyre. <sup>20</sup> Bedebute ibutumy rexiwore. Iribi tahe hāwālò tytyhyk̄ylemy reare bedero wesehek̄yle. <sup>21</sup> Idi inytyre resemyh̄yre bera ere erewesele resererimy ih̄yre. Ijō iutxie tahe 40 quilo bede heka iutxie rare. Kia tahe iny sumy r̄yire nibinahak̄ymy Deuxumy rarybemy.

## 17

<sup>1</sup> Tahe ŷju monahyna-ki wadee rybemy nade: —Adee arit̄ynynykre aōbo Hāwā Bero sōwe aōhebo rot̄ȳnykré heka. Kia hāwā adee ariteòsinykre timybo rare. Wedena wese aōhōk̄ymy rot̄ȳnykremy. Deuxu heka aōhōk̄ymy d̄ȳnana riwahinyke kia hāwā-ò. <sup>2</sup> Bede iòlò dinodu tamyhe iòraruna tamy rexiòrarunyre. Tule iny bedemy r̄yira mahādu ralòre tamy òtaòtamy. <sup>3</sup> Tai ta kia ŷju tamy riwadyre bederahy-ò. Deuxu Tyytyby wadee dobehede? (Riwatyytamy watyytyby heka ridyre). Tai tahe tuu rabire heka hāwyymy aōma iròdutyre-ki ronyrerimy. Iròdu heka isòhòk̄ylemy roire. Debò inatxi reurò irati r̄yire, tahe iò debò ituemy sōwe. Iritina heka aōkōre rar̄ȳnymyhȳre. Deuxudee heka aōbina binahak̄ylemy tai iritid̄ȳna r̄yimyhȳre. <sup>4</sup> Hāwyy heka isòhòk̄y ityky rare, iwihik̄y rare. Ityky tyre heka womati t̄yr̄h̄ȳk̄y roire. Mana r̄ys̄y wiwihik̄y, woumana-wana. Bemona debò-ki idi rare. Iwo-ki tahe bemonawo-ki tahe aōna bina nibina tai roire. <sup>5</sup> Tai tas̄y iòru-ki tule r̄yire iniō. Aōbo rare tahe iny rieryōtyhy. Babilonia Nihik̄y rare. Ibutu wedenase tii rare. Ibutu inybinase tii rare. Kia luunadu ibutumy bede bede-ki. <sup>6</sup> Iribi tahe rabire hāwyy ixityre. Tii iny hālubu riōre. Ityhyd̄ȳdu mahādu hālubu-di rexiòdewarinomy heka rare. Tiiboho rurure, òbitimy Jesusimy rityhynyreki wahe. Kia hāwyymy tahe rabireu, rexiòtiid̄ȳnyre. <sup>7</sup> Tai tahe ŷju wadee rarybera: —Aōherekibo bede teòtiinomy t̄yite. Adee arelyykre aōbo rare —kia hāwyy iròdu-wana, arit̄ynynykre tiiboho aōbo raré. <sup>8</sup> Iròdu tuu tabita, irumy rare tahe rurukre ele elemy. Tii hāloorehehek̄y-ribi kòdòhònykre. Iribi tahe rexihukre. Tii rurure idi ixiby dòsede. Bede iny mahādu bede riòtiinykre idi heka iròdu debure binamy robirenykreu, bede riòtiinykre idi. Tiiboho dori ini ihoōre iru tyritiwo-ki. Tai tahe iròdu deburebina lau ruberure. Iròdu dori ihetxiu irumy rare tahe wiji aōkōre. Idi tii irumy kanankre ixbybyle. <sup>9</sup> Kia ibutumy adee arit̄ynynykre: Debò inataō rati tahe iròdule rare. Kia hāwyy ityre ronyre kia hāwālò wesere. Iròdu rati tule iòlò mahāduō rare, debò inatxi reurò sōwe. <sup>10</sup> Iruyre iòlòō tahe reserenyre. Sohoji iòlò tahe ratximyhȳre. Ihe-wotyhy ikonanaludu tahe, kanakre wijina. Tai ibeded̄ȳnana iòhòlere. <sup>11</sup> Iòlò debòinataō ludu tahe iròdu rare —kia irumy juhūu rare tahe wiji rurumy rare wahe —tii juhūuu iòlò mahāduō rare. Tii tule ituekre. <sup>12</sup> Debò itue òmy tuu tabitamy wahe tule iòlò mahādu rare. Tiiboho kanakre iòlòwesemy.

Iròdu-wana tiiboho hāwā wedumy ronyrenykre iròdu aōni-wana sohoji horamy. Tii tyytyby bina rare. <sup>13</sup> Tyyritiō riwinykre idi tahe ibutumy ruruna iròdu bina-ò riwahinykre. <sup>14</sup> Raaōbinanyrenykremy heka Budoeni Riòre-wana. Tahe Budoeni Riòre aōbina-ki haỹnadukre. Tahe ýju wadee rarybere: —Tii dori butu iòlò, ibutu iòlòna ratximyhỹre. Ibutu inynyrỹ ratximyhỹre. Ijoi heka kia ywimy tii-wana roire itarasaō-ki. Kia rityhynykremy rỹirerimy ihỹre. <sup>15</sup> Tahe kia ahohokỹ, berohokỹ tai kia hāwyy ronymyhỹré. Tiiboho iny rare ibutu rybe-ribi, bede-ribi wahe. <sup>16</sup> Debòwiò òmy tuu tabita iròdu-wana heka hāwyy derarenyre. Tii irurawonykre. Tii heka heòty-ò risōmy, riròrenykre wiò wiò. Ityky iribi ritara idi. <sup>17</sup> Ibutumy inywese rare. Bede bede iny ibutumy rybe òta òta rarybemyhỹre. Tahe Deuxu heka riwahinyre aōbo ixideewimy riwinykremy. Tai tahe aōwaxiny aō tamywi heka riwinykre. Tai tahe ibutumy iròdu sòhòkỹ taru riwahinykre, Deuxu Rybemyna bede rỹidi. <sup>18</sup> Hāwāhākỹ nihikỹ tabite heka wedena wesemy roire. Kia Hāwāhākỹ heka ibutu wedu iòlò rare.

## 18

<sup>1</sup> Tai tahe ijōmy rabire ýjumy rabire biu-ribi ròhònyreri. Tii sōwemy iruru rare. Tii sōwemy iloosòna rare. Ibutumy bede ritoosònyre. <sup>2-3</sup> Ta rryryre tarurumy tii rryryre: —Babilonia nihikỹ resera! Resera! Katahe aōma wedumy, bede bede iòlò heka tii-wana òta riwinyre. Ibutu iny-ò tamona riwahinyre iòtaòta boho boho. Nawii wixira wixira ibinahakỹ tai rasỹnymyhỹre, tyytybybina-wana. Ijohodu mahādu idi nieru sōwemy ributunyre. Idi rexytyhynyre.

<sup>4</sup> Iribi tahe raholare ixityre rybeō biu-ribi rarerí. Manake hewa, Bòdòhònyke wa kia hāwyy-ribi. Kai heka waijoi toite. Tii-wana bexiòrarunybenykemy aōkō! Bexiòrarunybenykeki tii-wana, tai tii-wana aōhòkỹmy botỹỹnykre. <sup>5</sup> Tii heka iòraru sōwe nihikỹmy ratximyhỹre. Deuxu heka aōhòkỹmy dỹỹnana tamy riywinymy ratximyhỹre iòraru-ki. <sup>6</sup> Biwinymyhỹre heka iwese tii riwinymyhỹre wese. Aō ibinamy ibinatyhymy tamy relekre. <sup>7</sup> Aō ibinamy ròhònyke inatxi bededỹỹnanamy tamy ròhònykre. Ibutumy aōbo tamywimy idi raremyhỹ heka riwinymyhỹ ixideewimy. Katahe iwese aōhòkỹmy rotỹỹnykre tahe rabadewokre. Hāwyy tahe ixidee rarybere: —Jikarỹ ikòlò rare. Wytese anokō jikarỹ rare. Tiku heka rabadewokòtyhy anohòkỹmy ratykỹnykòtyhy. <sup>8</sup> Tai taheka aōwesele heka tamy bedeòtiidỹỹdu kedehemynymy bedekre: rubu, aōdese, rama uritereribile tamy kedehemynykre. Heòty ibutumy ritoonykre. Deuxu urihixina-di dehuu ratximyhỹre. Tii ruru-di ratximyhỹre. <sup>9</sup> Kia bede dinodu mahādu rahinykre itòenamy. Tii-wana dori òta òta riwinyrenyra. Tiiboho robikre wàdà iribi ròhònyreriò wahe. <sup>10</sup> Irehemy iribi rỹire. Ruberureri iaōhòkỹmy dỹỹnana lau. Tahe raryberenyre: —Babilonia hāwā, kai hāwā nihikỹ rare. Tahe wiji ituera atximahāte. Kobelàhàxe. <sup>11</sup> Ibutumy aōna-ribi ijohodu rahinykre itòenamy. Inyò dorihe iaō tamy riwydyōmy tamy ijhonamy aōkō. <sup>12</sup> Juhuu heka raaōbradỹỹmy aōma iny mahādu ratyre. Womati tỹrỹrỹ riòbranyòre. Tule woumana riwyrerimy ihỹre juhuu. Tykyisòwihikỹ wixira wixira heka riwyrerimy ihỹre. Tule òwòrulỹnyre, iròdu nohōmy riwinyrerimy ihỹre. Bede ritxoo ibutumy aōna iòwyhykỹre. Womati òta òta wiwihikỹ riwyrerimy ihỹre. <sup>13</sup> Aōma rỹsỹna uri wiwihikỹ tule aderòna wiwihikỹ, tule vỹi riwyre, paō widỹỹna, adỹỹ-wana riwyrerimy ihỹre. Tule maixōmo, broreni, budoeni, awaru, tewe, ityti heòty, tule iny deòdu iòwydimy. <sup>14</sup> Tahe ijohodu mahādu rarybere hāwā-ò: —Ibutumy aōna aōna wiwihikỹ ituera, kia kaiboho riwyrerimy ihỹre. Tiu ixityre aōna aōna riwyòtyhy, ixāwira.

15 Tahe aõna-di ijohodu mahãdu rabadewokre, rahinykre tiiboho dori iòraru-ki raityhynyreny. Irehe-ribi retehere. Ruberurenyre. Ryryreri: 16 — Kobelàhàxe hãwã wihikỹ. Ibutumy atykysò ituera, awomati wiwihikỹ ituera, woumana, manawiwihikỹ ibutumy ixãwire. 17 Sohoji òraule ibutumy iaõna aõna ixãwira. Ibutumy hãwòhòkỹ dinodu urile, iwiòhenadỹỹdu mahãdu tule suludu mahãdu retehereri irehe-ribi. Tii dori nieru ritamyhỹre iaõna-di. 18 Iu hãwã wàdàsìmy robirenyreu tahe, ryryre: —Kia hãwã wihikỹ rare. Ijõ hãwã iwese ihoõhyyre. 19 Tahe brybysi ityreneny rehurerimy ihỹre. Rahinyreri, ryryreri: —Bobrekỹ, bobrekỹ hãwã wihikỹ. Aõwesele heka ixãwira. Ibutumy ityhy mahãdu, iaõna rexihura. 20 Tahe kaiboho beysabenyke biu ludu mahãdu. Hãwã nihikỹ dori ituera. Deuxu hõrõ mahãdu, Deuxu deòdỹỹna mahãdu, Deuxu dee rybedu mahãdu ibutumy beysabenyke. Deuxu dori iaõhòkỹmy dỹỹnana tamy riwahinyre aòrauru-ki.

21 Tahe ýju nihikỹ heka manaõ rimyre, mana nihikỹõ, iwese maixõmosyna mana wese wahe. Idi rehure ahobero-ki rehure. Tahe ryryre: Kiawese heka Babilonia hãwã-di arehukemy watzireri waruru-di. Ixãwikre. 22 Tahe wiu wodỹỹ kia hãwã-ki roholaõtyhyke, harpa wodỹỹ aõkõ, flauta wodỹỹ aõkõ, jurõna wodỹỹ aõkõ. Aaõmysỹdỹỹdu aõkõ kia hãwã-ki raaõmysỹdỹỹõtyhy. Mai rỹỹna, manasya iny heka iwodỹỹ roholaõtyhy. 23 Loosõna ay-ki ri-toosõnyõtyhy. Herina mahãdu rybe ay-ki iny roholaõtyhy. Iaõna ijohodu mahãdu ibutu hãwã-ribi ityhy rare. Tule ibutumy iny riitxenanyre aòtaòta-di, bede bede iny wahe. 24 Babilonia hãwã heka aõhòkỹmy dỹỹnana rotỹỹnyre. Deuxu rybedu mahãdu hãlubu dori kai tetata tule Deuxu hõrõ mahãdu. Rirubunyre mahãdu wahe.

## 19

1 Iribi tahe ijoi nihikỹmy roholare. Ryrymy heka rỹimyhỹ sõwemy iny rỹimyhỹ biu-ki. Deuxu deysanamy heka ryryreri: —Wowydynamy Inynyrỹ-ò. Tarasana dori inyDeuxu-ribi rare. Wowydyna, ruruna ibutumy ihõrõle rare. Aõbo tii riwinyré, òbiti rare. 2 Aõhòkỹmy dỹỹnana òbiti rare. Aõhòkỹmy rotỹỹnyre heka kia aderana-ki heka rare. Tii aõhòkỹmy dỹỹnana ritare. Bede iny heka riòrarudỹỹnyre. Tahe Deuxu riòwinyre teòdu rubudỹỹna heka riòwinyre. 3 Ixityre ijoi ryrynyre, rawiunyre: —Wowydyna Inynyrỹ-ò. Wàdà raòwònyreri tai rawòsi-ribi. Ihyyemy raòwònykre, hãwã nihikỹ-ribi wahe. 4 Tahe ibutumy rejuxunyre Deuxu luukemy. Wawiò inaubiòwa matuari rare. Tule inaubiòwa aõni rare. Deuxu tahe rynana nihikỹ-ki ronyre. Tamy rirajuare: —Kia, Kia, wowydyna deysana Deuxu-ò. 5 Iribi heka ròhònyre Deuxu rynana nihikỹ-ribi heka rybeunimy ròhònyre: —Biwowydynybenyke Deuxu-ò ibutumy deòdu mahãdu, ibutumy iny rityhynymyhỹre mahãdu, iyja ta nihikỹ-wana. 6 Tahe ixityre ijoi-ò raholare. Ryrymy rỹimyhỹre. Tahe benihikỹlesetere wese heka iwodỹỹ rỹireri, biumytxi wesehekỹle heka iwodỹỹ rỹireri: —Wowydyna Inynyrỹ-ò biwahinyke. Tii iruru dire. Tii heka iòlò rare. 7 Ibutumy iny rekeysarenyke. Tamy wowydyna rikiwahinyrenykre. Tii dori inihikỹre. Iòhòra dori kia Budoeni Riòre kia hãwyyemy herina kia bededỹỹnana-ò. Worana bedehesi kỹnykre. Ihãwyy heka rexiywinyry ratxireri. 8 Tyyurahakỹle-di rexiyyynykre. Awityhymy ity doimyhỹde wahe. Deuxu dee awihikỹ widỹỹna wese heka kia ratxireri. 9 Kiamy heka ýju wadee rarybere: —Kia biritinyke. Ibutumy lobidỹỹna mahãdu reysamy ratxireri. Ýju wadee rarybere ijõ: —Kia heka Deuxule tuu rarybere. Inatyhy rare! 10 Tahe jiarỹ resere ýjuko-txi ariwowydynykemy. Tahe tii wadee rarybere: —Kia widỹỹõmyke hewa. Jiarỹ tule Deuxu deòdule heka jiarỹ rare, awesele

wahe. Aityhydÿÿdu seriòre tule awesele rare. Rarybemyhÿre dori Jesuisi tyhydÿÿnamy. Deuxule biwowydynyke! Ibutumy Jesuisi relyyre heka tuu rybedu mahãdu ritÿnynyre.

<sup>11</sup> Iribi tahe tuu rabire awaruurahakÿõ biuwetyky-ki. Inyõ ityre-ki rononymhÿ. Ini heka Òbiti rare, Inatyhy rare. Tii heka aõbinanymhÿle rare. <sup>12</sup> Irue heka heòty wesele rare. Irati heka sòwemy raheto rÿire. Iò-ribi heka nii roire, ini wahe. Urile inyõ rieryòtyhy mobo ini rare, tyyriti wixira dori tiile heka rieryre. <sup>13</sup> Ihety heka hãlubuhukÿle-di ityre rare. Deuxu Rybe heka inire, hãbu wahe. <sup>14</sup> Sòwemy iny heka awarutyre-ki rÿire, biu-ribi dòidenyde Deuxu Rybe hewomy, soldado wese wahe. Iny ibutumy ityyura-di rexityynyre, ityratyhy wahe. <sup>15</sup> Tii heka mayrehe rabuhukÿle iry-ribi ròhònyrerimy ihÿre. Idi tii heka iny rirubunykemy ibutu bede bede-ò. Iribi tahe tii ròhònyre iòlòtyhy tii rare. Aõhòkÿmy dÿÿnana tamy riwahinyre, ibinatyhymy heka riwahinyre, Deuxu iwona, Deuxu ruruwedu wahe. <sup>16</sup> Ihety-ki heka iti-ki rÿire iniõ: Iòlò iòlò wedu tii rare, ibutu wedu wahe.

<sup>17</sup> Iribi tahe ÿjumy rabire, txu-ki rÿire. Nawii ibutu-ò ryrymyhÿ: —Bòdòibedenyke heka, Deuxu worana bedehesina-ò bòdòike rÿsÿna birÿsÿbenykemy. <sup>18</sup> Aõmade biròbenyke, iòlòde, soldadu wedude, iawarude, ibutumy inyde biròbenyke, ixihy mahãdu, deòdu mahãdu, nihikÿ iyja-wana.

<sup>19</sup> Iribi heka tuu rabire aõni binahakÿ, iòlò mahãdu, tasoldado mahãdu wana. Wii ributunyre aõbinamy. Awaru tyre-ki ronyrerimy kia mahãdu-wana tiiboho raaõbinanykremy. <sup>20</sup> Tahe aõni bina rimyrenyre, rybedu bina-wana. Teròwmy tii aõna aõna wixirawi riwinyre. Iribi ridyrenyre heka heòtyaho-txi idi rehurenkremy, enxofre-di riworonyre wahe. <sup>21</sup> Ibutumy isoldado heka ituemy rÿimyhÿre rurumy. Mayrehe-di rurumyhÿre, kia awaru ura tyre-ki ratxireri kia ryribi ròhònyreri kia-di rurure. Tahe rararesa deadeade ide riròkremy.

## 20

<sup>1</sup> Iribi tahe ÿju nademy biu-ribi. Irayna heka debò-ki idi rÿire. Hãloonihikÿ rayna wahe. Tule womati rerotihikÿle iruty-ki roire. <sup>2</sup> Kia aõni rimyre, Diabo wahe, Satanasi wahe. Inyõ tule hemylala raninire. Tahe 1000 beòra riekre ritaataare womati reroti-di. <sup>3</sup> Idi heka rehure hãloo nihikÿ-ò tahe riratòbònyre, rirarytxynyre. Tai tahe tii riitxenanyòtyhy bede bede iny. Kia 1000 beòramy bede reakreule, tahe rexihumy iròtena. Urihimyò bededÿÿnana bede riijekre, ixihyyle tai ixybyle ròbòdÿÿkre.

<sup>4</sup> Iribi tahe rynana sòwemy rabire. Iny ityre ronyreri mahãdu ywisidÿÿdu mahãdu heka rare. Iribi heka tuu rabire Jesuisi dee rurure mahãdu. Inatyhyna rybe tÿnydÿÿ òraru-ki heka rurure. Aõni rityhynyòre, iritxoo rityhynyòre, iritina òraru iòru-ki ritidiòtyhy, deboreny-ki ritidiòtyhy. Rubu-ribi tiiboho rexixarenyre. Kristu-wana ratxireri 1000 beòramy. <sup>5</sup> Kia heka juhuludu ixixana heka rare. Ijò rubu mahãdu heka wiji rexixaòkre. Tahe 1000 beòramy reareu, tahe rexixarenkre. <sup>6</sup> Juhuludu ixixana mahãdu heka reysatyhymy rarekre. Ixyby rubunamy heka ruruòkre, inatxina rubunamy wahe. Deuxu dee, Kristu dee heka tiiboho Xiwena wahidÿÿdumy roirekre. Tii-wana 1000 beòramy riwyrenkre, iòlò mahãdu wesemy heka ratxirenkre.

<sup>7</sup> Kia 1000 beòra reareu heka Satanasi ixihyymy ròhònykre bede-ki. <sup>8</sup> Tii itxenadÿÿdumy ròhònykre ibutu iny riitxenanykremy. Kia Kòke bede, tule Makòke bede rare. Satanasi heka sòwemy iny ributunykre raaõbinanykremy. Tiiboho sòwemy ihÿre ÿnyra sòwe wese. <sup>9</sup> Tiiboho tahe ibutu bede-ò rariarenkre ityhydÿÿdu hãwã rirurawonyrenyre kia Deuxu hãwã Deuxudeewi

wahe. Idi heòty biu-ribi isõrenymy desede. Idi wewòsimy rururenyre, Deuxu iny mahãdu òludu wahe. <sup>10</sup> Tahe diabo iitxenadỹdureny heka Deuxu rehure heòty aho-ò. Tai aõnibina, ruimy rybedu-wana juhu delemy tamy reserenyre. Tai txumy rummy aõ rotỹnyrenyhykre.

<sup>11</sup> Iribi tahe ryanaurahõkỹmy rabire ityre rỹdu-wana. Suu biu-wana iribi rexitare, titxibo iõrenyre. <sup>12</sup> Tahe iny rubumy rabire, iny ibutumy iko-ki rỹirenyre. Tyyriti rarayre. Ijõ tahe rarayre, irutyriti wahe. Tyyriti-ribi Deuxu iaõna aõna rierymy aõhebo risỹnykre. <sup>13</sup> Ahohokỹ-ribi tahe rubu mahãdu dòhõnyde. Rubunahakỹ bede-ribi iludu mahãdu dòhõnyde. Idi iaõna aõnamyna Deuxu timybo rexinohõtinkyremy idi rare. <sup>14</sup> Idi rubunahakỹ, rubuna-wana heòtyaho-txi idi adehu rỹikre. Kia ixyby rubu rare. <sup>15</sup> Iru ityyriti-ki inyniõ roiõkeki, tii tule heòtyaho-txi adehu rỹikre.

## 21

<sup>1</sup> Idi biu tỹmyra sutỹmyramy rabire. Juhusu juhubi titxibo ikõrenyre, ahohokỹ tule. <sup>2</sup> Deuxu hãwã wihikỹ tỹmyra desemy nade biu-ribi. Iwese ijadõma tỹmyrawesemy ramyhỹre wese kia hãwã nade. Deuxu-ribi nade. <sup>3</sup> Tahe rybehekỹ biurynana rỹdu-ribi nade-ò roholare kiamy: —Kahe Deuxu sỹ heka akireny rare. Deuxu ikyreny-ki rarekre. Tii iwedurenykre. Tiiboho Deuxu dee roirekre. <sup>4</sup> Idi Deuxu irubereny risuhokre. Tai rubu, hii, ibru, txuberere ijõõkre. Bede tyby dori rexihura. <sup>5</sup> Idi ryanana-ki rỹdu narybede: —Wiji itỹmyramy ibutumy aõna aõna ariwinykre. Wadee tule narybede: —Kia bityyritinyke. Kaa rybe dori rybetyhy rare, ibutumy iny ratyhykremy. <sup>6</sup> Kia ixyby narybede: —Ibutumy relera. Jiarỹ dori AA rare YY rare Juhuludu rare ikonanaludu rare. Inyõ bemomo risakeki, tamy iòwykõlemy ariõkre, beòlõnaberu-ribi wahe. <sup>7</sup> Inyõ tarasadu heka ibutumy waribi rimykre. Jiarỹ iDeuxukre. Tii wariõkre. <sup>8</sup> Idi kamahãdu heòty aõho enxofre-ò rekoarenyre kamahãdu wahe: —Iny brebu, watyhydỹkõdu, òrarudu, maleerudu mahãdu, òta òta mahãdu, iny rubudỹdu mahãdu, hãri mahãdu, ritxoo tyhydỹdu, ruidu mahãdu. Kaboho rubunatyhy-ò rururenykre. Kia tahe inatxina rubuna rare.

<sup>9</sup> Tahe ýjuõ wadee nade, debò inatxi reurò mahãdu-ò. Tii hyna-di ryireri. Hynawo-ki tahe aõna aõnabina debò inatxi mahãdu-di. Kiamy narybede: —Mana ini, Budoeni hãwyy ini adee ariteòsinykre, hãwyy wese wahe. <sup>10</sup> Deuxu Tyytybytyhy wamy reare. Ýju tahe riwadyre hãwãlõnora-ò. Jerusalẽ hãwã tỹmyra awityhy wadee riteòsinyre. Tii biu-ribi desemy nade. <sup>11</sup> Deuxu loosõna-di yla aõkõ. Tii tahe manawiwihikỹ wese rarỹnymyhỹre. Jaspe wese, womati wese mana wihikỹ wese rare. <sup>12</sup> Tii ijõtòbõna irariere, waòinatxi reuròmý ijõtòbõna, iitxedu ýju tule. Ijò-ki tahe waòinatxi reuròmý Judeusỹ mahãduni wahe. <sup>13</sup> Inataõ ijõtòbõna sõwe, iraro-ò, ibòò, biura-ò, beà-ò. <sup>14</sup> Hãwã rurawona tahe waòinatxi reurò mana tyre-ki rỹimyhỹ. Mana sohoji sohoji-ki budoeni deòdu mahãduni rỹire. <sup>15</sup> Ýju wadee rybedu tebò-ki womati tỹrỹrỹhỹkỹ deòho-di nade idi hãwã, hãwã ijò, hãwã rurawona iurihinamy. <sup>16</sup> Hãwã tahe iurihina wiwesele rare. Tahe 2.200 iurihixina rimyre teòho-di tuu riwinyre. <sup>17</sup> Rurawona raru tahe ýju taurihixinamy riurihixinanyre idi 64my rimyre. <sup>18</sup> Rurawona tahe jaspe mana-di relere. Hãwã tahe womati tỹrỹrỹhỹkỹ-di relere. <sup>19</sup> Rurawo òraru heka mana wihikỹ-di juhumana heka jaspe rare. Inatxina safira rare. Inataõna, agata rare. Inaubiò-wana esmeralda rare. <sup>20</sup> Iruyrena sardonio rare. Debò sohoji reuròna sardio rare. Debò inatxi reuròna trisolito rare. Debò inataõ reuròna berilo rare. Debò inaubiò-wana topazio debò ituena crisoprazo rare. Wasohoji reuròna jasinto rare. Wainatxi reuròna ametista rare. <sup>21</sup> Woumanahakỹ sohoji-di heka ijò

sohoji sohoji relera, 12my ijò wahe. Ryy heka womati tÿrÿrÿhÿkÿÿhyky-di relera. <sup>22</sup> Tohodÿÿna heto tahe ihoõhyyre. Deuxule dori tuu rare, Budoeni-wana. Tai ihoõre. <sup>23</sup> Txuu ahãdu-wana tai ijõõre Deuxu loosona, budoeni loosona dori itxuuxaranarenyre. <sup>24</sup> Bede bede mahãdu iloosona-di rÿikre. Bede bede mahãdu heka taaõna aõna wiwi-di tamy kidirahukre. <sup>25</sup> Tahe ijò raratòbòõhykre, tai dori ruu ihoõhyyre. <sup>26</sup> Bede bede iòlò mahãdu heka wowydyna-di tamy kidirahukre. <sup>27</sup> Inybina bina, iny òrarudu mahãdu tamy ralòõtyhy, ruidu mahãdu tule. Inyni heka Budoeni tyyriti irumy rÿimyhÿre mahãdu sohojile wahe.

## 22

<sup>1</sup> Idi ÿju wadee riteòsinyre, iru wahidÿÿna berohokÿ. Ibelyramy Deuxu ryanana, Budoeni ryanana-ribi òlòdu wahe. <sup>2</sup> Ryrohokÿ tya-di kaa bera namyhÿde iwyòwyò-ki iruwahidÿÿna bederarade rÿimyhÿ. Tii bederarade waò inatxi reuròmÿ raratynyre. Kia ta ahãdu ahãdu-di sohojile raratynyre. Otxirarade tahe bede bede mahãdu deytana rare. <sup>3</sup> Kia hãwã-ki ihetxi txuhòbina tai ijõõkre, Deuxu aõ ritxuhònyõra tai. Deuxu ryananahakÿ itya-ki rÿikre. Kia teòdu mahãdu riwowydynykre. <sup>4</sup> Tiiboho iòsÿnymy robikre inireny iòru-ki rÿikre. <sup>5</sup> Tai ruu ijõõkre. Tai txuloosona ijõõkre. Deuxu dori itxurenykre. Tiiboho tai ihyyimy rÿikre iwese iòlò mahãduõ.

<sup>6-7</sup> Kia tahe ÿju wadee rarybere: —Kaa rybe tahe inatyhy rybe rare. Bityhynybenyke. Jesuisi rarybere: —Analekre heka tule adehemynylekre heka. Deuxu heka taÿju deòdu adee kanarybekre. Kaheka wylemy ibed-edÿÿnana kedeakre. Deuxu rarybehyy ratximyhÿre tÿnydÿÿdu mahãdu-ò, aõhebo bede rotÿÿnymyhÿkremy roimyhÿré. Ibutumy kia tyhydÿÿdu mahãdu heka reysamy rÿikremy rÿira.

<sup>8</sup> Jiarÿ tahe Joaõ rare. Rabirahe, ibutumy kia raholare. Rabimy rexi-hurau tahe, jiarÿ watiowotimy resere ÿjuko-txi. <sup>9</sup> Ixityre wadee rarybere: —Iwidÿÿòmÿ hewa, Jiarÿ heka Jesuisi deòdu tÿnydÿÿduõle jiarÿ watzireri. Ibutumy Deuxu tyyriti ityhydÿÿdu biòwa jiarÿ rare. Deuxule bityhynyke.

<sup>10</sup> Tahe ÿju ijòmÿ wadee rarybere: —Aõbo teritidÿÿnyteri ibutumy iny-ò rybe bitÿnynyke. Kia bededÿÿnana iòhòlemÿ ratxireri. <sup>11</sup> Kia bededÿÿnana kedehemynykreu, aõbina bina widÿÿdu heka aõbinale riwinykre. Iny bin-abina heka, ibinamy rÿikre iu. Inywiwihikÿ tasÿ awimy rÿikre iu. Kia òbitimy rÿira tahe, awityhymy relekre, òbitityhymy rÿira. <sup>12</sup> Boholake warybe-ò, aõwesele heka anakre. Uriõno heka adiwymy wadi anawãhãde. Aõbo wadee aõ riwinymyhÿre wahe iwese aõbo riwinymy raremyhÿwesemy heka araòwynykre. <sup>13</sup> Jiarÿ heka AA jiarÿ rare. YY tule jiarÿ rare. Tyyriti juhoo rare. Tyyriti konana rare. Jiarÿ heka juhuludu rare. Ihewoludu tule jiarÿ rare, ibutumy wahe. <sup>14</sup> Ibutumy tatyytyramy rÿira —teysamy rÿira. Tiiemy teysahyyhy rare. Iru òwòru wahidÿÿna bederaty heka ritokre. Tule rarònyrenykre kia hãwãhãkÿ-ò. <sup>15</sup> Ibutumy òrarudu mahãdu tule òwòru widÿÿdu tahe irehemy Deuxu hãwã-ribi nyimyhÿde. Tule iny rirubunymyhÿre mahãdu, tule suritxoo luunadu mahãdu, tule ibutumy ruidu mahãdu. Ibutumy irehemy hãwãhãkÿ-ribi roimyhÿre.

<sup>16</sup> Jesuisi heka jiarÿ rare. Waÿju reteònyre adeereny kia aõnaaõna bed-edÿÿnana relyykemy. Kaiboho heka dohodÿÿna heto mahãdu-ò relyyrenyke. Jiarÿ iòlò Davi juhu rare, tule Davi riokore rare. Biurasò taina Jiarÿ rare, loosona rare.

<sup>17</sup> Deuxu Tyytybytyhy rarybere: —Manake! Tule hãwyymy hãbumy heridu tule rarybere: —Manke! Ibutumy ijohodu tule marybeke: Jiarÿ, Juaõ, tule

rarybere: —Manake! Ibutumy iny bemy rurumyhỹre mahãdu tule manake irube biõke. Iòwy-di aõkõ heka rare.

<sup>18</sup> Jiarỹ, Juaõ, rarybere ibutumy iny katyyriti rariamyhỹre mahãdu-ò. <sup>19</sup> Iny ributunyekiki aõmybo kaki ritydỹỹna roiré, Deuxu tamy bededỹỹna binahakỹõ riwahinykre karitidỹỹna roireki. Inyõ karitidỹỹna-ribi ritakeki, Deuxu òwòru runa ijuraõ wahe heka iribi ritakre tule Hãwãhãkỹtyhy-ribi nadedi wahe. Tai rỹire tyyriti-ki.

<sup>20</sup> Tule aõmybo narybede inatyhymy tule rarybekre (Jesuisi wahe): —Analekre hewa idi. Araroorehenyõtyhy. Juaõ, tule rarybere: —Kie, Manake Wanyrỹ Jesuisi.

<sup>21</sup> Deuxu deysana, Inynyrỹ Jesuisi Kristu kia deysana ibutumy adee kanakremy watxiwahãre.